


# Waitare Wenati Aho



New Testament in Parecís (BR:pab:Parecís)

**Waitare Wenati Aho**  
New Testament in Parecís (BR:pab:Parecís)

copyright © 2012 Wycliffe Bible Translators, Inc.

Language: Parecís

Translation by: Wycliffe Bible Translators, Inc.

Parecís [ pab], Brazil

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Parecís

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2019 from source files dated 20 Dec 2018

6c7be6d9-c7f4-528f-bc3f-f1e6ef0d9943

## Contents

Mateus . . . . .	1
Marcos . . . . .	56
Lucas . . . . .	91
João . . . . .	148
Atos . . . . .	191
Romanos . . . . .	241
1 Coríntios . . . . .	264
2 Coríntios . . . . .	287
Gálatas . . . . .	301
Efésios . . . . .	309
Filipenses . . . . .	317
Colossenses . . . . .	322
1 Tessalonicenses . . . . .	327
2 Tessalonicenses . . . . .	332
1 Timóteo . . . . .	335
2 Timóteo . . . . .	341
Tito . . . . .	345
Filemom . . . . .	348
Hebreus . . . . .	350
Tiago . . . . .	366
1 Pedro . . . . .	372
2 Pedro . . . . .	378
1 João . . . . .	382
2 João . . . . .	388
3 João . . . . .	389
Judas . . . . .	390
Apocalipse . . . . .	392

## Mateus

*Jesus Nahetakomaniyereharenai  
(Lucas 3.23-38)*

<sup>1</sup> Exe baberakoa kaxairatyaka Jesus Cristo nahetakomaniyerenai nexare. Jesus Cristo atyo Davi jikolahare, Davi atyo Abraão jikolahare.

<sup>2</sup> Abraão atyo Isaque kaisani,

Isaque atyo Jacó kaisani,

Jacó atyo Judá kaisani, iximarenenai enaxenanenai xoaha kaisani.

<sup>3</sup> Judá atyo Peres, Zera xoaha kaisani,

Tamar atyo inityoha.

Peres atyo Esrom kaisani,

Esrom atyo Arão kaisani.

<sup>4</sup> Arão atyo Aminadabe kaisani,

Aminadabe atyo Nasom kaisani,

Nasom atyo Salmom kaisani.

<sup>5</sup> Salmom atyo Boaz kaisani, inityo atyo Raabe.

Boaz atyo Obede kaisani, inityo atyo Rute.

Obede atyo Jessé kaisani.

<sup>6</sup> Jessé atyo Davi kaisani hoka Davi atyo xekohaseti kalorexe tyaona.

Hatyaoseta Davi atyo Salomão kaisani, inityo atyo Urias ene exanityo.

<sup>7</sup> Salomão atyo Roboão kaisani,

Roboão atyo Abias kaisani,

Abias atyo Asa kaisani.

<sup>8</sup> Asa atyo Josafá kaisani,

Josafá atyo Jorão kaisani,

Jorão atyo Uzias kaisani.

<sup>9</sup> Uzias atyo Jotão kaisani,

Jotão atyo Acaz kaisani,

Acaz atyo Ezequias kaisani.

<sup>10</sup> Ezequias atyo Manassés kaisani,

Manassés atyo Amom kaisani,

Amom atyo Josias kaisani.

<sup>11</sup> Josias atyo Jeconias kaisani, iximarenenai xoaha kaisani Israel yerenai kaxolatyakaha

hoka kakolatyakehenahere Babilônia xeta xowakiya.

<sup>12</sup> Hatyo Babilônia xeta kakolatyakehenahere najikinita Jeconias atyo Salatiel kaisani, Salatiel atyo Zorobabel kaisani.

<sup>13</sup> Zorobabel atyo Abiúde kaisani,

Abiúde atyo Eliaquim kaisani,

Eliaquim atyo Azor kaisani.

<sup>14</sup> Azor atyo Sadoque kaisani,

Sadoque atyo Aquim kaisani,

Aquim atyo Eliúde kaisani.

<sup>15</sup> Eliúde atyo Eleazar kaisani,

Eleazar atyo Matã kaisani,

Matã atyo Jacó kaisani.

<sup>16</sup> Jacó atyo José kaisani hoka José atyo Maria exanene. Hatyo atyo Jesus nityo, Kalorexe

Enore Aohenere nityo atyo Maria.

<sup>17</sup> Nikare enahetakomaniyerenai hoka Abraão ta exakerexe kaxihatayakaha Davi tyaohenere kijiya hoka 14-hareha. Nikare Davi ta kaxihatayakehenahitiyaha, Babilônia

xeta kakolatyakehenahere kijiya hoka 14-hareha tehitia. Hatyo kakolatyakehenahere najikinita kaxihatyakehenahitiyaha, Cristo tyaohenere kijiya hoka 14-hareha tehitia.

*Jesus Cristo Nawenane Tahi  
(Lucas 2.1-7)*

<sup>18</sup> Jesus tyaohenere atyo exakerexe: inityo Maria tyaohenere José kakoa nahitita tifalo, Enore nisekohare nikare mokene. <sup>19</sup> Tifalo hoka hatyaoseta José maisa tyaona ekakoa aokowihitita. Hoka José atyo waiyexehare hoka maisa Maria kairaehalotyaka aokita hoka hatyo hiyeta memereta emaisaheta hawenakakoaneha aokowita hoka maisa kasemakita maheta.

<sup>20</sup> Hatyohare tahi ahekoita ene hoka Enore xaxikala anjo kaotyaka enomana inijihi-nako hoka nexa ihiye: — José, Davi jikolahare, awa atyo hamaikohare hawenane Maria kakoa tahi, Enore nisekohare atyo atifalokisene. <sup>21</sup> Awenakisaite haisani enamokose. Tyaonaite hoka maika hakaixaretene Jesus. Hatyo atyoite iyehetehena haliti haomanerenai iniyalahare enómanehe nonitata — nexa.

<sup>22</sup> Tyotya nikare tyaona, iraiti xakaisasehare xakaitere akerexeta kawenatyakeheta maheta. <sup>23</sup> Exakere iniraine xairatyoare tyaonita iraiti waiyexe nanekoa:

Ohiro mawatyalisakahaloite tifalo hoka awenakisaite enamokose hoka enexare ite Emanuel.

Wiyako maniya atyo, “Enore tyaonita winekoni”, nita.

<sup>24</sup> Hatyaoseta José kaose hoka Enore xaxikala anjo iraetere ekakoa akereta hatyaonero Maria kakoa tyaona. <sup>25</sup> Xakore hoka maisa atyo watyaliyene hekoti tyaohenere ityani kijiya. Tyaona ityani hoka José atyo Jesus nexarexe kaixaretya xoima.

## 2

*Ewaiyasenai Tyoaha Kamai Nihikoane Maniyata*

<sup>1</sup> Jesus tyaona wenakalati Belém nali, Judéia koa nali, Herodes xekohaseti tyaonitere xowakiya. Hatyo xowakiya Jesus tyaona najikini haiyanai halitinai tyoaha kamai nihikoane maniyata Jerusalém nali xeta. Waiyoreta xoresenai kakoa hatyo kaokiterenai hoka <sup>2</sup> kaokaha hoka nexaha, — Aliyako tyaona xoima judeunai xekohase maheta? Wiyaiya exoresera kamai nihikoane maniyata hoka wisoa wawaiyetene wimaxalo ekakoa maheta — nexaha axahene.

<sup>3</sup> Hatyo tahi sema xekohaseti Herodes hoka amaikohare, tyotya hatyo Jerusalém tyaoniterenai tehitia amaikohareha.

<sup>4</sup> Hatyaoseta Herodes ahohisakoatya sacerdotenai xekohasenai, Moisés xaotyakira kakoa waiyoreterenai xoaha hoka axahene: — Aliyekoa Cristo nawenane xaokita? nexa axahene.

<sup>5</sup> Hoka nexaha ihiye: — Wenakalati Belém nali Judéia koa. Nikarexe iraiti xakaisasehare xairatya etahi akiti. Exakere xairatyoare tyaonita:

<sup>6</sup> Hiso, wenakalati Belém Judéia koa nali, maisa hikirane xini haiyanai wenakalatinai Judéia koa nali nonitata.

Hihiyetaite kaotyakehena xekohaseti kalorexe hoka kaxaikohena nokaxaikoniharenai Israel hotyalinai.

<sup>7</sup> Hatyaoseta Herodes kawisa kamai nihikoane maniyata tyoiterenai, hawawaha heko irai ekakoaha maheta. — Xoana xowaka kaisere xorese kaotyaka xomana? Xiyakai rota nohiye — nexa axahene.

<sup>8</sup> Irai ekakoaha hoka hatyo najikinita axikatyahene Belém xeta. — Xiyane xatawa waiyekhalaka hatyo xoima xahita. Maika xikaokene hoka xisoa xakaixakaheta natyo hoka natyo tehitia noxani nowaiyene hoka nawaiyetene, nomaxalo ekakoa — nexa ihiyeha hoka axikatyahene.

<sup>9</sup> Nexa ihiyeha hoka hatyo tyoiterenai jiya xanehenahitiyaha. Ahoti waiyehenahitiyaha xorese waiyahitereta kamai nihikoane maniya nali. Hatyo xorese enahetaha maniya xane, xane amematyoa hatyo xoima tyaonitere hao akiti. <sup>10</sup> Waiyaha xorese hoka

masakare ihalahareha. <sup>11</sup> Xane kaokaha, xane isoaha hatyako hoka waiyaha xoima inityo Maria kakoa. Meholokoaha hakaolise kakoa enomana, awaiyetyahene, maxaloha ekakoa. Hatyo najikinita majiholatya haftinihareha hoka isaha enomana maxaimanehareta ouro, incenso, mirra xoaha. (Incenso atyo kakeratyaka hoka airaxekoa mokita, mirra atyo airaxero akerehare airaxe).

<sup>12</sup> Hatyaoseta Enore kaixakatyá hatyo tyoiterenai inijihinakoha hoka maisa haikoahenahitaha Herodes tyaonitere nali maheta. Hiyeta hoka haikoahenahitaha hawaikoheraha xeta haho ahota.

#### *José Tekoa Haiyanityo, Haisani Kakoa Egito Xeta*

<sup>13</sup> Hatyo tyoiterenai xaneheta najikini hatya anjo Enore nalitare kaotyaka José ana inijihinako, nexa ihiye: — Hisekoahena Egito xeta xoima kakoa, exahe inityo xoaha kakoa. Maika xisaona heko nali, ekakoitaite nakaixakaheta xiso. Kalikini Herodes tawita xoima aisene maheta — nexa anjo José hiye.

<sup>14</sup> Nexa hoka José kaose hoka tekoia xoima exahe inityo xoaha kakoa makiyita Egito xeta. <sup>15</sup> Hatyo nali tyaonaha Herodes kamane kijiya. Nikare tyaonaha Enore iraiti xakaisasehare hiye iraetere akereta kawenatyakeheta maheta. Exakere xairatyoare tyaonita:

Nakawiheta nityani hoka Egito nalita tyoheta.

#### *Herodes Xoimanai Xaisaka Aoka*

<sup>16</sup> Hatyaoseta Herodes kamai nihikoane maniyata tyohenerenai xahita atyahahena xakore, makaokeneha enomana hoka ehare. — Kaxiyani, maoseratyaha natyo — nexa hoka ehare, kahenehare tyaona. Hoka axikatyá sorarenai aisaha maheta enamokosenai hinama wanone katyahakoretaterenai Belém naliyerenai, exahe ehaliyita wenakalatissenai koarenai hoka. Nikare ahekotya, xorese kaotyakehenere xakaihenahere ihiye hiyeta.

<sup>17</sup> Nikarexe tyaonaha iraiti xakaisasehare Jeremias iraehenere akereta kawenatyakeheta maheta.

<sup>18</sup> Rama yerenai sema osexati, hokotyanika Raquel tiyita haisani mokosenai kawa. Tiya hoka maisa aliyakere kaxemaxalotyakita, tyotya ityaninai wainiha hoka.

#### *José Haikoaheta Egitota Haiyanityo, Haisani Kakoa*

<sup>19</sup> Hatyaoseta Herodes waini hoka ekamane najikini maniya hatya anjo Enore nalitare kaotyaka José ana inijihinako Egito nali hoka nexa ihiye: <sup>20</sup> — Nikahena hoka xoima exahe inityo xoaha kakoa hahahaeta Israel waikoherakoa. Aisa xoima aokowiterenai koxaka waini — nexa.

<sup>21</sup> Hatyaoseta José haikoaheta xoima exahe inityo xoaha kakoa Israel waikoherakoa xeta. <sup>22</sup> Hoka semehena atyo José, Herodes ityani Arquelau atyo xekohaseti tyaonita Judéia koa hanexe wenekoare. Semene José hoka maira haxanene kakoa hatyo maniya. Hatyaoseta Enore aotyakihityene inijihinako hoka xane Galiléia koa. <sup>23</sup> Xane tyaona wenakalati Nazaré nali. Nikare tyaona iraiti xakaisaseharenai niraene akereta kawenatyakeheta maheta. Exakere xairatyoare tyaonita: Nazaré yere nexahaite exaokaka.

#### *João Batista Batixatya Halitinai*

(Marcos 1.2-8; Lucas 3.1-18; João 1.19-28)

<sup>1</sup> Hatyo xowakiya João Batista xane maharexakiti Judéia koa nali hoka xakaihakahena iraiti naliyerenai hiye. <sup>2</sup> Hoka nehena: — Xahalakihena iniyalahare xománe, Xekohaseti Kalorexe Enore nalitare okoi kaotyakehena — nita ihiyea.

<sup>3</sup> João tahi iraiti xakaisasehare Isaías toahiya xairatya exakere: Hatya haliti kawijita maharexakiti nali: “Memere ahota xamohena Xekohaseti naheta, maika totaho xamohena enaheta maniya”.

<sup>4</sup> João ijoita kamelo niyali nomakere, ijiterone atyo militihi. Nijita iri, exahe maha hoka hiyokita.

<sup>5</sup> Tyotya Jerusalém nali tyaoniterenai, Judéia koa tyaoniterenai, exahe one Jordão maniya tyaoniterenai hoka tyoaha enomana, semaha maheta iniraine. <sup>6</sup> — Alitere iniyalahare kahare wisoma, xakore hoka wahalakisa iniyalahare wawenane waokowita — nexaha ihiye hoka João batixatyahene one Jordão xaiya.

<sup>7</sup> Hoka João atyo waiyehena, fariseunai exahe saduceunai atyo tyoahitaha João batixatyahene maheta. Hoka nehena: — Xiso atyo owi akereta xiyalijinihare. Xala irae xihiye hoka motyaita maisa iniyalahare xikaxomokaka xaokita, Enore kaheneharexe iniyalahare axikahenere xowaka? nexa ihiyeha. <sup>8</sup> — Maika xoalini hare waiyexe xisomehena hoka xahotikisa iniyalahare xawenane xihalakira maheta. <sup>9</sup> Hoka awa atyo exakere xahekotya: “Abraão atyo wahetahare hoka maisaiya Enore ehareta wihiye”, xehena. Hiyaiya, aliterexe nomita xihiye, exe sehalii kakoita hiyetaiya Enore aikawatuya Abraão jikolahare maheta — nexa.

<sup>10</sup> — Hiyaiya, xawatise atyo memere tyaonita, irikotya maheta atyakatenai ityahare kokoita. Tyotya atyakatenai mawaiyerihare kalitereharenai atyoite kaxityokaka hoka kaxawatuya irikatyaose — nexa.

<sup>11</sup> — Natyo atyo nabatixatya xiso one kakoa iniyalahare xománe xihalakira xahotikisa maheta. Hoka tyoaite hatya najikini maniya, noxahehare atyo. Hakíjinti kolatyakaiya aoka nohiye hoka nihalahareya nakolatene enomana, noxahehare hoka. Hatyo atyoite batixatya xiso Isekohaliti waiyexe kakoa, exahe irikati kakoa xoaha — nexa.

<sup>12</sup> — Abali koxaka ekaheko, hatyo kakaote haware moka trigo ekate nonitata hoka trigo ite moka exomokakala aka, hoka keratyaite ekate irikati mawakenehare tyaonitere koni — nexa João ihiyeha. (Halitinai xaokaka nikare João iraeta).

### *Jesus Kabatixatyaka*

(Marcos 1.9-11; Lucas 3.21, 22; João 1.32-34)

<sup>13</sup> Hatyo xowakiya Jesus tya hikoa Galiléia koa nalita, tya one Jordão nali, João batixatene maheta. <sup>14</sup> Xakore hoka kaokehena Jesus hoka João nehena iraehena ekakoa: — Natyoiya kahane habatixatya, hiso tyatyo noxahehare. Aliyakereyatya nabatixatya hiso? nexa.

<sup>15</sup> Hoka Jesus nehena ihiye:  
— Kala naokitere akere wisaona. Nikare ite hoka tyotya wisoma Enore aokitere akereta — nexa Jesus.

Nexa Jesus hoka João tyakeko iniraine hoka batixatene.

<sup>16</sup> Batixatene najikinita, Jesus kenekoahetehena onexata hoka enokoa totakore tyaona hoka waiyehena atyo Jesus, Enore Nisekohare exoahena enomana, motya watyaha hoka tya tyoka ihiye. <sup>17</sup> Enokoata iraiti nehena: — Exe atyo nityani, noxiyakawali, nihalahare mokita — nexa.

### *Tihanare Hasakaharehena Jesus*

(Marcos 1.12-13; Lucas 4.1-13)

<sup>1</sup> Hatyaoseta Enore Nisekohare axanekisa Jesus maharexakiti Tihanare hasakaharetene maheta. <sup>2</sup> Jesus tyaona 40-ki ferakene, 40-ki makene. Maisa kanakairare hoka hatyaoseta nakehena. <sup>3</sup> Hatyaoseta ehasakaharetyase tya kaoka enomana hoka nehena ihiye: — Enore ityaniya atyo hiso hoka exe sehalinai haikawatya nakairati hoka hikanakaira — nexa ihiye.

<sup>4</sup> Hoka Jesus nexa ihiye: — Exakerexe Iraiti Waiyexe xairatyoare tyaonita:  
Maisa nakairati xema taita xini haliti nawenane tyaonita. Enore iraihenere tyotya xema tehitiya wenati tyaonita.

<sup>5</sup> Hatyaoseta Tihanare noloka Jesus Jerusalém nali xeta waiyexe wenakalati nali hoka xane ekakoa Iraexatyakalati Hana maiyeho hoka iraehena ekakoa. <sup>6</sup> — Enore ityaniya hiso hoka hahlaisoaheta exaoseta. Hiyaiya, exakerexe Iraiti Waiyexe xairatyoare tyaonita:

Enore ite axikatya anjonai hoka kaxaiko hiso. Otokahaite hiso hakaheha kakoa hoka maisa hikijinai hekoti kawe hamokita sehalinai hiye.

<sup>7</sup> Hoka Jesus nexa ihiye: — Iraiti tehitiya exakerexe xairatyօare tyaonita: Awa atyo hahasakaharetya Hiyekohase Enore.

<sup>8</sup> Hatyo najikinita Tihanare noloka Jesus hatya tyairi heno enoakiya hoka hotikisa enomana hakakoare waikohetko, waiyexe wenati, xiyealiti xoalini hare kahare hotikisa enomana hoka nehena: <sup>9</sup> — Hameholokoaiya nahalakoi, hawaiityaiya natyo hoka exeharenai tyotya nisa homana — nexa Tihanare Jesus hiye.

<sup>10</sup> Hoka Jesus nexa ihiye: — Hiyanehetehena, Ahalakoahaliti! Iraiti Waiyexe exakere nexa:

Hawaiyehena hiyekohase Enore, exahe ekoamaniya taita hisaohena.

<sup>11</sup> Nexa Jesus hoka hatyaoseta Tihanare halakisene hoka anjonai tyoa kaokaha enomana hoka kahinaetene.

#### *Jesus Hahena Galiléia Nali*

(Marcos 1.14-15; Lucas 4.14-15)

<sup>12</sup> Hatyaoseta Jesus sema João xolatyaka hoka haikoaheta Galiléia koa xeta. <sup>13</sup> Xakore hoka maisa Nazaré nali tyaonita hoka xane wenakalati Cafarnaum nali tyaona. One Galiléia xa haliya, Zebulom, Naftali xoaha waikohera koa. <sup>14</sup> Nikare tyaona iraiti xakaisasehare Isaías iraetere akereta kawenatyaka maheta:

<sup>15</sup> Zebulom, Naftali xoaha waikohera one kaloxere maniya, Jordão xa halakoiya maniya, Galiléia koa xoaha nali, majudeuneharenai tyaonitere nali.

<sup>16</sup> Hatyonai atyo makaliroti koni tyaonahitaha hoka xaokanatyakalati kalorexe ite kaotyaka enomanaha. Hoka xaokanatyakalatite aokanahena makaliroti koni wainihenerenai ana.

<sup>17</sup> Hatyo najikinita Jesus xakaihena hairaine ihiyea. Nehena: — Xahalakihena iniyalahare xománe, Xekohaseti enokoatare okoi kalorexe tyaohena — nexa.

#### *Jesus 4-hare Mairatyatiyenai Aoka Haomana*

(Marcos 1.16-20; Lucas 5.1-11; João 1.35-42)

<sup>18</sup> Hatyaoseta Jesus tona kilihijita ene one Galiléia xa hoka waiya hinamahare haximarene kakoarenai, Simão Pedro, André xoaha. Maka kakoa mairatyahitaha, mairatyatiyenai hoka.

<sup>19</sup> Hoka Jesus nexa ihiyea: — Xisohena noximi hoka naotyakisa xiso hoka halitinai nolokasehare xisaona — nexa ihiyea.

<sup>20</sup> Nexa ihiyea hoka halakisaha rotita maka kohase hiyakakala hoka xaneha Jesus xema.

<sup>21</sup> Hatyaoseta Jesus jiyihitiya, maisekoneseta waiyihitiya hinamahare haximarene kakoarenai, Tiago, João xoaha, Zebedeu ityaninai. Tyaonahitaha kanowa ako hanexeha kakoa, tyomaharehenahititha hahiyakakalaha. <sup>22</sup> Jesus kawisahene hoka halakisaha rotita hanexeha exahe hakanowaneha xoaha hoka xaneha Jesus xema.

#### *Jesus Aotyakijita Exahe Aiyatelikihitita Halitinai*

(Lucas 6.17-19)

<sup>23</sup> Hatyaoseta Jesus xane hakakoare Galiléia koa tonakoatya. Kaokehena wenakalati hoka aotyakisahitene xahohisakoatyakalati hanako. Iraiti waiyexe xakaita ihiyea Xekohaseti Kalorexe Enore nalitare kaotyakene tahi. Haiyaharenai hokakiterenai aiyatelikihitita ekahehareha nonitata.

<sup>24</sup> Ekakoita etahi akiti semaha hakakoare Síria koa maniya. Hatyo hiyeta halitinai kolatya hokakiterenai Jesus ana, kahare hawareharexe kahehaliti kakoarenai, tihanare kamilakoretiterenai, hatyahalitinai, wainitatereharenai exahe maetonaneharenae xoaha hoka tyotya aiyatelikihenahitene.

<sup>25</sup> Hoka kahare halitinai xaneta exema Galiléia koa yerenai, Decápolis nalitarenai, Jerusalém nalitarenai, Judéia koa nalitarenai, one Jordãoxa halakoiya tarenae xoaha.

*Ihalahaliti Exahe Xamaikohaliti Xoaha  
(Lucas 6.20-26)*

<sup>1</sup> Haxowakiya Jesus hisoaka halitinai waiya hoka kakoha tyairi henose hoka xane tyoka. Hoka exaotyakiraharenae tyoa kaokaha ehaliya <sup>2</sup> hoka aotyakihenahene, nehena ihiyeha:

<sup>3</sup> — Waiye kaiserehare atyo maxaokowiharetyoanehare tyaonitereharenai. Hiyaiya, Xekohaseti enokoatare waikohera atyo enomanereha.

<sup>4</sup> — Waiye kaiserehare atyo tiyitereharenai. Hiyaiya, Enore atyoite emaxaloki-henahitene.

<sup>5</sup> — Waiye kaiserehare atyo waiyexeharexenai. Hiyaiya, kaxekaka atyoite enomanaha Enore aokitereharenai.

<sup>6</sup> — Waiye kaiserehare atyo Enore aokitere akereta tyaona aokowitereharenai. Hiyaiya, hatyo aokahitere akereta atyoite mokahene.

<sup>7</sup> — Waiye kaiserehare atyo airakoanetitereharenai haiyaharenai. Hiyaiya, Enore atyoite airakoaneharetyahene tehitiya.

<sup>8</sup> — Waiye kaiserehare atyo iniyalahare maomanehare ahekoiterenai. Hiyaiya, waiyaha atyoite Enore.

<sup>9</sup> — Waiye kaiserehare atyo waiyexe wenati atyahitereharenai. Hiyaiya, Enore atyoite haisani akereta mokahene.

<sup>10</sup> — Waiye kaiserehare atyo kairaeharetyakiteraharenai Enore aokitere akereta tyaon-ahitere hiyeta. Hiyaiya, Xekohaseti enokoatare waikohera atyo enomanereha.

<sup>11</sup> — Waiye kaiserehare atyo xikairawaiyakehena, xikairaeharetyakehena exahe ka-hare iniyalahare kairaltyakehena xitahi, nokoamaniye xisaonitere hiyeta hoka. <sup>12</sup> Maika xihalaharehena, nikare mohenaha xiso hoka. Hiyaiya, kalorexe xibakatyakala atyo ityakaisakahare tyaonita xomana enokoa nali. Hiyaiya, nikare atyo kairaeharetyaka iraeti xakaisaseharenai xahetakomaniyereharenai.

*Salo, Xaokanatyakalati Xoaha Tahi  
(Marcos 9.50; Lucas 14.34-35)*

<sup>13</sup> — Xiso atyo salo akere xisaonita halitinai koni. Xakore hoka salo atyo makexenehena hoka maisa atyo saloheta xini. Maisa atyo xoare hare niyahareheta xini. Hoka kaxawatyakita atyo hoka jiyitereharenai tyahakitene — nexa Jesus.

<sup>14</sup> — Xiso atyo xaokanatyakalati akere xisaonita tyotya halitinai koni. Hiyaiya, maisaiya aliyakere heteroakijita wenakalati tyairi heno kaomakehenere. <sup>15</sup> Nikare maisa xala hare aotakatyxaokanatyakalati hoka koho katyahe mokare. Hoka kaxaotakatyake-hena hoka exomokakaose terota kaxomokakita hoka tyotya hatyako tyaoniterenai ana aokanatita. <sup>16</sup> Nikareta tehitiya xiyaokanala aokanahena, haiyanai waiyaha maheta xoalini hare waiyexe xománe hoka ihalahareha Xexe enokoa tyaonitere kakoa maheta — nexa.

*Xaotyakiyaho Xaotyakisaka Tahi*

<sup>17</sup> — Awa atyo motya notyoa nemaisaheta maheta Moisés exahe iraiti xakaisaseharenai xaotyakira xoahena. Maisa atyo notyoa nemaisahetene maheta xini. Notyoa atyo exaotyakiraha akereta kaomakeheta maheta. <sup>18</sup> Aliterexe nomita xihkiye: hekotataite waikohe, enokoa xoaha tyaonitata hoka maisaiya xoare hare kaxemaiyaretyakihi-tita xaotyakiye ahotare, maisaiya hase hekoti kaxemaiyaretyakihitita. Nikare taite kawenatyaka tyotya xoalini hare miyane kijiya. <sup>19</sup> Hatyo hiyeta xala xamani atyoite matyakekotya kiranexe xaotyakisati hoka hatya aotyakisa hoka nikareta tyaona hoka hatyo atyoite haiyaharenai katyahakoreta tyaona, Enore nalitare Kalorexe tyaohete-henere xowaka. Xakore hoka xala xamani atyoite tyakeko xaotyakiyaho hoka hatya aotyakisa hoka nikare tyaona hoka kalorexe atyoite tyaona Enore nalitare Kalorexe tyaohetehenere xowaka. <sup>20</sup> Hiyeta hoka nomita xihkiye: maisaiya fariseunai exahe

xaotyakiyaho kakoa waiyoreterenai xahe nawaiye xisaonita hoka maisaiya aliyakere Xekohaseti enokoatare waikohera xiyaneta.

*Irawaniti Tahi*  
(Efésios 4.26; Tiago 1.19-20; 1 João 2.11)

<sup>21</sup> — Koxaka xasema xahetakomaniyereharenai hiye niraityaka:  
Awa atyo xaisa. Xala xamani atyoite aisa haliti hoka kakolatyakaite kalorexe ana.

<sup>22</sup> — Hoka natyo atyo nomita xihye: xala xamaniya ehare taita hahinaehare hiye hoka kakolatyaka atyoite kalorexe ana. Xala xamaniya nexa hahinaehare hiye: “Maisa xoare niyahare hiso”, nexaiya ihiye hoka kakolatyakaiya kalorexe ana. Xala xamaniya hahinaehare hatyaharene aoka hoka irikati koni haxanene atyo aheteretita.

<sup>23</sup> — Hatyo hiyeta maika hafetatyha haokowihena kirakahare Enore ana hoka hotehetehena hihinaehare xéharene hihiye hoka <sup>24</sup> hahalakisa hatyo kirakahare ekeratyakaose haliya hoka hiyane wenati waiyexe haoheta hihinaehare ana. Hatyaosetaite hahaikoaheta hoka hafetatene Enore ana.

<sup>25</sup> — Hoka maika hatya kahalakoaharehena hikakoa hoka kolatya hiso kalorexe ana aokowihena hoka maika ahotita hirae ekakoa. Waiya aliya hoka kalorexe ana kaoka hikakoa hoka isaiya hiso kalorexe ana hoka hatyo kalorexeya isa hiso sorare ana hoka berexo akiya moka hiso. <sup>26</sup> Aliterexe nomita, maisaiya habakaita tyotya hoka maisaiya hahikoahitita berexo akota — nexa Jesus ihiyeha.

*Maiyaseti, Halakisatiheta Xoaha Tahi*  
(Mateus 18.8-9; Marcos 9.43-49)

<sup>27</sup> — Koxaka xasema xahetakomaniyereharenai hiye niraityaka:

Awa atyo hatya nohiroxa xiwatyalí.

<sup>28</sup> Hoka natyo atyo nomita: xala xamaniya atyo wahakotya hatya ohiro ana, kasaniya watyalini aokowita hoka hatyoiya koxaka iniyalahare tyoma haxahekola kakoa.

<sup>29</sup> — Hiyeta hoka hifihini maniyere hiyoseya iniyalahare axomokanikijita hiso hoka holokotya hiyene hoka haxawatene. Ehekoretaiy meta hatyo ini akiti hiháre hiyetare. Hoka maisaiya atyo ehekoreta xini hiháre mainikere kakoarella hikaxawatyaka irikati koni hoka. <sup>30</sup> Nikare hifihini maniyereya hikahiya iniyalahare axomokanikijita hiso hoka hirikotene hoka haxawatene. Ehekoretaiy meta hatyo ini akiti hiháre hiyetare. Hoka maisaiya atyo ehekoreta xini, hiháre mainikere kakoarella hikaxawatyaka irikati koni hoka — nexa Jesus.

*Halakisakakoati Tahi*  
(Mateus 19.9; Marcos 10.11-12; Lucas 16.18)

<sup>31</sup> — Exakere tehitia kairalityaka koxakereharenai hiye:

Xala xamani haiyanityo halakiheta aokowita hoka maika isa enomana babera halakisati baberanexa hoka axikahetene.

<sup>32</sup> Hoka natyo atyo nomita: hatyaiya haiyanityo halakiheta, maisa xakoreya hatya ena watyaliyene hoka hatyoiya atyo maisa waiyeta. Waiya aliya hoka hatya kakoa tyaohetehitiya hoka iniyalahareya tyoma. Exahe hatyo ena tyaohenere ekakoaiya iniyalahare tehitia tyoma — nexa Jesus.

*Hisomehena Hiraetere Akereta*  
(Tiago 5.12)

<sup>33</sup> — Koxaka xasema xahetakomaniyereharenai hiye kairalityakehenere: “Awa atyo xahalakisa xisoma xaokowiterehare, xakore hoka maika xisomehena xisoma xaokowiterehare Xekohaseti hiye xiraehenere”. <sup>34</sup> Hoka natyo atyo nomita: awa atyo exaliti harenai xakaixaretya xikatyakekotyaka maheta. Awa atyo enokoa xakaixaretya, hiyaiya, Enore nokahakala atyo. <sup>35</sup> Exahe waikohe tahi hoka xakaixaretya, hiyaiya, hatyo heno atyo mokita hakiji. Exahe Jerusalém xakaixaretya, hiyaiya, hatyo atyo Xekohaseti Kalorexe nawenakala. <sup>36</sup> Awa atyo xiserinai xakaixaretya. Hiyaiya, maisaiya xisonai hakaseta sekatise xaiyomakasetita xamani, exahe xakiyakasetita xamani. <sup>37</sup> Maika xehena taita:

“Há”, xehena xamani, “Mahaiya”, xehena taita. Hiyaiya, xoare xexa xamani atyoite hatyo xahexe hoka hatyohare atyo Tihanare nalita tyoita — nexa ihiyeha.

*Waiye Hamohena Hahalakoaharenai  
(Lucas 6.29-30)*

<sup>38</sup> — Koxaka xasema exakere kairaityakehenere:

Hatyaiya wataka hiyose hoka hatyo nahalakoa hawataka exose, hatyaiya taika haikoli hoka hatyo nahalakoa enaikoli hataika, nexa.

<sup>39</sup> Hoka natyo atyo nomita xihiye: awa atyo hatya iniyalahare mohena xiso hoka hatyo nahalakoa iniyalahare xamokene. Hoka maika hatya mokohena hiso hitanakoli hiye hoka hamaniya tanakoli tehitiya hehaika enomana hoka mokohitiya. <sup>40</sup> Hoka maika hatya aiyateretyoa hihiye, kolatya maheta hima hoka hisene enomana, exahe himanase tehitiya hisa enomana. <sup>41</sup> Hoka maika sorare aiyateretyoa hihiye hakolatya maheta kolare hakilometrone enomana hoka maika hinama kilometrone hakolatene enomana. <sup>42</sup> Hoka maika hatya axehena hiso xoalini hare hoka hisene enomana. Exahe hatya axehena hiso xoalini hare hoka isehetene homana maheta hoka hisene enomana — nexa Jesus.

*Waiye Xamoka Xahalakoaharenae  
(Lucas 6.27-28, 32-36; Lucas 23.34; Atos 7.60; Romanos 12.14, 17-21)*

<sup>43</sup> — Koxaka xasema kairaityakehenere:

Hawaiyehena hihinaeharenai hoka hikirawanehena hahalakoaharenai.

<sup>44</sup> Hoka natyo atyo nomita xihiye: maika xawaiyehena xahalakoahenerenai, xiraexahena kirawaneterenai xiso ana. <sup>45</sup> Nikareya xisaona hoka Xexe enokoa tyaponitire ityaninaiya xisaona. Hiyaiya, waiyexeharexenai, mawaiyexeharexenai xoaha ana atyo kamai axaokanatyakijita, exahe hoka aonekijita atyo waiyexe tyomiterenai, iniyalahare tyomiterenai xoaha ana. <sup>46</sup> Hiyaiya, awaiyetiterenai xiso taitaiya xawaiyetita hoka xoanere hoka xoalini hare Enore xekane xahita xatyahita? Hiyaiya, nikare atyo kalorexe noloxa resebetyaseharenai haxawaiyetyaseharenai awaiyetyahitaha. <sup>47</sup> Hoka xihinaehare hiye taitaiya xikatyawaxita hoka hatyohare atyo maisa xoanereta xini. Hiyaiya, matyakekoneharenai kakoita atyo nikare tyaponita. <sup>48</sup> Hiyeta waiye maniyaira xisaona Xexe enokoa waiye tyaponitire akereta — nexa Jesus haxaotyakiraharenai hiye.

## 6

*Maoloxaharenai Kahinaetyaka Tahi*

<sup>1</sup> — Hirihaaríra! Hoka awa atyo hawenanaho waiyexe xema hisaonitire hiyeta, hatyoharenai hisoma halitinai haotita, waiyaha hiso maheta taita. Nikareya hisaona hoka maisaiya xoare hare Hexe enokoa tyaponitire ijita homana. <sup>2</sup> Hoka maika xoalini hare hisehena maxiyeharehare ana hoka awa atyo hatyoharenai hiyakaikoatya, teraharetyoarenae akereta. Nikare atyo tyaponahitaha, halitinai ihalahareha ekakoaha maheta taita. Hoka exeharíra xotyaxematyá: koxaka atyo kaxekaka enomanaha xoalinihare. <sup>3</sup> Maika hakahinaehena hatya maxiyeharehare, himeteneta nikare hisoma hoka maisa hihinaehare hekoti hikahinaera waiyita. <sup>4</sup> Hoka hatyoharenai atyoite metereta tyahohena. Hoka Hexe atyoite waiya hatyoharenai himeteneta hisomehenerehare hoka isaita homana xoalini hare waiyexe hatyo nahalakoa — nexa Jesus.

*Jesus Aotyakisa Iraexatyati Kakoa  
(Lucas 11.2-4)*

<sup>5</sup> — Maika xiraexahena hoka awa atyo teraharetyoarenae iraexaitere akereta xisaona. Hatyonai atyo tityoaha xahohisakoatyakalati hanako exahe ahotiaho hare hoka iraexatyahitaha, kasani halitinai waiyahene aokahitaha hoka. Hoka exeharíra xotyaxematyá: koxaka atyo kaxekaka enomanaha xoalinihare. <sup>6</sup> Hiyeta xiraexatyá xaokowihena hoka xiyané xihanako hoka xajihotyoa hoka xiwawaharenai xiraexatyá Xexe Enore hiye hoka

maisa xikawaiyakita. Xexe Enore atyoite waiyehena xisomitere ximeteneta hoka isehena xomana xoalinihare waiyexe hatyo nahalakoa.

<sup>7</sup> — Xiraexahena hoka awa atyo Enore maniya mawenaneharenai akereta xiraexatya. Hatyonai atyo iraexahena hoka hatyaoseta iraexaheta xoahita, motya iraexatya kahareki hoka Enore semene aokahitaha. <sup>8</sup> Awa atyo hatyonai akereta xiraexatya. Xexe Enore atyo koxaka otita xoalini hare xaokitere xiyaxane nahitita.

<sup>9</sup> — Hiyeta hoka exakere xiraexatya:

Wexe Enore, hiso atyo enokoa hisaonita. Kasani tyotyaha aiminisaha hiso waokita.

<sup>10</sup> Hisohena ali Xekohaseti hisaona maheta. Kasani ali waikohекоа haokitere akereta tyaona waokita, enokoa nali kaomakitere akereta.

<sup>11</sup> Kasani nakairati hisa womana tyotyaki ferakene waokita.

<sup>12</sup> Himaotyanehetehena iniyalahare wisomitereharenai, haiyaharenai iniyalahare mohenere wiso wimaotyanehititere akereta.

<sup>13</sup> Hoka awa atyo hahalakihena wiso hoka wikahasakaharetyakehena. Xakore hoka maika iniyalahare nonitata hiyehetehena wiso. Hiyaiya, homanere atyo waikohe. Iyateliti exahe kaihalaharetyaketa mene hikakoa waokita, xoaha taita.

<sup>14</sup> — Ximaotyanehetaiya haiyanai iniyalahare mohenere xiso hoka Xexe enokoa tyaonitere tehitiyaiya maotyaneheta iniyalahare xománe. <sup>15</sup> Hoka maisaiya atyo ximaotyanehitita haiyanai iniyalahare mohenere xiso hoka Xexe enokoa tyaonitere tehitiyaiya atyo maisa maotyaneta iniyalahare xománe — nexa Jesus ihiyeha.

### *Jesus Aotyakisa Manakairiti Enore Hiyeta Tahi*

<sup>16</sup> — Maika ximanakairehena Enore hiyeta hoka awa atyo xamaikohare tiho xisaohena, teraharetyoarenai akereta. Hatyonai atyo nikare tyaonahitaha, kasani haiyanai ana emanakaireneta waiyekahala aokahitaha hoka. Hoka xotyaxematyaira exeharenai: koxaka atyo xoalinihare kaxekaka enomanaha. <sup>17</sup> Hoka maika himanakairehena Enore hiyeta hoka hatihatihotyoa hoka hatilikoa hoka <sup>18</sup> maisa haiyanai otita himanakaireneta maheta. Hoka Xexe Enore mawaiyakahare takita atyoite waiya tyotyha himeteneta hisomiterehare hoka isa homana xoalini hare waiyexe hatyo nahalakoa — nexa Jesus ihiyeha.

### *Jesus Aotyakisa Xiyehaliti Matyotenehare Tahi*

(Lucas 12.33-34; 2 Timóteo 4.8; Hebreus 10.34-39; 2 Pedro 1.4-5)

<sup>19</sup> — Awa atyo xixiyeharenai kahare xamoka xaokowi ali waikohекоа. Hatyoharenai atyo kirakahare sesekita, exahe kaijikali tyaonita hoka mawenekoareta, exahe kaiwarexenai hoka isoaha hatyako hoka kaiwitene. <sup>20</sup> Maika enokoa nali xixiyehare xamoka xaheta maniya. Hatyo nali atyoite maisa kirakahare aiyalaharetitene, exahe kaijikali tyaonita, exahe hoka maisaiya kaiwarexenai isoaha hoka kaiwitene. <sup>21</sup> Aliye xamaniya xixiyehare xamokita hoka hatyo nali tehitia atyoite xiyahekola tyaonita — nexa.

### *Xaokanatyakalati Tahi*

(Lucas 11.33-36)

<sup>22</sup> — Xiyosenai atyo xaokanatyakalati akereta tyaonita xiháre hiye. Xiyosenaiya waiyese hoka waiyeya xiyaiyakatya. <sup>23</sup> Hoka xiyosenaiya atyo maisa waiyesexe hoka makaliroti koni atyo xisaonita. Nikareya xiyahekola iniyalahare maniya tyaonita hoka makaliroti koni atyo xisaonita. Hatyo makaliroti atyo kahenehare — nexa Jesus.

### *Hinama Xekohaseti Tahi*

(Lucas 16.13; Lucas 12.22-31)

<sup>24</sup> — Hatitaiya wakahare hoka maisaiya aliyakere hinamahare kaxekohaseta. Nikareya hoka hatya awaiyetita, hatya maisa awaiyetyare xoahaiya. Tyakekota hatya, hatya maisa tyakekore xoahaiya. Nikare tehitiyaiya maisa aliyakere Enore maniya hahekoita, olo xiyejaliti harenai maniya hahekoita xoaha haxowakita — nexa Jesus.

<sup>25</sup> — Hiyeta hoka nomita xihiye: awa atyo xamaikoharehena nakairati, erati harenai xaokiterenai xawenane niyahare kakoa, exahe imiti xaokitereharenai xiyisoane niyahare kakoa hoka. Xoana wenati kore atyo maisa nakairati xahehare xini? Xoana xiháre kore atyo maisa imiti xahehare xini? <sup>26</sup> Xiyaiyehena kotehalasenai ainakoitereharenai. Maisa atyo fityareha hanakaira, maisa imexareha, maisa mokareha hanakairaha hahanakoha. Xakore hoka Wexe enokoa tyaonitere atyo ijita enakaira enomanaha. Hoka xoana maisa korala exe kotehalanai xahexehare xini xiso? nexa.

<sup>27</sup> — Awa atyo xamaikohare mene xawenane kakoa. Hityokahokoseya hoka hiwahahare hisaoleta haokowita hoka hamaikohareta hoka hiyamaikoharene atyo maisa xoarehare tyomare.

<sup>28</sup> — Xoana hoka xamaikohareta ximaimene kakoa? Xiyaiyehena, iyitinai waiyehare kekoarehitaha. Maisa hakareha exahe maisa tyomare haimaha. <sup>29</sup> Xakore hoka nomita xihiye: Salomão xekohaseti tyaonitere xowakiya kalorexe xakore hoka maisa imiti exe iyitinai nawaiyehare akere ako isoare. <sup>30</sup> Enore xaokalita atyo atyamokose ime harenae waiyehare tyaonita. Kalini waiyehare tyaonitaha hoka makani wainihenahitaha hoka kakeratyakahitaha irikatyose. Hatyo hiyeta aliterexe ite kaimatya tehitija xiso. Hoka xityakekone atyo kirane.

<sup>31</sup> — Hiyeta hoka awa atyo exakere xexa xamaikohare: “Aliyakotaite wikaokehena winakaira werane exahe wima hoka?” <sup>32</sup> Hiyaiya, hahotyaliharenai atyo nikare taweta menahitaha tyotya hatyoharenai. Hoka Xexe enokoa tyaonitere atyo waiyoreta tyotya xaokitereharenai kakoa hoka hatyoharenai atyoite isa xomana. <sup>33</sup> Hiyeta hoka Enore maniya hotohare xawenane xamoka, exahe Enore aokitete akereta xisaona hoka hatyo atyoite isehena xomana tyotya xoalini harenai. <sup>34</sup> Hiyeta hoka awa atyo xamaikohare makaniye ferakene kakoa. Hiyaiya, hatyo kamaetaliye ferakene atyo maisa waiyekahalakere xomana. Maika xahekohena xisaonitere ferakene kakoa taita — nexa Jesus haxaotyakiraharenai hiye.

## 7

*Awa Atyo Hiraeharetya Haiyanai**(Lucas 6:37-38, 41-42; Romanos 2:1-2; 14:1; 1 Coríntios 4:5)*

<sup>1</sup> — Awa atyo xiraeharetya haiyaharenai, waiya aliya hoka xikairaeharetyaka tehitija. <sup>2</sup> Hiyaiya, xahekoitere haiyaharenai kakoa akeretaite Enore moka xiso, exahe haiyanai xamokitete akeretaite moka xiso.

<sup>3</sup> — Xoana hoka holoxotise xihinaehare xose ako tyaonitere atyo xiyaiyita hoka maisa atyo atya taose xiyose ako tyaonitere xiyaiyare? <sup>4</sup> Aliyakereya xihinaehare hiye xehena: “Nikahena hoka niyeheta holoxotise hiyose akota”, owene xakore tyaonita atya taose xiyose ako hoka? <sup>5</sup> Xasemehena, teraharetyoarenai, xiyehetehena hotohare atya taose xiyose akota hoka hatyaosetaite waiye xiyaiyakaheta hoka xiyehetaholoxotise xihinaehare xose akota — nexa Jesus ihiyea.

<sup>6</sup> — Awa atyo xisa kajolonai ana Enore anerenai, waiye aliya hoka kahalakoahareha xikakoa hoka tyalokaha xiso. Exahe awa atyo xaxawatya sehalise kaxaimanexe bolokonai ana. Waiya aliya hoka tyahakahene — nexa.

*Xaxehena Enore*  
*(Lucas 11:9-13)*

<sup>7</sup> — Xaxehena hoka xikaoxekaka. Xataweniya hoka xikaokene. Xamokotyaiya hati jihola hiye hoka majiholateniya xomana. <sup>8</sup> Hiyaiya, tyotya axiterenai ana atyo kaxekaka, tawiterenenai atyo kaokitene, jihore atyo majiholatyota mokotitereharenai ana.

<sup>9</sup> — Xoana, hatya xinekonitare ityaniya axehena hanexe nakairati hoka isaiya sehalis enomanha? <sup>10</sup> Xoana, isaiya enomanha owi, kohase axehena hoka? <sup>11</sup> Xiyaiya, maisa xakore xawaiyexe hoka xawaiyore atyo xijita xoalini hare waiyexe xityaninai ana. Nikare tehitijaite Xexe enokoa tyaonitere isehena xoalini hare waiyexe axiterenai ana.

**12** — Aliyakere xamani halitinai moka xiso xaokita hoka nikareta tehitia xamohena halitinai. Exe atyo Moisés, iraiti xakaisaseharenai xoaha xaotyakira — nexa Jesus ihiyeha.

*Hinamaho Ahotyahonai*

(Lucas 13.24; Filipenses 3.19-20)

**13** — Xisoahenaira xisoakalati kiranahore. Hiyaiya, hatya xisoakalati kaloahore, exahe waiye netonatyaka atyo, xakore hoka mawenekoaretyati aho atyo. Hoka kahare haliti tonita enaho. **14** Xisoakalati kiranexe aho atyo howitihare netonatyaka, xakore hoka wenati waiyexe xetare atyo hoka haiyanai taita atyo tonita enaho — nexa Jesus.

*Xiriharíra Iraiti Xakaisaseharenai Metalahare Kakoa*

(Lucas 6.43-44; João 15.4; Tiago 3.11-12)

**15** — Xiriharira iraiti xakaisaseharenai metalaharenai kakoa. Kaokahaite xomana hoka kalanero maxalijinharenahere akeretaite tyaonaha, xakore hoka exahekolahe atyo kahenehare. Ahoxa xalijinharexe akereta atyoite. **16** Maika waiyekahalahare xomana enawenaneha hiyeta. Katohere katenai kalihena hoka maisa atyo uvali kaliye. Exahe atya kaewero katenai kalihena hoka maisa halohalose kaliye. **17** Nikare atya kanakairoare kate kalihena hoka waiyexe atyali kalita. Nikare tehitia atya ewaxirahare kate kalihena hoka maisa waiyexe atyali xini kalita. **18** Nikareta kanakairoare kate ite kalihena hoka maisaiya manakairatyakahaliri kalita, maisaiya atya manakairatyakahare kate hoka atyali kanakairoare kalita. **19** Tyotya atyakatenai manakairatyakahaliri kaliterenai atyo kaxityokaka hoka kaxawatyakahitaha irikati aose. **20** Nikare ite waiyekahalaharehena xomana iraiti xakaisasehare metalaharenai enómaneha hiyeta — nexa Jesus.

*Maisa Atyoite Tyotyaha Xini Enokoa Xaneha*

(Lucas 13.25-27; 2 Coríntios 11.13-15; 2 Pedro 2.1; 1 João 2.3-6; 5.12)

**21** — Kahare haiyaharenai nexahitaha: “Xekohaseti, Xekohaseti”, nitaha nohiye. Xakore hoka maisaite tyotya hatyoharenai Xekohaseti enokoatare waikoherakoa xaneta. Hoka Baba enokoa tyaonitere aokitere akereta tyaoniterenai taita atyoite nali xane. **22** Hatyo xowakehenaite hoka kahare ite nehenaha nohiye: “Xekohaseti, xekohaseti, hexare kakoa wiyakai iraeti Enore tahi, hexare kakoa kahare tihanarenai waxanikihta halitinai nonitata, kahare maomakahare waiyexe wisoma”, nexahaite nohiye. **23** Xakore hoka nomihenaita ihiyeha: “Maisa nowaiyanihare xini xiso. Xakikisoahetehena noniti, xiso atyo iniyalahare taita nomaseharenai”, nomihenaita ihiyeha — nexa Jesus.

*Hinama Hatinae Tahi*

(Lucas 6.46-49)

**24** — Xala xamani atyo sema exe niraeni hoka tyaona exema hoka haliti hatya waiyorexe tyomehenere hahaha sehalo heno akerexeta atyo. **25** Tyoma hahaha mematene hoka one kaloxehena hoka kahekoakoa moka exahita, exahe kinatyawiniti hoholatya hatyo hati xahita. Xakore hoka maisa exoakijitene, waiye nomakere sehalo heno hoka. **26** Hoka xala xamani atyo sema exe niraeni hoka maisa tyaonita exema hoka haliti mairiharenehare tyomehenere hahaha kaiholokoa akereta atyo. **27** Tyoma hahaha mematene hoka one kaloxehena hoka kahekoakoa moka exahita, exahe kinatyawiniti hoholatya hatyo hati xahiyita hoka exoakikoatene. Exoakikoatene hoka mawenekoaretiterene akereta atyo — nexa Jesus xakai ihiyeha.

*Jesus Atyo Xekohaseti*

(Marcos 1.22)

**28** Jesus halakisa hairaine hoka halitinai hakaharetyoa exaotyakira kakoa. **29** Maisa atyo xaoityakiyaho kakoa waiyoreterenai akerexeta xini aotyakijita hoka. Iraeta atyo iyateliti kakoare hoka.

*Jesus Awaiyehiheta Jijikoahitere  
(Marcos 1.40-45; Lucas 5.12-16)*

- <sup>1</sup> Hatyaoseta Jesus exoaheta tyairi henoseta. Hoka hisoaka haliti xane exema.  
<sup>2</sup> Hatyaoseta jijikoahiti kahehare aijitere tyoa kaoka ehaliya hoka hakaoliri kakoa meholokoa enomana hoka nehena:  
— Xekohaseti, hawaiyehihetaiya natyo haokowi hoka hawaiyehihetaiya natyo — nexa.  
<sup>3</sup> Nexa hoka Jesus hakahe ekaokakisa ihiye hoka nehena: — Há, naokaite. Hawaiyehiheta atyo — nexa.

Nexa taita ihiye hoka waiyehiheta rotita jijikoahitere nonitata.

- <sup>4</sup> Hatyaoseta Jesus nexa ihiye: — Hasemehena, awa atyo exehare hiyakaihena hatya ihiye. Hiyanehena sacerdote nali hoka waiyahareheta hiso. Hatyaosetaite haisa kirakahare hoka fetatene Enore ana, Moisés aotyakihenere akereta. Hoka tyotyaha waiyoreha hikinatrehenere kakoa — nexa Jesus ihiye.

*Jesus Aiyatelikheta Roma Yere Wakanehare  
(Lucas 7.1-10)*

- <sup>5</sup> Hatyaoseta Jesus xane kaoka wenakalati Cafarnaum nali. Kaokehena hoka hatya sorenai xekohasehare tyoa ahalakoatene, irai maheta ekakoa, kasani Jesus aiyatelikheta ewakanehare enomana aokita hoka.  
<sup>6</sup> Hoka nexa: — Xekohaseti, nowakanihare kalore hokakita nohanyakota. Maisa moxomoxore, masakare waolitita — nexa.  
<sup>7</sup> — Notyoaite hoka naiyatelikhete homana — nexa Jesus.  
<sup>8</sup> Hoka sorare xekohasehare nehena ihiye: — Maisaiya hijoíta nohanyakko, Xekohaseti. Hiyaiya, natyo atyo hikatyahakohare. Kala hiraihena taita hoka nowakanihare kinatreheta nomani — nexa. <sup>9</sup> — Natyo tehitija atyo haiyanai xekohasetinai katyahakoreta notyaonita hoka wakatyahitaha natyo. Nosorarexinai atyo nowakani xema tyaonahitaha. Niraihena hatya ihiye: “Hiyane”, nomihena ihiye hoka xaneta. Hatya ihiye, “Hisohena”, nomihena hoka tyoita. Exahe nowakanihare ihiye, “Hisoma nikare”, nomihena hoka tyomita — nexa sorare xekohasehare Jesus ihiye.

- <sup>10</sup> Hatyaoseta Jesus hakaharetyoa sema hatyo iniraine hoka nexa haxema tyoitenai ihiye: — Kaxiyani, aliterexe niraeta xihiye, maisa xoana xowaka exakere kalore tyakekotyati nowaiyare Israel hotyalinai koni — nexa. <sup>11</sup> — Xotyaxematyaira exeharenai: kahare halitinaite tyohena, kamai nihikoane maniyata, exahe kamai xisoane maniyata hoka tyokehena mexa haliya Abraão, Isaque, Jacó harenai kakoa, Xekohaseti enokoatare kalorexe tyaohenere xowaka. <sup>12</sup> Hoka hatyo nali tyoka mahetarenai ene ite kaxawatyaka makaliroti koni. Hoka hatyo nalite tiyaha exahe haikolinaiha, “karai, karai”, nexa mokaha — nexa Jesus.

- <sup>13</sup> Hatyaoseta Jesus nehena sorare xekohasehare ihiye: — Hiyanehetehena hihana xeta. Hityakekone akereta koxaka kaomaka — nexa ihiye. Hatyo xowakita ewakanehare kinatreheta.

*Jesus Aiyatelikhita Kahare Halitinai  
(Marcos 1.29-34; Lucas 4.38-41)*

- <sup>14</sup> Hatyaoseta Jesus xane Pedro hanako, waiyehena atyo, owene atyo Pedro nimasero kamakoa ehokotoita, watyahiseta hoka. <sup>15</sup> Hoka Jesus otokene ekahe ihiye hoka ewatyahisene tyoteheta enonita. Hoka ainakoaheta, xane enakaira tyoma enomana.  
<sup>16</sup> Makakoahena hoka halitinai Jesus ana kahare tihanare kamilakoreraharenai kolatya hoka haserore irae hoka tihanare axanikihitita. Exahe haiyanai hoka hokakiterenai tyotyaha aiyatelikhitita.  
<sup>17</sup> Jesus nikare tyoma iraiti xakaisasehare Isaías xakaitere akere kawenatyakeheta maheta:

“Hatyo atyo kolatya wikahehare, exahe wihokakene hoka kolatya”, nexa atyo.

*Haiyaharenai Xaneha Aokowiha Jesus Xema  
(Lucas 9.57-62)*

<sup>18</sup> Hatyaoseta Jesus waiya haliti hisoakene hahoko haliya, hoka irae haxaotyakiraharenai hiye, xaneha maheta Galiléia xa halakoiya maniya.

<sup>19</sup> Hatyaoseta hatya xaotyakiyaho kakoa waiyoretere tyoa kaoka hoka nexa ihiye: — Xaotyakisatiye, notyoaite hiyema, aliyo xamani hiyanehena hoka — nexa.

<sup>20</sup> Hoka Jesus nexa: — Wakarenai atyo kahanere waikoako, exahe kotehalanai hoka kaihexe — nexa Jesus ihiye. — Xakore hoka Haliti Ityani atyo maisa xoare ako kawiniye — nexa. (Haxaokakita “Haliti Ityani”, Jesus nexa.)

<sup>21</sup> Hatyaoseta hatya Jesus xaotyakirahare nehena: — Xekohaseti, awisa hoka noxani naahaikoaheta hoka baba waini hoka nafetene hotohare hoka hatyaosetaite notyoa hiyema — nexa.

<sup>22</sup> Hoka Jesus nexa ihiye: — Hisohena noximi, kotare kamatinai fityaha hakamane hatyanai — nexa.

*Jesus Amemakiyaheta Kinatyawiniti  
(Marcos 4.35-41; Lucas 8.22-25)*

<sup>23</sup> Hatyaoseta Jesus isoa kanowa ako hoka exaotyakiraharenai tehitiya xaneha exema.

<sup>24</sup> Xanahitaha onexa hoka kinatyawiniti kaoka enomanaha, one ainakiyatya hoka jiyahaotita kanowa. Jesus hatyo xowaka nemakita. <sup>25</sup> Hatyaoseta exaotyakiraharenai kaosetene hoka nexaha ihiye: — Xekohaseti, hakahinaehena wiso, wiwainihenaore — nexaha.

<sup>26</sup> Hoka Jesus nexa: — Xoana hoka ximairita? Xoana hoka inira xityakekone tyeonita? nexa ihiyeha. Nexa ihiyeha hoka tityoaheta hoka watyali hoholati, one xoaha hoka tyotya, memakeheta.

<sup>27</sup> Hatyaoseta exaotyakiraharenai hakaharetyoaha hoka nexaha: — Xoare halitini ala exe hoka one, hoholati xoaha hiye irae hoka aokitere akereta tyonaha? nexaha.

*Jesus Axanikiheta Isekohalitinai Halitinai Nonitata  
(Marcos 5.1-20; Lucas 8.26-39)*

<sup>28</sup> Hatyaoseta Jesus xane Galiléiaxa halakoiya maniya, Gadara koa nali xane kaoka. Kaoka taita hatyo nali hoka hinamahare tihanarenai kamilakoreranai tyoa ahalakoatene. Kawatyakalatinai koni tyeonahitaha hoka hatyo nalita tyoahita. Kinatereha, xalijini-hareha hoka maisa xala hare hatyo ahoti aho jiya aokowiye.

<sup>29</sup> Tyoa ahalakoatyaha Jesus hoka nexaha: — Xoare haoka wihiye, Enore Ityani? Xoana, hisoa hoka iniyalahare hamoka wiso maheta imiyanaose ferakene nahitita? nexaha kawiyatyaha kinatyaxa.

<sup>30</sup> Hatyo xowaka bolokonai hatyo haliyita nisakoatita. <sup>31</sup> Hoka tihanarenai nehena Jesus hiye: — Haihikoaheta haokowita wiso halitinai milakota hoka haxikatya wiso bolokonai milako — nexaha tihityoaha ihiye.

<sup>32</sup> — Xiyanehena atyo — nexa Jesus. Hatyaoseta tihanarenai hikoaheta halitinai milakota hoka xane isoaha bolokonai milako. Hatyaoseta bolokonai tema exoahenahitaha tyairi henota hoka xane exoaha hokoxa, monaha hoka tyotyaha wainiha.

<sup>33</sup> Hatyaoseta boloko kaxaikotyasanai tekoahenahitaha hoka xanehenahitaha wenakalati xeta hoka xakaihaha hatyo tahi naliyerenai hiye, hatyo hinamahare halitinai kakamilakotyakiterenai tahi. <sup>34</sup> Hatyaoseta hatyo wenakalati tyeoniterenai tyotya tyoaha waiyaha Jesus maheta. Tyoa waiyahene hoka kasani Jesus xaneneheta hatyo ewaikoheraha koata aokaha.

<sup>1</sup> Hatyaoseta Jesus xane tyokeheta kanowa ako hoka haikoaheta halakoiya maniya, xane kaokeheta hawenakala. <sup>2</sup> Hatyaoseta kaokeheta hoka kolatyaha hatya maetonanehare exetolisoakala kakoita enomana. Jesus waiya ityakekoneha hoka nexa maetonanehare hiye: — Nohinaehare, hihalaharehena, koxaka kaxemaisatyakeheta iniyalahare hománe — nexa.

<sup>3</sup> Nexa hoka haiyaharenai xaotyakiyaho kakoa waiyoreterenai ahekohenaha hatyakoiyaharenaiha: — Exe haliti maisa aiminisare Enore — nexahitaha.

<sup>4</sup> Hoka Jesus otya exahekolah hoka nehena: — Xoana hoka hatyohare iniyalahare xahekotita? <sup>5</sup> Xoarehare ala haxerore niraetyaka: “Iniyalahare hománenai atyo kaxemaisatyakeheta”, nerekatihenaite, xoana, “Hativityoahetehena hoka hatohetehena”, nerekatihena koríte? nexa. <sup>6</sup> Hiyaiya, nahotikisaite xomana. Natyo Haliti Ityani atyo iyateliti kakoare notyaonita ali waikoheko halitinai nómane iniyalahare emaisatyaheta maheta — nexa. Hatyaoseta ehaikoa hoka nexa maetonanehare hiye: — Hativityoahetehena hoka hiyehetehena hiyetolisoakala hoka hiyanehetehena hihana xeta — nexa.

<sup>7</sup> Nexa hoka maetonanehare tityoaheta hoka xaneheta hahana xeta.

<sup>8</sup> Kahare haliti wahakoita hoka waiyaha hatyohare hoka mairaha. Hativityoahetehena hoka hiyehetehena hiyetolisoakala hoka hiyanehetehena hihana xeta — nexa.

### *Jesus Hikoa Mateus Ana*

(Marcos 2.13-17; Lucas 5.27-32)

<sup>9</sup> Hatyaoseta Jesus xanehitita ene nalita hoka waiya hatya haliti, Mateus nexarexe, tyokita olo resebityakaose nali hoka: — Hisohena noximi — nexa Jesus ihiye. Hoka Mateus tityoaheta hoka xane exema.

<sup>10</sup> Hatyaoseta Jesus xane Mateus hanako hoka kanakaira. Kanakairita hoka kahare haiyaharenai olo resebityaseharenai, haiyanai iniyalahare nomaseharenai xoaha kaokaha hoka tyokaha mexa haliya hoka kanakairaha Jesus exahe exaotyakiraharenai xoaha kakoa.

<sup>11</sup> Hoka haiyaharenai fariseunai waiyaha Jesus enekonyaha hoka axaha exaotyakiraharenai: — Xoana hoka Xiotaqisase kanakairita exe olo resebityaseharenai exahe iniyalahare tyomiterenai xoaha kakoa? nexaha axahene.

<sup>12</sup> Hoka Jesus sema hatyo exaxanahene hoka nehena: — Mahokakeneharenai atyo maisa wairatyare aokare haomana, hoka hokakiterenai wairatyare aokita haomana.

<sup>13</sup> Maika xahekohena exe iraiti kaxairatyakehenere iraiti waiyexe nanekoa hoka waiyekahalaka xomana. Hiyaiya, nexa atyo:

Kasani maisa kirakahare kafetatyaka nomani naokare. Kasani haliti waiye moka hahinaehare naokita exahe airakoaneharetene naokita.

Hiyaiya, notyoa atyo naotyakisa maheta iniyalahare nomaseharenai, maisa atyo waiyexaharexenai naotyakisa maheta xini — nexa Jesus iniraineha nahalakoa.

### *Jesus Xaotyakiraharenai Maisa Manakairereha Hekoti*

(Marcos 2.18-22; Lucas 5.33-39)

<sup>14</sup> Hatyaoseta João xaotyakiraharenai tyoa kaokaha Jesus ana hoka axahene: — Wiso, exahe fariseunai kahaliki wimanakairita Enore hiyeta. Hoka hiyakiraharenai atyo maisa manakairere Enore hiyeta. Xoana hoka? nexaha.

<sup>15</sup> Hoka Jesus nexa ihiye: — Wenakakoati ana kakaexakatyakehenerenai atyo maisa amaikoharexe, kaiyanityohenere enaliha tyaonita hoka. Hoka haxowakaite kaiyanityohenere kaiyakeheta enekonitaha, hoka hatyo xowaka atyoite manakairehenaha — nexa.

<sup>16</sup> — Exe tehitija: maisa xala hare tinolaharehena imiti xololo hoka imiti waitare kakoa tinolaharetyare. Waiya aliya hoka waitare taose emolisoa hoka halalahitiya imiti xololo hoka exahehariya ehalalakoane moka.

<sup>17</sup> — Exe tehitija: maisa atyo vinho waitarexa kaxomokakere toahiyere militirise nomaka ako. Nikareya kaxomokaka hoka halalakoaiya militirise hoka vinhoxaiya iratyoa

tyotya, exahela militirise hoka mawenekoare. Hatyo hiyeta vinhon waitarexa militirise waitare ako taita kaxomokakita. Nikare hoka waiye — nexa Jesus ihiyeha.

*Jesus Aiyatolokiheta Hatya Ohiro, Xoima Xoaha  
(Marcos 5.21-43; Lucas 8.40-56)*

<sup>18</sup> Jesus iraetata halitinai hiye hoka hatya xekohaseti judeu tyoa kaoka enomana, meholokoa hakaolise kakoa enahalakoa hoka nehena: — Nityani owa waini. Hisohena hoka hikahe hekaokakisa ihiye hoka kaseheta nomani — nexa.

<sup>19</sup> Nexa hoka Jesus xane exema. Exaotyakiraharenai tehtiya xane. <sup>20</sup> Ahotita xanahitaha hoka hatya ohiro kaoka Jesus haliya, ihiniri maniya. 12-terehokoanehena hokakita, timalati hikoata minita ihiyeta. Hatyo tyoa ihinirako maniyata hoka ekaokakisa hakahe inima kilihi hiye.

<sup>21</sup> Exakere ahekohalotyoita: — Nekaokakisa taitaiya nokahe inima kilihi hiye hoka nawaiyehaloheta — nita.

<sup>22</sup> Hatyaoseta Jesus terehoko waiyahokotyoa hoka waiya hatyo ohiro hoka nehena ihiye: — Ehekore nikare hisaonita! Hawaiyehaloheta atyo hityakekone hiyeta — nexa. Exowakita hatyo ohiro waiyehaloheta rotita.

<sup>23</sup> Hatyo najikinita Jesus jiyihitiya xekohaseti hana xeta. Xane kaokehena hoka sema exaimahalikiraha xerati xafityati niyahare. Kahare sema werahaliti, osexati hare hoka <sup>24</sup> nexa ihiyeha: — Xahikoahetehena xityotya alita. Exe xoimahaloti maisa waini xini, nemakitata — nexa.

Nexa hoka koexahalisahene, ehatyaharene aokaha.

<sup>25</sup> Hatyaoseta hikoahetaha hoka Jesus isoa hatyo kamati tyaonitere ako, otokene ekahe hiye hoka kaseheta hoka tityoaheta. <sup>26</sup> Hatyo tahi tyotya hakakoare hatyokoarenai sema.

*Jesus Awaiyeheta Maxoseharenai Exahe Matanakoakohare*

<sup>27</sup> Hatyo nalita Jesus jiyihitiya hoka ahoti, hinamahare maxosehare kawihisexe-matene: — Hairakoaneharenha wiso, Davi jikolahare — nexaha kawiyatayaha.

<sup>28</sup> Hatyaoseta Jesus xane isoa hatyako hoka maxoseharenai xane kaokaha ehaliya hoka Jesus nexa axahene: — Xoana xityakekota nowairatyani xiso kakoa? nexa.

— Há, wityakekota atyo — nexaha.

<sup>29</sup> Hatyaoseta Jesus ekaokakisa hakahe exosenaiha hiye hoka nexa: — Maika kaomaka xityakekone akereta — nexa ihiyeha.

<sup>30</sup> Hatyaoseta exosenaiha waiyeheta hoka waiyakatyarehetaha.

Hatyaoleta Jesus nexa ihiyeha: — Xasemehena, awa atyo xiyakaihenene hatya hiye. Xasemaira niraeni — nexa.

<sup>31</sup> Nexa xakore ihiyeha hoka xanehenahitaha hoka xakaikoatyaha hatyo tahi tyotya hatyo koarenai hiye.

<sup>32</sup> Hatyo hinamaharenai xanehetaha Jesus nonita hoka haiyaharenai kolatyaha mairainehare enomana. Tihanare kamilakoretitene hoka mairainititene. <sup>33</sup> Hatyaoseta Jesus axanekiheta tihanare hoka iraeheta.

Hatyaoleta tyotyaha hakaharetyoaha hoka nexaha: — Maisa xoana xowaka exakere wiyaiyare ali Israel waikoherakoa — nexaha.

<sup>34</sup> Hoka fariseunai nehena: — Kala tihanarenai xekohasehare tyaonita ekakoa hoka aiyatelikisene hoka axanekihitita tihanarenae halitinai nonitata — nexaha.

*Jesus Xane Wenakalatinaikoa Waiyakaty*

<sup>35</sup> Hatyaoseta Jesus xaneta wenakalatinai nihatyaka, aotyakisahitene xahohisakoatyakalati hanako. Iraiti Waiyexe kalorexe enokoatare tahi xakaita ihiyeha. Hoka aiyatelikihitita halitinai, ekahehareha exahe ehokakeneha nonitata.

<sup>36</sup> Jesus waiya haliti hisoakere hoka airakoaneharetayahene. Hatyo halitinai kirakoane tyaonahitaha, exahe makahinaetyakahareha hoka. Motya kalanero makaxaikotyakahare tyaonitere akereta tyaonahitaha hoka.

<sup>37</sup> Hatyaoseta Jesus nexa haxaotyakiraharenai hiye: — Nakairati xírikotyaka atyo kahare. Xakore atyo hoka hatenitiyenai atyo maisa kaharexe. <sup>38</sup> Xaxehena masene xekohasehare hoka axikahitiya hatenitiye hoka irikotyahene — nexa Jesus. (Halitinai xaokaka nikare iraeta).

## 10

### *Jesus Xaotyakiraharenai 12-harenae (Marcos 3.13-19; Lucas 6.12-16)*

<sup>1</sup> Hatyaoseta Jesus kawisa 12-hare haxaotyakiraharenai hoka isa enomanaha iyateliti axanekihenahitaha isekohaliti metalaharenai, tyotya kakaheharexenai exahe hokakiterenai hoka aiyatelikihenahitaha maheta.

<sup>2</sup> Exe atyo 12-hare exaotyakiraharenai nexare: hetatiye atyo Simão, Pedro tehitiya atyo enexarexe, haximarene André kakoa. Tiago haximarene João kakoita, Zebedeu ityaninai atyo. <sup>3</sup> Filipe, Bartolomeu, Tomé, Mateus xoaha. Mateus atyo kalorexe noloxa resebityasehare. Alfeu ityani Tiago, Tadeu, <sup>4</sup> Simão Canaã yere, Judas Iscariotes xoaha. Hatyo Judas atyo Jesus matawatyasehare.

### *Jesus Xaotyakiraharenae Hatene (Marcos 6.7-13; Lucas 9.1-6)*

<sup>5</sup> Hatyaoseta Jesus axikatya hatyo 12-hare halitinai koni. Xanehenaha hoka nexa ihiyeha:

— Awaira atyo majudeuneharenai tyaonitere nali xiyanehena, exahe awa atyo xiyanekahena Samaria yerenai nawenakalanai nali. <sup>6</sup> Xiyanira xatawehena Israel hotyali-nai xahita hotohare. Hatyonai atyo kalaneronai hehanitere akereta tyaonahitaha. <sup>7</sup> Xiyanira hoka xiakai iraiti ihiyeha. “Okoi Xekohaseti enokoatare kalorexe tyaonahitaha”, xexa ihiyeha. <sup>8</sup> Xawaiyehiheta jijikoahiterenai, hokakiti harenai xaiyatelikheta. Xekasekiheta kamatinai enomanaha, xaxanikheta tihanarenai enonyahitaha xoaha. Maxaimanehareta atyo kaxekakita xomana hoka hatyo hiyeta xisehena maxaimanehareta. <sup>9</sup> Awa atyo xakolahena xibosane aka ouro, prata exahe cobre hoko harenai. <sup>10</sup> Xiyanehena hoka awa atyo xisakolane, ximanase hinamate, xiberekatane, xatyakasera harenai xakolatya. Hiyaiya, hakiterenaiya atyo maisa aliyakere makahinaetyakahare tyaonita.

<sup>11</sup> — Xiyanira xikaokehena wenakalati exahe kiranexe wenakalatikoa hoka xatawa haliti waiyexe xahita, hoka waiye moka xiso hoka xisaona ehaliya xiyaneneheta kijiya. <sup>12</sup> Maika xisoahena hatyako hoka xexa: “Wenati waiyexe waoka xomana”, xexa. <sup>13</sup> Hatyoako tyaoniterenai waiye mokaha xiso hoka maika mehexaikohaliti xaoka enomanaha. Hoka maika maisa waiyexeharexeha hoka xemaisaheta enonyahitaha xiraehenere. <sup>14</sup> Aliyako xamani hatyako exahe wenakalati tyaoniterenai maisa waiye mokahitaha xiso, exahe maisa semaxemayaha aokowiyahitaha xiraine hoka maika nalita xiyanehitiya hoka xiberekatane xamokotyahatya xexoakiheta maheta waikohese naliyerenai waiyane maheta. <sup>15</sup> Aliterexe nomita xihiye: imiyanaose Enore axalihenere halitinai xowakiyaite, iniyalahare moka hatyo wenakalati tyaoniterenai Sodoma exahe Gomorra xahexe ite mokahene — nexa Jesus ihiyeha.

### *Howithiharexenai (Marcos 13.9-13; Lucas 21.12-17; 1 Pedro 4.12-16)*

<sup>16</sup> — Xasemelehena: naxikaita atyo xiso halitinai koni kalaneronai xanetere ahox-anai koni akereta. Hiyeta hoka xiriharíra xisaona owi akereta, watyaha maxalijini-harenehare tyaonitere akeretaira xisaona enekonyaha. <sup>17</sup> Xiriharíra xisaona. Hiyaiya, olatyahaite xiso hoka nolokahaite xiso kalorexenai ana, mokonasetyahaite xiso xahohisakoatyakalati hanako. <sup>18</sup> Nohiyetaite xikakolatya xekohaseti exahe kalorexenai ana, axaliha maheta xiso. Hatyo xowakiyaite xiakai iraiti waiyexe enomanaha, exahe majudeuneharenai ana hoka. <sup>19</sup> Awa atyo kolahenaha xiso axahenaha xiso maheta hoka

ximawaiyeharehena xiraene kakoa. Hatyo xowakehena atyoite hoka Enore isehena xomana iraiti xirai maheta. <sup>20</sup> Hiyaiya, xiraehenere atyoite maisa xiraene xini, xakore hoka Xexe Nisekohare atyoite iraehena xikoamaniyata — nexa Jesus.

<sup>21</sup> — Haiyaharenaite haximarene kaiserehare isehena hoka kaxaisakehena. Nikaretaite enexenaiha haisaninaeha mohena. Hoka ityaninaehaite kahalakoahareha hanexenaeha hanityonaeha kakoa hoka axaisakisahene. <sup>22</sup> Tyotyahaite kirawaneha xiso nohiyiti. Hoka xala xamani atyoite tyaona noximi miyanitiye ferakene kijiya hoka hatyo atyoite kaiyakeheta iniyalahare nonitata — nexa.

<sup>23</sup> — Maika hakoa wenakalati tyaoniterenai iniyalahare mohenaha xiso hoka xisecko hakoa xeta. Aliterexe nomita xihye: maisaite komita ene xiyaneta Israel hotyalinai nawenakala nihatyaka hekoti Haliti Ityani tyoaneneheta nahitita.

<sup>24</sup> — Maisa exaotyakirahare haxaotyakisase xahexe tyaonare, exahe wakahare hoka haxekohase xahexe tyaonare. <sup>25</sup> Exaotyakirahare atyoite haxaotyakisase akereta tyao-hena, exahe wakahare hoka haxekohase akereta. “Belzebu, tihanare xekohasehare”, nexahaiya exekohaseha xaokaka hoka ewakaneharenai tehitiyaiya atyoite exahehare nexare niyalahare kakaexaretyaka.

#### *Enore Atyoite Kamairakehena*

(Lucas 12.4-7)

<sup>26</sup> — Xakore atyo hoka awa atyo ximaira halitinai. Hiyaiya, tyotya xoalini hare kaxateroakisakiterenaite maxateroakisakeheta, metahare tyaoniterenaite kawaiyakeheta.

<sup>27</sup> Maika exe makaliroti koni wiwawaharenai niraetere xihye xiyakai halitinai hiye, exahe nawaiyeta niraetere xihye kinatyaxa xiyakaiheta hati maiyeho nalita.

<sup>28</sup> — Awa atyo ximairehena, aisehena hoka xiháre taita aijitere hoka xíyawa max-aisanetere. Hoka maika ximairehena Enore. Hatyoiya atyo mawenekoaretya xiso xiháre, xíyawa harenai kakoita irikati koni.

<sup>29</sup> — Haiya xowaka hinamali kotehalase kabetityakita olo hokosenai xaimanexe. Xakore atyo hoka hatyonaiya atyo maisa ixoita waikoa Enore maxaokareneta. <sup>30</sup> Hoka xiso atyo xisekasenai kakoita tyotya ixihatyakahare tyaonita. <sup>31</sup> Hatyo hiyeta awa atyo ximawaiyehare. Hiyaiya, hisoakere kotehalasenai xahehare atyo xiso.

<sup>32</sup> — Hoka tyotya iraihenere nomaniye aokowihenerenai haotikatita tahite natyoisa niraebaba enokoa tyaonitere haotita. <sup>33</sup> Xala xamani atyo maisa nokoamaniye nawenatyasehare aokowita halitinai haoti hoka natyo tehitiyaiya atyo Baba haoti, “Maisa atyo exe nokoamaniye nawenatyasehare xini”, nomi.

#### *Jesus Hiyeta Atyo Kairawaiyatayakakoita*

(Lucas 12.8-9; 2 Timóteo 1.8)

<sup>34</sup> — Awa atyo motya notyoa waiyexe wenati nakolatya maheta halitinai ana xahena. Notyoa naxalijinihalikisa maheta halitinai. <sup>35</sup> Notyoa atyo naxalijinihalikisa haliti hoka kahalakoahareha hanexenai kakoa maheta, exahe haloti hoka kahalakoahalo maheta hanityo kakoa. Haiyahalonai haimaseronaeha kakoa kahalakoahaloha maheta. <sup>36</sup> Nikare ite hoka haliti nahalakoahare kaheneharexe atyoite ehanako tyaoniterenai terota.

<sup>37</sup> — Xala xamani atyoite awaiyetita hanityo exahe hanexe noxahexe hoka maisaiya atyo aliyakere noximi tyaonita. Xala xamaniya awaiyetita haisaninai noxahexe hoka maisaiya atyo aliyakere noximi tyaonita. <sup>38</sup> Xala taita xamaniya atyo kolatya atyalihose xaimaholatyaka hakamanetyakala niyahare hoka tyaona noximi hoka hatyoiya atyo noximi tyaona. <sup>39</sup> Xala xamani atyoite wenati waiyexe tawita hoka meta atyoite enonita. Hoka xala xamani atyoite nokoamaniye tyaonita hoka nohiyiti waini hoka hatyo atyoite kaoka wenati waiyexe.

#### *Waiyexe Xekaka*

(Mateus 25.34-40; Marcos 9.41; Hebreus 13.1-3; 3 João 5-8)

<sup>40</sup> — Xala xamani atyo waiye mokita xiso hoka waiye atyo mokita natyo. Nikare waiye mokita natyo hoka waiye atyo mokita noxaxikatyasehare Enore. <sup>41</sup> Xala xamani

atyoite waiye moka iraiti xakaisasehare, Enore niraine kakoare aokene hoka kaxekakaite enomana xoalini hare waiyexe hatyo nahalakoa. Xala xamani atyoite waiye mokita waiye maniya tyaonitere, waiye maniya tyaonitere hiyeta hoka, hatyo nahalakoite kaxekaka enomana xoalini hare waiyexe.

<sup>42</sup> — Xotyaxematyia exeharenai: xala xamani atyoite hakobone one wehexere taita isa noxaotyakirihare ana, noxaotyakirihare aohenere hiyeta hoka hatyo nahalakoa atyoite kaxekaka enomana xoalini hare waiyexe — nexa Jesus.

## 11

*João Batista Wakaneharenai Kaokaha Jesus Ana  
(Lucas 7.18-35)*

<sup>1</sup> Hatyaoseta Jesus miyatya hairaine 12-hare haxaotyakiraharenai hiye hoka xanehitiya hatyo nalita, xane aotyakihitiya, xakaihitiya iraiti waiyexe hatyo haliyaseta wenakalati tyaoniterenai koa.

<sup>2</sup> Hatyo xowaka João koxaka berexo ako tyaonita hoka sema Cristo nōmanenai tahi hoka haxaotyakiraharenai axikatyia Jesus axaha maheta. <sup>3</sup> — Xoana hiso etake kaokehenere, xoana hatya korite watyahahitiya?

<sup>4</sup> — Xahaikoahetehena hoka xiakai João hiye xasemehenere, xiayihehene tahi — nexa Jesus. <sup>5</sup> — Maxoseharenai waiyakahitita, mawaiye netonaneharenai waiye netonanehitita, jijikoahiti tawaneharenai waiyehihitita, masemakalaharenai semakahitita, kamatinai kasehitita. Exahe Iraiti Waiyexe atyo kaxakaisakita maoloxaharenae hiye.

<sup>6</sup> Waiye kaiserehare atyo tyakekoterenai natyo hoka maisa amaikoharexe nokakoi — nexa Jesus João xaotyakiraharenai hiye.

<sup>7</sup> João xaotyakiraharenai xaneheta hoka Jesus iraihena João tahi halitinai hiye: — Xiyanehenere maharexakahare xahalakoahenere João xowaka, xoarehare xatyahita xiayiyanaheta? Xoana kána kase hoholati hoholaitere? <sup>8</sup> Hoka xoare xiayiyanaheta? Xoana hatya haliti imiti waiyehare akore xiayiyanaheta? Imiti waiyeharexe ako ijoiterenai atyo tyaonita hati wahaharexe ako. <sup>9</sup> Hoka xiakaihena nohiye: xoare xatyahita xiayiyanaheta? Xoana iraiti xakaisasehare aliterexe? Aliterexe atyo nomita xihiye: xiayihehene atyo iraiti xakaisasehare xahehare. <sup>10</sup> Exakere xairatyoare tyaonita Iraiti Waiyexe nanekoa João tahi:

Hasemehena, naxikatyaita haliti haheta maniya niraini kakoare hoka memere moka ahoti haheta maniya.

<sup>11</sup> — Aliterexe nomita xihiye: João Batista atyo tyotya halitinai xahehare. Xakore hoka xala xamani atyo ekatyahakohareta tyaonita enokoa nali hoka hatyo atyo João xahehare tyaona. <sup>12</sup> João Batista xakaihakaitere xowakiyata kalikini kijiya enokoatare tahi iniyalahare kairaetyakita. Xalijinharexenai iraeta etahi, kasani jiyahaotyahene aokowiyahitaha hoka. <sup>13</sup> Hiyaiya, Moisés exahe iraiti xakaisasehare xoaha xakaiha Enore xaotyakira João kaotyakehenere kijiya. <sup>14</sup> Xityakeko atyo iniraeneha xoakowi hoka xityakeko: João atyo Elias, hatyo haikoahaneheta atyo aokaha. <sup>15</sup> Xala xamani atyo katanakoakore semakatyia maheta hoka maika semehena niraini — nexa Jesus.

<sup>16</sup> — Hoka xoare kakoaite naimenekohena kalikiniyerenai? Kalikiniyerenai atyo motya xoimanai tyokitere wetekokoa akereta tyaonahitaha, hahotyali kawiyatitere hahotyali ana akereta.

<sup>17</sup> “Waemahalikisa wenakakoati anere xerati xakore hoka maisa xaholikoita. Wiyera xafityati anere xerati xakore hoka maisa xitiyita”.

<sup>18</sup> — Hiyaiya, João atyo manakairita, maeraneta vinhoa hoka tyotya nexahitaha: “Tihanare atyo tyaonita ekakoa!” <sup>19</sup> Hoka Haliti Ityani kanakairihena, terehena, hoka nexahitaha: “Xiayihehena, exe haliti atyo kanakairatetyoita, teratetyoita, etake kalorexe noloxa resebetyasehareni exahe iniyalahare nomasehareni xoaha hinaiharel!” Xakore atyoite hoka ekakoitaite Enore nawaiyorene katyakekotyakehena — nexa Jesus ihiyeha.

*Haiyanai Wenakalatiyerenai Maisa Tyakekoahitaha  
(Lucas 10.13-15)*

<sup>20</sup> Hatyaoseta Jesus amaikohare wenakalatinai koa tyaoniterenai hiyeta. Kahare xoalini hare maomakahare waiyexe tyoma ehaotihā hoka maisa halakisahitaha iniyala-hare háomaneha hoka hatyo hiyeta Jesus amaikohare. Hoka nexa: <sup>21</sup> — Kirakoane ite hisaohena, wenakalati Corazim! Kirakoane ite hisaohena, wenakalati Betsaida! Hiyaiya, waiyexenai mawaiyakaharenai kaomakehenere hatyo hinaliyeya atyo kaomakere we-nakalatikoanai Tiro, Sidom xoaha nali hoka hatyo naliyerenaiya atyo koxaka toahiyita halakihenahitaha háomaneha iniyalahare. Hotikisahaiya atyo aokowiha iniyalahare hahalakiraha hoka tyokahaiya atyo tataolate nimere exahe mokahaiya irikati niyehe haseriha hiye. <sup>22</sup> Natyo atyo nomita: Xaxalisati Ferakene ite Enore ite airakoaneharetya Tiro, Sidom xoahanae koa tyaoniterenai xiso Corazim, Betsaida xoahanae koa tyaoniterenai nonitata.

<sup>23</sup> — Exahe xiso wenakalati Cafarnaum nali tyaoniterenai: xoana xiyahekola hiye motyaite enokoa xikaoka xaokita? Xikaxawatyaka atyoite kamatinai tyaonitere nali. Ekoiya atyo maomakahare waiyexe kaomakere wenakalati Sodoma nali, xinali kao-makehenere akereta hoka kalikiniya atyo hekotata tyaonita. <sup>24</sup> Xasemehena, xaxalisati ferakenehena xowakiyaite Enore ite airakoaneharetya Sodoma yerenai xiso Cafarnaum nali tyaoniterenai nonitata — nexa Jesus.

<sup>25</sup> Hatyo xowakiya Jesus nexa: — Abá, hiso atyo enokoa, waikoa xoaha Xekohasehare. Nihalahare hikakoa, hawaiyekehalakehenere hitahi akiti xoimanai exahe mawaiyore-harenai ana hiyeta. Hoka waiyorexe, semarexe tyaohenerenai ana atyo metahare hamoka hitahi akiti. <sup>26</sup> Aliterexe, Abá, hatyoharenai atyo kaomaka hiyaokala exahe haokitere akereta. <sup>27</sup> Baba atyo halakisa nomani tyotya xoalini hare. Maisa atyo xala hare waiyorexe Ityani kakoa. Enexe taita atyo waiyoreta ekakoa. Maisa atyo xala hare waiyorexe Enexe kakoa. Ityani taita atyo waiyoreta ekakoa, exahe haiyaharenai ana awaiyekehalakatene hoka hatyonai tehitija atyo waiyoreta ekakoa — nexa Jesus.

*Xisohena Nonali Hoka Xikawini  
(Lucas 10.21-22)*

<sup>28</sup> — Xisohena nomani, xityotya xiso xikirahareterenai xikolalanai timinitere xi-hiye hoka nekawinikisa xiso. <sup>29</sup> Nokoamaniye nawenatyaseharenai xisaohena hoka xawaiyore noxaotyakiraho kakoa. Natyo atyo nawaiyexehare, maisa atyo noxalijini-harexe, xisaonaiya noximi hoka xikaokaiya xikawinini niyahare. <sup>30</sup> Xoalini hare xisoma naokitereharenai atyo maisa howitharexe xini, kolare namokitere xiheno atyo amala — nexa Jesus ihiyeha.

## 12

*Jesus Atyo Sábado Xekohasehare  
(Marcos 2.23-28; Lucas 6.1-5)*

<sup>1</sup> Hatyo najikinita, sábado xowaka Jesus jiyejena trigo xafityaka koni. Hoka exaotyaki-raharenai nakita hoka trigo xawase taikaha hoka esé kanakairaha. <sup>2</sup> Hatyaoseta fariseunai waiyahene hoka nexaha Jesus hiye: — Hiyaiyehena, hiyaotyakiraharenai sábado xowaka wiyaotyakisakaho mahokoanetiterehare tyomahitaha — nexaha.

<sup>3</sup> Hoka Jesus nehena: — Xoana maisa xasemare Davi, ihinaeharenai xoaha nakita hoka tyomehenere? <sup>4</sup> Davi atyo isoa Enore hanako hoka nakairati Enore anere fetatyaka kanakaira hahinaeharenai kakoa. Nikare xakore xaotyakisatyaho mahokoanetita hoka. Sacerdotenai taita xakore nikare kanakairita hatyo nakairati hoka.

<sup>5</sup> — Xoana maisa xakaixaritita babera Moisés xaotyakira xairatyoare tyaohenerenanecko? Sábado xowaka atyo sacerdotenai Iraexatyakalati Hanako hakahitaha xakore hoka maisa atyo xaotyakiyaho aokitere akereta tyaonareha. Xakore hoka maisa atyo kairaitakere etahiha.

<sup>6</sup> — Aliterexe nomita xihije: ali hatya hatyo hati xahehare tyaonita. <sup>7</sup> Xawaiyoretaiy exakerexe xairatyoare tyaohenere iraiti waiyexe nanekoa nehenere: “Kasani maisa kirakahare kafetatyaka nomani naokare. Kasani haliti waiye moka hahinaehare naokita exahe airakoaneharetene naokita”, nitere kakoa hoka maisaiya iniyalahare xamokita haliti waiyexeharexe. <sup>8</sup> Hiyaiya, Haliti Ityani tehitia atyo sábado Xekohasehare — nexa Jesus ihiyeha.

*Jesus Awaiyehiheta Nirakahexe Kahe  
(Marcos 3:1-6; Lucas 6:6-11)*

<sup>9</sup> Hatyaoseta Jesus, hatyo nalita xaneheta hoka xane xahohisakoatyakalati hana xeta. <sup>10</sup> Xane isoa hatyoako hoka hatyo nali hatya haliti hamaniya nirakahexe tyaonita. Hatyaoseta haiyaharenai Jesus iraeharetyaha aokowiterenai emaxaiminirene xaotyakisatyaho hiyeta axehenahene: — Xoana wiyaotyakisakahohiyetaiya waiyehena wawairatya sábado xowaka? nexaha.

<sup>11</sup> Hoka Jesus nehena: — Xikakalaneroxereya hoka exoaiya tolokoako sábado xowaka hoka maisaiya xiye hititene? <sup>12</sup> Haliti atyo kalanero xahexe. Hiyeta hoka sábado xowaka haiyanai wakahinaetya aokita wiyaotyakisakaho — nexa.

<sup>13</sup> Hatyaoseta Jesus nexa hatyo haliti nirakahexe hiye: — Haimahena hikahe — nexa. Aimatya hakahe hoka waiyeheta, hakakoa hamaniya kahe kakoa tyaoneheta.

<sup>14</sup> Hatyaoseta fariseunai hikoaheta hatyoakota. Ehareha Jesus hiye hoka aisahene aokowihenaha hoka iraekakoahenaha, ahekohenaha haxaisanahene tahi akiti.

<sup>15</sup> Jesus hatyo tahi sema hoka hatyo nalita xaneheta. Hoka kahare haliti xane exema hoka hokakiterenai tyotya aiyatelikheta. <sup>16</sup> Hatyaoseta halitinai hiye hatahi akiti maxakaisakene aoka.

<sup>17</sup> Nikarexe tyaona iraiti xakaisasehare Isaías iraetera akereta kawenatyakeheta ma-heta. Exakerexe atyo xairatya:

<sup>18</sup> Owene atyo nowakanihare naohenere, nawaiyititere, nihalahare mokita. Nisekohare ite nisa enomana hoka waiye ahekotya tyotya halitinai kakoa.

<sup>19</sup> Maisaite ehareta halitinai hiye, maisaite kinatyaxa iraeta halitinai kakoa. Maisaite xala hare semita iniraine wenakalati naho.

<sup>20</sup> Maisaite katyahita atya kano taikoane, maisaite ewakatita xaokanatyakalati ikalira aokanaitere. Hekoite aiyateretyoa wenati waiyexe maniya hoka ekakoita moka halitinai hatyoaho.

<sup>21</sup> Waikoheko nihatyaka tyaoniterenaite atyahaha exahita tyaonaha exema maheta.

*Jesus Atyo Motya Tihanare Kahinaetita Aokaha  
(Marcos 3:20-30; Lucas 11:14-23)*

<sup>22</sup> Hatyaoseta kolatyaha Jesus ana hatya haliti maxosehare, mairainehare. Tihanare nikare mokitene. Hatyaoseta Jesus awaiyehetene hoka waiyakaheta, iraiheta xoaha.

<sup>23</sup> Halitinai waiyene hoka hakaharetyoaha. — Xoana exe haliti ala Davi jikolahare? nexa axakakoaha.

<sup>24</sup> Hoka fariseunai semaha hatyo tahi hoka nehenaha: — Maisata Davi jikolahare xinika. Belzebu tihanarenai xekohaseharetia isa iyateliti enomana hoka axanikihitita tihanarenai halitinai nonitata — nexaha.

<sup>25</sup> Hatyaoseta Jesus otya exahekolaha hoka nehena: — Hakoa waikoheko tyaoniterenaiya kirawanekakoaha hoka maisaiya kinatere tyaonehenahititaha, exaoretyakakoahaiya. Nikareya wenakalati tyaoniterenai exahe halyako tyaoniterenai kirawanekakoaha hoka xaorehaiya. <sup>26</sup> Nikareya Ahalakoahaliti wakaneharenai hatyokakoaha kirawanekakoaha hoka aliyakereya kinatere tyaohenahitityaha? Xaorehaiya hoka maisaiya kinaterehenahititaha hoka kamawenekoaretyakaha rotitaiya. <sup>27</sup> Hoka xiso atyo Belzebu isa haiyatere nomani hoka hatyo kakoa naxanikihitita tihanarenai xaokita. Nikareya hoka xala isa iyateliti xiyaotyakiraharenai ana hoka axanikihitita tihanarenai halitinai nonitata? Nikarexaokita hoka maisaiya tyakekota xiso xiyaotyakiraharenai. <sup>28</sup> Aliterexe

atyo Enore nisekohare niyatere hiyeta naxanikihitita isekohalitinai hoka hatyoharenai atyo hotikijita Enore koamaniya nawenatyaka koxaka kaokehenehrehare xomana — nexa.

<sup>29</sup> — Maisaiya xala hare ijoita haliti kinaterexe hanako hoka kaiwaharetitene maxo-  
latyakahareta. Olatene hotohariya atyo hoka hatyaosetaiya kolaharetene ehanakota.

<sup>30</sup> — Xala xamani atyo maisa kahinaetyare natyo hoka kahalakoahareta atyo nokakoi,  
xala xamani atyo maisa ahohisakoatyare nohakakoani hoka exaoretita atyo.

<sup>31</sup> — Hiyeta hoka nomita: tyotya halitinai iniyalahare tyomitereharenai aty-  
oite kamaotyanetyakeheta, exahe Enore kairaeharetyakiterahare tehitiya atyoite ka-  
maotyanetyakeheta. Hoka xala xamaniya atyo Isekohaliti Waiyexe iraeharetya hoka  
maisaiya atyo aliyakere kaxemaisatyakehitita. <sup>32</sup> Xala xamaniya iraeharetya Haliti Ityani  
hoka enajikini maniya emaotyanetyaka aoheta hoka kamaotyanetyakehetaiya atyo.  
Hoka xala xamaniya atyo iraeharetya Isekohaliti Waiyexe hoka maisaiya atyo aliyakere  
kaxemaisatyakehitita, kaliniye waikohekao exahe etare tyohitiyere waikohekao xowaka  
hoka kamaotyanetyakehitita.

### *Atya, Atyali Xoaha*

(Lucas 6.43-45)

<sup>33</sup> — Atyali waiyexe xahiyoka xaokowita hoka atya kate waiyexe xafitya. Atya kate  
waiyexe atyo maisa ewaxirali kaliye, atya kate ewaxirahare atyo maisa waiyeri kaliye.  
Tyotya atyanai atyo irínaí hiyeta waiyekahalaharetaha.

<sup>34</sup> — Xisonae atyo xikahenehare owi akereta. Maisa xawaiyexe hoka aliyakeriya  
waiyexe xiraihena? Aliyakere xamani xiyahekola hoka xiyahekola akereta xahikoaita  
xikanasakota. <sup>35</sup> Haliti waiyexe atyo kahare xoalini hare waiye ahekoita hoka hatyo akiti  
iraeta. Hoka haliti mawaiyexeharexe atyo kahare xoalini hare ewaxirahare ahekoita  
hoka hatyohare iniyalahare tahi atyo iraeta.

<sup>36</sup> — Xasemehena niraini: miyanitiye xowaka Enore axalihenere halitinai xowakaite  
hatya xakini iraehetehena iniyalahare iraehenere tahi Enore hiye. <sup>37</sup> Hatyo xirainenai  
hiyeta atyoite xawaiyekahalaharehena, xoana aliterexe xamani iniyalahare xisoma,  
xoana maisa xamani hoka — nexa Jesus.

### *Fariseunai Waiyaha Aokowyahitaha Waiyexe Nomaka*

(Marcos 8.11-12; Lucas 11.29-32)

<sup>38</sup> Hatyaoseta haiyanai xaotyakiyaho kakoa waiyoreterenai, fariseunai xoaha ne-  
henaha Jesus hiye: — Kasani wiyaiya xoalini hare hománe waokowita, wityakeko maheta  
hiso, Xaotyakisatiye — nexaha.

<sup>39</sup> — Kalikiniyerenai atyo maisa waiyexe, maisa tyakekoreha. Axahitaha xoalini hare  
nomaka tyakekoha maheta. Xakore hoka maisaiya xoare hare kaomakita ewaiyaneha  
maheta. Iraiti xakaisasehare Jonas tyahenere akere taitaite kahotikisaka enomanaha  
tyakekoha maheta. <sup>40</sup> Jonas atyo hanamaki ferakene, hanamaki makene xoaha tyaona  
onexere najako. Nikare tehituyaite Haliti Ityani hanamaki ferakene, hanamaki makene  
xoaha tyaona waikoako.

<sup>41</sup> — Xaxalisati ferakenite Nínive nali tyaoniterenai tityoaha hoka iraeharehena xiso.  
Hiyaiya, halakisaha atyo iniyalahare háomaneha, semaha Jonas niraene hoka. Hoka  
natyo atyo nomita: kalikini ali tyaonitere atyo Jonas xahehare. <sup>42</sup> Xaxalisati ferakenite  
xekohasetiro Sabá yolo ite tityoaha hoka iraeharehena xiso. Hiyaiya, sekota atyo tyaona  
sema maheta Salomão nawaiyore xaotyakiranai. Hoka natyo atyo nomita: kalikini ali  
tyaonitere atyo Salomão xahehare — nexa.

### *Isekohaliti Iniyalahare Haikoahaneheta Haliti Ana Tahi*

(Lucas 11.24-26)

<sup>43</sup> — Xasemehena, isekohaliti iniyalahare hikoahetehena haliti milakota hoka xane  
tonakoaita maonexakoahare akiti, tawita hakawininaose. Maisaiya kaokita hoka <sup>44</sup> nita:  
“Nahaikoahetaite nohani nali xeta, notyohenere nalita”, nita. Hatyaoseta haikoa-  
heta hoka hati aokitere firakore, iyomakore, waiye xomokakotyakere ana kaokihitita.

<sup>45</sup> Hatyaoseta haikoaheta hoka xane nolokita hahotyali 7-harenai isekohalitinai exa-hehare niyalaharenai, hoka tyotyaha xane tyaonahitaha nali. Hatyo hiyeta hatyohare haliti nawenane hetatiye xahehare howitiharene tyaonita. Hoka nikarite kalikiniyerenai iniyalahare tyomiterenai tyaonaha — nexa Jesus.

*Jesus Nityo, Iximarenenai Xoaha Irae Aokowita Ekakoa*

(Marcos 3.31-35; Lucas 8.19-21; Hebreus 2.11-13)

<sup>46</sup> Hatyaoseta Jesus iraetata halitinai kakoa hoka inityo, iximarenenai kaokaha. Menanakita tyaonaha, kasani iraeha ekakoa aokowiyahitaha hoka kawisahene.

<sup>47</sup> Hatyaoseta hatya xane nexa Jesus hiye: — Hasemehena, hityo, hiximarenenai owene menanaka, iraeha aokowiyahitaha hikakoa — nexa ihiye.

<sup>48</sup> Hoka Jesus nehena: — Xalatya mama? Xalatya noximalininae? nexa. <sup>49</sup> Hatyaoseta hotikisa haxaotyakiraharenai ana hoka nehena: — Xiyaiyehena, owene atyo mama, noximalininai. <sup>50</sup> Xala xamani atyo tyaonita Baba enokoa tyaonitere akitere akereta hoka hatyonai atyo noximalini, noximaloni, mama naokita — nexa.

## 13

*Xafityatiye Tahi*

(Marcos 4.1-9; Lucas 8.4-10)

<sup>1</sup> Hatyo ferakeneta Jesus hikoaheta hatyakota, xane Galiléia xa haliya, xane tyoka one haliya hoka aotyakihena halitinai. <sup>2</sup> Ekakoita kaharehena halitinai hohisakoita enomana hoka xane kakoha kanowa aka hoka tyoka. Hoka halitinai atyo kaiholokoa tityoaha.

<sup>3</sup> Xakaihakahena ihiyeha kahare xoalini hare tahi hoka metahare hairaine moka enomanaha hoka nehena: — Hatya haliti xane fitya maheta hahananeharese. <sup>4</sup> Fitita ene hanakatise hoka haiyasenae exoa ahoti kilihi hoka kotehalanai kanakairehetene tyotya. <sup>5</sup> Haiyasenai ehananese exoa kahare sehali tyaonitere akiti, inira waikohe akiti. Hatyo hanakatisenae haxerore hikoa, komita ene maisa waikohe aka hoka. <sup>6</sup> Hatyaoseta kamai hikoahena hoka watere aisehetene, maisa hateko katyahareta hoka. <sup>7</sup> Haiyasenae exoa katohere tyaonitere akiti hoka katoherenae kinatere exahita hoka jiyahaotyahene, maisa aliyakere tyaona xaka. <sup>8</sup> Haiyasenae atyo exoa waiyexe waikohe akiti, tyaonaha atyo waiyehare. Haiyanai 100-se kaséta, haiyanai 60-se kase, haiyanai 30-se xoaha atyo kaseha — nexa.

<sup>9</sup> — Xala xamani atyo katanakoakore semakatyá maheta hoka maika semehena niraini — nexa Jesus ihiyeha.

<sup>10</sup> Hatyaoseta Jesus xaotyakiraharenae iraehenaha ekakoa: — Xoana hoka metahare hiraine hamoka hoka haotyakisahitene? nexaha.

<sup>11</sup> Hoka Jesus nehena: — Xomana atyo Enore hotikijita eko maniya nawenatyaka metahareterehare hoka enomanaha atyo maisa hotikisarene. <sup>12</sup> Xala xamani atyoite xoalini hare kakoare hoka kaxekakihitiyaite enomana hoka exahexe tyaona enomana. Hoka xala xamani atyoite maisa xoare hare enali aka hoka exahe inira kakoare hoka kaiyakeheta atyoite enonitata. <sup>13</sup> Hiyeta hoka metahare namokita niraini enomanaha. Hatyo halitinai atyo wahakotyahitaha xakore hoka maisa waiyakatyareha, semahitene xakore hoka maisa waiyekhalakere enomanaha. <sup>14</sup> Nikare tyaonahitaha iraiti xakaisahhare Isaías iraetere akereta tyaonaha maheta. Exakere Isaías xairatyat:

Xasemitene xakore hoka maisaite waiyekhalakita xomana, xawahakotyaita xakore hoka maisaite xoare xiayita.

<sup>15</sup> Exe halitinai xahekola atyo maisa waiyexe, jihotyaha hatanakoakoha exahe haxose-naiha hoka.

Ikoiya awa nikare tyaonahitaha hoka exosenahaiya waiyakaita, etanakoakonahaiya semita, waiyeya exahekolaha tyaonita hoka tyaonehenahitahaiya nokoamaniye hoka waiyeya namohenahitene, nexa Enore.

<sup>16</sup> Hoka Jesus nehitia: — Waiye kaiserehare xiyosenai waiyakaita, exahe xitanakoakonai hoka semakaita. <sup>17</sup> Aliterexe nomita xihiy: toahiya kahare iraiti xakaisasharenai, halitina Enore anere hotyalinai harenai semaha aokowiha exe xasemitere, waiyaha aokowiha ene exe xiyaitere. Xakore hoka maisa aliyakere.

*Jesus Awaiyekehala katya Xafityatiye Tahi  
(Marcos 4.10-20; Lucas 8.11-15)*

<sup>18</sup> — Xasemehena hoka nawaiyekehala katya xomana xafityatiye tahi kakoa, naimenekotya hoka metahare niraehene. <sup>19</sup> Haiyanai xakore atyo semaha iraiti, Xekohaseti enokoatara maniya nawenatyaka tahi akiti hoka maisa atyo waiyekehala kere enomanaha hoka hatyonai atyo hanakatise exoahenere ahoti kilihi akereta tyaonahitaha. Hoka Tihanare tya hoka iyehitita enonyahitaha kairaltyakehenere ihiyeha hoka maotyanehenahititene. <sup>20</sup> Hanakatise exoahenere kaharexe sehalise akiti atyo semehena iraiti waiyexe hoka haihalahareneha kakoa aokahiterene haomanaha akereta. <sup>21</sup> Xakore atyo hoka maisa atyo waha tyaonare exema, maisa katyaharexe hoka. Kirawanehenahene Iraiti Waiyexe hiyeta hoka haxerore halakihititere iraiti xema hawenane. <sup>22</sup> Haiyanai atyo hanakatise exoahenere katohere koni akereta. Semaha xakore iraiti hoka ahekotyahitaha hawenaneha akiti exahe wisekoliti hare kakoa, exahe hawenaneha keharere akiti kakoa hoka maotyanehenahititaha iraiti hoka maisa tyaonareha exema. <sup>23</sup> Hoka haiyanai atyo hanakatise kaxafityakitere waikoheko hoka waiyexe akereta. Hatyonai atyo semaha iraeti hoka tyaonaha exema, exahe waiyekehala kita enomanaha hoka haiyaharenai 100-se, haiyanai 60-se, exahe haiyanai hoka 30-se xahexe kaseta.

*Joio Xafityaka Tahi*

<sup>24</sup> Hatyaoseta Jesus aimenekohitiya enomanaha h̄atāhi. Hoka nehena: — Xekohaseti enokoatara koamaniya nawenatyaka atyo hatya haliti hanakatise waiyexe fititere hamasenekoa akereta atyo. <sup>25</sup> Haxowaka xatini tyotyaha nemakahitaha hoka tya enahalakoahareha hoka fitya manakairatyakahare joio aokahitere trigo koni hoka xaneheta. <sup>26</sup> Hatyaoseta hananehalitinae hikoa hoka kekoareha, kaenaseha. Hoka hatyaoseta manakairatyakahare tehitia kaotyaka. <sup>27</sup> Hatyaoseta ewakaneharenai tya iraehena hatyo masene waikatehare hiye: “Xekohaseti, waiyexe hanakatise takita atyo hafitya himasenekoa. Hoka aliyakere ala hoka manakairatyakahare tehitia tyaona?” nexaha. <sup>28</sup> “Kala hatya wahalakoahare nikare moka wiso”, nexa ihiyeha. Hoka nexa axahene: “Xoana, wamalaheta manakairatyakahare haokita?” nexaha. <sup>29</sup> “Maisaiya”, nexa. “Waiya aliya hoka hatyo xamalahetehena hoka xamalaka tehitiaiya trigo. <sup>30</sup> Kotare trigo exahe manakairatyakahare xoaha kekoareha haxawalita ixirikotyakaha kijiya. Hoka hatyo xowakehenaite hoka nomite ixirikotyaseharenai hiye: ‘Xamalahetaira manakairatyakahare hotohare hoka xolahisetyahene hoka xakeratyahene. Jikiniti maniyaira xirikotya trigo hoka xamokahene nakairati nitini ako’”, nexa ihiyeha.

*Mostardase Tahi  
(Marcos 4.30-32; Lucas 13.18-19)*

<sup>31</sup> Hatyaoseta Jesus aimenekohitiya enomanaha hatisa tahi. Hoka nehena ihiyeha: — Xekohaseti enokoatara koamaniya nawenatyaka atyo mostardase akereta. Hiayiaya, hatyo atyo kiranexe haiyanai hanakatise nonitata. Hoka hatya haliti atyo hatyo hanakatise fehena <sup>32</sup> hoka kekoarehena atyo hoka haiyanai xahehare kate atyo tyaonita. Hatyo hiyeta atyakate atyo tyaonita hoka kotehalasenai waiyehenene hoka haiheha tyomitaha ekanohinai koni — nexa.

*Kaorehetyakalati Tahi  
(Lucas 13.20-21)*

<sup>33</sup> Hatyaoseta Jesus aimenekohitiya enomanaha h̄atāhi. Hoka nehena: — Xekohaseti enokoatara koamaniya nawenatyaka atyo hatya ohiro iya kaorehetyakalati hoka trigohe

kakoa kaketatitere akereta. Hoka hatyaoseta wahasehena hoka tamomotere akereta atyo — nexa Jesus ihiyeha.

<sup>34</sup> Jesus iraihena halitinai kakoa hoka haxaimenekola kakoa taita iraeta ihiyeha. Maisa xoare nexa iraexe ihiyeha hamaxaimenekolahareneta. <sup>35</sup> Iraiti xakaisasehare xairala akereta kawenatyakeheta maheta nikare Jesus iraeta. Exakere iraiti xakaisasehare xairala:

Niraehenaite hoka noxaimenikoli kakoa taitaite niraе ekakoaha. Masemakahare tyaooniterehare hetati waikohe kaomakehenere xowakiyere tahi akitite noxakai ihiyeha.

#### *Jesus Awaiyekehala katya Xaimenekotyati Tahi*

<sup>36</sup> Hatyaoseta Jesus xaneheta halitinai nonita hoka xane isoa hatyako hoka exaotyaki-raharenai xane ehaliya hoka axehenahene: — Hawaiyekehala katya womana manakairatyakahare tahi akiti — nexaha.

<sup>37</sup> Hoka Jesus nexa: — Haliti Ityani xaokaka atyo, “Hanakatise waiyexe xafityasehare”, nomita. <sup>38</sup> Tyotya halitinai xaokaka atyo, “Masenekoa”, nomita. Enore maniya tyaooniterenai xaokaka atyo, “Waiyexe hanakatise”, nomita. Ahalakoahaliti maniya tyaooniterenai xaokaka atyo, “Manakairatyakahare”, nomita. <sup>39</sup> Tihanare xaokaka atyo, “Enahalakoahare”, “Manakairatyakahare xafityasehare”, nomita. Miyanitiye ferakene xaokaka atyo, “Ixirikotyakaosehena”, nomita. Anjonai xaokaka atyo, “Hatenitityenai”, nomita. <sup>40</sup> Hatyo manakairatyakahare kamalakaka hoka kaxawatyakehenere irikati koni akereta tehitija atyoite miyanitiye xowakehena hoka <sup>41</sup> Haliti Ityanite axikatya anjonai ahohisakoatya maheta iniyalahare nomaseharenai exahe iniyalahare axomokaneki-henerenai <sup>42</sup> hoka xawatyahene ite irikati kalorexe kiritere koni. Hatyo nalite tiyahenaha masakare exahe, “karai, karai”, nexaite mohenaha haikolinaiha. <sup>43</sup> Hatyaosetaite Enore maniya tyaooniterenaite waiye tyaoonaha hanexeha Enore nawenakala. Nalite weroka tyaoonaha kamae akereta — nexa. — Xala xamani atyo katanakoakore semakatya maheta hoka maika semehena niraini — nexa Jesus haxaotyakiraharenai hiye.

#### *Jesus Hanama Tahi Kakoa Aimene kohitiya*

<sup>44</sup> — Xekohaseti koamaniya nawenatyaka atyo xoalini hare kaloxaimanexe metahare tyaoonitere hakoa waikohekao akereta hoka hatya haliti kaokehene hoka ateroak-ihitiyerene akereta. Hoka ihalahare hoka xane betetya tyotya haxiyeharenai hoka haikoaheta hoka hatyo waikohe iyitere akereta atyo.

<sup>45</sup> — Xekohaseti koamaniya nawenatyaka tehitija atyo hatya haliti pérolanai niyase-hare akereta. <sup>46</sup> Hoka kaoka hatya pérola kaloxaimanexe hoka tyotya betetya haxiyeharenai, haikoaheta hoka hatyo sehalise pérola iyitere akereta atyo.

<sup>47</sup> — Xekohaseti koamaniya nawenatyaka atyo maka kaxawatyakitere one xaiya hoka hiyitere kahare kohase hawareharexe xakini akereta. <sup>48</sup> Kahare kohase isoa enako hoka mairatyatiyenai noloka ahikoatyahene kaiholokoa hoka tyokaha hoka imexakonisahene maheta. Waiyexe kohasenai haitinihareha ako mokahita hoka ewaxirahare kohasenai atyo xawatyahitaha. <sup>49</sup> Miyanitiye xowaka tehitijaite nikareta tyaoona. Anjonaite xane haware moka mawaiyexehareharenai waiyexeharexenai nonitata. <sup>50</sup> Hoka xawatyahaita mawaiyexehareharenai irikati kalorexe kiritere koni. Hatyo nalite tiyahenaha hoka haikolinaiha, “karai, karai”, nexa mokaha — nexa Jesus.

<sup>51</sup> Hatyaoseta Jesus axa haxaotyakiraharenai: — Xoana, tyotya exe noxakaitere xihiye akiti waiyekehala xomana? nexa ihiyeha.

— Há, waiyekehala womana — nexaha ihiye.

<sup>52</sup> Hoka Jesus nexa: — Hatya haliti kaxaotyakisakitere Enore nawenanaho kakoa atyo kaisaniye hotyali akereta hoka xoalini hare hatyakaira hiyeta waitare exahe toahiyere, waiyexe makere iyihititere hoka ijitere haiyanityo haisaninai ana akereta — nexa.

#### *Jesus Haikoaheta Nazaré Xeta*

(Marcos 6.1-6; Lucas 4.16-30)

<sup>53</sup> Hatyaoseta Jesus halakisa hairaene metaharexe hoka hikoaheta hatyo nalita <sup>54</sup> hoka xaneheta hawenakala xeta. Hoka hatyo nali aotyakijita xahohisakoatyakalati hanako hoka iniraene semehenerenai hakaharetyoaha hoka axakakoahenaha: — Aliyotala enawaiyore tyoita enomana? Exahe iyateliti hoka maomakahare waiyexe tyomita? <sup>55</sup> Xoana maisa hoka etake hati nomasehare ityani xini? xoana maisa hoka Maria ityani xini? Xoana maisa hoka Tiago, José, Simão, Judas xoaha naxenane xini? <sup>56</sup> Xoana maisa hoka iximalonenai xini ali tyaonita? Hoka aliyotala exehare iniyatere tyaonita enomana? nexaha, <sup>57</sup> maisa awaiyetyareha Jesus hoka.

Hoka Jesus nehena: — Iraeti xakaisasehare atyo kaxaiminisakita hakakoare. Xakore atyo hoka ewaikohera, enawenakala, ehana nali atyo maisa kaxaiminisakere — nexa.

<sup>58</sup> Maisa tyakekoreha hoka hatyo hiyeta Jesus maisa kahare tyomita maomakahare waiyexe hatyo nali.

## 14

### *João Batista Kamane Tahi (Marcos 6.14-29; Lucas 9.7-9)*

<sup>1</sup> Hatyo xowakiya Herodes Galiléia koa xekohaseti tyaonita hoka sema Jesus tahi. <sup>2</sup> Semene hoka nexa hawakaneharenai hiye: — Kala maisa hoka João Batista kaseheta. Hiyeta hoka kahare maomakahare waiyexe tyomita — nexa.

<sup>3</sup> Koxaka Herodes niraene xema João otokaha hoka olatyahene hoka berexotyakalati ako mokahene Herodias xemere. Hatyo nahitita Herodes tyaonita ene hatyo ohiro kakoa, iximarene Filipe exanityo xakore hoka.

<sup>4</sup> João Batista koxaka hatyo nahitita nexa Herodes hiye: — Xaotyakiyahlo atyo mahokoanetita hiximarene exanityo kakoa hawenane.

<sup>5</sup> Herodes aisene aokowi, xakore hoka mairita judeunai João iraiti xakaisasehare aokahitere hiyeta.

<sup>6</sup> Hatyaoseta Herodes nawenanaose ferakene xane hikoa hoka hisehaliti tyomaha kalore hoka Herodias ityani xoimahaloti holikoahena tyotyaha enahalakoa hoka awaiyetya exoholikoane Herodes <sup>7</sup> hoka nexa xoimahaloti hiye: — Xoarenai xamaniya nisa homana haoka hoka haxa natyo hoka niseniya homana, alitere naokita. Maisa namaoseraita xini — nexa.

<sup>8</sup> Hanityo xaotyakira ximita nehena: — Xama hisa nomani kalikinita João Batista seri balatoahекоа — nexa xoimahaloti Herodes hiye.

<sup>9</sup> Herodes semene hoka amaikohare. Xakore hoka hatyo iraihenere tyotyaha hakaix-akalaharenai haotita hiyetaiya atyo maisa aliyakere maxekaneta xoimahaloti ana.

<sup>10</sup> Hoka hatyaoseta axikatyia sorarenai irikotyaha maheta João Batista seri berexo akota.

<sup>11</sup> Kolatyaha eseri balatoahекоа hoka isahene xoimahaloti ana hoka kolatene hanityo ana. <sup>12</sup> Hatyo najikinita João xaotyakiraharenai semene hoka tyoaha kolahenahitaha ehare hoka fityahene. Fityahene hoka xane xakaihahene Jesus hiye.

### *Jesus Tyaisa Kahare Halitinai (Marcos 6.30-44; Lucas 9.10-17; João 6.1-14)*

<sup>13</sup> Hatyaoseta Jesus sema João kamane tahi hoka kanowako xaneheta hatyo nalita. Hoka hawawaharenai xane maharexakiti xeta. Hoka halitinai ana waiyekehalakita xanehenere akiti hoka xaneha exema tonareha hawenakalataha. <sup>14</sup> Hatyaoseta Jesus exoahena kanowa akota hoka waiya kahare halitinai hoka airakoaneharyahene, aiyatelikheta tyotyaha hokakiterenai.

<sup>15</sup> Hatyaoseta makehena hoka exaotyakiraharenai tya iraeha Jesus kakoa hoka nexaha ihiye: — Hiyaiyehena, makehena wihiye. Ali maharexakiti maisa xoare hare aka. Haxikahetehena exe halitinai hoka xanehetaha hoka xaneha wenakalatinai hoka iyaha nakairati hoka kanakairaha — nexaha.

<sup>16</sup> Hoka Jesus nexa: — Maisaiya xoare maheta exe halitinai xanehitita. Xisota xisehena nakairati enomanaha — nexa ihiyeha.

<sup>17</sup> — Winali atyo 5-tohase nakairati, hinama kohase xoaha taita — nexaha.

<sup>18</sup> — Xamehenene ali — nexa Jesus.

<sup>19</sup> Isahene enomana hoka hatyaoseta irai halitinai kakoa tyokaha maheta ime koa. Hatyo najikinita iya 5-tohase nakairati, hinama kohase xoaha hoka wahakoty enoxeta hoka iraexatya Enore hiye. Hoka taikasetya nakairati hoka isene haxaotyakiraharenai ana hoka exaotyakiraharenai irakene halitinai ana. <sup>20</sup> Hatyaoseta tyotyaha kanakairaha hoka fakatehareha. Hatyaoseta exaotyakiraharenai imexakoaheta emawaneha hoka 12-te koho kaise makere mokaha nakairati mawane kakoare. <sup>21</sup> Hatyo kanakairehenerenai atyo 5.000-hare ena taita. Ohironai, xoimanai tehitiya kahare kanakairaha, hoka maisa atyo ohironai, xoimanai harenai kaxihatayakita.

#### *Jesus Tonita One Heno*

(Marcos 6.45-52; João 6.15-21)

<sup>22</sup> Hatyo najikinita Jesus haxaotyakiraharenai kakoa irai hoka kakohahenahitaha kanowako hoka xanehenahitaha enaheta maheta halakoiya. Hoka hatyo nase Jesus jinaheta halitinai. <sup>23</sup> Jinaheta halitinai najikinita Jesus xane kakoha tyairi henose hawawaharenai iraexatya maheta. Makehena ihiyea hoka hatyo nali hawawaharenai tyaonita. <sup>24</sup> Hatyo xowaka kanowa koxaka nekesexehetehena xanehitita exaotyakiraharenae kakoare. One takoiyaxala mokotoita kinatyaxa kanowa hiye hoka hoholati hoholasekoatyahitene, xanehenahititere maniyata hoholatita hoka. <sup>25</sup> Hatyaoseta okoi ferakoahena hoka Jesus xane hikoaheta enomanaha, tonita one heno. <sup>26</sup> Hatyaoseta exaotyakiraharenai waiyaha Jesus netonane one heno hoka mairaha hoka nehenaha: — Kala maisa hoka isekohaliti! nexaha hoka hamairaneha kawiyatayaha.

<sup>27</sup> Hoka Jesus nexa: — Awa atyo ximaira, natyo ta. Awa atyo ximaira natyo — nexa ihiyea.

<sup>28</sup> Hoka Pedro nehena: — Xekohaseti, hisota atyo hoka hakawisa natyo hoka natona one heno hatyo hisaonitere kijiya — nexa.

<sup>29</sup> — Ahá, hisohena — nexa Jesus.

Nexa ihiye hoka Pedro exoa kanowa akota hoka tohena one heno Jesus maniya.

<sup>30</sup> Hatyaoseta hoholati hoholala kehexa. Mairehena hoka isoahena onexa. Hoka kawiyatya Jesus ana: — Xekohaseti, hotohetehena natyo — nexa.

<sup>31</sup> Hixerore Jesus aimaty hakahe enomana, otoheta Pedro hoka nehena: — Xoana hoka inira hityakekota! Xoanere hoka maisa hityakekore? nexa.

<sup>32</sup> Hatyaoseta hatyo hinamanai kakohaheta kanowa ako hoka hixerore hoholati memakeheta.

<sup>33</sup> Exaotyakiraharenai meholokoa awaiyetyaha Jesus hoka nexaha: — Aliterexe kore Enore Ityani hiso — nexaha.

#### *Jesus Xane Genesaré Nali*

(Marcos 6.53-56)

<sup>34</sup> Hatyaoseta imahotyoaha hoka xane kaokaha Genesaré koa nali. <sup>35</sup> Hatyo nali halitinai ana Jesus waiyekahalahare hoka xane kaexakatyaha tyoty hatyokoa tyaoniterenai. Semaha Jesus kaokene hoka kahare kolatyaha hokakitina enomana. <sup>36</sup> Hoka axahitene, kasani inima kilihi hiye hekoti ekaokakisaha hakaheha aokowiyahitaha. Hoka tyoty hakaheha ekaokakihenerenai inima kilihi hiye kinaterehitita.

#### *Jesus, Judeunai Xoaha Nawenanaho Tahi*

(Marcos 7.1-13)

<sup>1</sup> Hatyaoseta haiyaharenai fariseunai, haiyanai judeunai xaotyakiraho kakoa waiyoreterenai xoaha tyoaha Jerusalém nalita, Jesus kakoa iraeha maheta, hoka axe-henahene: <sup>2</sup> — Xoana hoka maisa hiyaotyakiraharenae tyaonareha wahetakomaniyere-harenai xaotyakira xema? Hiyaiya, maisa tihahisoareha hanakairaha nahitita — nexaha.

<sup>3</sup> Jesus nehena ihiyeha: — Hoka xoana atyo hoka xiso maisa xisaonare Enore xaotyakira xema hoka xahetakomaniyereharenai xaotyakiraho xema taita xisaonita?

<sup>4</sup> Hiyaiya Enore atyo nexa:

Waiyira xaiminihena xexe, xityo hoka.

Nexa tehitiya:

Xala xamaniya atyo hanexe, hanityo iraeharetya hoka waiye xaisaka, nexa.

<sup>5</sup> — Hoka xiso atyo exakerexe xaotyakijita: hatyaiya kaoloxere kahinaetya maheta ene hanexe, hanityo xakore hoka nexaiya ihiyeha, “Enore ana nisene”, nexaiya hoka maisa kahinaetita hanexe exahe hanityo hoka xomana atyo hatyohare ehekoreta. <sup>6</sup> Nikare maisaiya hanexe exahe hanityo waiye aiminijita hoka xomana atyo hatyohare ehekoreta. Hatyo hiyeta nikare atyo xaotyakijita hoka xahalakijita atyo Enore xaotyakira hoka xisaonita atyo xiyaotyakisakaho xema taita.

<sup>7</sup> — Xiso atyo teraharetyoarenai! Isaías nika aliterexe exakere xairatya xitahi:

<sup>8</sup> Exe halitinai waiye iraetaha notahi, nexa Enore, xakore hoka exahelolahita atyo seko tyaponita noniti.

<sup>9</sup> Maisa atyo awaiyetyahitaha natyo kaisere xini. Hiyaiya, halitinai xaotyakira kakoa atyo aotyakisahitaha hoka Enore xaotyakiraho aokahitaha.

### *Jesus Xakai Aiyalaharetiterehare Wawenane*

(Marcos 7.14-23)

<sup>10</sup> Hatyaoseta Jesus ahohisakoatya halitinai hoka nehena ihiyeha: — Waiye xasema hoka waiyekehalaka xomana: <sup>11</sup> Maisa atyo hatya kanasako ijoitere xini aiyalaharetita enawenane. Hoka ekanasakota hikoahititerehare atyo aiyalaharetita enawenane — nexa Jesus.

<sup>12</sup> Hatyaoseta exaotyakiraharenai xane kaokaha ehaliya hoka nehenaha: — Haseme-hena, hiraetera maisa waiyeta fariseunai hiye. Xoana hatyo akiti hasemita? nexaha ihiye.

<sup>13</sup> Hoka Jesus nexa ihiyeha: — Tyotya hananehaliti Baba enokoa tyaponitere maxafer-aharene atyoite kamalakakeheta. <sup>14</sup> Awa atyo ximawaiyahare ekakoha. Hatyonai atyo maxoseharenai hoka maxoseharenai xotokahisase tyaponiterenai akereta. Maxosehare atyoite hatya maxosehare otokahijita hoka hatyo hinamanaite xane tolokoako exoaha — nexa Jesus.

<sup>15</sup> Hatyaoseta Pedro axene: — Hawaiyekehalakatya womana hatyo metaharexe hiyakaitere tahi — nexa.

<sup>16</sup> — Xoana, haiyanai akerexeta xiso, maisa waiyekehalakere hekoti xomana? nexa Jesus. <sup>17</sup> — Hiyaiya, xoare xamani atyo hatya kanasako ijoita hoka enajako atyo xaneta. Hatyaoseta atyo hikoahitita ehare hiyeta. <sup>18</sup> Hoka xoare xamani atyo ekanasakota, exahekola emahiyase hiyeta hikoita hoka hatyohare atyo aiyalaharetita enawenane. <sup>19</sup> Hiyaiya, mahiyaseti hiyeta atyo iniyalahare xahekotyati tyoita, xaisati, ohiro watyalisaka, xoalini hare iniyalahare. Hiyaiya, hatyo iniyalahare xahekotyati hiyeta tehitiya haiya xowaka haliti kaiwita, maoseraita, iraeharetita. <sup>20</sup> Hatyoharenai atyo aiyalaharetita enawenane. Hoka himatihahisoaneharetaiya atyo hikanakaira hoka hatyohare atyo maisa aiyalaharetyare hawenane — nexa Jesus.

### *Jesus Aiyatolokiheta Cananéia Yolo Ityani*

(Marcos 7.24-30)

<sup>21</sup> Hatyaoseta Jesus xaneheta hatyo nalita, xane Tiro, Sidom xoaha nali. <sup>22</sup> Xane kaoka hatyo nali hoka hatya ohiro Canaã yolo hikoa enomana hoka kawiyatya enomana: — Hairakoanehalohena natyo, Xekohaseti Davi jikolahare! Nityani xoimahaloti tihanare kamilakoretita hoka maisa waiye tyaponare — nexa.

<sup>23</sup> Nexa hoka Jesus mema tyona. Hatyaoseta exaotyakiraharenai xane kaokaha ehaliya hoka nehenaha: — Haxikahetehena exe ohiro. Hiyaiya, tyoita wiyema hoka kirasaka kawiyatya minita — nexaha.

<sup>24</sup> Hatyaoseta Jesus nexa: — Nokaxaxikatyaki atyo Israel hotyalinai ana taita. Hatyonai atyo kalaneronai hehaniterenai akereta tyaconahitaha — nexa.

<sup>25</sup> Nexa hoka ohiro tyoa meholokoa ikiji haliya hoka nehena: — Hakahinaehena natyo, Xekohaseti! nexa.

<sup>26</sup> — Maisa atyo ehekoreta xini xoimanai nonitata kaiyakeheta nakairati hoka kaxawatyakita kajolonai ana — nexa Jesus.

<sup>27</sup> Hoka ohiro nexa: — Alitere haokita, Xekohaseti. Xakore atyo hoka kajolonai tehitija atyo kanakairita nakairati holoxo exoahena exekohasenaiha mexane katyahe hoka — nexa ihiye.

<sup>28</sup> — Ohiro, kalore atyo hityakekota! nexa Jesus. — Haokitere akeretaite kaomaka — nexa. Nexa taita ihiye hoka hatyo ohiro ityani exowakita kinatoloheta.

#### *Jesus Aiyatelikheta Kahare Halitinai*

<sup>29</sup> Hatyaoseta Jesus hatyo nalita haikoaheta hoka xane Galiléia xa haliya. Hatyaoseta xane kakoha tyairi henose, hoka tyoka. <sup>30</sup> Hatyaoseta hatyo Jesus tyaonitere nali kahare halitinai xaneta hoka kolatyahitaha mawaiye netonaneharenai, maxoseharenai, mairaeneharenai, mawaiyehalitinai exahe haiyanai hokakiterenai xoaha hoka mokahitene ikiji haliya hoka tyotya aiyatelikihenahitene. <sup>31</sup> Halitinai hakaharetyoaha, waiyaha mairaeneharenai niraeneheta, mawaiyehalitinai niyatereheta, mawaiye netonaneharenai nawaiye netonaneheta exahe maxoseharenai waiyakareheta hoka. Hoka ihalahareha Israel yerenai nEnorexa kakoa.

#### *Jesus Tyaisa 4.000-hare Halitinai*

(Marcos 8.1-10)

<sup>32</sup> Hatyaoseta Jesus kawisa haxaotyakiraharenai hoka nehena: — Nakanakaharetita exe halitinai. Hanamakihena tyaconahitaha nohaliye hoka ali maisa xoare nakairati aka. Maisa naxikahenahitene matyaisakaharahitaha naokowiye, waiye aliya hoka exoaha hanaka hiyeta ahotoyah — nexa.

<sup>33</sup> Hoka exaotyakiraharenai axehenahene: — Hoka aliyakereya ali maharexakiti wikaokehena nakairati exe halitinai ana? Hisoakaha atyo — nexaha.

<sup>34</sup> — Xoanama tohase nakairati xinali? nexa Jesus axahene.

— Sete tohase nakairati, haiyanai kohase xoaha — nexaha.

<sup>35</sup> Hatyaoseta Jesus irae halitinai hiye hoka waikoa tyokaha. <sup>36</sup> Tyokaha hoka hatyaoseta isaha Jesus ana sete tohase nakairati exahe kohasenai xoaha hoka: — Ehekore nakairati hisa womana, Abá — nexa iraexatya Enore hiye. Hatyaoseta taikasetene hoka isene haxaotyakiraharenai ana, hoka hatyonai irakene halitinai ana. <sup>37</sup> Tyotyaha kanakairaha hoka fakatehareha. Exaotyakiraharenai kaisehenahitaha kohokijinai ako hoka 7-te kaisero emawaneha imexehenahitaha. <sup>38</sup> Hatyo kanakairehenerenai atyo 4.000-hare enanai taita. Ohironai, xoimanai tehitija kahare kanakairaha, hoka maisa atyo ohironai, xoimanai harenai kaxihatayakita.

<sup>39</sup> Hatyaoseta Jesus axikaheta halitinai. Hatyo najikinita kakohaheta kanowako hoka xane Magadā koa nali.

## 16

#### *Jesus Axaha Tyoma Maheta Waiyexe Maomakahare*

(Mateus 12.39; Marcos 8.11-13; Lucas 12.54-56)

<sup>1</sup> Hatyaoseta haiyaharenai fariseunai, saduceunai xoaha xaneha Jesus kakoa iraeha maheta, kasani hasakaharetyahene aokowiyahitaha hoka xoalini hare nomaka aokaha ihiye hoka waiyaha maheta, xoana aliterexe xamani Enore nalita tyoita iniyatere, maisa xamani.

<sup>2</sup> Hoka Jesus nehena: — Makehena atyo xihiye hoka xita: “Waiye akaite wihiye, hiyaiya, enokoa xotyakoa”, xita. <sup>3</sup> Nikare weta hoka xita: “One ite wihiye, hiyaiya, xotyaka exahe makalikoa xoaha”, xita. Xawahakohena atyo enokoa hoka waiyekahalakita atyo xomana hatyoharenae. Xakore hoka maisa atyo waiyekahalakere xomana kalikini

kaotyakitereharenai. <sup>4</sup> Kalikiniyerenai atyo maisa waiyexe, maisa tyakekohatiyeha! Xoalini hare nomaka atyo aokaha nohiye tyakekoha maheta. Xakore hoka Jonas tyaohenere akere taitaite kaomaka enomanaha tyakekoha maheta — nexa ihiyeha. Hatyaoseta kikisoaheta enonyahita hoka xaneheta.

*Fariseunai, Saduceunai Xoaha Xaotyakiraho  
(Marcos 8.14-21)*

<sup>5</sup> Xanehenaha halakoia maniya hoka exaotyakiraharenai maotyaneha nakairati hakolalaha.

<sup>6</sup> Hoka Jesus nehena: — Xasemeheha, xirihalira fariseunai, saduceunai xoaha kaorehityakala kakoa — nexa.

<sup>7</sup> — Kala nakairati wimakolarehenere hiyeta nikareta — nexa exaotyakiraharenai hatyo kakoaha iraikakoahenaha.

<sup>8</sup> Jesus sema iniraikakoaneha hoka nehena: — Xoana hoka xiraikakoita nakairati ximakolarehenere hiyeta? Xoana hoka inira xityakekone tyaponita? <sup>9</sup> Xoana maisa waiyekehalkere xomana? Xoana maisa xotyare 5-tohase nakairati nirahenere 5.000-hare halitinai ana? Exowaka, xoanamate kohokiji xekaiseheta? <sup>10</sup> Xoana maisa xotyare sete tohase nakairati nirahenere 4.000-hare halitinai ana? Exowaka, xoanamate kohokiji xekaiseheta?

<sup>11</sup> — “Maika xirihare fariseunai, saduceunai xoaha kaorehityakala kakoa”, nomi xakore hoka maisa atyo nakairati tahi xini niraeta. Xoana maisa waiyekehalkere xomana? nexa.

<sup>12</sup> Hoka hatyaoseta exaotyakiraharenai ana iniraene waiyekehalka. Maisa nakairati kaorehityakala kakoa kaxaikoawihia maheta xini hoka fariseunai, exahe saduceunai xaotyakira kakoa irihareha maheta.

*Pedro Irae Jesus Hiye  
(Marcos 8.27-30; Lucas 9.18-21)*

<sup>13</sup> Hatyaoseta Jesus xane wenakalati Cesaréia de Filipe maniya. Hatyo nali axehena haxaotyakiraharenai: — Xala halitinai aokita natyo Haliti Ityani? nexa.

<sup>14</sup> — Haiyanai atyo João Batista aokahitaha hiso. Haiyanai tehitiya atyo Elias aokahitaha hiso. Nikare haiyanai Jeremias aokahitaha hiso. Haiyanai tehitiya iraiti xakaisasehare aokahitaha hiso — nexaha ihiye.

<sup>15</sup> — Hoka xiso atyo xala xaokita natyo? nexa Jesus ihiyeha.

<sup>16</sup> Simão Pedro nehena ihiye: — Hiso atyo Enore Kalorexe Aohenere. Hiso atyo Enore Ityani — nexa.

<sup>17</sup> — Waiye kaiserehare nikare hiraeta, Simão, João ityani — nexa Jesus. — Maisa haliti xini awaiyekehalkatene homana. Baba enokoa tyonitere atyo awaiyekehalkatene homana — nexa Jesus Pedro hiye.

<sup>18</sup> — Hiyeta hoka nomita hihiye: hiso atyo Pedro hoka exe sehalis henoite notyoma nohani. (Tyota eko maniya tyoniterenai xaokaka, “Nohani”, nita). Maisaiya efaharenai kinatere tyonita exahitaha. <sup>19</sup> Nisaite homana enokoa majiholatyakala. Hoka xoare xamani atyoite hamahokoanetya ali waikohekoa hoka enokoa nali atyoite kamahokoanetyaka tehitiya. Hoka xoare xamani atyoite haoka ali waikohekoa hoka kaxaokaka tehitiya atyoite enokoa nali — nexa.

<sup>20</sup> Hatyaoseta Jesus haxaotyakiraharenai hiye hatyohare maxakaisakene haiyanai hiye aoka.

*Jesus Irae Hakamane, Hakaseneheta Tahi  
(Marcos 8.31-9.2; Lucas 9.22-27)*

<sup>21</sup> Hatyaoseta Jesus iraehena mametaharenehare haxaotyakiraharenai hiye: — Jerusalém terota noxani hoka hatyo nalite judeunai nityohalitiranai, saduceunai xekohaseharenai, xaotyakiyaho kakoa waiyoreterenai harenaite iniyalahare axomokakihena natyo kalore. Nokaxaisakite hoka hanamaki ferakene najikinitaite nokaseheta — nexa.

<sup>22</sup> Hatyaoseta Pedro nolokene haware hoka nehena ihiye: — Maisaiya nikareta xini. Maisaiya nikare hikaxomokakita, Xekohaseti — nexa.

<sup>23</sup> Hoka Jesus ehaikoahareheta hoka nexa Pedro hiye: — Hakikisoahetehena nahitita, Ahalakoahaliti! Hiso atyo sehali kajiyakoatyakitere akereta nahotiri hisaonita. Hiyaiya, haliti xahekola akereta atyo hahekoita, maisa atyo Enore ahekoitere akereta xini — nexa.

<sup>24</sup> Hatyaoseta Jesus nexa haxaotyakiraharenai hiye: — Xala xamani atyo tyaona nokoamaniye aokowihena hoka maika hatyota maotyanoawi hoka maika kolatya haberekotyaka niyahare atyalihose xaimaholatyaka hoka tyaona noximi. <sup>25</sup> Hiyaiya, xala xamani atyoite wenati waiyexe tawita hoka meta atyoite enonita. Xakore hoka xala xamani atyoite nohiyiti kaxaisaka hoka kaiyakeheta atyoite hoka wenati waiyexe nali hikoa. <sup>26</sup> Hoka xoare mahetaiya hatya haliti hakakoare waikohekoxa xiyejhali harenai kakoa tyaona hoka hatyaoseta waini? Maisaiya xoare hare bakatya hoka ekasekihititene.

<sup>27</sup> Hiyaiya, Haliti Ityanite tyoheta Hanexe werokene kakoa, anjo haomanerena kakoa hoka sema halitinai tahi hoka enómanenaiha akereta mohenahene.

<sup>28</sup> — Exeharíra xotyaxematy: ali haiyaharenai tyaonitereharenate maisa wainahitaha hamawaiyaneneharahita Haliti Ityani tyohetehenere xowaka nahitita — nexa.

## 17

### *Jesus Ana Kaotyaka Moisés, Elias Xoaha*

(Marcos 9.2-13; Lucas 9.28-36)

<sup>1</sup> Hatyaoseta 6-ki ferakene najikinita Jesus noloka Pedro, haximarene kakoarenai Tiago, João xoaha hoka hatyonai kakoa taita xane tyairi wahaharexe heno. <sup>2</sup> Hoka nali hawareharexe tyaona ehaotyahitaha. Itiho weroka tyaona, motya kamai. Exahe inimanai hoka iyomate tyaona, motya xaokanatyakalati. <sup>3</sup> Hatyaoseta Moisés, Elias kaotyaka hoka hatyo hanamahare Jesus xaotyakiraharenai waiyaha iniraeneha Jesus kakoa.

<sup>4</sup> Hatyaoseta Pedro nehena: — Ehekoreta ali wisoa, Xekohaseti. Haokaiya atyo hoka notyoma hanama hatirise exaose. Hatya homanere, hatya Moisés anere, hatya Elias anere xoaha — nexa.

<sup>5</sup> Maisa halakihenere hekoti hairaine Pedro hoka kaiminiti werokali kaotyaka ehaoha hoka hatyo konita semaha iraiti: — Exe atyo Nityani, Noxiyakawali. Kalore aihala-halinikijita natyo. Xasemaxematyaira iniraine — nexa ihiyeha.

<sup>6</sup> Exaotyakiraharenai semaha hatyo iraiti hoka kalore mairaha hoka exoaha hatiho kakoa waikoa.

<sup>7</sup> Hatyaoseta Jesus tyoa totohenahitene hoka nehena: — Xainakoahetehena, awa atyo ximaira — nexa.

<sup>8</sup> Hatyaoseta waiyahokotyoahenahitehenaha xakore, Jesus takitehena waiyehenahitaha.

<sup>9</sup> Exoahenahitehenaha tyairi henota hoka Jesus aotyakisahene hoka waiyehenahere maisa xala hare hiye xakaiha aokita Haliti Ityani kasehetehenere kijiya.

<sup>10</sup> Hatyaoseta exaotyakiraharenai axene: — Xoanere hoka xaotyakiyaho kakoa waiyoreterenai Elias hotohare ite tyoheta aokahitaha? nexa.

<sup>11</sup> Hoka nexa: — Aliterexe atyoite Elias hotohare tyoa hoka tyotya xoalini hare memere mohena. <sup>12</sup> Hoka natyo atyo nomita xihye: Elias atyo koxaka tyoa. Xakore hoka maisa waiyekhalakita enomanaha hoka iniyalahare mokahene haxahekolaha akereta. Nikareta tehitiyaita Haliti Ityani iniyalahare mokaha — nexa Jesus ihiyeha.

<sup>13</sup> Hatyaoseta exaotyakiraharenai ana waiyekhalaka Jesus niraene. João Batista xakaka nikare iraeta.

### *Jesus Awaiyeheta Hatya Xoimahaliti*

(Marcos 9.14-29; Lucas 9.37-43)

<sup>14</sup> Hatyaoseta xanehenahitaha haliti hisoakere koni xeta hoka hatya haliti tyoa Jesus haliya hoka meholokoa hakaolise kakoa hoka nexa: <sup>15</sup> — Xekohaseti, hairakoaneharenha nityani! Wainitata exahe kalore kaweta ihiye. Hatyahareta hoka haiya xowaka

ixoita irikatyaoe exahe onexaiya hoka. <sup>16</sup> Notyoa ekakoa hiyaotyakiraharenai ana hoka maisa xoana mokahitene — nexa.

<sup>17</sup> Hoka Jesus nehena: — Haliti matyakekoneharenai, mawaiyexehareharenai! Otene kijiyaito notyaohena xihaliya? Otene kijiyaito naiyasetyoa xikakoa? Xisohena xoimahaliti kakoa ali.

<sup>18</sup> Hatyaoseta Jesus watyali tihanare hoka kikisoaheta hoka xoimahaliti waiyeheta rotita.

<sup>19</sup> Hatyaoseta hawawaha heko axehenaha Jesus exaotyakiraharenai: — Xoanala hoka maisa aliyakere etake tihanare waxanikihitita? nexaha.

<sup>20</sup> — Komita maisa xityakekore hoka — nexa Jesus. — Aliterexe nomita xihiye: xityakekotaiya, exahe mostardase akerehare inira hekoti xityakekotaiya hoka xexaiya exe tyairi hiye: “Hakikisoahena alita, hiyane exe maniya”, xexaiya ihiye, xityakekota hoka kikisoaiya. Nikareya xisaona hoka iyatelitiya tyaona xomana hoka tyotya xoalin-ihariya xisoma — nexa. <sup>21</sup> — Hoka hatyohare isekohaliti atyo iraexatyati, manakairiti xoaha xema taita kaxaxanikisakihitita — nexa.

### *Jesus Iraehitiya Hakamane, Hakaseneheta Xoaha Tahi*

(Marcos 9.30-32; Lucas 9.43-45)

<sup>22</sup> Exaotyakiraharenai hohisakoa Galiléia nali hoka Jesus nexa: — Haliti Ityanite kaxekakehena halitinai ana <sup>23</sup> hoka aisahenite. Xakore hoka hanamaki najikinitaite hoka kaseheta — nexa. Nexa hoka exaotyakiraharenai amaikohareha kalore.

### *Iraexatyakalati Hanako Xekaka Olo Tahi*

<sup>24</sup> Hatyaoseta Jesus haxaotyakiraharenai kakoa kaokaha wenakalati Cafarnaum nali. Kaokaha hoka kalorexe noloxa resebityaseharenai tyoa axaha Pedro: — Xoana xiyaotyakisahare maisa isare olo Iraexatyakalati Hana niyahare? nexaha.

<sup>25</sup> — Há, ijita — nexa Pedro ihiyeha.

Hatyaoseta Pedro xane isoahetehena hatyako hoka Jesus hotohare irae ekakoa: — Simão, xoanere atyo hiyahekola? Xala ala ijita olo xoalinihare xaimane aliyere gekohaseti ana: ali tyaoniterenai xamani, hakoatarenai kore? nexa.

<sup>26</sup> — Hakoatarenae — nexa Pedro.

— Ehekore — nexa Jesus. — Nikare atyo ala hoka ali tyaoniterenai maisa xoare maheta olo isahitaha — nexa. <sup>27</sup> — Xakore hoka maisaiya atyo wexamaikohalikisahitene. Hatyo hiyeta hiyane haxawahihena rotita mairatise. Maika hanoloka haihikoatyahetatiyekohase hanolohenera hoka ekanasakoite olo hokose hiyaiya hoka hatyoite noxekani, hiyekane hakakoanexe. Hatyaosetaite hiyane hisa noxekani, hiyekane niyahare enomanaha — nexa.

## 18

### *Xala Xamanite Masakare Kalorexe Tyaohena*

(Marcos 9.33-37; Lucas 9.46-48; Filipenses 2.3-5; 1 Pedro 3.4; 5.5)

<sup>1</sup> Hatyo xowaka exaotyakiraharenai tyaoha Jesus haliya hoka axehenahene: — Xekohaseti enokoa nalitare kalorexe tyaohena hoka xala atyo masakare kalorexe hatyo nali? nexaha.

<sup>2</sup> Nexaha hoka Jesus kawisa hatya xoima hoka enahetaha mokene <sup>3</sup> hoka nehena: — Aliterexe nomita xihiye: maisaiya xehawareharetita xawenane exahe xoima akereta xisaohitita hoka maisaiya hatyo nali xiyaneta. <sup>4</sup> Hoka xala xamaniya maxahenerehare exe xoima tyaonitere akereta tyaona hoka hatyo atyoite kalorexe tyaona enokoa nali.

<sup>5</sup> Xala xamani atyoite waiye moka xoima exakerehare hoka natyo atyo waiye mokita.

### *Iniyalahare Henehare*

(Marcos 9.42-48; Lucas 17.1-2)

<sup>6</sup> — Hoka exehare xoima mokosenai tyakekotereharenai natyoziya atyo hatya iniyalahare aomanekisa hoka halakihenahitaha hawenaneha nokoamaniye hoka ehekoretaiya

atyo kaxawatyaka one kaloxere xaiya sehalì kaloliro mehetyakalati kaxolatyaka ihino hiye hoka maisa ahowitikisa xoimanai nawenane maheta.

<sup>7</sup> — Kaxiyani, halitinai iniyalahare aomanekijita haiyaharenæ hoka hatyo hiyeta haiyanai halakisahitaha hawenaneha waiyexe maniyata! Nikare terota atyoite kawenatyakehena. Xakore hoka kirakoane atyoite kaxomokaka nikare axomokaniki aka-henere — nexa.

<sup>8</sup> — Hiyeta hoka hikahe exahe hikiji harenai iniyalahare aomanekijita hiso hoka hirikotene hoka haxawatene. Ehekoretaiya himakahehare, himakijihare hiyane wenati waiyexe nali. Hoka maisaiya atyo ehekoreta xini hikahe, hikijinai kakoita mainikere hikaxawatyaka irikati mawakenehare nali hoka. <sup>9</sup> Maika hiyose iniyalahare aomanekijita hiso hoka holokotya hiyene hoka haxawatene. Ehekoretaiya hamaniya xoserore kakoa hiyane wenati waiyexe nali hoka maisaiya atyo ehekoreta xini manene hiyosenai kakoita hikaxawatyaka irikati mawakenehare nali hoka.

*Kalanero Metene Tahi  
(Lucas 15.3-7)*

<sup>10</sup> — Xiriharira hoka maisa ximaxaiminirita hatya hekoti exehare xoimairanai. Aliterexe niraehena xihiye, ekahinaetyaseharenaiha anjonai atyo tyaotaha minita Baba enokoa tyaponitere haliya.

<sup>11</sup> — Hiyaiya, Haliti Ityani atyo tyoa taweheta, iyeheta maheta mititereharenæ — nexa.

<sup>12</sup> — Xoanere atyo xiyahekola? Hatya halitiya 100-ri kakalaneroxere hoka haliya meta hoka xoanaiya tyaohena? Halakisaite 99-ri tyairi heno nisakoatyahitere nalita hoka xane ite taweheta kalanero metehenere. <sup>13</sup> Aliterexe nomita xihiye, kaokeheteniya hoka ihalahareya ekakoa, hatyo 99-ri mameteneharenai tyaoniterenai xahexe. <sup>14</sup> Nikareta tehtiyya Xexe enokoa tyaonitere. Kasani maisa hatya hekoti exehare xoimanai meta aokare.

*Hihinaehareya Iniyalahare Tyomehena Hoka  
(Lucas 17.3-4; Gálatas 6.1; Tiago 5.16-20)*

<sup>15</sup> — Hihinaehareya iniyalahare tyoma hikakoa hoka hiyane hahotikisa iniyalahare enómane enomana. Maika hatyoharenai metahare hisoma, xiso hinamanai taita. Semaiya atyo hiraene hoka hihinaehare atyo waiye maniya hamoheta. <sup>16</sup> Maisa semaxemaita hiraine hoka hiyanehitia hatya exahe hinamahare kakoa enomana hoka hiraehitiya ekakoa ehaotyahita hoka xoalinhare kairaetyakehena hoka semaha. <sup>17</sup> Hoka maisaiya exahe semita hatyonai niraene hoka maika tyakekohatiyenai hotyali hiye hiyakaini. Hoka maika maisa sema aokowita hatyonai niraene hoka majudeunehare akereta, kalorexe noloxa resebityasehare akereta hamokene.

*Xaokati, Mahokoanetyati Xoaha  
(Mateus 16.19; João 20.23)*

<sup>18</sup> — Aliterexe nomita xihiye: xoare xamaniya atyoite xamahokoanitya ali waikohekua hoka enokoa nali tehtiyaiya atyoite kamahokoanityaka. Nikare ite xoare xamani xaoka ali waikohekua hoka enokoa nali tehtiyia atyoite kaxaokaka.

<sup>19</sup> — Xasemehena: ali waikohekua atyoite hinama hare xinekonitarenai iraexahenaha hoka axehenaha hatyohare makere hoka hatyohare atyoite Baba enokoa tyaonitere tyoma enomanaha. <sup>20</sup> Hiyaiya, aliyako xamaniya atyoite hinamahare, hanamahare ho-hisakoita nokoamaniye tyaonahitaha hoka natyo tehtiyia atyoite enekoniha notyaonita — nexa Jesus ihiyea.

*Wakahare Mahakaiserexe  
(Mateus 6.14-15; Lucas 17.3-4; Efésios 4.32; Colossenses 3.13)*

<sup>21</sup> Hatyaoseta Pedro xane Jesus haliya hoka axehenene: — Xekohaseti, nohinaehareya fera iniyalahare mohena natyo hoka xoanamakiya nomaotyaniheta iniyalahare exomokala natyo? Xoana, 7-kiya hoka ehekore? nexa.

<sup>22</sup> — Maisaiya. Maisaiya atyo 7-ki taita himaotyanehitita. Maika kahareki himaotyanehitita — nexa Jesus. <sup>23</sup> — Hiyaiya, wenati Xekohaseti enokoatare koa maniya atyo motya hatya kalorexe ewakaneharenai kakotanetere hoka habakatyaka aokitere ihiyeha akereta. <sup>24</sup> Habakatyaka aokita hoka hetatiye kaoka enomana, hatyo atyo kalore kakotanetene. <sup>25</sup> Xakore hoka ewakanehare maisa kaoloxere hoka maisa xoare kakoa bakatita hakotane. Hoka exekohase ebetetyaka aoka wakaharenai akereta, exanityo, ityaninai, tyota ixiyehare harenai hoka habakatyaka aoka. <sup>26</sup> Hoka ewakanehare hakaolise kakoa meholokoa haxekohase nahalakoa hoka axene: “Awa atyo hikaholawaka nokakoi, nabakatyaithe hiso!” nexa. <sup>27</sup> Nexa hoka exekohase airakoaneharetene hoka emaiyareheta ekotane hoka halakisene hoka xaneheta.

<sup>28</sup> — Hikoaheta enonita hoka ahalakoatya hahinaehare hakitere kakoa hoka hatyo kakotanetene 100-hokose olo hoka otoka hatyo hahinaehare ekoloako hoka xalawasekoatene hoka nehena ihiye: “Hikakotanetere natyo habakahena!” nexa. <sup>29</sup> Nexa hoka ihinaehare hakaolise kakoa meholokoa enahalakoa hoka axehenene: “Awa atyo hikaholawaka nokakoi, nabakatyaithe hiso”, nexa. <sup>30</sup> Nexa xakore hoka maisa tyakekota iniraene, hoka xane berexoako mokene ebakala hakotane kijiya. <sup>31</sup> Hatyaoseta haiyaharenai wakaharenai waiyaha nikare tyaothenere hoka maisa waiyeta ihiyeha hoka xane xakaihahene haxekohaseha hiye. <sup>32</sup> Hatyaoseta exekoseha kawiheta hatyo wakahare hoka nehena: “Kaxiyani, himaisakaisere. Tyota hikakotanetere natyo atyo nemaiyareheta, hirae nohiye hoka. <sup>33</sup> Xoana hoka maisa hairakoaneharitita hihinaehare nairakoaneharenere hiso akereta?” nexa ihiye. <sup>34</sup> Exekohase ehare ihiye hoka axikatene berexoako xeta, iniyalahare mokahene maheta, tyota hakotane bakahetehenere kijiya.

<sup>35</sup> Hatyaoseta Jesus halakihena hairaine hoka nexa: — Nikare ite Baba enokoa tyaonitere moka xiso, maisa ximaotyanehitita kaiserehare xihinaehare iniyalahare mohenere xiso hoka — nexa.

## 19

### *Jesus Irae Halakisakakoatiheta Tahi*

(Mateus 5.31-32; Marcos 10.1-12; Lucas 16.18; 1 Coríntios 7.10-11)

<sup>1</sup> Jesus hatyohare tahi irae najikinita, xaneheta Galiléia koa nalita hoka xane Judéia koa maniya Jordãoxa halakoiya. <sup>2</sup> Kahare haliti xane exema. Hoka hatyo nali kaokaha hoka hokakiterenai aiyatelikiheta.

<sup>3</sup> Hatyaoseta haiyanai fariseunai tyoaha ehaliya hoka hasakaharetyahene maheta axehenahene: — Xoana wiyaotyakisakaho hiyetaiya hatya haliti waiyehena xoalini hare xemere halakiheta haiyanityo?

<sup>4</sup> Hoka Jesus nehena: — Xoana maisala xakaixaretyare iraeti kaxairatyakenere nehenere: “Hetati xowaka Enore tyoma ena, ohiro”, nehenere? <sup>5</sup> Hatyo xowaka nexa Enore:

Hiyeta hatya haliti halakisa hanexe, hanityo hoka tyaona haiyanityo kakoa hoka hatyo hinamanaithe haterore tyaonaha, nexa.

<sup>6</sup> — Hatyo hiyeta maisa atyo hinamaha xini, xakore hoka hateroreha atyo. Hatyo hiyeta halitiya maisa exaorehitita Enore hahotalita mohenerehare — nexa Jesus.

<sup>7</sup> Hatyaoseta fariseunai axehitiyene: — Hoka xoana atyo hoka Moisés atyo hatya halitiya halakiheta aokowihena haiyanityo hoka halakisati baberanexa isa enomana hoka axikahetene aoka? nexaha ihiye.

<sup>8</sup> Hatyaoseta Jesus nehena: — Maisa xawaiye xahekolere hoka Moisés nikare irae. Xakore hoka maisa atyo hetati kaomakehenere xowakiya nikarexe ene xini. <sup>9</sup> Hiyeta hoka nomita: hatya halitiya halakiheta haiyanityo, maisa xakore hatya watyaliyene hoka xaneya hatya ohiro kakoa tyaohitiya hoka iniyalahareya atyo tyoma. Hatyaiya xane ehalakirahalo kakoa tyaohitiya hoka iniyalahareya atyo tyoma — nexa.

<sup>10</sup> Hatyaoseta Jesus xaotyakiraharenai nehenaha: — Nikarexeya hatyo haliti nawenane haiyanityo kakoa hoka ehekoretaia atyo maisa xoare maheta kakaianityotyakita — nexaha.

<sup>11</sup> Hoka Jesus nehena: — Exe xaotyakisati atyo maisa tyotya anere xini. Enore nikare tyona aohenerenai anere taita atyo. <sup>12</sup> Hiayiya, kahare xoalini hare hiyeta atyo haiyaharenai maiyanityota. Haiyaharenai atyo maiyanityohare terota maheta tyaona. Haiyaharenai atyo kaxaikoharetyakaha hoka maisa aliyakere kaiyanityohitaha. Haiyanai atyo maisa kaiyanityoreha Enore koamaniya hawenaneha hiyeta. Hoka xala xamani atyo exe xaotyakiye xema tyaona aokowita hoka tyaona — nexa Jesus.

*Jesus, Xoimanai Xoaha*

(Marcos 10.13-16; Lucas 18.15-17)

<sup>13</sup> Hatyo najikinita haiyaharenai kolatyaha xoimamokosenai Jesus ana, ekaokakisa hakahe ihiyeha hoka iraexatya etahiha maheta. Hoka exaotyakiraharenae mahoconetya etyoaneneha enomana.

<sup>14</sup> Hoka Jesus nehena: — Kotare xoimanai tvoa nomani, awa atyo xamahokoanitya etyoaneneha nomani. Hiayiya, Xekohaseti enokoatare waikoherakoa atyo exe xoimairanai tyaonitere akereharenai anere — nexa.

<sup>15</sup> Hatyaoseta ekaokakisa hakahe xoimanai hiye hoka iraexatya enomanaha. Hatyo najikinita xaneheta hatyo nalita.

*Xoimahaliti Kaoloxerexe Kaxiyeharexe Tahi*

(Mateus 13.22; Marcos 10.17-31; Lucas 18.18-30; 1 Timóteo 6.6-10; Tiago 5.1-3)

<sup>16</sup> Hatyaoseta haxowaka xoimahaliti kaoka Jesus ana hoka axehenen: — Waiyexe Xaotyakisatiye, xoareya notyoma waiyexe hoka wenati waiyexe matyotenehare nali noxani? nexa.

<sup>17</sup> — Xoanere hoka xekohaseti waiyexe haokita natyo? Waiyexe atyo haterore, Enore takita atyo waiyexe — nexa Jesus. — Wenati waiyexe matyotenehare koamaniya hisaona haokowita hoka Xaotyakiyenai xema hisaona — nexa.

<sup>18</sup> — Xoarenai hatyo xaotyakiyenai? nexa axene.

Hoka Jesus nexa: — Awa atyo haisa, awa atyo iniyalahare hisoma ohiro kakoa, awa atyo hikaiwa, awa atyo hamaoseratya. <sup>19</sup> Haiminisa hexe, hityo xoaha, hawaiyehena haiyanai hiso hawaiyetyoawitere akereta — nexa.

<sup>20</sup> — Haokitere akereta noxoiminita notyaonita tyotya hatyo xaotyakiyenai xema — nexa. — Xoareya notyomihitiya? nehitiya hatyo xoimahaliti.

<sup>21</sup> Hoka Jesus nexa: — Waiyexe maniya kaiserehare hisaoheta haokowita hoka hiyane tyotya hixiyeharenai habetetya hoka hisa olo maoloxaharenai ana. Nikare ite hisaona hoka hikaoloxere hikaxiyeharexe hisaona enokoa nali. Hatyaosetataite hisoheta hoka hisoa noximi — nexa.

<sup>22</sup> Hatyohare xoimahaliti sema hoka amaikohare hoka xaneheta, kahare kaxiyeharexe hoka.

<sup>23</sup> Xaneheta hoka Jesus nehena haxaotyakiraharenai hiye: — Aliterexe nomita xihiye: howitihare atyo kaoloxere nawenane Xekohaseti enokoatare koamaniya — nexa. <sup>24</sup> — Hoka niraehitiyaita: howitihare atyo kaoloxere nawenane Xekohaseti enokoatare koamaniya. Kamelo howitihare kaxajiyakisakitere awiyahi nakoako xahehare howitini atyo — nexa.

<sup>25</sup> Exaotyakiraharenai sema hatyohare hoka hakaharetyoaha hoka axahene: — Nikarite hoka xalaite kaiyakehetehena? nexaha.

<sup>26</sup> Hatyaoseta Jesus wahakotya enomanaha hoka nehena: — Halitinai ana atyo hatyohare howitihare. Xakore hoka Enore ana atyo maisa xoare hare howitiharexe — nexa.

<sup>27</sup> — Hiayiya, tyotya atyo wahalakiharetyoaha hoka wisoa hiyema. Hoka xoanere ite kaxekakehena womana — nexa Pedro axene.

<sup>28</sup> Hoka Jesus nexa: — Aliterexe nomita xihiye: tyotya xoalinhare Enore ewaitarehetehenere hoka Haliti Ityani tyokehenere haokahakala waiyeharexe heno xowakaite,

xiso nokoamaniye xisaohenerenai tehituyaite xisoka 12-okahakalati heno hoka 12-hotyali Israel hotyalinai xekohasenai xisaona. <sup>29</sup> Hoka tyotya haiyaharenai nohiyiti halakihenere hahaha, haximarenenai, haximalonenai, hanexe, hanityo, haisaninai, hawaikohera harenai hoka kahaliki atyoite hatyoharenai kaxekakeheta enomanaha, wenati waiyexe matyotenehare tehituyaite kaxekaka enomanaha. <sup>30</sup> Hoka kalikini atyo kahare kalorexe tyaoniterenai atyoite wakahare tyaoheta, hoka kahare wakahare tyaoniterenai atyoite kalorexe tyaoheta — nexa.

## 20

### *Uva Katenai Xafityaseharenai*

<sup>1</sup> Jesus nehena: — Enore koamaniya nawenatyaka atyo uva katenai xekohasehare weta xane hoka hatenitiyenai hiye irae hoka hakaha enomana emasenekoa aokitere akereta. <sup>2</sup> Hawenanaho akereta irae ekakoaha, hahoko olo kakoa haki ferakene bakatyahene aokowi hoka axikatyahene hakaha maheta ehananehare koni. <sup>3</sup> Eno kamaihena hoka xanehitiya wenakalati nekesekoa hoka waiya haiyaharenai, maisa xoare tyomareha. <sup>4</sup> Hoka nexa ihiyeha: “Xiyane xisonai tehituya xahaka nomasenikoi. Nabakatyaita xiso enaosexeta”, nexa ihiyeha hoka xaneha. <sup>5</sup> Nikare totahikoa, makakoahena hoka nikareta iraihitiya haiyanai hatenitiye hiye. <sup>6</sup> Komita waikoitehena kamai hoka xanehitiya hoka waiyehitiya haiyaharenai. Hekotata maisa xoare tyomareha hoka nehena ihiyeha: “Xoana hoka waha aka ali xisaonita, maisa xoare hare xisomare?” nexa ihiyeha. <sup>7</sup> “Maisa xala hare iraexe wikkakoa hoka maisa wahakare”, nexaha ihiye. Hoka nexa ihiyeha: “Xiso tehituya xiyane xahaka nohananihare koni”, nexa.

<sup>8</sup> — Maka hoka masene waikatehare nexa kaxaikotyatiye hiye: “Hiyane hakiterenai hakawihetehena hoka habakahenahene. Maika miyanitiye kawakatyakehenere hotohare habakatya. Nikare makere, hoka hetati kawakatyakehenere ite miyanitiye habakatya”, nexa ihiye. <sup>9</sup> Hatyo makehena hahenerenai ana hahoko xakini olo hoko isa. <sup>10</sup> Hatyaoseta motyalaite hetati hahenerenai xahekolaha hiye hoka exahereha kabakatyaka aakahitaha. Xakore hoka nikareta tehituya hahoko xakini olo hoko isa enomanaha. <sup>11</sup> Bakatyahene hoka maisa waiyeta ihiyeha hoka ehareha masene waikatehare hiye. <sup>12</sup> Hoka nehenaha: “Exe miyanitiye kaxahakakisakehenerenai atyo inirita hakaha hoka wiso atyo wahaka watere nase, waha aka. Xakore hoka wiso akereta atyo habakatyahene”, nexaha. <sup>13</sup> Hatyaoseta exekohaseha nehenaha hatya hiye: “Hasemehena, nohinaehare, maisa atyo namaoseraita hiso. Xoana maisa niraehenere hikakoa xowaka hahoko olo kakoa haki ferakene nabakatya hiso hoka hahaka nomani naoka hoka haohenere hotyare?” nexa ihiye. <sup>14</sup> “Hoka hotohena holoxa hoka hiyanehetehena hihana xeta. Hiyaiya, kasani exe haliti miyanitiye naxikahenere ana nisehenere homana akereta nisa naokowita”, nexa. <sup>15</sup> “Xoana maisaiya kore naokitere akereta noloxi kakoa notyomita? Xoana hokoawahareta kore ihiye, waiye namokiterene hiyeta?” nexa.

<sup>16</sup> Jesus halakihena hairaine hoka nexa: — Nikare ite kalikini hetatiye tyaoniterenai miyanitiye tyaoheta hoka kalikini miyanitiye tyaoniterenai atyoite hetatiye tyaoheta — nexa.

### *Jesus Iraehitiya Hakamane, Hakaseneheta Tahi (Marcos 10.32-34; Lucas 8.31-34)*

<sup>17</sup> Hatyaoseta Jesus xanehena Jerusalém xeta hoka haxaotyakiraharenai kakoa irae hawawaha heko tonahitaha hoka nehenaha: <sup>18</sup> — Xasemehena, wianeta Jerusalém xeta. Hatyo nalite Haliti Ityani kamatawatyakehenere sacerdotenai xekohasenai ana, xaotyakiyaho kakoa waiyoreterenai ana. Hatyonaita exaisaka aokaha hoka <sup>19</sup> majudeuneharenai anaite halakihenahene. Hoka hatyonaita koexahalisene, mokonasetene, berekotyahene ite atyalihose xaimaholatyaka hiye. Xakore hoka hanamaki ferakene najikinitaite kaseheta — nexa Jesus.

*Hatya Ohiro Axa Jesus  
(Marcos 10.35-45)*

<sup>20</sup> Hatyaoseta Zebedeu exanityo kaoka haisaninai kakoa Jesus ana, meholokoa enomana axene maheta.

<sup>21</sup> — Xoare haoka? nexa Jesus.

Hoka nehena: — Kalorexe hisaohenere xowakaite kasani nityaninai tyokaha hihaliya naokita, hatya hifihini maniya, hatya hiwatone maniya xoaha — nexa axa Jesus.

<sup>22</sup> Nixa hoka Jesus nehena ityaninai hiye: — Maisa atyo xawaiyorexe xaxitereharenai kakoa. Xoana xisonaiya xisera erakakalati akore noterehenere? nexa. (Hakamane xaokaka nikareta Jesus.)

— Há, wisereniya — nexaha.

<sup>23</sup> Hoka Jesus nexa: — Aliterexe atyoite xisera nerakakali akorexa. Hoka maisaiya atyo natyonai xala nokane xamani nofhini maniya, nowatoni maniya xoaha naokita. Hatyo okahakalatinai atyo Baba aohenerenai anere taita, hoka hatyo ana isene — nexa.

<sup>24</sup> Hatyaoseta 10-hare exaotyakiraharenai semaha hatyohare tahi hoka ehareha hatyo haximarene kokoarenai hiye.

<sup>25</sup> Hatyaoseta Jesus kawisahene tyotyaha hahaliya hoka nehena: — Xekohasetinai atyo wakatita halitinai, exahe kalorexenai atyo wakatyahitene. Hatyohare atyo waiyekehalakita xomana. <sup>26</sup> Hoka xisonaiya atyo maisa nikare xisaonita. Xala xamani atyoite xinekonitare kalorexe tyaona aokowita hoka maika hahena hahinaeharenai ana.

<sup>27</sup> Exahe xala xamani xinekonitare kalorexe tyaona aokowita hoka maika xiwakanehare tyaona. <sup>28</sup> Hiyaiya, Haliti Ityani kakoita tyaoa maisa kahakaka enomana maheta xini, xakore hoka tyaoa haka maheta, exahe waini hoka iyeheta maheta kahare haliti — nexa.

*Jesus Kaxoseheta Hinamahare Maxoseharenai  
(Marcos 10.46-52; Lucas 18.35-43)*

<sup>29</sup> Hatyaoseta jiyehenahitiyaha wenakalati Jericó nalita hoka kahare haliti xane Jesus xema. <sup>30</sup> Hatyaoseta hinamahare maxoseharenai ahoti kilihi tyokiterenai semaha Jesus jiyane hoka kawiyahena: — Xekohaseti, Davi jikolahare, hairakoaneharenha wiso! nexaha.

<sup>31</sup> Hatyaoseta kahare haliti xaneterenai mahokoanetya ekawiraha, exahe mema tyaonaha aokahitaha. Xakore hoka exahehare kinatyaxa kawiyatyaha: — Xekohaseti, Davi jikolahare, hairakoaneharenha wiso! nexahitaha.

<sup>32</sup> Hatyaoseta Jesus tityoa hoka kawisa maxoseharenai hoka axahene: — Xoana namoka xiso xaokita? nexa.

<sup>33</sup> — Kasani hakaxoseheta wiso waokita — nexaha ihiye.

<sup>34</sup> Jesus airakoaneharetya maxoseharenai hoka ekaokakisa hakahe exosenaiha hiye. Hatyaoseta waiyakatyarehenahitehena rotita. Hatyaoseta xaneha Jesus xema.

## 21

*Jesus Kaoka Jerusalém Nali  
(Marcos 11.1-11; Lucas 19.28-40; João 12.12-19)*

<sup>1</sup> Xane exaolitiki henaha Jerusalém hoka kaokaha wenakalati Betfagé nali, Oliveiras tyairiya haliya. Hatyo nalita, Jesus axikatya hinamahare haxaotyakiraharenai haheta maniya exakerexe iraiti kakoa:

<sup>2</sup> — Xiyane exe wenakalati waheta maniya tyaonitere nali. Hoka nalite xiyaiya boriko exolatyakahare haisanirise kakoa. Hoka maika xaolika hatyo hinamanai hoka xisoa ekakoaha ali. <sup>3</sup> Maika xala xamani xoare nehena xihije hoka xexa: “Xekohaseti aokahitene haomana”, xexa. Nikare ite xirae hoka halakisahene rotita xomana.

<sup>4</sup> Nikare tyaona iraiti xakaisasehare xairahenere akereta tyaona maheta:

<sup>5</sup> “Maika xexa Jerusalém yerenai hiye: kalikini atyo xiyekohase kaokehena. Hatyo atyo waiyexehare hoka tyokita boriko ityani heno”, nehenere akereta.

<sup>6</sup> Hatyaoseta exaotyakiraharenai xaneha enaheta maniya hoka Jesus akitere akereta tyomaha. <sup>7</sup> Kaokaha boriko exahe ityanirise xoaha kakoa hoka haimanaeha mokaha ehenoha hoka Jesus tyoka eheno. <sup>8</sup> Jiyehenahitiyaha hoka kahare halitinai xanetere exema mokahitaha haimanasenaiha waikoa enaheta maniya. Haiyaharenai xane iyaliti irikotyaha hoka mokahitaha ahotoyaho. <sup>9</sup> Hatyaoseta enaheta xaneterenai, enajikinita tyoiterenai xoaha kawiyahenaha:

— Wihalahareta, Davi jikolahare kakoa!

Xekohaseti Enore, waiyira hamohena hexare kakoa tyoiterehare!

Wihalahareta hikakoa, Enore!  
nexaha ihalaharahitaha.

<sup>10</sup> Hatyaoseta Jesus kaoka Jerusalém nali hoka tyotya naliyerenai wahakohenaha enomana hoka axakakoahenaha: — Xala hatyo kaokehena womana? nexaha.

<sup>11</sup> Hoka halitinai nexa ekoaxatayaha: — Exe atyo iraiti xakaisasehare Jesus, wenakalati Nazaré nalitare, Galiléia koatare — nexa exemata tyoiterenai ihiyeha.

### *Jesus Xane Iraexatyakalati Hanako*

(Marcos 11.15-19; Lucas 19.45-48; João 2.13-22)

<sup>12</sup> Hatyaoseta Jesus xane isoa Iraexatyakalati Hanako hoka aihikoaheta tyotya hatyoako iyakaiterenai, betetiterenai xoaha. Olo ehaikoakihitite mexanenai herawatya, watyaha betiterenai nokahakalanai harenai exoakikoatya <sup>13</sup> hoka nehena: — Exakere xairatyoare tyanonita Enore niraine babera waiyexe nanekoa:

“Nohani atyoite Iraexatyakalati Hana kaxaokaka”, nexa.

Xakore hoka xiso atyo kaiwarexenai xalijiniharexe xateroakisakala niyahare xamokene — nexa Jesus ihiyeha.

<sup>14</sup> Hatyaoseta maxoseharenai, maetonaneharenai xaneha Jesus ana Iraexatyakalati Hanako hoka tyotyaha aiyatelikihenahitene. <sup>15</sup> Xakore hoka sacerdotenai xekohasenai, iraiti kakoa waiyoreterenai harenai ehareha ihiye, hokakiterenai aiyatelikihitite hiyeta, exahe Iraexatyakalati Hanako xoimanai kawiyakotitere harenai semaha: — Davi jikolahare kakoa wihalahareta! nexahitere harenai hoka.

<sup>16</sup> Ehareha hoka nehenaha Jesus hiye:

— Xoana, hasemita iniraineha?

— Há, nasemitene. Xoana, maisa xiayiare Iraiti Waiyexe nanekoa exakerexe kaxairatyakehenere:

“Enore aotyakisa xoima kiranexe, xoima akokitaterenai harenai waiyexe taita iraeha maheta”, nehenere?  
nexa ihiyeha.

<sup>17</sup> Hatyaoseta Jesus halakisahene hoka hatyo wenakalatita xaneheta hoka xane wenakalati Betânia nali hoka nali nemaka.

### *Jesus Ainiraty Halohalo Kate*

(Marcos 11.12-14, 20-24)

<sup>18</sup> Kamaetali haikoahitita Jerusalém xeta hoka naka. <sup>19</sup> Hoka waiya halohalo kate, ahoti kilihita tyanonita hoka xane waiyakatetene iri xahita. Xakore hoka maisa kaliye, ehana taita. Hoka nehena halohalo kate hiye: — Maisaiya exehekota hikalihitita — nexa ihiye. Nexa hoka halohalo kate nirirena rotita.

<sup>20</sup> Exaotyakiraharenai waiya hatyohare hoka hakaharetyoaha hoka nexaha: — Xoana haxerore níra — nexaha.

<sup>21</sup> Hoka Jesus nehena: — Aliterexe nomita xihiye: xityakekotaiya hoka maisa ximatyakekoneta hoka exe namokitere halohalo kate akeretaiya xisoma. Maisaiya exakere taita xini. Exaheya xexa exe tyairi hiye: “Hakikisoahena hatyaoseta hoka hiyane hexoahena onexa”, xexaiya ihiye hoka nikareya tyona. <sup>22</sup> Xityakekotaiya hoka xiraexahena hoka xoalini hare xaxehena hoka xaokitere akeretaiya atyo tyona xomana — nexa.

*Jesus Atyo Iraiti Kakoare  
(Marcos 11.27-33; Lucas 20.1-8)*

<sup>23</sup> Hatyaoseta Jesus haikoaheta Iraexatyakalati Hana xeta. Hatyaoseta aotyakijita halitinai hoka sacerdotenai xekohasenai, judeunai nityohalitiranai xoaha tyoa kaokaha ehaliyita hoka axehenahene: — Xala niraine kakoare hiso hoka nikare hisaonita? Xala xaokala xema nikare hisaonita? nexaha.

<sup>24</sup> Hoka Jesus nehena: — Natyo tehitiaite naxa xiso. Xekoaxatyaita nomani hoka noxakaite xihije noxaxikatyasehare tahi. <sup>25</sup> Xala niraene xema João batixatya haliti? Xoana Enore niraene xema, halitinai niraene xema kore? nexa ihiyeha.

Nexa hoka iraikakoahenaha: —“Enore niraene xema”, wexaiya hoka nexaiya axa wiso: “Enore niraene xema hoka xoana hoka maisa xityakekota Joāo?” nexaiya wihiye.<sup>26</sup> “Halitinai niraene xema”, wexaiya hoka maisaiya waiyeta halitinai hiye hoka xoana xamaniya mokaha wiso. Joāo atyo iraiti xakaisasehare aokahitaha — nexa iraikakoaha.

<sup>27</sup> Hatyo hiyeta nexaha Jesus hiye: — Maisa wawaiyorexe João akiti kakoa — nexaha.

Nexaha ihiye hoka Jesus nehena: — Natyo tehitiyaite maisa noxakaita xala niraene xema exeharenai notyomita — nexa ihiyeha.

## *Hinamahare Xoimahaliti Tahi*

<sup>28</sup> Jesus nihitiya: — Xasemehena, xoanere atyo xiyahekola? Hatya haliti hinamahare kaisaniye. Hoka nexa haisani hetatiyehare hiye: “Hiyane hahaka wimasenekoa, haré”, nexa. <sup>29</sup> Nexa xakore hoka “Maisa noxani nahaka naokowiye, abá”, nexa hanexe hiye. Nexa ihiye hoka enajikini maniya kehexaharetyoaheta hoka xane haka hanexe aokitere akereta. <sup>30</sup> Enexeha nikareta tehitiya iraihitiya haisani xoimere kakoa hoka, “Há, noxanite nahaka, abá”, nexa hanexe hiye xakore hoka maisa xaneta.

<sup>31</sup> — Xala hare hanexe aokitere akereta tyaona? nexa Jesus axahene.

— Ityani hetatiyehare — nexaha.

Hoka Jesus nehena: — Kalorexe noloxa resebityaseharenai, enatyalolonai xoaha atyo iniyalahare tyomahitaha, xakore hoka hatyonai hotohare atyo tyaonahitaha Enore koamaniya xahitita.<sup>32</sup> Hiyaiya, João Batista atyo tyoa hotikisa maheta xomana aliterexe ahotoyaho, xakore hoka maisa xityakekotene. Hoka olo resebityaseharenai, enatyalolonai xoaha atyo tyakekone. Hoka xiso atyo hatyoharenai xiayaiya xakore hoka maisa xahalakijita iniyalahare xománe xityakekotene maheta.

*Masene Nomaseharena Maisakaiserexenai Tahi  
(Marcos 12,1-12; Lucas 20,9-18)*

<sup>33</sup> Jesus nexa: — Xasemehena exe xaimenekotyati: hatya haliti fitya uva katenai hamasenekoa hoka talahokotya hamasenekoa. Tyoma uva kakatyakala vinhoxa tyoma maheta, enoakiya kahainatya hakakoare waiyakoatya hamasene maheta. Hatyaoseta haiyanai halitinaí ana halakisene, kaxaikoahene hoka xonehena hoka irakakakoa-henahitene maheta. Hatyaoseta xane hakiti seko akiya. <sup>34</sup> Hatyaoseta inimex-aka xowakehena hoka masene xekohasehare axikatya hawakaneharenai masene kax-aikotyaseharenai holini iseheta enomana maheta. <sup>35</sup> Xane kaokaha hoka masene kaxaikotyaseharenai otokaha ewakaneharenai hoka hatya mokotyaha, hatya aisaha, hatya sehali kakoa mokohenaha xoaha. <sup>36</sup> Hatyo najikinita exekohase axikahitiya hawakaneharenai hetati axikahenere xahe. Xakore hoka masene kaxaikotyaseharenai nikreta mohenahitiyene. <sup>37</sup> Hatyo najikinita axikatya haisani kaiserehare, ahekotya hoka: “Nityani atyoite naxikatya hoka aiminisahene”, nexa. <sup>38</sup> Xakore hoka masene kaxaikotyaseharenai waiyaha ityani hoka nexaha: “Exe atyo masene xekohasehare ityani. Nika waisene hoka masene ite womanere tyaona!” nexaha. <sup>39</sup> Hatyaoseta otokaha ityani hoka sekose xanha ekakoa masene nonitata hoka aisahene.

<sup>40</sup> Hatyaoseta Jesus axehenhene: — Hoka hatyo masene xekohasehare ite kaokehete-hena hoka xoanaite mohena hatyo masene kaxaikotyaseharenai? nexa.

<sup>41</sup> Hoka nexaha: — Aisaite hatyo masene kaxaikotyaseharenai xalijiniharexenai hoka hahotyalinai anisaite halakihitiyene. Hoka hatyonai atyoite iseheta enomana holini, inimexaka ferakenehena hoka — nexa.

<sup>42</sup> Hoka Jesus nehena: — Xoana koxaka xakaixaretya Iraeti waiyexe nanekoa exakere nehenere:

“Sehali hati nomaseharenai maxaokarehenere atyo hati tononako kaxomokaka. Xeko-haseti xekane atyo. Hoka hatyo atyo waiye kaiserehare”, nehenere?

<sup>43</sup> Hoka Jesus nihitiya: — Hatyo hiyeta nomita xihiye: Enore waikoherakoa atyo xomanere xakore atyo hoka kaxemaisatyaka xonita hoka kahalakisaka atyoite hahotyaliharenai Enore aokitere akereta tyaoniterenai ana.

<sup>44</sup> — Xala xamani atyoite exoa hatyo sehalia heno hoka taikoehekoatyaite. Hoka hatyo sehalia atyo hatya heno exoa hoka miyoheteniya atyo — nexa.

<sup>45</sup> Sacerdotenai xekohasenai, fariseunai xoaha semaha hatyo Jesus xakaini metaharexe hoka otyahene, exaokakaha terota atyo nikare iraeta. <sup>46</sup> Hatyo hiyeta otokahene aokow-ihha, xakore hoka mairahitaha halitinai, halitinai Jesus iraiti xakaisasehare aokahitere hiyeta.

## 22

### *Wenakakoati Hisehare (Lucas 14.15-24)*

<sup>1</sup> Hatyaoseta Jesus haxaimenekola kakoa xakaihitiya ihiyeha hoka nehena: <sup>2</sup> — Xekohaseti enokoa tyaonitere koamaniya nawenatyaka atyo hatya xekohaseti ityani kaiyanityohena hoka tyoma hisehaliti haisani nawenakakoane niyahare akereta. <sup>3</sup> Hoka axikatyahawakaneharenai kaixakatyaha maheta kaexakahenerenai. Xakore hoka maisa tyoa aokowiyahitaha. <sup>4</sup> Hatyaoseta axikahitiya haiyaharenai hawakaneharenai hoka nexa ihiyeha: “Maika xiyakai xikaexakalaharenai hiye. Koxaka tyotya memere hisehaliti. ‘Koxaka naisa bowi mokosenai, bowi koloterenai hoka koxaka tyotya memere. Kasani tyoaha hisehaliti ana naokita! ” nexa.

<sup>5</sup> — Xakore hoka ekaixakalaharenai maisa hatyoharenaeta aokahitaha hoka xane tyomaha aokowiterehare ana xaneha. Hatya xane hamasenekoa nali, hatya xanephena haxiyehare nitini xomokakala nali xoaha. <sup>6</sup> Haiyaharenai otokaha ewakaneharenai hoka mokohekoatyahene hoka aisahene. <sup>7</sup> Hatyo hiyeta xekohaseti ehare hoka axikatyahasorarexanai aisaha maheta hatyo katawanakahenerenai, exahe enawenakalaha hoka kerahaotya maheta. <sup>8</sup> Hatyo najikinita kawisa hawakaneharenai hoka nexa: “Wenakakoati niyahare hisehaliti notyomehenere mema, xakore hoka wikaexakalaharenai atyo maisa tyoahitaha, maisa waiyexeha hoka. <sup>9</sup> Hoka xiyanehena kalikini ahoyahonai hoka xakaexakatyahotya xahalakoahenerenai”.

<sup>10</sup> — Hatyaoseta ewakaneharenai xaneha ahoyahohisakoatyahotya ahalakoahenerenai, waiyexeharexenai, mawaiyexeharexenai xoaha. Hoka hisehaliti tyaohenere ako kaise haliti moka. <sup>11</sup> Hatyaoseta xekohaseti isoa waiya maheta kakaex-akatyakehenerenai hoka waiya hatya haliti maisa hisehaliti anere imiti ako xini ijoita.

<sup>12</sup> Hoka axene: “Nohinaehare, aliyakere ali hisoa, maisa xakore hisehaliti anere imiti akore xini hiso hoka?” nexa. Nega hoka maisa xoare nita. <sup>13</sup> Hatyaoseta xekohaseti nexa hawakaneharenai hiye: “Xolatya exe haliti kijinai, exahe ewaotyalinai xoaha hiye hoka xaxawahetene menanaka makaliroti koni. Hatyo nalite tiya, exahe karai, karai, nexaite haikolinai moka”, nexa.

<sup>14</sup> Jesus halakihena hairaine hoka nehena: — Hiyaiya, kahare atyo kakaexakatyakita, xakore hoka haiyanai taita atyo kaxaokakita — nexa.

### *Olo Xekaka Tahi Axaha Jesus (Marcos 12.13-17; Lucas 20.20-26)*

<sup>15</sup> Hatyaoseta fariseunai hikoahenahitaha hoka ahekotyaha hasakaharetyaha Jesus maheta, kasani ehaikoare irae hoka iniraine kakoita iraeharetyahene aokowita.

<sup>16</sup> Hatyaoseta axikatyaha haxaotyakiraharenai, Herodes koamaniya tyaoniterenai xoaha nexaha Jesus hiye maheta: — Xekohaseti, hawaiyexeharene atyo waiyekehalakita womana, aliterexe atyo haotyakijita Enore aokitere akereta. Maisa atyo haiyanai xahekola hityakekore, hakakoa atyo halitinai hiyaiyita. <sup>17</sup> Hoka xoanere atyo hiyahekola: xoana wiyaotyakisakaho hiyetaiya hoka wisehenaito olo kalorexe Roma yere ana, maisaiya kore? nexaha.

<sup>18</sup> Nexaha hoka Jesus otya inirawaneneha hoka nehena: — Teraharetyoarenae, xoana hoka xahasakaharetya xaokowita natyo? <sup>19</sup> Xamehena olo hokose xijitere hoka nowaiya! nexa. Nexa hoka isaha olo hokose enomana.

<sup>20</sup> Hoka Jesus axehenahene: — Xala nexare exahe niyakotini tiho exe olo hokose hiye? nexa.

<sup>21</sup> Hoka nexaha: — Kalorexe Roma yere — nexaha.

— Xoare xamani atyo kalorexe Roma yere anere hoka kalorexe ana xisene. Hoka Enore anere hoka Enore ana xisene — nexa Jesus.

<sup>22</sup> Semaha nikare iniraine hoka hakaharetyoaha. Hoka halakisaha Jesus hoka xanehenahitaha enonita.

#### *Kamati Kaseneheta Tahi Axaha Jesus*

(Marcos 12.18-27; Lucas 20.27-40)

<sup>23</sup> Hatyo ferakeneta haiyaharenai saduceunai tyoaha Jesus ana. Enomanaha haliti wainihena hoka maisa kasehetere. Tyoaha Jesus haliya hoka nexaha: <sup>24</sup> — Xekohaseti, Moisés atyo exakerexe aotyakisa: “Hatya haliti wainihena hoka haiyanityo maisanihalota halakisa hoka iximarene atyoite tyaohena hatyo wainyanenehenolo kakoa hoka kaisanihenaha hoka enaxenane wainihenere ityani atyoite kaxaokaka”, nexa.

<sup>25</sup> — Hasemehena, winekoni ene 7-hare haximarene kakoarenai tyaonita hoka enaxenaneha kaiyanityo hoka waini maisanihareta. Hoka iximarene ihiyetare tyaohitiya ekakoa. <sup>26</sup> Xakore hoka nikreta maisanihareta wainihitiya, exahe ihiyetareha hoka tyaohitiya ekakoa hoka wainihitiya. Nikare makere hatyo 7-harenai waini tyotya.

<sup>27</sup> Waini tyotehenahere najikinita waini ohiro.

<sup>28</sup> — Nikarite hoka xala exanityo kaisere ite hatyo ohiro tyaohetehena, kamatinai kasehetehenere xowakiya? Hiyaiya, tyotyaha atyo tyaonaha ekakoa! nexaha Jesus hiye.

<sup>29</sup> Hoka Jesus nexa ihiyeha: — Xiso atyo ehaikoare xahekotita. Maisa atyo xawaiyorexe Iraiti Waiyexe xairatyore tyaonitere kakoa, exahe Enore niyatere kakoa hoka — nexa.

<sup>30</sup> — Hiyaiya, kamatinai atyoite kasehetehena hoka anjonai enokoa nali tyaonitere akereta atyoite tyaonaha, maisaiya atyo tyaonakakoahenahitita — nexa.

<sup>31</sup> — Hoka xoana maisa kamatinai kasehetehenere tahi xasemare Enore niraene? Exakere atyo nexa:

<sup>32</sup> “Natyo atyo Abraão, Isaque, Jacó xoaha Nenorexa”, nehenere.

Hoka exeharenai atyo hotikijita: Enore atyo kasexenai Nenorexa hoka maisa atyo kamatinai Nenorexa xini — nexa.

<sup>33</sup> Hatyoharenai halitinai semaha hoka hakaharetyoaha exaotyakira kakoa.

#### *Xaotyakiyaho Masákare Waiyexe*

(Marcos 12.28-34; Lucas 10.25-28; 1 João 5.3)

<sup>34</sup> Hatyaoseta fariseunai ahohisakoatyakakoaha, semaha saduceunai maxekoaxarene Jesus ana hoka. <sup>35</sup> Enekoniha hatya xaotyakiyaho kakoa waiyoretere kasani hasakaharetya aokowita Jesus hoka axene: <sup>36</sup> — Xaotyakisatiye, xoare masakare waiyexe tyotya xaotyakiyahonai konitare? nexa.

<sup>37</sup> Hoka Jesus nehena:

— Hawaiyehena kaiserehare hiyekohase Enore, hisaonehena exema maniya takita, hahekohena ekoamaniya takita.

<sup>38</sup> — Exe iraiti atyo masakarexe waiyexe tyotya xaotyakiyahonai konitare. <sup>39</sup> Hatya ihiyetare tehitija komitaene hetatiye akereta:

Hawaiyehena haiyaharenai hawaiyityoawitere akereta.

<sup>40</sup> — Tyotya Moisés xaotyakiraho, iraeti xakaisaseharenai xaotyakira harenai atyo exe hinamanai xaotyakiyenai nali kaxakaisakehena — nexa.

*Enore Kalorexe Aohenere Tahi Axaha Jesus*

(Marcos 12.35-37; Lucas 20.41-44)

<sup>41</sup> Hatyaoseta fariseunai hohisakoahitataha hoka Jesus axehenahene: <sup>42</sup> — Xoare atyo xiso xahekotita Enore Kalorexe Aohenere Cristo tahi akiti? Xala jikolahare xaokitene? nexa.

— Cristo atyo Davi jikolahare — nexaha ihiye.

<sup>43</sup> Hoka Jesus axehenahitiyene: — Hoka xoanere hoka Davi Isekohaliti Waiyexe kaxaihakohenere xowaka Haxekohase aokene? Hiyaiya, exakere atyo Davi irai:

<sup>44</sup> Nexa Xekohaseti Noxekohase hiye: “Hisokehenanofihini maniya, hahalakoaharenai hikijinai katyahe namohenere kijiya”, nexa. (Enahalakoaharenai mehotyaka xaokaka nikareta iraeta.)

<sup>45</sup> Hatyo hiyeta Davi atyo Haxekohase aokene hoka aliyakereya Enore Kalorexe Aohenere Davi jikolahare tyaohena xaokita? nexa ihiyeha.

<sup>46</sup> Nexa Jesus ihiyeha hoka maisa xala harenai ekoaxahenahitita enomana. Hatyo najikinita maisa xala harenai kinatya tyako axehititene.

## 23

*Jesus Irae Xaotyakisatiyenai, Fariseunai Kakoa*

(Marcos 12.38-40; Lucas 11.43-46; 20.45-46)

<sup>1</sup> Hatyaoseta Jesus iraihena haxaotyakiraharenai, halitinai xoaha kakoa hoka nehena:

<sup>2</sup> — Iraiti kakoa waiyoreterenai, exahe fariseunai xoaha atyo waiyore awaiyekehalakatyahitaha Moisés xaotyakiraho. <sup>3</sup> Hatyo hiyeta maika xasemaxematyainiraineha, exahe aokahitere akereta xisaona. Hoka awa atyo tyaonahitere akereta xisaohena. Hiyaiya, maisa atyo aotyakisahiterene akereta xini tyaonahitaha.

<sup>4</sup> — Timenere kolare atyo mokahitaha halitinai heno hoka maisa atyo kahinaetaryahene, maisa hakahihikase kakoa hekoti kahinaetyahene hoka hatyo kolare kolattyareha. <sup>5</sup> Xoalini hare atyo tyomahitaha kawaiyakaha maheta. Xiyaiyehena, kalose xairatyahitaha Iraiti Waiyexe nanekoatare hoka olatyahitaha hatyaolinaeha, hakanoha hiye. Xiyaiyehena inimanaeha kanotini nerore. <sup>6</sup> Hisehaliti xowakehena hoka waiyexe okahakalati aose tyokaha aokowiyahitaha, exahe xahohisakoatyakalati hanako hoka okahakalati waiyexe koa taita tyokaha aokowitaha, kaxaiminisaka maheta. <sup>7</sup> Nikare wetekokoa jiyehenaha hoka kasani xaiminisati kakoa kakatyawaxatyaka ihiyeha aokahitaha, exahe “Xaotyakisatiye”, kakaixaretyakaha.

<sup>8</sup> — Hoka xisoia atyo maisa nikareta, “Xaotyakisatiye”, xikakaexaretyakita. Hiyaiya, xityotya atyo hahinaehare kakoarenai taita hoka haterore atyo Xiyaotyakisase. <sup>9</sup> Hoka ali waikoheko atyo awa hatyatere xexe xaoka. Hiyaiya, haterore atyo Xexe enokoa nali tyaonitere. <sup>10</sup> Maisaiya “Xekohaseti”, xikaxaokakita. Hiyaiya, haterore atyo Xiyekohase, Cristo. <sup>11</sup> Xinekoni xekohaseti tyaonitere atyo etakehare hakiterehare. <sup>12</sup> Hiyaiya, xala xamani atyoite kalorexe aokowita hoka wakahare atyoite kaxomokaka, hoka xala xamani atyoite maisa haiyanae xahehare aokowita hoka kalorexe atyoite kaxomokaka — nexa Jesus ihiyeha.

*Jesus Irae Teraharetyoati Tahi*

(Marcos 12.40; Lucas 11.39-44, 52; 20.47)

<sup>13</sup> — Kaxiyani, xiso iraiti kakoa waiyoreterenai, exahe xiso fariseunai, teraharetyoarenae makere! Maikaite iniyalahare xikaxomokaka. Xiso atyo xamahokoanitita haiyanai nawenane Enore koamaniya. Maisa xakore Enore koamaniya xisaonare hoka xamahokoanitita haiyanai nawenane ekoamaniya.

<sup>14</sup> — Kaxiyani, xiso iraiti kakoa waiyoreterenai, xiso fariseunai, teraharetyoarenae makere! Maikaite iniyalahare xikaxomokaka. Xiso atyo wainiyaneneronai xiye halo

xametakijita, xikaiwita hoka waha xiraexaita xateraharetyoa maheta. Hatyo hiyetaite masakare iniyalahare xikaxomokaka.

<sup>15</sup> — Kaxiyani, xiso iraiti kakoa waiyoreterenai, exahe xiso fariseunai, teraharetyoarenae makere! Maikaite iniyalahare xikaxomokaka. Xiso atyo ximahotyoa one kaloxere hoka xiyaneta hakakoare waikoheko axtawa maheta haliti hoka xiyaotyakiraho tyaona maheta. Hoka hatya atyo xikaokehena hoka xiyahehare irikati mawakenehare xetare terota xamokitene.

<sup>16</sup> — Maikaite iniyalahare xikaxomokaka. Xiso atyo maxoseharenai xotakahisaseharenae xaokowita xakore hoka xiso tehtiya atyo ximaxosehare. Xiso atyo exakere xaotyakijita: “Xala xamaniya atyo kaexaretya Iraexatyakalati Hana iniraene katyakekotyaka maheta hoka maisa nikare tyaonita hoka ehekoreya. Hoka xala xamaniya atyo kaexaretya ouro werokere Iraexatyakalati Hanako tyaonitere iniraene katyakekotyaka maheta hoka nikare atyoite tyaohena”, xita. <sup>17</sup> Mactikonexenai, maxoseharenai! Xoare hare masakare waiye: Ouro werokere, xoana, Iraexatyakalati Hana hotikijitere ouro kore? <sup>18</sup> Exakere tehtiya xaotyakijita: “Hatyaiya kaexaretya kirakahare fetatyakalaose iniraene katyakekotyaka maheta hoka maisa nikare tyaonita hoka ehekoreya. Hoka kaexaretya fetatyakalatyaose nali kirakahare tyaonitere kakoa hoka nikare atyoite tyaohena”, xita. <sup>19</sup> Maxoseharenai! Xoare hare masakare waiye: kirakahare, xoana, fetatyakalati hotikijitere kirakahare kore? <sup>20</sup> Hiyeta hoka xala xamani atyo kaexaretita fetatyakalati tahi hoka kirakaharenai eheno tyaoniterenai tehtiya kaexaretita. <sup>21</sup> Exahe xala xamaniya kaexaretya Iraexatyakalati Hana iniraene katyakekotyaka maheta hoka Iraexatyakalati Hana, exahe Enore nali tyaonitere tehtiya kaexaretita. <sup>22</sup> Xala xamani atyo kaexarehena enokoa tahi hoka kaexaritita atyo Enore nokahakala, exahe Enore tyokitete eheno tehtiya kaexaretita.

<sup>23</sup> — Kaxiyani, xiso iraiti kakoa waiyoreterenai, xiso fariseunai, teraharetyoarenae makere! Maikaite iniyalahare xikaxomokaka. Xiso atyo xijita xinakaira hiyeta Enore ana holini: hortelā, erva-doce, cominho, atya hana kanakoairoarenae xoaha hiyeta, xakore hoka maisa atyo xityakekore xaotyakiyaho masakare waiyexe: wenati waiyexe, waiyexehaliti, Enore tyakekotyaka harenai. Exeharenai xema tehititaiya xisaonita hoka ehekoreya. <sup>24</sup> Xiso atyo maxoseharenai xotakahisaseharenae xaokowita xakore hoka xiso tehtiya atyo ximaxosehare. Xakowatita atyo nisarese, xakore hoka xatyokita atyo kamelo.

<sup>25</sup> — Kaxiyani, xiso iraiti kakoa waiyoreterenai, xiso fariseunai, teraharetyoarenae makere! Maikaite iniyalahare xikaxomokaka. Xatihita atyo kobo, balatoah harenai ihiniri maniya xakore hoka enakoha atyo kaise tyaonita xiyalijinharenai exahe xokoawaharene kakoare. <sup>26</sup> Fariseu maxosehare! Hatihehetehena kobo nakoako hoka ehenekoa maniya tehitiaite iyomeheta tyaona.

<sup>27</sup> — Kaxiyani, xiso iraiti kakoa waiyoreterenai, xiso fariseunai, teraharetyoarenae makere! Maikaite iniyalahare xikaxomokaka. Xiso atyo motya xawatyakalati nitini iyomere kakoa kaxonatyakitere akereta xisaonita. Henekoa maniya atyo waiyehareha hoka enakoakoha atyo kamati nahe, xetako harenai. <sup>28</sup> Nikareta atyo xisaonita. Henekoa maniya atyo motya haliti waiyexenai ene xiso, xakore hoka xityako atyo kaise tyaonita ximaoserala, iniyalahare xománe.

### *Maoseratyarenai Xomokaka Iniyalahare Tahi (Lucas 11.47-51)*

<sup>29</sup> — Kaxiyani, xiso iraiti kakoa waiyoreterenai, exahe xiso fariseunai, teraharetyoarenae makere! Maikaite iniyalahare xikaxomokaka. Xiso atyo waiyehare xawatyakalati xisomita iraiti xakaisaseharenai ana, exahe xawaiyeharehitita toahiya xowaka waiye maniya tyaohenerenai xawatyakalanai. <sup>30</sup> Hoka xita: “Wisoiya atyo wahetakomaniyereharenai tyaonitere xowakiya wisaonita hoka maisaiya atyo tyaonahitere akereta wisaonita, maisaiya atyo waijita iraiti xakaisaseharenai”, xita. <sup>31</sup> Nikareta atyo xiraehena

hoka iraiti xakaisaseharenai aisehenerenai jikolaharenai terota atyo xaokowita. <sup>32</sup> Hatyo hiyeta hekota atyo xisomita, xamematita xahetereharenai tyomitereharenai!

<sup>33</sup> — Owi aisarexenai, owi ityaninai! Xoana hoka xatyahaharetyoita ximaxawatyakene irikati koni? <sup>34</sup> Hiyeta hoka nomita xihye: naxikatyaita iraiti xakaisaseharenai, waiyorexenai, xaotyakisatiyenai xoaha xomana. Hoka haiyanaite xaisa, haiyanaite xaberekotya atyalihose xaimaholatyaka hiye, haiyanai tehituyaite xamokonasetya xahohisakoatyakalati hanako, exahe wenakalatinai nihatyakaite xehokatetyahene. <sup>35</sup> Hatyo hiyeta iniyalahare maomaneharenai iniyalahare mohenere, exahe aisehenere xahetakomaniyereharenai atyoite xiheno kaxomokaka, iniyalahare maomanehare Abel kaxaisakehenereta, Baraquias ityani Zacarias xaisehenere Iraexatyakalati Hana, fetatyakalati xoaha nenesesene xaisehenere kijiya. <sup>36</sup> Aliterexe nomita xihye: tyotya hatyoharenaite kalikiniyerenai heno tehituyaite kaxomokaka — nexa.

### *Jesus Xawaiyera Jerusalém Tahi*

(Lucas 13.34-35)

<sup>37</sup> Jesus halakihena hairaine hoka nexa: — Jerusalém, Jerusalém! Hiso atyo hajita iraiti xakaisaseharenai, sehali kakoa hamokotita Enore xaxikalahrenai! Kahaliki xakore naxakoloharetya naokowita hihotyaliharenai takoira haisani mokosenai hatane katyahe mokitere akereta, xakore hoka maisa atyo haoka. <sup>38</sup> Hoka kalikini atyoite hihana kahalakisakehena kaiserehare. <sup>39</sup> Aliterexe nomita: Maisa atyoite hiyaiyehitita natyo exakere hiraehenere kijiya: “Xekohaseti Enore, waiye kaiserehare atyo hatyo hexare kakoa tyoiterehare”, hehenere kijiya — nexa Jesus ihiyeha.

## 24

### *Jesus Iraexatyakalati Hana Mawenekoaretyaka Tahi*

(Marcos 13.1-2; Lucas 21.5-6)

<sup>1</sup> Hatyaoseta Jesus hikoaheta Iraexatyakalati Hanakota hoka xanehetehena ene hoka exaotyakiraharenai xaneha ehaliya hoka hotikisaha enomana Iraexatyakalati Hana, hatinasenai.

<sup>2</sup> Hoka Jesus nexa: — Xoana tyotya hatyoharenai xiayita? Haxowaka ferakenite tyotya exe xiayitereharenai kamawenekoaretyakeheta. Hoka maisaiya hatya sehali hatya sehali heno tyaohitita — nexa.

### *Howitiharexe Wenati, Irawaniti Tahi*

(Marcos 13.3-13; Lucas 21.7-19; 1 Pedro 1.6-7; 2.19; 3.14; 4.12-16)

<sup>3</sup> Hatyaoseta Jesus tyokita Oliveiras tyairiya heno hoka exaotyakiraharenai xaneha ehaliya hoka axehenahene hawawaharenai heko: — Xoana xowakaite hatyoharenai kaotyakehena? Xoare hare hotohare ite kaotyakehena hoka hotikihena hisoaneneheta ferakene exahe tyotya xoalini hare miyanaose hoka? nexaha.

<sup>4</sup> Hoka Jesus nehena: — Xirihalira xisaona hoka maisa xala hare maoseraita xiso.

<sup>5</sup> Hiyaiya, kaharetyaita kaotyakehena nexare kakoa hoka nehenaha: “Natyo atyo Enore Kalorexe Aohenere”, nehenaha. Hoka kahare halitite maoserahenaha.

<sup>6</sup> — Awa atyo ximairehena xasemehena xaisakakoati nemahare, exahe xaisakakoati tahi hoka. Tyotya hatyoharenaite kaotyaka, xakore hoka maisa atyoite imiyanaose-henere. <sup>7</sup> Hahotyalihare ite xane hahotyalihare kakoa aisakakoahena, hakoatare ite xane hakoatare kakoa aisakakoahena. Haiyanae koaite waikohe tatakoahena, nakitite tyaohena. <sup>8</sup> Hatyo harenai atyoite hetati xoima kawetere akereta — nexa.

<sup>9</sup> — Hatyo najikinitaite berexotyahaite xiso iniyalahare xikaxomokaka maheta. Hoka xikaxaisakaite. Tyotyahaite kirawaneha xiso nohiyiti. <sup>10</sup> Hatyo xowakiyaita kahare haliti halakisa hatyakekone hoka iraeharehena, kirawanehena hahinaeharenai. <sup>11</sup> Kahare ite iraeti xakaisaseharenai metalaharenai kaotyaka hoka kahare halitinai maoserahenaha.

<sup>12</sup> Hoka iniyalahare ite exaoretyoa hoka haiyaharenai xawaiyeraite awehetya. <sup>13</sup> Xakore hoka xala xamani atyoite heko kinatere tyaona nokoamaniye imiyanaose kijiya hoka

hatyo atyoite kaiyakeheta. <sup>14</sup> Iraeti Waiyexe enokoatare Xekohaseti tyoaneneheta tahi atyoite kaxakaisaka hakakoare wenakalatikoanai, tyotya haliti hotyalinai semene maheta. Hatyaoseta atyoite miyanitiyi ferakene kaotyakehena.

*Kalore Howithihare Wenati Tyaohenere Tahi*

(Marcos 13.14-23; Lucas 21.20-24)

<sup>15</sup> Jesus nihitiya: — Maika xiayiyeheha “Kaheneharexe, exahe wenati xaiyalaharetyasehare” waiyexe aose nali hoka maika xala xamani Judéia nali tyaonita hoka <sup>16</sup> tekoahenaira tyairinai koni xeta. (Iraiti xakaisasehare Daniel xakai hatyo tahi. Maika hatyo “Kaheneharexe, exahe wenati xaiyalaharetyasehare” aokitere ekaixarityasehare ana waiyekehalaka).

<sup>17</sup> — Maika xala xamani hahaha heno tyaonita hoka tekoahena rotitaira hoka awa atyo isoahetehena hoka xoalini hare iyehetehena. <sup>18</sup> Maika xala xamani mase tyaonita hoka awa atyo haikoahetehena hahaha xeta haima kolaheta maheta. <sup>19</sup> Kaxiyani, hatyo xowakiya atyoite howithihare tyaohena tifalonai exahe xoimaisanironai ana hoka! <sup>20</sup> Maika xiraexaty Enore hiye hoka maisa hatyo harenai tihere xowaka kaotyakita, exahe sábado xowaka hoka. <sup>21</sup> Hiyaiya, hatyo xowakehena atyoite hoka wenati atyoite howithihare tyaohena. Maisa xoana xowaka nikare tyaonare Enore tyomehenere waikohекоа xowakiyata. Maisaiya atyoite nikare tyaohitita haxowakiya. <sup>22</sup> Xakore hoka Xekohaseti atyo aikiranetya hatyo wenati howithiharex ferakenenae. Maisaiya nikarexe hoka maisaiya xala hare makamanehare tyaonita. Xakore hoka Enore iyeheta aokowihenerenai hiyeta atyo hatyo ferakenenae kaxakiranityakeheta — nexa.

<sup>23</sup> — Maika hatya nehena xihiye: “Xiyaiyeheha, Kalorexe Enore Aohenere ali tyaonita”, nehena xamani, “Owene tyaonita”, nehena hoka awa atyo xityakekone. <sup>24</sup> Hiyaiya, kaotyakaite iraeti xakaisaseharenai exahe Enore Kalorexe Aohenere metalaharenai hoka tyomahaite kahare xoalini hare maomakahare katyakekotyakaha maheta hoka maoserahenaha haliti. Aiyateretyoahaite maoseratya maheta Enore haomanerehare aohenerenai.

<sup>25</sup> — Waiyira xasema: exe harenaetya noxakaita xihiye kaotyakehenere nahitita — nexa.

<sup>26</sup> — Maika nehenaha: “Xiyaiyeheha, owene Enore Kalorexe Aohenere tyaonita maharexakiti”, nehenaha hoka awa atyo xiyane nali. Exahe xoana nehenaha xamani: “Xiyaiyeheha, owene teroita”, nehenaha hoka awa atyo xityakeko. <sup>27</sup> Hiyaiya, kahihiyeha hoka enokoa nali hamaniyata xane hamaniya werokakoa mokita. Nikareta atyoite tyaona Haliti Ityani tyaoneneheta xowaka.

<sup>28</sup> — Aliyako xamani atyoite kamati tyaonita hoka hatyo nalite olohonai hohisakoa-hena — nexa.

*Haliti Ityani Tyaoneneheta Tahi*

(Marcos 13.24-27; Lucas 21.25-28; 2 Tessalonicense 1.7; 2 Pedro 3.10; Apocalipse 1.7)

<sup>29</sup> Hatyaoseta Jesus nexa: — Hatyo howithihare tyaohenere ferakenenai najikinitaite kamae ite makaliro tyaona, kaimare ite hoka maisa aokanahitita. Xoresenaite exo enokoata, exahe enokoa kinatere tyaoniterenaite komita maiyaterehare tyaonahitaha.

<sup>30</sup> — Hatyaosetaite kaotyakeheta Haliti Ityani enokoa. Hoka tyotya halitinai waikohекоа tyaoniterenaite waiyahaite Haliti Ityani xexoaneheta kaiminiti konita, haiyatere exahe hawerokene kakoa hoka tiyahenaha hamairane. <sup>31</sup> Hatyaosetaite koneta kaemahare kinatyaxa hoka axikatyaita hawakaneharenae anjonai waikohекоа nihatyaka maniya. Hoka anjonaite ahohisakoatya Enore haomana aohenerenai tyotya hakakoareta — nexa Jesus ihiyea.

*Jesus Aimenekotya Halohalo Kate Hiye*

(Marcos 13.28-31; Lucas 21.29-33)

<sup>32</sup> Hoka Jesus nihitiya: — Waiyexira xasemehena halohalo kate tahi. Hiyaiya, ekanohnai atyo tihorehetehena, exahe ehanahinai atyo hikoahetehena hoka waiyekehalakita

atyo xomana enonenehetehena. <sup>33</sup> Nikareta tehitiaite exeharenai kaotyakehena hoka waiyekehalakaira xomana Haliti Ityani okoi haikoahetehenerehare. <sup>34</sup> Xotyaxematy exehare: exeharenai tyaite kaotyaka exe kasetatereharenai makamaneharene nahitita. <sup>35</sup> Enokoa exahe waikohe harenai tyaite maiyareheta, xakore hoka niraini tyatyoite tyaota mene — nexa.

*Ekaokeneheta Ferakene Xowaka Tahi*

(Marcos 13.32-37; Lucas 12.35-40; 17.26-30, 34-36; 1 Tessalonicenses 5.2-3; 2 Pedro 3.1-15)

<sup>36</sup> Jesus nihitiya: — Eferakene exahe exowakehena atyoite hoka maisa xala hare ana waiyekehalakere, maisa atyo anjonai enokoa tyaoniterenai ana waiyekehalakere, maisa atyo Enore Ityani ana hekoti waiyekehalakere, xakore hoka Enexe Enore ana taita atyo waiyekehalakita.

<sup>37</sup> — Haliti Ityani tyaoneneheta atyoite Noé xowakiya kawenatyakehenere akereta. <sup>38</sup> Hiyaiya, one morehenere nahitita halitinai kanakairitaha, terahitaha, exahe enanai ohironai harenai hoka tyaonakakoahitaha harenai, Noé isoahenere kanowa kalorexe kijiya. <sup>39</sup> Nikare tyaonahitaha exowaka hoka maisa one morehenere akiti waiyekehalakere enomanaha hoka one more exahitaha hoka aisa miyatyahene.

— Nikareta tehitia atyoite Haliti Ityani tyaoneneheta. <sup>40</sup> Hatyo xowakaite hinamahare halitinaite hakita masenekoa. Hoka hatyaite kakolatyaka, hatya atyoite kahalakisaka enaoseta. <sup>41</sup> Hinamahalo ohironaite mehetyakalati hiye mehetyahitaha trigo, hoka hahaloite kakolatyaka hoka hahaloite enaoseta kahalakisaka xoaha.

<sup>42</sup> — Maika xikaxaikoawihena. Hiyaiya, maisa atyo waiyekehalakere xomana Xiyekohase kaokeneheta ferakene. <sup>43</sup> Exeharenai xotyaxematy: hati waikatehareya atyo waiyoreta kaiwarexe kaokene kakoa hoka atyahiteniya hoka maisaiya ehanakota kaiwaharetitene. <sup>44</sup> Hatyohiyeta xiso tehitia ximemere xisaohena. Hiyaiya, Haliti Ityani atyoite tyoheta ximaxatyahaneneharene xowaka — nexa.

*Wakahare Tyakekohatiye, Matyakekonehare Tahi*

(Lucas 12.41-48)

<sup>45</sup> Hoka Jesus nihitiya: — Xoanere haretya wakahare tyakekohatiye exahe iriharexe? Hatyohare atyo etakehare exekohase hawenekoare halakisene hoka kaxaikoterehare ehana exahe ijiterehare nakairati wakaharenai ana enaose kamaehena hoka. <sup>46</sup> Waiye kaiserehare atyo wakahare nikare tyomiterehare, exekohase kaokehetehe hoka waiyiterehare. <sup>47</sup> Aliterexe nomita xihiy: exekohase ite hatyo wakahare ana tyoty haxiyeharenai halakisa kaxaikone maheta. <sup>48</sup> Hoka maisaiya atyo waiyexe wakahare hoka exakeriya ahekotya: “Noxekohase atyo howithihareta hatyoaneneheta kakoa”, nexaiya, hoka <sup>49</sup> hatyaosetaiya mokonasehenaiya haiyaharenai wakaharenai exahe wakahalonai, hoka kanakairehenaiya, terehenaiya hekatikarenai kakoa. <sup>50</sup> Hoka exekohase ite tyoheta, ewakanehare maxatyaharenahareta, mawaiyekahalakitere enomana xowaka. <sup>51</sup> Hoka iniyalahare ite hawakanehare moka, exahe matyakekoneharenai xomokaka akeretaite kaxomokaka aoka. Hoka nalite tiyahena exahe karai, karai, nexa mohena haikoli.

*10-halonai Xoimahalotinai Tahi*

<sup>1</sup> Hoka Jesus nexa: — Hatyo xowaka atyoite Enore koamaniya nawenatyaka atyoite 10-halo xoimahalotinai kolatyaha haxaokanatyakalaha hoka xane ahalakoatyahitire

<sup>2</sup> kaiyanityohenere akereta. 5-halonai atyo maisa irihalolo hoka 5-halo atyo irihalo.

<sup>3</sup> Hatyo 5-halo mairihalonehalonai atyo kolatyaha haxaokanatyakalaha hoka maisa atyo kolatyahitaha exá haxaokanatyakalaha niyahare. <sup>4</sup> Hoka irihalolonai atyo kolatyaha haitimaxaha haxaokanatyakalaha niyahare.

<sup>5</sup> — Kaiyanityohenere wahehena makaokeneta hoka nemahenaha, enemakaha kawehena hoka. <sup>6</sup> Hoka wahaxatihena hoka semaha kawawi: “Kaiyanityohenere kaokehena! Xisohena hoka xahalakoatene!” nexa.

<sup>7</sup> — Hatyaoseta hatyo 10-halo xoimahalotinai kaosehetaha hoka aotakahenahitaha haxaokanatyakalanai. <sup>8</sup> Hoka hatyo mairihalonehalonai nehenaha hahinaehalonaiha hiye: “Xama inira xisa womana xitimaxa hiyeta. Wiyaokanatyakala wakehena wonita”, nexaha.

<sup>9</sup> — “Maisaiya aliyakere”, nexaha hatyo ihinaehalonai irihalonai ihiyeha. “Witimaxaiya maisa xihakakoaneta, exahe wihakakoaneta. Xaokita atyo hoka xiyanexiya!” nexaha.

<sup>10</sup> — Hatyaoseta xoimahaloti mairihalonehalonai xaneha iyaha maheta haitimaxaha hoka emakanetaha kaiyanityohenere kaoka. Hoka 5-halo xoimahalotinai memere tyaponiterenai isoaha exema enawenakakoane hisehare ana hoka jihore jihotyoa.

<sup>11</sup> — Hatyo najikinita haiyahalonai kaokeheta hoka kawihenaha: “Xekohaseti, xekohaseti! hamajiholatya hoka wisoa”, nexaha.

<sup>12</sup> — Hoka kaiyanityohenere nehena: “Maisa nowaiyanihalo xini xiso! Maisaiya namajiholaita xomana!” nexo.

<sup>13</sup> Hoka Jesus halakihenahairaene hoka nehena: — Hiyeta maika xikaxaikoawihena. Hiayi, maisa atyo xawaiyorexe Haliti Ityani tyoaneneheta ferakene kakoa — nexo.

#### *Hanamaharenai Wakaharenai Tahi (Lucas 19.11-27)*

<sup>14</sup> Hoka Jesus nehitija: — Enore koamaniya nawenatyaka tehitija atyoite hatya haliti xanehena maheta hoka kawisa hawakaneharenai hoka halakijitere haxiye hare enomanaha hoka kaxaikoahitere enomana maheta akereta atyoite. <sup>15</sup> Hoka olo isa enomanaha, enawaiyoreha hakakoane akereta. Hatya ana 5.000 hokose olo isa, hatya ana tehitija 2.000 hokose, hatya ana tehitija 1.000 hokose isa. Hatyaoseta xane. <sup>16</sup> Hoka wakahare 5.000 hokose olo resebehenerere xane haka hatyo haoloxa kakoa hoka 5.000 akekoarehitiyene. <sup>17</sup> Nikare tehitija 2.000 resebehenerere haka haoloxa kakoa hoka 2.000 akekoarekihitiyene. <sup>18</sup> Hoka 1.000 resebehenerere atyo xane seka toloko hoka waikoako tolokotya haxekohase noloxa, ateroakisene maheta.

<sup>19</sup> — Hatyaoseta wahakiyehena najikinita exekohaseha haikoaheta hoka axehenahite-henene haoloxa tahi. <sup>20</sup> Hoka wakahare 5.000 hokose olo resebehenerere xane hoka iseheta enoloxa enomana 5.000 kajiyanehenere kakoita hoka nehena: “Xekohaseti, hisa atyo nomani 5.000 hokose olo. Hoka hiyaiyehena, owene 5.000 nakajiyanehenerene”, nexo.

<sup>21</sup> — “Waiye kaiserehare, wakahare waiyexe, tyakekohatiye atyo hiso”, nexo exekohase. “Hiso atyo hirihare hikaxaiko inirere olo. Hatyo hiyeta exaheharite nisa homana hoka hikaxaiko. Hisohena hoka wimaxalohare!” nexo.

<sup>22</sup> — Hatyaoseta wakahare 2.000 hokose resebehenerere xane hoka nehena: “Xekohaseti, hisa atyo nomani 2.000 hokose olo. Hoka hiyaiyehena, owene 2.000 nakajiyanehenerene”, nexo. <sup>23</sup> “Waiye kaiserehare, wakahare waiyexe, tyakekohatiye”, nexo exekohase. “Hiso atyo hirihare hikaxaikota inirere olo. Hatyo hiyeta exahehare ite nisa homana hoka hikaxaiko. Hisohena hoka wimaxalohare!” nexo.

<sup>24</sup> — Hatyaoseta wakahare 1.000 resebehenerere xane hoka nehena: “Xekohaseti, waiyekehalakita atyo nomani hiyaljiniharene. Himixita atyo himaxaferene akitita, hahotyalikijita atyo himaxawakoarene akitita. <sup>25</sup> Nomaira hoka hatyo hiyeta nateroakisa holoxa waikoako. Hiyaiyehena, owene holoxa”, nexo.

<sup>26</sup> — “Wakahare mahakaiserexe, maxaharehatiye!” nexo. “Waiyekehalakita atyo homana noximexani nomaxafirinhare akitita, nahotyalikihititere nomaxawakoalini-hare akitita. <sup>27</sup> Hoka ekoiya noloxi olo xomokakala hanako hamokare hoka naaikoahetehenaiya hoka exahexeya naresebehetene”, nexo.

— Hatyaoseta ehaikoahareheta hoka nehena hawakaneharenai hiye: <sup>28</sup> “Xiye heta enoloxa enonita hoka xisene 10.000 hokose kaoloxehenenre ana. <sup>29</sup> Hiayi, xala xamani atyoite kalore kakoare hoka kaxekakihitiye enomana hoka exahehare ite tyaona enomana. Hoka xala xamani atyoite maisa xoare kakoare, exahe inirere kakoare ene hoka kaiyaketa atyoite enonitata. <sup>30</sup> Hoka xaxawatene menanaka makaliroti koni

wakahare maisakaiserexe. Hoka nalite tiya exahe haikoli hoka karai, karai, nexa moka” — nexa.

*Xaxalisati Miyanitiye Tahi  
(Apocalipse 20.11-15)*

<sup>31</sup> — Haliti Ityani kalorexe tyaohetehenere hoka tyohetehenere tyotya anjonai kakoa xowakaite tyoka haokahakala waiyexe heno. <sup>32</sup> Hatyaosetaite tyotya halitinai waikohekao tyaoniterenaite hohisakoaha enahalakoa hoka haware xakinite mokahene, kalanero nonitata haware kabala mokitere ekaxaikotyasehare akeretaite. <sup>33</sup> Kalaneronai akitere ite hafihini maniya moka, hoka kabalnai aokiterite hawatone maniya. <sup>34</sup> Hatyaosetaite kalorexe nehena hafihini maniya mohenerenai hiye: “Xasemehena, xiso baba awaiyehenerenai! Xisohena hoka xisaona wenakalati Baba hetati waikohe, enokoa xoaha tyomehenere xowakiyita tyomehenere nali. <sup>35</sup> Hiyaiya, nonakita ene hoka xatyaisa natyo. Noinita ene hoka xerakisa natyo. Hahotyalihare xakore natyo hoka xihanako xaisoakisa natyo. <sup>36</sup> Nomaimahiro ene hoka xakaimatya natyo. Nohokakita ene hoka xikaxaiko natyo. Berexo ako notyaonita hoka xisoa xiayia natyo”, nexa.

<sup>37</sup> — Hoka waiyexeharexenaite axehena: “Xekohaseti, xoana xowaka hinakita ene hoka watyaisa hiso, exahe hoinita ene hoka werakisa hiso? <sup>38</sup> Xoana xowaka hahotyalihare xakore wiyaiya hiso hoka waiye wamoka hiso wihanako, exahe himaimahiro ene hoka wakaimatya hiso? <sup>39</sup> Xoana xowaka hihokakita ene, exahe berexo ako hisaonita hoka wisoa wiyaiya hiso?” nexahaite. <sup>40</sup> Hatyaosetaite Kalorexe nehena: “Aliterexe nomita xihiyie: nikare atyo xamoka nohinaeharenai kirakoane tyaoniterenai hoka natyo atyo nikare xamokita”, nexa.

<sup>41</sup> — Hatyaosetaite nehena hawatone maniya mohenerenai hiye: “Xakikisoahete-hena noniti, xiso Enore nirawanakorenai! Xiyanehena irikati matyotenehare koni memere kaxomokakehenere Tihanare, ewakaneharenai anjonai anere nali. <sup>42</sup> Hiyaiya, nonakitere xowaka maisa xatyaijita natyo, noinitere xowaka maisa xerakijita natyo. <sup>43</sup> Hahotyalihare xakore natyo hoka maisa xihanako xaisoakijita natyo, nomaimahiro xakore hoka maisa xakaimaita natyo. Nohokakita, exahe berexo ako xoaha xakore notyaonita hoka maisa xisoa xiayita natyo”, nexa.

<sup>44</sup> — Hatyaosetaite axehenahene: “Xekohaseti, xoana xowaka hinakita, hoinita, hahotyalihare, himaimahiro, hihokakita, berexo ako hisaonita hoka wiyaiya hiso hoka maisa wakahinaetita hiso?” nexahaite. <sup>45</sup> Hatyaosetaite kalorexe nehena: “Aliterexe nomita xihiyie: tyotyaki ximakahinaerehenere nohinaeharenai kirakoane tyaoniterenai xowaka atyo natyo atyo ximakahinairita”, nexaite.

<sup>46</sup> Hatyaoseta Jesus halakihena hairaene hoka nexa: — Hatyonai atyoite xaneha irikati matyotenehare tyaonitere nali hoka waiyexenai atyoite xaneha wenakalati waiyexe nali hoka waiye tyaonaha mene matyotenehare — nexa Jesus ihiyeha.

## 26

*Jesus Tahi Ahekotyaha Aisahene Maheta  
(Marcos 14.1-2; Lucas 22.1-2; João 11.45-53)*

<sup>1</sup> Hatyaoseta Jesus miyatya hatyoharenai tahi haxaotyakira hoka nexa haxaotyakira-harenai hiye:

<sup>2</sup> — Waiyekhalakita atyo xomana: Hinamaki ferakene taitehena atyo hoka hisehaliti Páscoa tyaohena. Hoka Haliti Ityanite kamatawat�akehena atyalihose xaimaholatyaka hiye kaberekotyaka maheta.

<sup>3</sup> Hatyaoseta sacerdotenai xekohasenai, judeu nityohalitiranaiha harenai aho-hisakoatyakakoaha xekohaseti Caifás hanako. <sup>4</sup> Hoka ahekotyaha: hametenetaha otokoha Jesus hoka aisahene aokowiha.

<sup>5</sup> Xakore hoka nehenaha: — Maisaiya nikare wisaoita hisehaliti xowaka, waiya aliya hoka halitinai xalijinhare tyaona — nexaha.

*Jesus Tyaonita Wenakalati Betânia Nali  
(Marcos 14.3-9; João 12.1-8)*

<sup>6</sup> Hoka Jesus wenakalati Betânia nali tyaonita jijikoahiti tawanehare Simão hanako hoka <sup>7</sup> hatya ohiro kaoka enomana airaxero karore kahekoalo. Hoka Jesus kanakairita ene hoka eseri heno airaxero owika.

<sup>8</sup> Hoka exaotyakiraharenai waiyaha hatyoharenai hoka ehareha hoka nexaha: — Xoanere hoka nikare tyaonita? Hiyaiya, airaxero meta. <sup>9</sup> Ikoiya atyo airaxero kabetyltyaka kalo xaimane hoka hatyo oloiya kaxekaka maoloxaharenai ana! nexaha.

<sup>10</sup> Hoka Jesus ana waiyekehala kita iniraineha hoka nehena: — Xoana hoka xexam-aikohalonikijita exe ohiro? Hiyaiya, waiyexe atyo tyoma nomani. <sup>11</sup> Hiyaiya, maolox-aharenai atyoite tyaota mene xinekoni hoka natyoia atyo maisa notyaoneta minita xinekoni. <sup>12</sup> Nokamani nahitita atyo tyaota airaxeharetya noháre, noxafityaki niyahare. <sup>13</sup> Aliterexe nomita xihiye: tyotya hakakoare Iraiti Waiyexe kaxakaisakehena nali atyoite kaxakaisaka exe tyomehenere nomani hoka otyaxemahenahitahaite exe ohiro.

*Judas Matawahena Jesus  
(Marcos 14.10-11; Lucas 22.3-6)*

<sup>14</sup> Hatyaoseta 12-hare exaotyakiraharenai konitare, Judas Iscariotes nexarexe, xane iraehena sacerdotenai xekohasenai kakoa <sup>15</sup> hoka nehena: — Xoanereya xabakatya natyo hoka namatawaya Jesus xomana? nexa.

Hatyaoseta ihatyaha 30 hokose olo prata nomaka hoka isaha enomana. <sup>16</sup> Hatyo najikinita Judas ahekohena Jesus hamatawala tahi akiti kakoa.

*Jesus Otyaxematyá Páscoa Ferakene  
(Marcos 14.12-21; Lucas 22.7-23; João 13.21-30)*

<sup>17</sup> Hatyaoseta hetatiye ferakene hisehaliti nakairati makaorehetyakahare kakanakairatyaka aokahitere xowaka xane hikoa. Hoka exaotyakiraharenai xaneha Jesus haliya hoka axahene: — Aliye nali wisoma nakairati hisehaliti Páscoa niyahare haokita? nexaha.

<sup>18</sup> Hoka nexa ihiye: — Xiyanehena wenakalati xeta hoka xatawa hatya haliti hoka xexa ihiye: “Xekohaseti nexa: ‘Noferakini xane hikoa. Noxaotyakiriharenai, natyo harenaite wotyaxemahena Páscoa ferakene hihanako’”, xexa.

<sup>19</sup> Hatyaoseta exaotyakiraharenai Jesus aokitere akereta tyaonaha hoka tyomaha nakairati Páscoa niyahare.

<sup>20</sup> Maka hoka Jesus 12-hare haxaotyakiraharenai kakoa tyoka kanakairaha maheta.

<sup>21</sup> Kanakairahita hoka Jesus nehena: — Aliterexe nomita xihiye: hatya xinekonitare ite matawahena natyo — nexa.

<sup>22</sup> Nexa hoka kalore amaikehoreha hoka hatya xakini axehenaha Jesus: — Xoana maisa natyo xini haokita? nexaha.

<sup>23</sup> Hoka Jesus nehena: — Hatya nohakakoani balatoahcko maikitere nakairatite matawahena natyo. <sup>24</sup> Haliti Ityanite wainihena Iraiti Waiyexe iraetere akereta, xakore hoka kirakoane atyoite tyaohena Haliti Ityani matawahenere! Waiye kaiserehareya atyo mawenanehareta tyaonare! nexa.

<sup>25</sup> Hatyaoseta Judas, ematawatyasehare, axehenene: — Xaotyakisatiye, xoana maisa natyo xini haokita? nexa.

— Hoka hisota atyo nikare hiraeta — nexa Jesus ihiye.

*Jesus Aimenekotya Nakairati, Erati Kakoa Hakamane  
(Marcos 14.22-26; Lucas 22.15-20; 1 Coríntios 11.23-26)*

<sup>26</sup> Kanakairahitaha hoka Jesus iya nakairati hoka iraexatya Enore hiye. Hatyaoseta taikasetene hoka isene haxaotyakiraharenai ana hoka nehena: — Xotohena hoka xikanakaira. Exe atyo noháre — nexa.

<sup>27</sup> Hatyaoseta iyehitiya erakakalati hoka iraexahitiya Enore hiye. Hatyaoseta isene haxaotyakiraharenai ana hoka nehena: — Xiserehena xityotya inira xakini. <sup>28</sup> Hiyaiya,

exe atyo notimalaxi, kaxiratyakehenere kahare haliti wanahiya, kaxemaisatyakeheta maheta iniyalahare enómaneha. Exe timalati hiyeta atyo waitare wenati tyaoheta halitinai ana Enore kakoa. <sup>29</sup> Aliterexe nomita xihkiye: exaoseta atyoite maisa noterehitita exehare vinhoxa xikakoa. Xakore hoka noterehitiya atyoite waitarexa vinhoxa xikakoa Baba nawenakala nali — nexa.

<sup>30</sup> Hatyaoseta xeraha haxaka xerati hoka xaneha Oliveiras tyairiya nali.

*Jesus Irae Pedro Kakoa*

(Marcos 14.27-31; Lucas 22.31-34; João 13.36-38)

<sup>31</sup> Hoka hatyo nali Jesus nexa: — Exe xatinite xisekoahena, xahalakihena natyo. Hiyaiya, iraiti waiyexe kaxairatyakehenere atyo nexa:

“Naisaite kaxaikotyatiye hoka tyotaite ekaxaikoneharenai xaore”.

<sup>32</sup> Xakore hoka nokasehetehenere najikinitaite noxani xaheta maniya Galiléia xeta — nexa ihiyeha.

<sup>33</sup> Hatyaoseta Pedro nehena Jesus hiye: — Maisaiya atyo natyo nahalakijita hiso, exahe haiyanai nikare tyona hoka — nexa.

<sup>34</sup> Hoka Jesus nexa Pedro hiye: — Aliterexe nomita hihiye: awisa xatinite, takoir makawiraharenetaite, hanamaki hateraharetyoa, himawaiyaneneharene ite haoka natyo — nexa.

<sup>35</sup> Hoka Pedro nexa: — Maisaiya xoana hekota nomawaiyanihare naokita hiso, exahite kotare nowaini hihakakoane — nexa. Tyotya exaotyakiraharenai nikare makere iraeha.

*Jesus Tyaonita Imekoa Getsêmani Nali*

(Marcos 14.32-42; Lucas 22.39-46)

<sup>36</sup> Hatyaoseta Jesus xane haxaotyakiraharenai kakoa Getsêmani aokahitere nali hoka nexa: — Alita xisokehena hoka noxani exe waheta maniya hoka niraexatya — nexa.

<sup>37</sup> Hatyaoseta noloka Pedro, hinamahare Zebedeu ityaninai xoaha hoka hatyo nali Jesus haxamaikoharene kehexa, exahe hamawaiyeharene, <sup>38</sup> hoka nehena: — Kalore noxamaikohalini nokihibit nohiye, motya aijita ene natyo. Alitehena xiso hoka xikaose hoka xiayaiyahokotyoa nohakakoani — nexa ihiyeha.

<sup>39</sup> Nexa hoka xanehitiya sekose aka hoka meholokoa hatiho kakoa waikoa hoka iraexatya: — Abá, haokitaiya atyo hoka hemaisaheta noniti exe erakakalati noxe-makawatikisase. Xakore hoka maisaiya atyo naokitere akereta xini kaomaka hoka maika atyo haokitere akereta kaomaka — nexa.

<sup>40</sup> Hatyaoseta haikoaheta hoka waiyehena atyo, hanamahare exaotyakiraharenai atyo nemakita hoka nehena Pedro hiye: — Xoana maisaiya ini hekoti xikaose hoka xiayaiyahokotyoita nohakakoani? nexa. <sup>41</sup> Xikaose hoka xiraexatya, maisa xikahasakaharetyakita maheta. Xiyahekola atyo waiye maniya tyaonita, xakore hoka xiháre atyo maisa kinaterexe — nexa.

<sup>42</sup> Hatyaoseta xane iraexahitiya ihinamakinihena hiye hoka nehena: — Abá, exe erakakalati noxemakawatikisaseya maisa kaxemaisatyakehitita nomaeraninhareta hoka maika haokitere akeretaite kaomaka — nexa.

<sup>43</sup> Hatyaoseta haikoaheta haxaotyakiraharenai ana hoka nemakahitataha waiyahene. Enemakaha kalore kaweta hoka maisa aliyakere kaosexeha.

<sup>44</sup> Hatyaoseta Jesus xanehitiya enonyahitaha hoka ehanamakinihena hiye iraexahenere akereta iraexahitiya. <sup>45</sup> Hatyaoseta haikoaheta haxaotyakiraharenai ana hoka nehena: — Xoana xisemakitata, xikawinitata? Xasemehena, enaose xane hikoa hoka Haliti Ityani atyo kamatawatatyakehena iniyalahare nomaseharenai ana. <sup>46</sup> Xatityoahetehena hoka wiyaneheta. Xiyaiya, owene haliti nomatawatatyasehare kaokehena — nexa.

*Jesus Kaberexotyaka*

(Marcos 14.43-50; Lucas 22.47-53; João 18.3-12)

<sup>47</sup> Jesus iraetata ene hoka Judas kaoka, hatyo 12-hare exaotyakiraharenai konitare. Kuhare haliti tyoa exema, kesekase, atyalihose harenai kakoare. Sacerdotenai xekohasenai, exahe judeunai nityohalitiranai xoaha xaxikala xema tyoahitaha.

<sup>48</sup> Ematawatyasehare koxaka irae ekakoaha hoka aimenekohena hoka nehena: — Nasohitanakolihenerira xotoka, hatyo terota atyo — nexa.

<sup>49</sup> Hatyaoseta Judas kaoka hoka xane Jesus haliya hoka nehena: — Xoana waiye hisaonita, Xaotyakisatiye? nexa hoka sohitankolisisene.

<sup>50</sup> Hoka Jesus nehena ihiye: — Nohinaehare, xoare xamani atyo hisoma haokowita hoka hisomehenene rotita! nexa.

Hatyaoseta kaokaha hoka otokaha Jesus hoka olatyahene.

<sup>51</sup> Hatyaoseta hatya Jesus haliya tyaonitere iya kesekase hoka mokotya sacerdote xekohasehare wakanehare hoka aikotya itinihe.

<sup>52</sup> Hoka Jesus nehena: — Hamohetehena hikeserakase. Hiyaiya, xala xamaniya atyo kesekase kakoa aisa hoka hatyohare kakoitaiya atyo kaxaisaka. <sup>53</sup> Xoana hiyahekola hiye ala, Baba naxa kahinaetya natyo maheta hoka motyaiyala maisa 12-hotyali anjonai axikaita nomani haokita? <sup>54</sup> Xakore hoka nikareya notyaona hoka aliyakereya Iraiti Waiyexe nali xakaihenere akereta kawenatyakehena? nexa.

<sup>55</sup> Hatyaoseta Jesus nehena halitinai hiye: — Xoana hoka xisoa xotohena natyo maheta hoka kesekase, atyalihose harenai kakoa xisoa nomani hoka haliti xalijinharexe akereta xamoka natyo? Hiyaiya, ferakiti nihatyaka notyaonita xikakoa Iraexatyakalati Hanako, xakore hoka maisa atyo xotokare natyo. <sup>56</sup> Exakere xakore atyo xamokita natyo hoka iraeti xakaisaseharenai xairahenere Iraeti Waiyexe naneko akereta atyo kawenatyaka maheta — nexa.

Hatyaoseta exaotyakiraharenai halakisa Jesus hoka tekoaha.

### *Jesus Kakolatyaka Kalorexenai Nahalakoa*

(Marcos 14.53-65; Lucas 22.54-55, 63-71; João 18.12-14, 19-24)

<sup>57</sup> Hatyaoseta Jesus xotokasenai kolatene sacerdotenai xekohase, Caifás nexarexe hana nali. Hatyo nali koxaka hohisakoaha xaotyakiyaho kakoa waiyoreterenai, judeunai nity-ohalitiranai xoaha. <sup>58</sup> Hoka Pedro xane Jesus xema sekoseta sacerdotenai xekohasehare hana talala hoko kijiya. Isoa hoka tyoka sorarenai haliya waiya maheta, aliyakere xamani mohenaha Jesus hoka.

<sup>59</sup> Hatyaoseta sacerdotenai xekohaseharenai, tyotya kalorexenai xoaha semaha aokowiha xoalinhare maoserare Jesus tahi hoka aisahene aokowihenaha. <sup>60</sup> Xakore hoka maisa xoarehare semahitaha etahi. Kahareha xakore tityoaha hoka iraeha hamaoseralaha etahi hoka. Hatyaoseta hinamahare haliti maoseratyaliyenai tityoaha hoka nehenaha:

<sup>61</sup> — Exe haliti atyo exakere irai: “Nahatahetiya Enore anere Iraexatyakalati Hana hoka notyomehetenya hanamaki ferakene kakoita”, nexa.

<sup>62</sup> Hatyaoseta sacerdotenai xekohasehare tityoaha hoka axehena Jesus: — Xoana, maisaite xoare hiraeta exe hiraeharetyaka nahalakoa? nexa.

<sup>63</sup> Nixa xakore hoka Jesus mema tyaona.

Hatyaoseta sacerdotenai xekohasehare axehitiyene: — Kasani hekoaxatya nomani naoka. Hiyaiya, Enore haotita niraeta hikakoa. Xoana hiso Enore Kalorexe Aohenere, Enore Ityani? nexa.

<sup>64</sup> Hoka Jesus nexa: — Hiso atyo nikare hiraeta. Xakore hoka aliterexe atyo niraeta xihiy: exaoseta atyoite xiayiuhena Haliti Ityani nokane Enore kinaterexe fihini maniya, exahe exexoaneheta enokoata kaiminiti konita — nexa.

<sup>65</sup> Hatyaoseta sacerdotenai xekohasehare halalaka haima (hotikisa maheta haxam-aikoharene) hoka nehena: — Iniyalahare atyo irae! Maisaiya atyo xoare maheta etahi akiti hatya xakai wihiye waohitita! Hiyaiya, xasema atyo iniyalahare iniraene Enore tahi!

<sup>66</sup> Hoka xoanaite wamohenene? nexa.

Hoka nehenaha: — Nikare iniyalahare atyo irae hoka waiye xaisaka.

<sup>67</sup> Hatyaoseta xatahotihotyahene, exahe itihokoa mokohenahene hoka <sup>68</sup> nexahitaha: — Hotehena “Enore Kalorexe Aohenere”: xalatya mokotya hiso? nexaha.

*Pedro Hamawaiyanenehare Aoka Jesus**(Marcos 14.66-72; Lucas 22.56-62; João 18.15-18, 25-27)*

<sup>69</sup> Hatyo xowaka Pedro tyokita menanaka wetekokoa hoka sacerdotenai xekohasehare wakanehalo hikoa enomana hoka nehena: — Hiso tehitia ene Jesus Galiléia yere xema hisaonita — nexa. <sup>70</sup> Hoka Pedro teraharetyoahena hoka tyotyaha ehaotitaha nehena: — Maisa atyo waiyekehala kere nomani hatyo hiraetere — nexa. <sup>71</sup> Hatyaoseta xane hatyo wetekokoa xisoakala nali hoka hatya wakahalo waiyehitiyene hoka nehena nali tyaoniterenai hiye: — Exe haliti atyo Jesus Nazaré yere xema ene tyaonita — nexa. <sup>72</sup> Nexa hoka Pedro teraharetyoahitiya: — Aliterexe naokita, maisa atyo nowaiyanihare xini hatyo haliti! nexa.

<sup>73</sup> Hatyo najikinita nali tyaoniterenai xane kaokaha Pedro haliya hoka nehenaha ihiye: — Hiraene hiyeta atyo hawaiyekehalakahare. Hiso tehitia atyo aliterexe enekonitareha — nexaha.

<sup>74</sup> Hatyaoseta Pedro nehena: — Aliterexe niraeta, maisa hatyo haliti nowaiyanihare xini! Ikoia namaoseraita hoka ehekoretaiya Enore hatyohare hiyeta iniyalahare moka natyo — nexa.

Hatyo xowaka takoira kawihena <sup>75</sup> hoka Pedro oteheta Jesus niraene: “Takoira makawiraharenetaite hanamaki hateraharetyoa hoka himawaiyanenehare ite haoka natyo”, nehenere. Hatyaoseta Pedro kikisoaheta hatyo nalita hoka tiya, kalore amaiko-hare hoka.

## 27

*Jesus Kakolatyaka Pilatos Ana**(Marcos 15.1; Lucas 23.1-2; João 18.28-32)*

<sup>1</sup> Kamaetali witita sacerdotenai xekohasenai, judeunai nityohalitiranaiha xoaha ahekohenaha Jesus haxaisaneha tahi. <sup>2</sup> Hatyaoseta olathyaha Jesus hoka xaneha ekakoa kalorexe Pilatos nali, isahene enomana hoka aisene maheta.

*Judas Kamane Tahi**(Atos 1.16-19)*

<sup>3</sup> Hatyaoseta Judas ematawatyasehare waiya Jesus xaisakehena hoka kehexaharetyoaheta hoka xane iseheta 30-hokose olo sacerdotenai xekohasenai exahe judeunai nityohalitiranaiha ana hoka <sup>4</sup> nehena ihiyea: — Iniyalahare notyoma namatawahenere haliti iniyalahare maomanehare hiyeta — nexa ihiyea.

Hoka nexaha: — Xoana, wisoyiyata hoka? Hiso kahane — nexaha.

<sup>5</sup> Hatyaoseta Judas xawaty olo hokosenai Iraexatyakalati Hanako hoka hikoaheta. Hatyo najikinita xane erahokoa hahino hiye hoka aisoawi.

<sup>6</sup> Hatyaoseta sacerdote xekohasenai iyehetaha hatyo olo hokosenai hoka nehenaha: — Exe olo atyo timalati xaimane hoka wiyaotyakisakaho hiyetai ya atyo maisa exe olo wamokita Iraexatyakalati Hana anere kaxomokakitete olo kajalise ako — nexaha.

<sup>7</sup> Hatyaoseta iraikakoahenahere najikinita hatyo olo kakoa xane iyaha “Barohe Hiye Hakatyasehare Waikohera”, aokahitere, sekotarenai xawatyakala niyahare maheta.

<sup>8</sup> Hatyo hiyeta hatyo waikohe xaokaka kalikini kijiye hena “Timalati Waikoherakoa”, nerekatita. <sup>9</sup> Nikare tyaona iraiti xakaisasehare Jeremias iraetere akereta:

Iyehenahitaha 30-hokose olo Israel yerenai tyakekohenahere ebakatyaka xaimane hoka <sup>10</sup> hatyo kakoa iyaha barohe hiye hakatyasehare waikohera, Xekohaseti notyoma ao-henere akereta.

*Jesus Tyaonita Pilatos Nahalakoa**(Marcos 15.2-5; Lucas 23.3-5; João 18.33-38)*

<sup>11</sup> Hatyaoseta Jesus tityoita kalorexe Pilatos nahalakoa hoka Pilatos axehenene hoka nehena: — Xoana, judeunai xekohase kalorexe hiso? nexa.

— Hiso atyo nikare hiraeta — nexa Jesus. <sup>12</sup> Xakore hoka maisa xoare ekoaxatyare sacerdotenai xekohasenai, judeunai nityohalitiranai niraene nahalakoa.

<sup>13</sup> Hatyaoseta Pilatos nehena: — Xoana maisa hasemare iniraehareraha hiso? nexa.

<sup>14</sup> Xakore hoka Jesus mema tyaohitiya, hoka kalorexe hakaharetyoa.

*Jesus Kahalakisaka Kaxaisaka Maheta*

(Marcos 15.6-15; Lucas 23.13-25; João 18.39-19.16)

<sup>15</sup> Hisehaliti Páscoa xowakehena nihatyaka Pilatos aihikoahitita hatya berexo ako tyaonitere halitinai xaxane ximita. <sup>16</sup> Hatyo xowakiya hatya ewaiyanehareha kaisere-hare berexo ako tyaonita, Barrabás nexarexe.

<sup>17</sup> Hatyaoseta halitinai hohisakoaha hoka Pilatos axehenahene: — Xalaite naihikoaheta xomana xaohera: xoana Barrabás, xoana Jesus etake Enore Kalorexe Aohenere aokahitere kore? nexa. <sup>18</sup> Waiyekehala kita atyo enomana sacerdotenai xekohaseharenai nokoawaharene Jesus hiye. Hatyohare hiyeta tyoaha ekakoa enali hoka isahene enomana.

<sup>19</sup> Hatyaoseta Pilatos tyokitata ene kalorexe nokahakalaose nali hoka exanityo axikaxatya hairaine enomana: — Hahalakihena hatyo haliti iniyalahare maomanehare. Hiayiaya, exe xatini nojihini ako maisa waiye notyaonare ihiyeta, kalore namaikohalo ihiyeta — nexa.

<sup>20</sup> Xakore hoka sacerdotenai xekohaseharenai, judeunai nityohalitiranai xoaha aiyateretyoahitaha halitinai xahita, axaha Pilatos hoka aihikoaheta Barrabás hoka Jesus xaisaka aokaha ihiye maheta.

<sup>21</sup> Hatyaoseta kalorexe axehenahene: — Exe hinamaharenai konita, xala hare kaisere naihikoaheta xaokita? nexa.

— Barrabás — nexaha.

<sup>22</sup> Hoka Pilatos axahene: — Hoka xoana atyoite namohena Jesus, etake Enore Kalorexe Aohenere aokahitere? nexa.

— Haberekohenene atyalihose xaimaholatyaka hiye! nexaha.

<sup>23</sup> Hoka Pilatos axehenahitiyene: — Hoka xoaretya iniyalahare tyoma? nexa.

Hatyaoseta aiyateretyoaha kawiyatyaha: — Haberekohenene atyalihose xaimaholatyaka hiye! nexaha.

<sup>24</sup> Hatyaoseta Pilatos xakore waiya hoka maisa terota jiyyaotyarahene, exahe halitinaiya enajikini maniya ehareha ihiye aokita hoka axa one hoka tihahisoaheta halitinai nahalakoita hoka nehena: — Maisa atyo natyo hare xini exe haliti xaisaka naoka, xakore hoka xiso atyo — nexa.

<sup>25</sup> Hoka tyotya halitinai nexaha: — Maika exe wainihenere hiyeta iniyalahare wikaxomokaka, exahe wijikolaharenai hoka — nexa.

<sup>26</sup> Hatyaoseta Pilatos aihikoaheta Barrabás enomanaha. Hatyaoseta wakatya sorarenai hoka mokonasetyaha Jesus militihi aohenere najikinita halakisene enomanaha berekotyahene atyalihose xaimaholatyaka hiye maheta.

*Sorarenai Koexahalisahitaha Jesus*

(Marcos 15.16-20; João 19.2-3)

<sup>27</sup> Hatyaoseta Pilatos sorarexanai kolatyaha Jesus kalorexe hanako nali hoka ahohisakoatyaha tyotya sorarenai hoka exahiyatyahene. <sup>28</sup> Hatyaoseta inima aitoakisaha hoka aisoakisahene imiti nase xotere ako. <sup>29</sup> Tyomaha xolatyaolisoakalati katohere kakoare hoka mokahene eseri hiye, atyakasese mokaha ekahekoia ifihini maniya. Hatyaoseta meholokoaha hakaolise kakoa enahalakoa hoka hirahenahene hoka nehenaha: — Hawaiyeta womana, judeunai xekohase! nexaha. <sup>30</sup> Hatyaoseta xataholisahene, exahe iyaha atyakase ekahekoata hoka mokotyahitene eseri hiye.

<sup>31</sup> Koexahalihenaherene najikinita aitoakihenahitaha imiti xotere nase hoka aisoakisahene inimako. Hatyaoseta xaneha ekakoa berekotyahene maheta atyalihose xaimaholatyaka hiye.

*Jesus Berekotyahaka Atyalihose Xaimaholatyaka Hiye Tahi*

(Marcos 15.21-32; Lucas 23.26-43; João 19.17-27)

<sup>32</sup> Xanahitaha ene hoka ahotoyahō ahalakoatyaha hatya haliti, Simão nexarexe, wenakalati Cirene yere, hoka otokaha Simão hoka Jesus berekotyakala niyahare atyalihose xaimaholatyaka kolatyaka aokaha ihiye.

<sup>33</sup> Hatyaoseta xane kaokaha Gólgota nexarexe nali. (Gólgota atyo “Seriti nahe akerehare aose”, nita.) <sup>34</sup> Kaokaha nali hoka isaha vinhoxa kaketaxatyaka nikanati kakoare Jesus ana terene maheta. Hoka hasakene hoka maisa terene aokowita. <sup>35</sup> Hatyaoseta berekotyahene atyalihose xaimaholatyaka hiye hoka hatyo najikinita hasakaharetyakakoaha hoka Jesus nima irakakakoaha hatyokakoaha. <sup>36</sup> Hatyo najikinita tyokaha hoka wahakohenaha Jesus ana. <sup>37</sup> Eseri haomaniya mokaha taba taose xairatise kakoare, haxawaiyekehalakalaha kakoare:

#### EXE ATYO JESUS JUDEUNAI XEKOHASE

<sup>38</sup> Hinamahare kaiwarexe tehitia berekotyaha atyalihose xaimaholatyakanai hiye ehakakoane, hahare ifihini maniya, hahare ewatone maniya xoaha.

<sup>39</sup> Hoka hatyo nali jiyiterenai koexahalisahene. Matyakekotyahitene exahe xalawalisaha hakaiyeha hoka nexahitaha: <sup>40</sup> — Hisoya atyo hamawenekoaretya Iraexatyakalati Hana hoka hanamaki ferakene kakuittaya hisomehetene haoka. Aliterexe atyo Enore Ityani hiso hoka hexoahetehena hiberekotyaka aoseta hoka hisota hiyoawihete-hena! nexaha.

<sup>41</sup> Hoka sacerdotenai xekohasenai, iraiti kakoa waiyoreterenai, judeunai nityohalitiranai harenai tehitia koexahalihenahene hoka nehenaha: <sup>42</sup> — Haiyanai atyo iyeheta iniyalahare nonitata hoka maisaiya atyo hatyota iyoawihitita! Xoana, maisa Israel yerenai xekohase xini? Hoka kalikinitaiya atyo iyoawiheta haberekotyakaoseta hoka wityakekonya atyo. <sup>43</sup> Enore atyo tyakekota, exahe Enore Ityani aokowi. Hatyo hiyeta wawahakohenha atyoite, xoana Enore xamani ala iyehetene aokowita kalikini! nexaha.

<sup>44</sup> Kaiwarexenai ehaliya kaberekotyakehenerenai kakoita tehitia kirawanahene hoka aiyalatyaha enomana.

#### *Jesus Kamane Tahi*

(Marcos 15.33-41; Lucas 23.44-49; João 19.28-30)

<sup>45</sup> Hatyaoseta totahikoahena hoka makalirohena hakakoare waikohetka. Hoka makaliro tyaona makaoahena kijiya. <sup>46</sup> Makaoahena hoka Jesus kinatyaxa kawiyatya: — Eli, Eli, lemá sabactani — nexa. Exe iraeti atyo exakerexe nita: — Nenorexi, Nenorexi, xoana hoka hahalakisa natyo? nita.

<sup>47</sup> Haiyaharenai nali tyaoniterenai, semaha hatyohare hoka nexaha: — Elias atyo kawihena — nexaha.

<sup>48</sup> Hatyaoseta hatya tema xane vinho xaiya mitoloka tiyaharetyoakalati hoka atyakase keteho mokene hoka aimatene Jesus ana, terene maheta. <sup>49</sup> Hoka haiyaharenai atyo nehenaha: — Awijira hoka wiyaiya, xoana xamanite hoka Elias tyoa iyehetene! nexaha.

<sup>50</sup> Hatyaoseta Jesus kinatyaxa kawiyahitiya hoka waini.

<sup>51</sup> Hatyo xowaka Iraexatyakalati Hanako imiti taose sololoitere halakoa nekese hoka hinama taose tyaona. Eno maniyata halalakoa waikoa maniya exoaheta. Waikohetatako, exahe sehali kalolironai hoka ehekua. <sup>52</sup> Xawatyakalatinai majiholatyaoaheta hoka kahare Enore koamaniya tyaoniterenai koxaka wainihenerenai kasehetaha <sup>53</sup> hoka hikoahenahitaha xawatyakalatinai akota. Hoka Jesus kasehetehenere najikinita xanehenahitaha Wenakalati Waiyexe nali hoka hatyo nali kahare halitinai waiyehenahitene.

<sup>54</sup> Hatyaoseta sorare xekohasehare, esorarexanai harenai, Jesus ana wahakoiterenai, waiyaha waikohetatakoane exahe xoalinihare hoka mairaha hoka nexaha: — Aliterexe atyo Enore Ityani ene! nexaha.

<sup>55</sup> Hoka hatyo nali haiyahalonai ohironai tyaonita hoka sekota wahakotyahitaha. Tyoaha atyo Jesus xema Galiléia ta, exahe kahinaetyahitene ene. <sup>56</sup> Enekoniha Maria Madalena, Maria, Tiago, José xoaha nityo, Zebedeu ityaninai nityo xoaha.

#### *Jesus Xafityaka Tahi*

(Marcos 15.42-47; Lucas 23.50-56; João 19.38-42)

<sup>57</sup> Okoi makehena hoka kaoka hatya haliti kaoloxere, José nexarexe, wenakalati Arimatéia nalitare. Hatyo tehitiya atyo Jesus nawenatyasehare. <sup>58</sup> Hoka José xane Pilatos axehetá Jesus háré. Hoka Pilatos exekakeheta enomana aoka. <sup>59</sup> Hatyaoseta José iyeheta eháré hoka olahisetene imiti kese taosero waitare taose kakoa. <sup>60</sup> Hoka xane mokene haomanere xawatyakalati ako. Hatyo sehalí sekakohenere atyo maisa wahehena xini tyaponita. Hatyaoseta talirika sehalí kalorexe taose jihotya maheta hatyo xawatyakalati. Hatyaoseta xaneheta.

<sup>61</sup> Exowaka Maria Madalena, hatya Maria xoaha, tyokahitaha hatyo xawatyakalati haliya.

### *Xawatyakalati Kaxaikotyaka*

<sup>62</sup> Kamaetali, hatyo memere mohenahere sábado ferakene nahetere nahitita sacerdotenai xekohasenai, fariseunai xoaha hohisakoaha Pilatos kakoa <sup>63</sup> hoka nehenaha: — Kalorexe, waiye atyo wotita. Kasetatere xowaka etake maoseratyaliye nexa: “Hanamaki ferakene najikinitaite hoka nokaseheta”, nitere. <sup>64</sup> Hatyo hiyeta haxikatya sorarenai hoka waiye exawatyakala kaxaikoha hanamaki ferakene. Hoka maisa exaotyakiraharenai iyehenahitita eháré hoka nexahita halitinai hiye: “Kaseheta”, nexahitaha. Hiyaiya, hatyo miyanitiye maoserahenahereya atyo hetatiye xaheharehena niyahare — nexaha.

<sup>65</sup> Hatyaoseta Pilatos nehena ihiyeha: — Owene sorarenai. Xiyane waiye xikaxaiko exawatyakala — nexa ihiyeha.

<sup>66</sup> Nexa hoka xaneha xawatyakalati jihola hiye mokaha baberane maisa xala hare watyalini maheta, exahe halakisaha sorarenai hatyo nali kaxaikoaha maheta xawatyakalati.

## 28

### *Jesus Kaseneheta Tahi*

(Marcos 16.1-10; Lucas 24.1-12; João 20.1-10)

<sup>1</sup> Sábado najikinita, domingo xowaka witita, Maria Madalena, hatya Maria xoaha xaneha waiyaha maheta xawatyakalati. <sup>2</sup> Hatyaoseta waikohekaoa kalore tatakoa. Hoka Enore nalitare hatya anjo tyoa enokoata hoka iyeheta sehalí xawatyakalati jihola hoka tyoka eheno. <sup>3</sup> Motya kahihiyeha. Inimanai hoka iyomate kaiserehara. <sup>4</sup> Hatyaoseta ihiyeta sorarenai kalore mairaha hoka tatakoaha hoka exoaha waikoa, motya ekamane tyaponaha.

<sup>5</sup> Hatyaoseta anjo nehena ohironai hiye: — Awa atyo ximaira! Notita atyo xiso, xatawita atyo Jesus, etake kaberekotyakehenere atyalihose xaimaholatyaka hiye xáhita.

<sup>6</sup> Maisa atyo aliheta aka. Koxaka atyo kaseheta hairaine aoseta. Xisohena hoka mohenaherene aose xiayaiya. <sup>7</sup> Hoka xiyanahetehena hoka xexa exaotyakiraharenai hiye: “Koxaka kaseheta hoka xanehenaite xaheta Galiléia nali xeta. Nalite xiayaiyehetene”, xexa ihiyeha. Xotyaxematyaira exe niraitere — nexa anjo ihiyeha.

<sup>8</sup> Hatyaoseta ihalahalo haikoahenahitaha xawatyakalati nalita. Mairahitaha, xakore hoka ihalahaloha. Hoka tema xanehenahitaha, xakaiha maheta exaotyakiraharenai hiye.

<sup>9</sup> Hatyaoseta eharehena rotita Jesus ahalakoahenahitene hoka nehena: — Kasani ximehexaiko xisaona naoka! nexa.

Nexa ihiyeha hoka xane kaokaha ehaliyita hoka meholokoa, awaiyityahene.

<sup>10</sup> Hatyaoseta Jesus nehena: — Awa atyo ximaira. Xiyaneheta hoka xirai nohinaeharenai hiye hoka xaneha Galiléia xeta hoka nalite waiyehenahitaha natyo — nexa ihiyeha.

### *Kaxaikotyatiyenai Niraesene Tahi*

<sup>11</sup> Ohironai ahotitata xanehenahitaha hoka haiyanai sorarenai xawatyakalati kaxikoterenai xanehenahitaha wenakalati hoka sacerdotenai xekohasenai hiye hatyo hawaiyaneha tahi xakaiha.

<sup>12</sup> Hatyaoseta hatyo kalorexenai ahohisakoatyaha judeunai nityohalitiranai hoka iraekakaoaha. Hatyaoseta kalore olo isaha sorarenai ana, <sup>13</sup> hoka nexaha ihiyeha: — Maika xexa: “Exaotyakiraharenai makiya tyoaha hoka wisemakiterenase ala iyehenahitaha eháre”, xexa. <sup>14</sup> Hoka exahe kalorexe semehenene hoka wijiyyaotenite xiraehenere akereta hoka maisa xoana mokita xiso — nexaha.

<sup>15</sup> Hatyaoseta sorarenai tyaonaha hatyo olo kakoa hoka sacerdotenai xekohasenai aokitere akereta tyaonaha. Hatyo iraiti exaoretyoa hakakoare judeunai koni, heko kalikini kijiuhena hatyo tahi nikare kasemakita.

*Jesus Kaotyakehetra Haxaotyakiraharenai Ana  
(Marcos 16.14-18; Lucas 24.36-49; João 20.19-23; Atos 1.4-8)*

<sup>16</sup> Hatyaoseta 11-hare exaotyakiraharenai xane Galiléia xeta. Hoka xaneha tyairi heno Jesus haxahalakoatyaka aohenere nali. <sup>17</sup> Hatyaoseta waiyehenahitaha Jesus hoka meholokoaha awaiyityahitene. Xakore hoka haiyaharenai atyo katyakoiyahare ekakoa.

<sup>18</sup> Hatyaoseta Jesus kaoka ehaliyahitaha hoka nehena: — Enokoa, waikohekoa xoaha Xekohasehare atyo notyaona — nexa. <sup>19</sup> — Hatyo hiyeta xiyane xaotyakihena tyotya haliti hotyalinai hoka nokoamaniye nawenatyasehare tyaonaha maheta. Hoka maika xabatixahenahene Baba nexare kakoa, Ityani nexare kakoa, Isekohaliti Waiyexe nexare kakoa. <sup>20</sup> Xaotyakihenahene hoka tyotya naokitere akere tyaonaha. Hoka xasemehena, tyotyaki ferakene ite nokaxaiko xiso miyanitiye ferakene kijiya — nexa Jesus haxaotyakiraharenai hiye.

## Marcos

### *João Batista Xakaihakala Tahi* (Mateus 3.1-12; Lucas 3.1-17; João 1.19-28)

<sup>1</sup> Iraiti Waiyexe Enore Ityani Jesus Cristo tahi akiti hetati xowakiya <sup>2</sup> Enore niraine xakaisasehare Isaías xairahenere akereta:

<sup>3</sup> Enore nexa: “Nirainikakoare naxikatyah haheta maniya memere moka maheta haheta maniya. Hoka kawijita maharexakahare nali:

Memere ahoti xamohena Xekohaseti naheta, maika totaho xamohena enaheta maniya,” nita.

<sup>4</sup> Hatyo hiyeta João Batista kaotyaka maharexakiti hoka batixaita halitinai, xakaita Iraiti Waiyexe ihiyeha.

— Xahalakihena iniyalahare xománe hoka xikabatixatyaka hoka Enore maotyaneheta iniyalahare xománe — nita João ihiyeha.

<sup>5</sup> Tyotya Judéia koa tyaoniterenai, exahe wenakalati Jerusalém yerenai hoka xaneha João nali hoka iniyalahare háomaneha tahi xakaita ihiye, maisa teraharetyoita, hoka tyotya batixatyahene one Jordão xa nali.

<sup>6</sup> João nima atyo camelio niyali nomakere hoka ijiterone atyo militihi. Iri nijita exahe maha hoka hiyokita.

<sup>7</sup> — Najikinitaite hatya noxahehare tyohena — nita halitinai hiye. — Hoka maisaiya aliyakere natyonae nameholokoa hoka ikijitini xolahi hekoti namaxolaita. Hiayiaya, natyo atyo ekatyahakohare — nexa.

<sup>8</sup> — Natyo atyo nabatixaita xiso one kakoa hoka hatyo atyoite batixahena xiso Isekohaliti Waiyexe kakoa — nita.

### *Jesus Batixatyaka Tahi* (Mateus 3.13-17; Lucas 3.21-22; João 1.32-34)

<sup>9</sup> Hatyo xowaka Jesus tya wenakalati Nazaré nalita, Galiléia koa nalita hoka João batixatene one Jordão xa nali.

<sup>10</sup> Hikoaheta onexata taita hoka waiyehena atyo Jesus, enokoa totakore tyaona hoka hatyoakota Isekohaliti Waiyexe exoahena enomana watyaha akerehare. <sup>11</sup> Enokoata iraiti kasemaka: — Hiso atyo nityani noxiyakawali, hawaiyeta nomani, kalore haihalahanikijita natyo — nexa.

### *Jesus Hasakaharetyaka Tahi* (Mateus 4.1-11; Lucas 4.1-13)

<sup>12</sup> Hatyo najikinita Isekohaliti Waiyexe axikatyah Jesus maharexakahare nali. <sup>13</sup> Hatyo nali 40-ki ferakene tyaona. Hatyo nali Ahalakoahaliti hasakaharetene. Hatyo nali tehtihiya kirakahare xalijiniharexenai tyaonita xakore hoka anjonai atyo kaxaikotene.

### *Jesus Hahena Galiléia Nali Hotohare* (Mateus 4.12-22; Lucas 4.14-15; 5.1-11)

<sup>14</sup> Hatyaoseta João kaberexotyakehenere najikinita Jesus xane Galiléia koa Iraiti Waiyexe Xekohaseti Enore nalitare tyohenere tahi akiti xakai maheta.

<sup>15</sup> — Aimenkohenere aoseya xane hikoahena. Okoitya xekohaseti Enore nalitare kaokehena, xahalakihenaira xománe iniyalahare hoka Iraiti Waiyexe xityakekohena — nita ihiyeha.

<sup>16</sup> Haxowakiya Jesus tonakilihijita one Galiléia hoka waiya hinamahare haximarene kakoarenas Simão Pedro, André xoaha. Maka kakoa mairatyahitaha, mairatyatiyenai hoka.

<sup>17</sup> — Xisohena noximi hoka naotyakisa xiso hoka haliti nolokasehare xisaona — nexa Jesus ihiyeha.

<sup>18</sup> Hatyaoseta halakisaha rotita kohase hiyakakala hoka xaneha Jesus xema.

<sup>19</sup> Jiyehtiya maisekoneta hoka waiya hinamahare haximarene kakoarenai Tiago, João xoaha, Zebedeu ityaninai. Kanowako tinolaharehenahitinha maka kohase hiyakakala.  
<sup>20</sup> Kawisahene hoka halakisaha rotita hanexeha Zebedeu, ewakaneharenai harenai kanowakota hoka xaneha Jesus xema.

*Hatya Haliti Kakoa Isekohaliti Iniyalahare Tyaonita  
 (Lucas 4.31-37)*

<sup>21</sup> Hatyaoseta Jesus haxaotyakiraharenae kakoa xane kaoka wenakalati Cafarnaum nali. Sábado ferakene xane xahohisakoatyakalati hanako aotyakisa halitinai maheta.  
<sup>22</sup> Exaotyakira semaha hoka hakaharetyoaha, iraeta atyo iyateliti kakoare hoka. Maisa judeunai xaotyakiraho kakoa waiyoreterenai akereta xini aotyakijita hoka hatyo hiyeta hakaharetyoaha.

<sup>23</sup> Aotyakijita ene hoka tihanare kamilakorerahare tyaonita enekonyaha hoka kinatayxa irai Jesus kakoa:

<sup>24</sup> — Xoare haoka wihiye, Jesus Nazaré yere? Xoana hisoa hamawenekoaretya maheta wiso? Waiye atyo hawaiyekahalahareta nomani. Hiso atyo Enore Xaxikalalahare Waiyexe — nexa.

<sup>25</sup> Hoka Jesus nexa tihanare hiye: — Nikareta hirae hoka hahikoahetehena hatyo haliti nonitata! nexa.

<sup>26</sup> Hatyaoseta tihanare atatakoakisene, awerahalikikoatene hoka hikoaheta enonita.

<sup>27</sup> Hatyo hiyeta tyotyaha hakaharetyoaha hoka axakakoahenaha: — Xoanere kaisere? Xoanere, waitare xaotyakiye kakoala aotyakijita? Xiyaiya, iraihena tihanarenai kakoa hoka tyakekota iniraine — nexakakoaha.

<sup>28</sup> Hatyo hiyeta tyotyaha Galiléia koa yerenae haxerore semaha Jesus tahi akiti.

*Jesus Aiyatolokiheta Pedro Nakero  
 (Mateus 8.14-15; Lucas 4.38-39)*

<sup>29</sup> Hatyaoseta Jesus haxaotyakiraharenai kakoa hikoahenahitaha xahohisakoatyakalati hanakota hoka xaneha rotita Tiago, João xoaha kakoa Simão Pedro, André xoaha hana nali xeta. <sup>30</sup> Exowaka Simão nimasero hokakita hoka ehokotyoita, watyahiseta hoka. Hatyaoseta Jesus kaoka taita hoka xakai etahi akiti ihiye.

<sup>31</sup> Hatyaoseta xane ehokotyoitere nali hoka otokene ekahe hiye hoka aokanikisene. Aokanikihetene hoka ewatyahisene tyoteheta enonita hoka xane nakairati tyoma enomanaha.

*Jesus Aiyatelekiheta Hokakiterenai  
 (Mateus 8.16-17; Lucas 4.40-41)*

<sup>32</sup> Okoi kamai isoahena hoka kolatyaha tyotyaha hokakiterenae, exahe tihanare kamilakoreraharenae Jesus ana. <sup>33</sup> Tyotyaha hatyo wenakalati tyaoniterenai xane hohisakoahahati kanase nali. <sup>34</sup> Jesus kahare haliti aiyatelikiheta tyotyaha kawakiti hawarehare kahehare kakoarenae, exahe kahare axanekiheta tihanarenae enonyahitaha. Hatyo tihanarenae ana atyo waiyekahalahareta Jesus hoka hatyo hiyeta Jesus mairaeniyahitene.

*Jesus Galiléia Nali  
 (Lucas 4.42-44)*

<sup>35</sup> Kamaetali makahekoasetata hoka Jesus kaose hoka xane maharexakahare hoka nali iraexatya. <sup>36</sup> Xane hoka hatyaoseta Simão Pedro, hahinaeharenae kakoa tawaha hakakoare Jesus xahita.

<sup>37</sup> Xane kaokehahitene hoka: — Tyotyahaore tawahitaha hiso — nexaha ihiye.

<sup>38</sup> Hoka Jesus nexa ihiyeha: — Wiyala hakiti wenakalati wihaliyeterenai nali hoka noxakai Iraiti Waiyexe ihiyeha. Hatyo niyahare notyoa — nexa.

<sup>39</sup> Hatyaoseta Jesus xane tyotyaha Galiléia koa nali hoka Iraiti Waiyexe xakaita ihiyeha xahohisakoatyakalati hanakonai, exahe tihanarenai hoka axanekihitita.

*Jesus Awaiyehiheta Jijikoahitere  
(Mateus 8.1-4; Lucas 5.12-16)*

<sup>40</sup> Hatyaoseta jijikoahiti kahehare aijitere kaoka Jesus ana, hakaoliri kakoa meholokoa enomana axene maheta. — Hawaiyehihetaiya natyo haokowi hoka hawaiyehihetaiya natyo — nexa Jesus hiye.

<sup>41</sup> Jesus airakoaneharetene hoka hakahe ekaokakisa ihiye hoka nexa ihiye: — Há, naokaite. Hawaiyehiheta atyo — nexa. <sup>42</sup> Hatyaoseta jijikoahiti kahehare tyoteheta enonita hoka kinatereheta.

<sup>43</sup> Hatyaoseta Jesus kinatyaxa irai ekakoa. <sup>44</sup> — Awaira atyo hiyakaikoahena exehare hatya hiye. Hiyane sacerdote nali hoka hahotikisoa enomana. Hatyaosetaite Moisés aokitere akereta hisa enomana hoka Enore ana fetatene. Hoka tyotyaha waiyoreha hikinaterehenere kakoa — nexa Jesus ihiye.

<sup>45</sup> Xakore hoka xaneheta hoka hakakoare xakaikoatene hoka tyotyaha semaha etahi. Hatyo hiyeta maisaiya Jesus aliyakere wenakalatinai koa xanehitita hoka maharexakahare nali xane tyaonita hoka hakakoare wenakalatinae tyaoniterenae tawitene.

## 2

*Jesus Aetonalinikheta Maetonanehare  
(Mateus 9.1-8; Lucas 5.17-26)*

<sup>1</sup> Akaiki ferakene najikinita Jesus haikoaheta wenakalati Cafarnaum nali xeta. Kaokeheta hahanako taita hoka haxerore nali tyaoniterenai semaha ekaokeneheta <sup>2</sup> hoka kahare haliti ehana nali xane. Kahare halitinai hohisakoa hoka hati kaise mokaha. Haiyaharenai menanakita tyaonita, maisa aliyakere hati kanase nali hekoti xane kaokareha.

Jesus xakaitere Iraiti Waiyexe ihiyeha nase <sup>3</sup> haiyaharenai haliti hatya maetonanehare kolatya Jesus ana. <sup>4</sup> Kaokaha xakore hoka maisa aliyakere isoahitaha Jesus ana ekakoa, kahare halitinai hoka. Maisa aliyakere isoareha hoka kakohaha hatiri hoka hati taose iyaha hoka Jesus hototene exoakisahene exehokotyoakala kokoita.

<sup>5</sup> Jesus waiya ityakekoneha hoka maetonanehare hiye nexa: — Hasemehena, iniyalahare hománenai atyo kaxemaisatyakeheta — nexa.

<sup>6</sup> Judeunai xoatyakisakaho kakoa waiyoreterenai nali tyokita hoka ahekohenaha: <sup>7</sup> — Xoanala hoka nikare iraeta? Maisa aiminisare Enore. Hiyaiya, Enore taita atyo emaiyarehitita iniyalahare kaomakiterekarenai.

<sup>8</sup> Jesus otya rotita exahekolaha hoka nehena: — Xoana hoka nikare xahekotita? nexa. <sup>9</sup> — Xoarehare ala haxerore niraetyaka maetonanehare hiye: “Iniyalahare hománenai atyo kaxemaisatyakeheta”, nerekatihenaita, xoana, “Hatityoahetehena hoka hatohetehena”, nerekatihenai koríte? nexa. <sup>10</sup> — Hiyaiya, nahotikisaita xomana. Natyo Haliti Ityani iyateliti kakoare atyo notyaonita ali waikohekoa hoka nohiyeta haliti nómame iniyalahare kaxemaisatyakeheta — nexa.

Hatyaoleta nexa maetonanehare hiye: <sup>11</sup> — Hatityoahetehena hiyehetehena hiyetolisoakala hoka hiyanehetehena hihana xeta — nexa.

<sup>12</sup> Nixa taita ihiye hoka tityoaheta ehaotitaha, haxetolisoakala iyeheta hoka hikoaheta hatyo nalita.

Tyotyaha hakaharetyoaha: — Maisa xoana xowaka exakere wiayiyyehenere — nexaha ihalahareha Enore kakoa.

*Jesus Aoka Levi Haomana  
(Mateus 9.9-13; Lucas 5.27-32)*

<sup>13</sup> Hatyaoseta Jesus xanehitia one Galiléia haliya. Kahare haliti kaoka enomana hoka atoyakisahitene.

<sup>14</sup> Tonita ene Jesus hoka waiya Alfeu ityani Levi, owene tyokita kalorexe noloxa bakatyakaose.

— Hisohena noximi — nexa Jesus ihiye hoka tityoaheta hoka xane Jesus xema.

<sup>15</sup> Wahasehena hoka Jesus xane Levi hana nali kanakaira haxaotyakiraharenai kakoa. Kahare kalorexe noloxa resebetyaseharenai, iniyalahare nomaseharenai hare kakoa.

<sup>16</sup> Judeunai xaotyakiraho kakoa waiyoreterenai, fariseunae xoaha waiyahita Jesus nakaira hatyo olo resebetyaseharenai, nikareterenai xoaha kakoa hoka axaha exaotyakiraharenae: — Xoana hoka kanakairita, terita xoaha exe halitinai kakoa? nexaha.

<sup>17</sup> Jesus sema exaxaneha hoka nehena ihiyeha: — Mahokakeneharenai atyo maisa wairatyare aokare haomana, hoka hokakiterenai wairatyare aokita haomana. Notyoa atyo naotyakisa maheta iniyalahare nomaseharenai, maisa atyo waiyexeharexenai naotyakisa maheta xini — nexa Jesus ihiyeha.

*Jesus Irae Manakairiti Enore Hiyeta Tahi*

(Mateus 9.14-17; Lucas 5.33-39)

<sup>18</sup> Haxowakiya João Batista xaotyakiraharenai, fariseunai xoaha manakairahitaha Enore hiyeta. Hoka haiyaharenai axa Jesus: — João xaotyakiraharenai exahe fariseunai xaotyakiraharenai xoaha maisa kanakairare Enore hiyeta. Xoana atyo hoka hiyaotyakiraharenai maisa nikare tehitija tyaconare? nexaha.

<sup>19</sup> Jesus nexa: — Xoana, wenakakoati xowakehena hoka ekaixakatyakaharenai manakairahare tyaconita xaowita? Kaiyanityoheneraya enekoniha tyaconita hoka maisaiya manakairahare tyaconahitaha. <sup>20</sup> Hoka haxowakaite kaiyanityoheneraya kaiyakeheta enekonitaha. Hoka hatyo xowaka atyoite manakairehenaha — nexa.

<sup>21</sup> — Maisa atyo katinolaharetyakehetere imiti xololo, imiti waitare taose mawane kakoa. Waitare taose mawaneya ityotyolisoahetehena hoka halalakaiya imiti xololo, aeroakotyaiya ehalalakoane — nexa.

<sup>22</sup> — Maisa atyo vinho waitarexa kaxomokakere toahiyere militirise nomaka ako. Nikareya kaxomokaka hoka halalakoaiya militirise hoka vinho xaiya iratyoa tyotya, exaheya militirise hoka mawenekoare. Hatyo hiyeta vinho waitarexa militirise waitare ako taita kaxomokakita — nexa Jesus.

*Jesus Atyo Sábado Xekohasehare*

(Mateus 12.1-8; Lucas 6.1-5)

<sup>23</sup> Sábado ferakene xowaka Jesus haxaotyakiraharenai kakoa tonahitaha hoka jiyakonihenahitaha trigo xafityaka hoka haetonaneta exaotyakiraharenae irikotyaha trigo xawase hoka ese kanakairaha.

<sup>24</sup> Hatyaoseta fariseunae axehena Jesus: — Xoana hoka nikare hiyaotyakiraharenai tyaconita? Wiyaotyakisakaho sábado xowaka mahokoanititerehare tyomahitaha — nexaha ihiye.

<sup>25</sup> Hoka Jesus nexa: — Xoana maisa xasemare Davi tahi akiti, manakairahare hoka nakehenere hahinaeharenae kakoa? <sup>26</sup> Isoa Enore hanako. Exowaka Abiatar kaxaikota Enore hana. Isoa hoka kanakaira nakairati Enore ana fetatyakere, isa tehitija hahinaeharenae ana hoka kanakairaha. Wiyaotyakisakaho hiyeta atyo maisa hatyatere kanakairita hatyo nakairati. Sacerdotenae anere taita atyo hatyo nakairati — nexa.

<sup>27</sup> Jesus nehitija: — Haliti hiyeta atyo Enore tyoma sábado. Maisa atyo sábado hiyeta xini tyoma haliti. <sup>28</sup> Nikare hoka Haliti Ityani atyo sábado ferakene xekohase — nexa Jesus ihiyeha.

*Jesus Awaiyehiheta Haliti Nira Kahexe*

(Mateus 12.9-14; Lucas 6.6-11)

<sup>1</sup> Haxowakiya Jesus isoahitiya xahohisakoatyakalati hanako. Isoa hoka waiya hatya haliti hamaniya nirakahexe. <sup>2</sup> Hatyo nali haiyaharenai halitinai wahakotyahita Jesus ana, sábado xowakiyaiya wairatyahita hoka iraeharetyahene aokowitaha emaxaiminirene xaotyakisatyaho hiyeta.

<sup>3</sup> Hatyaoseta Jesus nexa mawaiyekahehare hiye: — Hisohena ali — nexa ihiye.

<sup>4</sup> Hatyaoseta axehena wahakoiterenai: — Xoare nexa sábado ferakene xaokaka wiyaotyakisakaho? Xoareya wisoma hatyo ferakene: waiyexe, iniyalahare kore? Xoana haliti wainihenerite wakahinaehena, wahalakihenene kore ite hoka wainihena? nexa ihiyea.

Nexa ihiyea hoka mema tyaonaha.

<sup>5</sup> Mema tyaonaha hoka Jesus wahakota enomanaha hoka eharehena, amaikoharehena xoaha, maisa semaxematyaha aokowiyea iniraine hoka.

Hatyaoseta Jesus nexa mawaiyekahehare hiye: — Haimahena hikahe — nexa ihiye.

Nexa hoka aimatya hakahe hoka waiyeheta rotita ekae.

<sup>6</sup> Hatyaoseta fariseunai hikoahenahitaha hatyoakota hoka Herodes hiyetarenai kakoa iraekakoaha. Jesus tahi ahekotyaha aisahene maheta.

### *Jesus Aiyatelikheta Haiyanai Hokakiterenai*

<sup>7</sup> Hatyaoseta Jesus haxaotyakiraharenai kakoa xanehitia Galiléia xa nali. Xanehitia hoka kahare halitinai xaneha exema Galiléia koa yerenai, Judéia koa yerenai, <sup>8</sup> Jerusalém yerenai, Iduméia koa yerenai, Jordão xa halakoiya maniya tarenai, wenakalati Sidom, Tiro xoaha maniya tarenai xoaha, kahare halitinai xaneha Jesus xema waiyahene maheta, semahitaha enómane tahi akiti hoka.

<sup>9</sup> Hatyaoseta Jesus axikatya haxaotyakiraharenai tawaha kanowa enomana maheta, kasani maisa halitinai ehoyasekoatyahene aokita hoka. <sup>10</sup> Koxaka kahare haliti aiyatelekheta hoka hatyo hiyeta tyotya hokakiterenai kasani Jesus hiye hakahe hekoti ekaokakisa aokowiyahitaha hoka herawasetyakakoahitaha. <sup>11</sup> Tihanare kamilakoreraharenai waiya Jesus hoka exoaha ikiji haliya hoka kinatyaxa kawiyatyahitaha: — Hiso atyo Enore Ityani — nexahita ihiye.

<sup>12</sup> Nexahitaha hoka Jesus mahokoanitya nikare iniraineha.

### *Jesus Aoka 12-harenai Haxaotyakiraharenai Maheta*

(Mateus 10.1-4; Lucas 6.12-16)

<sup>13</sup> Hatyo najikinita Jesus kakoha tyairi heno hoka kawihena aohenerenai haomana hoka tyoaha enomana. 12-hare <sup>14</sup> haliti aoka haomana ehaliya tyaonaha maheta, exahe hoka axikatyahene xakaihaha Iraiti Waiyexe maheta. Hatyo 12-hare iraiti kakoarenae aoka. <sup>15</sup> Isatehitia iyateliti enomanaha hokakiterenai aiyatelikheta maheta, exahe tihanare kamilakoreraharenai nonita tihanarenai axanekihenahitaha maheta.

<sup>16</sup> Hatyo 12-harenai atyo exenai: Simão nexarexe hoka Pedro nexare kaixarehenahitiyene. <sup>17</sup> Tiago, João xoaha Zebedeu ityaninai hoka Boanerges nexare kaixarehenahitiyene, wiyako maniya atyo, “Onetalolo ityaninai”. <sup>18</sup> André, Filipe, Bartolomeu, Mateus, Tomé, Alfeu ityani Tiago, Tadeu, Simão Cananeu, <sup>19</sup> Judas Iscariotes xoaha. Hatyo Judas atyo Jesus matawat�yasehare.

### *Jesus Atyo Tihanare Aokaha*

(Mateus 12.22-32; Lucas 11.14-23; 12.10)

<sup>20</sup> Hatyaoseta Jesus xaneheta hahaha nali hoka kahare haliti hohisakoahitiya ehana nali hoka maisa aliyakere Jesus, exaotyakiraharenai kanakairareha. <sup>21</sup> Hatyaoseta Jesus hinaeharenai semaha etahi hoka xaneha enomana nolokahene maheta. Haiyaharenai ehatyaharene aokahitereha hiyeta xane nolokahene maheta.

<sup>22</sup> Judeunai nawenatyakaho kakoa waiyoreterenai tyohenere Jerusalém ta nexahitaha exaokaka: — Kala Belzebu tihanarenai xekohase tyaonita ekakoa. Hatyo hiyeta tihanarenai xekohasehare iyateliti ijita enomana hoka halitinai nonita tihanare axanekihitita — nexahitaha.

<sup>23</sup> Hoka Jesus kawisahene hoka aotyakihenahene hoka nehena: — Aliyakeriya Ahalakoahaliti hatyota axikatyoawihetehena xaokita? <sup>24</sup> Hiyaiya, hakoa waikoherakoa tyaoniterenai hatyo kakoaha makereya kirawanekakoaha hoka mehotyakakoahaiya.

<sup>25</sup> Exahiya hatya haliti kaiyanityore, kaisaniye tyaonitere hotyaliya kirawanekakoaha hoka maisaiya kinatere tyaonehenahitita, exaoretyakakoahaiya.

<sup>26</sup> — Nikareya Ahalakoahaliti hotyalinai: hatyo makere kirawanekakoaha hoka mai-saiya aliyakere tyaohenahitaha hoka mehohaiya — nexa.

<sup>27</sup> — Hiyaiya, maisaiya xala hare haliti kinaterexe hanako ijoita hoka kaiwaharetitene, ameteniya olatene hotohare hoka kaiwaharetene, xoare xamani kolatya aokowita ehanakota hoka — nexa Jesus.

<sup>28</sup> — Xotyaira exe niraini, tyotya halitinai iniyalahare tyomitereharenai atyuite kamaotyanetyakeheta, exahe Enore kairaharetyakiterehare tehitia atyoite kamaotyanetyakeheta. <sup>29</sup> Hoka xala xamaniya atyo iraharetya Isekohaliti Waiyexe hoka maisaiya atyo kaxemaisatyakihitita hekoti. Hiyaiya, hatyo iniyalahare atyo maxe-maisatyakahare — nexa Jesus. <sup>30</sup> Nikare Jesus irae haiyaharenai tihanare kamilakoretiterene aokahitere hiyeta.

### *Jesus Nityo, Iximarenenai Xoaha Tawitene*

(Mateus 12.46-50; Lucas 8.19-21; Hebreus 2.11)

<sup>31</sup> Hatyaoseta Jesus nityo iximarenenai harenai kaokaha hoka menanakita tyaonaha hoka ekawisaka aokaha.

<sup>32</sup> Kahare haliti tyokita ehaliya hoka haiyanai xane xakaini ihiye: — Hasemehena, hityo, hiximarenenai xoaha menanakita tyaonahitaha, tawahita hiso — nexaha Jesus hiyeha.

<sup>33</sup> — Xala mama, xala noximalininai xaokita? nexa Jesus axahene.

<sup>34</sup> Hatyaoseta wahakotahisa hahaliya tyokiterenai ana hoka nehena: — Xasemehena, owene atyo mama noximalininai xoaha. <sup>35</sup> Xalanai xamaniya atyo tyakeko Enore niraine hoka tyaona exema hoka hatyonai atyo mama noximalini noximaloni — nexa Jesus ihiyeha.

## 4

### *Xafityatiye Tahi*

(Mateus 13.1-9; Lucas 8.4-8)

<sup>1</sup> Haxowakiya Jesus aotyakihitiya halitinai Galiléia xa haliya. Haliti kahare ho-hisakoahitiya ehaliya hoka xane tyoka kanowako one kilihi halitinai tyaonitere haliyaseta hoka hekotaha hatyo kaiholo kilihi. <sup>2</sup> Jesus aotyakihenahene kahare xoalini hare kakoa hoka iraeti metaharexe kakoa taita aotyakihenahene hoka nehena:

<sup>3</sup> — Xasemehena: hatya haliti xane hahananeharese fitya maheta. <sup>4</sup> Fitita hanakatise hoka haiyasenai exoa ahoti kilihi, hoka kotehalasenai exoa hoka tyotya kanakaire-henahitene. <sup>5</sup> Haiyasenai tehitia sehalli tyaonitere akiti exoa, inira waikohe tyaonitere akiti hoka haxeroreta hikoa. <sup>6</sup> Hatyaoseta kamai hikoahena hoka watere aisehetene, maisa hateko katyahareta hoka. <sup>7</sup> Haiyasenai xane exoa katohere koni hoka katohere jiyahaotene hoka maisa kalita. <sup>8</sup> Haiyasenai waikohe waiyexe akiti xane exoa. Hikoa, waiyehare tyaona, kahare kali. Haiyakate 30-se, 60-se, 100-se hare kaseha — nexa Jesus xakaihakatya ihiyeha.

<sup>9</sup> — Xala xamani atyo katanakoakore semakatya maheta hoka maika semehena niraini — nexa ihiyeha.

### *Jesus Awaiyekehalakatya Xakaihenere Xafityatiye Tahi*

(Mateus 13.18-23; Lucas 8.9-15)

<sup>10</sup> Hatyaoseta halitinai xaneheta hoka Jesus haliya hekotehenerenai hohisakoaha 12-hare exaotyakiraharenai kakoa hoka axehenahene: — Xoare hexa haokowita hanakatise tahi akiti? nexaha ihiye.

<sup>11</sup> Hoka Jesus nehena: — Xomana atyo Enore metaharexe hakoamaniya nawenatyaka hotikijita. Hoka haiyaharenai ana atyoite metaharexe taita kaxakaihakatyakehena.

<sup>12</sup> Hoka waiyehena hoka maisa waiyekahalakita enomanaha, exahe semehenaha hoka maisa waiyekahalakita enomanaha maheta. Hoka hatyo hiyeta maisa Enore tyakekoahitaha maheta, exahe maisa iniyalahare enómaneha kamaotyanetyakihitita maheta.

<sup>13</sup> Hatyaoseta Jesus axehenahene: — Xoana maisa waiyekhalakita exe noxakaitere xihye? Hoka aliyakere ite waiyekhalakehena xomana haiyanai noxakaitere? nexa ihiyeha.

<sup>14</sup> Hatyaoseta Jesus awaiyekhalakehena xakaihenere enomanaha: — Hatyo hanakatise xafityasehare atyo Enore niraene xakaisasehare. <sup>15</sup> Haiyaharenai semehenereharenae Iraiti atyo hanakatise ahoti kilihi exoahenere akereta tyaonahita. Semaha taita iraiti hoka Ahalakoahaliti iyihititene rotita enonyahitaha. <sup>16</sup> Haiyaharenai semehenerenae Iraiti atyo hanakatise xane sehalise tyaonitere akiti exoahenere akereta tyaonahita. Semehenaha hatyo Iraiti hoka awaiyetyahitene haihalahareneha kakoa. <sup>17</sup> Xakore hoka maisa atyo waha tyaonare Iraiti Waiyexe xema, maisa katyaharexe hoka. Kirawanehenahene Iraiti Waiyexe hiyeta hoka haxerore halakihititere iraiti xema hawenane.

<sup>18</sup> Hoka haiyaharenae atyo hanakatise katohere koni xane exoahenere akereta tyaonahitaha. Semahitaha xakore atyo iraiti <sup>19</sup> hoka háwenaneha akiti kakoa atyo ahekotyahitaha, kehalahaliti tahi, xiyealiti harenai tahi atyo ahekotyahitaha, kasani xoalini hare tyomaha aokowihitaha hoka. Nikarehena hoka maisa aliyakere Iraiti Waiyexe xema tyaonareha hoka maisa xoare tyomareha. <sup>20</sup> Hoka haiyaharenae atyo waikohe waiyexe akiti exoahenere hanakatise akereta tyaonahita. Semaha Iraiti hoka awaiyetyahene hoka tyaonaha exema, hoka kahare tyomaha Enore ana, haiyakate 30-se, 60-se, 100-se kasetere akereta tyaonahitaha — nexa Jesus ihiyeha.

### *Xaokanatyakalati Tahi*

(Lucas 8.16-18)

<sup>21</sup> Hatyaoseta Jesus nhitiya ihiyeha: — Xoana, xaokanatyakalati xaotakahena hoka koho katyahe, kama katyahe xamokita? Maiha atyo nikarexe xini. Exomokakaose terota atyo wamokitene, waiye aokanakatya maheta.

<sup>22</sup> — Hiyaiya, tyotya kaxateroakisakitere harenai atyoite kawaiyaka, exahe tyotya masemakahare tyaonitereharenai atyoite kasemaka — nexa.

<sup>23</sup> — Xala xamani atyo katanakoakore semakatya maheta hoka maika semehena niraini — nexa ihiyeha.

<sup>24</sup> Hatyaoseta nhitiya ihiyeha: — Xirihalira xisaona xoalini hare xasemehena hoka. Hiyaiya, aliyakerexe xamaniya xamoka haiyaharenai hoka hatyo xamohenerene akertaiya atyo Enore moka xiso. Hoka hatyo xaheharite mohitiyata xiso.

<sup>25</sup> — Xala xamani atyoite xoalini hare kakoare hoka kaxekakehitiyaita enomana hoka xala xamani atyoite maisa xoare kakoare hoka inira tyaohenere enomana atyoite kaiyakeheta enonita — nexa Jesus ihiyeha.

### *Jesus Hanakatise Hiye Aimenekotya*

<sup>26</sup> — Enore koamaniya nawenatyakaho atyo exakerexe: motya atyo hatya haliti hamasenekoa fititerehare hanakatise akereta. <sup>27</sup> Hoka hatyaoseta xane nemaka, kaosehena hoka exafera hikoa, kekoare hoka mawaiyekhalakiterehare ekekoarene enomana akereta atyo. <sup>28</sup> Waikohe atyo hatyota akekoarenekijitene. Hetati hikoahenere xowaka kirane tyaonita, hatyaoseta kaenaseta, hatyaoseta kaséta. <sup>29</sup> Hatyaoseta nirehena hoka kataikore kakoa irikotitene, ixirikotyakaose xane hikoa hoka — nexa Jesus ihiyeha.

### *Aimenekohitiya Hanakatise Kiranexe Hiye*

(Mateus 13.31-32; Lucas 13.18-19)

<sup>30</sup> Jesus nhitiya: — Xoare kakoa hakakoa Enore koamaniya nawenatyaka akiti? Aliyakereya noxakaini xihye hoka waiyekhalaka xomana?

<sup>31</sup> — Hanakatise kiranexe mostardase akerehare atyo Enore koamaniya nawenatyaka akiti. Tyotya hanakatise katyahakorese atyo hatyo mostarda se. <sup>32</sup> Kiranese xakore hoka hafeteniya hoka hikoa kekoareya hoka tyotya hananehaliti xahehareya tyaona. Kahareya kakanohikoa hoka kotehalasenaiya haihe tyoma ekate — nexa Jesus xakaita ihiyeha.

<sup>33</sup> Exakere Jesus iraeta halitinai kakoa. Xakaihena hoka aimenekoita taita, xoalini hare kakoa. Kasani nikare xakai ihiyeha hoka waiyekehalaka enomanaha aokita hoka.  
<sup>34</sup> Nikare xakaihena hoka aimenekoita taita halitinai ana. Hoka hawawaha heko atyo haxaotyakiraharenai ana awaiyekehalakahititene.

*Jesus Watyali Kinatyawiniti  
(Mateus 8.23-27; Lucas 8.22-25)*

<sup>35</sup> Hatyo ferakene makehena hoka Jesus nexa haxaotyakiraharenai hiye: — Wiyala Galiléia xa halakoiya maniya — nexa.

<sup>36</sup> Hatyaoseta halitinai axikahenahitaha. Hatyaoseta kanowa ako Jesus haxaotyakiraharenai kakoa xane. Koxaka Jesus enahititaha hatyo kanowa ako tyaonita. Hatyaoseta haiyanai kanowa tehtiyya xane exemaha. <sup>37</sup> Nekesexehena xanahitaha hoka hoholati kaoka enomanaha. Hoholasekoatyahene, one ainakiyatya hoka kalorehena kanowa ako ijoita. <sup>38</sup> Jesus nemakita kanowa tyokolyako maniya, haseri kahainaty hoka. Hatyaoseta exaotyakiraharenai kaosetene. — Hikaosehena! Wiwainihenaoreka! Xoana maisa kore himawaiyeharexe wikamane kakoa? nexaha kaosetyahene.

<sup>39</sup> Hatyaoseta Jesus kaose hoka tityoaheta hoka watyali hoholati one ainakiyatitere. — Mema xisaona — nexa.

Nexa hoka mahohoreheta, memaxeheha one, mema akeheta.

<sup>40</sup> Hatyaoseta haxaotyakiraharenai hiye nexa: — Xoana hoka ximairita? Xoana hoka maisa xityakekore? nexa ihiyeha.

<sup>41</sup> Hatyaoseta exaotyakiraharenai kalore mairaha hoka iraikakoahenaha: — Xoare halitini ala exe hoka one, hoholati xoaha hiye irae hoka aokitere akereta tyaonaha? nexaha.

## 5

*Hatya Haliti Kakoa Tyaonita Isekohaliti Iniyalahare  
(Mateus 8.28-34; Lucas 8.26-39)*

<sup>1</sup> Hatyaoseta xane kaokaha Gerasa nali, Galiléia xa halakoiya maniya. <sup>2</sup> Exoa taita kanowakota hoka hatya haliti kawaiyaneharexe atihotene. <sup>3</sup> Xawatyakalatinai nalita tyoita, hatyo nali tyaonita. Maisaiya aliyakere xala harenai olatitene, mahaiya kamatiherahi kakoa hekoti holatitene. <sup>4</sup> Kamatiherahi kakoa olatyahitene kahaliki ekano, ikinoli hare hiye, xakore hoka irikokoaitatene. Maisaiya xala harenai jiyahaowitene.

<sup>5</sup> Tyairinai koni exahe xawatyakalatinai koni tyaonita. Wáhaka makiya, ferakoa xoaha tonakoita, kawikoita, sehali hiye kawe mokoita xoaha.

<sup>6</sup> Jesus kanowa akota exoa taita hoka sekota waiyene hoka tema xane enomana. Hoka hakaolise kakoa xane meholokoa enahalakoa, Jesus atyo exahehara hoka. <sup>7</sup> — Jesus, Enore Kalorexe Ityani, xoare haoka nohiye? Enore nexare kakoa nirai hikakoa, awaira atyo iniyalahare hamohena natyo — nexa kinatyaxa irae.

<sup>8</sup> Jesus koxaka hatyo nahitita nexa: — Tihanare, hahikoahetehenaira exe haliti nonitata — nexa. Hoka hatyo hiyeta nikare iraeta Jesus hiye.

<sup>9</sup> Hatyaoseta Jesus axene: — Xoare nexare hiso? nexa axene. — Nexare atyo Hisoakere, wikahare hoka — nexa.

<sup>10</sup> Hatyaoseta Jesus hiye maisa tihanarenai xaxikatyakeheta hatyo nalita hakiti xeta aokita.

<sup>11</sup> Exowaka kahare bolokonai nali tyaonita, kanakairakoatyahita tyairi henose <sup>12</sup> hoka Jesus hiye irae tihanarenai: — Haxikahena wiso hoka wisoa bolokonai milako — nexaha Jesus hiye.

<sup>13</sup> Hatyaoseta tihanarenai axikaheta haliti nonitata hoka xane bolokonai milako isoaha hoka bolokonai tema tyairi henota, xane onexa exoaha hoka monaha hoka wainiha. Hatyo bolokonai komitaene 2.000-li.

<sup>14</sup> Hatyaoseta bolokonai kaxaikotyasanai tekoaheta nalita hoka xane xakaikoatyaha hatyo tahi akiti wenakalati, exahe hatyo wenakalati haliyita tyaoniterenai hiye. Hoka kahareha xaneha hatyo nali waiyaha maheta. <sup>15</sup> Jesus tyaonitere nali xane kaokaha hoka

waiyehenaha atyo, owene atyo haliti hatyaharetere tyokita, kaimere tyaonita, waiyeheta atyo exahekola. Waiyahene hoka mairaha.

<sup>16</sup> Hatyaoseta koxaka waiyehenerenai xakaihakatya ihiye haliti, exahe bolokonai xoaha tahi akiti ihiye.

<sup>17</sup> Hatyaoseta kasani Jesus xaneheta ewaikoherataha aokaha.

<sup>18</sup> Hatyaoseta Jesus xane kakohahetehena kanowa ako hoka haliti tihanare ehatyahanlikihenere awaiyehetehenere iraehena ihiye: — Waiyehenaiya notyoa hiyema? nexa axene.

<sup>19</sup> Maisa exema xane aokita Jesus hoka nexa ihiye: — Hiyanehetehena hihana nali hoka hihinaeharenai hiye hiyakaihena Xekohaseti awaiyehetehenere hiso tahi akiti. Exahe airakoaneharenere hiso tahi akiti — nexa ihiye.

<sup>20</sup> Nexa ihiye hoka xaneheta hoka xakaihakatya Decapolis naliyerenai hiye Jesus tyomehenerehare enomana tahi. Hoka tyotyaha hakaharetyoaha.

*Jairo Axa Jesus*

(Mateus 9.18-19; Lucas 8.40-42)

<sup>21</sup> Hatyaoseta Jesus haikoaheta hatyo nalita halakooya maniya hoka kahare haliti xane ahalakoatene kaiholokoa nali.

<sup>22</sup> Hatyaoseta hatya haliti Jairo nexarexe, xahohisakoatyakalati hana kaxaikotyase-hare tyoa Jesus ana kaoka hoka ikiji haliya meholokoa.

<sup>23</sup> — Nityani ohiro mokose wainihena. Hisohena hoka hikahe hekaokakisa ihiye hoka kinatoloheta hoka maisa wainita — nexa axa Jesus tihityoa ihiye. <sup>24</sup> Nexa hoka Jesus xane exema. Kahare haliti tehitiya xane exema hoka ehovyasetyakakoaha xanahitaha.

*Jesus Aiyatolokiheta Ohiro*

(Mateus 9.20-22; Lucas 8.43-48)

<sup>25</sup> Hatyaoseta hatya ohiro xane kaoka halitinai koni. 12-terehokoanehena timalati hikoata minita ihiyeta. <sup>26</sup> Kahaliki wairatyarenai ana xane hoka exahehare ewaolitihalokisahitene. Koxaka haoloxa miyatya wairatyarenai hiye. Xakore hoka maisa waiyehetolo hekoti hoka aerorityoitata ihiye. <sup>27</sup> Sema Jesus tahi hoka xane halitinai koni hoka Jesus hiniri maniyata ekaokakisa hakahe inima hiye.

<sup>28</sup> Exakere ahekoita: — Nekaokakisa taitaiya nokahe inima hiye hoka nokinatoloheta — nita hoka <sup>29</sup> hakahe ekaokakisa inima hiye taita hoka waiyeheta. Hoka kehexa hahiyeta timalati tyoteneheta.

<sup>30</sup> Hatyaoseta Jesus kehexa rotita iyateliti hikoahenere ihiyeta hoka terehokoa wahakotya halitinai ana hoka nehena: — Xala hakahe ekaokakisa nimi hiye? nexa.

<sup>31</sup> Hoka exaotyakiraharenai nehena: — Hiyaiya, kahare haliti ehovyasekoita hiso. Hoka xoana hoka nikare haxita? nexaha ihiye.

<sup>32</sup> Hoka Jesus wahakohokotyoitata, kasani waiya aokowita inima hiye hakahe ekaokakihenere hoka. <sup>33</sup> Hatyaoseta hatyo ohiro tyoa Jesus kiji haliya meholokoa, tatakao hamairane, otya haxaiyatolokisakeheta hoka. Hatyaoseta tyotyha xakai Jesus hiye hahokakene tahi.

<sup>34</sup> Hatyaoseta Jesus nexa: — Hityakeko natyo hoka hikinatoloheta. Awa atyo himawaiyehalo, hikinatoloheta atyo. Hiyanehetehena himehexaikohalone kakoa — nexa ihiye.

*Jesus Ekasekiheta Jairo Ityani*

(Mateus 9.23-26; Lucas 8.49-56)

<sup>35</sup> Iraetata ene hatyo ohiro kakoa hoka xahohisakoatyakalati hana kaxaikotyasehare Jairo wakaneharenai kaokaha hoka nexaha ihiye: — Koxakatya hityani waini. Kotare Xekohaseti matyoaneneharenai hihana nali, waiya aliya hoka kirahare haetonane ihiyeta — nexaha.

<sup>36</sup> Jesus sema hatyo iraiti hoka nexa Jairo ihiye: — Awaira atyo himawaiyeharehena. Hityakekohena taitaira natyo — nexa Jairo ihiye.

<sup>37</sup> Hatyaoseta xaneha Jairo hana xeta. Pedro, haximarene kakoarenai Tiago, João xoaha xane exema aoka. Maisa hatehitiya aokita. <sup>38</sup> Hatyaoseta xane kaokaha Jairo hana nali hoka isoaha. Waiyehena atyo werahaliti, osexati hare. Kahare tiyahitaha.

<sup>39</sup> Hoka nehena: — Xoana hoka kalore xitiyita, exahe nikare xisaonita? Xoimahalotita maisa waini xinika, nemakitata — nexa Jesus ihiyeha.

<sup>40</sup> Hatyaoseta ehatyaharene aokitaha hoka Jesus aihikoahenahitene. Hatyaoseta enexe, inityo, hanamahare xanehenere exema xoaha taita isoa hatyo xoimahaloti tyaconitere ako.

<sup>41</sup> Isoa hoka otokene ekahe hiye hoka nehena: — Talita cumi! nexa. Exakere atyo iraeta: — Xoimahaloti, hainakoahetehena! nita atyo.

<sup>42</sup> Nexa ihiye hoka ainakoaheta, tohetehena rotita, xoimahaloti 12-wanone henolo hoka. Hatyaoseta tyotya hakaharetyoaha.

<sup>43</sup> Hatyaoseta Jesus hatyohare maxakaikoatyakene aoka ihiyeha. Hatyaoseta xoimahaloti tyaisaka aoka ihiyeha.

## 6

### *Jesus Haikoaheta Nazaré Xeta*

(Mateus 13.53-58; Lucas 4.16-30)

<sup>1</sup> Hatyaoseta Jesus haikoaheta haxaotyakiraharenai kakoa wenakalati Nazaré xeta, toahiya tyaconitere nali. <sup>2</sup> Hoka sábado ferakenehena hoka xane xahohisakoatyakalati hanako hoka aotyakihena halitinai. Semaha Jesus niraene hoka hakaharetyoa mokahene hoka axakakoaha: — Aliyotala enawaiyore tyoita enomana? Aliyetala exe haliti waiyore tyoita exakere? Aliyakere ala tyomita exehare maomakaharenai? <sup>3</sup> Xoana, maisa hoka okahakalati hati hare nomasehare xini? Xoana maisa hoka Maria ityani xini, exahe Tiago, José, Judas, Simão xoaha naxenane xini? Xoana, maisa hoka iximalonenai xini ali tyaconita? nexaha, maisa awaiyetyareha Jesus hoka.

<sup>4</sup> Hoka Jesus nexa ihiyeha: — Iraiti xakaisasehare atyo kaxaiminisakita hakoakiti. Xakore atyo hoka kaokeheteheha atyo hawaikohera hawenakala, hahinaeharenai koni hoka maisa kaxaiminisakere — nexa ihiyeha.

<sup>5</sup> Hatyo hiyeta maisaiya aliyakere xoare hare metaharexe nomakere tyomita Nazaré nali. Haiyanai hokakiterenai hiye taita hakahe ekaokakisa hoka aiyatelikihenahitene.

<sup>6</sup> Jesus atyo hakaharetyoa ematyakekoneha hiyeta. Hatyaoseta Jesus xaneta wenakalatinai nihatyaka hoka aotyakisahitene.

### *Jesus Xaotyakiraharenai Hatene Tahi*

(Mateus 10.5-15; Lucas 9.1-6)

<sup>7</sup> Hatyaoseta 12-hare haxaotyakiraharenai kawisa, hoka hinamahare xakini axikatyahene. Iyateliti isa enomanaha axanikihetaha isekohaliti iniyalahare halitinai nonitata maheta.

<sup>8</sup> Maisa xoare hare kolatyaka aokita ihiyeha ahoti niyahare. Atyakase taita kolatyaka aoka ihiyeha tonohisoaha maheta. Maisa nakairati, boná, olo hare kolatyaka aokita ihiyeha. <sup>9</sup> Berekataiya atyo waiyehena mokaha hoka maisaiya atyo xoare maheta hate hekoti kajianexe imitinase kolatyahitaha aoka ihiyeha.

<sup>10</sup> Hoka nehitia: — Maika xikaokehena wenakalati hoka hali hatyakota xisaona xiyanenehitiya hatyo nalita kijiya. <sup>11</sup> Maika wenakalati xikaokehena hoka maisa waiye mokahitaha xiso, exahe naliyerenai maisa semaha aokowiyahita xiraene hoka maika nalita xiyanenehitiya hoka xiberekatane xamokotyahatya xexoakiheta maheta waikohese emaxawaiyereneha xiso hiyeta — nexa ihiyeha.

<sup>12</sup> Hatyaoseta exaotyakiraharenai xaneha iraeti xakaiha halitinai hiye maheta, halitinai iniyalahare hawenaneha halakisaha maheta. <sup>13</sup> Kahare axanikihenahititaha isekohaliti iniyalahare halitinai nonita, exahe kolotenitiya mohenaha hokakiterenai seri hiye hoka aiyatelikihenahitene.

*João Batista Kamane Tahi  
(Mateus 14.1-12; Lucas 9.7-9)*

<sup>14</sup> Tyotya hatyoharenai tahi xekohaseti Herodes sema hakakoare halitinai xakaikoatyahitere Jesus tahi hiyeta. Haiyaharenai nita: — Kala João Batista kaseheta. Hatyo hiyeta xoalini hare metaharexe nomakere tyomita — nexahitaha exaokaka.

<sup>15</sup> Haiyanai atyo: — Kala Elias — nita.

Haiyanai tehitiya: — Kala iraiti xakaisasehare terota, toahiyereharenai akerexe — nexahitaha Jesus xaokaka.

<sup>16</sup> Herodes sema hatyoharenai tahi hoka nexa: — Kala João Batista. Iseri xirikotyaka naoka hoka kalikini ala kaseheta — nexo.

<sup>17</sup> João Batista kamane nahitita Herodes niraene xema João otokaha, olatyahene, berexo ako jihotyahene Herodias xemere. Hatyo nahitita Herodes tyaonita hatyo ohiro kakoa, iximarene Filipe exanityo xakore hoka.

<sup>18</sup> Hatyo hiyeta João Batista watyali Herodes: — Awa atyo hiximarene exanityo kakoa hisaona, Xaotyakiyaho atyo mahokoanetita hiximarene exanityo kakoa hawenane.

<sup>19</sup> Hatyo hiyeta Herodias kirawaneta João, kasani aisene aokowita. Xakore hoka maisaiya aliyakere aijitene, <sup>20</sup> enenala Herodes mairitene exahe haliti waiyexe aokitene. Hatyo hiyeta Herodias waiye kaxaikotene. Semehena iniraene hoka waiyeta ihiye, xakore hoka maisa aliyakere ahekotya xaka mokene. Xakore hoka iraehena hoka awaiyetita iniraene.

<sup>21</sup> Hoka Herodias atyo atyahita terota João kamane ferakene. Hatyaoseta xane hikoa enenala Herodes nawenane ferakene hoka hahisehare tyoma. Kalore nakairati tyoma, oloniti harenai hoka kaixakatya xekohasetinai taita, Galiléia koa tarenai, sorare xekohassenai harenai hoka tyoaha. <sup>22</sup> Hatyaoseta Herodias ityani xoimahaloti isoa hatyo nali hoka holikoahena. Herodes, ekaixakalaharenai xoaha awaiyetyaha exoholikoane hoka hatyo hiyeta xekohaseti Herodes nexo xoimahaloti hiye: — Xoare xamani haoka hiyoholikoane xaimane hoka niseniya homana — nexo. <sup>23</sup> — Exahiya kalore haoka hoka niseniya homana. Alitere naokita, maisa namaoseraita xini — nexo. <sup>24</sup> Nexo ihiye hoka hikoaheta xane hanityo axa maheta, xoare xamani haxoholikoane xaimane axa aohena hoka.

Hoka inityo nexo: — João Batista seri haxene — nexo.

<sup>25</sup> Hatyaoseta kaholawaka haikoaheta Herodes tyaonitere nali hoka axene: — Xama João Batista seri hisehena nomani balatoahcko kalikinita — nexo.

<sup>26</sup> Herodes sema hatyo hoka amaikohare. Xakore hoka koxaka tyotya haliti haoti irae hoka hatyo hiyeta maisa aliyakere matyakekotita xoimahaloti xaxane. <sup>27</sup> Hoka axikaty rota sorare, João Batista seri kolatya maheta. Hatyaoseta sorare xane berexo ako hoka irikotya João seri. <sup>28</sup> Mokene balatoahcko hoka isene xoimahaloti ana. Hatyaoseta hatyo xoimahaloti xane isene hanityo ana.

<sup>29</sup> Hatyaoseta João Batista xaotyakiraharenai sema etahi hoka tya kolahenahitene hoka fityahene.

*Jesus Kahare Halitinai Tyaisa  
(Mateus 14.13-21; Lucas 9.10-17; João 6.1-14)*

<sup>30</sup> Hatyaoseta Jesus xaotyakiraharenai kaokeheta enomana hoka xakaihakahenaha Jesus hiye tyotya tyomehenereharenaiha, aotyakihenahereha harenai tahi.

<sup>31</sup> Nali kahare haliti kaokehita, xanehitita xoaha hoka Jesus, exaotyakiraharenai xoaha komita ene maisa aliyakere kanakairareha hekoti.

Hoka Jesus nehena ihiyeha: — Xisohena hoka wiwana wiwana maharexakahare hoka inira xikawini — nexo haxaotyakiraharenai hiye.

<sup>32</sup> Hatyaoseta xaneha hawawaha kanowa ako maharexakahare. <sup>33</sup> Xakore hoka halitinai waiyaxematyahene hoka otyahene hoka tyotya hatyo nalitarenai tema xaneha one kilihi hoka enahityahitaha xane kaokaha. <sup>34</sup> Hatyaoseta Jesus xane kaoka hatyo nali hoka exoahena kanowa akota hoka waiya hatyo halitinai hoka airakoaneharetahene.

Motya kalanero makaxaikotyakahare akere tyaonahitaha hoka kahare xoalini hare aotyakihenahene.

<sup>35</sup> Waikoa kamaitehena hoka Jesus xaotyakiraharenai xane iraehena ekakoa. — Okoi makehena, maisa ali xoare aka. <sup>36</sup> Haxikahetehena exe halitinai hoka xanehenahitaha wenakalatinai kaharewaikatexe akiti nali hoka xoalini hare iyaha hoka kanakairaha — nexaha Jesus hiye.

<sup>37</sup> Xakore hoka Jesus nexa: — Xisota xisehena nakairati enomanaha.

— Xoana wiyanne 200-hokose olo kakoa wiya nakairati enomanaha haokita? nexaha Jesus hiye.

<sup>38</sup> — Xoanama tohase nakairati xinali? xiyanne xiayiya — nexa.

Xane waiyaha hoka: — 5-tohase nakairati, hinama kohase xoaha taita — nexaha.

<sup>39</sup> Hatyaoseta Jesus nehena halitinai hiye: — Xisokehena hahotyali xakini ime koa — nexa.

<sup>40</sup> Hoka hatyaoseta hahotyali xakini xane tyokaha. Haiya hotyalinai 100-hare, haiya hotyalinai 50-hare xakini tyokaha. <sup>41</sup> Hatyaoseta Jesus otoka 5-tohase nakairati, hinama kohase xoaha hoka enokoa xeta wahakotya hoka iraexatya Enore hiye: — Ehekore nakairati hisa womana, Abá — nexa. Hatyaoseta irikosetene hoka isene haxaotyakiraharenai ana, hoka hatyo exaotyakiraharenai irakene halitinai ana. Kohase nikareta iraka tyotya halitinai ana. <sup>42</sup> Tyotya kanakairaha hoka fakatehareha. <sup>43</sup> Hatyaoseta awaiyehotyalikihetaha halitinai nakaira mawane hoka 12-te koho kaisero mohenahitaha nakairati, kohase xoaha mawane. <sup>44</sup> Hatyo nakairati kanakairahenerenai 5.000-hare halitinai.

#### *Jesus Tona One Heno*

(Mateus 14.22-33; João 6.15-21)

<sup>45</sup> Hatyo najikinita Jesus haxaotyakiraharenai kakoa irai hoka kakohahenahitaha kanowako hoka xanehenahitaha enaheta maheta halakoiya Betsaida nali xeta. Hoka hatyo nase Jesus jinaheta halitinai.

<sup>46</sup> Hatyaoseta jinaheta halitinai hoka xane tyairi heno iraexatya maheta.

<sup>47</sup> One nekesexehena exaotyakiraharenai xaneta hoka makehena ihiyeha. Hoka exowaka Jesus hekota waikoheko hawawaharenai tyaonita. <sup>48</sup> Hatyaoseta waiya haxaotyakiraharenai xaeremola howitiharene hoholati hoholasekoatyahiterene hiyeta, xanehenahititere maniyata hoholatita hoka. Hatyaoseta okoi ferakoahena hoka Jesus xane hikoaheta enomanaha, tonita one heno. Okoi jiyahene hoka <sup>49</sup> hatyaoseta Jesus netonane one heno waiyaha hoka motya isekohaliti aokahitene hoka hamairaneha kawiyatuya. <sup>50</sup> Tyotya waiyahene hoka kalore mairaha.

Hoka Jesus nexa ihiyeha: — Awa atyo ximaira! Natyo ta, awa ximaira natyo — nexa ihiyeha, <sup>51</sup> hoka xane kanowa ako kakohaheta enaliha. Hatyaoseta hoholati amematyoaheta.

Hoka exaotyakiraharenai mairaha, hakaharetyoaha. — Xoanere kaisere? nexa mokahitene. <sup>52</sup> Maisa otehenahititaha halitinai tyaihenere nakairati kakoa, maisa waiye ahekohenahititaha hoka.

#### *Jesus Aiyatelikheta Hokakiterenai Genesaré Nali*

(Mateus 14.34-36)

<sup>53</sup> Hatyaoseta Jesus, exaotyakiraharenai harenai imahotyoaha Galiléia xa. Hoka xane takoaha kaiholokoa Genesaré waikoherakoa nali hoka katilikaha hakanowane hatyo nali.

<sup>54</sup> Kanowa akota exoaha taita hoka Jesus waiyekhalakahare rotita hatyo naliyerenai ana hoka <sup>55</sup> hatyaoseta tyotya wenakalati xaneha hahinaehare hokakiterenai kolatyaaha enomana maheta. Hatyaoseta hokakiterenai exehokotyoakalaha kakoita kolatyaaha, exahe aliyo xamani Jesus xanehena hoka semehenahene hoka hatyo nali kolatyaahitaha hokakiterenai enomana. <sup>56</sup> Exahe wenakalati kirane xe hare koa kaokehena hoka koxaka hokakitina mokahitaha enaheta hoka axahitene, kasani inima kilihi hiye hekoti

ekaokakisaha hakaheha aokowiyahitaha. Hoka tyotya hakaheha ekaokakihenerenai inima kilihi hiye kinaterehitita.

## 7

*Jesus Irae Judeunai Nawenatyakaho Tahi  
(Mateus 15.1-9)*

<sup>1</sup> Hatyaoseta haiyaharenai fariseunai, haiyanai judeunai xaotyakiraho kakoa waiyoreterenai Jerusalém nalita kaokehenerenai Jesus haliya hohisakoaha. <sup>2</sup> Hoka waiyaha Jesus xaotyakiraharenai haiyaxa kahitita kanakairehenahere. Matihahisoanehareta kanakairaha, maisa fariseunai aokitere akereta xini tyaonahitaha. Hoka maisa waiyeta ihiyeha.

<sup>3</sup> Judeunai exahe fariseunai atyo hahetako maniyereharenai xaotyakiraho xema tyaonahitaha, waiye atyo tihahisoaha hotohare hoka kanakairahitaha. <sup>4</sup> Xiyehaliti hanakota atyo iyehenaha nakairati hoka tihahene hotohare atyo hoka kanakairahitene. Haiyaharenai xaotyakisatyaho xema tehitiya tyaonahitaha hoka tihahitaha kanote, matalo, tinihaliti harenai.

<sup>5</sup> Hatyaoseta fariseunai, judeunai xaotyakiraho kakoa waiyoreterenai axehena Jesus: — Xoana hoka hiyaotyakiraharenai maisa tyaonareha wahetakomaniyereharenai xaotyakiraho xema hoka matihahisoanehareta kanakairahitaha? nexaha.

<sup>6</sup> Hoka Jesus ekoaxatya enomanaha: — Maoseratyalienai! aliterexe nika Isaías xairatya xitahi akiti exakerexe:

Exe halitinai atyo waiye iraetaha notahi, nita Enore. Xakore hoka exahekolaha atyo maisa nokoamaniye xini tyaonita.

<sup>7</sup> Hoka maisa atyo tyaonahitaha nokoamaniye kaisere. Hiyaiya, halitinai xaotyakira kakoa atyo aotyakisahitaha hoka Enore xaotyakiraho aokahitaha.

<sup>8</sup> Hoka Jesus nehitiya: — Xiso atyo xahalakijita Enore xaotyakiraho hoka halitinai xaotyakiraho xema xisaonita — nexa.

<sup>9</sup> — Xiso atyo xawaiyore xahalakijita Enore xaotyakiraho. Hoka toahiyere xawenanaho xema taita xisaonita. <sup>10</sup> Hiyaiya, exakere Moisés nexa:

Waiyira xaiminihena xexe, xityo hoka.

Nexa tehitiya:

Xala xamaniya atyo hanexe, hanityo iraeharetya hoka waiye xaisaka, nexa.

<sup>11</sup> — Hoka xiso atyo xita, “Xala xamaniya atyo kaoloxere hoka hanityo, hanexe kahinaetya maheta ene hoka Enore anaiya isa hatyo haoloxa hoka hatyo najikinitaiya atyo maisa aliyakere <sup>12</sup> kahinaehitita hanityo, hanexe xoaha hoka ehekoreya”, xita atyo.

<sup>13</sup> Nikare atyo xisaohena hoka maisa atyo Enore xaotyakiraho xema xini xisaonita. Hoka toahiyere xawenanaho xema atyo xisaonita hoka xahetakomaniyereharenai tyaonitere akereta xisaonita. Hoka nikarehare kahare xoalini hare xisomita.

*Jesus Irae Wenati Aiyalaharetiterehare Tahi  
(Mateus 15.10-20)*

<sup>14</sup> Hatyaoseta Jesus kawihitiya halitinai hoka nehena: — Waiyira xasema xityotya exe niraetereharenai hoka waiyekehalaka xomana. <sup>15</sup> Xoalini hareya hatya haliti hiye isoa hoka hatyoiya atyo maisa aiyalaharetita enawenane. Hoka xoalini hare atyo hikoahetehena hatya haliti hiyeta hoka hatyohare atyo aiyalaharetita enawenane — nexa.

<sup>16</sup> — Xala xamani atyo katanakoakore semakatyá maheta hoka maika semehena niraini — nexa.

<sup>17</sup> Hatyaoseta Jesus halakisa halitinai hoka isoa hatyako. Hatyaoseta exaotyakiraharenai axene hatyo haxaimenekola kakoa xakaihakahenere tahi.

<sup>18</sup> Hoka nexa: — Xoana haiyaharenai akereta tehitiya maisa waiyekehalakita xomana? Hatyo isoahenere haliti kanasakooya atyo maisa aiyalaharetita enawenane. <sup>19</sup> Hiyaiya, atyohenene atyo hoka maisa atyo exahekola hiye xini xaneta, enajako atyo xaneta. Hatyo

najikinita atyo eháre hiyeta hikoahitita — nexa. Nikare Jesus iraeta hoka tyotya nakairati kakanakairatyakere aoka.

<sup>20</sup> Hoka nehitia: — Xoalini hare hikoahititerehare hatya hiyeta atyo aiyalaharetita enawenane. <sup>21</sup> Hiayiya, mahiyaseti hiyeta atyo iniyalahare xahekotyati tyoita hoka kao-makita kaiwati, xaisati, <sup>22</sup> ohiro watyalisaka, xiyealiti maiyasetyaka, irawaniti, maoseryati, otokitaterehare, okoawahaliti, iraeharetyati, xahenityati, mawaiye xahekotyati harenai. <sup>23</sup> Tyotya hatyoharenai atyo mahiyaseti hiyeta hikoita hoka aiyalaharetita halitinai nawenane — nexa Jesus ihiye.

#### *Hatyahiro Mawaiyahalo*

(Mateus 15.21-28)

<sup>24</sup> Hatyaoseta Jesus xaneheta hatyo nalita, xane wenakalatinai Tiro, Sidom xoaha nali. Xane kaoka hoka isoa hatyako. Kasani maisa xala hare ekaokene sema aokare xakore hoka maisaiya aliyakere masemakita. <sup>25</sup> Hatya ohiro ityani isekohaliti iniyalahare ehatyahalokijita hoka sema Jesus kaokene tahi hoka tya enomana hoka enahalakoa hakaolise kakoa meholokoa. <sup>26</sup> Hatyo ohiro atyo hakoakityolo, sirofenícia yolo atyo. Hoka axene, kasani isekohaliti iniyalahare axikaheta ityani nonitata aoka ihiye.

<sup>27</sup> Hoka Jesus nexa ihiye: — Kotare xoimanai hotohare kanakaira. Hiayiya, maisaiya atyo ehekoreta xini xoimanai nonitata kaiyakeheta nakairati hoka haxawatene kajolonai ana hoka — nexa ihiye.

<sup>28</sup> — Alitere haokita, Xekohaseti — nexa hatyo ohiro. — Hoka kajolonai atyo kanakairita xoimanai nakaira holoxo exoahena mexakoata hoka — nexa ihiye.

<sup>29</sup> — Hekoaxahenere nomani hiyeta hiyanehetehena hihana nali. Koxaka hityani nonitata isekohaliti iniyalahare kikisoaheta — nexa Jesus ihiye.

<sup>30</sup> Hatyaoseta hatyo ohiro xane kaokeheta hahaha nali hoka waiyehena atyo, ityani atyo ehokotyota haxehokotyoakala koa. Koxaka atyo isekohaliti iniyalahare kikisoaheta enonitata.

#### *Jesus Airainikiheta Matanakoakohare Mairaenehara*

<sup>31</sup> Hatyaoseta Jesus xaneheta wenakalati Tirota hoka jiyeleta Sidom, Decapolis xoaha nali hoka xane kaokeheta Galiléia xa nali.

<sup>32</sup> Hatyaoseta haiyaharenai kolatya hatya haliti masemakalahare exahe komita ene maisa iraexe. Hoka axaha Jesus, ekaokakisa hakahe ihiye maheta. <sup>33</sup> Hatyaoseta Jesus nolokene haware halitinai nonita. Hoka hakahihi etanakoako moka. Hatyo najikinita xatahotya hoka ininise hiye xolotene. <sup>34</sup> Hatyaoseta wahakotya enokoa, kalore iyawinisoa hoka nehena: — Efató! nexa. Exakere atyo nita: “Hamajiholatyoahetehena!” nita atyo.

<sup>35</sup> Hatyaoseta hatyo haliti masemakalahare tanakoako waiyeheta. Exahe ininise tehtiyya waiyeheta hoka waiye iraeheta.

<sup>36</sup> Hatyaoseta Jesus mahokoanetya exakainiha hatyoharenai. Nikare iraehena ihiye hoka exahehare xane xakaikoatyahitaha hatyoharenai tahi.

<sup>37</sup> Hoka haiyaharenai semehena hatyoharenai tahi hoka hakaharetyoahitaha hoka nexahitaha: — Kaxiyani, waiye kaiserehare tyomita! Hiayiya, masemakalaharenai asemakihitita, mairaeneharenai hoka airainikihitita — nexahita.

#### *Jesus Tyaisa 4.000-hare Halitinai*

(Mateus 15.32-39)

<sup>1</sup> Hatyaoseta haxowakiya hohisakoa halitinai Jesus tyaonitere nali. Hatyaoseta maisa xoare kanakaireheta xaka hoka Jesus kawisa haxaotyakiraharenai hoka nexa:

<sup>2</sup> — Nairakoanearitita exe halitinai. Hiayiya, hanamaki ferakenehena tyaonahitaha nohaliye hoka kalikini maisa xoare kanakairareha. <sup>3</sup> Naxikahenahiteniya matyaisaka-harahitaha enawenakalanaiha xeta hoka exoahaiya ahotoyaho hanakaha hiyeta. Hiayiya, haiyaharenai atyo sekota tyoita — nexa.

<sup>4</sup> Hatyaoseta exaotyakiraharenai axahene: — Hoka aliakereya exe maharexakahareta wikaokehena nakairati hoka watyaihena exe halitinai haoka? nexaha ihiye.

<sup>5</sup> — Xoanama tohase nakairati xinali? nexa axahene.

— 7-tohase — nexaha.

<sup>6</sup> Hatyaoseta Jesus halitinai kakoa irae waikoa tyokaha maheta. Hatyaoseta iya hatyo 7-tohase nakairati hoka iraexatya Enore hiye: — Ehekore nakairati hisa womana, Abá — nexa. Hatyaoseta taikasetene hoka haxaotyakiraharenai ana isene hoka irakene halitinai ana. <sup>7</sup> Haiyaharenai kohase tehitiya enaliha hoka Jesus iraexatya Enore hiye: — Ehekore nakairati hisa womana, Abá — nexa hoka hatyaoseta wakatya haxaotyakiraharenai hoka irakene halitinai ana.

<sup>8</sup> Tyotyaha kanakairaha, fakatehareha. Hatyaoseta kaise exaotyakiraharenai enakairaha mawaneha 7-te kohokiji kaisehenahitaha. <sup>9</sup> Hatyo kanakairehenerenai atyo 4.000-hare haliti. Hatyaoseta Jesus axikaheta hatyo halitinai.

<sup>10</sup> Hatyaoseta kanowa ako xaneheta haxaotyakiraharenai kakoa Dalmanuta koa maniya.

#### *Fariseunai Axaha Waiyexe Mawaiyahahare Nomaka*

(Mateus 12.38-42; 16.1-4)

<sup>11</sup> Xane kaoka taita hatyo nali hoka fariseunai kaoka enomana hoka iraehenaha ekakoa, hasakaharetyahene aokowiyahitaha hoka xoalini hare nomaka aokaha ihiye hoka waiyaha maheta, xoana aliterexe xamani Enore nalita tyoita iniyatere, maisa xamani.

<sup>12</sup> Hatyaoseta kalore iyawinisoa hoka nehena: — Xoare mahetala xoalini hare nomaka aokita exe halitinai tyakekoha maheta? Aliterexe nomita xihiye, maisaiya xoare hare notyomitaa exe halitinai ana tyakekoha maheta — nexa.

#### *Fariseunai, Herodes Xoaha Kaoretyakala*

(Mateus 16.5-12)

<sup>13</sup> Hatyaoseta Jesus xaneheta. Kanowa ako kakohaheta hoka haikoaheta one halakoiya maniya.

<sup>14</sup> Xanehenaha hoka exaotyakiraharenai maotyaneha nakairati hakolalahha hoka hatita taita kolatyaha kanowa ako.

<sup>15</sup> Hatyaoseta Jesus iraehena ekakoaha hoka nehena: — Xasemehena, xirihalira fariseunai, Herodes xoaha kaoretyakala kakoa — nexa.

<sup>16</sup> Hatyaoseta hatyo kakoaha irae kakoahenaha hoka nehenaha: — Exakere irae kala maisa nakairati wakolatita hoka — nexaha.

<sup>17</sup> Hoka Jesus sema iniraekakoaneha hoka axehenahene: — Xoana hoka ximakolalaharene nakairati tahi xiraekakoita? Xoana maisa xawaiyorexe, exahe maisa waiyekelakere niraini xomana? Xoana hoka ximawaiye xahekolere hoka maisa waiyekelakere exeharenai xomana? <sup>18</sup> Xoana hoka xikaxosexe xakore hoka maisa xiayiyare? Xikatanakoakore xakore hoka maisa xasemare? <sup>19</sup> Xoana, maisa xotyare 5-tohase nakairati nirahenere 5.000-hare halitinai ana? Xoanamate koho kaisero exowaka emawane ximexeheta? nexa Jesus axahene.

— 12-te kaisero — nexaha.

<sup>20</sup> Hatyaoseta Jesus axehenahitiyene: — Hoka 7-tohase nakairati nirahenere 4.000-hare halitinai ana xowaka, xoanamate koho kaisero ximexeheta?

— 7-te kaisero wimexeheta — nexaha ihiye.

<sup>21</sup> — Xoana, hekota maisa waiyekelakere niraini xomana? nexa Jesus.

#### *Jesus Kaxoseheta Betsaida Yere*

<sup>22</sup> Hatyaoseta Jesus xane kaoka wenakalati Betsaida nali haxaotyakiraharenai kakoa. Hatyaoseta haiyaharenai kolatyaha hatya maxosehare hoka Jesus axaha, hakahe ekaokakisa ihiye maheta. <sup>23</sup> Hoka Jesus ekahe hiyeta otoka maxosehare hoka xane ekakoa sekose aka wenakalati nonitata. Hatyaoseta haxataho xolotya exose hiye hoka hakahe ekaokakisa ihiye hoka axene: — Xoana, xoalini hare hiyaiyita? nexa.

<sup>24</sup> — Nowaiyita halitinai, xakore hoka motya atya kate tonita ene — nexa.

<sup>25</sup> Hatyaoseta Jesus hakahe ekaokakihitiya exose hiye. Hatyaoseta maxosehare waiye waiyakaheta. Waiyeheta hoka tyotya xoalini hare waiye waiyeheta. <sup>26</sup> Hatyaoseta Jesus axikaheta hatyo haliti ehana xeta. Hoka halitinai koni emaxaneneheta aoka.

*Pedro Niraene Jesus Kakoa*

(Mateus 16.13-20; Lucas 9.18-21)

<sup>27</sup> Hatyaoseta Jesus haxaotyakiraharenai kakoa xane wenakalatinai Cesaréia de Filipe koa maniya. Xanahitaha hoka ahotoyah o haxaotyakiraharenai axa: — Xala aokita natyo halitinai? nexa.

<sup>28</sup> Hoka exaotyakiraharenai nexa: — Haiyaharenai atyo João Batista aokahitaha hiso, haiyaharenai atyo Elias aokahitaha hiso, haiyaharenai atyo iraeti xakaisasehare aokahitaha hiso — nexaha.

<sup>29</sup> — Hoka xiso atyo xala xaokita natyo? nexa ihiyeha.

— Hiso atyo Enore Kalorexe Aohenere — nexa Pedro Jesus hiye.

<sup>30</sup> Hoka Jesus hatyohare maxakaisakene aoka ihiyeha.

*Jesus Irae Hakamane, Hakaseneheta Tahi*

(Mateus 16.21-28; Lucas 9.22-27)

<sup>31</sup> Hatyaoseta Jesus aotyakihena haxaotyakiraharenai hoka nehena: — Haliti Ityanite kaxemawatikisaka kalore. Maisaita aokahitene haomanaha judeunai xekohaseharenai, sacerdote xekohaseharenai, judeunai xaotyakiraho kakoa waiyoreterenai harenai. Hoka kaxaisakaite hoka hanamaki ferakene najikinitaite kaseheta — nexa ihiyeha. <sup>32</sup> Jesus waiyekehalaka iraeta ekakoaha.

Xakore hoka Pedro nolokene haware hoka matyakekotya iniraene. — Awa atyo nikare hirae — nexa ihiyeha.

<sup>33</sup> Hatyaoseta Jesus ehaikoaheta hoka wahakotya haxaotyakiraharenai ana hoka Pedro niraene tehitija matyakekotya hoka nehena: — Hakikisoahetehena nahiti maniyata, Ahalakoahaliti! Halitinai ahekoitere akereta atyo hahekoita, maisa atyo Enore ahekoitere akereta xini — nexa.

<sup>34</sup> Hatyaoseta Jesus kawisa halitinai exahe haxaotyakiraharenai xoaha hoka iraehena ekakoaha: — Xala xamani atyo tyaona nokoamaniye aokowihena hoka maika hatyota maotyanoawi hoka maika kolatya haberekotyaka niyahare atyalihose xaimaholatyaka hoka tyaona noximi. <sup>35</sup> Xala xamani atyoite tawita hawenane waiyexe hoka maisaita kaokitene. Hoka xala xamani atyoite nohiyeti exahe Iraeti Waiyexe hiyeta kaxaisaka hoka hatyo atyoite kaoka wenati waiyexe.

<sup>36</sup> — Xoare mahetaiya hatya haliti hakakoare waikohekoa xiye haliti harenai kakoa tyaona hoka hatyaoseta waini? <sup>37</sup> Maisaiya xoare hare bakatya hoka ekasekihititene.

<sup>38</sup> Hiyaiya, xala xamani atyoite haiharefa natyo, niraeni xoaha kakoa kalikini xowaka exe matyakekoneharenai, mawaiyexehareharenai haoti hoka haxowakiyaita Haliti Ityani tyohetehena Hanexe werokene kakoa, anjonai waiyexeharexenai kakoa hoka haihare tehitijaite ekakoa — nexa Jesus ihiyeha.

9

<sup>1</sup> Hatyaoseta Jesus nehitija ihiyeha: — Exe harira xotya: haiyaharenai ali tyaoniterenaite maisa hamawaiyaneharefa wainita Enore nalitare kaokehene hiatere kakoa nahitita — nexa Jesus.

*Moisés, Elias Xoaha Kaotyaka Jesus Ana*

(Mateus 17.1-13; Lucas 9.28-36)

<sup>2</sup> Hatyaoseta 6-ki ferakene najikinita Jesus noloka Pedro, Tiago, João xoaha hoka hatyonai kakoa taita xane tyairi enoakiyere heno xeta. Hoka hatyo nali hawareharexete tyaona ehaotyahitaha. <sup>3</sup> Inima iyomate, werokate tyaona. Maisaiya hatya tihatiro hekoti nikare niyomene tihita. <sup>4</sup> Hatyaoseta Moisés, Elias kaotyaka hoka hatyo hanamahare Jesus xaotyakiraharenai waiyaha iniraeneha Jesus kakoa.

<sup>5</sup> Hatyaoseta Pedro nehena: — Xaotyakisatiye, waiye nawenatyaka ali. Nika wisoma hanamalise hatirisenai: hatya homanere, hatya Moisés anere, hatya Elias anere xoaha — nexa, <sup>6</sup> maisa waiyore iraexe. Exahe tyotya Jesus xaotyakiraharenai mairaha.

<sup>7</sup> Hatyaoseta kaiminiti exoa hoka exahiyatene hoka hatyo konita iraiti semaha hoka nehena: — Exe atyo nityani noxiyakawali, xasemaxematyaira iniraene — nexa.

<sup>8</sup> Hatyaoseta waiyasekoatyaha xakore hoka Jesus taita waiyehenahitaha hahaliyaha.

<sup>9</sup> Hatyo hekota tyairi henota exoahenahitehenaha hoka Jesus hatyohare waiyehenere-hareha maxakaisakene aoka ihiyeha Haliti Ityani kasehetehenere kijiya.

<sup>10</sup> Hoka tyakekoha iniraene, xakore hoka hatyo kakoaha iraekakoahitaha kasehetehenere nehenere tahi akiti.

<sup>11</sup> Hatyaoseta axaha Jesus: — Xoana hoka judeunai xaotyakiyaho kakoa waiyoretereharenai Elias hotohare ite tyoheta aokaha? nexaha.

<sup>12</sup> Hoka Jesus nexa: — Aliterexe ite Elias hotohare tyoheta hoka tyotya memere mohena xoalini hare. Hoka xoaneretya hoka Iraiti Waiyexe kaxairatyakehenere, Haliti Ityanite kaxemakawatikisaka, exahe maisa ite kaxaiminisakita, nita? nexa Jesus.

<sup>13</sup> — Xakore hoka noxakainite xihije: Elias atyo koxaka tyoheta hoka maisa waiye mokahitene. Aokahitere akereta mokahene iraiti kaxairatyakehenere etahi akiti akereta — nexa ihiyeha.

### *Jesus Mahatyahareneheta Xoimahaliti*

(Mateus 17.14-21; Lucas 9.37-43)

<sup>14</sup> Hatyaoseta hikoahenahitehenaha haiyaharenai Jesus xaotyakiraharenai ana hoka waiyaha kahare haliti ehokoha haliya. Haiyaharenai xaotyakiyaho kakoa waiyoreterenai kinatyaxa iraeta ekakoaha. <sup>15</sup> Hatyaoseta halitinai waiyaha Jesus kaokene eharehena rota hoka tema xaneha enomana, katyawaxaha ihiye maheta.

<sup>16</sup> Hatyaoseta Jesus axehena hatyo xaotyakiyaho kakoa waiyoreterenai: — Xoare tahi kinatyaxa xirae kakoita? nexa.

<sup>17</sup> Hatyaoseta hatya haliti halitinai konitare nehena: — Xaotyakisatiye, nakolatya nityani homana hiyaiyene maheta. Isekohaliti iniyalahare kakoare hoka maisa iraexe.

<sup>18</sup> Haiya xowaka mawaiye nisekohaliti ehatyahalikihenene hoka exoa waikoa hoka kilinakota ekanase, kinatyaxa tyalokakoaita hoka kinatyakase tyaonita. Koxaka hiyaotyakiraharenai hiye nirae axanikihenahitaha mawaiye nisekohaliti enonitata maheta. Xakore hoka maisa aliyakere axanikihenahitene enonitata — nexa.

<sup>19</sup> Hatyaoseta Jesus nexa: — Haliti matyakekoneharenai! Otene kijiyaito notyaona xinekon? Otene kijiyaito naiyasetyoa xikakoa? Xisohena ali xoimahaliti kakoa — nexa.

<sup>20</sup> Hatyaoseta xoimahaliti kolayaha Jesus ana. Hoka exehatyahalikisase waiya Jesus hoka xoimahaliti etatakoakisa hoka waikoa exoakisene hoka tekehirisoakoatya hoka kilinako ekanase tyaona.

<sup>21</sup> Hatyaoseta Jesus axa enexe: — Xoana hekota exakere hityani tyaona?

Hoka enexe nexa: — Haxoimeneta exakere tyaona. <sup>22</sup> Kahaliki irikatyao, onexa harenai axexoatyanyikijitene aisene maheta. Hoka hawaiyore atyo hoka hakahinaehena wiso. Hairakoaneharehena wiso!

<sup>23</sup> — Xityakekotaiya atyo hoka. Xala xamani atyo tyakekota hoka kaomakaiya atyo enomana — nexa Jesus.

<sup>24</sup> — Notyakekota atyo! Hoka hakahinaehena natyo hoka exahehare notyakeko! nexa enexe kawiyatya, tiya xoaha.

<sup>25</sup> Hatyaoseta Jesus atyo waiyehena, kaharehena atyo halitinai ehaliya makere ho-hisakoita hoka exehatyahalikisase hiye nexa: — Isekohaliti masemakalahare, mairaene-hare, hahikoahetehena exe xoimahaliti nonitata hoka waiyehenaira ehekota hehatyaha-likihititene — nexa.

<sup>26</sup> Hatyaoseta isekohaliti kawiyatya hoka atekehirisoakisa xoimahaliti hoka kikisoa-heta enonita hoka motya ekamane mokene. Hatyo hiyeta haiyaharenai motyala waini aokahitaha.

<sup>27</sup> Hoka Jesus otoheta xoimahaliti kahe hiye hoka atityoakihetene hoka tityoaheta.

<sup>28</sup> Hatyaoseta Jesus xane isoaheta hatyako hoka exaotyakiraharenai hawawaharenaiha heko axahene: — Xoanere ala hoka maisa aliyakere waxanikihitita etake isekohaliti? nexaha.

<sup>29</sup> — Hatyohare isekohaliti atyo iraexatyati exahe manakairiti xoaha xema taita kaxaxanikisakihitita — nexa Jesus ihiyeha.

*Jesus Iraehitiya Hakamane, Hakaseneheta Tahi*

(Mateus 17.22-23; Lucas 9.43-45)

<sup>30</sup> Hatyaoseta Jesus xanehitiya hatyo nalita haxaotyakiraharenai kakoa hoka Galiléia koa nali jiyaha. Jesus kasani maisa xala hare ana waiyekehalaka tyaonitere akiti aokare, hawawahare heko irae aokowita haxaotyakiraharenai kakoa hoka.

<sup>31</sup> Jesus aotyakijita haxaotyakiraharenai hoka nita ihiyeha: — Haliti Ityanite kaxékaka halitinai ana hoka aisahene ite. Xakore hoka hanamaki ferakene najikinitaite kaseheta — nexa.

<sup>32</sup> Nexa ihiyeha hoka maisa waiyekehalakere Jesus niraene enomanaha. Hoka haiharahitene hoka maisa axarahene hekoti.

*Xala Xamani Masakare Kalorexe Hoka*

(Mateus 18.1-5; Lucas 9.46-48)

<sup>33</sup> Hatyaoseta Jesus haxaotyakiraharenai kakoa kaokeheta wenakalati Cafarnaum nali. Hoka hatyako isoahenahitaha hoka Jesus axehena haxaotyakiraharenai: — Xoare tahi ahoti kinatyaxa xirae kakoita? nexa, axahene.

<sup>34</sup> Hoka mema tyaonaha enomana, ahotyaho hakalorexeneha tahi irae kokoahitere hiyeta.

<sup>35</sup> Hatyaoseta Jesus tyoka hoka kawisa haxaotyakiraharenai hoka nexa ihiyeha: — Xala xamani atyoite kalorexe tyaona aokowita hoka maika tyotya halitinai wakanehare, ekahinaetyasehare tyaona — nexa ihiyeha.

<sup>36</sup> Hatyaoseta Jesus iya xoima hoka enenekeseneha mokene. Hoka hakano talako mokene hoka iraehena haxaotyakiraharenai kakoa: <sup>37</sup> — Xala xamani atyoite nohiyeti hatya xoima waiye moka hoka natyo atyo waiye mokita. Hoka xala xamani atyoite waiye mokita natyo hoka maisa atyoite natyo taita xini waiye mokita, noxaxikatyasehare tehtiita atyoite waiye mokita — nexa ihiyeha.

*Xala Xamani Atyo Maisa Ahowitzikisare Hoka Kahinaetita Atyo*

(Lucas 9.49-50)

<sup>38</sup> Hatyaoseta João nehena: — Xaotyakisatiye, wiyaiya hatya haliti xaxanikireheta isekohaliti iniyalahare halitinai nonitata hexare kakoa hoka wamahokoanetya nikare enómane. Maisa winekonitare xini hoka — nexa.

<sup>39</sup> Hoka Jesus nexa: — Awa atyo xamahokoanetene. Hiyaiya, maisaiya xala hare metaharexe maomakahare waiyexe tyomita nexare kakoa hoka hatyo najikinita iniyalahare iraehitita notahi. <sup>40</sup> Hiyaiya, xala xamani atyo maisa kahalakoaharexe wikakoa hoka hatyo atyo wikahinaetyasehare — nexa Jesus.

<sup>41</sup> — Xotyaxematyaira exehare: xala xamani atyoite hákobone one isa xomana, Cristo koamaniya xawenane hiyeta hoka hatyo ana atyoite xoalini hare waiyexe kaxekaka — nexa.

*Iniyalahare Nomaka Henehare*

(Mateus 18.6-9; Lucas 17.1-2)

<sup>42</sup> — Hoka exehare xoima mokosenai tyakekotereharenai natyoiya atyo hatya iniyalahare aomanekisa hoka halakihenahitaha hawenaneha nokoamaniye hoka ehekoretaiya atyo kaxawatyaka one kaloxere xaiya sehalí kaloliro kaxolatyaka ihino hiye hoka maisa ahowitzikisa xoimanae nawenane maheta — nexa.

<sup>43</sup> — Maika hikahe iniyalahare axomokanikijita hiso hoka maika hirikotene! Hiyaiya, waiye kaiserehareya atyo hamaniya kahe kakoa taita hiyane wenati matyotenehare nali. Hoka maisaiya atyo waiyeta hinama kahe kakoa hikaxawatyaka irikati mawakenehare

nali hoka. <sup>44</sup> Hiyaiya, hatyo nali atyo xeteti, irikati harenai hoka maisa tyotere. <sup>45</sup> Maika hikiji iniyalahare axomokanikijita hiso hoka hirikotene. Hiyaiya, waiye kaiserehareya atyo hamaniya kiji kakoa taita hiyane wenati matyotenehare nali. Hoka maisaiya atyo waiyeta hinama kiji kakoita hikaxawatyaka irikati mawakenehare nali hoka. <sup>46</sup> Hiyaiya, hatyo nali atyo xeteti, irikati harenai hoka maisa tyotere. <sup>47</sup> Maika hiyose iniyalahare aomanekijita hiso hoka maika holokotya hiyene. Hiyaiya, waiye kaiserehareya atyo hamaniya xose kakoa taita hiyane Enore tyaonitere nali. Hoka maisaiya atyo waiyeta hinama xose kakoita hikaxawatyaka irikati mawakenehare nali hoka. <sup>48</sup> Hiyaiya, hatyo nali atyo xeteti, irikati harenai hoka maisa tyotere.

<sup>49</sup> — Hiyaiya, hatya xakini atyoite kasalotyakehena irikati kakoa. <sup>50</sup> Salo atyo waiye. Hoka ekexeniya atyo tyotehena hoka maisa atyo saloheta xini. Maika xirihare xisaohena hoka waiyira xamoka kakoahena haiyanai kakoa — nexa ihiyeha.

## 10

### *Jesus Irae Halakisakakoati Tahi (Mateus 5.31-32; 19.1-12; Lucas 16.18)*

<sup>1</sup> Hatyaoseta Jesus xaneheta hatyo nalita hoka xane Judéia koa xeta hoka imahotyoa one Jordão xa. Hoka kahare haliti hohisakoahitiya ehaliya hoka aotyakihenahitiyene, aotyakijitere akereta.

<sup>2</sup> Hatyaoseta haiyanai fariseunai hasakaharetene aokowihenaha hoka axahene: — Wiyaotyakisakaho hiyetaiya waiyehenaiya hatya haliti haiyanityo halakiheta? nexaha.

<sup>3</sup> Hoka Jesus haxaxane kakoa ekoaxaty enomanaha: — Xoare nexa tya Moisés aotyakissa xiso? nexa.

<sup>4</sup> Hoka nexaha: — Hatyaiya atyo halakihetehena haiyanityo hoka halakisakakoati baberaxa iseheta enomanha hoka axikahetene, aoka Moisés — nexaha.

<sup>5</sup> Hoka Jesus nexa: — Nikare Moisés aotyakisa xiso, maisa xawaiye xahekolere hoka.

<sup>6</sup> Xakore hoka hetati xowaka tyotya xoalini hare kaomakehenere xowaka atyo exakere kaxairatyaka:

Enore tyoma ena, ohiro xoaha.

<sup>7</sup> Hatyo hiyeta hatya ena ite kaiyanityohena hoka halakisa hanexe, hanityo xoaha hoka haiyanityo kakoa haxawalita tyaona.

<sup>8</sup> Hoka hatyo hinamanaite haterore tyaohenahitaha.

Nikare ite hoka maisa atyoite hinamehenahitaha xini hoka haterore henahitaha atyoite.

<sup>9</sup> Hatyo hiyeta maisaiya hatya haliti hatyonai exaorehitita Enore hahotalita mohenere-hare — nexa.

<sup>10</sup> Hatyaoseta xane isoahenahitaha hatyako hoka exaotyakiraharenai axene hatyo wenakakoati tahi.

<sup>11</sup> Hoka Jesus nexa ihiyeha: — Enaiya halakiheta haiyanityo hoka hatya ohiro kakoa tyaohitiya hoka iniyalahare atyo tyomita haiyanityo xahita. <sup>12</sup> Exahe hatya ohiroiya haiyanene halakiheta hoka hatya ena kakoa tyaoheta hoka iniyalahare tehitija atyo tyomita — nexa ihiyeha.

### *Jesus Waiyexe Wenati Aoka Xoimanai Ana (Mateus 19.13-15; Lucas 18.15-17)*

<sup>13</sup> Hatyo najikinita haiyaharenai kolatya ha xoimamokosenai Jesus ana, ekaokakisa hakahe ihiyeha hoka waiyexe wenati aoka enomanaha maheta. Xakore hoka exaotyakiraharenai mahokoanetyahene.

<sup>14</sup> Hoka Jesus waiya nikare enawenaneha hoka maisa waiyeta ihiye hoka nexa: — Kotare xoimanai tya nomani, awa atyo xamahokoanetyahene. Hiyaiya, Xekohaseti Enore naliye waikohekua atyo exe xoimairanai akereta tyaoniterenai anere — nexa. <sup>15</sup> — Aliterexe nomita xihije: xala xamani atyoite maisa exe xoimanai akereta Enore niraene tyakekota hoka maisaiya aliyakere tyaonahitaha exema — nexa.

<sup>16</sup> Hatyaoseta Jesus xakoloharetya xoimanai hoka eseriha hiye hakahe ekaokakisa hoka wenati waiyexe aoka enomanaha.

*Hatya Haliti Kaoloxere Tahi*

(Mateus 19.16-30; Lucas 18.18-30; 1 Timóteo 6.6-10; Tiago 1.9-11; 2.5-7; 5.1-3)

<sup>17</sup> Hatyaoseta Jesus xanehitiya ene hoka hatya haliti tema tyoa hoka hakaolise kakoa exoa enahalakoa hoka axehenene: — Waiyexe Xaotyakisatiye, xoareya notyoma hoka kaxekaka nomani wenati waiyexe matyotenehare? nexa axene.

<sup>18</sup> Hoka Jesus nexa: — Xoana hoka waiyexe haoka natyo? Enore taita atyo waiyexe, maisa atyo hatehitiya aka — nexa. <sup>19</sup> — Maisa hoka koxaka hiyaiya exe xaotyakiyahonai: “Awa atyo haisa, awa atyo iniyalahare hisoma ohiro kakoa, awa atyo hikaiwa, awa atyo hamaseratya, haiminisa hexe, hityo xoaha” nitere — nexa ihiye.

<sup>20</sup> — Xaotyakisatiye, noxoiminita atyo hatyo xaotyakiyahonai xema notyaonita — nexa hatyo xoimahaliti.

<sup>21</sup> Nexa hoka Jesus wahakota enomana hoka awaiyetene hoka nexa: — Exe taitehena himaomanehare: hiyane tyotya habetehena hixiyeharenai hoka maoloxaharenai ana olo hisehena. Nikare ite hisaona hoka hikaoloxahare, hikaxiyeharexe hisaona enokoa nali. Hatyaosetaite hisoheta hoka hisoa noximi — nexa Jesus ihiye.

<sup>22</sup> Hatyohare hatyo haliti sema hoka kalore amaikehare hoka xaneheta, kahare kaxiyeharexe hoka.

<sup>23</sup> Hatyaoseta Jesus wahakota haxaotyakiraharenai ana hoka nehena: — Kaxiyani, howitihare atyo kaxiyeharexenai nawenane Enore koamaniya — nexa.

<sup>24</sup> Exaotyakiraharenai sema iniraene hoka hakaharetyoaha. Xakore hoka Jesus nehitiya ihiye: — Nohinaeharenai, howitihare atyo kaoloxerenai nawenane Enore koamaniya. <sup>25</sup> Hiyaiya, howitihare atyo kaoloxere nawenane Enore koamaniya, kamelo howitihare kaxajiyakisakitere awiyahi nakoako xahehare howitini atyo.

<sup>26</sup> Exaotyakiraharenai hakaharetyoaha, semaha hatyoharenai hoka hatyo kakoaha nexa kakoaha: — Nikareya hoka xalaiya kaiyakehetehena? nexaha.

<sup>27</sup> Hatyaoseta Jesus wahakota enomanaha hoka nexa: — Halitinai ana atyo hatyoharenai howitihare, xakore hoka maisa atyo Enore ana xini howitihareta. Hiyaiya, Enore ana atyo maisa xoare hare howitiharexe — nexa.

<sup>28</sup> Hatyaoseta Pedro nehena Jesus hiye: — Hiyaiyehena, wisotya tyotya wahalakiharetyoa hoka hikoamaniya wisaona — nexa.

<sup>29</sup> Hoka Jesus nexa: — Aliterexe nomita xihiye, xala xamani atyoite halakisa hahaha, haximarenenai, hahahalonai, hanityo, hanexe, haisaninai, hawaikohera harenai, nohiyetti exahe Iraiti Waiyexe xoaha hiyeta hoka <sup>30</sup> kaxekakehitiyaite enomana. Kahalikite kaxekakehitiya enomana, ehananai, iximarenenai, enahahalonai, inityonai, enexenai, ityaninai, ewaikoheranai. Xakore hoka haiyaharenaite kirawanehenahene. Hoka haxowakehena atyoite hoka wenati waiyexe matyotenehare kaxekaka enomana — nexa.

<sup>31</sup> — Kahare kalikini kalorexe tyaoniterenai atyoite hatyo xowakiya wakahare tyaohenahitaha. Nikare ite kalikini kahare wakahare tyaoniterenaite exowakehena hoka kalorexe ite tyaonaha — nexa Jesus ihiye.

*Jesus Iraehitiya Hakamane, Hakaseneheta Tahi*

(Mateus 20.17-19; Lucas 18.31-34)

<sup>32</sup> Hatyaoseta Jesus, exaotyakiraharenai harenai xanahitaha Jerusalém xeta. Enahetaha tonita hoka exaoyakiraharenai enajikinita tonahitaha. Hoka hakaharetyoa mokahene, exahe haiyaharenai enajikinita xaneterenai mairahitaha.

Hatyaoeseta Jesus haware xane haxaotyakiraharenai kakoa hoka xakai ihiyea haxaisaka tahi hoka nehena: <sup>33</sup> — Xasemehena, wianeta atyo Jerusalém xeta. Nalite Haliti Ityaní kamatawayakehena sacerdotenai xekohaseharenai ana, xaotyakisatyaho kakoa waiyoretere harenai ana xoaha. Hoka exaisakaite aokaha hoka hahotyalihare halitinaí anaite halakisahene aisahene maheta. <sup>34</sup> Hoka hatyonaita koexahalisene, xataholisene,

mokotyahene ite, exahe aisahene ite. Xakore hoka hanamaki ferakene najikinitaite kaseheta — nexa Jesus haxaotyakiraharenai hiye.

*Tiago, João Xoaha Axaha Jesus*

*(Mateus 20.20-28)*

<sup>35</sup> Hatyo najikinita Zebedeu ityaninai, Tiago, João xoaha, xaneha Jesus haliya hoka nexaha: — Xekohaseti, hasemehena, waxiterehare hisehena womana — nexaha.

<sup>36</sup> — Xoare nisa xomana xaokita? nexa Jesus axahene.

<sup>37</sup> Hoka nexaha: — Kasani kalorexe hisaohenere xowakaite, hiyane hisokehenere hokahakala waiyexe heno xowakaite, wisoka hihaliya waokowita. Hatya hifihini maniya, hatya hiwatone maniya xoaha waokita — nexaha axahene.

<sup>38</sup> Hoka Jesus nexa: — Maisa atyo xawaiyorexe xaxitereharenai kakoa. Xoana waiyehenaiya xisera erakakalati akore noterehenere, exahe waiyehenaiya xikabatixatyaka nokabatixatyakihenere akereta? nexa ihiyeha (hakamane xaokaka nikareta Jesus).

<sup>39</sup> Hoka nexaha: — Há, waiyehenaiya — nexaha.

Hoka Jesus nexa: — Aliterexe nomita xihiye: xiseraite erakakalati akore noterehenere hiyeta, exahe xikabatixatyakaite nokabatixatyakihenere akereta — nexa. <sup>40</sup> — Hoka xisoka xaokowitere nofihini maniya, nowatoni maniya xoaha xaokowitere atyo maisa nomaniye xini. Enore atyo hatyoharenai memere moka, isá aokowihenereharenai anere — nexa.

<sup>41</sup> Hatyohare 10-hare exaotyakiraharenai semaha hoka ehareha Tiago, João xoaha hiye.

<sup>42</sup> Hatyo hiyeta Jesus tyotya kawisahene hahaliya makere, hoka nehena: — Xiyaiya, xekohasetinai atyo wakatita halitinai, exahe kalorexenai atyo wakatyahitene. Exe harenai atyo waiyekehalakita xomana. <sup>43</sup> Hoka maisaiya atyo nikare xisaonita. Xala xamani atyoite xinekonitare kalorexe tyaona aokowita hoka maika hahena hahinaeharenai ana.

<sup>44</sup> Maika xala xamani atyo kalorexe tyaona aokowita hoka hatyo atyoite tyotya halitinai wakanehare tyaona — nexa.

<sup>45</sup> — Hiyaiya, Haliti Ityani kakoita atyo tya hoka maisa atyo kahakaka enomana maheta xini. Haka maheta atyo tya, exahe waini hoka kahare halitinai iyeheta maheta — nexa ihiyeha.

*Jesus Kaxoseheta Bartimeu*

*(Mateus 20.29-34; Lucas 18.35-43)*

<sup>46</sup> Hatyaoseta Jesus xane kaoka haxaotyakiraharenai kakoa wenakalati Jericó nali. Hatyaoseta xanehitiya hatyo wenakalatita haxaotyakiraharenai kakoa, exahe kahare halitinai xoaha kakoa. Hoka waiya hatya maxosehare Bartimeu nexarexe, Timeu ityani. Hatyo atyo maxosehare. Ahoti kilihi tyokita hoka olo axita haomana.

<sup>47</sup> Hoka sema Jesus Nazaré yere jiyanehena hoka kawayatya: — Jesus, Davi jikolahare, hairakoaneharenai natyo! nexa.

<sup>48</sup> Hatyaoseta haiyaharenai mahokoanetya iniraene, mema xoaha tyaona aokaha, xakore hoka exahehare kawayahitiya: — Davi jikolahare, hairakoaneharenai natyo! nexa.

<sup>49</sup> Hatyaoseta Jesus tityoa hoka nexa: — Xakawihena maxosehare ali — nexa.

Hatyaoleta kawihenahene hoka nexaha: — Hihalaharehenaira! Hatityoahetehena. Hiyaiya, kawijita atyo hiso — nexaha.

<sup>50</sup> Hatyaoseta Bartimeu xawatyai haihiri hoka ihalahare tityoaheta hoka xane Jesus haliya.

<sup>51</sup> — Xoare notyoma homana haokita? nexa Jesus axene.

— Xaotyakisatiye! kasani nowaiyakatyareheta naokowita! nexa.

<sup>52</sup> — Hiyanehetehena, kalikini atyo hawaiyeheta hityakekone hiyeta — nexa Jesus ihiyeha.

Nexa hoka hatyaoseta Bartimeu waiyakahetehena rotita hoka Jesus xema xane ahoti aho.

## 11

*Jesus Kaokehena Jerusalém Nali  
(Mateus 21.1-11; Lucas 19.28-40; João 12.12-19)*

<sup>1</sup> Hatyaoseta Jesus haxaotyakiraharenai kakoa xane kaokehena ha Jerusalém nali. Hoka xane Oliveiras tyairiya nali kaokaha, wenakalatinai Betefagé, Betânia xoaha haliyaseta. Hoka axikatya hinamahare haxaotyakiraharenai <sup>2</sup> hoka nehena: — Xiyanehena wenakalati xaheta maniya tyaonitere nali. Xiyane ite nali xikaokehena hoka xiayaiyaita boriko mokose exolatyakahare tyaonita, maokatyakaharetata eheno. Hoka maika xamaxolatene hoka xisoa ekakoa ali. <sup>3</sup> Maika xala xamani axehena xiso: “Xoare maheta nikare xaolihenene?” nehena hoka maika, “Xekohaseti aokitene haomana hoka awisaite isehetene”, xexa ihiyeha.

<sup>4</sup> Hatyaoseta xaneha hoka waiyaha boriko mokose hati kanase jiyakalati haliyita, ekatilikakahare tyaonita.

Hatyaoleta aolihenaha hatyo boriko mokose hoka <sup>5</sup> haiyaharenai axehenahene: — Xoana xamohenene? Xoare maheta boriko mokose xaolihenene? nexaha.

<sup>6</sup> Hatyaoseta Jesus iraehenere ihiyeha akereta iraeha hoka hatyo halitinai halakisene hoka xaneha boriko mokose kakoa.

<sup>7</sup> Hatyaoseta nolokaha boriko mokose Jesus ana. Hoka haimanaeha mokaha eheno. Hatyaoseta Jesus tyoka eheno. <sup>8</sup> Hatyaoseta haiyaharenai kanahotyaha ahoti haimanaeha kakoa, exahe haiyaharenai hoka irikotyaha atya xawali hatyo nalita hoka hatyohare kakoa kanahotyahitaha ahoti aho.

<sup>9</sup> Enaheta xaneterenai, enajikinita tyoiterenai xoaha kawiyahenaha:  
— Wihalahareta hikakoa, Enore! Xekohaseti Enore, waiyira hamohena hexare kakoa tyoitere!

<sup>10</sup> Waiye kaiserehare atyo Davi najikinitare kaokehena womana xekohaseti tyaona maheta Davi akereta! Wihalahareta hikakoa, Enore! nexaha.

<sup>11</sup> Hatyaoseta Jesus kaoka Jerusalém nali hoka isoa Iraexatyakalati Hanako hoka tyotya hakakoare wahakoakotya. Xakore hoka koxaka makehena hoka xane wenakalati Betânia nali, 12-hare haxaotyakiraharenai kakoa.

*Jesus Irae Halohalo Kate Hiye  
(Mateus 21.18-22)*

<sup>12</sup> Kamaetali Betânia nalita haikoahenahitinha hoka Jesus naka. <sup>13</sup> Hoka sekota waiya halohalo kate. Kahanahiye kahare hoka xane iri xahita waiyakatetene. Xane hikoa ehaliya hoka ehana taita waiya, maisa iri xowakehetehenere hoka.

<sup>14</sup> Hatyaoseta nexa halohalo kate hiye: — Exe hekotaiya maisa xala hare hirínaí hiyohitita — nexa.

Nexa hoka hatyo harenai exaotyakiraharenai sema.

*Jesus Aihikoakaheta Iraexatyakalati Hanakota  
(Mateus 21.12-17; Lucas 19.45-48; João 2.13-22)*

<sup>15</sup> Hatyaoseta Jesus haxaotyakiraharenai kakoa kaokaha Jerusalém hoka isoa Iraexatyakalati Hanako. Hatyaoseta hatyo nali iyakaiterenai exahe betetitere harenai aihikoaheta. Herawatya exoakisa olo ehaikoakihititere harenai mexane, wavyaha betetitere harenai nokahakala hoka. <sup>16</sup> Hoka maisa xala hare xoalini hare kolatya Iraexatyakalati Hanako xeta aokare.

<sup>17</sup> Hoka aotyakisahene exakere: — Iraeti Waiyexe nanekoa atyo exakere Enore niraene kaxairatyaka:

Nohani atyoite Iraexatyakalati Hana kakaixaretyaka tyotya halitinai anere.  
Xakore hoka xiso atyo kaiwarexenai xateroakisakala niyahare xamokene! nexa ihiyeha.

<sup>18</sup> Hatyaoseta sacerdotenai xekohaseharenai, xaotyakiyaho kakoa waiyoretere harenai harenai, semaha iniraene hoka aisaha aokowihenaha Jesus. Xakore hoka mairahitene, halitinai awaiyetita exaotyakira hoka. <sup>19</sup> Hatyaoseta makehena hoka Jesus haxaotyakiraharenai kakoa xanehenahitinha wenakalati Jerusalém nalita.

*Halohalo Kate Tahi**(Mateus 21.20-22; João 14.13-14; 16.24; Tiago 1.6-8)*

<sup>20</sup> Kamaetali weta Jesus haxaotyakiraharenai kakoa jiyehenaha hatyo halohalo kate tyaonitere haliya hoka waiyehenaha atyo, nira atyo ityahare kakoita.

<sup>21</sup> Hatyaoseta Pedro oteheta Jesus niraene hoka nexa ihiye: — Hiayiuhena, Xaotyakisatiye, etake halohalo kate himaxawaiyerehenerore nira — nixa.

<sup>22</sup> Hoka Jesus nixa: — Exe harira xotya: xityakekoiya Enore hoka <sup>23</sup> xexaiya exe tyairi hiye: “Hakikisoahena hatyaoseta hoka hiyane onexa hexoahena”, xexaiya hoka maisaiya xamatyakekotita xiraene hoka xityakekoiya xiraene hoka hatyo xiraetere akeretaiya kaomaka. <sup>24</sup> Hatyo hiyeta nomita xihiye: xiraexahenaira hoka xoalini hare xaxehena hoka xityakekoira, motyaira koxaka kaxekakita ene hatyo harenai xomana. Nikare ite hoka hatyo harenai kaxekaka xomana — nixa.

<sup>25</sup> — Maika xiraexahena hoka ximaotyaneheta hatya iniyalahare tyomehenere hare xikakoa. Nikareya xisaona hoka Xexe enokoa tyaonitereya atyo maotyaneheta iniyalahare xománe. <sup>26</sup> Hoka maisaiya ximaotyanehitita hatya iniyalahare tyomehenere hare xikakoa hoka maisaiya Xexe enokoa nali tyaonitere maotyanehitita iniyalahare xománe — nixa.

*Jesus Xaxaka Ekalorexene Tahi**(Mateus 21.23-27; Lucas 20.1-8)*

<sup>27</sup> Hatyaoseta haikoahenahitaha Jerusalém nali. Hoka Jesus tonakoita ene Iraexatyakalati Hanako hoka sacerdotenai xekohaseharenai, xaotyakiyaho kakoa waiyoretere harenai, judeunai nityohalitiranai harenai xane kaokaha ehaliya <sup>28</sup> hoka axahene: — Xala niraene kokoare hiso hoka nikare hisaonita? Xala xaokala xema nikare hisaonita? nexaha.

<sup>29</sup> Hoka Jesus nixa: — Natyo tehitiaite naxa xiso. Hoka xekoaxatyaite nomani hoka noxakaite xihiye xala niraene xema exe harenai notyomita hoka — nixa. <sup>30</sup> — Xiyakaihenaira: xala niraene xema João Batista batixatya halitinai? Xoana Enore niraene xema, halitinai niraene xema kore? nixa.

<sup>31</sup> Nixa ihiye hoka hatyokakoaha irae kokoahenaha: —“Enore niraene xema”, wexaiya hoka nexaiya axa wiso: “Hoka xoaneretya hoka maisa xityakekota João?” nexaiya wihiye. <sup>32</sup> “Halitinai niraene xema”, wexaiya hoka halitinaiya ehareha wihiye — nexaha, mairahitaha halitinai, tyotyaha João Batista iraeti xakaisasehare terota aokahitere hiyeta.

<sup>33</sup> Hatyo hiyeta nexaha: — Maisa wawaiyorexe hatyo akiti kakoa — nexaha.

Hatyaoleta Jesus nehena: — Natyo tehitiaite maisa noxakaita xala niraene xema exeharenai notyomita hoka — nixa ihiye.

## 12

*Masene Nomaseharenai Xalijiniharexenai**(Mateus 21.33-46; Lucas 20.9-18)*

<sup>1</sup> Hatyaoseta Jesus haxaimenekola kakoa xakaihakahena ihiye. Hoka nixa: — Hatya haliti fitya uva katenai hamasenekoa hoka talahokotya hamasenekoa. Tyoma uva kakatyakala vinhoxa tyoma maheta, exahe enoakiya kahainatya hakakoare waiyakoatya hamasene maheta. Hatyaoseta haiyanai halitinai ana halakisene hoka xonehena hoka irakakakoahenahitene aoka ihiye hoka xane hakiti seko akiya xeta.

<sup>2</sup> — Enexona xowakehena hoka exekohase hatya hawakanehare axikatya, holini isehenahitaha enomana maheta. <sup>3</sup> Xakore hoka hatyo masene kaxaikotyaseharenai otokene hoka mokonasetene hoka axikahenahitene. Maisa xoare isahitaha enomana.

<sup>4</sup> Hatyaoseta hatisa hawakanehare axikahitiya enomanaha hoka nikareta tehitia maisa aiminisahitene hoka mokotyahene eseri hiye. <sup>5</sup> Hatyaoseta hatisa axikahitiya hatyo nali xeta hoka masene kaxaikotyaseharenai aisene. Nikare haiyaharenai kahare axikahenere mokaha. Haiyaharenai mokohekoatya, haiyaharenai aisaha xoaha. <sup>6</sup> Hatyaoseta ityani ixiyakawalahare takitehena hoka axikatya haisani enomanaha. Exakere ahekotya

hoka axikatene: “Nityanite naxikatyenomanaha hoka aiminisahene”, nexa. <sup>7</sup> Xakore hoka masene kaxaikotyaseharenai naxa irae kakoaha: “Exe atyo masene waikatehare ityani. Nikahena hoka waisene hoka hananehaliti waikohé harenai kakoa wisaona”, nexaha. <sup>8</sup> Hatyaoseta otokaha ityani hoka aisahene hoka xane xawatyahene seko masene nonitata.

<sup>9</sup> Hatyaoseta Jesus axahene: — Xoanaite masene waikatehare tyaohena? Tyoait aise-hena hatyo halitinai hoka hahananehare isehena hahotyalihare masene kaxaikotyase-harenai ana.

<sup>10</sup> — Xoana maisa xótyare Iraiti Waiyexe kaxairatyakehenere:  
Sehali hati nomaseharenai maxaokarehenere atyo kaxomokaka hati nekesako.

<sup>11</sup> Hatyo atyo Xekohaseti xekane. Kaxíyani, waiye kaiserehare atyo!

<sup>12</sup> Hoka judeunai nityohalitiranai ana waiyekehalaka. Hatyo haxaimenekola kakoa iraetere atyo etahiha hoka otokaha aokowihenaha Jesus. Xakore hoka mairahitaha halitinai. Hatyo hiyeta Jesus halakisaha hoka xanehenahitaha.

### *Olo Kekaka Kalorexe Ana Tahi Axaha Jesus*

(Mateus 22.15-22; Lucas 20.19-26)

<sup>13</sup> Hatyaoseta axikatyaha haiyahare fariseunai, Herodes konitarenai harenai Jesus ana hasakaharetyahene maheta, kasani Jesus komaniyatyoa hairaene kakoa aokahitaha.

<sup>14</sup> Xane kaokaha enomana hoka nexaha: — Xaotyakisatiye, waiyekehalakita atyo womana hawaiyexeharene. Maisa atyo haiyanai niraene xema hisaonare. Hiyaiya, maisa atyo halitinai henekoa maniya xini hiyaita, exahe hoka aliterexe atyo haotyakijita Enore xaotyakiraho. Hoka hiyakaihena wihiye: xoana wiyaotyakisakaho hiyeta ehekoretaiya olo kalorexe Roma yere aokiterehare wabakatya? Wabakahenaite, maisa kore ite wabakaita? nexaha.

<sup>15</sup> Hoka Jesus otya emaoseralaha hoka nexa ihiyeha: — Xoana hoka xahasakaharetya xaokowita natyo? Xama olo hokose nomani hoka nowaiya — nexa.

<sup>16</sup> Hoka isaha olo hokose enomana hoka axehenahene: — Xala nexare, niyakotini tiho exe olo hokose hiye? nexa.

Hoka nexaha: — Kalorexe Roma yere — nexaha.

<sup>17</sup> Hoka Jesus nexa: — Xoare xamani atyo kalorexe Roma yere anere hoka kalorexe ana xisene. Hoka Enore anere atyo hoka xisene Enore ana — nexa ihiyeha.

Nexa ihiyeha hoka hakaharetyoaha exekoaxala kakoa.

### *Kamatinai Kaseneheta Tahi Axaha Jesus*

(Mateus 22.25-33; Lucas 20.27-40)

<sup>18</sup> Hatyaoseta haiyaharenai saduceunai tyoaha Jesus ana. Enomanaha haliti wainihena hoka maisa kasehetere. Tyoaha Jesus haliya hoka nexaha: <sup>19</sup> — Xaotyakisatiye, Moisés exakere xairatya wawenane niyahare. “Hatyahalitiya waini hoka haiyanityo maisani-halota halakisa hoka iximareniya tyaohitiya ekakoa hoka kaisanihaiya hoka exanene wainihenere ityaniya kaxaokaka”, nexa.

<sup>20</sup> — Hasemehena, 7-hare haximarene kokoarenai tyaonahitaha. Hoka enaxenaneha hetatiyehare kaiyanityo hoka waini maisaniharetta. <sup>21</sup> Hatyaoseta iximarene ihiyetare tyaohitiya hatyo ohirō kakoa hoka maisaniharetta wainihitiya. Hatyaoseta nikareta ihiyetare tyaohitiya, maisaniharetta wainihitiya. <sup>22</sup> Nikare makere hatyo 7-hare haximarene kokoarenai tyaonaha hatyo ohirō kakoa hoka maisaniharetta wainiha. Hatyaoseta ekamaneha najikinita, hatyo ohirō tehitiya waini. <sup>23</sup> Nikarite hoka xala exanityo kaisere ite hatyo ohirō tyaohetehena, kamatinai kasehetehenere xowakiya? Hiyaiya, tyotyaha atyo tyaonaha ekakoa! nexaha.

<sup>24</sup> Hoka Jesus nexa: — Xiso atyo ehaikoare xahekotita. Maisa atyo iraiti xairatyoare tyaonitere waiyekehalakere xomana, exahe Enore niyatere hoka — nexa.

<sup>25</sup> — Hiyaiya, kamatinai atyoite kasehetehena hoka anjonai enokoa nali tyaonitere akereta atyoite tyaonaha, maisaiya atyo tyaonakakoahenahitaha — nexa.

<sup>26</sup> — Xoana maisa xakaixaretita kasehetehenerenai tahi xairatyoare tyaponitete Moisés xairala nanekoa? Etake hananehaliti keritete tahi iraetere exakere atyo xairatyoare tyaponita, Enore iraehenere Moisés hiye:

Natyo atyo Abraão, Isaque, Jacó xoaha Nenorexa.

<sup>27</sup> Hatyoharenai hiyeta Enore atyo kasexenai Nenorexa hoka maisa atyo kamatinai Nenorexa xini. Xiso atyo ehaikoare xahekotita — nexa ihiyeha.

### *Xaotyakiyaho Masakare Waiyexe*

(Mateus 22.34-40; Lucas 10.25-28; 1 João 5.3)

<sup>28</sup> Hatyaoseta hatya xaotyakiyaho kakoa waiyoretere, nali tyaponita hoka sema ini-raekakoaneha. Sema Jesus xekoaxala waiye hoka hatyaoseta xane axa Jesus: — Xoare hare masakare waiyexe xaotyakiyahonai konitare? nexa.

<sup>29</sup> Hoka Jesus nexa: — Exe waiye kaiserehare:

“Xasemehena, Israel yerenai! Wiyekohase Enore atyo haterore!

<sup>30</sup> Hawaiyehena kaiserehare hiyekohase Enore, hisaonehena exema maniya takita, hahekohenahena ekoamaniya takita, haiyateretyoahena hawenane kakoa exema maniya”, nexa.

— Hatyo atyo waiye kaisere. <sup>31</sup> Exe ihiyetare tehitia atyo masakare waiyexe:

“Hawaiyehena haiyaharenai hawaiyetyoawitete akereta”, nexa.

Maisa atyo hatehitiya xaotyakiye waiyexe aka exe hinamanai akereta — nexa.

<sup>32</sup> Hatyaoseta xaotyakiyaho kakoa waiyoretere nehena Jesus hiye: — Ehekore, Xaotyakisatiye! Aliterexe atyo hiraeta. Enore atyo haterore, maisa atyo hatehitiya aka. <sup>33</sup> Hoka ehekoretaiya wawaiyehena kaiserehare Enore, wisaonehena exema maniya takita, wahekohenahena exema maniya takita, exahe waiyateretyoawitete akereta. Hiyaiya, waiye tyakekotyaka atyo exe hinama xaotyakiyahonai. Kirakahare kaxaisaka hoka kafetatyakitere exahe xoalini hare kafetatyakitere hare Enore ana xahehare nawaiye atyo — nexa.

<sup>34</sup> Jesus ana waiyekehalaka xaotyakiyaho kakoa waiyoretere xekoaxala hawaiyore kakoa hoka nexa ihiye: — Hiso atyo maisa sekohetere hawenane Enore koamaniya nawenatyakaho nonitata — nexa.

Hatyo najikinita maisa xala hare kinatyatyako axehititene.

### *Enore Kalorexe Aohenere Tahi Axahene*

(Mateus 22.41-46; Lucas 20.41-44)

<sup>35</sup> Hatyaoseta Jesus aotyakijita Iraexatyakalati Hanako hoka axehe: — Aliyakereya xaotyakiyaho kakoa waiyoreterenai Enore Kalorexe Aohenere atyo Davi jikolahare aohenaha? <sup>36</sup> Hiyaiya, Isekohaliti Waiyexe atyo Davi kaxaehakoretya hoka exakere xairatya:

“Nexa Xekohaseti Noxekohase hiye: Hisokehena nofihini maniya hahalakoaharenai hikiji katyahe namohenere kijiya”. (Enahalakoaharenai mehotyaka xaokaka nikareta iraeta.)

<sup>37</sup> Hiyaiya, Davi atyo Haxekohase tehitia aokene. Hoka aliyakereya Cristo atyo Davi jikolahare kaxaokakehena? nexa.

### *Jesus Irae Xaotyakiyaho Kakoa Waiyoreterenai Tahi*

(Mateus 23.1-36; Lucas 20.45-47)

Nikare Jesus iraeta hoka halitinai awaiyetya iniraene.

<sup>38</sup> Hoka aotyakihena halitinai hoka nehena: — Xiriharira Xaotyakiyaho kakoa waiyoreterenai kakoa. Hatyona atyo awaiyetyahitaha haetonaneha imiti waiyeharexe ako, exahe wetekokoa hoka kasani halitinai haxaiminiraha kakoa katyawaxaha ihiyeha aokahitaha. Xanehenaha xahohisakoatyakalati hanako hoka waiyexe okahakalati koa

tyokahitaha. <sup>39</sup> Exahe nakairati hekohena hoka hatyoha hotohare waiyexe oka-hakalatikoa tyokaha aokowiyahitaha hoka kanakairahitaha. <sup>40</sup> Xakore hoka mehotyahitaha, kaiwahitaha wainyaneneronai xiyehalo. Hoka teraharetyoaha aokowihenaha hoka waha tahi Iraexatyahitaha. Hatyo hiyeta iniyalahare kaxomokakehenahere atyoite exahehare niyalahare — nexa.

*Wainyanenero Maoloxahalo Xekane Olo Tahi  
(Lucas 21.1-4)*

<sup>41</sup> Haxowaka Jesus Iraexatyakalati Hanako tyaonita hoka olo xomokakala haliya tyokita hoka wahakoita, aliyakere xamani halitinai mokita olo hatyoako hoka. Kuhare haiyaharenai kaoloxerenai kalore olo mokahitaha. <sup>42</sup> Hatyaoseta hatya ohir wainyanenero maoloxahalo hikoa hoka hinama olo hokose kirane xaimanexe moka olo xomokakalako.

<sup>43</sup> Hatyaoseta Jesus kawisa haxaotyakiraharenai hoka nexa: — Aliterexe nomita xihiye, exe ohir wainyanenero maoloxahalo atyo exahehareha isa. <sup>44</sup> Hiayiya, haiyanai atyo kamawanetere hiyeta isahitaha. Hoka exe atyo maoloxahalo xakore hoka tyotya haoloxa haxiyehalo niyahare atyo isa — nexa ihiye.

## 13

*Jesus Irae Iraexatyakalati Hana Mawenekoaretyaka Tahi  
(Mateus 24.1-2; Lucas 21.5-6)*

<sup>1</sup> Hatyaoseta Jesus hikoahetehena Iraexatyakalati Hanakota hoka hatya exaotyakirahare nehena ihiye: — Xaotyakisatiye, hiyaiyehena, kaxiyani waiyehare exe sehalinai exahe exe hatinasenai hoka! nexa.

<sup>2</sup> Hoka Jesus nexa: — Xoana, hiyaita exe hatinasenai? Haxowaka ferakenite tyotya exe hiyaiyiterekarenai kamawenekoaretyakeheta. Hoka maisaiya hatya sehalii hatya sehalii heno tyaohitita — nexa Jesus ihiye.

*Howitiharexe Wenati, Irawaniti Xoaha Tahi  
(Mateus 24.3-14; Lucas 21.7-19; 1 Pedro 1.6-7; 3.14; 4.12-14)*

<sup>3</sup> Hatyaoseta Jesus xane Oliveiras tyairiya heno tyoka hoka wahakoita ene Iraexatyakalati Hana ana hoka Pedro, Tiago, João, André xoaha hawawaharenaiha heko axehenahene: <sup>4</sup> — Xoana xowakaite hatyoharenai kaotyakehena? Xoare hotohare ite kaotyakehena hoka hotikihena hatyoharenai ferakene?

<sup>5</sup> Hatyaoseta Jesus aotyakihenahene: — Xirihalira hoka maisa xala hare maoseraita xiso. <sup>6</sup> Kahare tyaita kaotyakehena nêxare kakoa hoka nehenaha: “Natyo atyo Enore Kalorexe Aohenere”, nehenahaite. Hoka kahare halitinai maoserahenaha.

<sup>7</sup> — Awatyo ximairehena, xasemehena xaisakakoati nemahare, exahe xaisakakoati tahi hoka. Tyotya hatyoharenaite kaotyaka, xakore hoka maisa atyoite imiyanaosehenere.

<sup>8</sup> Hahotyalihare ite xane hahotyalihare kakoa aisakakoahena, exahe hakoatare ite xane hakoatare kakoa aisakakoahena. Haiyanai koaite waikohe tatakoahena, exahe nakitite tyaoahena. Hatyoharenai atyoite hetati xoima kawetere akereta — nexa.

<sup>9</sup> — Maika xirihare xisaona. Hiayiya, xikaberexotyakaite hoka xikakolatyakaite xekohasetinai ana, exahe xikamokonasetyakaite militihi kakoa xahohisakoatyakalatinai hanako. Nohiyitite xikakolatyaka kalorexenai, xekohasetinai nahalakoa hoka xiyakaite ihiyeha Iraeti Waiyexe. <sup>10</sup> Imiyanki ferakene nahitita atyoite Iraeti Waiyexe kaxakaisaka tyotya halitinai ana. <sup>11</sup> Maika berexohenaha, kolahenaha xiso kalorexenai ana hoka awa atyo ximawaiyehare xiraehenerehare tahi kakoa nahitita. Hoka maika xiyane xahikoahena hoka xirae Enore aokiterekare. Hiayiya, xiraehenere hare atyoite maisa xiraene xini, xakore hoka Isekohaliti Waiyexe nalitare atyoite.

<sup>12</sup> — Kahare haiyaharenaite haximarenenai kaiserehare iseheha kaxaisakaha maheta, exahe nikaretaite enexenaiha haisaninai mohenaha. Hoka ityaninaite kahalakoahare hanexenaiha kakoa hoka axaisakihenenite. <sup>13</sup> Tyotyahaite kirawaneha xiso nohiyiti,

xakore hoka xala xamani atyoite heko kinatere tyaona nokoamaniye imiyanaose kijiya hoka hatyo atyoite kaiyakeheta — nexa.

*Kalorexe Wenati Howitiharexe  
(Mateus 24.15-28; Lucas 21.20-24; 2 Tessalonicenses 2.3)*

<sup>14</sup> Hoka Jesus nehitia: — Maika xiayehena “kaheneharexe, exahe wenati xaiyalaharetyasehare” emawenanehare akiti nali hoka maika xala xamani Judéia nali tyaonita hoka tekoahenaira tyairinai koni xeta. (Maika hatyo “kaheneharexe, exahe wenati xaiyalaharetyasehare” aokitere ekaixarityasehare ana waiyeketahala). <sup>15</sup> Maika xala xamani hahaha heno tyaonita hoka tekoahena rotitaira hoka awa atyo isoahetehena hoka xoalini hare iyehetehena. <sup>16</sup> Maika xala xamani mase tyaonita hoka awa atyo haikoahetehena hahaha xeta haima kolaheta maheta. <sup>17</sup> Kaxíani, hatyo xowakiya atyoite howitihare tyaohena tifalonai exahe xoimaisanironai ana hoka! <sup>18</sup> Maika xiraex-ataya Enore hiye hoka maisa hatyoharenai tihere xowaka kaotyakita. <sup>19</sup> Hiyaiya, hatyo xowakehena atyoite hoka wenati atyo ite howitihare tyaohena. Maisa xoana xowaka nikare tyaonare Enore tyomehenere waikohekao xowakiya, hoka maisaiya atyo nikare tyaohitita haxowakiya. <sup>20</sup> Xakore hoka Xekohaseti atyo aikiranitya hatyo wenati howitiharexe ferakenenai. Maisaiya nikarexe hoka maisaiya xala hare makamanehare tyaonita. Xakore hoka Enore iyeheta aokowihenerenai hiyeta atyo hatyo ferakenenai kaxakiranityakeheta — nexa.

<sup>21</sup> — Maika hatya nehena xihiye: “Xiyaiyehena, Kalorexe Enore Aohenere ali tyaonita”, nehena xamani, “Owene tyaonita”, nehena hoka awa atyo xityakekone. <sup>22</sup> Hiyaiya, kaotyakaite iraeti xakaisaseharenai exahe Enore Kalorexe Aohenere metalaharenai hoka tyomahaite kahare xoalini hare maomakahare katyakekotyaka maheta, hoka maoser-ahenaha haliti. Exahe aiyateretyoahaite maoseratyaha maheta Enore haomanerehare aohenerenai.

<sup>23</sup> — Waiyira xasema: exe harenaitya noxakaita xihiye kaotyakehenere nahitita — nexa.

*Haliti Ityani Tyoaneneheta Tahi  
(Mateus 24.29-31; Lucas 21.25-28; 2 Tessalonicenses 1.6-7; Apocalipse 1.7)*

<sup>24</sup> Hatyaoseta Jesus nexa: — Hatyo howitihare tyaohenere ferakenenai najikinitaite kamaite makaliro tyaona, exahe kaimare ite hoka maisa aokanahitita. <sup>25</sup> Xoresenaita exoa enokoata, exahe enokoa kinatere tyaoniterenaenite maiyaterehare tyaona.

<sup>26</sup> — Hatyaosetaite Haliti Ityani kaotyakehetehena kaiminiti koni hoka exoahetehena kalore haiyatere kakoa, hawerokene kakoa hoka. <sup>27</sup> Hoka axikatyaita anjonai hamaniya xakini hoka ahohisakoatyahaite Enore haomana aohenerenai waikohekao tarenai — nexa.

*Jesus Halohalo Kate Hiye Aimenekotya  
(Mateus 24.32-35; Lucas 21.29-33)*

<sup>28</sup> Hoka Jesus nehitia: — Waiyexira xasemehena halohalo kate tahi. Hiyaiya, ekanonai atyo tihirehetehena exahe ehanahinai atyo hikoahetehena hoka waiyeketahala atyo xomana enonenehetehena. <sup>29</sup> Nikareta tehitiaite exeharenai kaotyakehena hoka waiyeketahakira xomana Haliti Ityani okoi haikoahetehenerehare.

<sup>30</sup> — Exehalira xotya: exeharenai tyaite kaotyaka exe kasetaterehare makamaneharene nahitita. <sup>31</sup> Enokoa, waikohe harenai tyaite maiyareheta, xakore hoka niraeni tyatyoite tyaota mene — nexa.

*Eferakene, Exowakehena Kakoa Maisa Xala Waiyorexe  
(Mateus 24.36-44; 1 Tessalonicenses 5.2-3; 2 Pedro 3.10)*

<sup>32</sup> Hoka Jesus halakihena hairaene hoka nehena: — Eferakene, exowakehena harenai tahi atyo maisa xala hare ana waiyeketahakere. Maisa atyo anjonai enokoa tyaoniterenai ana waiyeketahakere, maisa atyo Enore Ityani ana hekoti waiyeketahakere. Xakore hoka

enexe Enore ana taita atyo waiyekehalakita. <sup>33</sup> Maika xikaxaikoawi exahe xirihare. Hiyaiya, maisa atyo waiyekehalakere xomana hatyo hare ferakene kaotyakene.

<sup>34</sup> — Hatya haliti hahana halakisa hoka seko akiya xanetere akeretaite. Hoka haxanene nahitita irae hawakaneharenai hiye hoka ehateneha inihatayakaha halakijitere enomanaha hoka xisoakalati kaxaikotyasehare wakatya hoka kaxaikotere akereta atyoite. <sup>35</sup> Hatyo hiyeta xikaxaikoawihena. Hiyaiya, maisa atyo hati xekohasehare kaokeneheta waiyekehalakere xomana. Xoana makakoahena xamani, xoana wahaxati xamani, xoana ferakoa maniyehena xamani, xoana weta xamani. <sup>36</sup> Hoka eharehena rotita kaokehetehena hoka maisa xisemakitata waiyita xiso maheta.

<sup>37</sup> — Niraetere xihiye atyoite niraehena tyotya enomanaha: maika xikaxaikoawihena — nexa Jesus.

## 14

### *Ahekotyaha Aisaha Maheta Jesus*

(Mateus 26.1-5; Lucas 22.1-2; João 11.45-53)

<sup>1</sup> Hinamaki ferakene taitehena hisehaliti Páscoa naheta, nakairati makaorehetyakahare xoaha naheta hoka sacerdotenai xekohaseharenai, xaotyakiyaho kakoa waiyoreterehare harenai hametenetaha otokaha Jesus hoka aisahene aokowiyahitaha. <sup>2</sup> Hoka nexahitaha: — Maisaiya nikare wisaonita hisehaliti xowaka, halitinai maisa eharahitaha wihiye maheta — nexaha.

### *Jesus Tyaponita Betânia Nali*

(Mateus 26.6-13; João 12.1-8)

<sup>3</sup> Hoka Jesus wenakalati Betânia nali, Simão jijikoahiti tawanehare hanako tyaponita hoka kanakairita ene hoka hatya ohiro tyoa tinihaliti waikohe iyomehero nomakere akore kaisero airaxero waiyexe exahe károre kakoa. Hoka ehoka hatyo tinihaliti hoka owika airaxero Jesus seri heno.

<sup>4</sup> Hoka haiyaharenai nali tyaponiterenai ehereha hoka nexa kakoaha: — Xoare maheta exakere kalore ametakijitene? <sup>5</sup> Hiyaiya, airaxero atyo waiye betetyaka 300 olo hokose xaimanexe hoka kaxekakaiya maoloxaharenai ana — nexaha.

Hoka kirawaneha ohiro <sup>6</sup> xakore hoka Jesus nexa: — Xahalakihena exe ohiro! Xoanere hoka xexamaikohalonikihenene? Hiyaiya, waiyexe atyo tyoma nomani. <sup>7</sup> Hiyaiya, maoloxaharenai atyoite tyota mene xikakoa hoka xoana xowaka xamani atyoite xakahinaetyahene xaokowihena hoka xakahinaetyahene. Hoka natyo atyoite maisa notyaota minita xikakoa. <sup>8</sup> Háomane heko atyo tyoma: hiyaiya, nokamani nahitita atyo tyoa airaxeharetya noháre, noxfalityaki niyahare. <sup>9</sup> Aliterexe nomita xihiye: hakakoare waikohекоа atyoite, aliye xamani Iraeti Waiyexe kaxakaihakatyaka hoka kaxakaisakaite exe tyomehenere hoka kaxotyakehetaite exe ohiro — nexa Jesus ihiyeha.

### *Judas Matawahena Jesus*

(Mateus 26.14-16; Lucas 22.3-6)

<sup>10</sup> Hatyaoseta Judas Iscariotes, 12-hare exaotyakiraharenai konitare irae sacerdotenai xekohaseharenai kakoa, Jesus hamatawala enomanaha tahi akiti. <sup>11</sup> Hatyohare tahi semaha hoka ihalahareha hoka olo isaha enomana aokowiha. Hatyo najikinita Judas ahekohena Jesus hamatawala tahi akiti kakoa.

### *Jesus Otyaxematyá Páscoa Ferakene*

(Mateus 26.17-25; Lucas 22.7-14, 21-23; João 13.21-30)

<sup>12</sup> Hatyaoseta hetati ferakene, nakairati makaorehetyakahare xowaka, judeunai kalanero aisaha hoka Páscoa ferakene otehenahititere ferakene xane hikoa hoka exaotyakiraharenai axaha Jesus: — Aliye nali wisoma nakairati Páscoa niyahare haokita? nexaha.

<sup>13</sup> Hoka Jesus axikatya hinamahare haxaotyakiraharenai, nexa ihiyeha hoka: — Xiyanehena wenakalati nali. Hoka nalite hatya haliti one kolaita hoka ahalakoatya

xiso. Hoka hatyo haliti xemaite xiyane. <sup>14</sup> Hoka maika xexa hati xekohasehare hiye, aliyeri ako xamani isoa hoka. “Xekohaseti exakere waxa aokita: ‘Aliyako tyaonita hatyo hatyako hoka natyo, noxaotyakiriharenai xoaha kakoa nokanakairi hoka wotyaxemaheta Páscoa ferakene?’ ” <sup>15</sup> Hatyaosetaite hotikisa xomana kaloakore hatyako ehaore ako, exomokakotyakahare exahe memere. Hoka nalite tyotya xisoma womana — nexa Jesus ihiyeha.

<sup>16</sup> Nixa hoka hatyo hinamahare exaotyakiraharenai xaneha wenakalati xeta. Hoka Jesus aokitere akereta waiyaha. Hoka tyomaha nakairati Páscoa niyahare.

<sup>17</sup> Makehena hoka Jesus kaoka 12-hare haxaotyakiraharenai kakoa. <sup>18</sup> Kanakairahitaha mexakoa hoka nehena: — Hatya xinekonitare kanakairitere nokakoite matawahena natyo — nexa.

<sup>19</sup> Nixa hoka amaikohareha hoka hatya xakini axehenahene: — Xoana maisa natyo xini haokita? nexaha ihiyeha.

<sup>20</sup> Hoka Jesus nexa: — Hatya xinekonitare. Hatya nohakakoani balatoahcko maikitere nakairatite matawahena natyo. <sup>21</sup> Hiyaiya, Haliti Ityani atyoite wainihena, Iraeti Waiyexe iraetere akereta. Xakore hoka kaxiyani, kirakoane ite tyaohena Haliti Ityani matawahenere! Kaxiyani, waiye kaiserehareya atyo mawenanehareta tyaonare hoka! nexa.

#### *Jesus Nakairati, Erati Kakoa Aimenekotya Hakamane*

(Mateus 26.26-30; Lucas 22.15-20; 1 Coríntios 11.23-26)

<sup>22</sup> Hatyaoseta kanakairahitaha hoka Jesus iya nakairati hoka iraexatya Enore hiye. Hatyo najikinita taikasetene hoka isene haxaotyakiraharenai ana hoka nehena: — Xotohenen, xikanakairahenene, exe atyo nohare — nexa.

<sup>23</sup> Hatyaoseta iyehitiya erakakalati hoka iraexahitiya Enore hiye. Hoka isehitiyene haxaotyakiraharenai ana hoka tyotyaha terahene.

<sup>24</sup> Hatyaoseta Jesus nehena: — Exe atyo notimalaxi, kaxiratyaka kahare haliti hawaonita. Exe timalati hiyeta atyo waitare wenati tyaona halitinai ana Enore kakoa. <sup>25</sup> Aliterexe niraeta xihiyeha, exaoseta atyoite maisa noterehitita exehare vinhoxa. Exaoseta atyoite Enore nali taita noterehitita waitare vinhoxa — nexa Jesus ihiyeha.

<sup>26</sup> Hatyaoseta xeraha haxaka xerati hoka xaneha Oliveiras tyairiya nali.

#### *Jesus Irae Pedro Kakoa*

(Mateus 26.31-35; Lucas 22.31-34; João 13.36-38)

<sup>27</sup> Xane kaokaha hatyo nali hoka Jesus nexa haxaotyakiraharenai hiye: — Exe xatinite xahalakihena natyo. Hiyaiya, iraiti waiyexe kaxairatyakehenere atyo nexa: “Naisaite kaxaikotyatiye hoka tyotyaita ekaxaikoneharenai xaore”.

<sup>28</sup> — Hoka hatyo najikinitaite, nokaseheta hoka noxani xaheta maniya Galiléia xeta — nexa ihiyeha.

<sup>29</sup> Nixa ihiyeha hoka Pedro nehena: — Maisaiya atyo nahalakijita hiso, exahe tyotya haiyanai halakisa hiso hoka — nexa.

<sup>30</sup> Hatyaoseta Jesus nexa Pedro hiye: — Exehalira hotya: awisa xatinite, takoir makawiraharene hinamaki nahititaite, hanamaki hateraharetyoa. Himawaiyanenehare ite haoka natyo — nexa Jesus.

<sup>31</sup> Xakore hoka Pedro kahaliki nikareta aiyateretyoa irae: — Maisaiya xoana hekota nomawaiyaninihare naokita hiso, exahite kotare nowaini hihakakoane — nexa. Tyotya exaotyakiraharenai nikare makere iraeha.

#### *Jesus Tyaonita Ímekoa Getsêmani Nali*

(Mateus 26.36-46; Lucas 22.39-46)

<sup>32</sup> Hatyaoseta Jesus xane Getsêmani aokahitere nali haxaotyakiraharenai kakoa. Xane kaokaha hatyo nali hoka Jesus nehena ihiyeha: — Xisokehena ali niraexahenere nase — nexa ihiyeha.

<sup>33</sup> Hatyaoseta noloka Pedro, Tiago, João xoaha. Hatyaoseta Jesus kehexa kalore haxamaikoharene, hamawaiyeharene, <sup>34</sup> hoka nehena: — Kalore noxamaikohalini nokihixita nohiye, motya aijita ene natyo. Alitehena xiso hoka xikaose hoka xiayiahokotyoa nohakakoani — nexa.

<sup>35</sup> Hatyaoseta xanehitia sekose aka hoka totahi waikoa hoka axa Enore, kasani emaisaheta enonita nikare kaxomokakehenere nonitata aokita hoka.

<sup>36</sup> Hoka exakere iraexatya: — Abá! Hisooya atyo tyotya xoalini hare hisoma. Hoka maika hemaisahetehena exe erakakalati noxemakawatikisase noniti. Xakore hoka maisaiya atyo naokitere akereta xini kaomaka hoka maika atyo haokitere akereta kaomaka — nexa.

<sup>37</sup> Hatyaoseta haikoaheta hoka waiyehena atyo hanamahare exaotyakiraharenai atyo nemakita hoka nehena Pedro hiye: — Xoana hisemakita, Simão? Xoana maisaiya ini hekoti hikaose hoka xiayiahokotyoita? <sup>38</sup> Maika xikaose xiayiahokotyoa exahe xiraexatya maisa xikahasakaharetyakita maheta. Xiayiya, maisa xakore iniyalahare maniya xisaona xaokowiye hoka xiháre atyo maisa kinaterexe — nexa.

<sup>39</sup> Hatyaoseta xanehitia hoka iraexahitiya, hetati iraetera akereta. <sup>40</sup> Hatyaoseta haikoaheta haxaotyakiraharenai ana hoka nemakahitaha waiyehenahitiyene. Ene-makaha kalore kaweta hoka maisa kaosexeha. Hoka maisa aliyakere Jesus ana ekoaxyareha.

<sup>41</sup> Hatyaoseta Jesus haikoaheta ehanamakinihena hiye hoka nexa: — Xoana xise-makitata, xikawinitata? Nikahena, enaosetya xane hikoa. Xiayiya, Haliti Ityani atyo kamatawatyakehena iniyalahare nomaseharenai ana. <sup>42</sup> Xatityoahetehena hoka wiyanheta. Xiayiya, owehena haliti nomatawatyasehare — nexa.

### *Jesus Kaberexotyaka*

(Mateus 26.47-56; Lucas 22.47-53; João 18.3-12)

<sup>43</sup> Jesus iraetata ene hoka Judas kaoka, 12-hare exaotyakirahare konitare. Kahare haliti tyoa exema, kesekase, atyalihose harenai kakoare. Sacerdotenai xekohaseharenai, judeunai nawenatyakaho kakoa waiyoreterenai, exahe judeunai nityohalitiranai harenai xaxikala xema tyoahitaha.

<sup>44</sup> Ematawatyasehare Judas koxaka irae ekakoaha hoka aimenekohena enomanaha hoka nexa: — Nasohitanakolihenerira xotoka hoka xakolatya — nexa.

<sup>45</sup> Hatyaoseta kaoka hoka xane rota Jesus haliya hoka nehena ihiye: — Xoana waiye hisaonita, Xaotyakisatiye? nexa hoka sohitankolisisene.

<sup>46</sup> Hatyaoseta otokaha Jesus hoka olatyahene. <sup>47</sup> Hatyaoseta hatya nali tyaonitere iya kesekase hoka mokotya sacerdotenai xekohasehare wakanehare hoka aikotya itinihe.

<sup>48</sup> Hatyaoseta Jesus nexa ihiye: — Xoana hoka xisoa xotohena, xolahena natyo maheta hoka kesekase kakoa, atyalihose harenai kakoa xisoa nomani? Hoka xalijinharexe akereta xamoka natyo. <sup>49</sup> Wáhakiya notyaonita xinekoni hoka naotyakijita haliti Iraexatyakalati Hanako hoka maisa xotokare natyo. Xakore hoka Iraiti Waiyexe xakaihenere akereta atyo kawenatyaka maheta exakere xamoka natyo — nexa.

<sup>50</sup> Hatyaoseta tyotya exaotyakiraharenai halakisaha Jesus hoka tekoaha. <sup>51</sup> Hoka hatya xoimahaliti, imiti taose kakoa olalisoare taita, xaneta Jesus xema hoka haiyanai otokahene aokowi. <sup>52</sup> Xakore hoka halakisa imiti taose ekahekoaha hoka teko, maimahiro.

### *Jesus Kolatyaha Kalorexenai Nahalakoa*

(Mateus 26.57-68; Lucas 22.54-55, 63-71; João 18.13-14, 19-24)

<sup>53</sup> Hatyaoseta xaneha Jesus kakoa sacerdotenai xekohasehare hana nali. Koxaka hatyo nali exekohasenaiha hohisakoahitaha, judeunai nityohalitiranai exahe enawenatyakaho kakoa waiyoreterenai harenai kakoa. <sup>54</sup> Pedro xane Jesus xema sekoseta, xane isoa sacerdotenai xekohasehare hana talalahoko aco. Hoka xane tyoka irikatyaose wakaharenai haliya jijikoa maheta.

<sup>55</sup> Hatyaoseta sacerdotenai xekohasehareni, tyotya kalorexenai xakore sema aokow-ihia xoalini hare Jesus tahi akiti hoka aisahene aokowiha hoka maisa xoare hare

semahitaha. <sup>56</sup> Kahare iraeha etahi hamaoseralaha. Xakore hoka hawarehare xakini xakaiha.

<sup>57</sup> Hatyaoseta haiyaharenai tityoaha hoka Jesus iraeharehenaha hamaoseralaha hoka nehenaha: <sup>58</sup> — Wasema iniraene exakere: “Namawenekoarehetaite exe Iraexatyakalati Hana halitinai tyomehenere hoka hanamaki ferakene kakoa taitaite notyomehetene. Hatyo atyoite maisa halitinai nómame xini”, nita — nexaha.

<sup>59</sup> Nexaha xakore hoka hawarehare xakini xakaiha.

<sup>60</sup> Hatyaoseta sacerdotenai xekohasehare tityoa enekonitaha hoka axehena Jesus: — Xoana maisaite xoare hiraeta exe hiraeharetyaka nahalako? nexa.

<sup>61</sup> Xakore hoka Jesus mema tyiona, maisa xoare nexa iraeta.

Hatyaoseta sacerdotenai xekohasehare axehitiyene: — Xoana, Enore Waiyexe Ityani hiso, Enore Kalorexe Aohenere hiso? nexa.

<sup>62</sup> Hoka Jesus nehenaha: — Há, natyo. Xityotyaita xiayiye Hali Ityani nokane Enore kinaterexe haliya, ifihini maniya, exahe exexoaneheta kaiminiti konita enokoata hoka — nexa Jesus ihiyeha.

<sup>63</sup> Hatyaoseta hatyo sacerdotenai xekohasehare haima halalaka (hotikisa maheta haxamaikoharene) hoka nehenaha: — Maisaiya atyo xoare maheta etahi akiti hatya xakai wihiye waohitita. <sup>64</sup> Xiyaiya, xasema atyo iniraene iniyalahare Enore akiti. Xoanaite wamohenene? nexa.

Tyotyaha kahalakoaharahitaha Jesus kakoa hoka exaisaka aokaha.

<sup>65</sup> Hatyaoseta haiyaharenai xataholisene, talatihotyahene hoka mokotyahene hoka nehenaha: — Hotehena, xalatya mokotya hiso? nexaha.

Exahe sorarenai tehitia otokene hoka mokotene.

#### *Pedro Hamawaiyanenehare Aoka Jesus*

(Mateus 26.69-75; Lucas 22.55-62; João 18.15-18, 25-27)

<sup>66</sup> Pedro ekatyahexe talarehoko ako tyonita ene hoka hatya sacerdotenai xekohasehare wakanehalo hikoa enomana. <sup>67</sup> Hoka waiya Pedro jijikoane irikati haliya, hoka waiye wahakotya enomana hoka nehenaha: — Hiso tehitia ene Jesus Nazaré yere haliya hisaonita — nexa.

<sup>68</sup> Xakore hoka teraharetyoa hoka nehenaha: — Maisa atyo nowaiyanihare xini, exahe maisa waiyekhalakere nomani hatyo hiraetere akiti — nexa.

Nexa hoka hikoaheta hatyo nalita. Hoka xane talarehoko xisoakala maniya. Hatyo xowaka takoira kawihena.

<sup>69</sup> Hatyaoseta hatyo wakahalo waiyehitiya Pedro hoka nehenaha nali tyoniterenai hiye: — Exe haliti atyo enekonitareha — nexa.

<sup>70</sup> Xakore hoka Pedro teraharetyoahitiya.

Hatyaoseta mawaheneta hoka nehenahitiya ihiye nali tyoniterenai: — Aliterexe atyo enekonitareha hiso. Hiyaiya, Galiléia koa tare atyo hiso — nexaha.

<sup>71</sup> Hoka Pedro nehenaha: — Maisa atyo nowaiyanihare xini hatyo haliti xiakaitere. Alitere naokita. Ikoiya namaoseraita hoka ehekoretaiya Enore hatyohare hiyeta iniyalahare moka natyo — nexa.

<sup>72</sup> Hatyo xowaka takoira kawihitiya, hatyo kakoa hinamakihena kawijita. Hoka Pedro oteheta Jesus niraene: “Takoira hinamaki makawiraharenetaite hanamaki hateraharetyoa, himawaiyanenehare ite haoka natyo”, nehenere. Hatyaoseta Pedro kehexaharetyoaheta hoka tiyahena.

#### *Jesus Kolatya Pílatos Ana*

(Mateus 27.1-2, 11-14; Lucas 23.1-5; João 18.28-38)

<sup>1</sup> Kamaetalí witita sacerdotenai xekohaseharenai, ahohisakoatyakaoaha judeunai nityohalitiranaiha, judeunai nawenatyakaho kakoa waiyoreterenai harenai kakoa hoka iraekakoaha. Hatyaoseta Jesus kolatya hoka xaneha ekakoa kalorexe Pilatos nali. Hoka isahene enomana.

- <sup>2</sup> Hoka Pilatos axene: — Xoana, judeunai xekohase kalorexe hiso? nexa.  
 — Hiso atyo nikare hiraeta — nexa Jesus ihiye.  
<sup>3</sup> Hatyaoseta sacerdotenai xekohasenai kahare iraeharetene hoka mema tyaona.  
<sup>4</sup> Hatyaoseta Pilatos axehitiyene: — Xoana maisaite xoare hita? Hiyaiya, kahare iraeharetyahitaha hiso — nexa ihiye.  
<sup>5</sup> Xakore hoka Jesus mema tyaonehitiya. Hoka Pilatos hakaharetyoa moka.

*Jesus Kahalakisaka Kaxaisaka Maheta*

(Mateus 27.15-26; Lucas 23.13-25; João 18.39-19.16)

<sup>6</sup> Hisehaliti Páscoa xowakehena nihatyaka Pilatos aihikoahitita hatya berexo ako tyaoniterenai konitare halitinai xaxane xema. <sup>7</sup> Hatyo xowaka Barrabás nexarexe berexo ako tyaonita, haiyaharenai katawane akahenerenai kakoa. <sup>8</sup> Hatyaoseta halitinai tyoaha hoka hawenanahoha akereta axehenaha Pilatos. Kasani aihikoaheta hatya berexoako tyaonitere enomanaha aokaha.

<sup>9</sup> Hoka Pilatos axahene: — Xoana, judeunai xekohasehare kalorexe naihikoaheta xomana xaokita? nexa.

<sup>10</sup> Waiyekehalakita atyo enomana sacerdotenai xekohaseharenai nokoawaharene Jesus hiye. Hatyohare hiyeta tyoaha ekakoa enali hoka isahene enomana.

<sup>11</sup> Hatyaoseta sacerdotenai xekohaseharenai aiyateretyoaha halitinai xahita. Kasani axaha Pilatos hoka Jesus wenekoare aihikoaheta Barrabás enomanaha aokaha.

<sup>12</sup> Hoka Pilatos axehenahitiyene: — Hoka xoanaite namohena exe haliti, judeunai xekohasehare kalorexe xaokitare? nexa.

<sup>13</sup> — Haberekohenene atyalihose xaimaholatyaka hiye — nexa kawiyatya halitinai.

<sup>14</sup> — Hoka xoaretya tyoma iniyalahare? nexa Pilatos.

Hoka tyotyaha exahehare kinatyaxa kawiyatya: — Haberekohenene atyalihose xaimaholatyaka hiye! Haberekohenene atyalihose xaimaholatyaka hiye! nexaha.

<sup>15</sup> Hatyaoseta Pilatos kasani halitinai emaxalokisa aokowita hoka Barrabás aihikoaheta enomanaha. Hatyo najikinita Jesus mokonasetyaka militihi kakoa aoka sorarenai hiye. Hatyaoseta halakisene enomanaha berekotyahene maheta atyalihose xaimaholatyaka hiye.

*Sorarenai Koexahalisaha Jesus*

(Mateus 27.27-31; João 19.2-3)

<sup>16</sup> Hatyaoseta sorarenai xane Jesus kakoa kalorexe hakatyakala hanako nali hoka tyotyota sorarenai ahohisakoatya. <sup>17</sup> Hatyaoseta aisoakisaha Jesus imiti xotere nase ako. Tyomaha xolatyaolisoakalati katohere kakoare hoka mokahene eseri hiye.

<sup>18</sup> Hatyaoseta koexahaxahenaha ekakoa hoka nehenaha: — Hawaijeta womana, judeunai xekohasel! nexaha.

<sup>19</sup> Hatyaoseta mokotyahene eseri hiye atyakase kakoa, xataholisahene. Tyokaha hakaoliseha kakoa enahalakoa hoka motya ekoamaniya nawenatyaseharenai aokowiha.

<sup>20</sup> Hatyaoseta halakisaha hahiralahene hoka aitoakihenahitaha imiti xotere nase ihiyeta hoka inimako aisoakihenahitene. Hatyaoseta xaneha ekakoa berekotyahene atyalihose xaimaholatyaka hiye maheta.

*Jesus Kaberekotyaka Atyalihose Xaimaholatyaka Hiye*

(Mateus 27.32-44; Lucas 23.26-43; João 19.17-27)

<sup>21</sup> Xanahitaha ene hoka ahotyaho ahalakoatya hatya haliti, Simão nexarexe, wenakalati Cirene yere, Alexandre Rufo xoaha nexe atyo. Maseta ene tyohitita hoka otokaha Simão hoka Jesus berekotyakala niyahare atyalihose xaimaholatyaka kolatyaka aokaha ihiye.

<sup>22</sup> Hatyaoseta xaneha Jesus kakoa Gólgota aokahitere nali. Gólgota atyo “Seriti Akerehare Aose” nita. <sup>23</sup> Isaha xakore enomana aokowiha vinho xa kaketaxatyaka makehexaharetyoaniti niyahare mirra kakoare hoka maisa teritene.

<sup>24</sup> Hatyaoseta berekotyahene atyalihose xaimaholatyaka hiye. Hatyaoseta iraka kokoaha aokowihenaha inima nase hoka hasakaharetyakakoaha, xala xamani tyaona ekakoa maheta. <sup>25</sup> Eno kamaihena hoka berekotyaha Jesus. <sup>26</sup> Eseri haomaniya mokaha exawaiyekahalakalaha niyahare taba taose xairatise kakoare, exakerexe:

JUDEUNAI XEKOHASEHARE KALOREXE

<sup>27</sup> Berekotyaha tehitia atyalihose xaimaholatyakanai hiye hinamahare kaiwarexenai ehaliya, hatya ifihini maniya, hatya ewatone maniya xoaha. <sup>28</sup> Nikare tyaona Iraeti Waiyexe iraehenere akereta:

Haliti xalijinihadrexe akereta kaxomokaka.

<sup>29</sup> Hatyo nali jiyiterenai koexahaxatyahitaha ekakoa, xalawalisaha haseriha enomana hoka nexahitaha ihiye: — Hisoija atyo hamawenekoaretya Iraexatyakalati Hana hoka hanamaki ferakene kakoitaifa hisomehetene haoka. <sup>30</sup> Hoka hexoahetehena hiberekotyaka aoseta hoka hisota hiyoawihetehena! nexaha.

<sup>31</sup> Sacerdotenai xekohasenai, judeunai nawenatyakaho kakoa waiyoreterenai harenai koexahaxatyahitaha ekakoa hoka nexahitaha: — Haiyanai xakoane atyo iyehitita iniyalahare nonitata hoka xoana hoka maisa hatyota iyoawihetere. <sup>32</sup> Nikahena Enore Kalorexe Aohenere, Israel yerenai xekohasehare. Hexoahetehena hiberekotyaka aoseta hoka wityakeko hiso — nexahitaha.

Kaiwarexenai kaberekotyakehenerenai Jesus haliya tehitia kirawanahene hoka aiyalatuya enomana.

*Jesus Waini*

(Mateus 27.45-56; Lucas 23.44-49; João 19.28-30)

<sup>33</sup> Hatyaoseta totahikoahena hoka makalirohena hakakoare waikohekoa. Heko makaliro tyaona makakoa kijiya.

<sup>34</sup> Makakoahena hoka Jesus kinatyaxa kawiyatya: — Eloí, eloí, lemá sabactani — nexa. Exe iraeti atyo exakere nita: “Nenorexi, nenorexi, xoana hoka hahalakisa natyo?” nita.

<sup>35</sup> Haiyaharenai nali tyaoniterenai semaha hatyo iniraene hoka nehenaha: — Xaseme-hena, kawijitaore Elias — nexaha.

<sup>36</sup> Hatyaoseta hatya tema xane vinho xaiya mitoloka tiyaharetyoakalati hoka mokene atyakase keteho hoka aimatene Jesus ana terene maheta hoka nehenaha: — Awijira hoka wiyaiya, xoana Elias xamanite tyoa iyehetene atya hiyeta — nexa.

<sup>37</sup> Hatyaoseta Jesus kinatyaxa kawiyatya hoka waini.

<sup>38</sup> Hatyo xowaka imiti kalotaosero, Iraexatyakalati Hanako sololoitere halalakoa nekese hoka hinama taose tyaona, eno maniyata halalakoa, waikoa maniya exoaheta.

<sup>39</sup> Sorare xekohasehare tityoita Jesus kaberekotyakehenere naheta maniya hoka sema ekawira, exahe waiya ekamane hoka nexa: — Aliterexe ene exe haliti Enore Ityani — nexa.

<sup>40</sup> Haiyahalonai ohironai tehitia, hatyo nali tyaonahitaha hoka sekota wahakotyahitaha. Enekonihia Maria Madalena, Salomé, Maria, Tiago xojimere exahe José xoaha nityo. <sup>41</sup> Hatyo ohironai atyo tyoaha exahe kahinaetyaha Jesus Galiléia nali tyaonitatere xowakiya. Kahare tehitia nali haiyahalonai xanhenolonai exema Jerusalém xeta.

*Jesus Kaxafityaka*

(Mateus 27.57-61; Lucas 23.50-56; João 19.38-42)

<sup>42</sup> Makehena hoka José kaoka. Wenakalati Arimatéia nalitare atyo. José atyo xekohasetinai konitare. Hatyo tehitia atyahita Xekohaseti kalorexe tyoanene xahita Enore nalita. <sup>43</sup> Hatyo xowaka memere judeunai moka akatyahitaha, okoi sábado ferakenehena hoka. Hatyo hiyeta José hamamairanenehara kakoita xane axeleta Pilatos Jesus háré.

<sup>44</sup> Pilatos hakaharetyoa, Jesus kamane sema hoka. Hatyaoseta kawisa sorare xekohasehare axene maheta, otene xamani Jesus waini hoka. <sup>45</sup> Hatyaoseta sorare xekohasehare xakai etahi hoka Pilatos halakisa José ana Jesus háré.

<sup>46</sup> Hatyaoseta José imiti kese taosero iya hoka xane iyeheta Jesus háre atyalihose xaimaholatyaka hiyeta. Hoka olahisetene hatyo imiti taose kakoa. Hatyaoseta xane mokene xawatyakalati ako, sehalì kalorexe kakoakotyaka aka. Hatyaoseta talirika sehalì kalotaosero jihotya maheta hatyo xawatyakalati. <sup>47</sup> Maria Madalena, José nityo Maria xoaha wahakotyahitaha hoka waiyaha Jesus háre xomokaka.

## 16

### *Jesus Kaseheta*

(Mateus 28.1-8; Lucas 24.1-12; João 20.1-10)

<sup>1</sup> Sábado ferakene najikinita, Maria Madalena, Salomé, Tiago nityo Maria xoaha, iyyaha airaxeronai Jesus háre hiye mokahene maheta. <sup>2</sup> Domingo xowaka, witita, kamai hikoahena hoka xaneha xawatyakalati nali. <sup>3</sup> Ahoti xanahitaha hoka nexakakoahitaha: — Xalaite kikihena womana séhali xawatyakalati jihola?

<sup>4</sup> Nikare irae kakoahitaha, hatyo séhali kaloli hoka. Hoka xane kaokaha hoka waiyehenaha atyo koxaka atyo séhali kakikisakeheta. <sup>5</sup> Hatyaoseta isoaha xawatyakalati aka hoka waiyaha xoimahaliti, iyomere imiti akore, tyokita ifihini maniya hoka mairaha.

<sup>6</sup> Hatyaoseta hatyo xoimahaliti nehena: — Awa atyo ximaira! Waiyekehalakita nomani, Jesus Nazaré yere xatawita, etake kaberekotyakehenere atyalihose xaimaholatyaka hiye. Maisa atyo ali akeheta, koxaka atyo kaseheta. Xiyaiyaore mohenaherene aose — nexa. <sup>7</sup> — Hoka xiyanahetehena hoka xiakaihena Pedro hiye, haiyaharenai exaotyakiraharenai xoaha hiye. “Xanehenaite xaheta maniya Galiléia koa xeta. Nalite xiayiyehetene iraeterexikakoa akereta”, xehena ihiyeha — nexa.

<sup>8</sup> Hatyaoseta hikoahenahitaha hoka tekoahenahitaha xawatyakalati nalita. Mairahitaha, tatakoahitaha hoka maisa xoare xakaitaha haiyanai hiye. Kalore mairaha hoka.

### *Jesus Kaotyakeheta Maria Madalena Ana*

(Mateus 28.9-10; João 20.11-18)

<sup>9</sup> Jesus atyo weta kaseheta, domingo xowaka hoka Maria Madalena ana hotohare kaotyakeheta. Hatyo nonitata atyo 7-hare isekohaliti iniyalahare axanikheta, toahiya.

<sup>10</sup> Kaotyakeheta enomana hoka xane xakaini Jesus hinaeharenai hiye, tiyahitaha exahe amaikohare ahitaha hoka.

<sup>11</sup> Semaha ekaseneheta, ekaotyakeneheta enomana hoka maisa tyakekoahitaha.

### *Jesus Kaotyakeheta Hinamahare Haxaotyakiraharenai Ana*

(Lucas 24.13-35)

<sup>12</sup> Hatyaoseta Jesus hawareharexe kaotyakehetehitiya hinamahare haxaotyakiraharenai ana ahotyaho, hakoa wenakalati xeta xanahitaha hoka. <sup>13</sup> Hatyaoseta haikoahenahitaha hoka hatyo akiti xakaiha haiyaharenai exaotyakiraharenai hiye. Xakore hoka maisa tyakekoahitaha hatyo hinamaharenai xakaini.

### *Jesus Kaotyakeheta 11-hare Haxaotyakiraharenai Ana*

(Mateus 28.16-20; Lucas 24.36-49; João 20.19-23; Atos 1.3-8)

<sup>14</sup> Hatyaoseta Jesus kaotyakeheta 11-hare haxaotyakiraharenai ana, kanakairahitaha hoka. Hatyaoseta ahenexatya enomanaha matyakekohenahere exahe masemaxemarehenahere haiyanai ekaseneheta tahi xakaihenahere hoka matyakekohenahere hiyeta.

<sup>15</sup> Hatyaoseta nexa ihiyeha: — Xiyanehena hakakoareko hoka xiakaihena Iraiti Waiyexe tahi tyotya haliti hotyalinai hiye. <sup>16</sup> Xala xamani atyoite tyakeko hoka kabatixatyaka hoka hatyo atyoite kaiyakeheta. Hoka xala xamani atyoite maisa tyakekota hoka hatyo atyoite kaxawatyaka. <sup>17</sup> Hoka tyakekohenerenai ana atyoite iyataliti kaxekaka hoka exe harenaite waiyexe tyomaha: axanikhenehitahaite isekohaliti iniyalahare nexare kakoa, exahe masemakahare xako ite iraeha. <sup>18</sup> Exahiya owi otokaha xamani, teraha xamaniya howexere hoka maisaiya xoana tyaonahitaha. Hakahenaiha ite ekaokakihenaha hokakiterenai hiye hoka kinaterehenahitaha ite — nexa.

*Jesus Xaneheta Enokoa Xeta  
(Lucas 24.50-53; Atos 1.9-11)*

<sup>19</sup> Iraehenere ekakoaha najikinita Xekohaseti Jesus kakolatyaka enokoa xeta hoka tyoka Enore fihini maniya.

<sup>20</sup> Hatyaoseta exaotyakiraharenai xane tyotya wenakalatinai hakakoarekoia Iraeti Waiyexe xakaiha maheta. Hoka Xekohaseti kahinaetyahene, xoalini hare waiyexe tyomehenaha hoka hatyohare hiyeta halitinai tyakekoha exakainiha maheta.

## Lucas

### *Xairahenerene Niraene*

<sup>1</sup> Xekohaseti Teófilo: Kahare haiyaharenai atyo aiyateretyoaha xairatyaha maheta xoalini hare kaotyakehenereharenai winekoni tahi. <sup>2</sup> Xairatyaha atyo xakaihenahere-hare wihiye, hatyoharenai waiyehenereharenai hetati xowakiyata, exahe xakaihenahere iraiti tahi. <sup>3</sup> Hatyo hiyeta, xekohaseti, tyotya nawaiyore, aliyakereta xamani hatyoharenai kaotyakehenerehare hetati xowakiya kakoa, hoka nahekotya hoka kasani tyotya hatyoharenai waiyekehalaka naxairaheta homana naokowi, <sup>4</sup> waiyekehalaka homana maheta, iraiti aliterexe tahi kakoa hikaxaotyakisakehenerehare.

### *João Batista Nawenane Tahi Kaxakaisaka*

<sup>5</sup> Herodes kalorexe tyaonitere judeunai waikoherakoa xowaka Zacarias nexarexe sacerdote tyaonita. Hatyo atyo sacerdotenai Abias hotyalinai konitare. Exanityo atyo Isabel nexalolo, hatyo tehitiya atyo sacerdotenai ityaninai konitalo. <sup>6</sup> Hatyo haiyanityo kakoarenai waiye maniya taita tyaonahitaha Enore haotita, exahe tyakekoahitaha aliterexe Xekohaseti xaotyakiraho exahe niraene. <sup>7</sup> Xakore hoka maisa kaisaniyeha, Isabel maisanityakohalo hoka. Exahe hatyo hinamanai koxaka ohiyeha hoka.

<sup>8</sup> Haxowakiya Zacarias tyomita hahatene sacerdote hatene harero Enore haotita, enómane xowakehena hatyo hateniti ferakiti nihatyaka tyomahitere hoka. <sup>9</sup> Sacerdotenai nawenanahao akereta axikatyahene keratya maheta incenso ekeratyakalaose. Hatyo hiyeta isoa Xekohaseti anere Iraexatyakalati Hanako. <sup>10</sup> Hoka incenso keritere nase halitinai menanakita iraexatyahitaha.

<sup>11</sup> Hatyaoseta hatya anjo Xekohaseti nalitare kaotyaka Zacarias nahalakoa, tityoare keratyakalati aose fihini maniya, incenso keritere nali. <sup>12</sup> Hatyaoseta Zacarias waiyene hoka maira, exahe maisa aliyakere tyaona xaka mokene.

<sup>13</sup> Xakore hoka anjo nexa ihiye: — Awa atyo himaira, Zacarias! Enore sema hiraexala. Hexanityoite hamokose kaisani hoka João nexarexe ite hakaexaretene. <sup>14</sup> Tyaonaite hoka himaxaloite ekakoa, exahe haiyanaite hoka maxalo ekakoa. <sup>15</sup> Hatyo atyoite kalorexe tyaona Enore ana. Maisaiya atyo vinhoxa terita, kawexere harenai. Isekohaliti Waiyexe kakoare atyoite tyaona tyaohenere ferakenitita. <sup>16</sup> Hoka kahare ite Israel hotyalinai Xekohaseti koamaniya axomoka nikisa, Israel yerenai Nenorexa koamaniya. <sup>17</sup> Enore niraene xakaisasehare akeretaite tyaona, exahe kinatere ite iraiti xakaisasehare Elias akereta. Hatyoite aotyakisa nexekatinai, ityaninai hoka mehexaikohare tyaonaha, exahe masemaxemalaharenaite axomokanikiheta wenati waiyexe maniya. Hoka memere ite moka Israel hotyalinai Xekohaseti kaokene niyahare.

<sup>18</sup> Hatyaoseta Zacarias axa anjo: — Aliyakeriya hatyoharenai notyakekohena? Nonityohaliti kaiserehare, nexanityo tehitiya hoka.

<sup>19</sup> Hoka anjo nexa: — Natyo atyo Gabriel, Enore wakanehare. Hatyo atyo axikatyá natyo noxakai hihiye maheta exe iraiti waiyexe. <sup>20</sup> Maisa atyo hityakekota niraeni, xakore hoka hatyoharenai atyoite enaose xowakehena hoka kaotyaka. Hoka maisa tyare atyo hityakekota hoka himairaenehare ite hisaona, exahe maisaite hiraehitita hityani tyaohenere ferakene kijiya.

<sup>21</sup> Hatyo nase halitinai atyahitaha Zacarias, exahe tyotyaha hakaharetyoahitaha ehowitiharene Iraexatyakalati Hanako kakoa. <sup>22</sup> Hikoaheta hoka Zacarias maisa irae-hitita. Hatyaoseta waiyekehalaka enomanaha xoalinhare ewaiyane Iraexatyakalati Hanako. Maisa iraexe hoka aimenekokoatyá hakahenai kakoa halitinai ana.

<sup>23</sup> Hatyaoseta Zacarias miyatya hahatene Iraexatyakalati Hanako hoka xaneheta hawenakala xeta. <sup>24</sup> Hatyo najikinita, maisa wahita hoka, exanityo Isabel tifalo hoka 5-mijini maisa hikoare hekoti hahanakota. Hoka nexa: <sup>25</sup> — Kalikini tyare atyo Xekohaseti

kahinaetya natyo hoka maisaiya atyo xalahare kirawanehitita natyo nomaisanihaloni hiyeta — nexa.

### *Jesus Nawenane Tahi Kaxakaisaka*

<sup>26</sup> Hatyaoseta 6-mijinihena Isabel tifalo tyeonita hoka Enore axikaty aijo Gabriel hatya wenakalati Galiléia koa, Nazaré aokahitere nali. <sup>27</sup> Hoka hatyo atyo kolaita iraiti hatya mawatyalisakahalotatere okoi kaiyanenehenolo hatya haliti José nexarexe kakoa ana. José atyo xekohaseti Davi jikolaharenae konitare. Hatyo mawatyalisakahalotatere atyo Maria nexalolo.

<sup>28</sup> Hatyaoseta atyo tyoa hoka nexa: — Hihalalohena, Maria! Hiso atyo waiye hikaxomokakita. Xekohaseti atyo kaxaikota hiso — nexa.

<sup>29</sup> Hoka Maria sema atyo niraene hoka maisa aliyakere tyona xaka mokene. Hoka hahakahalotyoane kakoita ahekohena, xoare nexa xamani ala iraeta hoka.

<sup>30</sup> Hatyaoseta atyo nehitia: — Awa atyo himaira, Maria. Enore atyo ihalahareta hikakoa. <sup>31</sup> Hitifaloite. Hawenakisaite hityani hoka hakaexaretene ite Jesus. <sup>32</sup> Hatyo atyoite kalorexe haliti tyona hoka Enore Maxaixahityakahare Ityanite kaxaokaka. Xekohaseti Enore atyoite kalorexe mokene, enahetahare Davi akereta. <sup>33</sup> Hatyo atyoite Jacó jikolaharenai xekohase tyota mene. Kalorexe enawenane atyoite maisa xoana hekota tyotita — nexa.

<sup>34</sup> Hatyaoseta Maria nexa atyo hiye: — Hatyoharenaiya maisa aliyakere. Hiyaiya, nomawatyalisakihalotata atyo — nexa.

<sup>35</sup> Hoka atyo nexa ihiye: — Isekohaliti Waiyexe ite tyoa homana hoka Enore niyatere ite tyona hikakoa. Hatyo hiyetaite xoimaite waiyexe, exahe Enore Ityani kaxaokaka.

<sup>36</sup> Hotehena hihinaehalo Isabel. Maisaiya atyo kaisanita aokahitaha. Xakore hoka kalikini atyo 6-mijinihena tifalo tyeonita, inityohaloti xakore hoka. <sup>37</sup> Hiyaiya, Enore ana atyo maisa xoare hare maomakahare aka — nexa.

<sup>38</sup> Hoka Maria nexa: — Natyo atyo Enore wakanehalo, maika haokitere akereta nokaxomokaki — nexa.

Hatyaoseta atyo xaneheta.

### *Maria Xane Waiya Isabel*

<sup>39</sup> Hatyaoseta haiyakinai ferakene najikinita, Maria tyakaihalotyo hoka ihalahalo xane wenakalati tyairinai koni tyeonitare, Judéia koa nali. <sup>40</sup> Xane kaoka hoka Zacarías hanako isoa hoka Isabel hiye katyawawa.

<sup>41</sup> Maria katyawaxehena Isabel hiye hoka ityani moxomoxo ityakota. Hatyaoseta Isekohaliti Waiyexe tyeonita ekakoa hoka <sup>42</sup> Isabel nexa kinatyaxa: — Hiso atyo waiye hikaxomokakita tyotya ohironai koniyata, exahe xoima hikaisanihenere tehitia atyoite waiye kaxomokaka. <sup>43</sup> Hoka xala ala natyo hoka Noxekohase nityo tyoa waiyita natyo?

<sup>44</sup> Hikatyawaxehena nohiye hoka xoima ihalahare hoka moxomoxo nohiye notyakota.

<sup>45</sup> Hiso atyo hawaiye. Hiyaiya, hityakekota atyo kaotyakehenerehare, Xekohaseti iraehenererehare hihiye — nexa.

### *Maria Xerane*

<sup>46</sup> Hatyaoseta Maria nexa:

— Nihalahalota Xekohaseti kakoa.

<sup>47</sup> Nihalahalota Enore hiyeta, nisekohalo Niyaseheta hiyeta.

<sup>48</sup> Hiyaiya, oteheta atyo natyo hawakanehalo, wakahalo taita xakore atyo natyo hoka. Kalikinita atyoite tyotyaha ohiro waiye xomokakolo aohenaha natyo.

<sup>49</sup> Hiyaiya, Enore kinaterexe atyo kalore waiyexe tyoma nomani. Enexare atyo waiyexe.

<sup>50</sup> Hotikijita atyo hawaiyexehare tyotya aiminijiterenehareni ana, tyotya ehotaliharenai konitare tyeoniterehareni kakoita ana.

<sup>51</sup> Aimatya atyo hakahe kinaterexe hoka jiyyaotita aokowiharetyoiterehareni exahekolanaiha kakoita.

- <sup>52</sup> Kikihitita atyo enokahakalanai henota kalorexenai kinaterexenai, hoka mokita atyo waiyexeharexenae kalorexe tyaonaha maheta.
- <sup>53</sup> Kalore atyo ijita nakairati nakiteraharenai ana hoka axikahitita atyo kaxiyeharexenai eháreha firereta.
- <sup>54</sup> Irahenere wahetakomaniyereharenai hiye akereta atyo tyoma hoka kahinaetya hawakaneharenai Israel hotyalinai.
- <sup>55</sup> Oteheta hahotikira hawaiyexehare Abraão ana, tyotya ijikolaharenai xoaha ana hoka heko awaiyetyahene aokowihenerehare.
- <sup>56</sup> Maria ala xoana xamani hoka hanama mijini hare tyaona Isabel haliya. Hatyo najikinita xaneheta hahaha xeta.

#### *João Batista Nawenane Tahi*

<sup>57</sup> Hatyaoseta Isabel ityani nawenanaosehena hoka tyaona enamokose. <sup>58</sup> Ehaliya tyaoniterenai, exahe ehotaliharenai xoahanai semaha kalore Xekohaseti awaiyehenerene hoka ihalahareha Isabel kakoa.

<sup>59</sup> Hoka 8-ki ferakenehena xoima tyaonitere najikinita xane aikonomanere milihe-henahene hoka kaixaretyahene aokowihenaha enexe nexareta, Zacarias nexarexe.

<sup>60</sup> Xakore hoka inityo nexa: — Mahaiya. Enexare atyoite João — nexa.

<sup>61</sup> Hatyaoseta nexaha: — Xakore hoka maisa atyo hatyanai hekoti xinekonitarenai hatyo nexarexe aka — nexaha.

<sup>62</sup> Hatyaoseta aimenekokoatyaha enexe ana, axahitene xoare nexare xamaniya kaixaretya xoima aokowita hoka. <sup>63</sup> Hoka Zacarias axa xairatyakalati taba taose hoka xairaty: “Enexare atyo João”, nexa. Hoka tyotyaha hakaharetyoaha.

<sup>64</sup> Hatyaosehena hoka Zacarias iraexehetehitiya hoka ihalaharehena Enore kakoa.

<sup>65</sup> Hoka ehaliya tyaoniterenai kalore mairaha. Hoka hatyoharenai tahi exaoretyoa hakákoare tyairinai koni tyaoniterenai nali, Judéia koa nali.

<sup>66</sup> Tyotya semitereneharenai ahekotyahitaha hoka hatyohare tahi axahitaha: — Xoanahalanite exe xoima tyaohenaki? nexahitaha.

Hoka aliterexe atyo Xekohaseti niyatere tyaonita ekakoa hoka.

#### *Zacarias Niraene*

<sup>67</sup> Hoka Zacarias, Isekohaliti Waiyexe kaxaihakoretya hoka xakaihakahena hoka nexa:

<sup>68</sup> — Nika wihalahare Xekohaseti kakoa, Israel Nenorexa kakoa. Hiyaiya, tyoa atyo kahinaetya haomanerena exahe isa maheta wenati waiyexe enomanaha.

<sup>69</sup> Axikatya atyo womana hatya kinaterexe Wiyasehaheta maheta, etake hawakanehare Davi jikolahare.

<sup>70</sup> Toahiyita atyo Enore exeharenai irae, waiyexe iraiti xakaisaseharenai koamaniyata.

<sup>71</sup> Iyeheta atyo wiso aokowi wahalakoaharenai nonitata, tyotya kirawaneterenai wiso nonitata.

<sup>72</sup> Hotikisa atyo aokowi hawaiyexehare wahetakomaniyereharenai ana, exahe oteheta aokowi waiyexe iraehenerehare.

<sup>73</sup> Alitere atyo irae wahetahare Abraão hiye,

<sup>74</sup> iyeheta atyo wiso aokowi wahalakoaharenai nonita, hoka wisaona exema maniya wimamairanehareta maheta aoka.

<sup>75</sup> Nikare tyoma, kasani tyotyaki ferakenenai wikasetatere xowaka enomanere taita wisaona maheta, hoka wisoma maheta aokitereharenai taita.

<sup>76</sup> Hoka hiso, haré, hiso atyoite Enore Kalorexe niraene xakaisasehare hikaxaokaka.

Hiso atyoite hiyanehena Xekohaseti nahitita, memere hamoka ahoti enomanere maheta.

<sup>77</sup> Hiyakaihenaite hihotaliharenai hiye iniyakehenahitaha kaotyakehenerehare, kamaotyanetyakehetehenere iniyalahare enómaneha hiyeta tahi.

<sup>78</sup> Hiyaiya, wEnorexa atyo airakoaneharetyare, waiyexehare. Hoka aokanalisaite wiso haxaokanatyakala kakoa,

<sup>79</sup> Hoka enokoataite aokanalisa tyotya makaliroti maxakatyahene katawanexe katyahe tyaoniterenai ana, moheta wawenane waiyexe wenati maniya maheta — nexa.

<sup>80</sup> Hatyaoseta João kekoare hoka kinatere tyaona eháre, inisekohare xoaha. Hoka maharexakiti tyaona hotikisoawihenere Israel hotyalinai ana kijiya.

## 2

*Jesus Nawenane Tahi  
(Mateus 1.18-25)*

<sup>1</sup> Hatyo xowakiya xekohaseti Augusto axikatyá hairaene tyotya halitinai ekax-akonekoia tyaoniterenai ana, haexarenaiha isaha maheta hoka kaxihatayaka halitinai maheta. <sup>2</sup> Hatyo hetati kaxihatayakehenahere xowaka Cirênia kalorexe tyaonita Síria nali.

<sup>3</sup> Hatyaoseta tyotyaha xaneha haexarenaiha isaha hawenakalanaiha nihatayaka.

<sup>4</sup> Hatyo hiyeta José xane Nazaréta, Galiléia nalita, Judéia koa xeta, hatya wenakalati Belém nexarexe nali, kalorexe Davi tyaohenere nali. José nali xane, Davi jikolahare hoka.

<sup>5</sup> Xane haexare isa maheta Maria kakoa. Hatyo kakoa atyo tyaona aokowita exowaka.

<sup>6</sup> Hoka tifalo exowaka, hoka Belém nali tyaonahitere nase, xoima nawenanaose xane hikoa. <sup>7</sup> Hoka Maria awenakisa hetatiye mokose haisani. Hoka aihonolisa xoima imiti taosenai kakoa hoka ehokokisene kirakahare nakaira xomokakala aose, maisa xoare aoseheta aka enomanaha nemakatyakalati hanako hoka.

*Kaxaikotyatiyenai Ana Kaotyaka Anjonai*

<sup>8</sup> Hatyo nali kaxaikotyatiyenai tyaonahitaha makiya mase, kaxaikoahitaha hakalaneroxanai. <sup>9</sup> Hatyaoseta hatya anjo Xekohaseti nalitare kaotyaka hoka Xekohaseti xaokanala werokere aokanalisa kaxaikotyatiyenai.

Hoka kalore mairaha <sup>10</sup> xakore hoka anjo nexa: — Awa atyo ximaira! Ali atyo notyoa Iraiti Waiyexe tahi noxakai xihiye maheta. Hatyo atyo kaihalaharetyakere tahi, exahe tyotya halitinai ana tehitiya. <sup>11</sup> Kalikini Davi nawenakala nali tyaona Xiyasehareheta, Enore Kalorexe Aohenere, Xekohaseti! <sup>12</sup> Exakerite hoka xityakeko: xiyaiaite hatya xoimaira exaihonolisakahare imiti taosenai kakoa, exetolikisakahare kirakahare nakaira xomokakala aose.

<sup>13</sup> Hatyaoseta kaotyaka kahare haiyaharenai anjonai hatyo anjo kakoa, motya sorrarenai enokoatarenai. Hoka xerahitaha xerati, ihalahare ahitaha Enore kakoa hoka nexahitaha:

<sup>14</sup> — Maika kaihalaharetyaka Enore kakoa, enokoa xáhehare nenone!

Hoka maika waikohekaoa mehexaikohaliti tyaona halitinai waiye moka aokowitereharenai ana.

<sup>15</sup> Hatyaoseta anjonai xanehenahitaha enokoa xeta hoka kaxaikotyatiyenai nexakakoahenaha: — Wiyá Belém xeta hoka wiyaiya, xoana xamani nali tyaona hoka, exahe wiyaiya Xekohaseti xakaitere wihie — nexaha.

<sup>16</sup> Hoka kaholawakaha xaneha hoka waiyaha Maria, José xoaha hoka waiyaha xoima exetolikisakahare kirakahare nakaira xomokakala aose. <sup>17</sup> Hatyaoseta xakaiha anjonai iraehenere etahi ihiyeha. <sup>18</sup> Tyotya semiterenai kaxaikotyatiyenai xakaitereharenai hakaharetyoaha. <sup>19</sup> Hoka Maria oteheta tyotya hatyoharenai, kalore ahekota etahiha hoka tyotya hatyoharenai hamahiyasakota moka.

<sup>20</sup> Hatyaoseta kaxaikotyatiyenai haikoahenahitaha mase xeta hoka xerahaxahotyaha xerati ihalahalitiya Enore anere, semehenahere, waiyehenahere xoaha hiyeta. Anjo xakaitere akereta terota hoka.

*Xoima Kaexaretyaha*

<sup>21</sup> Hasemanane najikinita xoima nomanere milihe xaikotyaka ferakene xane hikoa hoka kaixaretyahene Jesus nexarexe. Hatyo nexare terota atyo anjo kaexaretene, enawenane nahitita.

*Jesus Hotikisaha Iraexatyakalati Hanako*

<sup>22</sup> Hatyaoseta xane hikoa Maria, José xoaha nómane Moisés Xaotyakiraho aokitere akereta ferakene. Hatyo hiyeta kolatyaha xoima Jerusalém xeta, hotikisahene maheta Xekohaseti ana. <sup>23</sup> Hiyaiya, exakere atyo xairatyoare tyaonita Xekohaseti Xaotyakiraho:

“Tyotya hetatiye xoima atyoite kakikisaka, kaxaokaka Xekohaseti anere”, nexa. <sup>24</sup> Hoka xaneha tehitiya fetatyaha maheta hinamalise wavyaha xamani, xoana hinamali kalotese xamani, Xaotyakiyaho akereta.

<sup>25</sup> Hatyo xowaka Jerusalém nali hatya haliti tyaonita, Simeão nexarexe. Waiyexehare, airakoaneharetyare, exahe atyahita Israel hotyalinai niyakeheta. Isekohaliti Waiyexe tyaonita ekakoa, <sup>26</sup> hoka hatyo Isekohalitita, wainihenere nahititaite waiya Enore Kalorexe Aohenere, Xekohaseti xaxikalahare, aoka ihiye. <sup>27</sup> Isekohaliti kaxaihakoretya Simeão hoka xane Iraexatyakalati Hanako. Hoka enexe inityo kolatyahitaha xoima Jesus Iraexatyakalati Hanako xeta, tyomaha maheta Xaotyakiyaho aokitere akereta, <sup>28</sup> hoka Simeão iya xoima, hakanotalako mokene hoka ihalahare Enore kakoa.

Hoka nexa:

<sup>29</sup> — Xekohaseti, kalikini atyo hiraetere akereta hisoma, hoka kalikini atyoite waiye nowainihena.

<sup>30</sup> Hiyaiya, koxaka atyo nowaiya noxosenai kakoita halitinae hiyáneheta, exahe

<sup>31</sup> memere hamohenere tyotya haliti hotyalinai nahalakoa.

<sup>32</sup> Xaokanatyakalati hotikisa maheta hahotira tyotya majudeuneharenai ana, exahe isa maheta wenati waiyexe hihotyaliharenai Israel yerenai ana.

<sup>33</sup> Xoima nexe, nityo xoaha hakaharetyoaha Simeão iraehenere etahi kakoa.

<sup>34</sup> Simeão wenati waiyexe aoka enomana hoka nexa Maria, Jesus nityo hiye: — Exe xoima atyo Enore xaxikalahare mawenekoaretya exahe iyeheta maheta kahare Israel yerenai. Exe xoima atyoite Enore xaimenekola hoka kahare ite haiyanai iraeharetene.

<sup>35</sup> Nikare ite hoka exahekolanaiha metaharexenai kasemaka. Hoka xamaikohalitite kesekase ekawetyakahare akereta aikotya himahiyase — nexa.

<sup>36</sup> Hoka nali hatya iraiti xakaisasehalo inityohaloti tyaonita. Wainiyanenero, enexalo atyo Ana. Fanuel ene ityani, Aser hotyalinai konitalo. 7-wanone tyaonakakoahenahere najikinita exanene waini. <sup>37</sup> Hoka hatyo xowaka 84-wanonehenena tyaonita. Hoka maisa kikisoahetolo hekoti Iraexatyakalati Hanakota hoka ferakoa, makiya xoaha Enore koamaniya tyaonita. Kahaliki manakairita, iraexaita harenai. <sup>38</sup> Hatyaosehena hoka kaoka hoka ihalahalohena Enore kakoa, exahe iraehena xoima tahi tyotyaha Jerusalém niyakeheta xahita atyahiterenai hiye.

### *José, Maria Haikoahetaha Nazaré Xeta*

<sup>39</sup> Hoka miyakatyaha háomaneha tyotya Xekohaseti Xaotyakiraho aokitere akereta hoka José, Maria xoaha haikoahenahitaha Galiléia xeta, hahanaha xeta, wenakalati Nazaré nali. <sup>40</sup> Hoka xoima kekoareta hoka kinatere tyaonita. Kalore waiyoliti kakoare, exahe Enore waiye mokitene.

### *Jesus Hekota Iraexatyakalati Hanako*

<sup>41</sup> Tyotya wanone Jesus nexe, nityo xanahitaha Jerusalém xeta hisehaliti Páscoa ana. <sup>42</sup> Hoka Jesus 12-wanonehenena hoka xaneha hisehaliti ana, hawenaneha akereta. <sup>43</sup> Hoka hisehaliti tyotehenere najikinita haikoahenahitaha hahanaha xeta. Xakore hoka Jesus hekota Jerusalém nali, hoka maisa atyo enexe, inityo semitaha hatyohare tahi. <sup>44</sup> Exahekola hiye hoka motya haikoahititerenai koni tyaonita aokahitaha hoka hatyo hiyeta haki ferakene tonahitaha taita. Hatyaoseta tawehenahene hahinaeharenai, hawaiyaneharenai xoaha koni. <sup>45</sup> Hoka maisa kaokehenahitene hoka haikoahenahitaha Jerusalém xeta, tawehenahitene maheta. <sup>46</sup> Hanamaki ferakene najikinita kaokehenahitene Iraexatyakalati Hanako, tyokita Xaotyakiyaho kakoa waiyoreterenai kakoa. Semita iniraeneha, exahe axahitene xoaha. <sup>47</sup> Tyotya iniraene semiterenai hakaharetyoahitaha iniraene kakoa, enawaiyore xekoaxala kakoa.

<sup>48</sup> Enexe, inityo waiyene hoka hakaharetyoaha tehitiya. Hoka inityo nexa ihiye: — Haré, xoana hoka exakere hisaona? Hexe, natyo xoaha kalore wimawaiyehare watawita hiso hoka — nexa.

<sup>49</sup> Hoka Jesus nexa: — Xoana hoka xatawita natyo? Xoana maisa waiyekehalakere xomana Baba hanako notyaonehenere akiti? nexa.

- <sup>50</sup> Xakore hoka maisa waiyekehala kita enomanaha iniraene.  
<sup>51</sup> Hatyaoseta haikoaheta hanityo, hanexe kakoa Nazaré xeta. Hanexe, hanityo xoaha niraene semaxemaita. Hoka tyotya hatyoharenai inityo otyaxemaita.  
<sup>52</sup> Hatyaoseta Jesus kekoareta haháre exahe hawaiyore xoaha kakoa. Enore, halitinai xoaha awaiyetitene.

## 3

*João Batista Niraene  
(Mateus 3.1-12; Marcos 1.1-8; João 1.19-28)*

<sup>1</sup> Koxaka Tibério kalorexe tyaonita Roma nali hoka exowaka Pôncio Pilatos kalorexe tyaonita Judéia koa nali. Herodes exowaka kalorexe tyaonita Galiléia nali, hoka iximarene Filipe exowaka Ituréia, Traconites xoahanai koa kalorexe tyaonita. Lisâncias exowaka kalorexe tyaonita Abilene nali. <sup>2</sup> Anás, Caifás xoaha exowaka sacerdotenai xekohasenae tyaonahitaha.

Hatyó xowakiya Enore isa maharexakiti nali iraiti João ana, Zacarias ityani ana. <sup>3</sup> Hoka João tonakoatya tyotya wenakalatinai tyaoniterenai one Jordão xa nali hoka xakaita exe iraiti:

— Xahalakihena iniyalahare xománenai hoka xikabatixatyaka hoka xománe iniyalahare Enore maotyaneheta — nita.

<sup>4</sup> Nikare tyaona iraiti xakaisasehare Isaías hababeranexakoa xairahenere akereta: Hatya haliti kawijita maharexakiti nali: Memere ahoti xamohena Xekohaseti naheta, maika totaho xamohena enaheta maniya.

<sup>5</sup> Tyotya tyairi hekoakonaite kahexotyakeheta hoka tyairinai atyoite kaxehakakoatyakeheta. Ahoti katyokoahoterenai atyoite kaxaototahotyakeheta, exahe ahotinai kenekoehero, mitikoehero harenai kakoare atyoite kaxehakakoatyakeheta.

<sup>6</sup> Hoka tyotya halitinaite waiyehenaha haiyaseharehenahita Enore nalitare.

<sup>7</sup> Hoka kahare halitinai xanahitaha João nali kabatixatyakaha maheta. Hoka nita tyotya ihiyeha:

— Owi xalijiniharexe hotyalinai! Xala irae xihiye hoka motyaite maisa iniyalahare xikaxomokakita xaokita, Enore kaheneharexe iniyalahare axikahenere xowaka? <sup>8</sup> Maika xoalini hare waiyexe xisomehena hoka xahotikisa iniyalahare xawenane xihalakira maheta. Hoka awa atyo xexakakoahena: “Abraão atyo wahetahare hoka maisaiya Enore ehareta wihiye”, xehena. Hiyaiya, aliterexe nomita xihiye, exe sehalinai hiyeta kakoitaiya Enore tyoma Abraão jikolahare! <sup>9</sup> Hiyaiya, xawatise atyo memere tyaonita, irikotya maheta atyakatenai ityahare kakoita. Tyotya atyakatenai mawaiyerihare kalitereharenai atyoite kaxityokaka hoka kaxawatyaka irikatyaoe — nita.

<sup>10</sup> Hoka halitinai axitene: — Hoka xoare ite wisomehena? nexahitaha.

<sup>11</sup> Hoka nita ihiyeha: — Xala xamani atyo hinamanase kaimanasexe hoka maika isehena hanase maimanasehare ana, exahe maika xala xamani kanakairere hoka maika irákakoahene manakairahare kakoa — nexa.

<sup>12</sup> Haiyaharenai kalorexe noloxa resebetyaseharenai tehitija kaokaha hoka axaha João: — Xaotyakisatiye, xoare ite wisomehena? nexaha.

<sup>13</sup> — Awa atyo kalorexe aokitere xahexe xaxa halitinai — nexa João ihiyeha.

<sup>14</sup> Haiyaharenai sorarenai tehitija axitene: — Hoka wiso, xoare ite wisomehena? nexaha.

Hoka João nita ihiyeha: — Awa atyo haiyaharenai noloxa xiya iniyalahare xiyomokarene kakoa, exahe maoserare xiyakaini etahi xoaha kakoa. Hoka maika xihalahrenha xoloxa xaresebetitreharenai kakoa.

<sup>15</sup> Halitinai xatyahane hatyo xowaka aeroretyoa. Exahekolaha hiye hoka João motya Enore Kalorexe Aohenere aokahitaha.

<sup>16</sup> Xakore hoka João nexa tyotya ihiyeha: — Natyo atyo nabatixaita xiso one kakoa. Xakore hoka hatya atyo kaokehena noxahehare, hoka maisaiya natyonae aliyakere namaxolaita ikijitini nanohi, hatyo atyo noxahehare hoka. Hatyo atyoite batixahena

xiso Isekohaliti Waiyexe exahe irikati xoaha kakoa. <sup>17</sup> Abali koxaka ekaheko. Hatyo kakaite haware moka trigo ekate nonitata hoka trigo ite moka exomokakala aka, hoka keratyaita ekate irikati mawakenehare tyaponitere koni.

<sup>18</sup> Xakaihena Iraiti Waiyexe hoka João aotyakijita halitinai kahare maniyata. <sup>19</sup> Hatyaoseta João watyali xekohaseti Herodes tyaohenere Herodias haximarene kaisere-hare exanityo kakoa hiyeta. Exahe xoalinihare iniyalahare tyomehenere xoaha hiyeta. <sup>20</sup> Hatyaoseta Herodes ehare hoka exahehare niyalahare tyoma: João xomokaka berexoako aoka.

*Jesus Kabatixatyaka*

(*Mateus 3.13-17; Marcos 1.9-11; João 1.32-34*)

<sup>21</sup> Tyotya halitinai kabatixatyakehenere najikinita, Jesus tehitiya kabatixatyaka. Hoka iraexaita ene hoka enokoa majiholatyoa <sup>22</sup> hoka Isekohaliti Waiyexe exoa enomana watyaha akerehare. Hoka enokoata tyoa iraiti hoka nexa:

— Hiso atyo Nityani nawaiyetitere, kalore haihalahalinikijita natyo — nexa.

*Jesus Nahetakomaniyereharenai*

(*Mateus 1.1-17*)

<sup>23</sup> Hoka Jesus hetati hahenere xowaka, kala xoana xamani hoka 30-wanonehena. Hoka ahekotyahitere akereta atyo,

José ityani atyo, hatyo atyo Eli ityani,

<sup>24</sup> Eli atyo Matate ityani,

Matate atyo Levi ityani,

Levi atyo Malqui ityani,

Malqui atyo Janai ityani,

Janai atyo José ityani,

<sup>25</sup> José atyo Matatias ityani,

Matatias atyo Amós ityani,

Amós atyo Naum ityani,

Naum atyo Esli ityani,

Esli atyo Nagai ityani,

<sup>26</sup> Nagai atyo Maate ityani,

Maate atyo Matatias ityani,

Matatias atyo Semei ityani,

Semei atyo José ityani,

José atyo Joda ityani,

<sup>27</sup> Joda atyo Joanã ityani,

Joanã atyo Resa ityani,

Resa atyo Zorobabel ityani,

Zorobabel atyo Salatiel ityani,

Salatiel atyo Neri ityani,

<sup>28</sup> Neri atyo Melqui ityani,

Melqui atyo Adi ityani,

Adi atyo Cosã ityani,

Cosã atyo Elmadão ityani,

Elmadão atyo Er ityani,

<sup>29</sup> Er atyo Josué ityani,

Josué atyo Eliézer ityani,

Eliézer atyo Jorim ityani,

Jorim atyo Matate ityani,

Matate atyo Levi ityani,

<sup>30</sup> Levi atyo Simeão ityani,

Simeão atyo Judá ityani,

Judá atyo José ityani,

José atyo Jonã ityani,  
 Jonã atyo Eliaquim ityani,  
<sup>31</sup> Eliaquim atyo Meleá ityani,  
 Meleá atyo Mena ityani,  
 Mena atyo Matata ityani,  
 Matata atyo Natã ityani,  
 Natã atyo Davi ityani,  
<sup>32</sup> Davi atyo Jessé ityani,  
 Jessé atyo Obede ityani,  
 Obede atyo Boaz ityani,  
 Boaz atyo Sala ityani,  
 Sala atyo Nassom ityani,  
<sup>33</sup> Nassom atyo Aminadabe ityani,  
 Aminadabe atyo Admim ityani,  
 Admim atyo Arni ityani,  
 Arni atyo Esrom ityani,  
 Esrom atyo Peres ityani,  
 Peres atyo Judá ityani,  
<sup>34</sup> Judá atyo Jacó ityani,  
 Jacó atyo Isaque ityani,  
 Isaque atyo Abraão ityani,  
 Abraão atyo Tera ityani,  
 Tera atyo Nacor ityani,  
<sup>35</sup> Nacor atyo Seruque ityani,  
 Seruque atyo Ragau ityani,  
 Ragau atyo Faleque ityani,  
 Faleque atyo Éber ityani,  
 Éber atyo Sala ityani,  
<sup>36</sup> Sala atyo Cainã ityani,  
 Cainã atyo Arfaxade ityani,  
 Arfaxade atyo Sem ityani,  
 Sem atyo Noé ityani,  
 Noé atyo Lameque ityani,  
<sup>37</sup> Lameque atyo Metusalém ityani,  
 Metusalém atyo Enoque ityani,  
 Enoque atyo Jarete ityani,  
 Jarete atyo Maleleel ityani,  
 Maleleel atyo Cainã ityani,  
<sup>38</sup> Cainã atyo Enos ityani,  
 Enos atyo Sete ityani,  
 Sete atyo Adão ityani,  
 Adão atyo Enore nomanehare.

*Jesus Hasakaharetyaka Tahi  
 (Mateus 4.1-11; Marcos 1.12-13; Hebreus 2.18; 4.15)*

<sup>1</sup> Jesus kakoa Isekohaliti Waiyexe tyaonita hoka haikoaheta one Jordão xa nalita hoka hatyo Isekohalitita axanikisene maharexakiti. <sup>2</sup> Hoka nali Tihanare hasakaharetene 40-ki ferakene. Hatyokinai maisa kanakairare hekoti hoka nakehena.

<sup>3</sup> Hatyaoseta Tihanare nexa ihiye: — Enore Ityaniya atyo hiso hoka exe sehalinai haikawatya nakairati hoka hikanakaira — nexa.

<sup>4</sup> Nexa hoka Jesus nexa: — Exakere Iraiti Waiyexe xairatyaoare tyaonita:  
 Haliti atyo maisa nakairati xema taita xini tyaonita —

nexa.

<sup>5</sup> Hatyaoseta Tihanare kolatya Jesus enoakiya hoka haxerore hotikisa enomana tyotya waikohekua tyaoniterekarenai ixiyeharenai kakoita <sup>6</sup> hoka nexa: — Nisait homana tyotya exe iyateli, exahe exe xiyehaliti. Hiyaiya, tyotya exeharenai atyo kaxekaka nomani, hoka xala ana xamaniya atyo nisene naokowi hoka nisene. <sup>7</sup> Tyotya exeharenai atyoite homanere, hameholokoa nahalakoi hoka hawaiyetya natyo hoka — nexa.

<sup>8</sup> Hoka Jesus nexa: — Exakere Iraiti Waiyexe xairatyoare tyaonita: Hawaiyehena hiyekohase Enore, exahe ekoamaniya taita hisaohena, nexa.

<sup>9</sup> Hatyaoseta Tihanare kolatene Jerusalém nali hoka mokene Iraexatyakalati Hana maiyeho enoakiyere akili hoka nexa: — Enore Ityaniya atyo hiso hoka hahalaisoahete-hena exaoseta waikoa xeta. <sup>10</sup> Hiyaiya, exakere Iraiti Waiyexe xairatyoare tyaonita: Enore ite axikaty hanjoxanai kaxaiko hiso maheta, nexa.

<sup>11</sup> — Exakere tehitia xairatyoare tyaonita:  
Otokaite hiso hoka maisa hikijinai hekoti kawe hamokita sehalinai hiye, nexa.

<sup>12</sup> Hoka Jesus nexa: — Exakere Iraiti Waiyexe xairatyoare tyaonita:  
Awa atyo hahasakaharetya Hiyekohase Enore, nexa.

<sup>13</sup> Hatyaoseta Tihanare miyatya hahasakaharerera Jesus kahare maniyata hoka xaneheta haxowaka niyahare.

#### *Jesus Hahena Galiléia Nali Hotohare*

(Mateus 4.12-17; Marcos 1.14-15)

<sup>14</sup> Jesus haikoaheta Galiléia xeta hoka Isekohaliti Waiyexe niyatere tyaonita ekakoa. Etahiyakahare exaoretyoa hakákoare hatyokoa nali. <sup>15</sup> Hoka aotyakijita xaho-hisakoatyakalati hanakonai, exahe tyotya aexakeretyahitene.

#### *Jesus Xane Nazaré Xeta*

(Mateus 13.53-58; Marcos 6.1-6)

<sup>16</sup> Jesus xane wenakalati Nazaré xeta, enaihenere nali. Hoka sábado xowaka háwenane akereta, xane xahohisakoatyakalati hanako. Nali tityoa kaexaretya maheta Iraiti Waiyexe kaxairatyakehenere, <sup>17</sup> hoka isaha enomana iraiti xakaisasehare Isaías xairala nane. Hoka omereka babera hoka kaoka exakerexe kaxairatyakehenere aose:

<sup>18</sup> Xekohaseti nalitare Isekohaliti atyo tyaonita nokakoi.

Hatyo atyo aoka natyo haomana, noxakai maheta Iraiti Waiyexe maoloxaharenai ana, exahe axikaty natyo noxakai maheta mehexaikohaliti eberexotyakaharenai ana, nakaxoseheta maheta maxoseharenai, niyeheta maheta iniyalahare kaxomokakiterenai,

<sup>19</sup> noxakai maheta Xekohaseti iyehetehenere haomanerenai ferakene kaotyakene-henere maheta. <sup>20</sup> Hatyaoseta Jesus ityahaheta babera hoka isehetene xaho-hisakoatyakalati hana kaxaikotyasehare ana hoka tyokeheta. Tyotya halitinai nali tyaoniterenai wahakotyaha Jesus ana mamahirirahareha.

<sup>21</sup> Hatyaoseta iraehena hoka nexa: — Kalikini atyo kaotyaka Iraiti Waiyexe kaxairatyakehenere, kalikini xasemehenere tahi — nexa.

<sup>22</sup> Hoka tyotyaha aexakeretyaha Jesus, hakaharetyoahitaha iraiti aihalahalinikisare iraetere kakoa hoka nexahitaha: — Xoana maisa José ityani xini? nexahitaha.

<sup>23</sup> Hoka Jesus nexa: — Maisa hoka exakerexe ite xiraehitiya nomani exe iraiti: “Wairat-yare, hisota hawairatyoawihena”. Exahe xexa tehitiaite: “Hisomehena ali hawenakala kaiserehare nali, xakaitahere hománe tahi wihije Cafarnaum naliye akereta”, xexaite — nexa ihiyeha.

<sup>24</sup> Hoka nehitia: — Aliterexe niraeta xihije, maisa atyo hatya hekoti iraiti xakaisahare waiye kaxomokakere ewaikoherakoa kaiserehare nali. <sup>25</sup> Xasemehena: kahare wainiyaneneronai tyaonahitaha Israel waikoherakoa nali iraiti xakaisasehare Elias

xowaka, hoka maisa onehitita hanama wanone mokotexe hoka nakiti kalorexe tyaona hakákoare hatyo waikohekoa nali. <sup>26</sup> Xakore hoka Enore maisa axikaita Elias hahalonai wainiyanneronai tyaonitolonai Israel waikohera nali ana. Hoka hahalo wainiyanneronai tyaonitololo wenakalati Sarepta nali Sidom waikohekoa nali ana taita. <sup>27</sup> Nikare tehitia kahare jijikoahiyenai tyaonita Israel waikohera nali iraiti xakaisasehare Eliseu xowaka. Xakore hoka maisa hatyanai hekoti enekomitareha kaxaiyatelikisakihitita. Naamā taita, Síria nalitare, hatyo taita atyo kaxaiyatelikisakeheta — nexa.

<sup>28</sup> Hoka hatyoharenai semaha hoka tyotya xahohisakoatyakalati hanako tyaoniterenai kalore ehareha. <sup>29</sup> Hoka tityoahenahitaha, nolokasekoatyaha Jesus haware wenakalati nonitata. Xaneha ekakoa tyairi wáhaharexe nali xawatyahene maheta hatyo henota waikoa maniya. Hatyo heno atyo wenakalati kaomaka. <sup>30</sup> Xakore hoka jiyehetia halitinai konita hoka xaneheta.

*Hatya Haliti Kakoa Tyaonita Isekohaliti Iniyalahare  
(Marcos 1.21-28)*

<sup>31</sup> Hatyaoseta Jesus xane Cafarnaum xeta, hatya wenakalati Galiléia koa nali. Hoka hatyo nali aotyakijita halitinai sábado xowaka. <sup>32</sup> Hoka hakaharetyoahitaha exaotyakira kakoa, iraeta atyo iyateliti kakoare hoka.

<sup>33</sup> Hoka hatya haliti tyaonita xahohisakoatyakalati hanako hoka isekohaliti iniyalahare tyaonita ekakoa. Hoka kawiyatya: <sup>34</sup> — Kaxiyani! Xoare haoka wihiye, Jesus Nazaré yere? Xoana ali hisoa hamawenekoaretya maheta wiso? Waiye atyo hawaiyekahalahareta nomani: hiso atyo Enore Xaxikalahare Waiyexe — nexa.

<sup>35</sup> Hatyaoseta Jesus irae isekohaliti iniyalahare hiye: — Nikareta hirae hoka hahikoa-hetehena hatyo haliti nonitata! nexa.

Tyotya enahalakoahitaha isekohaliti iniyalahare exoakisa haliti waikoa hoka hikoaheta enonita makawexomokalahareneta.

<sup>36</sup> Hoka tyotyaha hakaharetyoaha hoka irae kakoaha hatyo tahi: — Xoarehare iraiti ala exe? Exe haliti iyateliti kakoare hoka axikaheta isekohaliti iniyalaharenai hoka xanehenahititha! nexaha.

<sup>37</sup> Hoka Jesus tahi exaoretyoa hakákoare hatyokoa nali.

*Jesus Aiyatelikiheta Kahare Halitinai  
(Mateus 8.14-17; Marcos 1.29-34)*

<sup>38</sup> Hoka Jesus hikoaheta xahohisakoatyakalati hanakota hoka xane Simão hana xeta. Hoka Simão nakero hokakita, kalore wátyahiseta, hoka xakaiha hatyoharenai Jesus hiye.

<sup>39</sup> Hatyaoseta xane tityoa exehokotyoakala haliya hoka irae watere hiye. Hoka wátere tyoteheta enonita, hoka tityoaheta rotita hoka enakairaha tyoma.

<sup>40</sup> Hatyaoseta kamai isoahena hoka tyotya kahinaeharexenai hokakiterenai, kahare hawareharexe kahehaliti kakoarenai, kolatyaha Jesus ana. Hoka hakahe ekaokakisa ihiyeha hoka aiyatelikihenahitene.

<sup>41</sup> Hoka tihanarenai kahare halitinai nonitata xanehenahitaha hakawiyalahakakoa: — Hiso atyo Enore Ityani! nexahitaha.

Waiyekahalahareta atyo Jesus enomanaha. Enore Kalorexe Aohenere atyo, hoka hatyo hiyeta watyalyahitene, mairaeniyahitene.

*Jesus Xakaihena Iraiti Waiyexe  
(Marcos 1.35-39)*

<sup>42</sup> Hatyaoseta ferakoa hoka Jesus xaneheta wenakalatita hoka xane maharexakiti. Hoka halitinai tawehenene hoka kaokehenehitene hoka maisa xaneheta enonyahitaha aokareha.

<sup>43</sup> Xakore hoka Jesus nexa: — Noxakaini tehitia atyo haiyanaikoa wenakalati koanai Iraiti Waiyexe Enore koamaniya nawenatyaka tahi. Hiyaiya, hatyo maheta atyo Enore axikatya natyo — nexa.

<sup>44</sup> Hatyo hiyeta xakaita Iraiti xahohisakoatyakalati hanakonai tyotya wenakalatikoanai.

## 5

*Jesus Kawisa Hetatiyeharenai Haxaotyakiraharenai  
(Mateus 4.18-22; Marcos 1.16-20)*

<sup>1</sup> Haxowakiya Jesus tyaonita Galiléia hokoxala kaiholonekoa kilihi, hoka halitinai ehovyasekoaitene semaha maheta Enore niraene. <sup>2</sup> Hoka waiya hinama kanowanai hokoxa xaiya, kaiholokoa haliya. Mairatyatiyenai exoahenahitaha taita enakotaha hoka tihehenahititaha kohase hiyakakala. <sup>3</sup> Hoka Jesus kakoha Simão kanowane aka, hoka Jesus irae ihiye kikiyatene maheta inira kaiholokoa nonitata. Hatyaoseta Jesus tyoka hoka aotyakihena halitinai.

<sup>4</sup> Hatyaoseta halakisa hairaene hoka nexa Simão hiye: — Hiyanehena kanowa kakoa hakiti hokoxa hatekoxa tyaohenere akiti. Hiso, hihinaeharenai xoaha hoka xaxawatya maka xahiyaxatya maheta — nexa.

<sup>5</sup> Hoka Simão nexa: — Xekohaseti, makiya wáhaka wahiyaxatya hoka maisa xoare wahiyita. Xakore hoka maka xawatyaka tyare atyo haokita hoka notyakekoite — nexa.

<sup>6</sup> Hatyaoseta xawatyaha makanai onexaiya hoka hiyaha kahare kohase hoka komitehena makanai irikotyoahitaha. <sup>7</sup> Hatyaoseta kowaisaha hahinaeharenai kanowa halyako tyaoniterenai ana tyoaha kahinaetyahene maheta. Xaneha hoka ekaisetyaha hinama kanowanai kahare kohase kakoa hoka komitaene tabobokooha.

<sup>8</sup> Hatyaoseta Simão Pedro waiya hatyoharenai hoka hakaolise kakoa meholokoa Jesus nahalakoa hoka nexa: — Xekohaseti, hakikisoahetehena nonitita. Hiyaiya, iniyalahare nomasehare atyo natyo! nexa.

<sup>9</sup> Simão, haiyaharenai ehaliya tyaoniterenai tehitiya hakaharetyoaha kahare kohase-nai hiyehenahere kakoa. <sup>10</sup> Zebedeu ityaninai Tiago João tehitiya kalore hakaharetyoaha. Hatyonae atyo Simão hinaenai.

Hatyaoseta Jesus nexa Simão hiye: — Awa atyo himawaiyehare. Kalikinita atyoite halitinai híyasehare hisaohena — nexa ihiye.

<sup>11</sup> Hoka nolokehehenahitaha kanowanai kaiholokoa nali hoka tyotya halaki akayaha hoka xaneha Jesus xema.

*Jesus Awaiyehiheta Jijikoahitere  
(Mateus 8.1-4; Marcos 1.40-45)*

<sup>12</sup> Haxowaka Jesus tyaonita hatya wenakalatikoa hoka hatyo nali hatya haliti jijikoare kahehare iraharetita. Hoka waiya Jesus hoka halaisoa exoa waikoa enahalakoa, ekaokakisa hatiho waikoa, hoka axene:

— Xekohaseti, hawaiyehihetaiya natyo haokowi hoka hawaiyehihetaiya natyo — nexa.

<sup>13</sup> Hoka Jesus hakahe ekaokakisa ihiye hoka nexa: — Há, naokaite. Hawaiyehiheta atyo — nexa.

Hatyaosehena hoka jijikoare kahehare maiyareheta.

<sup>14</sup> Hoka Jesus exakere aotyakisene: — Awaira atyo exeharenai hatya hiye hiyakai-hena, xakore hoka hiyane hiraehena sacerdote hiye hoka waiyahareheta hiso. Hatyo najikinitaite hiyane hafetatyka kirakahare Moisés aotyakihenere akereta. Hoka tyotya waiyoreha hikinaterehenere kakoa — nexa Jesus ihiye.

<sup>15</sup> Xakore hoka Jesus tahi kahare exaoretyoa hakákoare, hoka kahare halitinai tyoahi-taha semaha maheta iniraene, exahe kaxaiyatelikisakehenahitaha maheta ekáhehareha nonitata. <sup>16</sup> Xakore hoka Jesus xaneta maharexakahare nali hoka iraexaita.

*Jesus Aetonalikiheta Maetonanehare  
(Mateus 9.1-8; Marcos 2.1-12)*

<sup>17</sup> Haxowaka Jesus aotyakijita hoka haiyaharenai fariseunai, exahe haiyaharenai Xaotyakiyaho kakoa waiyoreterenai xoaha tyokahitaha ehaliya. Tyoaha atyo tyotya wenakalatikoaanai tyaoniterenai Galiléia nalita, Judéia nalita, Jerusalém nalitare

harenai tehitia. Hoka Xekohaseti niyatere tyaonita Jesus kakoa aiyatelikheta mahaeta hokakiterenai. <sup>18</sup> Hoka haiyaharenai halitinai kolatyaha hatya maetonanehare etolisoare haxetolisoakala hoka kasani isoaha hatyako hoka mokahene aokowiyahitaha Jesus nahalakoa. <sup>19</sup> Xakore hoka kahare halitinai hiyeta maisa aliyakere isoahitaha maetonanehare kakoa. Hatyaoseta kolatyahene hatiri heno. Hoka hati taose aitoakisaha hoka hatyoahota exoakisahene exetolisoakala kakoita halitinai nali tyaoniterenai nenekesene hoka mokahene Jesus nahalakoa.

<sup>20</sup> Hoka Jesus waiya ityakekoneha hoka nexa maetonanehare hiye: — Nohinaehare, iniyalahare hománenai atyo kaxemaisatyakeheta — nexa.

<sup>21</sup> Hoka Xaotyakiyaho kakoa waiyoreterenai, fariseunai xoaha hatyo tahi iraekakoa-henaha: — Xala exe haliti hoka exakere maisa aiminisare Enore? Mahaiya atyo xalahare iniyalahare emaisahitita. Enore taita atyo hatyo iyateliti kakoare — nexaha.

<sup>22</sup> Xakore hoka Jesus otita exahekolaha hoka nexa ihiyeha: — Xoanere hoka nikare xahekoita? <sup>23</sup> Xoarehare ala haxerore niraetyaka: “Iniyalahare hománenai atyo kaxemaisatyakeheta”, nerekatihenaite, xoana, “Hatityoahetehena hoka hatohetehena”, nerekathena koríte? nexa. <sup>24</sup> — Nahotikisaite xomana. Natyo Haliti Ityani iyateliti kakoare atyo notyaonita ali waikohekua nemaisaheta maheta iniyalahare — nexa.

Hatyaoseta nexa maetonanehare hiye: — Hatityoahetehena, hiyehetehena hiyetolisoakala hoka hiyanahetehena hihana xeta — nexa.

<sup>25</sup> Hatyaoseta hatyo haliti tityoaheta tyotyaha enahalakoaha, iyeheta haxetolisoakala hoka xaneheta hahana xeta, ihalahare Enore kakoa.

<sup>26</sup> Tyotyaha hakaharetyoaha. Exahe hoka kalore hamairaneha kakoita ihalahareha Enore kakoa hoka nexaha: — Kaxiyani! Waiyexe kalikini xowaka wiyaiya! nexaha.

### *Jesus Kawisa Levi*

(Mateus 9.9-13; Marcos 2.13-17)

<sup>27</sup> Hatyo najikinita Jesus xanehitiya hoka waiya hatya kalorexe noloxa resebetyase-hare, Levi nexarexe, owene tyokita olo resebetyakalaose. Hoka Jesus nexa ihiye: — Hisohena noximi — nexa.

<sup>28</sup> Levi tityoa, halaki akatya tyotyaha hoka xane exema. <sup>29</sup> Hatyaoseta Levi tyoma kalorexe hisehaliti Jesus ana hahanako. Hoka nali kahare kalorexe noloxa resebetyase-harenai tyaonahitaha, exahe haiyaharenai iniyalahare nomaseharenai hoka tyokahitaha ehaliyaha hoka kanakairahitaha.

<sup>30</sup> Fariseunai, Xaotyakiyaho kakoa waiyoreterenai xoaha enekonitareha hoka ehareha Jesus xaotyakiraharenai hiye hoka axahene: — Xoana hoka xikanakairita xiserita kalorexe noloxa resebetyaseharenai, haiyaharenai iniyalahare nomaseharenai xoaha kakoa? nexaha.

<sup>31</sup> Hoka Jesus nexa ihiyeha: — Mahokakenaharenai atyo maisa wairatyare aokare haomana, hoka hokakiterenai atyo wairatyare aokita haomana. <sup>32</sup> Notyoa atyo naotyakisa maheta iniyalahare nomaseharenai waiye maniya tyaohenahitaha maheta, maisa atyo waiyexeharexenai naotyakisa maheta xini — nexa.

### *Jesus Irae Manakairiti Enore Hiyeta Tahi*

(Mateus 9.14-17; Marcos 2.18-22)

<sup>33</sup> Haiyaharenai nexaha Jesus hiye: — João Batista xema tyaoniterenai manakairahitaha kahaliki, exahe iraexatyahitaha. Exahe fariseunai xema maniya tyaoniterenai tehitia nikareta tyaonahitaha. Hoka hiyaotyakiraharenai atyo kanakairahitaha, terahitaha xoaha — nexaha.

<sup>34</sup> Hoka Jesus nexa ihiyeha: — Xoana xiyahekola hiye kakaexakatyakehenerenai wenakakoati hisehare ana manakairatyakahare tyaonita kaiyanityohenere ehaliyaha tyaonitata hoka? <sup>35</sup> Hoka haxowakaite kaiyanityohenere kaiyakeheta enekonitaha, hoka hatyo xowaka atyoite manakairenaha — nexa.

<sup>36</sup> Jesus tehitia xakai exe xaimenekore: — Maisa atyo xala hare aikotyare ini taose imiti waitarete hiyeta hoka tinolaharetyare imiti xololo. Nikareya tyoma hoka

aiyalaharetyaiya imiti waitarete, exahe hatyo waitare taoseya maisa waiye kaotyakeneta hatyo imiti xololo kakoa.

<sup>37</sup> — Maisa atyo vinho waitarexa kaxomokakere toahiyere militirise nomaka ako. Nikareya kaxomokaka hoka halalakoaiya militirise hoka vinhoxaiya iratyoa tyotya, exaheya militirise hoka mawenekoare. <sup>38</sup> Hatyo hiyeta vinho waitarexa militirise waitare ako taita kaxomokakita.

<sup>39</sup> — Exahe maisa atyo xalahare aokare vinhoa waitarexa terehenahere vinhoa toahiyerexa najikinita. Hiyaiya, nexa atyo: “Vinhoa toahiyerexa atyo waiye”, nexa.

## 6

*Jesus Atyo Sábado Xekohasehare*

(Mateus 12.1-8; Marcos 2.23-28)

<sup>1</sup> Sábado xowaka Jesus jiuhene trigo xafityaka koni. Hoka exaotyakiraharenai taikaxawatyaha hoka matyatyasetyahene hoka kanakairahitaha trigosenai. <sup>2</sup> Hatyaoseta haiyaharenai fariseunai axahene: — Xoana hoka xisomita Wiyaotyakisakaho sábado xowaka maomakene aokiterekare? nexaha.

<sup>3</sup> Hoka Jesus nexa: — Xoana maisa xasemare Davi tyomehenerehare, hatyo ihinaenai xoaha nakehenahere xowakere? <sup>4</sup> Isoa atyo Enore hanako, iya nakairati Enore ana kafetatyakehenerenai hoka kanakairene, exahe isa tehitia hahinaenai ana. Wiyaotyakisakaho hiyeta maisaiya atyo hatya kanakairita hatyo nakairatinai hiyeta. Sacerdotenai taitaiya atyo — nexa.

<sup>5</sup> Hoka Jesus halakihena hairaene hoka nexa: — Haliti Ityani atyo sábado ferakene xekohase — nexa.

*Jesus Awaiyekaheheta Nira Kahexe*

(Mateus 12.9-14; Marcos 3.1-6)

<sup>6</sup> Hoka hatyotare sábado xowaka Jesus isoa xahohisakoatyakalati hanako hoka aotyakihena. Hoka nali tyaponita hatya haliti fihini maniya nira kahexe. <sup>7</sup> Hoka haiyanai Xaotyakiyaho kakoa waiyoreterenai, haiyaharenai fariseunai xoaha waiye Jesus ana wahakotyahitaha, waiyaha maheta exaiyatelikirehta sábado xowaka. Kasani irae-haretyahene hoka emaxaiminirene Xaotyakiyaho aokaha maheta. <sup>8</sup> Xakore hoka Jesus otita exahekolaha hoka hatyo hiyeta nexa haliti nira kahexe hiye: — Hainakoahena hoka hatityoa ita nekese — nexa. Nexa hoka haliti ainakoa hoka tityoa.

<sup>9</sup> Hatyaoseta Jesus nexa: — Naxehenaite xiso: xoare nexa Wiyaotyakisakaho sábado xaokaka? Xoare hare kaomakere exe ferakene: waiyexe, xoana iniyalahare kore? Haliti hokakita hoka kaxaiyatelikisakehena, xoana kahalakisaka korite hoka wainihena? nexa.

<sup>10</sup> Hatyaoseta Jesus wahakotya tyotya hahoko haliya tyaponiterenai ana hoka nexa mawaiyekahehare hiye: — Haimahena hikahe — nexa.

Hoka hatyo haliti aimatya hakahe, hoka waiyehiheta ekahe.

<sup>11</sup> Hatyaoseta Xaotyakiyaho kakoa waiyoreterenai, fariseunai xoaha ehareha hoka iraekakoahenaha xoalini hare háomaneha Jesus kakoa tahi.

*Jesus Aoka Haomana 12-hare Haxaotyakiraharenai Maheta*

(Mateus 10.1-4; Marcos 3.13-19)

<sup>12</sup> Hoka hatyo xowaka Jesus kakoha tyairi heno iraexatya maheta hoka hatyo xatini heko iraexatya Enore hiye. <sup>13</sup> Ferakoa hoka kawisa haxaotyakiraharenai hoka 12-harenai enekonitareha aoka haomana. Hoka iraiti kakoarenai kaixaretyahene hoka 12-harenai atyo exenai: <sup>14</sup> Simão, hatyo atyo Pedro nexarexe kaexareheta, exahe iximarene André. Tiago, João, Filipe exahe Bartolomeu. <sup>15</sup> Mateus, Tomé, Alfeu ityani Tiago, exahe Simão Zelote nexarexe. <sup>16</sup> Tiago ityani Judas, Judas Iscariotes eko xoaha. Judas atyo matawat�atiye tyoahena.

*Jesus Aotyakijita, Aiyatelihihitita Xoaha*

(Mateus 4.23-25)

<sup>17</sup> Hatyaoseta Jesus exoaheta tyairi henota ekakoaha hoka amematyoa kahare haxaotyakiraharenai kakoa hakakoehekoare. Hoka kahare halitinai nali tyaonahitaha. Judeía koa nalitarenai, Jerusalém nalitarenai, wenakalatikoanai Tiro, Sidom xoaha, one kaloxere haliya tyaonitere nalitarenai harenai. <sup>18</sup> Tyoaha semaha maheta Jesus niraene, exahe kaxaiyatelikisakehenahitaha maheta ekahehareha nonitata. Haiyanai isekohaliti iniyalahare hasakaharetiterenai tehtiya tyaoha hoka waiye maniya kaxomokakehenahitaha.

<sup>19</sup> Tyotyaha kasani ekaokakisa hakahe ihiye aokowiyahitaha. Ihiyeta iyateliti hikoita hoka aiyatelihihita tyotyaha halitinai hoka.

#### *Ihalahaliti, Xamaikohaliti Xoaha*

(Mateus 5.1-12)

<sup>20</sup> Hatyaoseta Jesus wahakotya haxaotyakiraharenai ana hoka nexa: — Waiye kaiserehare atyo xiso maoloxaharenai. Hiyaiya, Enore Nawenakala atyo xomanere.

<sup>21</sup> — Waiye kaiserehare atyo xiso kalikini nakitereharenai. Hiyaiya, xikanakairahare ite xisaona.

— Waiye kaiserehare atyo xiso kalikini tiyitereharenai. Hiyaiya, xikoexehetaite.

<sup>22</sup> — Waiye kaiserehare atyo xisaonita xikairawaiyakehena, xikaxaxikaharetyakehena, iniyalahare xikaxomokakehena, exahe xiso atyo maisa xawayyexe xikaxaokakehena, xisaonitere Haliti Ityani xema maniya hiyeta hoka. <sup>23</sup> Maika xihalaharehena, ximaxalohena, nikare xikaxomokakehena hoka. Hiyaiya, kalorexe xibakatyakala atyo ityakaisakahare tyaonita xomana enokoa nali. Hiyaiya, enahetakomaniyereharenai atyo hatyo akereta mokaha iraiti xakaisaseharenai.

<sup>24</sup> — Xakore hoka kirakoane ite xisaohena, xiso kalikini kaoloxere tyaoniterenai. Hiyaiya, koxaka atyo waiye xisaona!

<sup>25</sup> — Kirakoane ite xisaona, xiso kalikini tyotyaha xaokitreharenai kakoare xisaonitereharenai. Hiyaiya, xinakehenaite!

— Kirakoane ite xisaona, xiso kalikini koexitereharenai. Hiyaiya, xitiyahenaite!

<sup>26</sup> — Kirakoane ite xisaona, tyotyaha aexakeretyaha xiso hoka. Hiyaiya, enahetakomaniyereharenai tehtiya atyo aexakeretyaha iraiti xakaisaseharenai metalaharenai — nexa.

#### *Ahalakoahalitinai Xawaiyetyaka Tahi*

(Mateus 5.38-48; 7.12; Lucas 23.34; Atos 7.60; Romanos 12.17-21)

<sup>27</sup> — Xakore hoka nomita atyo xiso xasemiterenai niraini hiye: Xawaiyehena xahalakoaharenai, exahe waiye xamohena kirawanetereharenai xiso. <sup>28</sup> Xaohena waiyexe iraeharetiterenai xiso ana, exahe xiraexahena iniyalahare mokiterenai xiso ana. <sup>29</sup> Maika hatya mokohena hiso hitanakoli hiye hoka hehaika enomana hamaniya mokotya tehtiya maheta. Maika hatya kolahena himanase hoka maika kotare kolatya ekatyahexete tehtiya. <sup>30</sup> Hatyatere ana hisehena, xoalinihare axehena hiso hoka. Exahe maika hatya kolahena hixiyehare hoka awa atyo haxehetene. <sup>31</sup> Maika haiyanai waiye xamoka kasani haiyanae moka xiso xaokitere akereta — nexa.

<sup>32</sup> — Hoka xawaiyetitaiya etakehare awaiyetitereharenai xiso taita hoka xoanere hoka xatyahita xoalinihare waiyexe xekaka xomana xahita? Halitinai iniyalahare nomaseharenai kakoita atyo awaiyetita etakehare haxawaiyetyaseharenai. <sup>33</sup> Exahe waiyeya xamokita etakehare waiye mokitreharenai xiso taita hoka xoanere hoka xatyahita xoalinihare waiyexe xekaka xomana xahita? Halitinai iniyalahare nomaseharenai kakoita atyo nikare tyaonahitaha. <sup>34</sup> Exahe xijitaiya etakehare bakahititreharenai xiso ana taita hoka xoanere hoka xatyahita xoalinihare waiyexe xekaka xomana xahita? Halitinai iniyalahare nomaseharenai kakoita atyo haiyaharenai iniyalahare nomaseharenai ana isahitaha, isehenahitaha enomanaha maheta isehenereharenta.

<sup>35</sup> — Maika xawaiyehena xahalakoaharenai, waiye xamohenahene. Xisehena hoka awa atyo xatyahita xisehenereharenta xekakeheta xomana xahita. Nikare ite hoka kaxekakaite waiyexe xomana, exahe Enore Kalorexe ityaninaite xisaona. Nikare xisaona. Hiyaiya,

hatyo tehitiya atyo waiyexeharexe waiyexenai ana, exahe xalijiniharexenai ana xoaha.  
<sup>36</sup> Maika xawaiyexehare xisaona, Xexe nawaiyexehare akereta — nexa.

### *Iraehekoatyati Tahi*

(Mateus 7.1-5; Romanos 2.1-3)

<sup>37</sup> — Awa atyo haiyaharenai xiraeharetya hoka maisaita xikairaeaharetyakita. Awa atyo haiyaharenai xairawaiyakisa, hoka maisaita xikairawaiyakita. Maika ximaotyaneheta haiyanai xomokala xiso iniyalahare hoka kamaotyanetyakehetaite iniyalahare xománe.

<sup>38</sup> Xisehena haiyanai ana hoka Enore ite isa tehitiya xomana. Nikare ite hoka kaxékaka xomana kalore, kalore kaiserehare. Xikolala hekorexe ite isa xomana. Hoka xisehenere haiyanai ana hákakoanetaite Enore iseheta xomana — nexa.

<sup>39</sup> Hatyaoseta Jesus xakai exe xaimenekorenai: — Mahaiya hatya maxosehare aliyakere otokahijita hatya maxosehare. Nikareya tyona hoka hatyo hinamanaiya exoaha tolokoako. <sup>40</sup> Maiha atyo hatya kaxaotyakisakiterehare haxaotyakisase xahehare xini. Xakore hoka kaxaotyakisakitereya atyo miyahena haxaotyakisaka hoka haxaotyakisase hákakoanehare atyoite tyona — nexa.

<sup>41</sup> — Xoana hoka hawahakoita holoxoti hihinaehare xosako tyanonitete ana hoka maisa atyo hiyaiyare atya taose hiyosako tyanonitete? <sup>42</sup> Hoka aliyakereya hehena hihinaehare hiye: “Nohinaehare, haiya hoka niyeheta holoxoti hiyosakota haoka”, hehena, hisota maisa hiyaiyare atya taose hiyosako tyanonitete hoka? Maoseratyalie! Hiyehetehena hotohare atya taose hiyosako tyanonitete hoka hatyaosetaite waiye hiyaiyakaheta hoka hiyeheta holoxoti hihinaehare xosako tyanonitete — nexa.

### *Atyakate, Iríni Xoaha Tahi*

(Mateus 7.15-20; 12.33-35)

<sup>43</sup> — Atya kate waiyexe atyo maisa ewaxirali kaliye, exahe atya kate ewaxirahare atyo maisa waiyeri kaliye. <sup>44</sup> Hiyaiya, tyotya atyanai atyo irinai hiyeta waiyekelakaharetaha. Mahaiya atyo aliyakere kaximexakita halohalose katohilihinai hiyeta, exahe uva hoka katohere kateta kaximexakita. <sup>45</sup> Nikare haliti waiyexeharexe iyita waiyexe haxomokala waiyexenai akota, hatyo atyo emahiyasakotare. Hoka haliti mawaiyexeharexe atyo iyita iniyalahare haxomokala iniyalaharenai akota. Hiyaiya, ekanase atyo iraeta emahiyasako kaise tyanonitrehareta — nexa.

### *Hinamakase Hati Hokolikase Tahi*

(Mateus 7.24-27)

<sup>46</sup> — Xoana hoka, “Xekohaseti, Xekohaseti”, xita noxaokaki hoka maisa niraetere xihije akereta xisaonare? <sup>47</sup> Nahotikisaita xomana, xoare hare kakoa xamani ala hakáko, etakehare nokoamaniye tyanonitrehare, semiterehare noxaotyakiri hoka tyakekoterenehare. <sup>48</sup> Hatyohare atyo motya etakehare hatya haliti tyoma hati hoka seka hateko hoka ehokoli niyahare sehalì heno ajika. Hoka one kahekoaxa tyona hoka one xane kaoka hatyo hati hiye, xakore hoka maisa exoita, waiye nomakere hoka. <sup>49</sup> Xakore hoka xala xamani atyo sema niraeni hoka maisa tyakekorene hoka motya atyo etakehare mairiharenehare tyomehenerehare hati waikohekoa, mahokoli kasehare akereta. One tyoa hatyo hati ana hoka exoakisene rotita hoka mawenekoaretene — nexa.

### *Jesus Aiyatelikheta Roma Yere Wakanehare*

(Mateus 8.5-13)

<sup>1</sup> Hatyaoseta Jesus halakisa hatyoharenai haxakaini halitinai hiye hoka xane wenakalati Cafarnaum xeta. <sup>2</sup> Hoka hatyo nali hatya sorarenai xekohasehare tyanonita. Kawakaneharexe hoka awaiyetita hawakanehare hoka ewakanehare hokakita, komitehena wainita. <sup>3</sup> Hatyaoseta sorarenai xekohasehare sema Jesus tahi hoka axikatyajudeunai nityohalitiranai axahene hoka tyoa aiyatelikheta maheta ewakanehare.

<sup>4</sup> Hoka xane ahalakoatyaha maheta Jesus hoka tihityoaha ihiye hoka nexaha: — Aliterexe atyo hatyo haliti hihiyeta waiye kahinaetyaka. <sup>5</sup> Hiyaiya, awaiyetita atyo wihinaeharenai, exahe xahohisakoatyakalati hana kakoita tyoma womana — nexaha.

<sup>6</sup> Hatyaoseta Jesus xane exemaha. Xakore hoka hati haliyehena hoka sorarenai xekohasehare axikatya haiyaharenai hahinaeharenai nexaha maheta Jesus hiye: — Xekohaseti, maisa nahakakisa naokowita hiso. Maisa atyo noxoare waikatehare hoka maisaiya hijoita nohanyako. <sup>7</sup> Maisa tehitiya noxoare waikatehare hoka maisaiya natyonaira niraeta hiháre hiyeta. Hiraehena taita, hoka nowakanihare ite waiyeheta. <sup>8</sup> Natyo tehitiya atyo haiyanai xekohasetinai katyahakoharella notyaonita hoka wakatyahitaha natyo. Exahe nosorarexina atyo nowakani xema tyaonahitaha. Niraihena hatya hiye: “Hiyane”, nomihena ihiye hoka xaneta. Hatya hiye, “Hisohena”, nomihena hoka tyoita. Nowakanihare hiye, “Hisoma nikare”, nomihena hoka tyomita — nexa sorare xekohasehare Jesus hiye.

<sup>9</sup> Jesus kalore hakaharetyoa sema hatyoharenai hoka ehaikoahareheta hoka nexa kahare halitinai xaneterenai exema hiye: — Aliterexe nomita xihye: maisa xoana xowaka exakere kalore tyakekotyati nowaiyare Israel hotyalinai koni — nexa.

<sup>10</sup> Hatyaoseta sorarenai xekohasehare hinaeharenai haikoahenahitaha hahanaha xeta hoka waiyehenahitaha wakahare niyatereheta.

### *Jesus Ekasekiheta Wainiyanenero Ityani*

<sup>11</sup> Hatyo najikinita, mawahaneta, Jesus xane wenakalati Naim nali. Exaotyakiraharenae, kahare halitinai xoaha xane exema. <sup>12</sup> Hatyaoseta xane kaokehena wenakalati talalahoko jihola haliya hoka naliyerenae xane fehenaha kamati. Hatyo wainihenere atyo hamokoserore wainiyanenero ityani, hoka kahare halitinai wenakalatitarenai xanahitaha exema. <sup>13</sup> Hatyaoseta Xekohaseti waiya inityo, kalore airakoanehalotene hoka nexa: — Awa atyo hitiya — nexa.

<sup>14</sup> Hatyaoseta xane ehaliyase kaiserehare hoka ekaokakisa hakahe kamati nitini hiye. Hoka kolaiterenenai tityoaha. Hatyaoseta Jesus nexa: — Xoimahaliti, niraehena hikakoa: hatityoahetehena! nexa.

<sup>15</sup> Nexa hoka xoimahaliti tyokeheta hoka iraehetehena, hoka Jesus isehetene inityo ana.

<sup>16</sup> Tyotyaha kalore mairaha hoka ihalahareha Enore kakoa hoka nexaha: — Kaxiyani, kalorexe iraiti xakaisahhare kaotyaka winekoni! Enore atyo tyoa iyehitita hahotyaliharenai! nexaha.

<sup>17</sup> Hatyoharenai Jesus tahi kahare exaoretyoa hakakoare wenakalati kalokoarenai exahe ehaliyakoita tyaoniterenai xoaha nali.

### *João Batista Xaxikalahrenai*

(Mateus 11.2-19)

<sup>18</sup> Hatyaoseta João Batista xema tyaoniterenai xakaiha tyotya hatyoharenai haxaotyakisase hiye. Hoka João kawisa hinamahare enekonitareha <sup>19</sup> hoka axikatene axaha maheta Xekohaseti Jesus: “Xoana hiso etake kaokehene, xoana hatya korite watyahahitiya?” nexaha maheta.

<sup>20</sup> Hatyaoseta xaneha Jesus tyaonitere nali hoka nexaha: — João Batista axikatya wiso waxa maheta exakere: Xoana hiso terota etake kaokehene, xoana hatya korite watyahahitiya? nexaha.

<sup>21</sup> Hatyaosehena hoka Jesus aiyatelikheta kahare halitinai hokakiterenai, isekohaliti iniyalahare kaxaihakoretiterenai, exahe kahare maxoseharenai tehitiya. <sup>22</sup> Hatyo najikinita Jesus nexa João xema tyaoniterenai hiye: — Xiyaneheta hoka xiayaihena João hiye exe xiayaiheneharenai, exahe xasemeheneharenai atyo: maxoseharenai atyo waiyakahititaha, maetonaneharenai atyo tohenahititaha, jijikoahiti tawaneharenai waiyehihititaha, matanakoakoharenai atyo semakahititaha, kamatinai atyo kasehitita, Iraiti Waiyexe atyo kaxakaisakita maoloxaharenai hiye. <sup>23</sup> Waiye kaiserehare atyo tyakekoterenai natyo hoka maisa amaikoharexe nokakoi — nexa.

<sup>24</sup> Hatyaoseta João xema tyaoniterenai xaneheta hoka Jesus iraehena halitinai kakoa João tahi: — Xiyanehenere maharexakahare xahalakoahenere João xowaka, xoare hare xatyahita xiayiaye maheta? Xoana kána kase hoholati hoholaitere? <sup>25</sup> Xoare hare xiayane xiayiaye? Xoana hatya haliti waiye nimere? Xasemehena, waiye nimerenai, exahe waiye tyaoniterenai atyo hati wahaharexenai ako tyaonita. <sup>26</sup> Xiyakaihena terota, xoare xatyahita xiayiaye maheta? Xoana hatya iraiti xakaisasehare? Aliterexe atyo nomita xihye: xiayiye henere atyo iraiti xakaisasehare xahehare. <sup>27</sup> Hiyaiya, exakere xairatyoare tyaonita, Iraiti Waiyexe nanekoa João tahi:  
Hasemehena, naxikatyaite haliti haheta maniya niraini kakoare hoka memere moka ahoti haheta maniya.

<sup>28</sup> Hoka Jesus nehitia: — Nomita atyo xihye: João atyo tyotya halitinai xahehare. Xakore hoka xala xamani atyo ekatyahakoharella tyaonita enokoa nali hoka hatyo atyo João xahehare tyaona.

<sup>29</sup> Kalorexe noloxa resebetyaseharenai exahe tyotya halitinai xoaha semaha hatyoharenai. Hatyonai atyo etake tyakekohenerenai Enore niraine aliterexe hoka João batixahenerenai. <sup>30</sup> Xakore hoka fariseunai, Xaotyakiyo kakoa waiyoreterenai xoaha atyo maisa habatixatyaka aokahitaha João hiyeta, nikare hoka maxaokalaha atyo Enore ahekohenere etahiha.

<sup>31</sup> — Hatyo hiyeta xoare kakoite naimenekohena kalikiniyerenai haliti? nehitia Jesus. — Xoarehare kakoala exehare halitinai hakakoa? <sup>32</sup> Motya atyo xoimanai wetekokoa tyokiterenai. Háhotyali kawiyaita háhotyali ana:

“emahalikijita atyo wenakakoati anere xerati, xakore hoka maisa xaholikoare!  
Wiyerita atyo xafityati anere xerati, xakore hoka maisa xitiyare!”  
nitere akereta. <sup>33</sup> João Batista atyo manakairita, maeraneta vinhoxa hoka xita: “Tihanare atyo tyaonita ekakoa!” xita. <sup>34</sup> Hoka Haliti Ityani atyo kanakairehena, terehena hoka xita: “Xiyaiyehena, exe haliti atyo kanakairatetoita, teratetoita. Etake kalorexe noloxa resebetyaseharenai exahe iniyalahare nomaseharenai xoaha hinaehare!” xita atyo.  
<sup>35</sup> Xakore atyoite hoka ekakoitaite Enore nawaiyorene katyakekotyakehena — nexa.

### *Jesus Xane Fariseu, Simão Nexarexe Hanako*

<sup>36</sup> Hatyaoseta hatya fariseu noloka Jesus kanakaira maheta. Hoka Jesus xane isoa ehanako hoka tyoka kanakaira maheta. <sup>37</sup> Hatyo wenakalati nali tyaonita hatya ohiro iniyalahare nomasehalo. Hoka sema Jesus nakaira fariseu hanako. Hatyaoseta iya halise kanoteset airaxero kakoare <sup>38</sup> hoka Jesus hiniri maniya amematyoa, ehaliyaseta, tiyita hoka aolowitzita ikijinai haosexo xatali kakoa. Hatyaoseta tirehetene hasekase kakoita. Hoka sohikijita Jesus kijinai, exahe owikita airaxero ikijinai heno.

<sup>39</sup> Hoka fariseu waiya hatyoharenai hoka exakere ahekotya: — Aliterexeya atyo exe haliti iraiti xakaisasehare hoka waiyekehalakitaiya atyo enomana exe ohiro otoiterene, exahe enawenane iniyalahare maniya xoaha — nexa.

<sup>40</sup> Hatyaoseta Jesus nexa fariseu hiye: — Simão, hatahi noxakai hihiye naokowita — nexa.

— Hiraehena, Xaotyakisatiye — nexa Simão.

<sup>41</sup> Hoka Jesus nexa: — Hinamahare halitinai kakotanetaha, hatya haliti kakotanetya minitere. Hatya 500-hokose olo prata nomaka, háhare hoka 50-hokose xoaha. <sup>42</sup> Xakore hoka maisaiya háhare hekoti hatyo hinamahare konitare xoare kakoa bakahitita hakotane. Hatyaoseta emaiyareheta hatyo hinamanai kotane. Xala hare kaisere ite masakare awaiyehenene? nexa.

<sup>43</sup> — Noxahekoli hiye hoka kalore masakare kakotaneterene — nexa Simão.

— Ehekore hekoaxatya — nexa Jesus.

<sup>44</sup> Hatyaoseta ehaikoahareheta ohiro ana hoka nexa Simão hiye: — Xoana hiyaiyita exe ohiro? Nisoahenere xowaka maisa hijita one nomani natilha maheta nokiji, xakore hoka tihene atyo haosexo xatali kakoa hoka tirihititene atyo hasekasenai kakoita. <sup>45</sup> Maisa atyo hasohitanakolijita natyo nokaokihenere xowaka, xakore hoka hatyo atyo maisa

halakisare hekoti hasohikijira nokiji nisoaheneritita. <sup>46</sup> Maisa atyo airaxeroxa nosekase niyahare hijita, xakore hoka hatyo atyo owika airaxero nokijinai heno. <sup>47</sup> Aliterexe nomita hihiye: kalore haxawaiyera hiyeta tyomehenere atyo hotikijita koxaka kalore iniyalahare tyomehenere kamaotyanetyakehetehenere. Xakore hoka etakehare inira hiyeta kaxawaiyetyakihitrehare atyo inirita tehitia awaiyehitita — nexa.

<sup>48</sup> Hatyaoseta Jesus nexa ohiro hiye: — Iniyalahare hómanenai atyo kaxemaisatyakeheta — nexa.

<sup>49</sup> Hatyaoseta mexa haliya tyokiterenai axakakoahenaha: — Xala exe hoka iniyalahare kakoita emaisahitita? nexaha.

<sup>50</sup> Xakore hoka Jesus nexa ohiro hiye: — Hityakekone atyo waiye maniya moheta hiso. Hiyanehetehena himehexaikohalone kakoa — nexa.

## 8

### *Ohironai Xanetolonai Jesus Xema*

<sup>1</sup> Hatyo najikinita Jesus xane wenakalatikoanai exahe wenakalatikoasenai xeta, hoka xakaita Iraiti Waiyexe Enore koamaniya nawenatyaka tahi. Hoka 12-harenai exaotyakiraharenai xaneha exema, <sup>2</sup> exahe haiyahalonai ohironai kaxaiyatolokisakehetehenolonai isekohaliti iniyalahare nonitata, ehokakeneha nonitata xoaha. Hatyonai atyo: Maria Madalena nexalolo, hatyo nonitata atyo 7-harenai isekohaliti iniyalaharenai kaxaxanikisakeheta. <sup>3</sup> Joana, Cuza exanityo: exanene atyo kalorexehare tyeonita xekohaseti Herodes wakanehare. Susana, haiyahalonai ohironai kahinaetitolonai Jesus, exahe exaotyakiraharenai xoaha haxiyejhalonaiha kakoita, xoahanai.

### *Xafityatiye Tahi*

(Mateus 13.1-9; Marcos 4.1-9)

<sup>4</sup> Kahare halitinai tyoaha haiyanaikoa wenakalatita waiyaha maheta Jesus. Tyotyaha hohisakoaha hoka xakaihena ihiyeha exe xaimenekore:

<sup>5</sup> — Hatya haliti xane fitya maheta hahananeharese. Hoka fitita hanakatisenai hoka haiyasenai ahoti kilihi exoa, hoka halitinai tyahakene, exahe kotehalasenai hoka kanakairene. <sup>6</sup> Haiyasenai hanakatisenai exoa kaharexe sehalli tyaonitere akitiya. Hikoaha hoka niraha, maisa olowehiti aka hoka. <sup>7</sup> Haiyasenai hoka xane exoa katohereshinai koni, hoka hahotalita kekoareha hananehaliti kakoa hoka katohere jiyahaotyahene. <sup>8</sup> Xakore hoka haiyasenai atyo exoa waikohe waiyexekoa. Hoka hananehalitinai kekoareha, kaxawaha. Hasese hiyeta 100-se kasé.

Hoka Jesus nehitia — Xala xamani atyo katanakoakore semakatya maheta hoka maika semehena niraini — nexa.

### *Jesus Awaiyekehalakaty Xafityatiye Tahi*

(Mateus 13.10-23; Marcos 4.13-20)

<sup>9</sup> Hoka Jesus xaotyakiraharenai axahene, xoare nexa xamani ala aokowita hatyo xaimenekore kakoa hoka.

<sup>10</sup> Hoka Jesus nexa: — Xomana atyo Enore hotikijita metaharexe hakoamaniya nawenatyaka. Hoka haiyanai ana atyo xaimenekotyati maniyata kaxaotyakisakita, wahakotya hoka maisa waiyahitaha maheta, semehenaha hoka maisa waiyekehalakita enomanaha maheta.

<sup>11</sup> — Exe xaimenekore iraitere atyo exakerexe: hanakatise atyo Enore niraene.

<sup>12</sup> Hanakatisenai exoahenerenai ahoti kilihi atyo etakehare semitreharenai iraiti xakore hoka Tihanare kaoka hoka iyehitrehare iraiti emahiyasakota, maisa tyakekoahitaha kaiyakehenahititha maheta. <sup>13</sup> Hanakatisenai exoahenerenai kaharexe sehalli akiti atyo etakehare semitreharenai iraiti hoka aokitreharene haomana haihalaharene kakoita. Xakore hoka maisa atyo kinaterexeha hoka hatyo hiyeta maisa waha xini tyakekoahitaha. Hoka kahasakaharetyakehenaha hoka tyoty halakisahitaha. <sup>14</sup> Hanakatisenai exoahenerenai katohereshinai koni atyo etakehare halitinai semitreharenai iraiti xakore

hoka emawaiyeharene, ixiyehare, ekehalaharene aeroretyoitata hoka jiyahaotita hatyoharenai halitinai. Hatyo hiyeta kasetereharenai maisa xonere hekoti, maisa miyatita hahatene Enore koamaniya. <sup>15</sup> Hoka hanakatisenai exoahenerenai waikohewaiyexeko atyo etakehare halitinai semaxematy hoka tyakajiterekarenai iraiti hamahiyase waiyexe ako, exahe tyakekohatiye hoka kahare tyomaha Enore ana, tyakekohatiha atyo hoka — nexa.

*Xaokanatyakalati Tahi*  
(Marcos 4.21-25)

<sup>16</sup> — Maisa atyo xalahare aotakahena xaokanatyakalati hoka hatyo najikinita mokarene koho exahe xoana kama katyahe xamani. Xakore hoka xaokanatyakalati atyo exomokakalaose terota kaxomokakita, hoka tyotya ijoiterenai waiyaha maheta exaokanala. <sup>17</sup> Hiyaiya, tyotya kaxateroakisakiterenai atyoite kawaiyakehetaite, exahe tyotya metaharetere harenai atyoite kawaiyakeheta, kahotikisakeheta — nexa.

<sup>18</sup> — Hatyo hiyeta maika xirihare exahe xiyaiyehena, aliyakere xamani exeharenai xasemita hoka. Hiyaiya, xala xamani atyoite xoalinhare kakoare hoka kaxekakihitiyaita exahexe enomana. Xakore hoka xala xamani atyoite maisa xoare kakoare hoka haxoaliniya aokitere atyoite kaiyakeheta enonitata — nexa.

*Jesus Nityo, Iximarenenai*  
(Mateus 12.46-50; Marcos 3.31-35)

<sup>19</sup> Hatyaoseta Jesus nityo, iximarenenai xoaha tyoaha tyaonitere nali xakore hoka maisa aliyakere kaokahitaha ehaliya, kahare halitinai hoka.

<sup>20</sup> Hatyo hiyeta hatya xakaini Jesus hiye: — Hityo, hiximarenenai xoaha menanaka tyaonahitaha hoka iraeha hikakoa aokowiyahitaha — nexa.

<sup>21</sup> Xakore hoka Jesus nexa tyotya ihiyeha: — Mama, noximalininai xoaha atyo etakehare semitereharenai exahe tyaonitereharenai Enore niraene xema — nexa.

*Jesus Amemakiheta Kinatyawiniti*  
(Mateus 8.23-27; Marcos 4.35-41)

<sup>22</sup> Haxowaka ferakene Jesus kakoha haxaotyakiraharenai kakoa kanowa ako hoka nexa: — Wiya hokoxa halakoia maniya — nexa. Hatyaoseta xaneha.

<sup>23</sup> Hoka imahotyoahitataha hokoxa hoka Jesus nemaka. Hoka hoholati kinatyaxa hoholahena hokoxa hao, hoka kanowako one kaisehena, kaheneharehena tyotya enomana.

<sup>24</sup> Hatyaoseta exaotyakiraharenai kaokaha Jesus haliya hoka kaosetyahene hoka nexaha: — Xekohaseti, Xekohaseti! Wiwainihenaore! nexaha.

Hoka Jesus kaose hoka tityoaheta hoka irae hoholati, one xoaha hiye hoka mahohoreheta, memaxeheta one, mema akeheta.

<sup>25</sup> Hatyaoseta nexa haxaotyakiraharenai hiye: — Aliyo xityakekone tyaonita? nexa.

Xakore hoka hakaharetyoahitaha, exahe mairahitaha xoaha hoka nexahitaha: — Xoare halitini ala exe hoka one, hoholati xoaha hiye irae hoka aokitere akereta tyaonaha? nexaha.

*Jesus Axikaheta Isekohaliti Iniyalaharenai Haliti Nonitata*  
(Mateus 8.28-34; Marcos 5.1-20)

<sup>26</sup> Hatyaoseta kaokaha Gerasakoa, Galiléia hokoxala halakoia maniya. <sup>27</sup> Hoka Jesus exoahena kanowakota hoka hatya haliti, hatyo wenakalatitare xane ahalakoatene. Hatyo haliti kakoa isekohalitinai iniyalaharenai tyaonita. Wahakiyehena maisa isoare imityako, maisa hatyako hekoti tyaonare, xawatyakalatinai koni atyo tyaonita.

<sup>28</sup> Hatyaoseta waiya Jesus hoka hatyo haliti kawiyatya, exoa hakaoliri kakoa waikoa enahalakoa hoka nexa kinatyaxa: — Jesus, Enore Kalorexe Ityani! Xoare haoka nohiye? Naxita hiso hoka awa atyo iniyalahare hamohena natyo! nexa. <sup>29</sup> Nikare irae, Jesus koxaka irae isekohaliti iniyalahare hiye hikoaheta maheta haliti nonitata hoka.

Kahaliki isekohaliti otokitene. Haxowaka halitinai olatyahene ikijinai, ewaotyalinai xoaha hiye kamatiherahi kakoa, xakore hoka irikotitene, hoka isekohaliti axanikijitene maharexakahare xeta.

<sup>30</sup> Hatyaoseta Jesus axene: — Xoare nexare hiso? nexa.

— Nexare atyo Hisoakere — nexa. Nikare irae kahare isekohalitinai iniyalaharenai tyaonita ekakoa hoka. <sup>31</sup> Hoka isekohalitinai axahitaha Jesus hoka maisa hatyo toloko hatekoakore axikatyahene aokareha.

<sup>32</sup> Exowaka kahare bolokonai nisakoaita hatyo haliyaseta tyairi heno. Hoka isekohalitinai axa Jesus, kasani halakisahene hoka bolokonai milako tyaonaha maheta hoka halakisahene. <sup>33</sup> Hatyaoseta isekohalitinai hikoahetaha haliti nonitata hoka bolokonai milako tyaonaha, hoka exoahenahitaha tyairi henoseta hokoxa xaiya xeta hoka monaha hoka tyotyaha wainiha.

<sup>34</sup> Hatyaoseta boloko kaxaikotyasenae waiyaha hatyoharenai hoka tekoahenahitaha hoka xakaiha etahiha wenakalatikoanai, exahe hatyo wenakalati haliyita tyaoniterenai hiye. <sup>35</sup> Hatyaoseta kahare halitinai xaneha waiyaha maheta nikare tyaohenerehare. Kaokaha Jesus tyaonitere nali hoka waiyaha haliti. Hatyo nonitata atyo isekohalitinai iniyalaharenai xanehitita hoka Jesus kiji haliya tyokita, kaimere, waiye xahekoreheta xoaha. Waiyahene hoka mairaha. <sup>36</sup> Hatyohare waiyehenerehareni xakaihakatyaha hatyo haliti waiye maniya xomokakeheta tahi.

<sup>37</sup> Hatyaoseta tyotya Gerasa nalikoa tyaoniterenai kalore mairaha hoka Jesus hiye iraeha, xaneheta maheta ewaikoheraha koata. Hatyaoseta Jesus kakohaheta kanowako hoka xaneheta.

<sup>38</sup> Hoka hatyo haliti tihanare ehatyahalinikihenere hoka xanehetehenere enonitata awaiyehetehenere tihityoa Jesus hiye: — Haokareya hoka notyoa hiyema, Xekohaseti — nexa.

Xakore hoka Jesus axikahetehenene hoka nexa: <sup>39</sup> — Hiyanehetehena hawenakala xeta hoka hiyakaihena Enore tyomehenerehare homana — nexa.

Hatyaoleta hatyo haliti xane tyotya wenakalatikoanai hoka xakaihakatyaha Jesus tyomehenerehare enomana tahi.

#### *Jesus Aiyatolokiheta Ohiro, Xoimalotu Xoaha*

(Mateus 9.18-26; Marcos 5.21-43)

<sup>40</sup> Hatyaoseta Jesus haikoaheta hokoxa halakoia maniya hoka kahare halitinai haihalaharenha kakoa katyawaxehenahitaha ihiye, tyotyaha atyo nali terota atyahahitene hoka.

<sup>41</sup> Hatyaoseta kaoka hatya haliti Jairo nexarexe, hatyo atyo xahohisakoatyakalati hana kaxaikotyasehare tyaonita hawenakala nali. Hoka meholokoa Jesus kiji haliya hoka axene, xane maheta ehana nali, <sup>42</sup> ityani hamokoserore 12-wanonehenolo wainihena hoka.

Hoka Jesus xanetata hoka kahare halitinai ehotyasekoaitene tyotya maniyata. <sup>43</sup> Hatyaoseta hatya ohiro kaoka halitinai koni. Koxaka 12-terehokoanehena timalati hikoata minita ihiyeta. Koxaka tyotya haxiyehalonai miyatya wairatyarenai hiye, xakore hoka maisa xala hare aiyatolokihititene. <sup>44</sup> Hoka xane Jesus hiniri maniyata hoka ekaokakisa hakahe inima kilihi hiye hoka irikotyoahlohetehena rotita hoka waiyeheta.

<sup>45</sup> Hatyaoseta Jesus axehena: — Xala ekaokakisa hakahe nohiye? nexa.

Nexa hoka tyotya teraharetyoaha.

Hatyaoleta Pedro nexa: — Xaotyakisatiye, tyotya halitinai atyo hihoko haliya tyaonahitaha, ehotyasekoatyahitaha hiso — nexa.

<sup>46</sup> Xakore hoka Jesus nexa: — Hatya ekaokakisa hakahe nohiye. Hiyaiya, nokehix nohiyeti iyateliti hikoane — nexa.

<sup>47</sup> Hatyaoseta ohiro maisa aliyakere teroahetolo hoka tya hatatakoane kakoita hoka meholokoa Jesus kiji haliya. Hoka tyotya enahalakoahitaha xakai Jesus hiye xoare hiyeta ekaokakisa hakahe ihiye, exahe kinatolohetehenolo rotita xoaha tahi.

<sup>48</sup> Hatyaoseta Jesus nexa: — Hikinatoloheta atyo hityakekone hiyeta. Hiyanehetehena himehexaikohalone kakoa — nexa.

<sup>49</sup> Jesus iraetata hoka kaoka hatya wakahare Jairo hanakotare hoka nexa: — Xekohaseti Jairo, hityani koxaka waini. Kotare Xaotyakisatiye matyoanenehare hihana nali, waiya aliya hoka kirahare haetonane hiyeta — nexa.

<sup>50</sup> Jesus sema hatyoharenai hoka nexa Jairo hiye: — Awa atyo himawaiyehare, maika hityakekohena hoka kinatolohetaite — nexa.

<sup>51</sup> Hatyaoseta Jesus kaoka Jairo hana nali hoka Pedro, João, Tiago xoaha taita isoaha exema aoka, xoimahaloti nexe, nityo xoaha taita, maisa hatehitiya isoa aokita.

<sup>52</sup> Tyotyaha nali tiyahitaha, exahe kirakoane tyaanahitaha xoimahaloti hiyeta. Hoka Jesus nexa: — Awa atyo xitiya, xoimahaloti maisa waini xini. Nemakahalota atyo — nexa.

<sup>53</sup> Hatyaoseta tyotyaha koexahalihenahene, waiyekehalakita atyo enomanaha koxaka ekamane hoka.

<sup>54</sup> Xakore hoka Jesus xane isoa, otokene ekahe hiye hoka nexa kinatyaxa: — Xoimahaloti, hatityoahetehena! nexa.

<sup>55</sup> Hoka kasehetehitiya hoka tityoahetehena rotita. Hatyaoseta Jesus nakairati xekaka aoka xoimahaloti ana.

<sup>56</sup> Hoka enexe, inityo hakaharetyoaha, xakore hoka Jesus irae ihiyeha hoka hatyoharenai maxakaisakene hatya hiye aoka.

## 9

### *Jesus Xaotyakiraharenai 12-harenai Hatene Tahi*

*(Mateus 10.5-15; Marcos 6.7-13)*

<sup>1</sup> Jesus kawisa 12-harenai haxaotyakiraharenai hoka isa enomanaha iyáteliti, waiyoliniti xoaha, axanikihenahitaha maheta isekohalitinai iniyalaharenai, exahe aiyatelikihenahitaha maheta hokakiterenai.

<sup>2</sup> Hatyaoseta axikatyahene xakaiha maheta Enore koamaniya nawenatyaka tahi exahe aiyatelikihenahitaha maheta hokakiterenai hoka <sup>3</sup> nehena: — Awaira atyo xoalinhare xakolahena xiyanene niyahare: mahaiya tonohisoakalati hekoti xatonohisoa maheta, mahaiya sako, mahaiya nakairati, mahaiya olo exahe mahaiya hate hekoti kajiyane imitinase xakolaita. <sup>4</sup> Maika xikaokehena hakoa wenakalati hoka maika waiye mohenerenai xiso hanako xisaona hatyo wenakalatita xiyanahitaya kijiya. <sup>5</sup> Xakore hoka maika maisa waiye mokahitaha xiso hoka xijiye hitiya rotitaira hatyo wenakalatita. Hoka maika xijiye hitiya hoka xamokotyahatya xiberekatanenai waikohese xahita, xahotikisa maheta hatyo halitinai ana emawaiye xomokareneha xiso — nexa.

<sup>6</sup> Hoka exaotyakiraharenai xaneha hoka jiyaha tyoty wenakalatikoanai hoka xakaitaha Iraiti Waiyexe, exahe aiyatelikihenahitaha hokakiterenai hakakoare.

### *Herodes Tyakoiyahare Tahi*

*(Mateus 14.1-12; Marcos 6.14-29)*

<sup>7</sup> Herodes, xekohaseti tyaconitere Galiléia nali, sema tyoty hatyoharenai tahi hoka maisa aliyakere ahekotya xaka mokene, haiyaharenai atyo nita hoka:

— João Batista kaseheta! nexahitaha hoka.

<sup>8</sup> Haiyaharenai atyo Elias kaotyakeheta aokahitaha, exahe haiyaharenai atyo hoka motya toahiyerehare iraiti xakaisasehare kaseheta aokahitaha.

<sup>9</sup> Xakore hoka Herodes nexa: — Natyota terota atyo João seri xirikotyaka naoka. Hoka xala halitini tahi niraetyakala exeharenai nasemita? nexa.

Hoka Herodes waiya aokowihena Jesus.

### *Jesus Tyaisa Kahare Halitinai*

*(Mateus 14.13-21; Marcos 6.30-44; João 6.1-14)*

<sup>10</sup> Hoka iniraene kakoarenai kaokehena hitaha hoka Jesus hiye xakaihakatyaha tyoty háomaneha tahi. Hatyoseta nolokahene hoka xaneha hawawaha wenakalati Betsaida nali. <sup>11</sup> Xakore hoka kahare halitinai semaha hatyoharenai tahi hoka xaneha exema.

Hoka Jesus awaiyetyahene hoka kakai ihiyeha Enore koamaniya nawenatyaka tahi, exahe aiyatelikiheta hawairatyaka aokiterenai.

<sup>12</sup> Hatyaoseta waikoa kamaetehena. Hatyo hiyeta 12-harenai exaotyakiraharenai tyoaha hoka nexaha Jesus hiye: — Haxikahetehena exe halitinai hoka xanehenahitaha. Hoka xaneha wenakalatikoanai, wenakalatikoasenai xoaha nali, alita owitene tyaoherere nali, hoka kaokaha nakairati, haemakahaose xoaha. Hiyaiya, ali atyo maisa xoare aka — nexaha.

<sup>13</sup> Xakore hoka Jesus nexa ihiyeha: — Xisehena xisota enomanaha nakairati — nexa.

Hoka nexaha: — Tyotya tyaconiterenai winali atyo 5-tohase nakairati, hinama kohase-nai xoaha taita. Xoana haxikaita wiso wiya maheta nakairati tyotya exe halitinai ana? nexaha.

<sup>14</sup> Nali tyaconita kala xoana xamani hoka 5.000-harenai halitinai. Hoka Jesus irae haxaotyakiraharenai hiye: — Xiraehena halitinai hiye hoka tyokaha 50-harenai xakini haware — nexa.

<sup>15</sup> Hoka exaotyakiraharenai sema iniraene hoka iraeha ihiyeha tyotya tyokaha maheta.

<sup>16</sup> Hatyaoseta Jesus iya 5-tohase nakairati, hinama kohase xoaha hoka wahakotya enokoa xeta hoka iraexatya Enore hiye: — Ehekore nakairati hisa womana, Abá — nexa. Hatyaoseta taikasetya nakairati, kohasenai xoaha hoka isene haxaotyakiraharenai ana irakahene halitinai ana maheta. <sup>17</sup> Tyotyaha kanakairaha hoka fakatehareha, hoka exaotyakiraharenai kaisehenahitaha 12-te koho kamawanehenere holoxo kakoa.

#### *Pedro Iraehena Jesus Kakoa*

(Mateus 16.13-20; Marcos 8.27-30)

<sup>18</sup> Haxowaka Jesus hawawaharenai tyaconita, iraexaita, hoka exaotyakiraharenai kaokaha ehaliya. Hatyaoseta Jesus axahene: — Xala aokita natyo halitinai? nexa.

<sup>19</sup> Hoka nexaha: — Haiyanai atyo João Batista aokahitaha hiso. Haiyaharenai atyo Elias aokahitaha hiso. Haiyaharenai atyo koxakerehare iraiti xakaisasehare kaseheta aokahitaha hiso — nexaha.

<sup>20</sup> — Hoka xiso atyo xala xaokita natyo? nexa Jesus.

— Hiso atyo Enore Kalorexe Aohenere, Enore xaxikalahare waokita hiso — nexa Pedro.

<sup>21</sup> Hatyaoseta Jesus irae ihiyeha hoka hatyoharenai maisa hatya hiye xakaisaka aokita.

#### *Jesus Irae Hakamane, Hakaseneheta Xoaha Tahi*

(Mateus 16.20-28; Marcos 8.30-9.1)

<sup>22</sup> Hoka nehitia: — Haliti Ityani ite kaxemakawatikisakehena kalore. Judeunai nityohalitiranaiha, sacerdotenai xekohasenai, Xaotyakiyo kakoa waiyoreterenai hare-naite maisa aokahitene haomanaha. Kaxaisakaite, hoka hanamaki ferakene najikinitaite kasehetehitiya — nexa.

<sup>23</sup> Hatyaoseta nexa tyotya ihiyeha: — Xala xamani atyo tyona nokoamaniye aokowihena hoka maika hatyota maotyanoawi hoka maika kolatya tyotyaki ferakene haberekotyaka niyahare atyalihose xaimaholatyaka hoka tyona noximi. <sup>24</sup> Hiyaiya, xala xamani atyoite waiyexe maniya moka aokowita hawenane hoka metaite enonita. Xakore hoka xala xamani atyoite kaxaisaka nohiyeti hoka wenati waiyexe atyoite kaoka. <sup>25</sup> Xoare mahetaiya hatya jiyahaotya hakakoare waikohekoarenai, hatyota xamani ametakisoaw-ihena, xoana kamawenekoaretyakehena xamani hoka? <sup>26</sup> Hiyaiya, xala xamani atyoite haihareta natyo exahe noxaotyakiri xoaha hoka Haliti Ityani tehituyaite haihare ekakoa, tyohetehenere hawerokene, Hanexe werokene, anjonai waiyexeharexenai xoaha kakoa xowaka.

<sup>27</sup> — Exeharenaira xotyaxematya: aliterexetya nomita xihiye: haiyaharenai ali tyaconiteraharenai tyaite maisa wainahitaha Enore nalitare Kalorexe hamawaiyanene-hareha nahitita — nexa.

#### *Jesus Ana Moisés, Elias Xoaha Kaotyaka*

(Mateus 17.1-13; Marcos 9.2-13)

<sup>28</sup> Kala xoana xamani hoka hasemanane najikinita, Jesus noloka Pedro, João, Tiago xoaha hoka kakoha tyairi heno iraexatya maheta. <sup>29</sup> Iraexaita ene hoka itiho haware-harexe tyaona, exahe inima hoka iyomate, werokate tyaona. <sup>30</sup> Hatyaosehena hoka hinamahare haliti nali kaotyaka hoka iraehena ekakoa. Hatyonai atyo Moisés, Elias xoaha <sup>31</sup> exahiyatyoareha werokiti enokoatare kakoa. Iraetaha Jesus kakoa ekamane exahe exemakawatikasaka Jerusalém nali Enore aohenere akereta tahi. <sup>32</sup> Pedro, ihinaeharenai xoaha waiye nemakahitaha, xakore hoka kaosehenahitaha hoka waiyaha Jesus, hinamahare halitinai ehaliya tyaoniterenai xoaha werokahalini.

<sup>33</sup> Hoka hatyo halitinai xanehenahitehena Jesus nonitata hoka Pedro nexa: — Xaotyakisatiye, waiye nawenatyaka ali. Nika wisoma hanamalise hatirisenai: halise homanere, halise Moisés anere, halise tehituyaite Elias anere — nexa. Aliterexe Pedro ana maisa waiyekehalkere hekoti iniraeneta enomana.

<sup>34</sup> Iraetata ene hoka kaotyaka kaiminiti hoka exahiyahokotyahene. Hoka hatyo koni tyaonaha hoka mairaha.

<sup>35</sup> Hoka kaiminiti konita tya iraiti hoka nexa: — Exe atyo Nityani, noxiyakawali. Xasemaxematyaira inirainé — nexa.

<sup>36</sup> Hatyaoseta iraiti tyoteheta hoka Jesus waiyehenahitaha hawawita. Hoka exaotyaki-raharenai mema tyaonaha hoka hatyo xowaka maisa xala hare hiye xakaitaha hawaiyaneha tahi.

### *Jesus Mahatyahareneheta Xoimahaliti*

(Mateus 7.14-21; Marcos 9.14-29)

<sup>37</sup> Hatyaoseta kamaetalí exoahenahitaha tyairi henota, hoka kahare halitinai tya ahalakoatya Jesus.

<sup>38</sup> Hatyaoseta hatya haliti tyaonitere halitinai nenesene kawayahena: — Xekohaseti, naxehena hiso nityani hiyeta, hamokoserore nityani hoka! <sup>39</sup> Hatya isekohaliti iniyalahare tyaonita ekakoa, hoka ehárehena rotita xoimahaliti kawijita, exahe atatakoakijitene exahe kakatoloxaholijitene ekanasakota. Hoka isekohaliti kawe mokitene, maisa halakisarene hekoti. <sup>40</sup> Koxaka naxa hiyaoxakiraharenai axanikihenahitaha maheta isekohaliti iniyalahare, xakore hoka maisa xoana mokahitene — nexa.

<sup>41</sup> Hoka Jesus nexa: — Haliti matyakekoneharenai, mawaiyexehareharenai! Otene kijiyaite notyaohena xikakoa? Otene kijiyaite naiyasetyoa xikakoa? nexa.

Hatyaoseta nexa haliti hiye: — Hisohena ali hityani kakoa — nexa.

<sup>42</sup> Hatyaoseta xoimahaliti kaokehena hoka kafahare hoka isekohaliti iniyalahare exoakisene waikoa. Hatyaoseta Jesus watyali isekohaliti hoka awaiyeheta xoimahaliti hoka isehetene enexe ana. <sup>43</sup> Hoka tyotyaha hakaharetyoaha Enore niyatere nerore kakoa.

### *Jesus Iraehitiya Hakamane Tahi*

(Mateus 17.22-23; Marcos 9.30-32)

Tyotyaha hakaharetyoahitataha ene Jesus tyomiterehare kakoa hoka nexa haxaotyakiraharenai hiye: <sup>44</sup> — Awaira atyo ximaotyanehena niraehenerehare xihiye tahi: Haliti Ityani tyaite kaxekakehena halitinai ana hoka aisahene ite — nexa.

<sup>45</sup> Xakore hoka maisa waiyekehalkita enomanaha hatyoharenai. Hatyo iraehenerehare tahi akiki metahare tyaona enomanaha hoka maisa waiyekehalkita terota enomanaha maheta. Hoka mairahitaha haxaxaneha hatyoharenai tahi.

### *Xala Xamani Masakare Kalorexe Hoka*

(Mateus 18.1-5; Marcos 9.33-37; Filipenses 2.3-5; 1 Pedro 3.4; 5.5)

<sup>46</sup> Hatyaoseta exaotyakiraharenai iraekakoahenaha: xalahare kaisere xamani ala enekonitareha masakare kalorexe hoka. <sup>47</sup> Hoka Jesus ana waiyekehalkita exahekolaha. Hatyaoseta iya hatya xoima hoka mokene hahaliya <sup>48</sup> hoka nexa: — Xala xamaniya atyo nohiyeti hatya xoima waiye mokita hoka waiye atyo mokita natyo. Hoka xala xamani atyo waiye mokita natyo hoka waiye atyo mokita noxaxikatyasehare. Hiayiya, xala

xamani atyoite maisa haiyanae xahehare tyaona aokowita xinekoni hoka hatyo atyoite haiyaharenae xahehare — nexa.

*Hatya Maisa Ahowitzikisare Xiso Hoka Kahinaetita Xiso  
(Marcos 9.38-40)*

<sup>49</sup> Hoka João nexa: — Xaotyakisatiye, wiyaiya hatya haliti axanikihitita isekohalitinaí hexare kakoa, xakore hoka wamahokoanetya nikare enómane, maisa winekonitare xini hoka — nexa.

<sup>50</sup> Hatyaoseta Jesus nexa João, haiyaharenai haxaotyakiraharenai xoaha hiye: — Awa atyo xamahokoanetya. Hiyaiya, xala xamani atyo maisa ahowitzikisare xiso hoka kahinaetita atyo xiso — nexa.

*Samaria Yerenai Maisa Jesus Kaokene Awaiyetyahitaha*

<sup>51</sup> Hoka hikoahena Jesus xanene aosehena enokoa xeta hoka xane Jerusalém xeta aokowi. <sup>52</sup> Hoka haiyaharenai axikatyaheta maniya. Hoka xaneha hoka kaokaha hatya wenakalatikoase Samaria koa nali, kaokaha hakiti hoka nemakaha maheta. <sup>53</sup> Xakore hoka nali tyanoniterenai maisa Jesus kaokene awaiyetyahitaha, semaha exanenehena Jerusalém xeta hoka.

<sup>54</sup> Hoka exaotyakiraharenai Tiago, João xoaha semaha hatyoharenai hoka nexaha: — Xoana waxa irikati enokoatire hoka exe halitinai mehotya haokita? nexaha.

<sup>55</sup> Xakore hoka Jesus ehaikoahareheta hoka watyaliyahene. <sup>56</sup> — Maisa Haliti Ityani tyoa mehotya maheta xini halitinai. Tyoa iyehenahitene iniyalahare nonitata maheta — nexa. Hatyaoseta xanehenahitinya hakoa wenakalatikoase xeta.

*Haiyaharenai Jesus Xema Xaneha Aokowiha  
(Mateus 8.18-22)*

<sup>57</sup> Hoka Jesus, exaotyakiraharenai xoaha xanahitaha ahotoyaho hoka hatya haliti nexa Jesus hiye: — Notyoaite hiyema, alio xamani hiyanehena hoka — nexa.

<sup>58</sup> Hatyaoseta Jesus nexa: — Wakarenai atyo kahanere waikoako, kotehalanai atyo kaihexe. Xakore hoka Haliti Ityani atyo maisa xoare ako kawiniye — nexa.

<sup>59</sup> Hatyaoseta hahare hiye nexa: — Hisohena noximi — nexa.

Xakore hoka nexa: — Xekohaseti, nahaikoaheta hoka baba waini hoka nafetene hotohare hoka hatyaosetaite notyoa hiyema — nexa.

<sup>60</sup> — Hahalakisene hoka kotare kamatinai fityaha hakamane hatyanai — nexa Jesus. — Xakore hoka hiso hiyane hiyakaihena Enore koamaniya nawenatyaka tahi — nexa.

<sup>61</sup> Hähare nexa: — Notyoaite hiyema, xakore hoka nahaikoaheta hoka nojinaheta hotohare nohinaeharenai — nexa.

<sup>62</sup> Hoka Jesus nexa: — Xala xamaniya atyo aijohehena waikohe hoka maisaiya hajikini maniya wahakoita. Nikarexe xala xamaniya Enore xema maniya tyaona aokowi hoka maisaiya hawenane toahiyere xema tyaohitita — nexa.

## 10

*70-harenai Hatene Tahi*

<sup>1</sup> Hatyo najikinita Xekohaseti aoka haiyaharenai exema xaneterenai konitare 70-harenai hoka axikatyahene hinamahare xakini, xaneha maheta enaheta maniya wenakalatinai exahe xaneheneraosenai nali nihatuya.

<sup>2</sup> Axikahenaherene nahitita, nexa: — Kahare ximexati niyahare, xakore hoka hatenitienai atyo maisa kaharexe. Hatyo hiyeta xaxehena hanakatihaliti xekohasehare hoka axikatyaheta maniya. <sup>3</sup> Xiyanehena! Naxikaita atyo xiso ahoxanai koni kalaneronai xanetera akereta. <sup>4</sup> Awaira atyo xakolahena xibonane, xoloxa nitini, exahe xiberekatane. Exahe awa atyo xatityoahena ahotoyaho hoka xikatyawaxehena hatya hiye.

<sup>5</sup> Maika xisoahena hali hatyako hoka xexa hotohare: “Kasani mehexaikohaliti tyaona exe hatyako waoka”, xexaire. <sup>6</sup> Maika hatya haliti mehexaikoharexe nali tyaonita hoka xahalakisira xityawaxa ekakoa. Xakore hoka maika haliti mamehexaikoharenehare hoka xityawaxa xemaisaheta enonita. <sup>7</sup> Maika hatyoli hatyakota xisaona hoka

xikanakairehena, xiserehena, xoarenai xamani isehenaha xomana hoka. Hiyaiya, hatenitiye atyoite kabakatyaka ehatene nahalakoa. Awa atyo halyakota xiyanira halyako xeta menehena — nexa.

<sup>8</sup> — Maika xikaokehena hakoa wenakalati hoka waiye mokaha xiso hoka maika xikanakaira isehenerehareha xomana. <sup>9</sup> Xaiyatelikhetaira hokakiterenai hatyo wenakalatikoarenai hoka xexaira halitinai naliyerenai hiye: “Enore koamaniya nawenatyaka tahi akiti atyo kaoka xomana”, xexaira. <sup>10</sup> Xakore hoka maika xikaokehena hakoa wenakalati hoka maisa waiye mokahitaha xiso hoka xiyanira ahotoyahonai hoka xexa: <sup>11</sup> “Waikohese kakoita alalatyohahenere wikijinai hiye exe wenakalatita wamokotyahaheta xiayahita! Xakore hoka xotyaxematyaira exehare: Enore koamaniya nawenatyaka tahi akiti atyo kaoka xomana”, xexaira.

<sup>12</sup> Hoka Jesus nehitia: — Xaxalisati Ferakene ite Enore ite airakoaneharetya Sodoma hatyo wenakalati nonitata — nexa.

*Wenakalatikoanai Matyakekoneharenai  
(Mateus 11.20-24)*

<sup>13</sup> Hoka Jesus nehitia: — Kirakoane ite hisaohena, wenakalati Corazim! Kirakoane ite hisaohena, wenakalati Betsaida! Hiyaiya, waiyexenai mawaiyakaharenai kaomakehenere hatyo hinaliyeya atyo kaomakere wenakalatikoanai Tiro, Sidom xoaha nali hoka hatyo naliyerenaiya atyo halakihenahitaha háomaneha iniyalahare. Exahe hotikisahaiya atyo aokowiha iniyalahare hahalakiraha hoka tyokahaiya atyo tataolate nimere, hoka mokahaiya irikati niyehe haseriha heno. <sup>14</sup> Xaxalisati Ferakene ite Enore ite airakoaneharetya Tiro, Sidom xoahanai xiso, Corazim, Betsaida xoahanai nonitata! <sup>15</sup> Exahe hiso, wenakalati Cafarnaum, xoana hiyahekola hiye hoka motyaité hakakoha enokoa nali haokita? Hasemehena, hikaxawatyaka atyoite kamatinai tyaconitere nali.

<sup>16</sup> Hatyaoseta nexa haxaotyakiraharenai hiye: — Xala xamaniya atyo sema xiraene hoka semita atyo niraeni. Hoka xala xamaniya atyo maisa awaiyetyare xiso hoka natyo atyo maisa awaiyetyare. Hoka xala xamani atyo maisa awaiyetyare natyo hoka maisa atyo awaiyetyare noxaxikatyasehare — nexa.

*70-harenai Kaokeneheta Tahi*

<sup>17</sup> Hoka 70-harenai kaokehena hitaha kalore haihalahareneha kakoa hoka nexaha Jesus hiye: — Tihanarenai kakoita semaxematyira wiraene, hexare kakoa wiraehena hikoahenahitaha maheta halitinai nonitata hoka! nexaha.

<sup>18</sup> Hoka Jesus nexa: — Aliterexe. Hiyaiya, nowaiya Ahalakoahaliti xexoaneheta enokoata, motya kahihye. <sup>19</sup> Xasemehena: nisá atyo xomana iyateliti xatyahaka maheta owinai xakolokoanai harenai, exahe xijiyaotya maheta xahalakoaharenai niyatere hoka maisa ininai hekoti iniyalahare xikaxomokakita maheta. <sup>20</sup> Xakore hoka awa atyo xihalahare tihanarenai semehenahere xiraene kakoa taita. Xakore hoka maika xexarenai enokoa nali kaxairatyakehenere kakoa kaisere xihalaharehena — nexa.

*Jesus Kalore Ihalahare  
(Mateus 11.25-27; 13.16-17)*

<sup>21</sup> Hatyaosehena hoka Isekohaliti Waiyexe niyatere hiyeta Jesus kalore ihalahare hoka nexa: — Abá, hiso atyo enokoa, waikoa xoaha Xekohasehare. Nihalahare hikakoa, hawaiyekahakenere hitahi akiti xoimanai exahe mawaiyoreharenai ana hiyeta. Hoka waiyorexe, semarexe tyahenerenai ana atyo metahare hamoka hitahi akiti. Aliterexe, Abá, hatyoharenai atyo kaomaka hiyaokala exahe haokitire akereta — nexa.

<sup>22</sup> — Baba atyo halakisa nomani tyotya xoalini hare. Maisa atyo xala hare waiyorexe Ityani kakoa. Enexe taita atyo waiyoreta ekakoa. Exahe maisa atyo xala hare waiyorexe Enexe kakoa. Ityani taita atyo waiyoreta ekakoa, exahe haiyaharenai ana awaiyekahakenetene hoka hatyonai tehitia atyo waiyoreta ekakoa — nexa.

<sup>23</sup> Hatyaoseta Jesus ehakoahareheta haxaotyakiraharenai ana hoka nexa ihiyeha, hawawahareha heko: — Waiye kaiserehare atyo waiyitereharenai exehare xiayiytere-harenai! <sup>24</sup> Natyo atyo nomita: kahare iraiti xakaisaseharenai, kalorexenai xoaha

waiyaha aokowiha exehare xiayiyiterehare, xakore hoka maisa waiyahitene. Exahe semaha ene aokowiha exe xasemiterehare xakore hoka maisa semahitene hekoti — nexa.

*Samaria Yere Waiyexe Tyomehenere Tahi*

(Mateus 22.34-40; Marcos 12.28-34)

<sup>25</sup> Hatya Xaotyakiyaho kakoa waiyoretere tityoa, hoka kasani hasakaharetya Jesus aokowita hoka axene:

— Xaotyakisatiye, xoareya notyoma hoka kaxekaka nomani wenati matyotenehare? nexa.

<sup>26</sup> Hoka Jesus nexa: — Xoare nexa atyo Iraiti Waiyexe kaxairatyakehenere hatyoharenai tahi? Hoka aliyakerexe hatyo akiti hasemita? nexa.

<sup>27</sup> Hoka hatyo haliti nexa: — Hawaiyehena kaiserehare Hiyekohase Enore, hisaonehena exema maniya takita, hahekohena ekoamaniya takita, haiyateretyoahena hawenane kakoa exema maniya. Exahe hawaiyehena haiyanae hawaiyetyoawitere akereta — nexa.

<sup>28</sup> — Hekoaxahenere atyo ehekorexeta — nexa Jesus. — Nikare hisaonehena hoka hisaona mene — nexa.

<sup>29</sup> Xakore hoka Xaotyakiye kakoa waiyoretere kasani waiyexehare aokowita hoka axene: — Hoka xala atyo haiyanae haokitire? nexa.

<sup>30</sup> Hoka Jesus nexa: — Hatya haliti xanehitita Jerusalém nalita Jericó xeta. Hoka ahotoyaho haiyaharenai kaiwarexe otokene, aitoakisaha inima, mokotyahene hoka komita ene aisahene hoka halakisahene. <sup>31</sup> Hoka hatya sacerdote xanehitiya hatyoahota. Hoka waiya hatyo haliti hoka exahiyatene hoka jiya. <sup>32</sup> Hatya levita tehitiya hatyo nali jiya. Wahakota enomana hoka exahiyatene tehitiya hoka jiyehtiya. <sup>33</sup> Hoka hatya Samaria yere jiyehtena hatyo ahotoyaho hoka hikoa hatyo nali. Hoka waiya hatyo haliti hoka airakoaneharetene. <sup>34</sup> Kaoka ehaliya hoka wairatene kolotenitiya, vinhoa harenai kakoa ekawe xomokakaose. Hatyo najikinita moka hatyo haliti hakirakaharexa kaiserehare heno hoka kolatene hatya nemakatyakalati xeta hoka nali kaxaikone.

<sup>35</sup> — Kamaetali xanehetehena hoka isa hinama hokose olo nemakatyakalati xekohashare ana hoka nehena: “Maika hikaxaiko exe haliti. Nahaikoahetaite hoka nojiyehetehena ali hoka nabakaheta hiso, xoare xamani exe xahexe holoxa kakoa hiya enomana hoka” — nexa.

<sup>36</sup> Hatyaoseta Jesus axa Xaotyakiyaho kakoa waiyoretere: — Hiyahekola hiye hoka hatyo hanamaharenai konitare, xala hare hatyo haliti kamokohekoatyakehenere hinaehare tyona? nexa.

<sup>37</sup> — Etake kahinaehenerene — nexa Xaotyakiye kakoa waiyoretere.

— Hoka hiyanehena hoka nikareta hisomehena — nexa Jesus.

*Jesus Xane Waiya Marta, Maria Xoaha*

<sup>38</sup> Hatyaoseta Jesus, exaotyakiraharenai xoaha xanehenahitinya hoka kaokaha hakoa wenakalatikoase. Hatyo nali hatya ohiro Marta nexalolo hahanako nolokene. <sup>39</sup> Hoka iximalone, Maria nexalolo, tyoka Xekohaseti haliyaseta hoka semaxemaita exaotyakira.

<sup>40</sup> Hoka Marta kahatenehalo tyaoonita tyotya hatyakore hatenitinai kakoa. Hatyaoseta xane Jesus haliya hoka nexa: — Xoana maisa xoare hahekotyare hoka exe noximaloni halakijita natyo tyotya exe hatenitinai kakoa? Haxikahenene hoka tyoa kahinaetya natyo — nexa.

<sup>41</sup> Hatyaoseta Xekohaseti nexa: — Marta, Marta, hikahateneta, himawaiyehalota xoaha kahare xoalini hare kakoa. <sup>42</sup> Xakore hoka haterore atyo ehekorexeta. Maria atyo aoka waiyexe, hoka hatyo atyoite maisa xala hare iyehitita enonitata — nexa.

<sup>1</sup> Haxowakiya Jesus iraexaita hakiti. Hoka halakisa hairaexala hoka hatya exaotyakirahare axene: — Xekohaseti, haotyakihena wiso iraexatyati kakoa, João aotyakihenere haxaotyakiraharenai akereta — nexa.

<sup>2</sup> Hoka Jesus nexa: — Exakere xiraexatyat:

Wexe Enore, Hiso enokoa tyaonitere, kasani tyotyaha aiminisaha Hiso waokita. Hisohena ali Xekohaseti hisaona maheta.

<sup>3</sup> Kasani nakairati hisa womana tyotyaki ferakene waokita.

<sup>4</sup> Himaotyanehetehena iniyalahare wisomitereharenai, haiyaharenai iniyalahare mohenera wiso wimaotyanehititire akereta. Hoka awa atyo hahalakihena wiso hoka wikahasakaharetyakehena, xexa — nexa.

<sup>5</sup> Hatyaoseta Jesus nexa haxaotyakiraharenai hiye: — Xasemehena, hatyaiya xinekonitare xane hatya hahinaehare hana nali wahaxati hoka nexaiya: “Nohinaehare, xama hisa nomani hanamalise nakairati. <sup>6</sup> Hatya nohinaehare kalikini kaoka nomani haetonane hekota, hoka maisaiya xoare kakoa natyajitene”, nexaiya.

<sup>7</sup> — Hoka xiyahekola hiye tyaite hoka xihinaehare ekoaxahena enomana hahanakota: “Awa atyo hamawaiyenemakatya natyo! Jihore atyo koxaka jihotoare, hoka natyo, nityaninai xoaha koxaka wehokotyoita. Maisaiya nainakoita hoka nijita homana nakairati”, nexaiya.

<sup>8</sup> — Natyo atyo nomita xihiy: maisaiya ainakoita ihinaehare. Xakore hoka ainakoite ekaoserene hiyeta hoka isaite hahinaehare ana tyoty aokitereharenai. <sup>9</sup> Hatyo hiyeta nomita: xaxehena hoka xikaoxekaka. Xataweniya hoka xikaokene. Xamokotyaiyi hati jihola hiye hoka majiholateniya xomana. <sup>10</sup> Hiyaiya, tyoty axitereharenai ana atyo kaxekakita. Exahe tawiterenai atyo kaokitene. Exahe jihore atyo majiholatyoita mokotitereharenai ana.

<sup>11</sup> — Xoana, hatya xinekonitare ityaniya axehena hanexe kohase hoka isaiya owi enomana? <sup>12</sup> Xoana, axehena xamaniya eseti hoka isaiya xakolokoa enomana? <sup>13</sup> Xisonai atyo maisa xakore xawaiyexe hoka xawaiyore atyo xijita xoaliniharenai waiyexenai xityaninai ana. Hoka exahexe atyoite Wexe enokoa tyaonitere isehena Isekohaliti Waiyexe xalanai xamani axehenene hoka! nexa.

#### *Jesus Atyo Tihanare Kahinaetita Aokaha*

(Mateus 12.22-30; Marcos 3.20-30)

<sup>14</sup> Jesus axanikihitita hatya haliti nonitata isekohaliti iniyalahare mairainititerene. Hoka isekohaliti hikoaheta hoka haliti iraexeheta.

Hoka halitinai hakaharetyoaha <sup>15</sup> xakore hoka haiyaharenai nexaha: — Belzebu, isekohalitinai xekohasehare atyo ijita iyateliti exe haliti ana axanikiheta maheta isekohalitinai — nexaha.

<sup>16</sup> Haiyaharenai kasani hasakaharetyahene aokowiyahitaha hoka axahitene tyoma maheta xoalini hare hotikisa maheta haiyatere Enore nalitare.

<sup>17</sup> Xakore hoka Jesus waiyoreta exahekola kakoa hoka nexa: — Hakoa waikohekua tyaoniterenaiya kirawanekakoaha hoka maisaiya kinatere tyaonehenahititaha, exaoretyakakoahaiya. Nikareya halyako tyaoniterenai kirawanekakoaha hoka xaorehaiya. <sup>18</sup> Hoka Ahalakoahaliti hotyalinaiya kahotyaliye hoka hatyokakoaha kirawane kokoahitaha hoka aliyakereya kinatere tyaohenahitityaha? Hiyaiya, xisonai atyo Belzebu ijita iyateliti nomani naxikaheta maheta isekohalitinai xaokita. <sup>19</sup> Belzebu isa haiyatere nomani hoka hatyo kakoa naxanikihitita tihanarenai xaokita. Nikareya hoka xala isa iyateliti xiyaotyakiraharenai ana hoka axanikihitita tihanarenai halitinai nonitata? Nikarexaokita hoka maisaiya tyakekota xiso xiyaotyakiraharenai.

<sup>20</sup> — Aliterexe atyo Enore niyatere hiyeta naxanikihitita isekohalitinai hoka hatyoharenai atyo hotikijita Enore koamaniya nawenatyaka koxaka kaokehenehrehare xomana — nexa.

<sup>21</sup> — Hoka hatya haliti kinaterexe exahe kaxaisakarere atyo kaxaikohenahahanita hoka tyoty ixiyeharenai atyo katalatyakere tyaonita. <sup>22</sup> Xakore hoka hatya haliti

exahere niyatereya jiya enomana hoka jiyahotene hoka kolatyaiya exaisakalanai, hatyo hatya tyakekotere hoka, irakaiya hahinaeharenai ana tyota kolahenere enonitata — nexa.

<sup>23</sup> — Xala xamani atyo maisa kahinaetyare natyo hoka kahalakoahareta atyo nokakoi. Exahe xala xamani atyo maisa ahohisakoatyare nohakakoani hoka exaoretita atyo — nexa.

*Isekohaliti Iniyalahare Haikoahititerehare Tahi  
(Mateus 12.43-45)*

<sup>24</sup> Hoka Jesus nehitia: — Xasemehena, isekohaliti iniyalahare hikoahetehena haliti milakota hoka xane tonakoaita maonexakoahare akiti, tawita hakawininaose. Hoka maisaiya atyo kaokita hakiti hoka nita atyo: “Nahaikoahetaite nohani xeta notyohenere nali xeta”, nita. <sup>25</sup> Hatyaoseta haikoaheta hoka kaokehittita hati ihisakotyakahare, waiye xomokakotyakere ana. <sup>26</sup> Hatyaoseta haikoaheta hoka xane nolokita hahotyali 7-harenai isekohalitinai exahere niyalaharenai, hoka tyotyaha xane tyaonahitaha nali. Hatyo hiyeta hatyohare haliti nawenane hetatiharene xahehare howitiharene tyaonita — nexa.

*Waiyexe Kaiserehare Tahi*

<sup>27</sup> Hatyoharenai Jesus iraehenere najikinita hatya ohiro tyaonitolo halitinai neneke-sene kawayatya enomana: — Waiye kaiserehare atyo ohiro awenakihenolo exahe akokihenolo hiso! nexa.

<sup>28</sup> Kakore hoka Jesus nexa: — Exahere nawaiye atyo etakeharenai semitereharenai Enore niraene hoka tyakekotereneharenai — nexa.

*Maomakahare Nomaka Xaxaka Tahi  
(Mateus 12.38-42; Mateus 16.1-4; Marcos 8.11-13)*

<sup>29</sup> Hatyaoseta kahare halitinai hohisakoaha Jesus haliya hoka iraehena hoka exakere nexa: — Kaxiyani, kalikiniyerenai maisa waiyexe! Axahitaha xoalini hare nomaka tyakekoha maheta, xoana aliterexe xamani Enore nalitare niyátere tyoita hoka. Kakore hoka maisaiya hatya hekoti kahotikisakita enomanaha, hoka Jonas tahi akereta taitaite.

<sup>30</sup> Hiyaiya, iraiti xakaisasehare Jonas tahi tyare atyo aimenekoita wenakalati Nínive nali tyaoniterenai ana hoka Haliti Ityani tehitia atyoite aimenekohena kalikiniyerenai ana. <sup>31</sup> Xaxalisati ferakenite xekohasetiro Sabá yolo ite tityoa hoka iraeharehena xiso. Hiyaiya, sekota atyo tya sema maheta Salomão nawaiyore xaotyakiranai. Hoka natyo atyo nomita: kalikini ali tyaonitere atyo Salomão xahehare. <sup>32</sup> Xaxalisati ferakenite Nínive nali tyaoniterenai tityoaha hoka iraeharehena xiso. Hiyaiya, halakisaha atyo iniyalahare háomaneha, semaha Jonas niraene hoka. Hoka natyo atyo nomita: kalikini ali tyaonitere atyo Jonas xahehare — nexa.

*Xaokanatyakalati Haríti Hiyexe  
(Mateus 5.13-16; 6.22-23; Marcos 9.50)*

<sup>33</sup> Hoka Jesus nehitia: — Maisa atyo xalahare aotakahena hatya xaokanatyakalati hoka mokarene metaharexe akiti, exahe xoana koho katyahe xamani. Kakore hoka mokita atyo xaokanatyakalati exomokakalaose terota, hoka hatya isoahena hoka waiye waiyexenai hoka tyotyota hiháre atyo xaokanatyakalati kakoare tyaonita. Kakore hoka hiyosenaiya maisa waiyexenai xini hoka tyotyota hiháre atyoite makaliroti koni tyaonita.

<sup>34</sup> Xosetinai atyo xaokanatyakalati akereta wiháre ana. Hoka hiyosenaiya waiyexenai hoka tyotyota hiháre atyo xaokanatyakalati kakoare tyaonita hoka maisa atyo hakiti hekoti makaliroti koni tyaonare, hoka werokaite tyaona, motyaita exaokanatyakahare ene hatya xaokanatyakalati kakoa — nexa.

*Jesus Irae Fariseunai, Xaotyakiye Kakoarenai Kakoa  
(Mateus 23.1-36; Marcos 12.38-40)*

<sup>37</sup> Hatyaoseta Jesus halakisa hairaene hoka hatya fariseu nolokene kanakaira maheta emanako. Hoka Jesus xane isoa hoka tyoka mexa haliya. <sup>38</sup> Hoka fariseu hakaharetyoa waiya Jesus matihahisoaneharene hanakaira nahitita hoka.

<sup>39</sup> Hatyaoseta Xekohaseti Jesus nexa: — Xiso fariseunai atyo xatihita kobo, balatoahe xoaha henekoa maniya, hoka xityako atyo tyaonita xiyalijiniharene, exahe ximawaiyenawenanene taita. <sup>40</sup> Maotikonexenai! Xala xamani atyo tyomita henekoa maniya hoka maisa enakoako maniya tyomitereta xini? <sup>41</sup> Hatyo hiyeta xisehena maoloxaharenai ana tyaonitereharenai xikobonenai, xibalatoahenekoarenai. Nikare ite hoka tyotyait iyomeheta xomana — nexa.

<sup>42</sup> — Kirakoane ite xiso fariseunai xikaxomokaka! Hiyaiya, xijita atyo Enore ana holini hortelā, arruda, tyotya atya hana kanakoairoarenae xoaha hiyeta. Xakore hoka xahalakijita atyo Enore nawaiyexehare exahe xawaiyera. Nikare ene atyo hatyoharenai xisomehena exeharenai ximahalakirahareneta — nexa.

<sup>43</sup> — Kirakoane ite xiso fariseunai xikaxomokaka! Hiyaiya, xawaiyetita kaiserehare atyo kaxaiminisakitereharenai aosenai xahohisakoatyakalati hanakonai, exahe kakatyawaxatyakiterehare xihije xaiminisati kakoa halitinai wetekonekoanai — nexa.

<sup>44</sup> — Kirakoane ite xisaona! Hiyaiya, motya atyo xawatyakalatinai mawaiyahahrenai akereta atyo xisaonita, xawatyakalatinai halitinai tyahakitere hamawaiyanenahitaha akereta atyo — nexa.

<sup>45</sup> Hatyaoseta hatya Xaotyakiyaho kakoa waiyoretere nexa Jesus hiye: — Xaotyakisiatiye, nikare hiraeta hoka hexamaikohalinikijita tehitia wiso — nexa.

<sup>46</sup> Hoka Jesus nexa: — Kirakoane tehitiaite xikaxomokaka, xiso Xaotyakiyaho kakoa waiyoreterenai! Hiyaiya, xamokita atyo kolare timenere haiyanai hiniri, hoka komitaene maisa kolatyarahene. Xakore hoka xisonai maisa xikahihikase kakoa hekoti xakahinaetya xakolatyare hatyo kolarenai.

<sup>47</sup> — Kirakoane ite xisaona! Hiyaiya, xisomita xawatyakalatinai waiyehare iraiti xakaisasehareni ana, xahetakomaniyereharenai aisehenerenai anita. <sup>48</sup> Hoka hatyo hiyeta xahotikijita atyo xiyafihira xahetakomaniyereharenai tyomehenerehare. Hiyaiya, aisaha atyo iraiti xakaisasehareni, hoka xiso atyo xisomihitita exawatyakalanaiha.

<sup>49</sup> — Hatyo hiyeta Enore hawaiyore hiyeta nexa: “Naxikatyaita enomanaha iraiti xakaisasehareni, exahe iraiti kakoarenai. Hoka aisahaite haiyaharenai, kahalakoaharehaite haiyaharenai kakoa”, nexa. <sup>50</sup> Hatyohare hiyetaite kalikiniyerenaite iniyalahare kaxomokakaha tyotya iraiti xakaisasehareni xakaisakehenereharenai hiyeta, hetati kaomakehenere waikohекоа xowakiyata, <sup>51</sup> hetati Abel kaxaisakehenereta Zacarias kaxaisakehenere kijiya. Hatyo atyo xakaisaka jihatyalat, Waiyexe Aose xoaha nenekesene. Aliterexe atyo nomita: kalikiniyerenaite iniyalahare kaxomokakaha tyotya hatyoharenai xaisati hiyeta — nexa.

<sup>52</sup> — Kirakoane ite xiso Xaotyakiyaho kakoa waiyoreterenai xikaxomokaka! Hiyaiya, xatyakijita atyo waiyoliti hana jihola jafini. Nikare hoka maisa xisonai hekoti xisoare, exahe maisa haiyaharenai hekoti xahalakisa hoka isoareha — nexa. (“Xatyakijita atyo waiyoliti hana jihola jafini”, nitere atyo: fariseunae mahokoanititere haiyaharenae semaxemala Iraiti Waiyexe xaokaka nikareta.)

<sup>53</sup> Hatyaoseta Jesus hikoaheta nalita hoka Xaotyakiyaho kakoa waiyoreterenai, fariseunai xoaha iraeharehenene haxehareneha kakoa, exahe axahenene kahare xoalini hare.

<sup>54</sup> Kasani Jesus irae xoalinhare ehaikoare hoka komaniyatyoa aokahitaha hoka.

## 12

### *Maoseratyati Tahi*

(Mateus 10.26-27)

<sup>1</sup> Kahare halitinai hohisakoaha hoka tyahakehetyakakoahitaha. Hatyaoseta Jesus nexa haxaotyakiraharenai hiye hotohare: — Xiriharira fariseunai kaorehityakala kakoa.

Emaoseralaha xaokaka niraeta. <sup>2</sup> Tyotya kaxaihonolisakiterehare atyoite maxaihonolisakeheta, exahe kaxateroakisakiterehare atyoite maxateroakisakeheta. <sup>3</sup> Nikare ite hoka tyotya xiraetereharenai makaliroti koni ite kasemakeheta ferakoa xowaka. Exahe tyotya xiraetereharenai ximeteneta hati jihotyoarako atyoite kaxakaisakeheta hatirinai henota — nexa.

### *Xala Atyoite Wimairehena*

(Mateus 10.28-31)

<sup>4</sup> Jesus nehitiya: — Natyo atyo nomita xihiyen: awa atyo ximaira etakehare ajitereharenai xiháre taita, hoka hatyo najikinita maisa xoare hare tyomihititerehare. <sup>5</sup> Noxakaite xihiyen xala xamaniya atyo ximairehena: maika ximairehena Enore. Hiyaiya, aisehenere najikinitaiya atyo iyateliti kakoare hoka xawatyaiya atyo haliti irikati koni. Aliterexe niraehitiya: maika ximaira Enore! nexa.

<sup>6</sup> — Xoana maisa kabetetyakere 5-lise kotehalasenai haiyahokosenai olo hokosenai xaimanexe? Xakore hoka Enore atyo maisa maotyanexe halisenai hekoti enekonitareha.

<sup>7</sup> Xisekasenai kakoita atyo tyotya ixihatayakahare. Awa atyo ximaira. Hiyaiya, xawenane atyo kaharexe kotehalasenai xahexe! nexa.

### *Aokowiterehare, Maxaokowiniterehare Cristo Anere*

(Mateus 10.32-33; 12.32; 2 Timóteo 1.8)

<sup>8</sup> Jesus nehitiya: — Natyo atyo nomita xihiyen: hatyaiya atyo irae halitinai haotita hoka nomaniye aokowi, hoka Haliti Ityani tehitityaite irae Enore anerenai anjonai nahalakoa hoka hatyo haliti atyoite haomanere aoka. <sup>9</sup> Xakore hoka xala xamani atyoite halitinai haotita maisa nomaniye xini aokowi, hoka Haliti Ityani tehititya atyoite Enore anerenai anjonai nahalakoa maisa haomanere xini aokene — nexa.

<sup>10</sup> — Xala xamaniya atyo irae iniyalahare Haliti Ityani tahi hoka kamaotyanetyakeheta atyoite. Xakore hoka xala xamaniya atyo irae iniyalahare Isekohaliti Waiyexe tahi hoka maisaiya atyo kamaotyanetyakehitita — nexa.

<sup>11</sup> — Maika kolahlenaha xiso semaha maheta xitahi xahohisakoatyakalati hanakonai, exahe xoana kalorexenai, waiyorexenai xoaha nahalakoa xamani hoka, awa atyo ximawaiyehare, exahe xahekotya xiyeoxala, xiraene xoaha kakoa. <sup>12</sup> Hiyaiya, hatyo xowaka atyoite Isekohaliti Waiyexe aotyakihena xiso xiraehenerehare kakoa — nexa.

### *Kaoloxere Maxahekolahare Tahi*

<sup>13</sup> Hoka hatya haliti tyaonitere halitinai nenekesene nexa Jesus hiye: — Xaotyakisatiye, hiraehena axexe hiye hoka waiye wirakakhoa xiyehaliti wexe halakihenerehare — nexa.

<sup>14</sup> — Xoana, natyoiyatya hoka? Maisa atyo xala hare wakaita natyo niraka maheta xiyehaliti halitinae ana — nexa.

<sup>15</sup> Hoka nehitiya tyotya ihiyeha: — Waiyira xasemehena: maika xirihare tyotya xoalinihare kaxaokakitereharenai kakoa. Hiyaiya, hatya nawenane aliterexe atyo maisa xiyehare hiyeta xini tyaoonita, exahiya kahare hoka — nexa.

<sup>16</sup> Hatyaoseta Jesus nexa xakai exe xaimenekotyati: — Hatya haliti kaoloxere tyaoonita hoka emasenekoarenai exaferanai ihatihena kalore. <sup>17</sup> Hatyaoseta ahekohena: “Maisaiya atyo xoarako natyakaijita tyotya exe inihatihenerenai. Xoare ite notyomehena? <sup>18</sup> Kala exakere ite notyoma: nexoakihetaite noximexaninai nitininai hoka notyomeheta exaheharerinai. Hoka hatyoako ite namoka tyotya noximexaninai hahotalita tyotya haiyanai noxiyeharenai kakoita. <sup>19</sup> Hatyaosetaite nomihena nomanita: ‘Haliti ihalaharexe! Tyotya waiyexe haokitereharenai kakoare atyo hiso waha terehokoane niyahare. Kalikini hikawinihena, hikanakairehena, hiserehena, hihalaharehena!’ nomite”, nexa.

<sup>20</sup> — Xakore hoka Enore nexa ihiyeha: “Maotikoniti! Exe xatinite hiwainihena, hoka xalaite tyaoherena tyotya exe hamohenereharenai kakoa?” nexa.

<sup>21</sup> Hoka Jesus kamiyanetene: — Hatyo akereta atyo tyaoonita etakeharenai ahohisakoiterekarenai haxiyeharenai haomanahitaha, xakore hoka maisa atyo kaxiye-harexeha Enore nahalakoa — nexa.

*Enore Tyekekotyaka Tahi  
(Mateus 6.25-34)*

<sup>22</sup> Hatyaoseta Jesus nexa haxaotyakiraharenai hiye: — Hatyo hiyeta nomita xihiye: awa atyo ximawaiyehare nakairati xaokitereharenai xawenane niyahare kakoa, exahe imiti xaokitereharenai xiyisoane niyahare kakoa. <sup>23</sup> Hiyaiya, wenati atyo nakairati xahexe, exahe wiháre atyo imitinai xahexe. <sup>24</sup> Xiyaiyehenaore kololokarenai: maisa fityareha, maisa imexareha, maisa awaiyetolisareha hanakaira, maisa nakairati xomokakala kakoareha hekoti xini, xakore hoka Enore atyo tyaisahitene! Hoka xoana maisala kotehalanai xahexe xini xiso? <sup>25</sup> Xala hareya xinekonitare mawaiyehareta hoka hatyo hiyeta tyaohtiya haiya terehokoanenai jiyare? <sup>26</sup> Hatyo hiyeta maisaiya xikaokare nikarehare kirane hoka xoanere hoka ximawaiyehareta haiyanai kakoa?

<sup>27</sup> — Xiyaiyehenaore iyitinai masekoia tyeoniterenai kekoarene: maisa atyo hakareha, maisa haimaha tyomareha haomanaha. Xakore hoka natyo atyo nomita: maisa Salomão hekoti, kaloxere xakore hoka maisa imiti exe iyitinae nawaiyehare akere ako isoare.

<sup>28</sup> Enore xaokalita atyo atyamokose ime harenae waiyehare tyeonita. Kalini waiyehare tyeonitaha hoka makani wainihenahitaha hoka kakeratyakahitaha irikatyao. Hatyo hiyeta aliterexe ite kaimatya tehitiya xiso. Hoka xityakekone atyo kirane. <sup>29</sup> Hatyo hiyeta awa atyo ximawaiyehare hoka xataweta mene xinakaira, exahe xoana xeráne niyahare xamani. <sup>30</sup> Hiyaiya, hahotyaliharenai atyo nikare taweta menahitaha tyotya hatyoharenai. Hoka Xexe enokoa tyeonitere atyo waiyoreta tyotya xaokitereharenai kakoa hoka hatyoharenai atyoite isa xomana. <sup>31</sup> Enore koamaniya nawenatyaka maniya hotohare xamohena xawenane, hoka Enore ite isa xomana tyotya hatyoharenai — nexa.

*Xiyejalitina Enokoare Tahi  
(Mateus 6.19-21; 1 Pedro 1.4)*

<sup>32</sup> Hoka Jesus nehitia: — Nokaxaikoneharenai, maisa xikaharexe xakore atyo hoka awa atyo ximairal! Hiyaiya, Xexe atyo hamaxalone kakoa isehena xomana wenakalati waiyexe. <sup>33</sup> Xabeteheha tyotya xixiyeharenai hoka xisehena olo maoloxaharenai ana. Xisomehena xiyejaliti nitini maxololoneharenai hoka xaxakaihena xixiyeharenai enokoa nali. Nalite maisa tyotyahitaha. Hiyaiya, nali atyoite maisa kaiwarexenai kaiwitene, exahe maisaiya atyo mololotinai mawenekoaretitene. <sup>34</sup> Hiyaiya, aliyo xamani atyoite xixiyeharenai tyeonita hoka hatyo nali atyoite xiyahekola tyeonita — nexa.

*Wakaharenai Iriharexenai*

<sup>35</sup> Hoka Jesus nehitia: — Memerira xisaohena tyotya kaotyakehenereharenai niyahare: xima ira kinatya xakirolorena jitero kakoa, exahe xaokanatyakalati takoare xoaha kakoa. <sup>36</sup> Xisaohenaira wakaharenai atyahiterenai haxekohaseha kaokeneheta xahita wenakakoati hisehare hekota akereta. Mokohetehena jihore hiye hoka ewakaneharenai majiholahititire haxerore enomana akereta. <sup>37</sup> Waiye kaiserehare atyo wakaharenai kaokeheteheha exekohaseha hoka kaosetaha exahe memere tyeoniterenai! Hoka aliterexe atyo nomita: exekohaseha ite tyoma tyaisahene maheta, wakatyahenite tyokaha maheta mexa haliya, hoka hatyotaite moka enomanaha. <sup>38</sup> Waiye kaiserehareya atyo exekohaseha kaokeheteheha hoka memere tyonahitaha, exahe kaokeheteheha wahaxati, xoana ferakoa maniyeheha xamani hoka!

<sup>39</sup> — Xotyaxematyaira exeharenai: hati waikatehareya atyo waiyoreta kaiwarexe kaokene kakoa hoka atyahiteniya hoka maisaiya ehanakota kaiwaharetitene. <sup>40</sup> Hatyo hiyeta xiso tehitiya ximemere xisaohena. Hiyaiya, Haliti Ityani ite kaokeheta xomana ximaxatyahaneterene xowaka — nexa.

*Wakahare Tyakekohatiye, Matyakekonehare Xoaha  
(Mateus 24.45-51)*

<sup>41</sup> Hatyaoseta Pedro axene: — Xekohaseti, hatyo xaimenekore womanere taita, xoana tyotyahana anere kore? nexa.

<sup>42</sup> Hoka Jesus nexa: — Xoanere haretia wakahare tyakekohatiye exahe iriharexe? Hatyohare atyo etakehare exekohase hawenekoare halakisene hoka kaxaikoterehare ehana exahe ijiterehare nakairati wakaharenai ana enaose kamaehena hoka. <sup>43</sup> Waiye kaiserehare atyoite hatyohare wakahare, nikare tyomita hatyoharenai hoka exekohase kaokehetehena hoka! <sup>44</sup> Aliterexe nomita xihiye: exekohase ite hatyo wakahare ana tyotya haxiyeharenai halakisa kaxaikone maheta.

<sup>45</sup> — Hoka xahekohenaore: xoana halanite kaxomokakehena hatyo wakahareya exakere ahekotya hoka: “Noxekohase atyo howitihareta hatyoaneneheta kakoa”, nexaiya, hoka hatyaosetaiya mokonasehenaiya haiyaharenai wakaharenai, wakahalonai. Hoka kanakairehenaiya, terehenaiya, hekehenaiya. <sup>46</sup> Hatyaosetaiya exekohase tyoheta hafer-akene ewakanehare maxatya haneterene, mawaiyoreterehare ekaokeneheta ferakene kakoa xowaka. Hoka exekohase ite aikotene hataose xakini, exahe iniyalahare ite mokene masemaxemalaharenai xomokakaho akereta — nexa.

<sup>47</sup> — Hoka wakahare waiyoreterehare haxekohase aokiterehare hoka maisa memere tyaponare, exahe maisa tyomiterehare aokiterehare atyoite kamokonasetyaka kalore.

<sup>48</sup> Hoka wakahare mawaiyorehare haxekohase aokiterehare kakoa hoka tyomiterehare xoalinihare hoka akomaniyatayakijoitererehare atyoite kamokonasetyaka ininaita. Nikare ite hoka xala xamani kalore resebitita hoka kalore ite kaxaxaka xala nonitata xamani kalore karesebetita hoka — nexa.

### *Jesus Hiyetaite Kaxaoretyakehena*

(Mateus 10.34-36)

<sup>49</sup> Hoka Jesus nehitia: — Notyoa atyo naotakatyia irikati waikoheko maheta hoka kasani koxaka ekeratyakahare nowaiyene naokowita! <sup>50</sup> Nokabatixatyakihenaite hoka kaxiyani, kalore namaikohareta hatyoharenai kaotyakehenerehare kijiya! <sup>51</sup> Xoana motya xiyahekola hiye hoka notyoa namehexaikohalikheta halitinai maheta xaokita? Hoka natyo atyo nomita: hoka maisa atyo notyoa namehexaikohalikheta maheta xini, xakore hoka nexaoretya maheta atyo. <sup>52</sup> Hiyaiya, exaoseta atyoite hahotyalita 5-harenai tyaponiterenai exaoretyoahena: hanamaite kahalakoaharehena hinamerore kakoa, exahe hinamerore ite kahalakoaharehena hanama kakoa. <sup>53</sup> Enexenahaite kahalakoaharehena haisaninaihaka, exahe ityaninaihaite hoka kahalakoaharehena hanexenaiha kakoa. Inityonahaite kahalakoahalohenaha haisaninaihaka, ityaninaihaite hoka kahalakoahalohenaha hanityonaiha kakoa. Enakeronaihaite kahalakoahalohenaha hatamisonenaiha kakoa, etamisonenaihaite hoka kahalakoahalohenaha hakeronaiha kakoa — nexa.

### *Oneterehare, Watiterehare Xoaha Tahi*

(Mateus 16.1-4)

<sup>54</sup> Hoka Jesus nexa tehitia halitinai hiye: — Xiyaiyehena atyo kaiminiti makiti maniyata hoka xita rotita atyo: “Onehenaite wihiyeh”, xita. Hoka aliterexe oneta.

<sup>55</sup> Exahe xikehexehena atyo hoholati hoholala watere maniyata hoka xita: “Watehenaite”, xita. Hoka watita. <sup>56</sup> Maotikonitinael! Xawaiyore atyo xawaiyekehala kaita waikoheko, enokoa xoaha tyaponiterereharenai. Hoka xoanere hoka maisa xawaiyore xawaiyekehala kaita kaotyakitereharenai? nexa.

### *Ahalakoahaliti Kakoa Niraetyaka Tahi*

(Mateus 5.25-26)

<sup>57</sup> Hoka Jesus halakihena hairaene hoka nexa: — Xoana hoka maisa xisota xahekotyare, xoarehare maniya xamani waiye nawenatyaka hoka? <sup>58</sup> Maika hatya irae haharehena hiso hoka kolahena hiso kalorexe ana hoka maika hatihityoa ihiye hoka hamiyatya hatyoharenai tahi ahotita. Nikare ite hoka maisa kolaita hiso kalorexe nahalakoa, hoka kalorexe ijita hiso sorare ana, hoka sorare berexoako mokita hiso. <sup>59</sup> Natyo atyo nomita: maisaiya hahikoahitita hatyoakota, maisa habakaita tyotya aokiterehare hoka — nexa.

## 13

### *Iniyalahare Xahalakihena, Xoana Xiwainihena Xamani*

<sup>1</sup> Hatyaoseta haiyaharenai kaokaha hoka xakaihenaha Jesus hiye, Pilatos wakane xema Galiléia koa yerenai fetatyahitere Enore ana heko aisehenahere tahi.

<sup>2</sup> Hatyaoseta Jesus nehena: — Xoanala hoka hatyo Galiléia koa yerenai nikare kaxaisakaha, xoana xiyahekola hiye hoka motya masakare iniyalahare tyomahitaha, haiyaharenai Galiléia koa yerenai xahexe xaokita? <sup>3</sup> Maisa nikarexe xini. Aliterexe nomita xihije: maisaiya xahalakijita iniyalahare xománenai hoka nikare ite xikaxaisaka.

<sup>4</sup> Hoka etake Siloé nali, 18-harenai heno hati wahaharexe hatakoa hoka aisehenerenai? Xoana xiyahekola hiye hoka motya masakare iniyalahare tyomahitaha haiyaharenai Jerusalém nali tyaoniterenai nonitata xaokita? <sup>5</sup> Maisa nikarexe xini. Alitere nomita xihije: maisaiya xahalakijita iniyalahare xománenai hoka nikare ite xikaxaisaka — nexa.

### *Halohalo Kate Malihare*

<sup>6</sup> Hatyaoseta Jesus exakere aimenekotya enomanaha: — Hatya haliti masenekoa uva katenai koni hakate halohalo tyaonita. Hoka xane iri xahita waiyakatetya hoka maisa kaliye. <sup>7</sup> Hatyo hekota nexa masene kaxaikotyasehare hiye: “Hasemehena, hanama wanonehena notyoa iri nimexa naokowita hoka maisa terota kaliye. Maika hityoka exe halohalo kate! Xoare maheta hahalakijitene masenekoa, maisa xakore kaliye hoka?” nexa. <sup>8</sup> Hoka ewakanehare nexa: “Xekohaseti, kala kotare hahalakihityene exe wanone niyahare. Naijohokotene ite hoka imexati kakoa namokahokotene. <sup>9</sup> Ite etare wanone kali hoka ehekore. Ite maisa kalita hoka ixityokaka haoka”, nexa.

### *Sábado Xowaka Jesus Aototaloheta Ohiro*

<sup>10</sup> Sábado xowaka Jesus aotyakijita ene xahohisakoatyakalati hanako. <sup>11</sup> Hoka nali kaoka hatya ohiro koxaka 18-wanonehena hokakitolo. Isekohaliti iniyalahare nikare axomokanikitene. Katyokohexe tonita, maisa aliyakere aototalohotoare.

<sup>12</sup> Hatyaoseta Jesus waiyene hoka kawisene hoka nexa ihiye: — Hasemehena, koxaka atyo hikinatolohetehena — nexa ihiye.

<sup>13</sup> Hatyaoseta hakahenai ekaokakisa ihiye hoka totahloheteheha rotita. Hatyaoseta ihalahalo Enore kakoa.

<sup>14</sup> Xakore hoka hatyo xahohisakoatyakalati hana kaxaikotyasehare ehare, sábado xowaka aiyatolokihetene hoka. Hatyo hiyeta nexa halitinai hiye: — 6-ki ferakene atyo hateniti niyahare. Maika hatyonai ferakenenai xisoa hoka xikaxaiyatolokisakeheta hoka awa atyo sábado xowaka nikare xisaona — nexa.

<sup>15</sup> Hoka Jesus nexa: — Maoseratyaliyenai! Xoana maisa sábado xowaka xamaxolatyare xibowiya, xikawalone hoka xiyanexe ekakoaha one ana teraha maheta? <sup>16</sup> Hoka kalikini atyo owene tyaonita Abraão jikolahalo, Ahalakoahaliti olahenolo 18-wanone. Hoka xoanereya hoka maisa sábado xowaka kaxaiyatolokisakihitita ehokakene nonitata? nexa.

<sup>17</sup> Hatyaoseta Jesus niraene sema enahalakoaharenai hoka haihareha. Xakore hoka halitinai atyo ihalahare Jesus nómanenai waiyexe kakoa.

### *Mostardase Hiye Aimenelekota*

(Mateus 13.31-32; Marcos 4.30-32)

<sup>18</sup> Jesus nexa: — Xoare hare kakoala hakakoa Enore koamaniya nawenatyaka? Xoarehare kakoaita naimenekohena? <sup>19</sup> Motya atyo mostardase hatya haliti iya hoka fititere hamasenekoa akereta. Hoka hananehaliti kekoare hoka kalokate tyaona hoka kotehalanai kaihititere ekanohinai koni akereta atyoala — nexa.

### *Xetamomotyakalati Hiye Aimenelekota*

(Mateus 13.33)

<sup>20</sup> Jesus nehitiya: — Xoare kakoaita naimenekohena Enore koamaniya nawenatyaka?

<sup>21</sup> Motya atyo hatya ohiro xetamomotyakalati iya hoka kaorehititere trigohe hoka hatyaoseta trigohe tamomotere akereta atyo — nexa.

*Xisoakalati Kiranahore  
(Mateus 7.13-14, 21-23)*

<sup>22</sup> Hatyaoseta Jesus jiyejena wenakalati, wenakalatikoasenai hoka aotyakijita, exahe xaneta Jerusalém xeta.

<sup>23</sup> Hatyaoseta hatya axene: — Xekohaseti, xoana haiyanai taitaite kaiyakehetehena? nexa.

<sup>24</sup> Hoka Jesus nexa ihiyeha: — Maika xaiyateretyoa xisoa maheta xisoakalati kirana-hore. Aliterexe nomita xihiye: kahare ite isoa aokowiha xakore hoka maisa atyoite isoahitaha — nexa. <sup>25</sup> — Hati waikatehare ite xane jihotya hahaha jihola. Hatyaosetaite mananakita xisaona hoka xamokotya ite jihore hiye hoka xehena: “Xekohaseti, hamajiholatya womana hoka wisoa”. Xexaite ihiye xakore hoka nexaite: “Maisa atyo nowaiyanihore xini xiso, kala alyakotare xamani xiso”, nexaite. <sup>26</sup> Hoka xehenaite: “Wikanakaira, wisera hikakoa, Xekohaseti. Haotyakisa tehitia wiso wawenakala nali”, xexaite. <sup>27</sup> Xakore hoka nehitiyaite: “Maisa nowaiyanihore xini xiso. Kala alyakotare xamani xiso. Xiyanehetehena noniti, xiso iniyalahare taita tyomiterenai”, nexaite. <sup>28</sup> Hatyaosetaite xiayiyejena Abraão, Isaque, Jacó, tyotya iraiti xakaisasehare-nai xoahanai, Enore nawenakala nali hoka xiso atyoite mananakita hoka hatyaosetaite xitiyahena, exahe xaikolinaite karai, karai, nexa xamohen. <sup>29</sup> Kahare halitinai ite tyoaha kamae hikoane maniyata, kamae xisoane maniyata, one hohola maniyata, tihalo hohola maniyata hoka tyokahaite mexa haliya Enore nawenakala nali. <sup>30</sup> Hoka haiyaharenai kalikini wakahare tyaoniterenaite kalorexe tyaoheta. Hoka haiyaharenai kalorexe tyaoniterenaite wakahare tyaoheta — nexa.

*Jesus Xawaiyera Jerusalém Tahi  
(Mateus 23.37-39)*

<sup>31</sup> Hatyaoseta haiyaharenai fariseunai xaneha Jesus haliya hoka nexaha ihiye: — Maika hiyanehetehena alita. Hiyaiya, Herodes aisa aokowita hiso — nexaha.

<sup>32</sup> Hoka Jesus nexa ihiyeha: — Xiyaneheta hoka exakere niraini xiyakai hatyo wakare hiye: “Naxanikihitita tihanare, exahe naiyatelikihitita halitinai kalikini, makani xoaha hoka ehanamakini ferakenite namematya nohateni”, nexa. <sup>33</sup> Xakore hoka noxanihitia atyo kalikini, makani, kamaetali. Hiyaiya, iraiti xakaisasehare atyo maisa alyakere kaxaisakita Jerusalém nonitata haware — nexa.

<sup>34</sup> — Jerusalém, Jerusalém! Hiso atyo haijita iraiti xakaisasehareni, exahe sehalí kakoa hamokotita Enore xaxikalahrenai! Kahaliki xakore naxakoloharetya naokowita hihotyaliharenai takoira haisani mokosenai hatane katyahe mokitere akereta, xakore hoka maisa atyo haoka. <sup>35</sup> Hoka kalikini atyoite hihana kahalakisakehena kaiserehare. Aliterexe nomita: Maisa atyoite hiyaiyehitita natyo exakere hiraehenere kijiya: “Xekohaseti Enore, waiye kaiserehare atyo hatyo hexare kakoa tyoitrehare”, hehenere kijiya — nexa Jesus ihiyeha.

## 14

*Jesus Aiyatelikheta Hatya Hokakitere*

<sup>1</sup> Sábado xowaka Jesus xane isoa hatya xekohaseti fariseu hanako kanakaira maheta. Hoka wahakotyahitaha Jesus ana. <sup>2</sup> Hoka hatya haliti kasahenai, kanonai xoaha fakitere tyaoheta ehaliya.

<sup>3</sup> Hatyaoseta Jesus axehena Xaotyakiyaho kakoa waiyoreterenai, fariseunai xoaha: — Xoana wiyaotyakisakaho hiyetaiya waiyehena wawairatya sábado xowaka, maiha koré? nexa.

<sup>4</sup> Hoka maisa xoare nexahitaha. Hatyaoseta Jesus otoka hatyo haliti hoka aiyateliki-hetene. Hatyo najikinita axikahetene.

<sup>5</sup> Hatyaoseta nehitiya ihiyeha: — Hoka xisonaiya, hamokose xikaisaniye exahe hali xikabowiyere hoka exoa tolokoako hoka maisaiya xiyejhitene rotita, exahe sábado xowaka hoka? nexa Jesus.

<sup>6</sup> Hoka maisa waiyore ekoaxatyahitaha enomana.

*Himaxahenerahare Exahe Waiye Hamoka Haliti Hihanako*

<sup>7</sup> Hatyaoseta Jesus wahakoita kakaixakatyakehenerenai kaokene hoka waiyexe mexa haliya enokaneha. Hoka exakere aotyakisa: <sup>8</sup> — Hatya kaixakahena hiso wenakakoati ana hoka awa atyo okahakalatikoa waiyexe koa hisoka. Waiya aliya hoka hatya hiyahehare kakaexakatyaka hoka <sup>9</sup> hatyaosetaiya kaexakahenere hiso, hatya xoahaiya, nexa hihiye: “Hainakoaheta hoka exe hatyaose tyoka”, nexaiya. Hoka hatyaosetaiya hihaihare, exahe ewaxirahare okahakalatikoiya hiyane hisokeheta. <sup>10</sup> Hoka maika hikakaixakatyakehena hoka ewaxirahare okahakalatikoa hiyane hisoka. Nikare ite hoka kaexakahenere hiso ite nexa: “Nohinaehare, hisohena hoka exe okahakalati waiyexe koa hisoka”, nexaiya. Nikare ite kalore hikaxaiminisakita tyotya kakaexakatyakehenerenai nahalakoa. <sup>11</sup> Hiyaiya, xala xamani atyo ite kalorexe aokowita hoka wakahare atyoite kaxomokakeheta. Hoka xala xamani atyo ite maisa haiyanae xahehare aokowita hoka kalorexe atyoite kaxomokakeheta — nexa Jesus.

<sup>12</sup> Hatyohekota Jesus nexa hakaixakatyasehare hiye: — Maika nakairati kalore hisomehena halitinae ana totahikoa niyahare, exahe makehena niyahare hoka awa hakaixakatyahihinaeharenai, hiximarenenai, hiyaiyaneharenai, hihinaeharenai kaoloxerenai taita hoka. Hiyaiya, hatyoisahaiya kaixakatyaha hiso hoka hatyo kakaoiya bakanenahitaha hiso waiye hamohenaherene. <sup>13</sup> Xakore hoka maika hisehaliti hisomehena hoka hakaexakatyamaoloxaharenai, maetonaneharenai, mawaiye netonaneharenai, maxoseharenai harenai, <sup>14</sup> hoka waiye atyoite hikaxomokaka. Hiyaiya, maisaiya atyo aliyakere bakahenahititha hiso, xakore hoka Enore atyoite bakatya hiso, waiyexe nomaseharenai ekasekihetehenere xowaka — nexa.

*Kalorexe Hisehaliti Tahi  
(Mateus 22.1-14)*

<sup>15</sup> Hatya tyokitere ekakoaha mexa haliya sema iniraene hoka nexa Jesus hiye: — Waiye kaiserehare atyoite xane mexa haliya tyokehenerenai Enore nawenakala nali — nexa.

<sup>16</sup> Hatyaoseta Jesus nehena: — Hatya haliti kaexakatyahahare haliti, kaolonehena hoka. <sup>17</sup> Memakaty hoka axikatyahawakanehare kakaexakatyakehenerenai hiye: “Xisohena, koxaka tyotya memaka”, nexa maheta.

<sup>18</sup> — Xakore hoka hatya xakini awaiyekelakahena. Hetatiye nexa wakahare hiye: “Niya hakoa waikohe hoka noxanite nowaiyehenenene hoka maisaiya aliyakere notyoita. Kasani himaotyanehetene naoka”, nexa. <sup>19</sup> Hatya atyo nexa: “Niya 10-ri bowi hoka noxanite nowaiyehenenene, xoana waiyore xamani ala hakahititha. Hatyo hiyeta maisaiya aliyakere notyoita. Kasani himaotyanehetene naoka”, nexa. <sup>20</sup> Exahe hatya hoka nexa: “Kalikini nokaiyanityo. Hatyo hiyeta maisaiya aliyakere notyoita”, nexa.

<sup>21</sup> — Hatyaoseta haikoaheta hoka xakaini haxekohase hiye. Hatyaoseta exekohase ehare hoka nexa: “Hihalahare hiyanehena ahotoyahonai exahe ahotoyahoseranai wenakalati nali hoka hanoloka maoloxaharenai, maetonaneharenai, maxoseharenai, mawaiye netonaneharenai xoaha”, nexa.

<sup>22</sup> — Hatyaoseta wahehena hoka ewakanehare nexa: “Xekohaseti, koxaka haokitere akereta notyoma, xakore hoka hekotata maisa hihana kaiseixe”, nexa.

<sup>23</sup> — Hoka exekohase nexa: “Nikare atyo hoka hiyanehena ahotoyahokoahore, ahotisenai aho hoka hahalakoahenerenai hiye hirae, tyoaha maheta ali hoka nohani ekaisetyaha. <sup>24</sup> Aliterexe nomita hihiye: hetati kakaixakatyakehenerenai atyoite maisa kanakairahititha nakairati notyomehenere”, nexa.

*Exakereya Hisaona Hoka Jesus Xaotyakirahare Hisaona  
(Mateus 10.37-38; Lucas 9.23-24)*

<sup>25</sup> Hatyaoseta kahare halitinai xanetaha Jesus xema. Terehokoa hoka nehena ihiyeha: <sup>26</sup> — Xala xamaniya atyo tyaona nokoamaniye aokowita hoka maisaiya atyo noxaotyakirihare tyaonita, maisa awaiyetyare natyo hanexe, hanityo, haiyanityo, haisaninai, haximarenenai, haximalonenai, exahe hatyota awaiyetyoawitere xahexe hoka. <sup>27</sup> Xala xamaniya atyo maisa kolaita haberekotyaka niyahare atyalihose xaimaholatyaka, exahe maisa tyaonita nokoamaniye hoka hatyoiya atyo maisa noxaotyakirihare tyaonita.

<sup>28</sup> — Hiyaiya, hatya xinekonitare ahekoita háomane hati wahaharexe tahi hoka tyoka hotohare exahe aimenekotene hoka exaimane waiya, xoana ehekorexe xamani olo. <sup>29</sup> Maisaiya nikare tyomita hoka tyomene rotitaiya hoka maisaiya aliyakere mematitene, hoka tyotyahaiya waiyaha emamemarene hati hoka koexahaxahenahaiya ekakoa hoka nexahaiya: <sup>30</sup> “Exe haliti tyoma hati hoka maisa mematitene!” nexahaiya.

<sup>31</sup> — Nikareya hatya xekohaseti, 10.000 sorarenai kakoa xane aisakakoahena hatya halalakoahare kakoa hoka tyoka hotohare ite hoka ahekohena, xoana kinatere xamaniya aisakakoa halalakoahare kakoa. <sup>32</sup> Maisaiya kinaterexe hoka axikatyaiya hairaene kakoa hatya xekohaseti ana sekotata hoka axene maheta, xoare xamani aokita hoka halakisaha haxaisakakoaneha maheta.

<sup>33</sup> Hatyaoseta Jesus halakihena hairaene hoka nexa: — Nikare ite maisaiya hatya hekoti xinekonitare noxaotyakirihare tyaonita, maisa halakijita tyotyota haxiyeharenai harenai hoka — nexa.

### Salo Makexenehare

(Mateus 5.13; Marcos 9.50)

<sup>34</sup> — Xasemehena, salo atyo waiye, xakore hoka makexeniya hoka maisa atyo saloheta xini. <sup>35</sup> Maisa atyo waikohe niyahare, exahe exawaiyetolisaka niyahare ana hekoti waiyihitita. Hoka kaxawatyakita atyo kolaliti koni.

— Xala xamani atyo katanakoakore semakatya maheta hoka maika semehena niraini — nexa Jesus.

## 15

### Kalanero Metene Tahi

(Mateus 18.12-14)

<sup>1</sup> Haxowaka kahare kalorexe noloxa resebetyaseharenai, exahe haiyaharenai iniyalahare nomaseharenai xoaha kaokaha Jesus ana, semaha maheta iniraine.

<sup>2</sup> Hoka fariseunai, xaotyakiyahoo kakoa waiyoreterenai xoaha iraehenaha etahi hoka nexaha: — Exe haliti atyo iniyalahare nomaseharenai koni tyaonita exahe kanakairita ekakoaha.

<sup>3</sup> Hatyaoseta Jesus exakere aemenekotya: <sup>4</sup> — Hatya xinekonitareya 100-ri kakalaneroxere hoka haliya meta hoka xane ite tawehetehenene, maiha kore ite? Hatyo hiyeta halakisaite 99-ri maseta hoka xane ite tawehetene kaokeheteherene kijiya.

<sup>5</sup> Kaokeheteeniya hoka ihalaharetaiya ekakoa hoka hatyoakolyahooya kolahetene hoka haikoaheta ekakoa. <sup>6</sup> Kaokehetaiaya ekakoa hahaha nali hoka kawisaiya hahinaeharenai, hawaiyaneharenai hoka nexaiya: “Xihalaharehena nokakoi. Nokaokiheta nokalaneroxi mititere”, nexaiya.

<sup>7</sup> — Hatyo hiyeta nomita: hatyo akeretaite kalore ite kaihalaharetyaka enokoa nali, hatya haliti iniyalahare nomasehare halakihenere iniyalahare háomane kakoa, 99-harenai iniyalahare maomaneharenai, koxaka waiyexe wenati xema tyaohetehenerenai xahexe — nexa.

### Olo Hokose Metene Tahi

<sup>8</sup> Hatyaoseta Jesus iraehitiya: — Hatya ohiroiya kaoloxolo 10-hokose hoka hahokoseya meta enonita hoka taweheteneya, maisaiya kore? Kaokeheta mahetaiya olo hokose hoka aotakatyaiya xaokanatyakalati, hisakotyaiya hati ako hoka waiyeya taweheta exahita kaokeheteherene kijiya. <sup>9</sup> Kaokeheteeniya hoka kaixakatyaiya hahinaehalonai, hawaiyanehalonai hoka nexaiya: “Xihalahalohena nokakoi. Nokaokiheta atyo noloxi mititere”, nexaiya.

<sup>10</sup> — Hatyo hiyeta nomita: nikareta tehituyaite Enore wakaneharenae anjonai ihalahareha, hatya iniyalahare nomasehare halakihena iniyalahare háomane hoka — nexa.

### *Hatya Haliti Ityani Miyahenere Haxiyehare Tahi*

<sup>11</sup> Hoka Jesus nehitiya:

— Hatya haliti hinamahare kaisaniye. <sup>12</sup> Hoka haxowaka ityani xoimere nexa hanexe hiye: “Abá, xama kalikini hisehena nomaní holini hixiyehare, noxiyehare maheta”, nexa. Hoka enexeha iraka haxiyeharenai haisaninai ana.

<sup>13</sup> — Hatyaoseta mawaheneta hoka ityani xoimere xakaiharetyna hoka xane hakoa wenakalati xeta. Hatyo nali wenati iniyalahare xema taita tyaona, exahe miyatya tyotya haxiyeharenai kaxekakehenere enomana.

<sup>14</sup> — Miyahenere tyotya haxiyehare najikinita nakiti tyaona hatyo tyaonitere nali hoka xoimahaliti nakehena. <sup>15</sup> Hatyaoseta tawa hatya nali tyaoniterenai konitare hoka hakahinaetyaka aoka. Hoka hatya axikatya xoimahaliti hawenakala xeta, ebolokoxanai kaxaiko maheta. <sup>16</sup> Hoka hatyo nali nakita hoka kasani bolokonai kanakairiterekare kanakaira aokowita, xakore maisa hatyoharenai hekoti isaha enomana aokowiyeha.

<sup>17</sup> — Hatyaoseta kehexaharetyoaheta hoka ahekohena: “Xoanamahare baba wakaneharenai nakaira ala kalikini kamawaneta hoka natyo atyo ali nowainihena nonaki!

<sup>18</sup> Nahaikoahetaite baba hana xeta hoka nomite ihiye: ‘Abá, iniyalahare notyoma Enore ana, exahe hikakoa <sup>19</sup> hoka maisaiya atyo hityani haohitita natyo. Maika hiwakaneharenai akereta hamoka natyo’, nomite”, nexa. <sup>20</sup> Hatyaoseta kikisoaheta hatyo nalita hoka haikoaheta hanexe hana xeta.

— Xanehititata hoka enexe sekota waiyehetene. Hoka airakoaneharetyna haisani hoka tema xane ahalakoatene, xakoloharetene, sohitankolisene xoaha. <sup>21</sup> Hoka xoimahaliti nehena: “Abá, iniyalahare notyoma Enore ana, exahe hikakoa hoka maisaiya atyo xoare maheta hityani haohitita natyo”, nexa.

<sup>22</sup> — Xakore hoka enexe wakatya hawakaneharenai: “Xihalahare! Xisohena imiti waiyexe kakoa hoka xaisoakihetene. Kahititini xamoheta ihiye, kijititini harenai.

<sup>23</sup> Exahe xiyané xaisehena bowi mokose kolotere hoka wimaxalohare. <sup>24</sup> Xiyaiya, exe nityani atyo waini ene hoka kalikini atyo kaseheta. Meta xakore hoka kakaokakeheta”, nexa enexe. Hatyaoseta aokitere akereta tyomaha hoka maxalohareha.

<sup>25</sup> — Hatyo xowaka ityani inityohaliti xaneta mase. Hoka kaokehetehehena, owitehetehena mohitita hati hoka sema xerati, xoholikoati nemahare. <sup>26</sup> Hoka kawisa hatya wakahare hoka axene: “Xoana hoka nikare tyaonaha?” nexa. <sup>27</sup> Hoka wakahare nexa ihiye: “Hiximarene kinaseta, exahe kinatereta kaokeheta. Hatyo hiyeta hexe bowi mokose kolotere xaisaka aoka”, nexa ihiye.

<sup>28</sup> — Hatyaoseta ityani inityohaliti ehare, maisa isoaheta aokowita hatyako. Hoka enexe hikoa menanaka hoka tihityoa ihiye isoaheta maheta. <sup>29</sup> Xakore hoka nexa hanexe hiye: “Hiyaiya, waha terehokoanehena wakahare akereta nahakita homana, exahe maisa namasemakiyatyre hiraine. Xakore hoka maisa hali hekoti kabala hisare nomaní hoka nomaxaloharexe nohinaeharenai kakoa. <sup>30</sup> Hoka exe hityani hixiyeharenai tyotya miyahenere enatyololonai hiye kalikini haikoaheta hoka bowi mokose kolotere xaisaka haoka”, nexa.

<sup>31</sup> — Hatyaoseta enexe nexa ihiye: “Haré, nohaliyi atyo hisaota minita hoka tyotya noxiyeharenai atyo homanere tehituya. <sup>32</sup> Hoka exe hisehaliti terota notyoma naokowi, wihalaharene wahotikisa maheta. Hiyaiya, exe hiximarene atyo waini ene hoka kaseheta, meta hoka kakaokakeheta”, nexa haisani hiye.

### *Kaxaikoakatyatiye Mahakaiserexe*

<sup>1</sup> Jesus nexa haxaotyakiraharenai hiye: — Hatya haliti kaoloxere tyaonita hoka hatya kaxaikotene enomana. Hoka haiyanai xakaiha ihiye, ekaxaikoharetyasehare ametakijita enoloxa aokaha. <sup>2</sup> Hatyo hiyeta kawisene hoka nexa ihiye: “Xoana, aliterexe exakerexe

hisaonita aokaha nohiye? Hahotikihena nomani hikaxaiko akahenere xowakiyere. Hiyaiya, maisaiya atyo nokaxaikoharetyase hisaohitita”, nexa.

<sup>3</sup> — Hatyaoseta ewakanehare ahekota: “Noxekohase axikahetehena natyo. Hoka xoare ite notyomehena? Maisaiya atyo nokinatere nasekehettita waikohe, exahe nohai-hareta atyo olo noxaxani kakoa”. <sup>4</sup> Hatyohekota nexa, “Exakerite notyaona. Nikarite notyaona hoka nokaxaxikatyakehetehenere najikinita nokahinaeharexe notyaona hoka waiye mokaha natyo hahanakonaeha nali”, nexa.

<sup>5</sup> — Hatyaoseta kawisa tyotya kakotaneterenai exekohase hoka hetatiyehare hiye nexa: “Xoanere hikakotaneta noxekohase?” nexa. <sup>6</sup> “Nokakotanitene 100-litrone kolotenitiya”, nexa ihiye. “Owene hikotane. Hisokehena exaose hoka haxairatya 50-litrone”, nexa hatyo kaxaikoakatyatiye.

<sup>7</sup> — Hähare hiye nehitia: “Hiso atyo, xoanere hikakotaneta?” nexa. “Nokakotanita 1.000 kilone trigohe”, nexa. “Hisokehena hoka haxairatya exaose 800-kilone”, nexa ihiye kaxaikoakatyatiye.

<sup>8</sup> — Hatyaoseta exekohase tyakeko hatyo kaxaikoakatyatiye mahakaiserexe iniri-harene hiyeta.

Hoka Jesus nehitia: — Halitinai exe waikoheko taioniterenai atyo masakare irihareha xoalinhare háomaneha kakoa, halitinai Enore xaakanala xema taioniterenai xahe niriuheneha atyo. <sup>9</sup> Hatyo hiyeta nomita xihiy: maika xakahinaeharetyoahena exe waikoheko taioniterenai kaoloxerenai kakoa hoka ximaoloxaharehena hoka kahinaetyaha xiso, wenati matyotenehare nali xiyanenhenere kijiya.

<sup>10</sup> — Xala xamaniya atyo enaosexeta tyomita xoalinhare inirere hoka enaosexeta tehitia atyoite tyoma xoalinhare kalorexe, exahe xala xamaniya atyo maisa waiyexe xoalinhare inirere háomane hiye hoka maisa tehitia atyoite waiyexe xoalinhare kalorexe háomane hiye. <sup>11</sup> Xiyaiya, xikaiwitaiya exe halitinai waikoheko taioniterenai noloxa hoka xalaiya isehena xomana xiyealiti aliterexe? <sup>12</sup> Exahe xikaiwitaiya haiyaharenai xiyeahare hoka xalaiya isehena xomana xixiyeahare kaiserehare? nexa.

<sup>13</sup> — Maisaiya atyo xala hare hinamahare xekohaseti wakanehare taionita haxowakita. Nikareya hoka hatya awaiyetita, hatya maisa awaiyetyare xoahaiya. Tyakekota hatya, hatya maisa tyakekore xoahaiya. Nikare tehitiaiya maisa aliyakere Enore maniya hahekoita, olo xiyealiti harenai maniya hahekoita xoaha haxowakita.

### *Jesus Niraene Haiyasenai*

(Mateus 5.31-32; 11.12-13; Marcos 10.11-12)

<sup>14</sup> Hoka fariseunai sema hatyoharenai hoka Jesus koexahalisaha, olo xiyealiti harenai awaiyetyahitaha hoka.

<sup>15</sup> Hoka Jesus nexa: — Xiso atyo motya waiyexeharexenai ene xisaonita halitinai nahalakoa hoka Enore atyo waiyita xiyealiti. Hiyaiya, halitinai ana masakare waiyeterahare atyo Enore ana maisa waiyexe — nexa.

<sup>16</sup> — Moisés Xaotyakiraho, iraiti xakaisaseharenai xakayira xoaha xema halitinai tyaona João Batista kaotyakehenere kijiya. Hatyo najikinita Iraiti Waiyexe Xekohaseti enokoatire tyaonene Enore nalitare tahi kaxakaisaka hoka halitinai aiyateretyoahitaha exema maniya tyaonaha maheta.

<sup>17</sup> — Maisaiya atyo hase xairatise hatyatate iraiti Xaotyakiyaho hiyetare mitita. Enokoa, waikoheko harenai maiyareheta hotohariya.

<sup>18</sup> — Hatya halitiya haiyanityo halakiheta hoka hatya ohiro kakoa tyaoheta hoka iniyalahare atyo tyoma. Exahe xala xamaniya ohiro ehalakisakahalo kakoa tyaoheta hoka iniyalahare atyo tyomita tehitia — nexa Jesus.

### *Kaoloxere, Lázaro Xoaha Tahi*

<sup>19</sup> Jesus nehitia ihiyeha: — Hatya haliti kaoloxere taionita hoka imiti karore ako taita ijoita, exahe fera hisehaliti tyomita. <sup>20</sup> Nali tehitia hatya haliti maoloxahare taionita, exahe kahonotirahiye, Lázaro nexarexe. Kahalakisakita minitaha kaoloxere

hana haliya. <sup>21</sup> Hoka Lázaro atyahita kanakaira maheta nakairati holoxo exoiterehare kaoloxere mexanekoata. Kajolonai kakoita tya takaxosetita ehonotiraosenai.

<sup>22</sup> — Hatyaoseta hatyo maoloxahare waini hoka anjonai kolutene Abraão tyaconitere nali, wenati waiyexe nali. Hatyaoseta hatyo kaoloxere tehitia waini hoka kaxafityaka.

<sup>23</sup> Hoka kirakoane tyaonita kamatinai tyaonitere nali.

— Hatyaoseta waiyakahena ene hoka Abraão waiya seko akiya, exahe Lázaro Abraão haliya. <sup>24</sup> Hoka kawiyatya: “Abá Abraão, hairakoaneharehena natyo! Haxikahena Lázaro hoka hakahehi aolowatya one xaiya hoka tya noninise awehetya. Hiyaiya, kirakoane notyaonita exe irikati koni!” nexa. <sup>25</sup> Hoka Abraão nexa ihiye: “Xoana hotita hikasetare xowaka tyotya xoalinhare waiyexe tyaonitere homana? Hoka Lázaro atyo iniyalahare taita kaxomokaka. Hoka kalikini atyo ali waiye tyaonita, hiso kirakoane hisaonitere nase. <sup>26</sup> Exahe toloko kalorexe winenekesene tyaonita. Hatyo hiyeta alita xinali tya aokowiterenaiya maisa aliyakere tyaohitaha, exahe hatyo nalitarenai tehitiaiaya maisa aliyakere ali tyaohitaha”, nexa.

<sup>27</sup> —“Hatyo hiyeta maika Lázaro haxikaheta baba hana xeta naoka, abá Abraão.

<sup>28</sup> Hiyaiya, nali 5-harenai nokaximaliniye. Halakisene hoka xaneheta hoka xakai ihiyeha. Nikarite hoka maisa tyaohitaha exe kirakoane kawenatyakitere xeta”, nexa.

<sup>29</sup> Xakore hoka Abraão nehitia: “Moisés, iraiti xakaisaseharenai xoaha baberane kakoare hiximarenenai tyaonita. Maika semaxemahenaha hatyonai xairala”, nexa.

<sup>30</sup> —“Maisaiya atyo nikare hoka xoare tyomita, abá Abraão!” nexa kaoloxere ene. “Alitareya atyo hatya kaseheta hoka xane irai ekakoaha hoka halakisahaiya atyo háomaneha iniyalahare”, nexa. <sup>31</sup> Hoka Abraão nexa ihiye: “Maisaiya semaxemahitaha Moisés, iraiti xakaisaseharenai niraene hoka maisaiya tyakekoahitaha, exahe alitare kaseheta hoka xane irae ekakoaha”, nexa.

## 17

### *Iniyalahare Exahe Emactyanetyakeheta Xoaha Tahi (Mateus 18.6-7, 21-22; Marcos 9.42-48)*

<sup>1</sup> Hatyaoseta Jesus nexa haxaotyakiraharenai hiye: — Exakerexe ite kawenatyaketa mene: Haiyanaita iniyalahare aomanekisa hahinaeharenai xakore atyoite hoka kirakoane atyoite kaxomokaka nikare axomokanikiyahenere. <sup>2</sup> Ehekoreya atyo kaxawaytaka one kaloxere xaiya sehalo kaloliro mehetyakalati kaxolatyaka ihino hiye hoka maisa ahowitzikisa exe xoimairanai nawenane.

<sup>3</sup> — Maika xirihare! Maika hihinaehare iniyalahare tyomehena hoka hiwatyalini. Hoka háomanne iniyalahare halakisa hoka himaotyanehetene. <sup>4</sup> Maika exahe 7-ki iniyalahare moka hiso haferakoaneta hoka hatyokinai nihatyaka tya hoka nehena: “Himaotyanihetene naoka”, nehena hoka himaotyanehetene.

### *Tyakekoti Tahi (Mateus 17.20; Marcos 11.22-23)*

<sup>5</sup> Hatyaoseta iniraine kakoarenai axaha Jesus: — Xekohaseti, haeroretya wityakekone — nexaha.

<sup>6</sup> Hoka Jesus nexa ihiyeha: — Ikoiya xityakekone mostardase akerehare hekoti hoka xexaiya exe halohalo kate hiye: “Hamalakoawihena hityahare kakoita hoka hiyane onexaiya hisaohena!” xexaiya ihiye hoka tyakekoya xiraene hoka xaokitere akereya tyaona — nexa.

### *Wakahare Hatene Tahi*

<sup>7</sup> Jesus nexa: — Maika xiyahekola hiye hoka motya xikawakaneharex ene xisaonita hoka xane hakita masenekoa xamani, xoana kaxaikota xamani kalaneronai. Hoka kaokehetehehena: maseta hoka xoana hexaiya: “Hisohena rotita, hisokehena mexa haliya”? hexaiya. <sup>8</sup> Mahaiya atyo nikare hiraeta! Xakore hoka hexaiya: “Hisomehena nakairati nomani hoka hakanekoatya hoka hamohena nakairati hoka nokanakairi,

notera. Hatyo najikinitaite hikanakaira, hisera”, hexaiya. <sup>9</sup> Xoana wakahare kakoaiya hihalahare, hiwakane xema taita tyomita hoka?

<sup>10</sup> — Maika nikarexeta xisaona. Maika xisoma xamemahenere tyotya xisoma kaxaokakehenereharenai najikinita xexa: “Wiso atyo wakaharenai maxoarewaikate-harenai. Hiyaiya, wisomita atyo wikkawakatyakiteraharenai taita”, xexa — nexa ihiyeha.

#### *Jesus Awaiyehiheta 10-hare Jijikoahiterenai*

<sup>11</sup> Hatyaoseta Jesus xaneta Jerusalém xeta hoka jiya Samaria, Galiléia xoaha koa nenekesene. <sup>12</sup> Xane kaokehena hakoa wenakalati hoka 10-hare jijikoahitina tyoa ahalakoatene. Sekota amematyoaha <sup>13</sup> hoka kawiyatyaha enomana: — Xaotyakisatiye Jesus! Hairakoaneharenha wiso! nexaha.

<sup>14</sup> Jesus waiyahene hoka nexa ihiyeha — Xiyanehetehena sacerdotenai nali hoka waiyahareheta xiso — nexa. Hatyaoseta xanahitataha ene ahoti hoka waiyeharehenehahita.

<sup>15</sup> Hatyaoseta hatya enekonitareha Samaria yere, kehexa haiyatereheta hoka haikoa-heta aexakeritya maheta Enore. <sup>16</sup> Hatyaoseta Jesus kiji haliya meholokoa hoka ihalahare ekakoa.

<sup>17</sup> Hatyaoseta Jesus nexa: — Halitinai kaxaiyatelikisakeheteherenai atyo 10-harenai. Hoka aliyo 9-harenai? <sup>18</sup> Xoana hoka exe hahotyalihare taita haikoaheta aexakeritya maheta Enore? nexa. <sup>19</sup> Hatyaoseta Jesus nexa ihiye: — Hatityoahetehena hoka hiyanaheta. Hikinatereheta atyo hityakekone hiyeta — nexa.

#### *Xekohaseti Enore Nalitare Tyoanene Tahi*

(Mateus 24.23-28, 37-44)

<sup>20</sup> Hatyaoseta haiyaharenai fariseunai axaha Jesus, xoana xowakiya xamaniya kaotyakehena Xekohaseti Enore nalitare tahi akiti.

Hoka nexa ihiyeha: — Hatyo Xekohaseti tyoanene Enore nalitare atyo maisa kawaiyakere xini. <sup>21</sup> Maisaiya atyo xala harenai nita: “Xiyaiyehena, owene tyoanita”, exahe, “Exe nali tyoanita”, nita. Hiyaiya, Xekohaseti Enore nalitare atyo tyoanita xinekoni — nexa.

<sup>22</sup> Hatyaoseta nexa haxaotyakiraharenai hiye: — Haxowakaite kasanite xiyaiya xaokowi Haliti Ityani, xakore hoka maisaiya atyo xiyaiyitene. <sup>23</sup> Hoka haiyaharenaita nehena xihiye: “Witya ali xiyaiya”, exahe “Nali xiyane xiyaiya”, nexahaite. Xakore hoka awa atyo xiyane xatawene. <sup>24</sup> Hiyaiya, kahihiyeha hoka enokoa nali hamaniyata xane hamaniya werokakoa mokita. Nikareta atyoite tyoona Haliti Ityani tyoaneneheta xowaka. <sup>25</sup> Xakore hoka ite kaxemakawatikisaka hotohare, exahe maisa ite kalikiniyerenai aokahitene haomanaha — nexa.

<sup>26</sup> — Noé xowakiya tyoanahitere akereta atyoite Haliti Ityani tyoaneneheta xowaka.

<sup>27</sup> Hatyo xowakiya tyotyaha kanakairahitaha, terahitaha, tyoanakakoahitaha harenai, Noé isoahenere kanowa kalorexe ako kijiya. Hatyaoseta one more exahitaha hoka tyotyaisahene. Nikare ite tyoona Haliti Ityani kaokeheteherenere xowaka.

<sup>28</sup> — Nikareta tehitija tyoona Ló xowakiya. Tyotyaha kanakairahitaha, terahitaha, iyahitaha, betetyahitaha, fityahitaha, hati tyomahitaha xoaha. <sup>29</sup> Hoka Ló kikisoahete-henere Sodoma nalita ferakeneta enokoata exoa irikati enxofre xoaha hoka aisahene tyoty.

<sup>30</sup> — Nikare ite tyoona Haliti Ityani kaokeheteherenere xowaka. <sup>31</sup> Hoka maika xala xamani hatiri tyoanita hoka exoaheta hoka tekoahena rotita, awa atyo ahowitiharetyoa xane haxiyeahrenai iyehetehena. Exahe xala xamani mase xaneta hoka awa atyo haikoahetehena hahana xeta. <sup>32</sup> Xotyaxematyaira Ló exanityo tahi akiti. <sup>33</sup> Xala xamani atyoite wenati waiyexe tawita hoka meta atyoite enonita. Hoka xala xamani atyoite nokoamaniye tyoanita hoka nohiyiti waini hoka hatyo atyoite kaoka wenati waiyexe.

<sup>34</sup> — Hatyo xatinite hinamanaite nemakita haxawalita kamakoa hoka hatitaiya kakolatyaka hoka hatyaita enaoseta kahalakisaka. <sup>35</sup> Hinamahalo ohiroite haxawalita mehititaha trigohe, hoka hahaloite kakolatyaka hoka hahaloite enaoseta kahalakisaka.

<sup>36</sup> Nikare tehituyaite hinamahare haliti ite hakita masenekoa hoka hahare ite kakolatyaka hoka hahare ite kahalakisaka enaoseta — nexa Jesus.

<sup>37</sup> Hatyaoseta exaotyakiraharenai axene: — Xekohaseti, alyako xeta kakolatyakahitaha? nexaha.

— Aliyako xamani atyoite kamati tyaonita hoka nalite olohonai hohisakoahena — nexa Jesus.

## 18

### *Wainiyanenero, Watyalisatiye Xoaha Tahi*

<sup>1</sup> Jesus exakere aimenekohitiya, hotikisa enomanaha hoka iraexatyaha mene hoka maxamaikoharenehare tyaonaha maheta: <sup>2</sup> — Hatya wenakalati koa tyaonita hatya haliti watyalisatiye. Hoka maisa mairare Enore, exahe maisa xala hare aiminisare. <sup>3</sup> Hatyokoa tehituya tyaonita ohiro wainiyanenero. Hatya iniyalahare mokitene hoka tya fera kaokita watyalisatiye ana hoka nita: “Hakahinaehena natyo nahalakoihare nonitata!” nita ihiye. <sup>4</sup> Xakore hoka waha maisa kahinaetene aokowita. Xakore hoka wahehena hoka exakere ahekotya: “Aliterexe maisa Enore nomairare, exahe maisa xalahare naiminisare. <sup>5</sup> Xakore hoka exe ohiro nomaxaharehena mokita hoka nakahinaetene ite. Maisaiya nakahinaetene hoka ekakoitaiya emaxahalikisa kaiserehare natyo”, nexa.

<sup>6</sup> Hatyaoseta Jesus nehituya: — Hoka waiyira xasemehena exe watyalisatiye mahakaiserexe niraine. <sup>7</sup> Xoana Enore maisaiya kahinaetita hakoamaniya tyaoniterenai, kawijiterenai ferakoa, makiya harenai, hakahinaetyaka aohenaha hoka? Xoana howitihareya hakahinaerahene kakoa? <sup>8</sup> Natyo atyo nomita xihkiye: kahinaetyaite hatyo halitinai, haxerore ite hatyoharenai tyoma! Xakore hoka Haliti Ityani tyohetehenere xowakaite, xoana waikohekoa tyaoniterenai kaite tyakekohenene? nexa.

### *Fariseu, Kalorexe Noloxa Resebetyasehare Xoaha Tahi*

<sup>9</sup> Haiyahare waiyexeharexenai aokowiha hoka haiyaharenai mawaiyexehareharexexe aokaha hoka Jesus exakere aimenekotya enomanaha: <sup>10</sup> — Hinamahare halitinai xaneha Iraexatyakalati Hanako iraexatyaha maheta. Hatya Fariseu, hatya kalorexe noloxa resebetyasehare xoaha. <sup>11</sup> Fariseu tityoa hawawahare hoka exakere iraexahena: “Enore, nihalahare hikakoa. Hiyaiya, maisa atyo xiyealiti xawaiyetyasehare xini natyo, maisa nokaiwarexe, exahe ohiro nowatyaliye haiyaharenai akereta. Nihalahare tehituya hikakoa. Hiyaiya, maisa atyo exe kalorexe noloxa resebetyasehare akereta xini natyo. <sup>12</sup> Hasemanane nihatyaka atyo hinamaki ferakene nomanakairita notyaxematya hiso maheta, exahe nokainotyoani hiyeta atyo holini nijita homana”, nexa.

<sup>13</sup> — Hoka olo resebetyasehare atyo sekota iraexahena, maisa kenekakoatyare hekoti eno xeta, hatikolalikoa mokotya (haxamaikoharene hiyeta) hoka nehena: “Enore, hairakoaneharehena natyo. Hiyaiya, iniyalahare nomasehare atyo natyo”, nexa.

<sup>14</sup> — Hoka natyo nomita xihkiye: hatyo haliti atyo, maisa atyo etake hahare xini, xaneheta hahaha xeta hamehexaikoharene Enore kakoa. Hiyaiya, xala xamani atyoite kalorexe aokowita hoka wakahare atyoite kaxomokaka, hoka xala xamani atyoite maisa haiyanae xahehare aokowita hoka kalorexe atyoite kaxomokaka — nexa.

### *Jesus Wenati Waiyexe Aoka Xoimanai Ana (Mateus 19.13-15; Marcos 10.13-16)*

<sup>15</sup> Hatyo najikinita haiyaharenai kolatyaha xoimamokosenai Jesus ana, ekaokakisa hakahe ihiyeha hoka wenati waiyexe aoka enomanaha maheta. Xakore hoka exaotyakiraharenai waiyahene hoka mahokoanetyahene.

<sup>16</sup> Hoka Jesus kawisa xoimanai hahaliya hoka nexa: — Kotare xoimanai tya nomani, awa atyo xamahokoanetyahene. Hiyaiya, Enore waikoherakoa atyo exe xoimanai akereharenai anere. <sup>17</sup> Aliterexe nomita xihkiye: xala xamani atyoite maisa exe xoimanai akereta Enore niraene tyakekota hoka maisaiya aliyakere tyaonahitaha exema — nexa.

*Haliti Kaoloxere Tahi**(Mateus 19.16-30; Marcos 10.17-31; 1 Timóteo 6.6-10; Tiago 5.1-3)*

<sup>18</sup> Hatya xekohaseti judeu axa Jesus: — Waiyexe Xaotyakisatiye, xoareya notyoma hoka kaxekaka nomani wenati waiyexe matyotenehare? nexa.

<sup>19</sup> Hoka Jesus nexa ihiye: — Xoana hoka waiyexe haoka natyo? Enore taita atyo waiyexe, maisa atyo hatehitiya aka. <sup>20</sup> Maisa hoka koxaka hasemita Xaotyakiyahonai: “Awa atyo iniyalahare hisoma ohiro kakoa, awa atyo haisa, awa atyo hikaiwa, awa atyo hamaoseratya, haiminisa hexe, hityo xoaha”, nitere — nexa Jesus.

<sup>21</sup> — Noxoiminita atyo tyotya hatyo xaotyakiyahonai xema notyaonita — nexa hatyo haliti.

<sup>22</sup> Jesus sema nikare iniraine hoka nexa: — Hátitehena himaomanehare. Habetehena tyotya hixiyeharenai hoka hisehena olo maxiye hareharenai ana. Nikare ite hisaona hoka hikaxiyeharexe ite hisaona enokoa nali. Hatyaosetaite hisoheta hoka hisoa noximi — nexa.

<sup>23</sup> Hatyohare sema hatyo haliti hoka kalore amaikohare, kahare kaxiyeharexe hoka.

<sup>24</sup> Jesus waiya examaikoharene hoka nexa: — Howitihare atyo kaxiyeharexenai nawenane Enore koa maniya. <sup>25</sup> Howitihare atyo kaxiyeharexenai nawenane Enore koa maniya, kamelo howitihare kaxajiyakisakitere awiyahi nakoako xahehare howitini atyo — nexa.

<sup>26</sup> Hoka iniraene semehenerenai axene: — Hoka xala ite nikare hoka kaiyakehetehena? nexaha.

<sup>27</sup> — Halitinai ana howitihareterehare atyo Enore ana maisa howitiharexe — nexa Jesus ihiyeha.

<sup>28</sup> Hatyaoseta Pedro nexa: — Hasemahena, wiso atyo wahalakisa tyotya hoka wisoa hiyema — nexa.

<sup>29</sup> — Aliterexe nomita xihiye: Xala xamani atyo ite halakisa hahaha, haiyanityo, haximarenenai, hahinaeharenai, haisaninai harenai, Enore xema maniya hawenane hiyeta hoka <sup>30</sup> kalikini ali tyaonitatere xowakaite exahehare kaxekakeheta enomana. Hoka haxowakiyaita wenati waiyexe matyotenehare kaxekakihitiya enomana — nexa.

*Jesus Iraehitiya Hakamane, Hakaseneheta Tahi**(Mateus 20.17-19; Marcos 10.32-34)*

<sup>31</sup> Hatyaoseta Jesus xane haware haxaotyakiraharenai kakoa hoka nehena ihiyeha: — Xasemahena, wiyanetaty Jerusalém xeta. Nalityaite iraiti xakaisaseharenai xairahenahere Haliti Ityani tahi akereta kawenatyakehena. <sup>32</sup> Kahalakisakaite majude-uneharenai ana hoka hatyonaito koexahalisene, kirawanahenite, xataholisahenite, <sup>33</sup> mokotyahenite hoka hatyo najikinitaite aisahene. Xakore hoka hanamaki ferakene najikinitaite kaseheta — nexa.

<sup>34</sup> Exaotyakiraharenai ana maisa terota waiyekhalakita Jesus niraene. Exe irae-henere tahi metahare tyaona enomanaha hoka maisa Jesus iraitere waiyekhalakita enomanaha.

*Jesus Kaxoseheta Maxosehare**(Mateus 20.29-34; Marcos 10.46-52)*

<sup>35</sup> Hatyaoseta Jesus okoi xane kaokehena wenakalati Jericó nali. Hoka hatya haliti maxosehare tyokita ahoti kiliki, axita olo. <sup>36</sup> Hoka sema kahare halitinai jiye henerenai kasako hoka axahene: — Xoare nemahare nasemita? nexa.

<sup>37</sup> Hoka nexaha ihiye: — Jesus Nazaré yere jiye hena — nexaha.

<sup>38</sup> Hatyaoseta maxosehare kawayahena: — Jesus, Davi jikolahare, hairakoaneharehena natyo! nexa.

<sup>39</sup> Hoka enaheta xaneterenai mahokoanetyaha ekawira, kasani mema tyaona aokahitaha. Xakore hoka exahehare kinatyaxa kawayatya: — Davi jikolahare, hairakoaneharehena natyo! nehitiya.

<sup>40</sup> Hatyaoseta Jesus tityoa hoka enolokaka aoka. Tyoa kaoka ehaliya hoka Jesus axene:

<sup>41</sup> — Xoare notyoma homana haokita? nexa.

— Xekohaseti, nowaiyakatyareheta naokowita! nexa ihiye.

<sup>42</sup> Hoka Jesus nexa ihiye: — Hiyaiyakahetehena. Kalikini atyo hawaiyeheta hityakekone hiyeta — nexa Jesus.

<sup>43</sup> Hatyaoseta waiyakatyarehetehena rotita hoka xane Jesus xema, ihalahare Enore kakoa. Tyotya halitinai waiyaha hatyoharenai hoka ihalahareha Enore kakoa.

## 19

### *Jesus, Zaqueu Xoaha Tahi*

<sup>1</sup> Hatyaoseta Jesus xane kaoka Jericó hoka jiyehe na wenakalati. <sup>2</sup> Hoka nali hatya haliti kaoloxere tyaonita, Zaqueu nexarexe. Kalorexe noloxa resebetyaseharenai xekohase tyaonita. <sup>3</sup> Hoka kasani waiya aokowita Jesus xakore hoka maisa aliyakere. Kahare halitinai, exahe maisa wahaharexe xoaha hoka. <sup>4</sup> Hatyaoseta tema xane halitinai naheta hoka kakoha halo halo howero kate, waiya maheta Jesus, hatyoaho ijiyanehena hoka.

<sup>5</sup> Hoka Jesus hatyo akitihena hoka kenekakoaty waiya hoka nexa Zaqueu hiye: — Zaqueu, hihalahare hexoahetehena. Awisa hihanako nali notyoa notemaka naokowi — nexa.

<sup>6</sup> Hatyaoseta Zaqueu ihalahare exoaheta, xane ekakoa hahanako xeta haihalaharene kakoa.

<sup>7</sup> Tyotya waiyahene hoka iraehenaha etahi: — Kaxiyani, exe halitite xane nemahena iniyalahare nomasehare hanako! nexaha amai kohareha Jesus kakoa.

<sup>8</sup> Hatyo najikinita Zaqueu tityoa hoka nexa Xekohaseti hiye: — Hasemehena, holinite noloxi hiyeta nisa maoloxaharenai ana. Exahe xala xamanite koxaka nokaiwita hoka 4-kite exahexe niseheta enomana — nexa.

<sup>9</sup> Hoka Jesus nexa: — Kalikini atyo exe haliti kaiyakeheta iniyalahare maniyata, exahe exe haliti tehitia atyo Abraão jikolahare. <sup>10</sup> Hiyaiya, Haliti Ityani atyo tyoa taweheta, iyeheta maheta mititereharenai — nexa.

### *10-hokose Olo Hokosenai Tahi (Mateus 25,14-30)*

<sup>11</sup> Hatyaoseta Jesus xakaihitiya ihiyeha haxaimenekola kakoa iniraene semehenerenai ana. Jerusalém owitehena mokahita hoka exahekolaha hiye hoka motyala okoi Xekohaseti Enore nalitare kalorexe kaotyakehena aokahitaha hoka.

<sup>12</sup> Hatyo hiyeta Jesus nexa: — Hatya haliti kalorexe ityani konitare xane hakoa wenakalati seko akiya, kalorexe tyaona hoka hatyo najikinita haikoaheta maheta. <sup>13</sup> Haxanene nahitita kawisa 10-harenai hawakaneharenai hoka isa enomanaha ini-hatyakahokoseha olohokosenai ouro nomaka, hoka nehena ihiyeha: “Xasemehena, xoare xamanite xisoma exe olo kakoa, exahe xoanere xamanite xakajianetene na-haikoahetehenere kijiya”, nexa.

<sup>14</sup> — Hoka ihinaeharenai enawenakala yerenai kirawanetene. Hatyo hiyeta axikaty haiyaharenai enajikinita, nexa ihiye maheta: “Kasani exe haliti maisa wiye kohase tyaona waokare”, nexaha maheta.

<sup>15</sup> — Hatyaoseta hatyo haliti kalorexe tyaona hoka haikoaheta hawenakala xeta. Hoka hawakaneharenai kawisa, etake olo isehenere enomanaha akiti sema aokowita, xoanere xamani ala kajianetehene hoka.

<sup>16</sup> — Hetatiyehare kaoka hoka nexa ihiye: “Xekohaseti, etake olo hokose ouro nomaka hisehenere nomani kakoa 10-hokose olo nakajianetene”, nexa. <sup>17</sup> “Waiye kaiserehare!” nexa. “Hiso atyo wakahare waiyexe! Hiyaiya, hawaiyore atyo hikaxaikota inirere. Hatyo hiyetaite 10-koa wenakalatinai xekohasehare namoka hiso”, nexa.

<sup>18</sup> — Hatyaoseta hatisa wakahare kaoka enomana hoka nexa ihiye: “Xekohaseti, etake olo hokose ouro nomakere hisehenere nomani kakoa 5-hokose olo nakajianetene”, nexa. <sup>19</sup> “Hiso atyoite 5-koa wenakalatinai xekohasehare hisaona”, nexa exekohase ihiye.

<sup>20</sup> — Hatyaoseta hatya wakahare kaokehitiya enomana hoka nexa: “Xekohaseti, owene holoxa hokose. Nityahalisene imiti taose kakoa hoka nateroakisene. <sup>21</sup> Nomaira hiso. Exahe waiyekehalakita atyo nomani hiyalijinharene, exahe hiyatatere haiyanai

xiyehare, maisa xakore hixiyehare xini hoka. Exahe himixitatere, maisa xakore hiyafera xini hoka”, nexa. <sup>22</sup> Hoka nexa ihiye: “Hiso atyo wakahare maisa waiyexe! Hiraene kakoitaite iniyalahare namoka hiso. Waiyekehalakita atyo homana noxalijininalini, exahe niyitere haiyanai xiyehare, maisa xakore noxiyehare xini hoka. Exahe nimixiterekare nomaxafirinhare. <sup>23</sup> Xoana hoka maisa noloxi olo xomokakala hanako hekoti hamokita? Nikareya hamokarene hoka noxanini hekotaiya, nahaikoaheta hoka kajianexeya naresebehetene”, nexa.

<sup>24</sup> — Hoka nexa nali tyaaniterenai hiye: “Xiyejeta ollokose enonita hoka xisene 10-hokose olo kakoare ana”, nexa. <sup>25</sup> “Xekohaseti, koxaka atyo 10-hokose olo kakoare!” nexaha.

<sup>26</sup> — Hoka xekohaseti nexa: “Aliterexe nomita xihiye: xala xamani atyoite kalore kakoare hoka exaheharexe ite kaxekakihitiya enomana. Xakore hoka xala xamani atyoite maisa xoare kakoare hoka exahe inirere kakoare ene hoka iyehenahitene atyoite enonita. <sup>27</sup> Hoka kalikini xanolohena ali nahalakoharenai, kasani emaxekohase-hareneha notyaona aokiterenai hoka xaisehenahene nahalakoita!” nexa.

### *Jesus Kaokehena Jerusalém Nali*

(Mateus 21.1-11; Marcos 11.1-11; João 12.12-19)

<sup>28</sup> Hatyo irahehene najikinita Jesus xanehitiya enahetaha Jerusalém xeta.

<sup>29</sup> Hatyaoseta xane kaokehena wenakalatinai Betfagé, Betânia xoaha haliya, hoka Oliveiras tyairiya nalita axikatya hinamahare haxaotyakirahare haheta maniya,

<sup>30</sup> hoka nexa ihiyeha: — Xiyanehena exe wenakalati waheta maniya tyaaniterenai nali. Xikaokehenaite hoka owene ite borikose exolatyakahare tyaanita, maokatyakaharetata eheno. Hoka maika xamaxolatene hoka xisoa ekakoa ali. <sup>31</sup> Maika xala xamani axehehena xiso, exahe xoare maheta xamani xaolihenene hoka xexa ihiye, “Xaotyakisatiye aokitene haomana”, xexa ihiye — nexa.

<sup>32</sup> Xaneha hoka Jesus iraetere akereta taita waiyaha. <sup>33</sup> Aolihenaha borikose hoka ekaxaikotyaseharenai axahene: — Xoana hoka borikose xaolihena? nexaha.

<sup>34</sup> — Xaotyakisatiye aokitene haomana hoka — nexaha.

<sup>35</sup> Hatyaoseta nolokaha borikose Jesus ana. Hoka mokaha eheno haimanasenaiha hoka kahinaetyaha Jesus tyoka eheno maheta. <sup>36</sup> Hatyaoseta Jesus jiyejena hoka halitnai haimanasenaiha mokahitaha ahotoyah.

<sup>37</sup> Hatyaoseta kaokehena Jerusalém haliya, Oliveiras tyairiya xexoakala nalihena hoka kahare halitinai ekoamaniya tyaaniterenai xanetaha exema. Awaiyetiterenai ihala-harenenaha Enore kakoa hoka kinatyaxa kawayahenaha, tyotya xoalini hare enómane waiyehenaherehare hiyeta. <sup>38</sup> Hoka nexahitaha:

— Kasani Xekohaseti Enore waiye moka kalorexe enexare kakoa tvoiterekare waokita!

Wenati waiyexe enokoa nali, exahe Enore kakoa kaihalaharetyaka waokita! nexaha.

<sup>39</sup> Hatyaoseta haiyaharenai fariseunai tyaaniterenai kaharexe halitinai koni nexaha Jesus hiye: — Xaotyakisatiye, hiwatyalihena hikoamaniya tyaaniterenai hoka mema tyaaonaha! nexaha.

<sup>40</sup> — Aliterexe nomita xihiye — nexa Jesus: — Memaiya tyaojenahitaha hoka sehalinaiya kawayatya — nexa.

### *Jesus Tiya Jerusalém Kawa*

<sup>41</sup> Hoka Jesus xane kaokehena Jerusalém haliya hoka waiya wenakalati hoka tiya ekawa. <sup>42</sup> Hoka nexa: — Kaxiyani, Jerusalém! Kalikinitaiya atyo waiyekehalaka homana, xoare xamaniya hisoma hoka wenati waiyexe koamaniya hawenaneheta hoka ehekoreya! Xakore hoka kalikiniya atyo maisa hatyoharenai waiyekehalakita homana. <sup>43</sup> Hiayiha, haxowaka ferakenehenaite hoka hahalakoaharenaite talahokotya hiso tolokoiyohi kakoa, exahiyatyaite hiso, exahe ehoyasekoatyahaite hiso tyotya maniyata.

<sup>44</sup> — Mawenekoaretyahaite hiso, tyotya hikoa tyaoniterenai xoaha. Maisait sehalì heno tyaohitita. Hiyaiya, maisa atyo waiyekehala kota homana Enore tya iye heta hiso aokowihenere xowakere — nexa.

*Jesus Betetyatiyenai Aihikoaheta Iraexatyakalati Hanakota*

(Mateus 21.12-17; Marcos 11.15-19; João 2.13-22)

<sup>45</sup> Hatyaoseta Jesus xane isoa Iraexatyakalati Hanako hoka aehikoaheta betetiterenai.

<sup>46</sup> Nexa ihiyeha: — Iraiti Waiyexe kaxairatyakehenere nali exakere xairatyoare tyaonita Enore niraene:

Nohani atyoite Iraexatyakalati Hana kakaexaretyaka, nexa.

Xakore hoka xiso atyo kaiwarexenai xateroakisakala niyahare xamokene — nexa Jesus ihiyeha.

<sup>47</sup> Jesus aotyakijita halitinai ferakiti nihatyaka Iraexatyakalati Hanako. Hatyaoseta sacerdotenai xekohasenai, Xaotyakiyaho kakoa waiyoreterenai, judeunai nityohalitiranae xoaha aisahene aokowihenaha. <sup>48</sup> Xakore hoka maisa aliyakere nikare mokaruhene, tyotya halitinai awaiyetyahitaha exaotyakira hoka.

## 20

*Jesus Atyo Iraiti Kakoare*

(Mateus 21.23-27; Marcos 11.27-33)

<sup>1</sup> Haxowaka Jesus Iraexatyakalati Hanako tyaonita hoka aotyakijita halitinai, exahe yakaita ihiyeha Iraiti Waiyexe tahi. Hoka sacerdotenai xekohasenai, Xaotyakiyaho kakoa waiyoreterenai, judeunae nityohalitiranai xoaha kaokaha enomana <sup>2</sup> hoka axehenahene: — Hiyakaihena wihiye, xala niraene kakoare hiso hoka exeharenai hisomita? Xala axikatya hiso hoka nikare hisaonita? nexaha.

<sup>3</sup> Hoka Jesus nexa ihiyeha: — Natyo tehituyaite naxa xiso. Hoka xekoaxahena: <sup>4</sup> Xala niraene xema João batixatya haliti? Xoana Enore niraene xema, xoana halitinai niraene xema kore? nexaha.

<sup>5</sup> Hatyaoseta hekota hatyo kakoha axakakoahenaha: — Xoare wehenaita? “Enore niraene xema”, wexaiya hoka nexaiya axa wiso: “Xoana hoka maisa xityakekota João?”

<sup>6</sup> Exahiya, “Halitinai niraene xema”, wexa hoka exe halitinaiya mokotyaha wiso sehalì kakoa. Hiyaiya, João atyo iraiti xakaisasehare terota aokahitaha — nexaha.

<sup>7</sup> Hatyo hiyeta nexaha: — Maisa wawaiyorexe. Kala xala niraene xema xamani João batixatya — nexaha.

<sup>8</sup> — Hoka natyo tehituya atyoite maisa noxakaita xala niraene xema exeharenai notyomitita — nexa Jesus.

*Masene Nomaseharenai Xalijiniharexenai Tahi*

(Mateus 21.33-46; Marcos 12.1-12)

<sup>9</sup> Hatyaoseta Jesus exakere aimenekotya halitinai ana: — Hatya haliti fitya uva katenai hamaseneko hoka halakisene haiyanai halitinai ana kaxaikone maheta hoka xonehena hoka irakakakoahenahitene maheta. Hatyaoseta xane seko akiya hoka waha tyaona. <sup>10</sup> Iximexaka xowakehena hoka axikatya hatya hawakanehare, isehenahitaha maheta enomana holini. Xakore hoka masene kaxaikotyaseharenai mokonasetene hoka axikahenahitene eháre firereta. <sup>11</sup> Hatyaoseta axikahitiya hatya hawakanehare, xakore hoka mokonasehenahitinyene. Haihare xakere mokahene hoka axikahenahitene eháre firereta. <sup>12</sup> Hatyaoseta axikahitiya hatisa hawakanehare, xakore hoka masene kaxaikotyaseharenai mokotyahene tehituya hoka axikahenahitene.

<sup>13</sup> — Hatyaoseta masene xekohasehare ahekotya: “Xoanaite notyaohena? Naxikatyaite nityani noxiyakawali. Hatyo atyoite hoka aiminisahene”, nexa. <sup>14</sup> Xakore hoka masene kaxaikotyaseharenai waiyaha ityani hoka nexaha: “Exe atyo masene xekohasehare ityani. Nikahena hoka waisene hoka masene ite womanere tyaona”, nexaha. <sup>15</sup> Hatyaoseta otokaha ityani hoka xaneha haware ekakoa masene nonitata hoka aisahene.

Hatyaoleta Jesus axahene: — Xoanaite masene xekohasehare mohena hatyo masene kaxaikotyaseharenai xaoka? <sup>16</sup> Tyoaite hoka aisehena hatyo halitinai, exahe isehitiyaite hahananehare hahotyalinai masene kaxaikotyaseharenai ana — nexa.

Semaha hatyoharenai hoka nexaha: — Kasani maisa nikare kawenatyaka waokare! nexaha.

<sup>17</sup> Xakore hoka Jesus waiye wahakotya enomanaha hoka nexa: — Iraiti waiyexe kaxairatyakehenere atyo nexa:

“hali hati nomaseharenai maxaokarehenere atyo hati nekesako kaxomokaka”, nexa.

<sup>18</sup> Xala xamaniya atyo exoa hatyo sehalia heno hoka taikohekao atyoite. Hoka hatyo sehalia atyo hatya heno exoa hoka miyoheteniya atyo — nexa.

*Jesus Axaha Olo Xekaka Tahi  
(Mateus 22.15-22; Marcos 12.13-17)*

<sup>19</sup> Hatyaoleta Xaotyakiyaho kakoa waiyoreterenai, sacerdotenai xekohaseharenai xoaha ana waiyekhalakita. Jesus xaimenekola atyo etahiha iraeta, hoka otokahene aokowi hatyo xowaka. Xakore hoka mairahitaha halitinai hoka maisa xoana mokahitene.

<sup>20</sup> Hatyaoleta kaxaikohenaha Jesus. Bakatya haiaharenai halitinai hoka axikatya-hene axaha maheta Jesus. Hoka waiyexeharexenai aokowiha hoka Jesus nawenane waiyaha hoka kasani hairaine kakoita komaniyatyoa aokahitaha hoka iraharetyahene maheta. Nikare tyaona hoka hatyohare hiyeta otokahene hoka isahene aokowiyahitaha kalorexe ana. <sup>21</sup> Hoka hatyo halitinai axahene: — Xaotyakisatiye, waiyekhalakita atyo womana. Hiraeterehare, haotyakijitrehare atyo aliterexe. Waiyekhalakita tehitia womana. Hakakoa atyo hiyaiyita halitinai, hoka aliterexe kakoa haotyakijita halitinai Enore aokitere akereta. <sup>22</sup> Hoka hiyakaihena wihiye: Xoana wiyaotyakisakaho ala axakoanetita, xoana mahokoanetita kore ala wiykane olo kalorexe Roma yere ana? nexaha.

<sup>23</sup> Hoka Jesus otya iniyalahare exahekolaha hoka nexa: <sup>24</sup> — Xama ali nomani hatya olo hokose. Hoka xala nexare exahe tiho niyakotini exe olo hokose hiye? nexa.

— Kalorexe — nexaha.

<sup>25</sup> Hoka Jesus nexa ihiyeha: — Xoare xamani atyo kalorexe Roma yere anere hoka kalorexe ana xisene. Xoare xamani Enore anere hoka Enore ana xisene — nexa.

<sup>26</sup> Hoka maisa Jesus aliyakere xoare tahi kakoa iraharetyahitaha halitinai nahalakoa. Hatyo hiyeta mema tyaonaha, hakaharetyoaha exekoaxala kakoa.

*Jesus Axaha Kamatinai Kaseneheta Tahi  
(Mateus 22.23-33; Marcos 12.18-27; João 5.21; Romanos 8.10-11; 1 Coríntios 15.35-57; 1 Tessalonicense 4.16; Apocalipse 20.4)*

<sup>27</sup> Hatyaoleta haiaharenai saduceunai tyoaha Jesus ana. Enomanaha haliti wainihena hoka maisa kasehetere. Tyoaha Jesus haliya hoka nexaha: <sup>28</sup> — Xaotyakisatiye, Moisés atyo exakerexe aotyakisa wiso: Hatya halitiya waini hoka haiyanityo maisanihalota halakisa hoka iximarene atyoite tyaoheta hatyo wainyanenehenolo kakoa. Hoka kaisaniha hoka enaxenane wainihenere ene ityaninai kaxaokaka maheta aoka.

<sup>29</sup> — Hoka 7-harenai haximarene kakoarenai tyaonahitaha hoka enahetahareha kaiyanityo hoka maisanihareta waini. <sup>30</sup> Hoka ihiyetare iximarene tyaoheta hatyo wainyanenero kakoa, xakore hoka wainihitiya maisanihareta. <sup>31</sup> Nikare ihiyetare iximarene tyaohitiya ekakoa hoka wainihitiya. Nikare makere tyaonaha hatyo haximarene kakoarenai: tyotyaha wainiha maisaniharahitaha ekakoa. <sup>32</sup> Hatyo najikinita ohir tehitia waini. <sup>33</sup> Nikarite hoka xala exanityo kaisere ite hatyo ohir tyahetehena, kamatinai kasehetehenerere xowakiya? Hiyaiya, tyotyaha atyo tyaonaha ekakoa — nexaha.

<sup>34</sup> Hoka Jesus nexa ihiyeha: — Ali waikohekao atyo halitinai kaiyanityota, exahe ohironai hoka kaiyanenahitaha. <sup>35</sup> Hoka kasehetehenerenai, exahe wenati haxowaka niyahare anerenai terota atyoite maisa tyaonakakoahenahitita. <sup>36</sup> Hiyaiya, anjonai

akeretaha atyoite, exahe maisaiya atyo wainihenahititaha. Enore ityaninai atyo, hiyaiya, kasehenahitaha atyo.

<sup>37</sup> — Hiyaiya, waiyeckehalaka atyo Moisés xakai kamatinai kaseneheta tahi. Hananehaliti kiritere tahi iraehenere xowaka. Enore tahi xairatya hoka Enore atyo Abraão, Isaque, Jacó xoaha Nenorexa aoka. <sup>38</sup> Hatyoharenai atyo hotikijita hoka Enore atyo kasexenai Nenorexa, maisa kamatinai Nenorexa xini. Hiyaiya, enomana atyo tyotyaha atyo kasetaha — nexa.

<sup>39</sup> Hatyaoseta haiyaharenai Xaotyakiyaho kakoa waiyoreterenai nexaha: — Ehekore hekoaxatya, Xaotyakisatiye — nexaha.

<sup>40</sup> Hatyaoseta maisa kinatyatyako axehenahititene.

*Jesus Axahene Enore Kalorexe Aohenere Tahi  
(Mateus 22.41-46; Marcos 12.35-37)*

<sup>41</sup> Hatyaoseta Jesus axahene: — Aliyakerexe hoka Enore Kalorexe Aohenere atyo Davi jikolahare aokahitaha? <sup>42</sup> Hiyaiya, hatyo Davi atyo exakere nexa, Salmos nanekoa nali: Nexa Xekohaseti Noxekohase hiye: “Hisokehenanofihini maniya

<sup>43</sup> hahalakoaharenai hikiji katyahe namohenere kijiya”, nexa.

<sup>44</sup> Hiyaiya, Davi atyo Haxekohase aokene, hoka aliyakereya Enore Kalorexe Aohenere atyo Davi jikolahare xaohena? nexa.

*Jesus Irae Xaotyakiyaho Kakoa Waiyoreterenai Tahi  
(Mateus 23.1-36; Marcos 12.38-40)*

<sup>45</sup> Halitinai semaxematyahitaha Jesus niraine hoka nexa haxaotyakiraharenai hiye: <sup>46</sup> — Xiriharira Xaotyakiyaho kakoa waiyoreterenai kakoa. Hatyonai atyo awaiyetyahitaha haetonaneha imiti waiyeharexe ako, exahe wetekokoa hoka kasani halitinai haxaiminiraha kakoa katyawaxaha ihiyeha aokahitaha. Xanehenaha xahohisakoatyakalati hanako hoka waiyexe okahakalati koa tyokahitaha, exahe nakairati xowakehena hoka kasani okahakalati waiyexe koa tyokaha aokowihitaha. <sup>47</sup> Exahe kaiwahitaha, mehotyahitaha wainyaneneronai xiyejalo. Hoka teraharetyoaha aokowihenaha hoka waha tahi iraexatyahitaha. Hatyo hiyeta iniyalahare kaxomokakehenahere atyoite exahehare niyalahare — nexa.

## 21

*Wainyanenero Maoloxahalo Xekane Olo Tahi  
(Marcos 12.41-44)*

<sup>1</sup> Jesus tityoita Iraexatyakalati Hanako hoka wahakoita halitinai ana hoka waiya kaoloxerenai xomokala kajali olo nitini ako. <sup>2</sup> Waiya tehitia hatya wainyanenero maoloxahalo xomokala hinama hokose olo, inira xaimanexe.

<sup>3</sup> Hatyo hiyeta nexa: — Aliterexe nomita xihije: exe wainyanenero maoloxahalo atyo isa tyotya haiyaharenae xahexe. <sup>4</sup> Hiyaiya, haiyaharenai atyo isa kamawanetere hiyeta. Hoka exe atyo, maoloxahalo kaiserehare xakore hoka hanakaira haxiyehalo niyahare tyotya isa — nexa.

*Jesus Irae Iraexatyakalati Hana Mawenekoaretyaka Tahi  
(Mateus 24.1-2; Marcos 13.1-2)*

<sup>5</sup> Haiyaharenai iraetaha Iraexatyakalati Hana tahi, enawaiyehare ihiye tyaoniterenai sehalinai exahe xoalinhare kaxekakiterehare tahi.

Hoka Jesus nexa:

<sup>6</sup> — Haxowaka ferakenite tyotya exe xiyaiyitereharenai kamawenekoaretyakeheta. Hoka maisaiya hatya sehalinai hatya sehalinai heno tyaohitita — nexa.

*Howitiharexe Wenati, Irawaniti Xoaha Tahi  
(Mateus 24.3-14; Marcos 13.3-13)*

<sup>7</sup> Hatyaoseta axahene: — Xaotyakisatiye, xoana xowakaite hatyoharenai kaotyakehena? Xoare hare hotohare ite kaotyakehena hoka hatyoharenai kaotyakene hotikihena? nexaha.

<sup>8</sup> — Maika xirihare hoka maisa xala hare maoseraita xiso. Hiyaiya, kahare tyaite nexare kakoa kaotyakehenaha hoka nehenaha: “Natyo atyo Enore Kalorexe Aohenere”, exahe, “Koxaka atyo enaose xane hikoa”, nehenahatyaita. Xakore hoka awa atyo hatyoharenai niraene xema xisaona.

<sup>9</sup> — Awa atyo ximairehena xasemehena xaisakakoati, xalijinihare tyaoniterenai tahi hoka. Hatyoharenai hotohare atyoite kaotyakehena. Xakore hoka maisa tyaite hatyo xowaka imiyanaose xane hikoahenere — nexa.

<sup>10</sup> — Hahotyalihare ite xane hahotyalihare kakoa aisakakoahena, exahe hakoatare ite xane hakoatare kakoa aisakakoahena. <sup>11</sup> Haiyanai koaite kaotyaka waikohe tatakoane, exahe nakiti, kawe akiti kaheneharexe xoaha. Kahare ite xoalini hare amairakisare kaotyaka, exahe xoalini hare ite enokoa nali kawaiyaka.

<sup>12</sup> — Xakore hoka tyotya hatyoharenai kaotyakehenere nahititaite xikaxotokaka, xikairaeharetyaka. Xikakolatyakaite axaha maheta xiso xahohisakoatyakalati hanako hoka hatyo najikinitaite berexoako xikaxomokaka. Nohiyetite xikakolatyaka kalorexenai, xekohasetinai nahalakoa. <sup>13</sup> Nikare ite xikaxomokaka hoka hatyo xowakaite Iraiti Waiyexe xiyakaihena ihiyeha. <sup>14</sup> Hoka xasemehena: maisaiya hatyo nahitita xahekohena xikahawaonitaretyoane xiraene tahi kakoa. <sup>15</sup> Hiyaiya, natyota atyoite nisa xomana iraiti, exahe waiyoliniti hoka xahalakoaharenaite maisa jiyahaotyahitaha xiso, exahe matyakekotyahitaha xiraene. <sup>16</sup> Exahe xexenai, xiximarenenai, xihinaeharenai kaisereharenai taite aberexotyakisaha xiso. Hoka aisahaite haiyaharenai xinekonitare. <sup>17</sup> Tyotyahaite kirawaneha xiso nohiyiti. <sup>18</sup> Xakore hoka maisaite hakase hekoti xisekase mitita. <sup>19</sup> Maika heko xisaona nokoamaniye. Hiyaiya, nikare atyoite xisaona hoka xikaiyakeheta — nexa.

*Jesus Irae Jerusalém Mawenekoaretyaka Tahi  
(Mateus 24.15-28; Marcos 13.14-23)*

<sup>20</sup> Jesus nehitija: — Maika xiayiyejena Jerusalém exahiyatyoare sorarenai kakoare hoka waiyekehalaka xomana: Mawaheneta atyoite hoka kamawenekoaretyakehena.

<sup>21</sup> Hatyo hiyeta maika xala xamani Judéia koa tyaonita hoka tekoahenaira tyairi koni xeta. Maika xala xamani wenakalati tyaonita hoka kikisoahetehena rotitaira enakoata. Maika xala xamani mase tyaonita hoka awa atyo haikoahetehena wenakalati. <sup>22</sup> Hiyaiya, hatyo xowakaite atyoite judeunai nómane iniyalahare hiyeta kahenehare kaisere tyaona, hoka hatyo xowakaite tyotya Iraiti Waiyexe kaxairatyakehenere iraehenereharenai kaotyakehena. <sup>23</sup> Kaxiyani, hatyo xowakiya atyoite howithihare tyaohena tifalonai, xoimaisanironai xoaha ana! Hiyaiya, howithiharexe wenati atyoite kaotyaka waikohekhoa, exahe Enore xomokala iniyalahare atyoite kaotyaka judeunai ana. <sup>24</sup> Kahare ite kaxaisakaha kesekase kakoa, exahe haiyaharenaite kakolatyaka alita eberexotyakaharenai akereta tyotya wenakalati kalokoarenai xeta. Exahe majudeuneharenaite tyaonaha Jerusalém nali, nalita kakikiskehetehenahere kijiya — nexa.

*Haliti Ityani Tyoaneneheta Tahi  
(Mateus 24.29-31; Marcos 13.24-27; 2 TessalonICENSES 1.7; 2 Pedro 3.10; Apocalipse 1.7)*

<sup>25</sup> — Xoalini hare ite kaotyaka kamai, kaimare, xoresenai xoaha hiye. Hoka waikohekaoite tyotya haliti hotyalinaite mawaiyeharehena kalore, hamairaneha one kaloxere, exahe one ainakoiyatyoitere nemahare hiyeta. <sup>26</sup> Hakakoare waikohekaoite kahare halitinaite mawaiyehareha kalore, hamairaneha, haxahekolaha xoalinihare kaotyakene tahi xoaha hiyeta. Hiyaiya, enokoa nali kinatere tyaoniterenaite maiyaterehare tyaohitita. <sup>27</sup> Hatyaosetaite Haliti Ityanite kaotyakehetehena hoka exoahetehena kaiminiti konita, iyateliti, kalorexe xaokanatyakalati xoaha kakoa.

<sup>28</sup> — Hoka maika exeharenai kaotyakehena hoka maika heko xikinatere xisaona exahe maika xakenekakoahena. Xiyaiya, mawaheneta atyoite hoka xikaiyakehetehena — nexa Jesus.

*Jesus Halohalo Kate Hiye Aimenelekota*

(Mateus 24.32-35; Marcos 13.28-31)

<sup>29</sup> Hatyaoseta Jesus exakere aimenekotya enomanaha: — Xasemehena, halohalo exahe hatyatere atya kate tahi. <sup>30</sup> Xiyaiyehena atyo ehanahinai hikoaneheta hoka waiyekahalakita atyo xomana, okoi enonenehetehena. <sup>31</sup> Maika nikareta tehitiya exeharenai kaotyakene xiyaiyehena hoka waiyekahalakaira xomana Enore nalitare Kalorexe okoi haikoahetehenerehare — nexa.

<sup>32</sup> — Xotyaxematyaira exeharenai: exeharenaityaite kaotyaka kalikini kasetaterenai tyaonitereharenai makamaneharene nahitita. <sup>33</sup> Hoka enokoa, waikohe xoahanai tyaite maiyareheta, xakore hoka niraini tyatyoite tyaoneta mene — nexa Jesus.

*Kaxaikotyoti Tahi*

<sup>34</sup> Hoka Jesus halakihena hairaene hoka nehena: — Maika xikaxaikoawihena! Awa atyo hisehaliti, oloniti ahekakisare, exahe xawenane ali waikohekoare tahi taita xema xisaona. Hoka maisa hatyo ferakene ximaxatyahanehareta kaotyakihitita xomana.

<sup>35</sup> Hatyo ferakene ite kaotyakeheta tanolatyati akereta tyotyaha ana, hakakoare waikoheko. <sup>36</sup> Hatyo hiyeta maika xikaxaikoawita, exahe xiraexata mene hoka xikaxaihara xisaona tyotya kaotyakehenerehare nonitata. Exahe heko xikinatere xisaona maheta Haliti Ityani nahalakoa — nexa.

<sup>37</sup> Jesus aotyakijita halitinai Iraexatyakalati Hanako ferakiti nihatyaka. Hoka makiya xanehitita Oliveiras tyairiya nali nemaka maheta. <sup>38</sup> Hoka tyotya halitinai xanahitaha makiyaseta Iraexatyakalati Hanako semaha maheta iniraene.

## 22

*Ahekotyaha Aisaha Maheta Jesus*

(Mateus 26.1-5; Marcos 14.1-2; João 11.45-53)

<sup>1</sup> Maisa wahehetere Hisehaliti Nakairati Makaorehetyakahare nomaka xowaka Páscoa nexarexe naheta <sup>2</sup> hoka sacerdotenai xekohasenai, xaotyakiyaho kakoa waiyoreterenai xoaha ahekohenaha hametenetaha haxaisaneha Jesus tahi, halitinai amairakisahitene hoka.

*Judas Matawahena Jesus*

(Mateus 26.14-16; Marcos 14.10-11)

<sup>3</sup> Hatyaoseta Ahalakoahaliti kamilakoretya Judas Iscariotes nexarexe. Hatyo atyo 12-harenai exaotyakiraharenai konitare. <sup>4</sup> Hoka Judas xane irai sacerdotenai xekohasenai, Iraexatyakalati Hana kaxaikotyaseharenai kakoa, hamatawala Jesus enomanaha tahi.

<sup>5</sup> Hoka kalore ihalahareha hoka olo isaha enomanha aokowiha. <sup>6</sup> Hoka Judas tyakeko hoka kaxaikohena Jesus matawatya maheta halitinai masemakareneta.

*Jesus Nakairati Nomaka Aoka Páscoa Niyahare*

(Mateus 26.17-25; Marcos 14.12-21; João 13.21-30)

<sup>7</sup> Hatyaoseta xane hikoa Hisehaliti Nakairati Makaorehetyakahare nomaka ferakene. Hatyo xowaka judeunai aisahitaha kalanero mokosenai hoka otyaxemahenahititaha Páscoa ferakene.

<sup>8</sup> Hatyo hiyeta Jesus axikaty Pedro, João xoaha hoka nexa ihiyeha: — Xiyane nakairati xisoma womana Páscoa niyahare — nexa.

<sup>9</sup> Hoka axahene: — Alyako wiyanne wisoma hatyoharenai haokita? nexaha.

<sup>10</sup> Hoka Jesus nexa ihiyeha: — Xasemehena: xikaokehenatyaita wenakalati hoka hatya haliti kolaitere tinhilatiri ako haonexa tyaite ahalakoaty xiso. Hoka xiyanira hatyo haliti xema, hatyako isoahetehenere ako kijiya. <sup>11</sup> Hoka maika xexa hati xekohase hiye: “Xaotyakisatiye exakere waxa aokita, aliyeri akoite hatyo, exaotyakiraharenai xoaha

kanakairehenaha Páscoa ferakene nahitita?" xexaiti ihiye. <sup>12</sup> Hoka hotikisaite xomana halyako kaloakore exomokakotyakahare, ehaore akereta. Hoka hatyoakoite xisoma nakairati — nexa.

<sup>13</sup> Hoka xaneha wenakalati xeta hoka Jesus niraine akereta tyotya waiyaha. Hoka hatyo nali nakairati tyomaha Páscoa niyahare.

*Jesus Hakamane Aimenelekota Nakairati, Erati Kakoa  
(Mateus 26.26-30; Marcos 14.22-26; 1 Coríntios 11.23-26)*

<sup>14</sup> Enaose xane hikoa hoka Jesus tyoka mexa haliya haxaotyakiraharenai kakoa <sup>15</sup> hoka nehena ihiyeha: — Nokanakairi terota naokowi xikakoa exe nakairati kalikini Páscoa xowaka, nomakawatihalini nahitita. <sup>16</sup> Hatyo hiyeta nomita: maisaiya xoana hekota nokanakairihitita exehare nakairati, nokanakairihenere aliterexe nakairati kaomakehenere Enore Nawenakala kijiya — nexa.

<sup>17</sup> Hatyaoseta Jesus iya erakakalati hoka iraexatyat Enore hiye — Ehekore hamokita wiso, Abá — nexa. Hatyaoseta nexa haxaotyakiraharenai hiye: — Xotehena exe hoka xiserehenene ini xakini. <sup>18</sup> Aliterexe nomita xihiye: maisaiya atyo xoana hekota exehare vinhoxa noterehitita, Enore nalitare Kalorexe kaokehethenere kijiya — nexa.

<sup>19</sup> Hatyo najikinita iya nakairati hoka iraexatyat Enore hiye. Hatyo najikinita taikasetene hoka irakene haxaotyakiraharenai ana hoka nehena: — Exe atyo noháre hoka kaxekakehenaita kahawaonitaretya xiso maheta. Exakerira xisoma xotyaxemaheta natyo maheta — nexa.

<sup>20</sup> Kanakairehenahere najikinita nikareta iyihitiya erakakalati hoka isehityiene enomanaha teraha maheta hoka nexa: — Hiyaiya, exe atyo notimalaxi, kaxiratyakehenere kahare haliti wanahiya, kaxemaisatyakeheta maheta iniyalahare enómaneha. Exe timalati hiyeta atyo waitare wenati tyaoheta halitinai ana Enore kakoa.

<sup>21</sup> — Hoka xasemehena! Matawatyatiye atyo ali tyokita nohakakoani ali mexa haliya. <sup>22</sup> Hiyaiya, Haliti Ityani atyoite wainihena, Enore aokitere akereta. Xakore hoka kirakoanite kaxomokaka Haliti Ityani matawatyasehare — nexa.

<sup>23</sup> Hatyaoseta exaotyakiraharenai hatyokakoaha makere axakakoahenaha, xala xamaniya nikare matawahenene.

*Xala Xamani Masákare Kalorexe Enekonitareha*

<sup>24</sup> Hatyaoseta exaotyakiraharenai kinatyaxa iraikakoaha, semaha maheta xala xamani enekonitareha kalorexe kaiserehare hoka.

<sup>25</sup> Hoka Jesus nexa ihiyeha: — Kalorexenai ali waikohekoare atyo wakatita halitinai, exahe xekohasetinai atyo “Halitinai hinaeharenai” kaxaokakita. <sup>26</sup> Hoka xiso atyo maisa nikare xisaonita. Xakore hoka xinekoni kalorexe kaiserehare tyaonitere atyoite wakahare akereta tyaohena, exahe wakatitrehare atyoite kawakatyakitere akereta tyaohena. <sup>27</sup> Xala masakare kalorexe? Tyokitere mexa haliya kanakaira maheta, xoana etyaisasehare kore? Aliterexe atyo mexa haliya tyokitere kalorexe. Hoka xinekoni atyo natyo atyo tyajitrite akereta notyaonita — nexa.

<sup>28</sup> — Hoka xiso atyo eko nohaliye xisaona nomakawatihalinai xowaka. <sup>29</sup> Hatyo hiyeta Baba kalorexe mohenere natyo akeretaite natyo tehituyaite nikareta namoka xiso.

<sup>30</sup> Xisonaite xikanakaira, xisera nawenakali nali, exahe xisokaite okahakalatikoa hoka 12-hotyalinai Israel hotyalinai xekohasenai xisaona — nexa.

*Jesus Irae Pedro Kakoa  
(Mateus 26.31-35; Marcos 14.27-31; João 13.36-38)*

<sup>31</sup> Jesus nehitija: — Simão, Simão, hasemehena waiye: Ahalakoahaliti atyo koxaka kahalakisaka hasakaharetya xiso maheta. Xoisaita xiso, masene nomasehare trigose haware mokitere ekase nonitata akereta. <sup>32</sup> Xakore hoka niraexaita atyo hitahi, Simão, maisa hityakekone hahalakijita maheta. Hoka hisaohetehitiyere nokoamaniye xowaka haihalahalinikisa maheta hihinaeharenai — nexa ihiye.

<sup>33</sup> Hoka Pedro nexa ihiye: — Nomimiye atyo notyaonita nokaberexotyaki, exahe nowaini maheta hihakakoane! nexa.

<sup>34</sup> Hoka Jesus nexa: — Natyo atyo nomita hihiye: awisaite, takoira makawiraharene nahititaite hanamakite himawaiyanenehare haoka natyo — nexa.

#### *Jesus Irae Haxaotyakiraharenai Kakoa*

<sup>35</sup> Hatyo najikinita Jesus axahena: — Xoana maisa xoare hare xaokita naxikahenere xiso ximabosanehare, ximasakolanehare, ximakijitinhare xowaka? nexa.

— Maisa xoare waokita — nexaha.

<sup>36</sup> Hatyaoseta Jesus nexa: — Hoka kalikini xala xamani atyo kabosanexe, kasakolanexe hoka maika iyehetehenene. Exahe xala xamani maisa kakeserakasexe hoka maika betehena haimanase hoka iya haeho. <sup>37</sup> Hiayiya, Iraití Waiyexe kaxairatyakehenere atyo nexa: “Xalijiniharexe akereta kaxomokaka”, nexa. Hoka natyo atyo nomita xihiye: nikare terotaite nokaxomokaki. Hiayiya, xoare xamani atyoite xairatyoare tyaponita notahi hoka nikare ite nokaxomokaki — nexa.

<sup>38</sup> Hatyaoseta exaotyakiraharenaisa nexaha: — Xekohaseti, owene hinamaeho kesekase — nexaha.

Hoka: — Ehekore — nexa Jesus ihiyeha.

#### *Jesus Xane Oliveiras Tyairiya Nali*

(Mateus 26.36-46; Marcos 14.32-42)

<sup>39</sup> Hatyaoseta Jesus xane, hawenane akereta, Oliveiras tyairiya xeta hoka exaotyakiraharenai xaneha exema.

<sup>40</sup> Xane kaoka aokiteraoise hoka Jesus nexa: — Xiraexahena maisa xikamaoseratyakita maheta — nexa ihiyeha.

<sup>41</sup> Hatyaoseta kikisoa sekose aka enonyahitaha, kala xoana xamani hoka 30-metrone hare. Meholokoa hakaolise kakoa hoka iraexahena, <sup>42</sup> hoka nexa: — Abá! haokaiya hoka hemaisaheta noniti exe erakakalati emakawatikisare. Xakore hoka maisaiya atyo naokiterehare kaomakita hoka maika haokiterehare kaomaka — nexa.

<sup>43</sup> Hatyaoseta anjo enokoatare exoa enomana, aihalahalinikisene maheta.

<sup>44</sup> Kalore amaikohareta hoka Jesus masakare aiyateretyoa iraexaita. Hoka ewatehirini xata motya timalati tohira ixoita waikoa.

<sup>45</sup> Iraexahenere najikinita tityoaheta, haikoaheta haxaotyakiraharenai tyaponitere nali hoka nemakitaha waiyehenahitene, kalore amaikoharahitaha hoka.

<sup>46</sup> Hoka nexa: — Xoanere hoka xisemakita? Xatityoahetehena exahe xiraexahena maisa xikamaoseratyakita maheta — nexa.

#### *Jesus Berexotyaka Tahi*

(Mateus 26.47-56; Marcos 14.43-52; João 18.3-11)

<sup>47</sup> Jesus iraetata hoka kaokehena kahare halitinai. Judas, 12-hare exaotyakiraharenai konitare, tyoita hatyo halitinai kakoa, hoka xane kaoka Jesus haliya sohitankolisene maheta.

<sup>48</sup> Xakore hoka Jesus nexa ihiye: — Judas, xoana hisohitanakolira kakoait hamatawahena Haliti Ityani? nexa.

<sup>49</sup> Hatyaoseta exaotyakiharenai Jesus haliya tyaponiterenai ana waiyekhalaka hoka nexaha: — Xekohaseti, wiyehenaite wikeserakasenai hoka wijiyehena enomanaha? nexaha. <sup>50</sup> Hoka hatya enekonihatareha mokotya kesekase kakoa sacerdotenai xekohasehare wakanehare hoka itinihe aikotya, ifihini maniya.

<sup>51</sup> Hoka Jesus watyalini: — Hahalakihenene! nexa. Hatyaoseta itinihe hiye ekaokakisa hakahe hoka awaiyehetene.

<sup>52</sup> Hatyaoseta Jesus nehena sacerdotenai xekohasenai hiye, Iraexatyakalati Hana kaxaikotyasehareni, judeunai nityohalitiranai xoaha tyohenerenai exotokase maheta hiye. — Xoana hoka xisoa nomani kesekase atyalihose harenai kakoa xotoka maheta natyo xalijiniharexe akereta? <sup>53</sup> Ferakiti nihatayaka notyaonita xikakoa Iraexatyakalati Hanako, xakore hoka maisa atyo xotokare natyo. Hoka kalikini terota atyo nikare xiymokala natyo, exahe makaliroti niyatere xoaha hiyeta tehitia — nexa.

*Pedro Hamawaiyanenehare Aoka Jesus**(Mateus 26.69-75; Marcos 14.66-72; João 18.15-18, 25-27)*

<sup>54</sup> Hatyaoseta Jesus otokaha hoka xaneha ekakoa sacerdotenai xekohase hana xeta. Hoka Pedro sekoseta xaneta exema. <sup>55</sup> Hatyaoseta xane kaokaha hoka airihityaha wetekokoa hoka Pedro xane tyoka, hatyo tyokalyao setiterenai haliya.

<sup>56</sup> Hoka hatya wakahalo waiyene tyokita nali irikati haliya hoka waiye wahakotya enomana hoka nexa: — Exe haliti tehitia ene Jesus haliya tyaonita — nexa.

<sup>57</sup> Hoka Pedro teraharetyoahena hoka nexa: — Ohiro, maisa atyo nowaiyanihare xini! nexa.

<sup>58</sup> Hatyohekota mawahaneta, hatya haliti waiyehitiyene nalita hoka nehitia ihiye: — Hiso tehitia atyo enekonitareha — nexa.

Hoka Pedro nehitia: — Maisa atyo enekonihatareha xini natyo — nexa.

<sup>59</sup> Hatyaoseta kala wahasehena hoka hatya aiyateretyoa exahita: — Aliterexe atyo hisaonita ene ehalia. Hiyaiya, Galiléia koa yere tehitia atyo hiso — nexa.

<sup>60</sup> Xakore hoka Pedro nexa: — Maisa atyo waiyekehala kere nomani hatyo hiraitere! nexa.

Hatyo xowaka, iraetata ene hoka takoira kawisa. <sup>61</sup> Hatyaoseta Xekohaseti ehaikoahare hoka kinatyah wahakotya Pedro ana. Hoka oteheta Xekohaseti iraitere ekakoa: “Awisaite, takoira makawiraharene nahititaite hanamakite himawaiyanenehare haoka natyo”, nehenere. <sup>62</sup> Hatyaoseta Pedro hikoaheta nalita hoka tiya, kalore amai kohare hoka.

*Sorarenai Mokonasetyaha Jesus**(Mateus 26.67-68; Marcos 14.65)*

<sup>63</sup> Hatyaoseta halitinai Jesus kaxaikoterenai koexahalihenahene, mokohenahene xoaha. <sup>64</sup> Talatyaha exosenaiha hoka nexahitaha ihiye: — Hotehena, xalatya mokotya hiso! nexahitaha. <sup>65</sup> Hoka kahare xoalini hare iraihitaha ekakoa, kahare watoxaharetyahene.

*Jesus Nolokaha Xekohasetinai Nahalakoa**(Mateus 26.59-66; Marcos 14.55-64; João 18.19-24)*

<sup>66</sup> Ferakoa ihiyeha hoka judeunai nityohalitiranai, sacerdotenai xekohasenai, Xaotyakiyaho kakoa waiyoreterenai xoaha ahohisakoatyakakoaha. Hatyo najikinita Jesus nolokaka aokaha xekohasetinai ana.

<sup>67</sup> Hatyaoseta axehenahene: — Hiyakaihena wihiye: xoana, Enore Kalorexe Aohenere hiso? nexaha.

Hoka nehena ihiyeha: — Exahiya atyo, “Há, natyo”, nomi xihiye hoka maisaiya atyo xityakekota natyo. <sup>68</sup> Exahiya naxa xiso hoka maisaiya xekoaxaita nomani. <sup>69</sup> Hoka kalikinita atyoite Haliti Ityani xane tyokehena Enore maxaexahityakahare niyaterexe fihini maniya — nexa Jesus.

<sup>70</sup> Hatyaoseta tyotyaha axahene: — Hoka xoana, Enore Ityani hiso? nexaha.

— Xiso atyo nikare xiraeta — nexa Jesus ihiyeha.

<sup>71</sup> Hoka tyotyaha nexaha: — Maisaiya xoare maheta waxehitita etahi! Hiyaiya, wisota atyo wasema iniraene! nexaha.

*Jesus Kolatyaha Pilatos Ana**(Mateus 27.1-2, 11-14; Marcos 15.1-5; João 18.28-38)*

<sup>1</sup> Hatyaoseta tyotyaha tityoahenahitaha hoka xaneha Jesus kakoa Pilatos nali.

<sup>2</sup> Nali iraeharehenahene hoka nexaha: — Wotoka exe haliti, mawaiye nawenanetita wihinaeharenai hoka. Exahe olo maxekakene aokita Kalorexe Roma yere ana. Exahe Enore Kalorexe Aohenere tehitia aokowita, xekohaseti atyo — nexaha.

<sup>3</sup> Hatyaoseta Pilatos axa Jesus: — Xoana, judeunai xekohase hiso? nexa.

— Hiso atyo nikare hiraeta — nexa Jesus ihiyeha.

<sup>4</sup> Hatyaoseta Pilatos nehena sacerdotenai xekohaseharenai, exahe tyotya halitinae xoaha hiye: — Maisaiya xoare xemere exe haliti kaxaisaka naokita — nexa.

<sup>5</sup> Xakore hoka exahehare aiyateretyoaha exahita: — Exe atyo mawaiye nawenanetita Judéia koa tyaoniterenai. Galiléia koa hotohare nikare tyaona hoka kalikini ali kaoka — nexaha.

### *Jesus Axikatyaha Herodes Ana*

<sup>6</sup> Hatyoharenai sema Pilatos hoka axahene: — Xoana exe haliti Galiléia koa tare? nexa.

<sup>7</sup> Sema, Jesus atyo Herodes kaxaikotere nalitare hoka Pilatos axikatene enomana, Herodes hatyo xowaka tehitija nali Jerusalém tyaonita hoka.

<sup>8</sup> Herodes waiya Jesus hoka ihalahare, semita etahi hoka toahiyita waiyene aokowita. Kasani waiya aokowita xoalini hare metaharexe maomakahare waiyexe enómane.

<sup>9</sup> Hatyo hiyeta axehekoatya Jesus, xakore hoka maisa ekoaxaita enomana.

<sup>10</sup> Hatyaoseta sacerdotenai xekohasenai, Xaotyakiyaho kakoa waiyoreterenai xoaha tityoaha hoka iraeharetyaha kahare Jesus. <sup>11</sup> Herodes tehitija hasorarexanai kakoa koexahalisa Jesus, maisa aiminisahitene. Hatyaoseta mokaha ihiye imiti nase waiyeharexe hoka axikahenahitene Pilatos ana. <sup>12</sup> Herodes, Pilatos xoaha, hatyo nahitita hamahinaeharene aokakakoahitere, hatyo ferakene hahinaehare aokakakoaha.

### *Jesus Kahalakisaka Kaxaisaka Maheta*

(Mateus 27.15-26; Marcos 15.6-15; João 18.38-19.16)

<sup>13</sup> Hatyaoseta Pilatos ahohisakoatya sacerdotenai xekohaseharenai, judeunai nityohalitiranai, halitinai xoaha <sup>14</sup> hoka nexa ihiyeha: — Xiso atyo xakolatya exe haliti nomani, xihinaeharenai mawaiye nawenanitita xaoka hoka. Xakore hoka xityotya xihaotita naxehekoatene hoka maisa xoare harenai nasemita etahi hatyo xiraeharetiternenai akiti. <sup>15</sup> Exahe Herodes tehitija maisa xoare hare iniyalahare semita. Hatyo hiyeta axikahetehitiyene womana. Nikare hoka aliterexe atyo exe haliti maisa xoare hare tyomita hoka mahaiya aliyakere kaxaisakita. <sup>16</sup> Kala emokonasetyaka naoka. Hatyo najikinitaite nahalakisene hoka xaneheta — nexa. <sup>17</sup> Páscoa xowakehena hoka Pilatos aihikoahitita hatya berexoakota halitinai xaxane ximita hoka nikare irae.

<sup>18</sup> Hatyaoseta tyotya halitinai kawayahenaha: — Barrabás haihikoahetehena womana hoka hatyo haliti xaisaka haohena — nexaha. <sup>19</sup> Barrabás hatyo xowaka kaberexotyaka mawaiye nawenanititere wenakalatikoarenai exahe katawanetere xoaha hiyeta.

<sup>20</sup> Hatyaoseta Pilatos, kasani halakiheta aokowita Jesus hoka iraihitiya halitinai kakoa, <sup>21</sup> xakore hoka exahehare kawayatya: — Haberekohenene atyalihose xaimaholatyaka hiye! Haberekohenene atyalihose xaimaholatyaka hiye! nexaha.

<sup>22</sup> Hoka Pilatos nehitija ehanamakinihena hiye: — Hoka xoare iniyalahare tyoma? Maisa xoare enómane iniyalahare nowaiyita hoka mahaiya exaisaka naokita! Emokonasetyakaite naoka hoka hatyo najikinitaite nahalakihetene — nexa.

<sup>23</sup> Xakore hoka heko kinatyaxa kawayatya, kasani Jesus kaberekotyaka atyalihose xaimaholatyaka hiye aokahitaha. Hoka ekawiyalaha jiyahaotene. <sup>24</sup> Hatyaoseta Jesus kamane aoka Pilatos axahitere akereta. <sup>25</sup> Exahe aihikoaheta enomanaha haliti aokahitere, etake kaberexotyakehenere mawaiye nawenanititere exahe katawanakaitere xoaha hiyeta. Hoka halakisa Jesus enomanaha hoka aokahitere akereta mokahene maheta.

### *Jesus Berekotyaka Atyalihose Xaimaholatyaka Hiye Tahi*

(Mateus 27.32-44; Marcos 15.21-32; João 19.17-27)

<sup>26</sup> Hatyaoseta sorarenai xaneha Jesus kakoa. Hoka ahoytaho ahalakoatya hatya haliti, Simão nexarexe, wenakalati Cirene yere, maseta ene tyohitita. Hoka otokaha Simão hoka atyalihose xaimaholatyaka kolatyaka aokaha ihiye hoka Jesus xema xane aokaha.

<sup>27</sup> Kahare halitinai xanetaha exema. Enekoniha haiyahalonai ohironai tiyahitaha, amakohaloahitaha ekawa. <sup>28</sup> Hoka Jesus ehaikoahare enomanaha hoka nexa: —

Ohironai, Jerusalém yolonai! Awa atyo xitiya nokawi, xakore hoka maika xikawa exahe xityaninai kawa xitiyahena! <sup>29</sup> Hiyaiya, haxowaka ferakenehenaito hoka tyotyahaite nexaha: “Waiye kaiserehare atyo ohironai maisanihalonai ana, exahe xoima maxawenakirahalonai ana, exahe xoimanai maxaokokirahalonai ana!” <sup>30</sup> Haxowakaite tyotyahaite nexaha tyairinasenai hiye:

“xoahena wiheno hoka xateroakisa wiso!”

Exahe nexaha tehitiaite tyairinai hiye:

“xoahena wiheno hoka xaxaihonota wiso!”

nexahaite. <sup>31</sup> Hiyaiya, nikareya kaxomokakita mowisati eholitata hoka xoanaite kaxomokakehena nirehena hoka? nexa.

<sup>32</sup> Xaneha tehitia hinamahare xalijiniharexenai kakoa, kaxaisakaha maheta Jesus hakakoane. <sup>33</sup> Xane kaokaha ekakoaha “Seriti Nahe” aokahitere nali hoka berekotyaha Jesus atyalihose xaimaholatyaka hiye, exahe ehaliya hoka hinamahare xalijiniharexenai berekotyaha atyalihose xaimaholatyakanai hiye. Hahare ifihini maniya, hahare ewatone maniya xoaha.

<sup>34</sup> Hatyaoseta Jesus nehena: — Abá, maika exe halitinai nómane iniyalahare hematoxyaneheta, maisa atyo waiyorexe háomaneha kakoa — nexa.

Hatyo najikinita sorarenai hasakaharetyakakoaha hoka Jesus nima irakakakoaha hatyokakoaha.

<sup>35</sup> Hoka halitinai nali tyonahitaha hoka wahakotyahitaha. Hatyo nase judeunai nityohalitiranai koexahaxatyahitaha Jesus kakoa hoka nexahitaha: — Haiyanai atyo iyehitita. Hoka maika hatyota iyoawiheta, aliterexe atyo Enore Kalorexe Aohenere hoka! nexahitaha.

<sup>36</sup> Sorarenai tehitia koexahaxatyaha ekakoa. Kaokaha Jesus haliya hoka isehenaha vinhoxa ewaxirahare enomana <sup>37</sup> hoka nexahitaha: — Aliterexe atyo judeunai xekohase hiso hoka hisota hiyoawihetehena! nexahitaha.

<sup>38</sup> Taba taose hiye, ehao maniya, xairatyoare tyaonita exakerexe:  
EXE ATYO JUDEUNAI XEKOHASE

<sup>39</sup> Hatya nali xalijiniharexe kaberekotyakehenere aiyalatya enomana hoka nehena: — Xoana, maisa hiso xini Enore Kalorexe Aohenere? Hoka hiyoawihetehena hisota hoka hiyeheta tehitia wiso — nexa.

<sup>40</sup> Hoka hatya watyalihenene hoka nexa: — Xoana, maisa himairare Enore? Wityotya atyo hakakoa wikaxomokakita. <sup>41</sup> Iniyalahare wigomokaka atyo kaxemerexe, hiyaiya, iniyalahare atyo wikaxomokakita wománenai hiyeta. Hoka hatyo atyo maisa xoare iniyalahare tyomare — nexa.

<sup>42</sup> Hatyaoseta nexa Jesus hiye: — Jesus, hotehetaira natyo, hisohetehenere Kalorexe hisaona maheta xowaka — nexa.

<sup>43</sup> Hoka Jesus nexa ihiye: — Aliterexe atyo nomita hihiyeh, awijita atyoite hisaona nohaliye wenakalati waiyexe nali — nexa.

### *Jesus Waini*

(Mateus 27.45-56; Marcos 15.33-41; João 19.28-30)

<sup>44</sup> Hatyaoseta kala totahikoahena hare hoka kamai maxaokanala hoka tyotya waikohekua makaliro tyaona makakoahena kijiya. <sup>45</sup> Hoka Iraexatyakalati Hanako imiti taose tyaonitere nekese taose halalakoa.

<sup>46</sup> Hatyaoseta Jesus kawiyatya kinatyaxa: — Abá, hikahekua nahalakisa nisekohare — nexa. Nikare iraehenere najikinita waini.

<sup>47</sup> Hatyaoseta Roma yerenai sorare xekohasehare waiya hatyoharenai hoka tyakeko Enore hoka nexa: — Aliterexe atyo exe haliti maisa iniyalahare nomasehare xini — nexa.

<sup>48</sup> Tyotya nali hohisakoahenerenai waiyaha maheta nikare kaxomokakehenere waiyaha hatyoharenai hoka haikoahenahitaha hahanaha xeta haxamaikoharenha, exahe hatikolalinaiha hiye hamokolaha kakoa. <sup>49</sup> Tyotya Jesus hinaeharenai, exahe ohironai Galiléia ta tyohenolonai exema xoahanai, sekota tyaonahitaha hoka wahakotyahitaha tyotya hatyoharenai ana.

*Jesus Xafityaka Tahi**(Mateus 27.57-61; Marcos 15.42-47; João 19.38-42)*

<sup>50</sup> Hoka nali tyaonita hatya haliti, José nexarexe, wenakalati Arimatéia yere, Judéia koa nali. Hatyo atyo waiyexeharexe, aiminisare, exahe atyahita Enore nalitare Kalorexe xahita. <sup>51</sup> Xekohasetinai konitare xakore hoka maisa haiyanae kalorexenai niraekakoane, exahe tyomehenahere ehekoreta enomana. <sup>52</sup> Hoka José xane Pilatos ana axa maheta Jesus háre. <sup>53</sup> Hatyaoseta iyeheta eháre atyalihose xaimaholatyaka hiyeta hoka olahisetene imiti kese taosero kakoa. Hatyaoseta mokene xawatyakalati kasekakotyakehenere tyairi hiye ako. Maisa xala hare hatyoako kaxomokakehenere. <sup>54</sup> Exowaka sextafeira, okoi sábadohena.

<sup>55</sup> Ohironai Galiléia ta xanhenolonai Jesus xema xaneha José xema hoka waiyaha xawatyakalati, exahe Jesus xomokaka xoaha. <sup>56</sup> Hatyaoseta haikoahenahitaha hahanaha nali xeta hoka tyomaha airaxeronai eháre niyahare maheta. Hoka sábado xowaka kawiniha Xaotyakiyaho aokitere akereta.

## 24

*Jesus Kásehetehenere Tahi**(Mateus 28.1-10; Marcos 16.1-8; João 20.1-10)*

<sup>1</sup> Domingo xowaka witita, ohironai xane xawatyakalati xeta hoka tyomehenahere airaxeronai kolatyaha. <sup>2</sup> Hoka waiyehenaha atyo, xawatyakalati xisoakalahore sehalí taose atyo koxaka kaiyakeheta. <sup>3</sup> Hoka isoaha xakore, hoka maisa waiyehenahitaha Xekohaseti Jesus háre <sup>4</sup> hoka maisa aliyakere ahekotya xaka mokahene. Hoka eharehena rotita enahalakoaha kaotyaka hinamahare halitinai imiti werokatexe akorenai. <sup>5</sup> Hoka kalore mairaha hoka meholokoaha hoka talatihotyoaha. Hatyaoseta nexaha: — Xoana hoka kamatinai tyaonitere aose xatawita kasetatere? <sup>6</sup> Maisa atyo aliyakeheta, koxaka kaseheta hoka. Xotyaxemahenaore iniraine xikakoa, Galiléia nalitatere xowaka. <sup>7</sup> “Haliti Ityani atyoite kahalakisakehena terota iniyalahare nomaseharenai ana. Kaberekotyakehenena terota atyoite atyalihose xaimaholatyaka hiye hoka kasehetaite hanamaki ferakene najikinita”, nehenere — nexaha.

<sup>8</sup> Hatyaoseta ohironai otehetaha iniraine <sup>9</sup> hoka haikoahenahitaha xawatyakalatita hoka hatyoharenai xakaiha 11-hare exaotyakiraharenai hiye, exahe tyotya haiyaharenai hiye.

<sup>10</sup> Exehalonai nikareta: Maria Madalena, Joana, Tiago nityo Maria xoaha. Hatyonai, haiyahalonai ohironai xanhenolonai xoaha xakaiha tyotya hatyoharenai exaotyakiraharenai hiye.

<sup>11</sup> Xakore hoka motya ohironae maoseraita aokahitaha hoka maisa tyakekoahitaha. <sup>12</sup> Hoka Pedro tityoaheta tema xane xawatyakalati xeta. Meholokoa waiyakotya maheta, xakore hoka maisa xoare waiyita, imiti kese taosero mohenahere taita, maisa xoare hitiya aka. Hatyaoseta haikoaheta hahana xeta hoka hakaharetyoa hatyoharenai kakoa.

*Wenakalati Emaús Naho Jesus Kaotyakeheta**(Marcos 16.12-13)*

<sup>13</sup> Hatyo ferakeneta hinamahare enekonihatareha xanetaha wenakalati Emaús xeta. Jerusalém nalita kala 10-kilometro hatyo wenakalati. <sup>14</sup> Iraisahotyahitaha tyotya hatyoharenai kawenatyakehenere tahi.

<sup>15</sup> Iraisahotyahitaha, axakakoahitaha harenai ene hoka Jesus terota kaoka ehaliyaha hoka tonehena exemaha. <sup>16</sup> Exaotyakiraharenai waiyene, xakore hoka exosenaiha motya jihotyoare tyaonita hoka maisa waiyekahalakaharehitita enomanaha.

<sup>17</sup> Hoka Jesus axahene: — Xoare xexa xiraisahotita ahotyaho? nexa.

Hatyaoseta tityoaha haxamaikoharenha kakoa, <sup>18</sup> hoka hatya, Cleopas nexarexe, nexa: — Xoana, hiawala hiso Jerusalém nali tyaonitere maisa hasemita kafaka kaotyakehenere tahi? nexa.

<sup>19</sup> — Xoare tahi? nexa axa.

— Jesus Nazaré yere tahi — nexaha. — Hatyo haliti ene iraiti xakaisasehare, exahe Enore hoka tyakekotene, exahe tyotya halitinai hoka. Exahe haliti kinaterexe aokahitene enawenane, iniraene hiyeta. <sup>20</sup> Hoka sacerdotenai xekohasenai, winityohalitiranai xoaha isahene Roma yerenai ana kaxaisaka maheta hoka sorarenai berekotyahene atyalihose xaimaholatyaka hiye. <sup>21</sup> Motya atyoite wiyahekola hiye hoka hatyo iyehetehena Israel hotyalinai waokita. Hoka kalikini kakoita hanamakihena wisaonita hatyoharenai najikinita.

<sup>22</sup> — Hoka haiyahalonai ohironai winekonitarenai ahakaharetyoakisaha wiso. Xaneha makiyaseta xawatyakalati nali <sup>23</sup> hoka maisa waiyehenahitinha eháre. Haikoahenahitinha hoka xakaiha wihiye. Waiyaha anjonai hoka Jesus atyo kaseta aokaha ihiyeha. <sup>24</sup> Hatyaoseta haiyaharenai winekonitarenai xaneha xawatyakalati xeta hoka waiyaha ohironai xakaitere akereta hoka maisa atyo Jesus waiyehenahitinha — nexa.

<sup>25</sup> Hatyaoseta Jesus nehetehena ihiyeha: — Xoana hoka howitihare waiyekehala kita xomana? Xoana hoka maisa xityakekota tyotya iraiti xakaisasehareni iraehenerehare? <sup>26</sup> Xiyaiya, nikare terota atyo Enore Kalorexe Aohenere xomokaka iniyalahare hoka hatyo hiyeta Enore isa maheta enomana kalorexe iyateliti — nexa.

<sup>27</sup> Hatyaoseta awaiyekehala kitya enomanaha tyotya Iraiti Waiyexe nanekoa iraetere etahi akiti. Moisés xairala tahi hotohare, exahe tyotya iraiti xakaisasehareni xairala harenai.

<sup>28</sup> Xane kaokehenaha wenakalati xanahitere haliya hoka Jesus motya exaihakoha xeta xanetere akereta tyaona. <sup>29</sup> Hoka tihityoaha ihiye, hekota maheta ekakoaha hoka nexaha: — Alita hiso wihiya. Hiya, makakoahena, makehena — nexaha.

Hatyaoseta Jesus isoa exemaha. <sup>30</sup> Tyoka ekakoaha mexa haliya hoka iya nakairati hoka iraexatya Enore hiye. Hatyaoseta taikasetya nakairati hoka irakene enomanaha. <sup>31</sup> Hatyaoseta exosenaiha motya majiholatyoahetehena ene hoka waiyekehala kahareheta Jesus enomanaha, xakore hoka maiyareheta enonyahitaha.

<sup>32</sup> Hatyaoseta hatya nexa hahinaehare hiye: — Motya wimahiyasenai krita ene wimawinini ako ahotoyaho iraetere, exahe awaiyekehala kaitere womana Iraiti Waiyexe nanekoa tahi xowaka — nexa.

<sup>33</sup> Hatyaoseta tityoahenahitaha hoka haikoahenahitaha Jerusalém xeta. Nali waiyehenahitaha 11-harenai exaotyakiraharenai, hohisakoahitaha haiyaharenai kakoa.

<sup>34</sup> Hoka hatyonai nexaha: — Aliterexe nika Xekohaseti kaseheta! Simão waiyeheta Xekohaseti! nexaha. <sup>35</sup> Hatyaoseta hatyo hinamaharenai xakaiha waiyehenahere ahotoyahore, exahe waiyekehala kaharehete henere Xekohaseti enomanaha, nakairati irahetehenere enomanaha xowakere xoaha tahi.

### *Jesus Kaotyakeheta Haxaotyakiraharenai Ana*

(Mateus 28.16-20; Marcos 16.14-18; João 20.19-23; Atos 1.3-8)

<sup>36</sup> Hekotata xakaihakatyahitaha ene hatyoharenai tahi hoka Jesus ehárehena rotita kaotyakeheta enenkeseneha hoka nehena: — Kasani ximehexaikohare xisaona naokita — nexa.

<sup>37</sup> Hoka mawaiyehareha, kalore mairaha, motya isekohalititere aokahitene hoka.

<sup>38</sup> Hoka nexa: — Xoana hoka ximawaiyehareta? Xoana hoka kahare xoalini hare xahekoita? <sup>39</sup> Xiyaiyehena nokahenai exahe nokijinai ana hoka natyo terotaite xiyaiyehetehena. Xotokoahena nohiye hoka xityakekohena. Hiya, isekohaliti atyo maisa káhexe, káetexe xini natyo akereta — nexa.

<sup>40</sup> NEXA hoka hotikisa hakahenai, hakijinai enomanaha. <sup>41</sup> Xakore hoka maisa terota tyakekoreha, kalore ihalaharahitaha exahe hakaretyoahitaha xoaha hoka.

Hatyaoseta Jesus axahene: — Xoana ali xoalini hare kanakairatyakere? nexa.

<sup>42</sup> Hoka isaha enomana kohase jihatayaka halakoase, maha nolone xoaha <sup>43</sup> hoka otokene, exahe kanakairene ehaotyahitaha.

<sup>44</sup> Hatyaoseta nexa: — Notyaonitatere xikakoa xowakaira noxakaitaira tyoty kaotyakehenerehare notahi kaxairatyakehenere Moisés Xaotyakiraho nanekoare, iraiti xakaisaseharenai xairala nanekoare, salmos nanekoare xoaha tahika — nexa.

<sup>45</sup> Hatyaoseta awaiyolikisahene waiyoreha maheta Iraiti Waiyexe xairatyoare tyaonitere kakoa <sup>46</sup> hoka nexa ihiyeha: — Exakere atyo nita kaxairatyakehenere: Enore Kalorexe Aohenere atyoite kaxemakawatikisaka hoka hanamaki ferakene najikinita atyo ekaseneheta terota. <sup>47</sup> Hoka enexare hiyeta kaxakaisaka iraiti maheta tyoty haliti hotyalinai hiye, kahalakisaka exahe kamaotyanetyakeheta maheta iniyalahare enómanenai. Hatyoharenaite Jerusalém nali hotohare kaxakaisaka.

<sup>48</sup> — Xiso atyo xiayiya tyoty nikare nokaxomokakihenerenai. <sup>49</sup> Hoka natyota atyoite naxikahena xomana Baba isa aokowiterehare. Xakore hoka maika xatyaha ali wenakalatita, iyateliti enokoata kaokehenere xomana kijiya — nexa.

*Jesus Kakolatyaka Enokoa Xeta*

(Marcos 16.19-20; Atos 1.9-11)

<sup>50</sup> Hatyaoseta Jesus nolokahene haware wenakalati nonitata hoka xane ekakoaha wenakalati Betânia nali. Hatyo nali hakahenai ehaoha moka hoka waiyexe wenati aoka enomanaha. <sup>51</sup> Waiyexe wenati aokitata enomanaha hoka Jesus kikisoahena enonyahitaha hoka kakolatyaka eno xeta.

<sup>52</sup> Hatyohekota awaiyityahene. Hatyaoseta haikoahenahitaha Jerusalém xeta haihalahareneha kakoa. <sup>53</sup> Hatyota Iraexatyakalati Hanako tyaonahitaha mene, ihalaharahitaha Enore kakoa xoaha.

## João

*Iraeti Exahe Wenati Tahi  
(Colossenses 2.9-10; Hebreus 1.1-2; 1 João 1.1; 5.20)*

<sup>1</sup> Hetati waikohe maomakahare xowakiya, koxaka terota Iraiti tyaonita. (“Iraiti”, nita, Jesus xaokaka nikare iraeta.) Enore nali atyo Iraiti tyaonita, Enore atyo hatyo Iraiti.

<sup>2</sup> Hetati xowakiya atyo Enore nali terota atyo Iraiti tyaonita. <sup>3</sup> Hatyo Iraiti hiyeta Enore tyoma enokoa waikohekoa, exahe tyotya xoalinharenai hoka. Ekoiya awa hatyo Iraiti hoka maisaiya xoare harenai kaomakita.

<sup>4</sup> Hatyo Iraiti atyo waiyexe wenati kakoare hoka xaokanatyakalati akereta tyaona halitinai ana. <sup>5</sup> Xaokanatyakalati aokanaita makaliroti koni hoka makalirotiya maisa aliyakere ewakaitene. (“Xaokanatyakalati”, nita tehitiya Jesus xaokaka. “Makaliroti”, nita xoalini hare iniyalahare xaokaka.)

<sup>6</sup> Enore axikatya João nexarexe <sup>7</sup> xakai maheta hatyo xaokanatyakalati tahi akiti halitinai hiye. João xakai halitinai hiye hoka tyotyaha sema xaokanatyakalati tahi akiti, exahe tyakekoha maheta. <sup>8</sup> João atyo maisa hatyo xaokanatyakalati xini xakore atyo hoka tyoa irae halitinae kakoa, xakai hatyo xaokanatyakalati akiti ihiyeha.

<sup>9</sup> Hatyo xaokanatyakalati atyo aliterexe, aokanaita tyotya halitinai ana. Hikoa halitinai koni hoka aokanaita enomanaha.

<sup>10</sup> Hatyo Iraiti hiyeta Enore tyoma enokoa waikoa tyotya xoalini harenai. Hatyaoseta Iraiti tyaona halitinai koni xakore hoka maisa waiyekehalakita halitinai ana. <sup>11</sup> Tyaona hahinaeharenai judeunai koni xakore hoka maisa judeunai aokitene haomanaha. <sup>12</sup> Hoka haiyanai atyo tyakekone hoka haomanaha aokene. Tyakekone hoka hatyo hiyeta Enore haisaninai aokahene. <sup>13</sup> Tyakekoha hoka Enore ityaninai tyaonaha. Xakore hoka maisa atyo xoima kakaisanisakitere akerexe xini Enore ityaninai tyaonaha, exahe maisa haliti xaokalaoseta xini nikare tyaonaha. Enore xaokalita ityaninai tyaonaha.

<sup>14</sup> Hatyo Iraiti atyo haliti kyawa hoka tyaona winekoni. Waiye wiyaiyene, kalorexe terota. Haliti awaitita kaisere, iraiti aliterexe taita iraeta. Enore Ityani haterore atyo hoka nikare kalorexe tyaonita.

<sup>15</sup> João atyo irae etahi akiti naliyerenai hiye: — Koxaka niraeta xikakoa hatyo akiti. “Maikaite najikinita tyohena noxahehare. Koxaka xakore atyo tyaonita terota nahitita nomawenanharetatere xowakiya”, nomi xihiye. Hoka hatyo atyo kalini kaoka — nexa João irai.

<sup>16</sup> Kalore awaiyetya wiso hoka kahare xoalini hare waiyexe axikatya womana, fera hatyoharenai ijita womana. Hatyo hiyeta wawenane waiye tyaonita. <sup>17</sup> Moisés atyo wawenanaho halakisa womana: — Exakerexe xisaona — nexa aotyakisa wahetakomaniyerenai. Hoka Jesus Cristo atyo waiye mokita haliti, awaiyetita haliti, exahe iraiti aliterexe taita iraeta. <sup>18</sup> Maisa xala harenai Enore waiyare hoka Ityani Jesus awaiyekehalakatene halitinai ana. Hiyaiya, Enore Ityani haterore, hanexe haliya tyaonita, hanexe Enore akerexe terota atyo.

*João Batista Niraene*

*(Mateus 3.1-12; Marcos 1.1-8; Lucas 3.1-17)*

<sup>19</sup> Hatyaoseta judeunai nityohalitiranai axikatya sacerdotenai, Levi hotyalinai xoaha João nali xeta, João axaha maheta. Jerusalém nalita axikatyahitene.

Tyoa kaokehenahitaha João ana hoka: — Xala atyo hiso? nexaha ihiye.

<sup>20</sup> Hoka João nehena ihiyeha: — Maisa atyo Enore Kalorexe Aohenere xini natyo — nexa ihiyeha.

<sup>21</sup> Hoka nehenaha ihiye: — Hoka xalatya hiso? Xoana, Elias kore hiso? nexa axeheňahitayha João.

— Maisa Elias xini natyo — nihiyiha ihiyeha.

— Xoana hiso iraiti xakaisasehare wavyahitere? nexaha axahenahitiyahene.

Hoka: — Maisa — nexa ihiyeha.

<sup>22</sup> Hatyaoseta nehenaha João hiye: — Hoka xala kaisere hiso? Hiyakai wihiye hoka wasema hitahi akiki hoka wiyanaheta Jerusalém nali hoka wiyakai hitahi akiki wiyaxikatyasenai hiye — nexaha.

<sup>23</sup> Hoka João nehenaha: — Exakerexe babera Isaías niraine kakoare:

Hatya haliti maharexakiti kawiyaita: “Waiye xamohena ahoti hoka hatyoaho Xekohaseti jiya”, nita.

Hatyo kawiyaitere atyo natyo — nexa João ihiyeha.

<sup>24</sup> Hatyo kaokiterenai João ana atyo fariseunai. <sup>25</sup> Hatyaoseta axehitiyahene: — Xoana maisa xakore Enore Kalorexe Aohenere xini hiso hoka habatixaita? Maisa Elias xini hiso, maisa iraiti xakaisasehare wavyahitere xini hiso xakore hoka habatixaita? nexaha ihiye.

<sup>26</sup> Hoka João nehenaha ihiyeha: — Natyo atyo nabatixaita one kakoa hoka hatya xinekoni ximawaiyanenehare tyaonita. <sup>27</sup> Hatyo atyoite najikini maniyata iraihena xikakoa. Hatyo atyo noxahehare hoka maisaiya natyonae aliyakere ikijitini nanohi hekoti naolikita — nexa João irai.

<sup>28</sup> Wenakalati Betânia nali iraehitaha João kakoa one Jordão halakoiyaxa maniya, João tyaonitere batixaitere nali iraehitaha ekakoa.

#### *Enore Kalaneroxa Mokose Tahi*

<sup>29</sup> Kamaetali waiyehena atyo João, Jesus atyo tyoita hoka João nehenaha: — Xiyaiyehena, owene Enore xaxikalahare. Maikaite kalanero mokose wainitire akere waini halitinai ana emaisatya maheta iniyalahare enómaneha maheta — nexa. <sup>30</sup> — Ali koxaka notyaonita hoka etahi akiki niraeta xihye: “Maikaite najikinita tyohena noxahehare. Koxaka atyo tyaonita terota nahitita nomawenaninihatatere xowakiya”, nomi xihye — nexa.

<sup>31</sup> — Enore Ityani xakore atyo hoka maisa tehitia waiyekehalakita nomani. Hoka nabatixatita haliti one kakoa Israel yerenai waiya maheta hatyo kalorexe — nexa.

<sup>32</sup> João nihitiya: — Nowaiya Isekohaliti Waiyexe wavyahase akerehare exoahena enokoata hoka tya tyoka esiri heno. <sup>33</sup> Maisa atyo waiyekehalakaharete tehitia nomani hatyo Enore Kalorexe Aohenere. Xakore atyo hoka Enore axikatyatya natyo one kakoa nabatixatya maheta. Hoka noxaxikatyasehare Enore nexa nohiye: “Maikaite hatya ana exoahena Isekohaliti Waiyexe hoka: ‘Ahai, exe kore aokita. Exe atyoite Isekohaliti Waiyexe kakoa batixahena’, hehena”, nexa nohiye. <sup>34</sup> Aliterexe atyo nowaiya nikare. Hatyo hiyeta, “Ahai, exe kore Enore Ityani”, nomi exaokaka — nexa João ihiyeha.

#### *Jesus Xaotyakiraharenai Hetatiyeharenai*

<sup>35</sup> Kamaetali hoka João hatyo akikitita hinamahare haxaotyakiraharenai kakoa xane tyahenahitiyah. <sup>36</sup> Hoka waiyehena atyo João, Jesus atyo jiyita hoka João nehenaha: — Owene Enore xaxikalahare. Maikaite kalanero mokose wainitire akereta waini halitinai ana — nexa.

<sup>37</sup> Hatyaoseta hatyo hinamahare João xaotyakiraharenai semaha João niraine hoka xaneha Jesus xema.

<sup>38</sup> Jesus xaneta ene hoka terehokoa waiya hajikini maniya, waiyehena atyo, tyoahitaha exema hoka axehehene: — Xoare xatawita?

— Rabi — nexaha ihiye. Wiyako maniya atyo, “Xaotyakisatiye”, nita. — Rabi, aliyako hisaonita? nexaha axahene.

<sup>39</sup> — Xisohena hoka xiayia — nexa Jesus ihiyeha. Hatyo xowaka makakoasehena.

— Xisohena hoka xiayia — nexa Jesus ihiyeha hoka xaneha Jesus xema, waiyaha tyaonitere nali hoka tyaohenaha ehaliya heko maka ihiyeha. <sup>40</sup> Hatyo hinamahare xanetere Jesus xema atyo Simão Pedro ximarene André, exahe hatya tehitia. João iraeta Jesus tahi hoka semene hoka xaneha Jesus xema.

<sup>41</sup> Hatyo najikinita André xane háxenane nali. Xane hikoa enomana hoka nexa ihiye: — Wikaoka Cristo — nexa. Cristo atyo wiyako maniya, “Enore Kalorexe Aohenere”, nita.

<sup>42</sup> Hatyaoseta André noloka hánxenane Jesus tyaonitere nali. Xane kaokaha enomana hoka Jesus wahakotya Simão ana hoka nehena, — Hexare Simão, João ityani atyo hiso. Hoka kalikini atyo Cefas tehitia hexare — nexa Jesus ihiye. Cefas atyo wiyako maniya, “Sehali”, nita.

### *Jesus Kawisa Filipe, Natanael Xoaha*

<sup>43</sup> Kamaetali hoka Jesus xane aokowi Galiléia koa xeta. Haxánene nahitita xane tawa Filipe xahita.

Xane kaokene hoka nexa ihiye: — Hisohena noximi — nexa. <sup>44</sup> Filipe atyo Betsaida nalitare, André, Pedro xoaha tyaonitere nalitare.

<sup>45</sup> Hatyaoseta Filipe tawa Natanael xahita hoka irai ekakoa. — Moisés, iraiti xakaisase-harenai xoaha xairatyaha Enore Kalorexe Aohenere tahi. Kalikini atyo wikaokene. Hatyo wenakalati Nazaré tare José ityani Jesus terota atyo — nexa Filipe Natanael hiye.

<sup>46</sup> Hatyaoseta Natanael axehenene: — Xoana Nazaré nalitaiya kaotyaka xoalini hare waiyexe? nexa, komita maisa tyakekota.

— Hisohena hoka hiyaiya — nexa Filipe ihiye hoka xanheha Jesus tyaonitere nali xeta.

<sup>47</sup> Hatyaoseta waiyehena atyo Jesus, Natanael atyo kaokehena hoka Jesus nexa: — Xiayiaya, owehena Israel yere kaiserehare, exe atyo maisa maoseratyaliye xini — nexa.

<sup>48</sup> Hatyaoseta Natanael axehena Jesus: — Alyako hiyaiya natyo? nexa.

— Filipe mairaineharetatere hikakoa xowaka nowaiya hiso, hisokita halohalo katyahe hoka — nexa Jesus ihiye.

<sup>49</sup> — Xaotyakisatiye, Enore Ityani atyo hiso! Israel hotyalinai Xekohase Kalorexe atyo hiso — nexa Natanael ihiye.

<sup>50</sup> Hoka Jesus nehena: — Xoana, “Halohalo katyahe hisokita hoka nowaiya hiso”, nomihenere hiyeta hityakeko natyo? nexa. — Maikaite exe xaehhare hiyaiya. <sup>51</sup> Hasemehena niraini: enokoaitate totakore tyaona hoka anjonai Enore nalitarenaite kakohahitita, exoahitita xoaha Haliti Ityani ana. Exeharenaite xiayiaya — nexa Jesus ihiye.

## 2

### *Jesus Xane Wenakakoati Ana*

<sup>1</sup> Hinama ferakene najikinita hoka sema wenakakoati hisehare wenakalati Caná nali Galiléia koa hoka Jesus nityo xane waiya hatyo hisehaliti. <sup>2</sup> Jesus hahaotyakiraharenai kakoa tehitia kakaixakatyakaha hatyo wenakakoati ana hoka xanheha.

<sup>3</sup> Hatyaoseta nali tyaoniterenai terahitaha oloniti hoka ekakoita enoloneha vinhoa tyotya hoka Jesus nityo nexa haisani hiye: — Enoloneha tyotya — nexa.

<sup>4</sup> Nexa ihiye hoka Jesus nehena: — Xoana hoka hiraeta nokakoi? Xoana natyoiyatya hoka? Maisa terota xane hikoahenere nokahinairaose — nexa hanityo hiye.

<sup>5</sup> Hatyaoseta inityo nexa nali waikatehare wakaneharenai hiye: — Aokitere akereta xisoma, iraihena xihiye hoka — nexa.

<sup>6</sup> Hatyo nali 6-ri tinihaliti kanote, kaloli, 80, 100 litrone niyahare. Judeunai nawenanaho hoka hatyohare akotarexa kakoa tihahitaha haitinihareha haháre xoaha.

<sup>7</sup> Hatyaoseta Jesus nexa wakaharenai hiye: — Xakaisexatya one tinihalitinai ako — nexa. Nexa hoka tinihalitinai kaisexatya one kakoa, kaise mokahene.

<sup>8</sup> Hatyaoseta Jesus nehitia ihiyeha: — Xiyejena enakota hoka xiyanne xisehena harekahare ana — nexa Jesus ihiyeha hoka kolatyaha exaokalaoseta harekahare ana.

<sup>9</sup> Hatyaoseta harekahare hotohare hasaka hatyo one. Hasahena hatyo one hoka koxaka vinhoa kyawa. Maisa atyo harekahare semare hatyo vinhoa nomaka akiti hoka wakaharenai atyo waiyoreta.

Hatyaoleta harekahare iraehena kaiyanityohenere hiye <sup>10</sup> hoka nexa ihiye: — Haliti hisehaliti tyomehena hoka vinhoa waiyexere hotohare ijita oloniti faharenai ana. Hatyaoseta teraha miyahenaha waiyexere hoka enajikini maniya atyo isihitita ewaxiraharexa enomanaha. Hoka hiso atyo enajikini maniya waiyexere hisehena — nexa.

<sup>11</sup> Wenakalati Caná Galiléia koa nali hetati Jesus nikare maomakahare tyoma, awaiyekehaharetyoa kalorexe hawenane akiti enomanaha hoka exaotyakiraharenai atyo tyakekone.

<sup>12</sup> Hatyo najikinita Jesus xane wenakalati Cafarnaum nali xeta hanityo, haximarenai, haxaotyakiraharenai hare kakoa hoka akaiki ferakene hatyo nali tyaonaha.

*Jesus Isoa Iraexatyakalati Hanako*

(Mateus 21.12-17; Marcos 11.15-19; Lucas 19.45-48)

<sup>13</sup> Hatyaoseta okoi xane hikoahena hisehaliti Páscoa ferakene hoka Jesus xane Jerusalém xeta. Páscoa xowakehena hoka judeunai hisehare tyaohena. <sup>14</sup> Jesus xane kaoka Jerusalém nali hoka xane isoa Iraexatyakalati Hanako. Waiyehena atyo, owene bowi, kalanero, wavyaha harenai betetyasenai tyaonita, owene olo ehaikoakihititere harenai tyokita hamexaneha haliyita. <sup>15</sup> Hatyohekota Jesus tyoma hamokotyakalahi olawahi hoka aihikoaheta tyotya hatyoakorenai, kalanero, bowi harenai kakoita.

Ehaikakoatya tyotya olo ehaikoakihititereharenai mexanenai enoloxaha kakoita <sup>16</sup> hoka nehena hatyo wavyáha betetiterenai hiye: — Xiyakahetehena alita! Awa atyo Baba hanako exakere xisaona. Xoana wisekoliti nitini xaokitene? nexa ihiyeha.

<sup>17</sup> Hatyo najikinita exaotyakiraharenai otyaha Iraiti Waiyexe xakaisaseharenai xairala. Exakerexe exairalaha:  
Nawaiyetita hihana hoka nikare tyaonaha enako hoka maisa waiyeta nohiye, Abá. Nikare tyaonaha hoka ewatyatya natyo.

<sup>18</sup> Hatyaoseta judeunai nityohalitiranai axehenene: — Xala niraene kakoare atyo hiso hoka nikare hisaona? Xoare ite hisomehena hoka wityakeko hiso? nexaha ihiye.

<sup>19</sup> — Xexoakiheta exe Iraexatyakalati Hana hoka hanamaki ferakene taitaite hoka notyoma namemahetene — nexa Jesus ihiyeha.

<sup>20</sup> Hoka nexaha ihiye: — 46-terehokoane hakahitaha exe Iraexatyakalati Hana hiye hoka mematyahene. Hoka hiso atyo, “Hanamaki ferakeneta takitaiya hoka notyomehitiene”, hexa — nexaha.

<sup>21</sup> Hatyo Iraexatyakalati Hana tahi Jesus iraitere atyo haháre xaokaka nikare iraeta. <sup>22</sup> Waini hoka kasehetehena najikini hoka exaotyakiraharenai hatyo xowaka iraitere otehenahitaha. Otehenahitaha hatyo xowakere iniraine hoka tyakekoha iraiti xakaisasharenai xairala, Jesus niraine harenai.

*Jesus Atyo Waiyoreta Tyotya Halitinai Kakoa*

<sup>23</sup> Jesus tyaonita hisehaliti Páscoa xowaka Jerusalém nali hoka kahare haliti tyakekotene, xoalini hare enómane waiyaha hoka hatyo hiyeta tyakekoahitene. <sup>24</sup> Hoka Jesus atyo maisa tyakekorahene, waiye otita exahekolaha hoka. <sup>25</sup> Maisaiya atyo xoare maheta haiyaharenai tahi akiti exahekolaha hare xakaita ihiye, koxaka atyo otita makere tyotya hakakoare xahekola.

3

*Jesus Irae Nicodemos Kakoa*

<sup>1</sup> Haxowakiya Nicodemos nexarexe kaoka Jesus ana. Nicodemos atyo judeunai nityohalitira, fariseu tehitiya atyo.

<sup>2</sup> Makiya tyoa waiya maheta Jesus hoka nexa ihiye: — Wiso atyo wotita hiso, xaoityakisatiye. Enore xaxikalahare terota waokita hiso, wiyaotyakisase maheta. Maisaiya xala harenai tyomita hisomitereharenai Enore mawenaneharene ekakoa hoka — nexa.

<sup>3</sup> Hoka Jesus nehena ihiye: — Hasemehena niraini: Maisaiya haliti kaxawenakisakihiyiha hotohare hoka maisaiya aliyakere Enore xema maniya tyaonita — nexa Jesus ihiye.

<sup>4</sup> — Hoka aliyakereya koxaka inityohaliti haliti hoka tyaonihitiya? Xoana isoahitiyaiha hanityo tyako hoka tyaonihitiya? nexa Nicodemos axa Jesus.

<sup>5</sup> Jesus nihitiya ihiye: — Aliterexe nomita hihiyeha: maisaiya onexaiya Isekohaliti Waiyexe xoaha kakoa kaxawenakisakihitita hotohare hoka maisaiya aliyakere haliti

Enore xema maniya tyaonita. <sup>6</sup> Wityo, wexe kaisanihena wiso hoka hatyoaha akereta wisaonita. Nikare Isekohaliti Waiyexe kaisanihena wiso hoka hatyo akereta tehitija wisaonita. <sup>7</sup> Hiyeta hoka niraini hasemehena: “Maisaiya haliti kaxawenakisahitiya hotohare hoka maisaiya aliakere Enore xema maniya tyaonita”, nomi niraihena hoka awa, “Aliyakere ala aokita?” hexa.

<sup>8</sup> — Hoholati atyo aliye maniya xamani hoholatya aokowita hoka hatyo maniya atyo hoholaita. Wasemita atyo ehololala nemahare xakore atyo hoka maisa atyo wawaiyorexe ityoanene, exanene xoaha kakoa. Nikare tyaonita Isekohaliti Waiyexeta kaisanihenerenai tyaonehena hoka. Maisa wawaiyorexe exawenakisakaha kakoa — nexa Jesus ihiye.

<sup>9</sup> — Hoka aliyakerexe hatyo? nexa Nicodemos axene.

<sup>10</sup> Hoka Jesus nehena: — Xoana Israel yerenai xaotyakisase xakore hiso hoka maisa exe akiti kakoa hawaiyorexe? nexa. <sup>11</sup> — Hasemehena niraini: aliterexe nomita hihiye, xoalini tahi nasema nawaiyore ekakoa xoaha hoka noxakaitene xihiye, xakore atyo hoka maisa atyo xityakekore niraini. <sup>12</sup> Noxakaita xihiye kalikiniyere wenati tahi, exahe halitinai nawenane tahi akiti harenai xihiye hoka maisa xityakekore niraini. Nikare hoka aliyakereya noxakaihena enokoa tahi xihiye hoka xityakekohena? <sup>13</sup> Maisa xala hare enokoa xeta xanexe. Hoka Haliti Ityani atyo enokoa terota tyaonita hoka exoaheta waikoa xeta — nexa Jesus. Haxaokakita “Haliti Ityani”, nita.

<sup>14</sup> — Toahiya Moisés berekotya owi xaimenekotyaka akerehare atyalihose hiye hoka atityoakisene ekakoare maharexakiti nali. Nikare ite berekotyaha Haliti Ityani atyalihose xaimaholatyaka hiye hoka atityoakisahene ekakoare. <sup>15</sup> Nikare ite mokahene hoka exema maniya tyaoniterenai maisa wainahitaha hoka tyaonaha mene matyotenehare maheta. <sup>16</sup> Enore atyo tyotya halitinai awaiyetita hoka haisani haterore axikatya halitinai koni waini enomanaha maheta hoka tyakekohenerenai maisa wainita maheta hoka tyaonaha mene matyotenehare maheta. <sup>17</sup> Enore axikatya Haisani halitinai koni iyehenahitene iniyalahare enómaneha nonitata maheta, maisa halitinai xawatya maheta xini — nexa.

<sup>18</sup> — Xala xamaniya atyo tyakeko Ityani hoka hatyoiya atyo maisa kaxawatyakita. Hoka xala xamaniya atyo maisa tyakekota hoka hatyoiya atyo waiye xawatyaka, maisa tyakekore haterore Enore Ityani hoka. <sup>19</sup> Xaokanatyakalati kaoka halitinai ana xakore hoka makaliroti waiyeta enomanaha, iniyalahare nomaseharenai hoka. Hatyo hiyeta waiye xawatyaka aokita Enore. <sup>20</sup> Iniyalahare tyomiterenai atyo maisa awaiyetyahitaha xaokanatyakalati hoka tekoahitaha enonita, haiyaharenai maisa waiyaha enómaneha iniyalahare aokareha hoka. <sup>21</sup> Hoka waiye maniya tyaoniterenai, exahe iraiti aliterexe xema tyaoniterenai atyo awaiyetita xaokanatyakalati, kaokahitaha ehaliya, waiye tyaonahitaha hoka. Enore aokitere akereta tyomahitaha hoka kasani halitinai waiyaha enómaneha aokahitaha — nexa.

### *Jesus, João Batista Xoaha Tahi*

<sup>22</sup> Hatyo najikinita Jesus xane haxaotyakiraharenai kakoa Judéia koa xeta. Hatyo nali akaiki ferakene tyaona ekakoaha hoka batixatita halitinai. <sup>23</sup> João tehitija batixatita halitinai wenakalati Enom nali, wenakalati Salim haliyita. Hatyo nali kaloxa one hoka. Kahare haliti kaokita enomana hoka batixatyahitene. <sup>24</sup> João hatyo xowaka maisa kaberexotyakenere.

<sup>25</sup> Hatyaoseta haiyaharenai João xaotyakiraharenai iraeha kinatyaxa hatya judeu kakoa: — Enore maniya wisaonita hoka exakere watihita tinihalitinai, exahe halitinai hare — nexaha.

<sup>26</sup> Hatyo najikinita xane iraeha haxekohase João kakoa. — Xaotyakisatiye, xoana hotita etake haliti one Jordâoxa halakoiya nali tyaonitere hikakoa, hirai etahi akiti xoaha. Xoana hotitene? Kalikini batixaita haliti hoka kahare haliti ekoamaniya tyaonita — nexaha.

<sup>27</sup> Hoka João nexa ihiyeha: — Kala Enore kahinaetitene nali. Ekoiya awa Enore kahinaetita wiso hoka maisaiya xoare wisomita. <sup>28</sup> Koxaka xasema niraini. “Maisa atyo Enore Kalorexe Aohenere xini natyo. Enaheta maniya atyo Enore axikatya natyo”, nomi xihiye. <sup>29</sup> Xasemehena, wenakakoati xowakehetehena hoka hatyo kaiyanityohenere atyo tyaonita hatyaonero kakoa. Hoka ihinaehare, exako semehena hoka ihalahareta hahinaehare kakoa. Nikarexe natyo notyaonita. Nasemehena Jesus tahi hoka nihalahareta. <sup>30</sup> Hatyo atyoite ekakoita kalorexe tyaona. Hoka natyo atyoite ekatyahakoreta hoka ekakoita atyoite kiranexe notyaona — nexa João ihiyeha.

#### *Etakehare Enokoata Tyoiterehare*

<sup>31</sup> — Enore Ityani atyo enokoata tyoa hoka tyotya halitinai xahehare atyo. Hoka halitinai atyo waikoatarenai hoka waiyakitiya maniya tahi akiti kakoa taita waiyoreta hoka hatyohare tahi takita iraeta. Hoka hatyo enokoatare atyo tyotya halitinai xahehare. <sup>32</sup> Hatyo atyo xakaita hasemané, hawaiyane xoaha enokoa naliye xakore hoka maisa xala harenai tyakekore exakaini. <sup>33</sup> Xala xamani atyo tyakeko Enore Ityani niraine hoka tyakekota tehitiya atyo Enexe Enore niraine. Enomana atyo Enore aliterexe taita iraeta. <sup>34</sup> Enore axikahenere atyo xakai iniraine halitinai hiye. Enore atyo axikatya Isekohaliti Waiyexe enomana maxaimenekotyakahareta hoka masakare kahinaetitene. <sup>35</sup> Enexe Enore awaiyetita Haisani hoka maxaixahityakahare mokene, tyotya xoalini hare xekohasehare. <sup>36</sup> Xala xamani atyo tyakekota Enore Ityani hoka makamanehareya atyo tyaona. Hoka xala xamaniya atyo maisa tyakekota Ityani hoka maisaiya atyo tyaota menita, Enore ite iniyalahare motene mene.

## 4

#### *Jesus Irae Ohiro Samaria Yolo Kakoa*

<sup>1</sup> Semehena atyo fariseunai, Jesus atyo kahare batixaite haliti, João xahe batixaite haliti. <sup>2</sup> Maisa atyo Jesus xini batixaite haliti, exaotyakiraharenai atyo batixatyahitene. <sup>3</sup> Jesus ana waiyekehalaka hatyo tahi akiti hoka xaneheta Judéia koa nalita hoka haikoaheta Galiléia koa xeta. <sup>4</sup> Ahoti atyo Samaria koaho jiyita. Hiyeta hoka Jesus hatyoaho jiyeheta.

<sup>5</sup> Jiyehena hoka xane kaoka wenakalati Sicar haliya. Ikinohareha Jacó haisani José ana waikohe isehenere haliyaseta hatyo wenakalati. <sup>6</sup> Hatyo nali tehitiya Jacó sehenere poço. Kala totahikoa harehena hoka Jesus xane tyoka hatyo poço haliya, kiraharehena haitonane wenekoa hoka.

<sup>7</sup> Hatyaoseta hatya Samaria yolo tyoa hikoa one iya maheta hoka Jesus nexa ihiye: — Xama hisa nomani one hoka notera — nexa ihiye. <sup>8</sup> Exowaka Jesus hawawa tyaonita, exaotyakiraharenai koxaka xane wenakalati xeta nakairati iyaha maheta hoka.

<sup>9</sup> — Hiso atyo judeu hoka natyo atyo Samaria yolo. Nikare hoka xoana hoka haxa natyo one? nexa ohiro Jesus hiye. Maisa judeunai kakoa Samaria yerenai awaiyetyakakoareha hoka nikare irae Jesus kakoa.

<sup>10</sup> — Hawaiyolotaiya Enore xekane kakoa, exahe hawaiyolota tehitiyaiya axitere one hiso kakoa hoka haxene tehitiyaiya one hoka isaiya one homana hoka hatyo oneya hisera hoka menanehaloti hisaona — nexa Jesus ihiye.

<sup>11</sup> Hatyaoseta hatyo ohiro nehena Jesus hiye: — Hiyaiya, maisa atyo hikaitiniharexe hoka one hiya haokowita. Poço atyo hateko. Aliyakereya hatyo one menanehalitiya hiyehena? nexa. <sup>12</sup> — Wikinohare Jacó atyo seká exe poço. Hatyaoseta hatyo, ityaninai, ijiyetenai, ikirakaharexanai hare terahitaha exe poço akotarexa. Xoana Jacó xahehare hiso haokita? nexa ohiro Jesus niraene nahalakoa.

<sup>13</sup> Hatyaoseta Jesus nehena ihiye: — Xala xamaniya atyo exe akota one tera hoka oinihiyiaya atyo. <sup>14</sup> Hoka one naokitereya atyo tera hoka maisaiya atyo oinihitita. Hatyo one nijitereya atyo maisa tyotehitita enonita. Tyaona meneya atyo ihiye hoka ekakoitaiya atyo menanehaliti tyaona — nexa Jesus.

<sup>15</sup> — Xama hisa nomani hatyo one hoka maisa noinihatita, exahe one nomakolalihalo notyaona alita — nexa ohiro ihiye.

<sup>16</sup> — Hiyane hakawiheta hexanene hoka hisoheta ekakoa ali — nexa Jesus ihiye.

<sup>17</sup> — Maisa nokaiyaniniro — nexa ihiye.

— Aliterexe hiraeta, “Maisa nokaiyaniniro”, hita. <sup>18</sup> Koxaka 5-hare kakoa hisaona hoka maisa tyaonareha hikakoa. Kalikini hatya tyaonita hikakoa hoka alitere atyo maisa hexanene xini. Aliterexe atyo hiraeta — nexa Jesus ihiye.

<sup>19</sup> — Kalikini atyo hawaiyekahalahare nomani. Kala iraiti xakaisasehare hiso — nexa.

<sup>20</sup> — Wahetakomaniyereharenai kakoha exe tyairi heno hoka iraexatyahitaha Enore ana hoka awaiyetyahitene. Hoka xiso judeunai atyo xita: “Jerusalém nali taita atyo waiye niraexatyaka Enore hiye”, xita — nexa ohiro ihiye.

<sup>21</sup> — Waiye hasemehena niraini: Ekakoitaite maisa exe tyairi henose, exahe Jerusalém nali taita xini kairaexatyaka Enore hiye. (Aliyo xamani wisaonita hoka hatyo nali tehitiya waiye niraexatyaka Enore hiye.) <sup>22</sup> Xiso Samaria yerenai atyo maisa xawaiyorexe Enore akiti kakoa hoka wiso judeunai atyo wawaiyore wisaonita Enore akiti kakoa. Hiyaiya, halitinai niyasehareheta atyoite judeunai konita kaotyaka.

<sup>23</sup> — Okoi enaose xane hikoahena, xakore hoka koxaka xane hikoa enaose hoka Baba xema maniya tyaoniterenaita awaiyetene haisekohareha kakoita hoka tyaonaha kaiserehare ite exema maniya. Hatyohare hotyalinai Baba aokita haomana. <sup>24</sup> Enore atyo Isekohaliti hoka hatyo hiyeta kasani haliti awaiyetene haisekohareha kakoita, exahe tyaona kaiserehare exema maniya aokita — nexa Jesus.

<sup>25</sup> — Enore Kalorexe Aohenere ite kaotyaka womana. Nasema hatyo akiti, notyakeko xoaha. Kaotyakaito womana hoka tyotya awaiyekahalahena womana — nexa ohiro Jesus hiye.

<sup>26</sup> — Natyo atyo Enore Kalorexe Aohenere atyo niraeta hikakoa — nexa Jesus ihiye.

<sup>27</sup> Hatyaoseta exaotyakiraharenai kaokehetehehena enomana hoka waiyaha iniraene ohiro kakoa hoka hakaharetyoaha. Xakore hoka maisa ohiro hekoti axahitaha, xoare xamani aokita ihiye hoka. Exahe tehitiya maisa axahitaha Jesus, xoare hiyeta xamani iraeta ekakoa hoka.

<sup>28</sup> Hatyaoseta hatyo ohiro halakisa haonexa nitini, haikoaheta hawenakala xeta hoka nexa nali tyaoniterenai hiye: <sup>29</sup> — Hatya haliti kaoka nomani poço nali hoka irae nokakoi. Tyotya notyomiterenai kakoa waiyoreta. Xoana Enore Kalorexe Aohenere ala? Wiyala wiyanne hatyo nali hoka xiayiaya — nexa ihiyeha. <sup>30</sup> Nexa xakai ihiyeha hoka kahare haliti xane hatyo Jesus tyaonitere nali xeta.

<sup>31</sup> Hatyo ohiro xanehenere nase exaotyakiraharenai nexa ihiye: — Xaotyakisatiye, ali nakairati. Witya hikanakairahena — nexaha ihiye.

<sup>32</sup> Xakore atyo hoka nexa: — Ali nonakairi ximawaiyanenehare — nexa Jesus ihiyeha.

<sup>33</sup> Nexa ihiyeha hoka axakakoahenaha hatyo kokoahaa: — Xoana koxakala hatya kaoka enomana hoka nakairati isa enomana? nexaha.

<sup>34</sup> — Noxaxikatyasehare akitere akereta notyaohena, exahe nohateni isehenere nomani namiyahena hoka hatyo atyo nakairati akereta nomani. <sup>35</sup> Exe tehitiya: xiso atyo exakere xita: “4-li kaimarehena hoka nakairati ihatihena”, xita. Hoka waiyira xiayiaya! Nakairati koxaka ihati, waiye niyakehena. <sup>36</sup> Xala xamani atyo xirikotyati hiye hahena hoka kabakatyaka atyoite. Hawenane matyotenehare naheta maniya mokita. Nikare ite exafityasehare ixirikotyasehare xoaha haxawalita ihalahareha. <sup>37</sup> Hiyaiya, exakere babera iraiti kokoare:

Hatyahetene hoka ihatihena hoka hatisa irikohititene.

Hatyohare aliterexe.

<sup>38</sup> — Xiso atyo maisa xafityare hoka naxikatya xiso xirikotya maheta nakairati xonehenere. Xahetakomaniyereharenai hakaha ali xahitita, hoka xiso atyo xamiyahena ehateneha — nexa Jesus ihiyeha.

<sup>39</sup> Hatyaoseta Samaria yerenai kaokaha enomana. Kahare Samaria yerenai tyakekoha Jesus ohiro xakaini hiyeta. “Tyotya nawenani tahi waiyore hoka xakai nohiye”, nitere hiyeta. <sup>40</sup> Hatyaoseta Samaria yerenai xane hikoa Jesus ana hoka irae ekakoa hoka kasani Jesus tyaona enawenakalaha aokahita hoka hatyo hiyeta hinamaki ferakene tyaona ekakoaha.

<sup>41</sup> Hatyaoseta Jesus irae ekakoaha hoka tyakekoha Jesus iniraene hiyeta hoka <sup>42</sup> nexaha ohiro hiye: — Kalikini atyo wityakeko. Wisota atyo wasema iniraine, maisa atyo hiyakaini hiyeta taita xini wityakekone. Aliterexe atyo Enore Kalorexe Aohenere, halitinai niyaseheta kaiserehare — nexaha.

### *Jesus Aiyatelikheta Hatya Xekohaseti Ityani*

<sup>43</sup> Hatyo nali hinamaki ferakene Jesus tyaona hoka hatyaoseta jiyeitiya Samaria koa nalita hoka xane Galiléia koa. <sup>44</sup> Hatyota atyo nexa: — Sekorenai semaxemaita iraiti xakaisasehare hoka ewaikohera tyaoniterenai atyo maisa tyakekorene.

<sup>45</sup> Hatyaoseta xane kaoka Galiléia nali hoka nali waikatenai waiye mokahene. Galiléia koa yerenai xane hisehaliti Páscoa xowaka Jerusalém nali hoka exowaka waiyaha Jesus nómanenai hatyo nali hoka hatyo hiyeta waiye mokaha Jesus.

<sup>46</sup> Hatyaoseta Jesus kaoka Caná nali, one aikawahenere vinhoa nali xeta haikoaheta. Hatyaoseta hatya xekohaseti tyoa irai Jesus kakoa, ityani hokakita ehanako wenakalati Cafarnaum nali hoka. <sup>47</sup> Koxaka sema Jesus tahi: — Koxaka tyoheta Judéia koata hoka kaokeheta Galiléia koa — nitere sema hoka xane irae ekakoa, kasani tyoa Cafarnaum nali hoka ityani aiyatelikheta enomana aokita, ityani hawinitehena hoka.

<sup>48</sup> Hoka Jesus nexa hatyo xekohaseti hiye: — Xiso atyo maomakahare ximawaiyanenehareta maisa xityakekore natyo — nexa.

<sup>49</sup> — Xekohaseti, hisohena rotita waiya aliya hoka nityani waini wimakaokenehareta enomana — nexa ihiye, kaholawaka exánene kakoa.

<sup>50</sup> Hoka Jesus nexa ihiye: — Hiyanehetehena hihana xeta. Hityanite waiyeheta — nexa ihiye. Nexa ihiye hoka tyakeko Jesus niraene hoka haikoaheta hahaha xeta.

<sup>51</sup> Xaneheta Jesus nonita hoka ahotita ahalakoatyahawakanehareni hoka ewakanehareni nexaha ihiye: — Hityani waiyeheta.

<sup>52</sup> Hatyaoseta hawakanehareni axa: — Otene kamai nityani waiyeheta?

Hoka ewakanehareni nexa ihiye: — Kafaka makakoalihena hoka ewatyahisene tyoteheta enonita.

<sup>53</sup> Hatyaoseta enexe Jesus niraine, hatyaose kamaihena hoka iraetere: “Hityanite waiyeheta”, nitere ihiye oteheta hoka tyakeko Jesus hajianityo haisaninai harenai kokoita.

<sup>54</sup> Jesus tyoheta Judéia koata hoka Galiléia nali kaokeheta hoka hatyo xoima aiyatelekihetehenere kokoita hinamakihena maomakahare tyomita.

### 5

### *Jesus Aetonalikheta Maetonanehare*

<sup>1</sup> Hatyo najikinita judeunai hisehare tyaohena Jerusalém nali hoka Jesus xane waiya.

<sup>2</sup> Hatyo nali one nitini kalorexe, 5-hati taose kakoare wahaharexe tehitiya hatyo one haliya. Wenakalati Kalanero Xisoakala aokahitere nali maniya hatyo one nitini kalorexe. Judeunai xako atyo, “Betedsa”, nexahitaha hatyo one nitini xaokaka. <sup>3</sup> Kahare hokakitinai hatyo hati taosenae ako etolijoita one haliya, maxoseharenai, mawaiyehalitinai, maetonanehareni hare. Tyaonahitaha atyahahitaha one watyalisaka xahita. <sup>4</sup> Haiya xowaka anjo exoita hoka one watyalita. Hatyo najikinita xala hotohare xamani exoa exaiya hoka kinatereheta.

<sup>5</sup> Exowakita hatya haliti hatyo nali etolijoita, 38-terehokoanehena hokakita. <sup>6</sup> Owene etolijoita hoka Jesus waiyene hoka otita wahehena ehokakene hoka nexa ihiye: — Xoana hikinatereheta haokowita? nexa ihiye.

<sup>7</sup> Hoka nehena Jesus hiye: — Xekohaseti, maisa xala hare mokare natyo onexa, one kawatyalisakehena hoka. Nexoa xakore naokowita exaiya hoka nahitita hatya hokakiti exoita exaiya — nexa.

<sup>8</sup> Hatyaoseta Jesus nexa ihiye: — Hatityoahetehena hoka hiyetolisoakala hiyehetehena hoka hatohetehena — nexa.

<sup>9</sup> Nexa taita ihiye hoka exowakita hatyo haliti kinatereheta rotita, iyeheta haxetolisoakala, xaneheta.

Sábado xowaka aetonakihetene. <sup>10</sup> Hiyeta hoka judeunai nityohalitiranai nexaha ihiye: — Kalikini sábado, mahateniti ferakene. Mahateniti ferakene hoka awa atyo hakolatya hiyetolisoakala. Wiyaotyakisakaho hiyeta hoka maisa waiyeta — nexaha ihiye.

<sup>11</sup> Hoka nehena ihiyeha: — Xasemehena, noxajiyakisase atyo nexa nohiye: “Hiyehetehena hiyetolisoakala hoka hatohetehena”, nexa nohiye.

<sup>12</sup> — Xala nikare irae hikakoa hoka nikare hisaona? nexa axahene.

<sup>13</sup> Hoka maisa atyo Jesus nexare semita. Jesus atyo koxaka xaneheta hatyo nalita, kahare haliti tyaconita hatyo akiti hoka. — Maisa nasemita noxajiyakisase nexare — nexa ihiyeha.

<sup>14</sup> Wahasehena hoka Jesus tyoa isoahitiya Iraexatyakalati Hanako hoka ahalakoatya hatyo haxajiyakirahare hoka nehena ihiye: — Hasemehena, kalikini atyo hawaiyeheta. Awa atyo iniyalahare hisomehitiya, waiya aliya hoka exahehena hisaonita — nexa ihiye.

<sup>15</sup> Nexa Jesus ihiye hoka hatyaoseta hikoaheta hoka xakaini judeunai nityohalitiranai ihiye: — Jesus nika aiyatelikheta natyo — nexa ihiyeha.

<sup>16</sup> Hatyaoseta Jesus hiye ehareha, sábado xowaka haliti aiyatelikheta hoka hatyo hiyeta ehareha ihiye, aisahene aokowiha.

<sup>17</sup> Ehareha hoka Jesus nehena ihiyeha: — Baba atyo hakita kalikini kijiya hoka natyo tehitiya nahakita — nexa Jesus.

<sup>18</sup> Hatyo iraetera hiyeta judeunai nityohalitiranai aisahene aokowiha. Maisa exaotyakisakahoha xema tyaconita sábado ferakenehena, exahe Enore Ityani aokowita. Exahe Enore hákakoanehare aokowita nikare iraeta hoka maisa waiyeta enomanaha. Hatyo xemere aisahene aokowiha.

#### *Enore Ityani Atyo Iraiti Kakoare*

<sup>19</sup> Hatyaoseta Jesus nehena: — Xasemehena niraini. Enore Ityani taitaiya atyo hoka maisaiya atyo xoare hare tyomita. Hanexe Enore nómane waiyehena hoka hatyo akereta Ityani tyomita. Enexe tyomehena hotohare hoka enajikini maniya Ityani tehitiya tyomihitita Hanexe tyomitere akereta. <sup>20</sup> Enexe atyo awaitita Haisani hoka tyota háomanenai hotikijita enomana. Hotikisaita exaheharexe Haisani ana hoka hatyoharenai ite Ityani tyomehena hoka xahakaharetyoite.

<sup>21</sup> — Hiyaiya, Enexe ekasekihete hena kamatinai hoka kasehenahitinha. Nikare tehitiya Ityani ekasekiheta aokowihenere kamati ekasekihitita. <sup>22</sup> Enexe maisa sema aokowita halitinai nómane tahi. Kasani Ityani sema halitinai nómane tahi hoka tyaconahiterene akereta mokahene aoka Enexe. <sup>23</sup> Kasani halitinai aiminisaha Ityani aokita Enexe kaxaiminisakitere akereta. Xala xamani atyo maisa aiminijita Ityani hoka maisa tehitiya atyo Enexe aiminisare. Hiyaiya, hatyo atyo axikatya Haisani.

<sup>24</sup> — Aliterexe nomita xihiye, xala xamani atyo semaxemaita niraini hoka tyakekota tehitiya atyo noxaxikatyasehare hoka makamanehare atyo tyona hoka maisaiya atyo kamawenekoaretyakita. Koxaka atyo hakamaneta kaseheta hoka menanehaliti tyona.

<sup>25</sup> Aliterexe nomita xihiye, enaose xane hikoahena, koxaka enaose xane hikoa. Maika ite kamatinai semehenaha Ityani xako. Semehenahaite hoka kasehetehenahitinha. <sup>26</sup> Enexe atyo tyota menita hoka ihiyeta halitinae kaseta tyaconita. Haisani nikare tehitiya moka hoka Ityani hiyeta halitinai kaseta tyaconita. <sup>27</sup> Enexe iyateliti isa Haisani ana axalisa maheta halitinai hoka tyomahitere tahi sema hoka nikareta mokahene maheta. Hiyaiya, Haliti Ityani tehitiya atyo hoka.

<sup>28</sup> — Awa atyo exeharenai hiyeta xahakaharetyoahena: ekakoitaite enaose xane hikoahena hoka tyotya kamatinai semehena Enore Ityani xako <sup>29</sup> hoka kamatinae kasehenahitehenaha haxawatyakalaha akota. Hatyaosetaite waiye tyomehenerenai atyoite menanehaliti tyaonaha hoka iniyalahare tyomehenerenai atyoite kaxawatyakehena — nexa Jesus.

### *Jesus Atyo Iraiti Kakoare*

<sup>30</sup> — Maisaiya atyo nowawiharenai hoka xoare hare notyomita. Baba niraine nasemita hoka nasemitere akereta namokita haliti. Tota maniya taita nahekoita halitinai kakoa hoka tyaonahitere akereta namokahitene. Baba Enore xaokalita nikare notyaonita, maisa noxaokalita xini.

<sup>31</sup> — Nowawiya niraeta notahi hoka maisaiya xoare maheta xityakekota niraeni. <sup>32</sup> Xakore hoka hatya tehitiya atyo xakai notahi akiti. Hatyo iraihena hoka maisa atyo maoseraita xini. <sup>33</sup> Hiyaiya, xaxikatya haliti João ana axene maheta. Axahene hoka João xakai notahi akiti ihiyeha hoka maisa maoseratyahitene xini. <sup>34</sup> Maisaiya xoare maheta halitinai iraeha notahi nokatyakekotyaki maheta xakore hoka noxakaita exe iraiti waiyexe xihiyeha xikaiyakeheta maheta. <sup>35</sup> João atyo xaokanatyakalati. Takoa hoka aokanaitere akereta tyaonita halitinai koni, aotyakisahitene hoka. Maisa waha tyaonare xinekoni hoka exowaka xihalahare exaotyakira kakoa.

<sup>36</sup> — João xakai notahi akiti halitinai hiye tyakekoha maheta natyo. Hoka exe tehitiya João xahehare nawaiye: maika notyomitere hiyeta xityakeko natyo. Baba axikatya natyo ehatene notyoma maheta. Maika xityakekohena natyo nománinai hiyeta.

<sup>37</sup> — Noxaxikatyasehare Baba tehitiya irae notahi akiti, tyakeko natyo hoka. Hoka xiso atyo maisa xasemare exako, exahe xiayiyarene. <sup>38</sup> Maisa iniraine tyaonita xikakoa. Xiyaiya, maisa natyo exaxikalahare xityakekota hoka.

<sup>39</sup> — Babera Iraiti Waiyexe kakoare xakaixarita minita. Exema maniya xisaona hoka ximakamanehare xisaona xaokita hoka. Xakore hoka notahi atyo hatyo Iraiti Waiyexe nanekoa xairatyoare tyaonita. <sup>40</sup> Xakore atyo hoka maisa xisaona xaokowiye nokoamaniyi. Xisaonaiya nokoamaniyi hoka ximakamanehariya xisaona — nexa Jesus.

<sup>41</sup> — Maisa atyo halitinai aeroretyaha natyo naokare. <sup>42</sup> Hiyaiya, notita atyo xiso, maisa atyo Enore xawaityare kaisere, maisa exema maniya xisaonare. <sup>43</sup> Baba niraine kakoare atyo natyo xakore hoka maisa xaokita natyo xomana. Hatyaiya kaoka xomana haxaokalita hoka xawaiyeteniya. <sup>44</sup> Komitainiya maisa aliyakere Enore xema maniya xisaonita. Kasani halitinai ihalahareha xikakoa xaokita, komita maisa Enore ihalahareta xikakoa xaokare.

<sup>45</sup> — Xasemehena, maisaiya niraeharitita xiso Baba hiye. Xawaiyetita hatyo Moisés xaoxyakira xakore hoka Moisés atyoite iraeharetya xiso. <sup>46</sup> Hiyaiya, Moisés xairatya notahi akiti. Xityakekoreya Moisés xaoxyakira hoka xityakeko tehitiyaiya natyo.

<sup>47</sup> Maisaiya xityakekota Moisés xairala hoka aliyakoreya xityakekohena niraini? nexa Jesus ihiyeha.

### *Jesus Tyaisa Kahare Halitinai*

(Mateus 14.13-21; Marcos 6.30-44; Lucas 9.10-17)

<sup>1</sup> Hatyo najikinita Jesus imahotyoa Galiléia xa. Tiberíades xa tehitiya enexare.

<sup>2</sup> Kahare haliti xane exema, koxaka waiyaha enómane maomakahare hokakiterenai xaiyatelikisakeheta hoka. <sup>3</sup> Xane imahotyoa halakoiya hoka Jesus kakoha tyairi henose, xane tyoka haxaotyakiraharenai kakoa. <sup>4</sup> Hatyo xowaka okoi judeunai hisehare Páscoa tyaohena.

<sup>5</sup> Jesus atyo waiyehena, hisoaka atyo haliti tyoaha exema hoka nehena Filipe hiye: — Aliyakotaite wiyehena nakairati tyotya exe halitinai ana? nexa axene. <sup>6</sup> Koxaka atyo Jesus waiyoreta ityaisakaha kakoa hoka Filipe hasakaharetya aokowita hoka nikare iraeta.

<sup>7</sup> Hoka Filipe nehena ihiye: — Owane, aliyakere xamani. Kala 200-olohokose kakoa nakairati wiya hoka wisa enomanaha hoka maisaiya kehexahitene — nexa.

<sup>8</sup> Hatyaoseta exaotyakirahare André, Simão Pedro ximarene iraehena: <sup>9</sup> — Owene hatya xoima 5-tohase kolatita nakairati cevadahe nomakere, hinama kohase xoaha kakoare. Hoka wiseneya halitinai ana hoka maisaiya kehexahitene, hisoakaha hoka — nexa André.

<sup>10</sup> — Xiraihena halitinai hiye hoka tyokaha waikoa — nexa Jesus haxaotyakiraharenai hiye. Hatyo nali kalokoare ime koa. Hatyaoseta exaotyakiraharenai irae ekakoaha hoka tyotya tyokaha. Kala komita 5.000-hare haliti.

<sup>11</sup> Hatyaoseta isaha xoima nakaira Jesus ana hoka iraexaty: — Ehekore nakairati hisa womana, Abá — nexa iraexaty Enore hiye hoka irakene haxaotyakiraharenai ana hoka exaotyakiraharenai irakene tyokiterenai ana. Nikareta kohase irahitiya enomanaha.

<sup>12</sup> Tyotya kanakaira, fakatehareha, kamawaneha.

Kanakaira, fakatehareha hoka Jesus nehena haxaotyakiraharenai hiye: — Ximexeheta enakairaha mawane hoka waiye xamoheta hoka maisa mitita — nexa.

<sup>13</sup> Nexa hoka imexehenahitene hoka 12-te koho ako kaise mokaha. 5-tohase nakairati xakore hoka 12-te kaise mokaha emawaneha.

<sup>14</sup> Hatyo Jesus nakairati aerorititere halitinai waiyaha hoka nexaha: — Iraiti xakaisahare kalorexe kaotyakehenaite haliti koni aoka koxakereharenai. Kala maisa hoka exe Jesus terota hatyo kalorexe — nexahitaha.

<sup>15</sup> Hatyaoseta Jesus exekohaseha kalorexe tyaohena aokahitaha hoka aiyateretyoaha exahita, kalorexe tyaohena maheta. Xakore hoka Jesus sema hatyo tahi hoka xanehitia hawawaharenai enonitaha tyairi henose xeta.

#### *Jesus Tonita One Heno*

(Mateus 14.22-33; Marcos 6.45-52)

<sup>16</sup> Maka hoka Jesus xaotyakiraharenai aihetehena onexa haliya, <sup>17</sup> isoahenahitaha kanowako hoka imahotyoahenahitaha hoka Cafarnaum maniya xanehenahitaha. Koxaka makaliro xakore hoka Jesus atyo makaokeneta enomanaha. <sup>18</sup> Xanehenahititaha onexa hoka kinatyawiniti kaoka enomanaha, hoholasekoatyahene, one ainakiyatya.

<sup>19</sup> Kala exaotyakiraharenai sekohetehena, nekesexehetehena hoka, waiyehenaha atyo, owehena Jesus tyohitita, oneheno atyo tonita. Tyoa kaokehetehehena kanowa ana hoka mairaha.

<sup>20</sup> — Awa atyo ximaira, natyo taore — nexa Jesus ihiyeha.

<sup>21</sup> Hatyaoseta ihalahareha, ekakohakihenahitene kanowako. Hatyaoseta jiyehenahitiya hoka haxerore xane kaokaha xane aokowitere nali.

#### *Halitinai Tawehetaha Jesus*

<sup>22</sup> Kamaetali hoka hatyo haliti jikotiterenai tawehena Jesus xahita. Nali haterore kanowa hoka koxaka hatyoako exaotyakiraharenai xanehenahitaha maxekohasehareta hoka motya hatyo nali aokahitaha hoka tawehenaha exahita. <sup>23</sup> Hatyaoseta wenakalati Tiberíades nalitare tyoa kaokehena kanowanai kakoa, tyoa takoaha hatyo halitinai kanakairihenere nali, Jesus iraexahenere Enore hiye najikinita kanakairihenahere nali.

<sup>24</sup> Maisa waiyehenahititaha Jesus, exahe exaotyakiraharenai hoka hatyaoseta kanowanai ako tyokaha hoka xanehenahitiya Cafarnaum nali xeta tawehenahitene maheta.

#### *Jesus Atyo Nakairati Wenati Niyahare*

<sup>25</sup> Imahotyoaha hoka xane kaokehena hitaha Jesus halakoiya maniya. — Xaotyakisatiye, xoana xowaka ali hikaoka? nexaha ihiye kaokehena hitene hoka.

<sup>26</sup> Hoka Jesus nehena ihiyeha: — Xasemehena, kafaka xikanakaira xifikatehare hoka hatyo hiyeta kalikini xatawa natyo. Maisa atyo waiyekehala kitere maomakahare notyomehenere hiyeta xini xatawihitita natyo — nexa ihiyeha. <sup>27</sup> — Awa atyo nakairati kaiyalaharetatere xema xahaka. Exahe kalore xikanakaira xakore hoka haxowaka atyoite xiwaini. Maika menanehaliti nakaira xema xahaka. Halitiya kanakairene hoka

makamanehareya tyaona. Haliti Ityani ijita hatyo nakairati xomana. Enore isa iyateliti enomanahenikare tyaona maheta — nexa Jesus ihiye.

<sup>28</sup> — Hoka xoare wisoma aokita Enore? nexa axaha Jesus.

<sup>29</sup> — Xityakeko exaxikalalahare aokita — nexa Jesus.

<sup>30</sup> Hoka nexaha ihiye: — Hoka hiso atyo xoareya hisoma hoka wiyaiya hoka wityakeko hiso? nexaha. <sup>31</sup> — Wahetakomaniyerenai atyo kanakaira nakairati maná aokahitere maharexakiti nali. Hatyo tahi akiti kaxairatyaka Iraiti Waiyexe nanekoa exakere: Enore isa enomanahenikare tyaona nakairati enokoata hoka kanakairaha.

— Hoka hiso atyo xoare hisoma hoka wityakeko hiso? nexaha ihiye.

<sup>32</sup> Hoka Jesus nehena ihiye: — Xasemehena, Moisés isa nakairati enokoatare xomana xakore atyo hoka maisa atyo menanehaliti nakaira xini. Nakairati enokoatare ekaiserehare atyo Baba ijita. <sup>33</sup> Enore xaxikalalahare atyo enalita exoa xomana hoka hatyo atyo nakairati. Halitinaiya tyaona exema maniya hoka menanehalitiya tyaonaha — nexa Jesus.

<sup>34</sup> — Xekohaseti, hiseta menira womana hatyo nakairati hiyeta — nexaha axahene.

<sup>35</sup> Hoka Jesus nehena ihiye: — Natyo atyo nakairati enokoatare. Xala xamaniya atyo tyaona noximi hoka maisaiya atyo nakihitita, maisaiya oinihitita — nexa. <sup>36</sup> — Koxaka nomi xihiye: Xiyaita xakore natyo hoka maisa xityakekore natyo. <sup>37</sup> Baba Enore ijita halitinai nomani hoka tyaonahaite noximi maniya. Tyaonahaixa noximi maniya hoka maisaiya naxanekihenahitene haware. <sup>38</sup> Hiyaiya, Baba atyo axikatya natyo hoka notyoa enokoata notyoma maheta aokitreharenai. Exaokalita nikare notyaonita, maisa noxaokalita xini.

<sup>39</sup> — Baba noxaxikatyasehare atyo kasani nokoamaniye mohenerenai nokaxaiko waiye hoka maisa hatya hekoti meta nonitita aoka. Wainihenaha hoka miyanitiye xowakehenaita nekasekihahitene aoka. <sup>40</sup> Kasani tyotya noximi maniya tyaohenerenai makamanehare tyaohenaha aoka noxaxikatyasehare. Exahe wainihenaha hoka nekasekihahitenite miyanitiye xowakehenita — nexa Jesus ihiye.

<sup>41</sup> Nixa Jesus irae hoka judeunai sema hatyo iniraine hoka maisa waiyeta ihiye.

— Xoana hoka exakere iraeta: “Natyo atyo nakairati enokoatare”, nita? nexaha weraweratyakakoaha. <sup>42</sup> — Xoana, exe atyo José Ityani Jesus, aliterexe? Enexe inityo xoaha atyo wiyaiyanehare. Xoana hoka, “Enokoata nexoa” nita? nexaha.

<sup>43</sup> Hoka Jesus nehena ihiye: — Xahalakihena xiweraweralo notahi. <sup>44</sup> Baba axikatya natyo hoka tyaona noximi aohenerenai taita atyoite tyaona noximi maniya. Maisaiya aokahitene nomani hoka maisaiya aliyakere tyaonahitaha noximi maniya. Hoka miyanitiye ferakenehenaite hoka nekasekihahitene. <sup>45</sup> Iraiti xakaisaseharena xairala nanekoa exakerexe xairatyare tyaonita:

Enore ite tyotya aotyakisahene.

— Hoka xalanai xamani atyo semaxemaita Baba niraine hoka ihiyeta atyo waiy-orahitaha hoka tyaonahitaha noximi maniya. <sup>46</sup> Maisa atyo xala hare waiyare Baba, enalita tyohenerere taita atyo waiyitene. <sup>47</sup> Aliterexe nomita xihiye, xala xamaniya atyo tyakeko natyo hoka tyaona mene matyotenehare. <sup>48</sup> Natyo atyo nakairati enokoatare. Halitiya kanakairene hoka tyaona meneya matyotenehare. <sup>49</sup> Xahetakomaniyerenai ene atyo kanakairaha nakairati maná maharexakiti nali xakore hoka wainiha. <sup>50</sup> Hoka xala xamaniya atyo kanakaira nakairati kaiserehare exoahenerere enokoata hoka maisaiya atyo wainita. <sup>51</sup> Natyo atyo nakairati enokoatare. Xala xamaniya exe nakairati hiyeta kanakaira hoka tyaona meneya atyo. Noháre atyo tyotya halitinai anere enakairaha maheta. Halitiya kanakairene hoka tyaona meneya, maisaiya wainita — nexa Jesus.

<sup>52</sup> Nixa Jesus irae hoka judeunai hatyaoseta kinatyaxa iraekakoaha: — Aliyakereya hoka exe haliti tyaisa halitinai haháre kakoa aokita? nexaha.

<sup>53</sup> Hatyaoseta Jesus nihitiya ihiye: — Aliterexe nomita xihiye, maisaiya xanijita Haliti Ityani nete, exahe xiserita itimalaxa hoka maisaiya xisaota menita matyotenehare — nexa. <sup>54</sup> — Hoka xala xamani atyo nete nisa, notimalaxi tera hoka tyaona mene

matyotenehare. Eháre wainihena hoka miyanitiye xowakehenaita hoka nekasekihetene. <sup>55</sup> Noháre atyo nakairati kaiserehare, exahe notimalaxi atyo erati kaiserehare. <sup>56</sup> Xala xamani atyo nete nijita, notimalaxi terita xoaha hoka tyaonita atyo nokakoi, exahe natyo tehitiya atyo notyaonita tehitiya ekakoa.

<sup>57</sup> — Baba tyaota menitere hiyeta atyo maisa nowainiye. Hatyo atyo axikatya natyo. Nikareta tehitiya xala xamani nisa nete hoka maisaiya wainita, tyaona meneya. <sup>58</sup> Exe nakairati atyo exoa enokoata. Maisa atyo xahetakomaniyerenai ene kanakairehenere maharexakiti akerexe xini. Hatyonai atyo kanakairaha hoka enajikinita atyo wainiha. Hoka xala xamani atyo exe nakairati naokitere kanakaira hoka tyaona meneya atyo matyotenehare — nexa Jesus.

<sup>59</sup> Jesus hatahi iraeta ihiyeha Cafarnaum nali, xahohisakoatyakalati hanako aotyakisahitene.

#### *Iraiti Menanehaliti Tahi*

<sup>60</sup> Hoka kahare Jesus xema tyaoniterekarenai sema hatyo iniraine hoka maisa waiyeta ihiyeha. — Exaotyakiraho atyo howitihare! Xalaiya tyaohena hatyoharaho? nexaha.

<sup>61</sup> Hoka Jesus atyo otita eweraweralaha hoka nehena: — Xoana xahalakihena xawenne nokoamaniye niraini hiyeta? <sup>62</sup> Hoka Haliti Ityani haikoahetehena xihaotita hetati tyaonitere nali enokoa xeta hoka xoanaiya xisaohena? <sup>63</sup> Isekohaliti Waiyexe aiyatelikijita halitinai, tyaona mene matyotenehare maheta. Hawawaiya haliti hoka maisaiya aliyakere tyaota menita. Xasemaxematy niraini xikakoa hoka ekakoitaite menanehaliti xisaona — nexa. <sup>64</sup> — Haiyaharenai atyo xinekonitare niraini tyakeko xakore hoka haiyaharenai atyo maisa tyakekore — nexa Jesus ihiyeha. Jesus atyo enaheta komaniyita otita matyakekotiterenai, exahe otita hamatawatyasehare xoaha hoka: — Haiyaharenai atyo maisa tyakekore niraini — nexa.

<sup>65</sup> — Hatyo hiyeta nomita xihiye: Baba axikatya natyo hoka tyaona noximi aohenerenai taita atyoite tyaona noximi maniya. Maisaiya aokahitene nomani hoka maisaiya aliyakere tyaonahitaha noximi maniya — nexa Jesus.

<sup>66</sup> Hatyo najikinita kahare exema tyaoniterenai haikoaheta enonita, xanehenahitaha hawenakalaha.

<sup>67</sup> Hatyaoseta 12-hare haxaotyakiraharenai axa: — Xoana xiso tehitiya xiyanehetehena xaokowita? nexa ihiyeha.

<sup>68</sup> — Maisaiya — nexa Simão Pedro. — Wahalakisaiya hiso hoka xala xemaiya wisaonehena? Hiraine xemaiya wisaona hoka ekakoitaiya wimakamanehare wisaona.

<sup>69</sup> Wiso atyo wityakekota exahe waiyekahalakita atyo womana. Enore xaxikalahare waiyexe atyo waokita hiso — nexa Pedro Jesus hiye.

<sup>70</sup> Hoka Jesus nihitiya ihiyeha: — Xiso 12-hare nomaniye naoka xiso hoka hatya xinekonitare atyo tihanare — nexa Jesus ihiyeha. <sup>71</sup> Judas xaokaka, Simão Iscariotes ityani xaokaka nikareta Jesus. Judas exaotyakiraharenai konitare xakore hoka hatyo najikinitaiya matawahena Jesus.

#### *Jesus Irae Haximarenenai Kakoa*

<sup>1</sup> Hatyo najikinita Jesus xane Galiléia koa tonakonisahitene. Maisa Judéia koa xane aokowihitita, naliyerenai judeunai nityohalitiranai aisene aokowiyahitaha hoka.

<sup>2</sup> Exowaka okoi judeunai hisehare aose xane hikoahena. Hatyo hisehaliti xowakehenita hoka judeunai hatirisako tyaonahitaha hoka “Hatirisako tyaoniterenai hisehare”, nexaha exaokaka.

<sup>3</sup> Hatyaoseta Jesus ximarenenai nehenaha ihiye: — Hiyanehena Judéia koa maniya hoka hisomiterekarenai hisomehena, hiyema tyaoniterenai hománe waiyaha maheta.

<sup>4</sup> Hiyaiya, hatya haliti tahi waiyekahalaka kasemaka aohena hoka maisa hameteneta tyomare. Aliterexe atyo hisomita hoka hiyane ehaotiha hisomehena hoka tyotyaha waiyaha — nexaha ihiye. <sup>5</sup> Iximarenenai kakoita matyakekotitene hoka nikare iraeta.

<sup>6</sup> Hoka Jesus nexa ihiyeha: — Maisa atyo xane hikoahenere noxanini aose. Hoka xiso xomana atyo haxowaketere. <sup>7</sup> Maisaiya atyo matyakekoneharenai ehareta xihiye. Hoka nohiye atyo eharahitaha niraini xemere. “Xoana hoka iniyalahare xisomita?” nomihena ihiyeha hoka.

<sup>8</sup> — Xiyane atyo xiayiye hena hisehaliti. Hoka maisaiya atyo kalikini natyo noxanita, maisa terota atyo xane hikoahenere noxanini aose — nexa Jesus haximarenenai hiye.

<sup>9</sup> Nexa ihiyeha hoka hekota Jesus Galiléia koa nali.

#### *Jesus Xane Hatirisakorenai Hiséhare Ana*

<sup>10</sup> Hatyaoseta iximarenenai xaneha waiyaha maheta hisehaliti. Xaneha hoka hatyo najikinita Jesus tehitija xane. Xane xakore atyo hoka hameteneta atyo xane, maisa atyo halitinai semahitaha exánene.

<sup>11</sup> Hatyaoseta judeunai nityohalitiranai tawehenene hatyo hisehaliti koa nali. — Xoana koxaka kaoka ali? nexa axaha hatyo nali tyeoniterenai.

<sup>12</sup> Hiséhaliti koa nali tyeoniterenai kahare iraehenaha etahi akiti. Haiyanai atyo nexa exaokaka: — Hatyo atyo waiye — nexahitaha.

Hoka haiyanai atyo nexa: — Hatyo atyo maoseratita wiso — nexahitaha. <sup>13</sup> Kahare iraeha etahi akiti hoka maisa atyo tyotya haliti haoti xini, mairahitaha judeunai nityohalitiranai hoka.

<sup>14</sup> Hatyaoseta koxaka 4-ki ferakenehena ihisehareha tyaonita hoka Jesus xane isoia Iraexatyakalati Hanako hoka aotyakihenahene. <sup>15</sup> Aotyakisahitene hoka judeunai semahitaha exaotyakira hoka nexahitaha: — Aliyakerala hoka waiyore iraeta, maisa xakore waha kaxaotyakisakita hoka? nexa hakaharetyoaha.

<sup>16</sup> Hoka Jesus nehena ihiyeha: — Maisa atyo noxaotyakiri xini, noxaxikatyasehare Enore xaotyakira atyo hoka nikareta naotyakijita. <sup>17</sup> Xala xamani atyo Enore aokitire akereta tyoma aokowita hoka ekakoita ite waiyore noxaotyakiri kakoa hoka nehenaitie: “Hatyo exaotyakira atyo Enore xaotyakira terota, maisa haxaotyakira kakoa xini aotyakijita wiso”. <sup>18</sup> Hatya halitiya atyo iraeta hatahita hoka hatyota atyo haxaexakerityaka aokita. Hoka haxaxikatyasehare xaexakerityakaiya aokita hoka hatyoiya atyo tota maniya tyaonita, maisaiya atyo maoseraita xini.

<sup>19</sup> — Moisés halakisa haxaotyakira xomana xisaona maheta exema maniya xakore hoka maisa atyo xisaonare exema. Xisaonitaiya exema maniya hoka maisaiya xaisa xaokowiye natyo. Xoana hoka nikareta xiso? nexa Jesus.

<sup>20</sup> — Xala aisa aokowita hiso? Kala tihanare tyaonita hikakoa hoka nikare hiraeta — nexa halitinai iniraene nahalakoa.

<sup>21</sup> Hatyaoseta Jesus nehena: — Kafaka hatya haliti hokakita hoka naiyatelikihetene hoka xityotya xahakaharetyoaha.

<sup>22</sup> — Xiso atyo enamokose tyaohena hoka enomanere milihe xaikotita Moisés xaotyakira akereta, sábado ferakenehena hoka. Maisa hatyo akiti Moisés xowaka rotita xini nikare kaomaka. Enahetakomaniyerenai hotohare nikare tyaonita hoka Moisés xairahetene babera koa. <sup>23</sup> Mahateniti ferakene xakore atyo hoka Moisés niraene xema sábado ferakenehena hoka enamokose normanere milihe xaikotita hoka waiyeta xihiye. Hoka xoanere hoka xehareta nohiye sábado xowaka naiyatelikihetehena haliti hoka?

<sup>24</sup> Waiyehena nikare xahekotya. Waiye maniya xamohenha xiyahekola — nexa Jesus ihiyeha.

#### *Jesus Ála Enore Kalorexe Aohenere?*

<sup>25</sup> Hatyaoseta haiyanai Jerusalém yerenai nehena: — Xoana aliterexe exe haliti aisaha aokowiyahitaha? <sup>26</sup> Hiyaiya, wityotya wihaoti iraeta hoka maisa winityohalitiranai xoare nexareha ihiye, maisa mahokoanityareha iniraine. Xoana Enore Kalorexe Aohenere tehitijala aokahitene? nexahitaha. <sup>27</sup> — Enore Kalorexe Aohenere ite tyohena hoka maisaite waiyekhalakita womana hetati kaotyakehenere aose kakoa. Xakore hoka exe haliti nawenane aose atyo waiyekhalakita womana — nexa iraekakoahitaha.

<sup>28</sup> Hatyaoseta Jesus aotyakijita Iraexatyakalati Hanako hoka nexa: — Xoana aliterexe xiayaiyanehare natyo, exahe nawenani aose hoka waiyekehala hokita xomana? Hatya axikatya natyo haliti koni, maisa noxaokalita xini nokaotyaki haliti koni. Noxaxikatyase-hare atyo maisa maoseratyaliye, xakore hoka maisa atyo xiayaiyanehare xini. <sup>29</sup> Hoka natyo atyo nowaiyitene, ehaliyata atyo notyoa, exaxikalahare atyo natyo hoka — nexa Jesus kinatyaxa iraeta.

<sup>30</sup> Hatyaoseta otokaha xakore Jesus aokowiha hoka maisa xala harenai otokarene, maisa exotokakaose xane hikoahenere hoka maisa otokahitene. <sup>31</sup> Kahare haiyaharenai nali tyaconiterenai tyakekoha Jesus hoka nexaha: — Exe haliti kahare tyomita maomakahare wityakekone maheta. Xoana Enore Kalorexe Aohenere kaite tyohena hoka exe xahehara kaite tyomehena maomakahare? nexa axakakoahitaha.

#### *Axikatyaha Sorarenai Otokaha Maheta Jesus*

<sup>32</sup> Fariseunai sema halitinai niraene Jesus tahi akiti hoka hatyo hiyeta axikatyaha sorarenai otokahene maheta. Sacerdotenai xekohasenai tehitia kahinaetyahene hoka sorarenai axikatyaha.

<sup>33</sup> Hoka Jesus nehena:

— Iniraita notyaohitiya xikakoa hoka hatyohekotaite noxaniheta noxaxikatyasehare nali. <sup>34</sup> Noxanihetaite hoka xatawaite natyo hoka maisaiya xikaokehilita natyo. Hoka xisoiya atyo maisa aliyakere xiyaneta noxanihenere nali — nexa.

<sup>35</sup> Hatyaoseta judeunai nexa iraekakoahenaha: — Aliyakoiyala xane hoka maisa wikaokehititene? Xoana sekoala xanehena Grécia koa nali hoka judeunai tyaconahitere nali ala tyahena? Xoana Grécia yerenai tehitialaite aotyakihena? <sup>36</sup> Xoana ala hoka nikare iraeta: “Noxanihetaite hoka xatawaite natyo hoka maisaiya xikaokehilita natyo. Hoka xisoiya atyo maisa aliyakere xiyaneta noxanihenere nali”, nita? nexaha.

#### *Haty Oneseta Wenati Waiyexe Kaotyakehena*

<sup>37</sup> Miyanitiye hisehaliti ferakene xowakehena kahare haliti hohisakoita hoka Jesus tityoa enekonyaha hoka kinatyaxa iraihena: — Xala xamani oinita hoka tyoa nomani hoka nisa enomana one hoka tera — nexa. “One”, nitere atyo Isekohaliti Waiyexe xaokaka nikare iraeta.

<sup>38</sup> — Xala xamani tyakeko natyo hoka one ite kahare hikoa ihiyeta hoka tyona mene matyotenehare Iraiti Waiyexe nanekoa iraetera akereta — nexa Jesus. <sup>39</sup> Jesus atyo Isekohaliti Waiyexe xaokaka iraeta. Exowakita maisa Isekohaliti Waiyexe kaokare tyakekohenerenai ana. Hoka Jesus waini hoka kaseheta hoka kalorexe tyona hotohare hoka hatyaosetaiya Isekohaliti Waiyexe kaoka enomanaha.

#### *Halitinai Exaoretyakakoa*

<sup>40</sup> Nixa hoka kahare naliyerenai semaha iniraine hoka nehenaha: — Aliterexe exe haliti atyo iraiti xakaisasehare Moisés aokitere — nexaha.

<sup>41</sup> Haiyanai atyo nexaha: — Exe atyo Enore Kalorexe Aohenere.

Hoka haiyanai atyo nexaha: — Xoana Enore Kalorexe Aohenere alaite Galiléia koata tyoa? <sup>42</sup> Exakere Iraiti Waiyexe nanekoa xairatyoare tyaconita: Enore Kalorexe Aohenere atyoite Davi jikolahare. Belém nali atyoite tyona Davi tyonitere nali — nexaha hahinaeharenai niraene nahalakoa.

<sup>43</sup> Hatyaoseta hahekore xakini ahekotya Jesus tahi. <sup>44</sup> Haiyanai atyo otokaha Jesus aokowiha xakore hoka maisa otokahitene.

#### *Judeunai Nityohalitiranai Maisa Tyakekoahitaha*

<sup>45</sup> Hatyaoseta sorarenai haikoaheta fariseunai, sacerdote xekohasenai tyaconahitere nali. Haikoaheta hoka exekohasenai axahene: — Xoana hoka maisa xotokitene hoka ali xanolokitene? nexaha.

<sup>46</sup> Hoka sorarenai nexaha haxekohaseha hiye: — Maisa xala harenai hatyo haliti iraehenere akere iraexe — nexaha.

<sup>47</sup> — Xoana xiso tehitiya emaoserala xema xisaona? nexaha. <sup>48</sup> — Xoana haiyaharenai kalorexenai, fariseunai xoaha tyakeko iniraine? Xiyaiya, maisa hatya hekoti tyakekore. <sup>49</sup> Alitere exe haliti hisoakere tyakekotene. Xakore atyo hoka exe halitinai maisa waiyorexeha wiyaotyakisakaho kakoa hoka maisa waiyexeha Enore ana — nexaha sorarenai hiye.

<sup>50</sup> Hatyaoseta Nicodemos nexarexe, makiya xane iraehenere Jesus kakoa, nehena ihiyeha: <sup>51</sup> — Wiyaotyakisakaho hiyeta atyo maisa haliti waberexotyare rota. Wasema hotohare atyo iniraene, exahe etahi akiti hoka waberexowita — nexo.

<sup>52</sup> — Xoana hiso tehitiya Galiléia koatare? Hiyane hiyaiya babera iraiti xakaisasehare-nai niraine kakoare. Maisa iraiti xakaisasehare kaotyakita Galiléia koata — nexaha ihiye.

<sup>53</sup> Nexo hoka hatyaoseta iniraikakoaneha tyotya hoka xanhenahitaha hahanaha nihatyaka.

## 8

### *Hatyah Ohiro Énatyalolo*

<sup>1</sup> Hatyo najikinita Jesus xane Oliveiras tyairiya heno. <sup>2</sup> Kamaetali makiyita haikoaheta Iraexatyakalati Hana nali hoka kahare haliti hohisakoa ehaliya exaotyakira semaha maheta. Jesus tyoka hoka aotyakisahitene.

<sup>3</sup> Hatyaoseta judeunai xaotyakiraho kakoa waiyoreterenai fariseunai xoaha nolokaha hatya ohiro enomana. Hatya ena watyalitene hoka waiyahene hoka otokahene hoka tyoaha ekakoa Jesus ana. Tyoa kaokaha ekakoa hoka mokahene halitinai nenekesene

<sup>4</sup> hoka nehenaha Jesus hiye:

— Xaotyakisatiye, exe ohiro wotoka, hatya ena watyalitene hoka. <sup>5</sup> Exakerexe atyo Moisés xaotyakiraho aotyakisa wiso: “Maikaite nikare tyaoniterhalonai sehalli kakoa kamokotyaka”. Nikare Moisés xairatya hoka hiso atyoite xoare hehena etahi? nexo axaha Jesus. <sup>6</sup> Nexo iraeha ihiye hasakaharetyahene maheta, kasani haware irae Moisés niraine nonita aokowiyahitaha hoka eheno maniya xawatyahene aokowiyahitaha hoka.

Nexaha ihiye hoka Jesus meholokoa hoka xairatya hakahihi kakoa waikoa. <sup>7</sup> Hekota axahitene hoka Jesus aototaharetyoa hoka nehena ihiyeha: — Maika hatya maomanehare iniyalahare hotohare mokotya sehalli kakoa exe ohiro — nexo hoka <sup>8</sup> meholokoahitiya waikoa hoka xairahitiya.

<sup>9</sup> Hatyo iniraine semaha hoka hikoahenahitaha hatya xakini, maisa xala hare iniyalahare maomanehare aka hoka. Inityohalitiranaiha hotohare hikoaheta, jikiniti maniya tyotya hikoahenahita. Ekakoita Jesus hawawitehena. Hatyo ohiro tehitiya hekota tityoita hatyo nali.

<sup>10</sup> Hatyaoseta Jesus aototaharetyoaheta hoka waiyehena atyo, maisa xala hare akeheta hoka nehena hatyo ohiro hiye: — Aliyo hiraeharetyasenai? Xoana maisa hatya hekoti hiyaisaka aokare? nexo.

<sup>11</sup> Hoka nexo Jesus hiye: — Maisa xala hare aka, Xekohaseti.

Jesus nihitiya ihiye: — Natyo tehitiya atyo maisa hiyaisaka naokita. Kotare hiyanetehena. Hoka waiyehena atyo nikare iniyalahare hisomehitiya — nexo Jesus ihiye.

### *Jesus Atyo Halitinai Xaokanatyakala*

<sup>12</sup> Haxowaka Jesus iraihitiya halitinai kakoa: — Natyo atyo xaokanatyakalati akereta halitinai ana. Xala xamaniya atyo tyaona noximi hoka waiyeyahene atyo tyaona. Hoka maisaiya makaliroti koni tyaohitita — nexo.

<sup>13</sup> Nexo hoka fariseunai nehena Jesus hiye: — Kalikini atyo hitahi akiti taitehena hiraeta hikaxaexakeretyaka maheta. Hamaoseraita atyo wiso — nexaha.

<sup>14</sup> Hoka Jesus nehena ihiyeha: — Aliterexe xakore atyo notahi niraeta hoka maisa atyo namaoseraita xini. Aliterexe atyo niraeta hoka nawaiyoreta atyo notyoanini exahe noxaninheta kakoa. Hoka xiso atyo maisa xawaiyorexe notyoanini exahe noxaninheta kakoa. <sup>15</sup> Xiso atyo haliti xiyaiyehena, inira xawaiyorehena ekakoa hoka, “Exakerexe

waiye xomokaka”, xita. Hoka natyo atyo maisa nikare niraexe halitinai xaokaka. <sup>16</sup> Haiya xowakiya nomihena, “Exe haliti atyo exakere tyaonita”, nomihenaiya hoka aliterexe atyo niraeta. Hiyaiya, maisa atyo nowawi xini notyaonita. Baba noxaxikatyasehare atyo tyaonita nokakoi hoka nikare niraeta.

<sup>17</sup> — Exakere iraiti xiyaotyakisakaho nanekoa xairatyoare tyaonita tehitiya: Hinamahareya haliti xakai hawaiyane tahi hoka hakakoa iraeha hatyo tahi taita hoka xityakeko iniraeneha. Iniraeneha atyo aliterexe.

<sup>18</sup> — Hiyaiya, natyo atyo noxakaita notahi akiti xihiye, Baba noxaxikatyasehare tehitiya xakaita notahi.

<sup>19</sup> Nixa ihiyeha hoka nehenaha ihiye: — Aliyo atyo hexe?

Hoka Jesus nehena ihiyeha: — Maisa xiayianehare kaisere xini natyo, exahe Baba hoka maisa xiayianehare xini. Xiyaiyanehare kaisereya natyo hoka Baba tehitiyaiya xiayianehare — nixa Jesus ihiyeha.

<sup>20</sup> Exowaka Jesus aotyakijita Iraexatyakalati Hanako. Halyako olo nitini tyaonitere ako Jesus iraeta ekakoaha. Irae ekakoaha hoka maisa otokahitene, maisa exotokakaose-henere hoka.

### *Xala Atyo Jesus?*

<sup>21</sup> Hatyaoseta Jesus nihitiya ihiyeha: — Noxanihetehenaite xonita. Xatawa xakore ite natyo hoka maisaiya xiayiehitita natyo hoka iniyalahare xománe kakoitaite xiwaini hoka maisaiya atyo noxanihenere nali xijoita — nixa ihiyeha.

<sup>22</sup> Nixa irae hoka judeunai nexakakoahenaha: — “Maisaiya noxanihenere nali xijoita”, nita. Xoana tyaohena? Xoana hatytala alsoawihena? nexakakoaha.

<sup>23</sup> Hatyaoseta Jesus nihitiya: — Xiso atyo ali waikoatare hoka natyo atyo enokoatare. Xiso atyo ali waikohekoare hoka natyo atyo maisa ali waikohekoare xini. <sup>24</sup> Hiyeta hoka nomita xihiye. “Iniyalahare xománe kakoitaite xiwaini”. Maisa tyare xityakekota natyo hoka — nixa Jesus ihiyeha.

<sup>25</sup> Hatyaoseta axehenahitiyene: — Xala atyo hiso? nexaha.

Hoka Jesus nehena ihiyeha: — Hetati xowakiyita nowaiya xiso hoka noxakai notahi xihiye. Kalikini noxakaihiyi xihiye. <sup>26</sup> Kahare xitahi nirai naokowita exahe nowatyalí xiso naokowita. Hatyo noxaxikatyasehare atyo maisa maoseratyare xini hoka iniraine koxaka nasema hoka noxakaita halitinai hiye — nixa Jesus ihiyeha.

<sup>27</sup> Jesus xakore xakaita hanexe Enore tahi akiti ihiyeha hoka maisa waiyekahalakere enomanaha, motya hatya tahi iraeta aokahitaha.

<sup>28</sup> Hatyo hiyeta Jesus nihitiya ihiyeha: — Natyo atyo maisa atyo xoare noxaokali ximita notyomare. Baba aotyakihenere natyo taita atyo niraeta. Xainakihenaite Haliti Ityani hoka hatyaosetaite waiyekahalakehena xomana “Natyo atyo Natyota terota” nomitere.

<sup>29</sup> Noxaxikatyasehare atyo tyaonita nokakoi. Exaokalaoseta notyaona minita hoka maisa atyo nowawi halakisare — nixa Jesus ihiyeha. <sup>30</sup> Nikare Jesus hatyo tahi irae hoka kahare haliti tyakekoahene.

### *Wakahare, Mawakaharenahare Tyaoniterenai*

<sup>31</sup> Hatyaoseta kahare judeunai tyakekoahene hoka Jesus nehena tyakekohenerenai hiye: — Niraini xemaiya xisaona hoka noximi nawenatyasehareya naoka xiso <sup>32</sup> hoka waiyekahalakaiya xomana aliterexe hoka xikaiyakehetaiya xiwakaharene nonitata — nixa Jesus ihiyeha.

<sup>33</sup> Hatyaoseta nehenaha Jesus hiye: — Wiso atyo Abraão jikolaharenai, maisa atyo xoana xowakiya wakahare wisaonare, exahe wahetakomaniyereharenai hoka wakahare tyaonareha. Xoanere hoka wikaiyakeheta wiwakaharene nonitata haoka?

<sup>34</sup> Hoka Jesus nihitiya ihiyeha: — Xasemehena niraini: wakahareya atyo maisa aliyakere halakijita haxekohase. Nikareta iniyalahare nomaseharenaiya maisa aliyakere halakijita iniyalahare háomane. <sup>35</sup> Wakahare atyo maisa tyaoneta menexe haxekohase hanako hoka exekohase ityani atyo tyaoneta minita hanexe hanako. <sup>36</sup> Hoka Enore

Ityaniya iyeheta xiso aokowi hoka iyehetaiya atyo xiso hoka maisaiya atyo hatyohekota wakahare xisaohitita.

<sup>37</sup> — Aliterexe atyo Abraão jikolaharenai xiso. Xakore atyo hoka xaisa xaokowita natyo, maisa noxaotyakiri xaokare xomana hoka. <sup>38</sup> Baba nali nowaiyehenere atyo noxakaita xihije. Nikare xiso tehitija xexe nali xawaiyorehenere akereta xisaonita — nexa Jesus.

<sup>39</sup> Hoka nehenaha: — Abraão atyo wexe — nexaha.

Hoka Jesus nehena ihiyeha: — Maisa Abraão jikolaharenai kaisere xini xiso. Abraão jikolaharenaiya atyo xiso hoka hatyo akeretaiya atyo xisaonita. <sup>40</sup> Nasema iraiti aliterexe Enore nali. Xakore hoka noxakaihenene xihije hoka hatyo hiyeta xaisa xaokowita natyo. Abraão atyo maisa nikare tyaonare. <sup>41</sup> Xiso atyo xexe tyomehenere akereta xisomita — nexa Jesus.

Hoka nehenahitiyaha ihiyeha: — Hatita atyo Wexe, Enore taita atyo Wexe. Maisa hatya ityani xini wiso.

<sup>42</sup> Hoka Jesus nihitiya ihiyeha: — Maisa noxaokali ximita xini notyoa ali, Enore axikatyatya natyo. Enore nalita atyo notyoa hoka kalikini ali notyaonita. Enoreya atyo xexe hoka xawaiyetitaiya atyo natyo. <sup>43</sup> Xoana hoka maisa waiyekehalaka xasemare niraini? Maisa xasema xaokowiye niraini hoka hatyo hiyeta maisa waiyekehalakere xomana. <sup>44</sup> Tihanare xekohase ityaninai atyo xiso. Tihanare xekohase ityaninai atyo xiso hoka tyaonitere akereta xisaonita. Hetati xowakiya atyo aisarexe tyaona, maisa atyo iraiti aliterexe awaiyitita. Maoseratyaliye terota atyo, exahe maoseratyaliye kinohare. <sup>45</sup> Hatyo jikolaharenai atyo xiso hoka iraiti aliterexe niraihena xikakoa hoka maisa xityakekore natyo. <sup>46</sup> Xalaiya hotikisa nomani iniyalahare nománi? Xoana hoka iraiti aliterexe niraihena xikakoa hoka maisa xityakekore natyo? <sup>47</sup> Xala xamani atyo Enore xema maniya tyaonita hoka semaxemaita atyo Enore niraine. Hoka xiso atyo maisa xasemaxematyare iniraine, maisa atyo enomanerenai xini xiso hoka — nexa Jesus ihiyeha.

### *Jesus Irae Abraão Tahi*

<sup>48</sup> Hatyaoseta judeunai nehena Jesus hiye: — Kala ehekoreta wiraeta hitahi akiti. “Samaria yere atyo hiso, tihanare kakoare atyo hiso”, wita. Kala ehekoreta wiraeta — nexaha.

<sup>49</sup> Hatyaoseta Jesus nehena ihiyeha: — Maisa atyo tihanare kakoare xini natyo. Naiminijita atyo Baba hoka xiso atyo maisa xaiminisare natyo. <sup>50</sup> Maisa atyo naeroretyoa naokowiye. Hatya atyo aeroretya aokowita natyo. Maika hatyo ahékotya nokakoi — nexa. <sup>51</sup> — Xasemehena niraini, aliterexe niraeta: Xala xamaniya atyo tyaona niraini xema hoka maisaiya atyo wainita — nexa ihiyeha.

<sup>52</sup> Hatyaoseta judeunai nihitiya Jesus hiye: — Kalikini atyo waiyekehalaka womana. Tihanare terota tyaonita hikakoa. Abraão, iraiti xakaisaseharenai atyo toahiya waini. Hoka hita atyo: “Xala xamaniya atyo tyaona niraini xema hoka maisaiya atyo wainita”, hita. <sup>53</sup> Hiyaiya, wikinohare Abraão atyo waini. Xoana Abraão xahehare haokowita? Hatyo, iraiti xakaisaseharenai atyo waini tyotya. Xala haokowita? nexaha ihiyeha.

<sup>54</sup> Hoka Jesus nihitiya: — Natyotaiya atyo naeroretyoawi hoka maisaiya atyo waiyeta. Hoka maisa naerorityoawita, Baba atyo aeroritita natyo. Xenorexa xaokitere aeroritita natyo. <sup>55</sup> Xiso atyo maisa Enore xiayiyare, exahe exema maniya xisaonare. Hoka natyo atyo nowaitene, exema maniya atyo notyaonita. “Maisa nowaiyarene”, nomiya atyo hoka xiso akeretaiya atyo namaoseratita. Hoka nowaiyitene atyo, notyaonita atyo iniraine xema. <sup>56</sup> Xikinohare Abraão atyo waiya notyoaniniheta ali xeta hoka ihalahare. Hatyo xowaka Abraão waiya natyo hoka ihalahare — nexa Jesus.

<sup>57</sup> Hoka judeunai nehena ihiyeha: — Maisa xakore 50 terehokoanehenere hekoti hisaonare hoka, “Nowaiya Abraão”, hita. Xoana hoka nikareta hiso? nexaha.

<sup>58</sup> Hoka Jesus nihitiya ihiyeha: — Aliterexe nomita xihije: Abraão mawenanehareneta atyo koxaka terota Natyo Notyaonita — nexa Jesus.

<sup>59</sup> Nexa hoka hatyaoseta judeunai eharehenaha ihiye hoka xane iyaha sehalii hoka mokotyaha Jesus aokowi. Xakore atyo hoka Jesus teroa enonyahitaha. Hatyaoseta hikoaheta Iraexatyakalati Hanakota hoka xaneheta enonyahitaha.

## 9

*Jesus Kaxoseheta Maxosehare*

<sup>1</sup> Hatyaoseta Jesus jiyejhena hoka waiya hatya haliti maxosehare. Nikarexe terota tyaona hanityo tyakota.

<sup>2</sup> Hoka exaotyakiraharenai axehenene: — Xaotyakisatiye, xoana hoka exe haliti tyaona maxosehare? Xoana iniyalahare ala tyoma, enexe inityo xoaha kore iniyalahare tyoma hoka hatyo nahalakoa maxosehare tyaona? nexaha.

<sup>3</sup> Hoka Jesus nehena ihiyeha: — Maisa enómane iniyalahare, exahe enexe, inityo xoaha nómmane iniyalahare hiyeta maxosehare tyaona. Maxosehare tyaona Enore niyatere kawaiyaka maheta — nexa. <sup>4</sup> — Xasemehena, waiye hakaka atyo ferakoa. Nikare kasani namiyatty naokowita noxaxikatyasehare hatene. Hiyaiya, makehena atyo. Maka atyoite hoka maisa xala hare hahitita. (“Makehena”, nitere atyo hakamane xaokaka nikareta).

<sup>5</sup> Haliti koni notyaonitere xowaka atyo exaokanatyakalaha notyaonita enomanaha — nexa Jesus ihiyeha.

<sup>6</sup> Nixa hoka hatyaoseta xata hotya waikoa hoka inira aolowihitya waikohe haxataho kakoa hoka mokene maxosehare xose hiye hoka nehena: <sup>7</sup> — Hiyane hatihehetehena one nitini Siloé xaiya — nexa. Hatyo Siloé nitere atyo wiyako maniya, “Exaxikatyakahare”, nita.

Nixa ihiye hoka hatyaoseta maxosehare xane tiheheta hatiho hoka waiyakatyare haikoaheta tyaonitere nali.

<sup>8</sup> Hatyaoseta ewaiyaneharenai nexaha: — Exe haliti ferakiti nihatyaka tyoka ali hoka axita olo haomana. Hatyo terota, xoana alitere? nexa axakakooha.

<sup>9</sup> — Há, hatyo terota — nexa haiyanai.

— Maisa hatyo xini, hatyo akerehare — nexa atyo haiyanai.

— Há, natyo terota — nexa hatyo haliti.

<sup>10</sup> Hatyaoseta axahene: — Aliyakere hisaona hoka kalikini hiyaiyakatyareheta? nexa axahene.

<sup>11</sup> Hoka nehena: — Hatya haliti Jesus nexarexe aolowihitya waikohe hoka mokene noxosenai hiye hoka nexa nohiye: “Hiyane one nitini Siloé nali hatihehetehena hitiho”. Nixa hoka hatyaoseta noxani natiheheta notiho hoka kalikini nowaiyakatyareheta — nexa.

<sup>12</sup> — Aliyo hatyo haliti? nexaha axahene.

— Owane — nexa ihiyeha.

*Fariseunai Axehekoatyaha Kaxosehetehenere*

<sup>13</sup> Hatyaoseta hatyo haliti waiyakatyareheta hoka xaneha ekakoa fariseunai nali.

<sup>14</sup> Hatyo Jesus aolowihitya waikohe hoka kaxosehetehenere haliti xowaka atyo sábado ferakene.

<sup>15</sup> Xane kaokaha ekakoa enomanaha hoka fariseunai axene hatyo ekaxosetyakeheta akiti hoka nexa ihiyeha: — Moka haxaolowehera noxosenai hiye hoka noxani natiheheta notiho hoka kalini atyo nowaiyakatyareheta — nexa.

<sup>16</sup> — Hoka hatyo haliti maisa Enore xaxikalalahare xini. Hiyaiya, sábado atyo mahateniti ferakene xakore hoka hakita. Maisa winaho xema tyaonita — nexaha fariseunai iraeta.

Hoka haiyaharenai nexaha: — Aliyakereya iniyalahare nomasehare kalore tyoma maomakahare? nexaha. Hatyaoseta iraikakoaha hoka hahekore, hahekore xikini ahekotyahitaha.

<sup>17</sup> Hatyaoseta fariseunai axehitiyene: — Hoka hiso atyo xoare haoka hatyo hikaxosetyaseheta? nexaha.

— Iraiti xakaisasehare atyo naokene — nexa hatyo kaxosehetehenere ihiyeha.

<sup>18</sup> Hoka judeunai atyo maisa tyakekota iniraine hoka kawisaha enexe inityo xoaha hoka axahene: <sup>19</sup> — Xoana, exe haliti atyo xityani? Xoana alitere maxosehare terota tyaona? Nikare hoka aliyakere kalikini waiyakatyareheta? nexaha.

<sup>20</sup> Hoka enexe, inityo xoaha nehenaha: — Exe wityani terota, aliterexe maxosehare tyaona. <sup>21</sup> Hoka kalikini kaxosehetehenere akiti kakoa atyo maisa wawaiyorexe, exahe ekaxosetyasehare kakoa tehitija maisa wawaiyorexe. Xala xamani ala kaxosehetene — nexaha. — Xaxehenene: inityohaliti tyare hoka hatyota xakai hatahi akiti xihiye — nexa enexe, inityo xoaha ihiyeha.

<sup>22</sup> Enexe, inityo xoaha mairahitaha judeunai nityohalitiranai hoka nikare iraeha. Judeunai nityohalitiranai koxaka iraikakoaha: — Hatya halitiya: “Jesus atyo Enore Kalorexe Aohenere”, nexa irai hoka maxisoaniteneya xahohisakoatyakalati hanako — nexaha koxaka. <sup>23</sup> Hatyo hiyeta enexe, inityo xoaha nexa: — Xaxenore, koxaka inityohaliti — nexaha.

<sup>24</sup> Hatyo hekota kawihenahitiyaha hatyo maxosehare tyaohenere hoka nexaha ihiye: — Hasemehena, haiminisaira Enore. Exe hikaxosetyasehare atyo iniyalahare nomasehare, wawaiyore enawenane kakoa — nexaha ihiye.

<sup>25</sup> Hatyaoseta nehena ihiyeha: — Kala xoana iniyalahare nomasehare xamani, maisa xamani ala, maisa nawaiyorexe ekakoa. Hoka exe taita kakoa atyo nawaiyore. Nomaxosehare ene hoka kalikini atyo nowaiyakatyareheta — nexa ihiyeha.

<sup>26</sup> — Xoana moka hiso? Aliyakere kaxoseheta hiso? nexa axehenahitiyene.

<sup>27</sup> — Koxaka noxakaini xihiye hoka maisa xityakekota. Xoare maheta noxakaihitiya xihiye xaowita? Xoana xisaona xaokowita tehitija exaotyakira xema? nexa ekoaxatya enomanaha.

<sup>28</sup> Nexa hoka hatyaoseta aiyalatyaha enomana: — Hiso atyo exaotyakira xema maniya nawenatyasehare. Hoka wiso atyo Moisés xaotyakira xema maniya wisaonita. <sup>29</sup> Enore irae Moisés kakoa, hatyo kakoa wawaiyore. Hoka exe hikaxosetyasehare atyoala alyakota xamani kaotyaka — nexaha.

<sup>30</sup> Hoka nihitiya ihiyeha: — Kaxiyani, xoana hoka winaho kakoa xawaiyore xaokowita xakore hoka exe haliti kaotyakene akiti kakoa maisa xawaiyorexe? Kaxoseheta xakore natyo hoka maisa xawaiyorexe ekaotyakene akiti kakoa. <sup>31</sup> Hiyaiya, Enore atyo maisa iniyalahare nomaseharenai niraexala semaxematyare. Hoka awaiyetitaiya Enore hoka aokitere akeretaiya tyaonita hoka Enoreya semaxematyia iniraexala. Hatyahare kakoa atyo wawaiyoreta. <sup>32</sup> Kalikini rotita maxosehare tyaohenere kakaxosetyakeheta. Toahiya xowaka, exahe waikohe kaomakehenere najikinita maisa kasemakere exehare tahi, kalini rotita kasemaka. <sup>33</sup> Ekoiya awa Enore axikaitene hoka maisaiya xoana mokita natyo — nexa ekoaxatya enomanaha.

<sup>34</sup> — Hisaohenere xowakita iniyalahare hisoma. Xoana hoka haotyakisa wiso haokowita? nexaha ihiye. Hatyaoseta maxisoanetene xahohisakoatyakalati hanako.

#### *Wenati Maniya Maxosehaliti*

<sup>35</sup> Jesus sema emaxisoanene xahohisakoatyakalati hanako hoka hatyaoseta ahalakoatene hoka axene: — Xoana Haliti Ityani hityakekota? nexa.

<sup>36</sup> — Xekohaseti, xala atyo Haliti Ityani hoka notyakekone? nexa.

<sup>37</sup> — Kalini hiyaitene, natyo niraeterere hikakoa — nexa Jesus ihiye.

<sup>38</sup> — Xekohaseti, notyakeko — nexa meholokoa Jesus nahalakoa awaiyetene.

<sup>39</sup> Hatyaoseta Jesus nihitiya: — Notyoa nowatyali halitinai maheta. Nikare ite hoka maxoseharenaite waiyakatyareheta hoka kaxosexenaite maxosehare tyaoheta — nexa.

<sup>40</sup> Haiyanai fariseunai nali tyaonita hoka semaha Jesus niraine hoka nexaha: — Xoana wiso tehitija wimaxosehare haokita? nexaha.

<sup>41</sup> — Ximaxosehariya hoka maisaiya xoare kaxawatyakita xiheno. Hoka, “Waiye wiyaita”, xita hoka kaxawatyakita xiheno — nexa Jesus ihiyeha.

## 10

*Jesus Xaotyakiraharenai Atyo Kalanero Akereta*

<sup>1</sup> Jesus nihitiya: — Xasemehena niraini: Kaiwarexe isoa aokowihena kalaneronai talalahokoako hoka maisa ixisoakala ahota isoare. Halaisoa jiyita talarehoko hoka xane hikoita kalaneronai ana. <sup>2</sup> Hoka ekaxaikotyasehare isoahena hoka ixisoakala nahota ijoita. <sup>3</sup> Xisoakalati kaxaikotyasehare majiholatita enomana hoka ijoita. Hatyaoseta iraihena hakaxaikoneharenai hiye hoka ekaxaikoneharenai kalaneronai otyahita exako. <sup>4</sup> Hatyaoseta ahikoatyahitene talarehokoakota hoka enahetaha tonita hoka kalaneronai xaneta exema, exako waiyekehalkita enomanaha hoka. <sup>5</sup> Mawaiyahareya atyo hoka maisaiya atyo xanahitaha exema, tekoahaiya atyo enonita, maisa otyareha mawaiyahare xako hoka — nexa Jesus.

<sup>6</sup> Hatyo tahi Jesus xakai ihiyeha aotyakissahitene maheta xakore hoka maisa waiyekehalkita enomanaha.

*Jesus Atyo Waiyexe Kaxaikotyatiye*

<sup>7</sup> Hatyaoseta Jesus nihitiya: — Aliterexe nomita xihiyeh, natyo atyo xisoakalati kalaneronai xisoakalaho akereta. <sup>8</sup> Haiyanai nahítita kaokaha kalaneronai ana hoka maisa atyo kalaneronai semaxematyare iniraineha, kaiwarexe, xalijiniharexenai akereta taita hoka. (“Kalaneronai” nita Jesus, hakaxaikoneharenai haliti xaokaka nikare iraeta.)

<sup>9</sup> — Natyo atyo xisoakalati akereta. Xala xamaniya isoa nonaho hoka kaiyakehetaiya iniyalahare nonitata exahe isoaheta, hikoaheta, kanakairita harenai hoka waiyeya tyaona. <sup>10</sup> Hoka kaiwarexe atyo kaokehena enomanaha hoka kaiwita, aijita, mawenekoaretita kalaneronai. Hoka natyo atyo notyoa kalaneronai waiye tyaonaha maheta, exahe waiye kaiserehare tyaonaha maheta — nexa.

<sup>11</sup> — Natyo atyo kalanero kaxaikotyasehare waiyexe. Kalanero kaxaikotyasehare waiyexe atyo wainita hakaxaikoneharenai ana. <sup>12</sup> Wakahare atyo maisa kalanero kaxaikotyasehare kaisere xini, kaoloxa maheta taita atyo hakita. Kalaneronai maisa ehalanai xini. Hiyeta hoka ahoxa kaokehena enomanaha hoka tekoita hoka ahoxa aijita, aekoakijita kalaneronai. <sup>13</sup> Kaoloxa maheta taita hakita. Maisa iyakawatyare kalaneronai hoka nikare tekoita — nexa.

<sup>14</sup> — Hoka natyo atyo kalanero kaxaikotyasehare waiyexe. Nokaxaikoniharenai atyo nowaiyaniharenai makere. Natyo tehitiya atyo ewaiyanehareha. <sup>15</sup> Nikare Baba Enore atyo nowaiyanihare, hoka natyo atyo ewaiyanehare. Maikaite nowainihena nokaxaikoniharenai ana — nexa Jesus.

<sup>16</sup> — Maisa aliyerenai taita xini nokaxaikonihare. Hahotyaliharenai tehitiya nokaxaikonihare hoka kasani nahohisakoatyahene hoka hahotyalita namoka nokaxaikoniharenai naokowita. Hatyaosetaite niraini xema maniya tyaonaha. Nikare ite hoka hahotyalita tyaonaha hoka haterore ite ekaxaikotyasehareha tyaona. <sup>17</sup> Nowainite nokaxaikoniharenai ana hoka hatyaosetaite nokaseheta. Hatyo hiyeta Baba Enore awaiyetita natyo. <sup>18</sup> Maisa halitinai xaokala xini nowainihena, noxaokalita atyoite nowainihena. Baba aiyatelikisa natyo hoka noxaokalita nowainihena. Hatyaosetaite noxaokalita nokaseheta. Baba irai nokakoi hatyo akiti hoka exaokalita nikareta natyo — nexa Jesus ihiyeha.

<sup>19</sup> Hatyaoseta judeunai semaha Jesus niraine hoka hahekore makere ahekotyahita, hoka haiyaharenai nexa: <sup>20</sup> — Tihanare tyaonita ekakoa hoka hatyahareta. Xoana hoka xasemaxemaita iniraene? nexaha haiyanai iraeta.

<sup>21</sup> Hoka haiyanai atyo nexaha: — Tihanare kamilakorerahareya atyo hoka maisaiya exakere iraexe. Xoana, tihanareya kaxoseheta maxosehare? nexaha.

*Judeunai Kirawaneha Jesus*

<sup>22</sup> Exowakiya judeunai Jerusalém nali otyaxematyahitaha hahetakomaniyerenai nómane xahohisakoatyakalati hana hisehare. Exowaka wehe akiti. <sup>23</sup> Hatyaoseta Jesus

isoa Iraexatyakalati Hanako hoka tonakoita Iraexatyakalati Hanako Salomão xisoakalaho aokahitere nali.

<sup>24</sup> Hatyaoseta judeunai hohisakoaha ehaliya hoka axehenahene: — Kahare wahekoita hitahi hoka wamaikohareta. Xoana Enore Kalorexe Aohenere hiso, maisa kore? Hiyakaihena waiyekehalaka wihiye — nexaha ihiye.

<sup>25</sup> Hoka Jesus nehena: — Koxaka Enore nalitare atyo natyo nomi xihije hoka maisa xityakekota niraini. Xiayiya, kahare maomakahare notyoma Baba xaokalita. Baba nalitare terota atyo natyo hoka nikare notyona. <sup>26</sup> Xakore hoka maisa xityakekota natyo. Maisa atyo nokaxaikoniharenai xini xiso hoka hatyo hiyeta maisa xityakekore natyo. <sup>27</sup> Nokaxaikoniharenai semita noxako hoka naokitere akereta tyomahitaha. Ewaiyanehareha atyo natyo hoka tyaonahitaha niraini xema. <sup>28</sup> Nokaxaikoahinete hoka tyaonaha mene matyotenehare hoka maisaiya atyo wainahitaha. Maisaiya atyo xala hare iyehenahititene noniti. <sup>29</sup> Baba atyo maxaexahityakahare hoka maisaiya atyo xala harenai iyehitita nokaxaikoniharenai enonitata — nexa.

<sup>30</sup> — Baba natyo xoaha atyo haterore, hakakoa wisaoonita — nexa Jesus judeunai hiye.

<sup>31</sup> Hatyaoseta judeunai eharehenaha hoka xane kolatya sehalinai mokotyaha maheta Jesus.

<sup>32</sup> Ehareha ihiye hoka Jesus nehena ihiyeha: — Kahare notyoma xihaoti, waiyexe makere nománinae. Baba aokiterehare taita notyoma. Xoana, hatyo nománi xemere xamokotya xaokowita natyo? nexa axahene.

<sup>33</sup> Hoka judeunai nehena ihiye: — Maisa atyo hománe waiyexe xemere xini wamokotya waokowita hiso. Hoka hiraine atyo maisa waiyexe womana, maisa haiminisare Enore hoka. Haliti xakore hiso hoka Enore haokowita hoka hatyo xemere wehareta hihiye — nexaha ihiye.

<sup>34</sup> Hoka Jesus nehena ihiyeha: — Exakerexe xairatyoare tyaonita babera xiyaotyakisakaho nanekoa:

Enorenai makere xiso, nomita.

<sup>35</sup> — “Enorenai makere xiso”, nita Enore halitinai hiye, iniraine kaoka enomanaha hoka. Hatyo babera Enore niraine kakoare atyo aliterexe taita iraeta hoka maisaiya kahalakisakita. <sup>36</sup> Hiyaiya, Baba axikatya natyo halitinai koni haxaokalita. Nikare hoka xoanere hoka “Natyo atyo Enore Ityani”, nomihena hoka Enore maisa naiminisare xaokita? <sup>37</sup> Maisaiya Baba xaokalaoseta notyomare hoka ehekoretiya atyo maisa xityakekota natyo. <sup>38</sup> Maisa xityakekota natyo hoka maika notyomiterenai hekoti xityakekohena. Nománinai hiyeta xawaiyorehena nokakoi. Baba atyo tyaonita nokakoi, exahe natyo hoka notyaonita ekakoa — nexa Jesus.

### *Jesus Xaneheta Hatyo Nalita*

<sup>39</sup> Nega Jesus ihiyeha hoka eharehitiyaha ihiye hoka hatyaoseta tohenahitiyene aokowiha xakore hoka iyoawiheta enonyahitaha. <sup>40</sup> Jesus iyoawiheta enonyahitaha hoka haikohaheta one Jordão halakoiya maniya hoka João Batista hetati batixaitere aose xane tyaona.

<sup>41</sup> Nali xane tyaona hoka kahare haliti kaoka enomana. — João Batista atyo maisa xoare hare tyomita maomakahare. Xakore hoka tyotya iraehenere Jesus tahi atyo aliterexe, maisa maoseraita xini wiso João — nexa iraeha. <sup>42</sup> Kahare haliti tyakeko Jesus hatyo nali.

### *Lázaro Kamane Tahi*

<sup>1</sup> Haxowakiya Lázaro nexarexe hokakita. Wenakalati Betânia nali tyaonita, hahahalonai Marta, Maria xoaha kakoa. <sup>2</sup> Hatyo Maria atyo Jesus kiji tiha hoka owika airaxero ikiji hiye, exahe hasekase kakoa tirihetene.

<sup>3</sup> Enahahareha Lázaro hokakita hoka enahahalonai axikaxatyaha Jesus ana: — Hihi-naehare Lázaro hawaiyetitere hokakita — nexaha.

<sup>4</sup> Jesus sema ehokakene tahi hoka nexa: — Maisaiya hatyo kahehaliti kakoa Lázaro wainita. Hokakita hoka ite kaxaeyatelekisaka hoka hatyo hiyetaite Enore kaxaexakerityaka, exahe Enore Ityani hoka kaxaexakerityaka — nexa Jesus.

<sup>5</sup> Jesus awaiyetita Marta, iximalone Maria, enahahareha Lázaro xoaha. <sup>6</sup> Jesus sema Lázaro hokakene xakore hoka hatyo tyaanitere nalita heko hinamaki tyaochitiya. <sup>7</sup> Hinamaki ferakene najikinita hoka Jesus nehena haxaotyakiraharenai hiye: — Wiyala wiyané Judéia koa xeta — nexa ihiyeha.

<sup>8</sup> — Xaotyakisatiye, xoana hoka hiyanehitiya hatyo nali haokowita? Hiyaiya, kafaka maniya judeunai nali tyaaniterenai mokotyaha hiso aokowiha sehalí kakoa — nexaha exaotyakiraharenai iniraine nahalakoa.

<sup>9</sup> — Maisa ferakiti tyokakere xini, wahakiya atyo. Watonita ferakoa hoka waiye wiyaiyita waheta maniya hoka maisa wahisehityoare. <sup>10</sup> Hoka makiya atyo watohena hoka haiya xowaka wahisehityoita, maisa waiye waiyakere makiya hoka — nexa. <sup>11</sup> — Xasemehena, wihinaehare Lázaro nemakita xakore hoka noxanite nekaosekihetene — nexa Jesus haxaotyakiraharenai hiye.

<sup>12</sup> — Nemakitaiya hoka waiyeya atyo kehexoawiheta — nexaha haxekohaseha hiye.

<sup>13</sup> Jesus iraetere Lázaro kamane xaokaka. Hoka exaotyakiraharenai motya enemaka xaokaka nikareta aokahitaha.

<sup>14</sup> Hatyaoseta Jesus nexa: — Lázaro atyore waini — nexa, awaiyekehalakatene enomanaha. <sup>15</sup> — Waini atyo Lázaro. Hoka ehekoreta ali notyaonita, wainihena xakore hoka. Enawenakala nali wisaonita hoka maisaiya xityakekota — nexa. — Wiyala kalikini hoka wiyaiya — nexa Jesus ihiyeha.

<sup>16</sup> Hatyaoseta Tomé Dídimo nexarexe nehena hahinaeharenai hiye: — Wiyala wiyané exema hoka wiwaini ehakakoane — nexa.

### *Jesus Atyo Ekasekihitita Haliti*

<sup>17</sup> Hatyaoseta xaneha. Jesus xane kaokehena Betânia nali hoka Lázaro koxaka 4-kihena tyaanita xawatyakalatyako. <sup>18</sup> Wenakalati Betânia maisa sekore Jerusalém nalita, hanama kilometrone taita. <sup>19</sup> Maisa sekore hoka judeunai kahare xane waiyaha Marta, Maria xoaha emaxalotyahene maheta enahahareha kamane hiyeta.

<sup>20</sup> Hoka Marta sema Jesus kaokene. Owitehena hoka xane atihotene. Hoka Maria atyo hekota hahanakota. <sup>21</sup> Marta xane atihotya Jesus hoka nehena ihiyeha: — Aliya hiso hoka maisaiya naháhare wainita, Xekohaseti — nexa ihiyeha. <sup>22</sup> — Waini xakore atyo hoka xoalini hareya haxa Enore hoka tyomeniya homana. Waiyekehalakita atyo hatyo akiti nomani nexa Marta Jesus ihiyeha.

<sup>23</sup> — Haháhare ite kaseheta — nexa Jesus ihiyeha.

<sup>24</sup> — Miyanitiye xowakehena atyoite hoka naháhare kaseheta. Nasemita hatyohare akiti hoka notyakekota — nexa Marta ihiyeha.

<sup>25</sup> — Natyo atyo kamatinai xekasekisasehareheta. Halitiya tyona noximi maniya hoka waini xakoreya hoka kasehetaiya. <sup>26</sup> Exahe kasetere noximi maniya tyaanitereya maisa wainita. Xoana hityakeko niraini? nexa Jesus ihiyeha.

<sup>27</sup> — Há, notyakekota atyo, Xekohaseti — nexa. — Hiso atyo Enore Ityani, Enore Kalorexe Aohenere atyo hiso. Wahetakomaniyerenai nexaha exaokaka: “Maika xatyaha exahita. Ekakoitaita kaotyaka xomana”, nexaha — nexa Marta Jesus ihiyeha.

### *Jesus Tiya*

<sup>28</sup> Nexa ihiyeha hoka haikoaheta hahaha xeta hoka xane haximalone Maria kakoa irai hameteneta: — Xaotyakisatiye kaoka hoka kawijita hiso — nexa haximalone hiyeha.

<sup>29</sup> Maria semene hoka ihalahalo xane Jesus tyaanitere nali xeta. <sup>30</sup> Hatyo xowaka Jesus maisa kaokehene re wenakalati, hekotata Marta ahalakoahenere aose.

<sup>31</sup> Ehanakoha haiyanae judeunai tyaanita, Maria emaxalotyahitaha. Hoka waiyehenaha atyo, Maria atyo ihalahalo hikoa xane hoka hatyo exemaxalotyasenai xaneha exema, motya atyo xane xawatyakalati nali hoka tiyahena maheta aokahitaha.

<sup>32</sup> Maria xane kaoka Jesus ana hoka exoa hakaoli kakoa ehaliya hoka nehena: — Aliya hiso hoka maisaiya naháhare wainita, Xekohaseti — nexa tiya.

<sup>33</sup> Waiyehena atyo Jesus, Maria atyo tiyita, judeunai tehitiya tiyita ehakakoane. Tiyahitaha makere hoka Jesus hiye kirakoane hoka amaikohare. <sup>34</sup> — Aliyo exawatyakala? nexa axahene.

— Witya hoka hiyaiya, Xekohaseti — nexaha ihiye.

<sup>35</sup> Hatyaoseta Jesus tiya.

<sup>36</sup> Jesus tiyita hoka judeunai nexaha: — Xiyaiyehena, tiyita. Kala awaiyetita tehitiya Lázaro — nexaha. <sup>37</sup> — Aliya Lázaro hokakitere xowakiya hoka xoanaiya mokene? Kafaka maniya maxosehare kaxoseheta. Aliya Lázaro hokakitere xowaka hoka xoana xamaniya hoka aiyatelikeheteneniya hoka maisa wainita — nexa haiyaharenai.

### *Lázaro Kaseneheta Tahi*

<sup>38</sup> Jesus hekotata kalore amaikohareta hoka xane xawatyakalati nali. Hatyo xawatyakalati atyo sehali kakoakotyaka, ijihola atyo sehali taose. <sup>39</sup> Jesus xane kaoka xawatyakalati nali hoka nexa ihiyeha: — Xiyehetehena sehali taose — nexa ihiyeha.

Nexa hoka kamati nahahalo Marta nehena: — Maisaiya, Xekohaseti — nexa. — Hiyaiya, koxaka 4-kihena tyaponita xawatyakalatyako. Kala koxaka xetehena. Kotare mawatyalisakahare — nexa.

<sup>40</sup> — Maika xityakekohena hoka xiayi Enore nómane, nomira xihiye ka. Xoana himaotyaneheta niraini? nexa Jesus ihiye.

<sup>41</sup> Neda ihiye hoka iyehenahitaha sehali xawatyakalati ijihola.

Iyehenahitene hoka Jesus wahakota enoxeta hoka nehena: — Maisa xoana xowaka himaxekoaxalere niraini hoka nihalahareta hikakoa, Abá. <sup>42</sup> Hiyaxikalahrenetra atyo natyo hoka hasemaxemetya minita niraini hikakoa. Kalikini niraexaita homana exe halitinai haoti tyakekoha maheta hiso — nexa iraexatya Enore hiye.

<sup>43</sup> Halakisa hairaexala hoka kinatyaxa kawiyatya: — Lázaro, hahikoahetehena hatyoakota — nexa.

<sup>44</sup> Neda hoka Lázaro hikoaheta hakiji, hakahe, hatiho olalisoare kakoa haxawatyakalakota.

Eháre olalisoare imiti taose kakoa hoka Jesus nehena: — Xamaxolalihetehene hoka waiye toneheta — nexa ihiyeha hoka maxolalihetene.

### *Ahekotyaha Aisaha Maheta Jesus*

(Mateus 26.1-5; Marcos 14.1-2; Lucas 22.1-2)

<sup>45</sup> Hatyaoseta kahare judeunai Maria xema tyohenerenai tyakekoha Jesus, waiyaha enómane hoka. <sup>46</sup> Hoka haiyanai atyo xane hoka xakaihahene fariseunai hiye Lázaro ekasekihetehene tahi.

<sup>47</sup> Hiyeta hoka sacerdotenai, fariseunai xoaha nityohalitiranai ahohisakoatyakakoaha iraekakoaha maheta. — Xoanaite wamohenene? Exe haliti kahare tyomita maomakahare. <sup>48</sup> Wahalakiseniya hoka ekakoitaiya tyotyahaiya tyakekoahene hoka hatyaosetaiya maisa waiyeta Roma yerenai hiye hoka tyoahaiya iyaha wawenakala wiwaikohera xoaha wonita, exahe mawenekoaretyahaiya Iraexatya hoka — nexa iraikakoaha.

<sup>49</sup> Hatyo terehokoane xowakiya Caifás sacerdote xekohase tyaponita hoka nexa ihiyeha: — Xiso atyo maisa xawaiyorexe. <sup>50</sup> Hatyaiya waini womana wityotya anere maheta hoka waiyeya, maisaiya Israel yerenai kamehotyakita. Kala maisa hatyohare akili xahekotyare — nexa ihiyeha.

<sup>51</sup> Caifás iraihena hoka maisa hatyota haxahékola xini iraeta. Sacerdotenai xekohase tyaponita hoka waiya Jesus kamane naheta maniyita Israel yerenai ana, <sup>52</sup> exahe sekoyahoniterenai xaoreterenai xoaha ana hoka hatyotajikinitaiya Enore kaxaikoneharenai hahotalita tyaponaha.

<sup>53</sup> Neda Caifás irai ekakoaha hoka hatyotajikinitaiya judeunai nityohalitiranai iraekakoaha Jesus haxaisane tahi. <sup>54</sup> Hatyaiya hoxa maisa hotikijoita judeunai ana

Jerusalém nali hoka xane enonyahitaha, xane kaoka wenakalati Efraim nali hoka hatyo nali tyona haxaotyakiraharenai kakoa maharexakiti maniya.

<sup>55</sup> Hatyaoseta okoi Páscoahena, okoi judeunai hisehare aose xane hikoahena. Kahare judeunai xane Jerusalém xeta hisehaliti nahitita, waiye maniya mokaha hawenaneha maheta.

<sup>56</sup> Hatyaoseta Jerusalém nali tawaha Jesus xahita. Xane isoaha Iraexatyakalati Hanako hoka iraikakoaha: — Xoana tyoa waiya xamanite hisehaliti, maisa xamanite? nexaha.

<sup>57</sup> Sacerdotenai, fariseunai xoaha nityohalitiranai otoka aokowiyahitaha Jesus. Hiyeta hoka nexa iraeha: — Maika kaokehena hoka aliyo xamani xiayihehene hoka waiyekahalakehena xomana hoka xiakaini wihiye — nexaha otoka aokowitzaha Jesus hoka.

## 12

### *Jesus Xane Betânia Xeta*

(Mateus 26.6-13; Marcos 14.3-9)

<sup>1</sup> Hatyaoseta Jesus xanehitiya wenakalati Betânia nali. Lázaro Jesus ekasekihetehenere nali tyonita. Exowaka 6-ki ferakenetehena hisehaliti Páscoa naheta. <sup>2</sup> Xane kaoka hatyo nali hoka nakairati tyomaha Jesus ana hoka kaexakatyaha tehitija haiyaharenai. Kanakairehenaha hoka Lázaro kanakaira ekakoaha. Haiyanae ihinaeharenai tehitija kanakairaha Jesus kakoa. Hoka Marta atyo nakairati mokita kanakairiterenai ana.

<sup>3</sup> Kanakairahitaha hoka Maria xane kaoka Jesus haliya tinihalitise airaxero kahekoalo. Hatyo airaxero kaloxaimane, maisa makarohare xini. Kaoka ehaliya hoka owikene Jesus kijinai hiye, exowakerota hasekase kakoita tirihetene. Airaxako moka hatyako.

<sup>4</sup> Hoka Jesus xaotyakirahare Judas Iscariotes hiye maisa waiyeta. Hatyo najikinita Judas matawatya Jesus. Maisa waiyeta ihiye hoka nexa: <sup>5</sup> — Exe airaxero maisa makarohare xini, exaimane atyo 300 hokose olo. Xoana hoka maisa betetitene hoka maxiyehareharenai ana ijita exaimane? nexa Judas.

<sup>6</sup> Maisa xakore maxiyehareharenai kahinaetya aokowiye hoka nikareира, kaiwarexe xakore hoka. Kaxaikota Jesus noloxa exaotyakiraharenai xoaha noloxa hoka kaiwita.

<sup>7</sup> Nexa hoka Jesus ekoaxatya enomana: — Awa xiwatalini. Kotare airaxero moka nohiye. Noxfityaki nahitata nikare mokita natyo. <sup>8</sup> Maxiyehareharenai atyoite tyaoleta mene xinekoni. Hoka natyo atyoite maisa notyaoneta menita xinekoni — nexa Jesus.

### *Kahalakoahareha Lázaro Kakoa*

<sup>9</sup> Judeunai sema Jesus kaokene Betânia nali hoka kahare tyoa kaokaha hatyo nali, waiyaha aokowitzaha Jesus hoka, exahe ekasekihetehenere Lázaro tehitija waiyaha aokowitzaha hoka. <sup>10</sup> Kahare haliti xane waiyaha Jesus, Lázaro xoaha hoka hatyo hiyeta sacerdote nityohalitiranai okoawaharehena hoka Lázaro xaisaka tehitija aokaha. <sup>11</sup> Ekasekihetehenerene hiyeta kahare judeunai Jesus xema maniya tyonita. Awaiyetyahitene hoka hanityohalitiranaiha maotyaneha hoka maisa waiyeta inityohalitiranaiha hiye.

### *Jesus Kaokehena Jerusalém Nali*

(Mateus 21.1-11; Marcos 11.1-11; Lucas 19.28-40)

<sup>12</sup> Kamaetali hoka hisoaka haliti kaokehena Jerusalém nali waiyaha maheta hisehaliti Páscoa hoka semaha Jesus tyoanene Jerusalém xeta. <sup>13</sup> Semahene hoka tyoaha ahalakoatyahene. Iyaliti kolatyaha hoka ahalakoatyahene, ihalahareha ekakoa.

— Wihalahareta hikakoa, Enore! Xekohaseti Enore, waiyíra hamohena héxare kakoa tyoiterel! Xekohaseti Enore xaxikalahare tyoita Israel hotyalinai ana hoka waiyeta womana, Enore xoaha waiyeta womana — nexaha masakare ihalaharshitaha Jesus kakoa.

<sup>14</sup> Jesus ahalakoatya boriko mokose hoka tyoka eheno, babera Iraiti Waiyexe nanekoa xairatyoare tyaoitere akereta:

<sup>15</sup> Awaira atyo ximawaiyeharehena, wenakalati Sião tyaoiterenae! Ite Xiyekohase Kalorexe tyoa kaoka xomana boriko mokose heno.

<sup>16</sup> Hatyo xowakiya maisa exaotyakiraharenai ana waiyekehalakere. Hoka Jesus waini hoka kaseheta najikini maniyata rota otehenahitaha iraiti xakaisasehare xairala, exahe mohenerene boriko mokose heno hoka waiyekehalaka enomanaha.

<sup>17</sup> Halitinai ihalahare Jesus kakoa. Haiyaharenai haotita Jesus kawiheta Lázaro kamane exawatyakalakota hoka hatyo waiyehenerenae xakaikoatyaha hatyo tahi. <sup>18</sup> Jesus ekasekihetehenere Lázaro tahi semahitaha hoka hisoaka haliti tyoa ahalakoatyaha Jesus.

<sup>19</sup> Hatyo hiyeta fariseunai amaikohareha: — Xiyaiyaore, halitinai maisa semaxematare wiraine. Tyotyaha awaiyetyahitene hoka tyaonahitaha exema — nexakakoaha.

#### *Haiyaharenai Grécia Yerena Waiyaha Aokowiha Jesus*

(Mateus 26.20-25; Marcos 14.17-21; Lucas 22.21-23)

<sup>20</sup> Hatyaoseta haiyanai Grécia koatarenai kaokaha Jerusalém nali waiyaha maheta hisehaliti, Enore xoaha awaiyetyaha maheta. <sup>21</sup> Hatyaoseta ahalakoatyaha Filipe. Filipe atyo Galiléia yere, wenakalati Betsaida nalitare. Tyoa kaokaha Filipe ana hoka nexaha ihiye: — Wiyaiya waokowita Jesus — nexaha.

<sup>22</sup> Nexaha ihiye hoka Filipe xane André hiye irai hoka hatyo hinamanai xane iraeha Jesus kakoa.

<sup>23</sup> Hoka Jesus nexa ihiyeha: — Hikoa Haliti Ityani kamanaosehena hoka kasehetaite hoka kalorexe tyaona — nexa. <sup>24</sup> — Xasemehena, maisa namaoseraita xini: trigose kaxafityakehena waikoa hoka hikoita hoka esé atyo walolota, wainita. Hoka maxafityakahareya hoka haseroreya tyaota mene. Wainiya hoka hikoa hoka ekakoitaiya kahare kasé.

<sup>25</sup> — Xala xamani atyoite awaiyetita hawenane ali waikohекoa maniya hoka meta atyoite tyotyha enonita. Hoka xala xamani atyoite maisa awaiyetyare hawenane ali waikohекoa maniya hoka hatyo atyoite tyaota mene matyotenehare. <sup>26</sup> Xala xamani tyaona noximi maniya aokowi hoka maika tyakekohena niraini. Aliye xamanite notyaonita hoka hatyo tehituyaite nali tyaonita. Tyaonaiya noximi maniya hoka Baba ite awaiyetene — nexa Jesus.

#### *Jesus Xakai Hakamane Tahi*

<sup>27</sup> — Kalikini kalore namaikohareta. Okoi aisehenaha natyo hoka nomawaiyehareta. Xakore hoka maisaiya naxa Baba hoka kikiheta natyo nomakawatihalini nonitata naokita. Nowaini terota maheta notyoa — nexa.

<sup>28</sup> Hatyaoseta iraexahena: — Abá, hikaxaexakeretyakehena naoka — nexa Jesus.

Hoka hatyaoseta enokoata iraiti kasemaka: — Koxaka nokaxaexakerityaki hoka haxowakaite nokaxaexakerityakihiya — nexa.

<sup>29</sup> Halitinai semahene hoka nexaha: — Kala onetalolo nemahare — nexa haiyanae.

— Maisa onetalolo xini, kala anjo iraeta ekakoa — nexa haiyanai iraeha.

<sup>30</sup> Hoka Jesus nehena: — Maisa nohiyiti xini exe iraiti tyoa. Xihiyeta tyoa xasemene maheta — nexa. <sup>31</sup> — Okoi Enore iraihena iniyalahare nomaseharenai tahi. “Exakere kaxomokakaha naoka”, nehenaite hoka exekohaseha Tihanare tehituyaite kaxawatyakeheta — nexa.

<sup>32</sup> — Ainakisahaite natyo hoka hatyaosetaite kahare haliti ite tyakekohenaha natyo — nexa Jesus. <sup>33</sup> Hakamane, haberekotyaka atyalihose xaimaholatyaka hiye xaokaka nikareta, “Ainakisahaite natyo”, nita.

<sup>34</sup> Nixa hoka halitinai nixa ihiye: — Maisaite Enore Kalorexe Aohenere wainita, maikaite tyaoneta mene aokaha. Hatyo tahi kaxairatyaka babera Moisés niraine kakoare. Hoka hiso atyo hita, “Maika Haliti Ityani kaxainakisaka”, hita. Xala xaokaka nikare hiraeta? nixa axaha Jesus.

<sup>35</sup> — Xaokanatyakalati tyaonita kalini xikakoa hoka ininai ite tyaohitiya. Xaokanatyakalati tyaonitata xikakoa hoka memere xamohena xawenane, waiya aliya hoka maisa ximemehenere hekoti hoka makaliroti kaoka xomana. Howitihare netonatyaka atyo makaliroti koni. <sup>36</sup> Maika xaokanatyakalati aokanaitatere xomana

xowaka xityakekohenene hoka hatyo xema maniya xisaohena — nexa Jesus ihiyeha. (Kasani halitinae exema maniya tyaona aokita hoka nikare iraeta.)

*Judeunai Maisa Tyakekotene*

(*Mateus 26.31-35; Marcos 14.27-31; Lucas 22.31-34*)

Nexa Jesus ihiyeha hoka hatyaoseta xaneheta hatyo nalita hoka xane teroa judeunai nonita. <sup>37</sup> Kahare Jesus nómame maomakahare waiyexe waiyaha xakore hoka maisa tyakekorahene, <sup>38</sup> Isaías niraene akereta kawenatyakeheta maheta. Exakerexe Isaías xairatyá:

Maisa xala hare tyakekore wiraine, Xekohaseti, exahe hiyatere hoka maisa waiyekehala kere enomanaha.

<sup>39</sup> Exakerexe tehitija Isaías xairala hoka maisaiya aliyakere tyakekoahitaha:

<sup>40</sup> Enore maxosehare mokahene, exahe maxahekolahare mokahene, hoka maisa waiyakatyareha, maisa waiyekehalakere enomana, exahe maisa haikoahenahitaha enomana hoka waiye mohenahitene hoka kaxaiyatelikisakehenahitaha.

<sup>41</sup> Nikare Isaías irae Jesus nawenane kalorexe waiya hoka nikare irae etahi.

<sup>42</sup> Nikare Isaías xairatyá xakore hoka kahare judeunai nityohalitiranai tyakekoha Jesus. Tyakekoahene xakore atyo hoka mema atyo tyaonahitaha, maisa atyo xoare nexareha. Motyaiya fariseunai ehareha ihiyeha hoka mahokoanityaha ixisoaneha xahohisakoatyakalati hanako aokahitaha hoka mema tyaonahitaha. <sup>43</sup> Kasani Enore ihalahare ekakoaha aokahitaha xakore hoka halitinai hotohare ihalahareta ekakoaha aokahitaha hoka hatyo hiyeta mema tyaonahitaha.

*Jesus Irae Xaxalisatiye Akereta*

<sup>44</sup> Hatyaoseta Jesus kinatyaxa irai: — Xala xamani atyo tyakekota natyo hoka maisa atyo natyo taita xini tyakekota. Noxaxikatyasehare tehitija atyo tyakekota. <sup>45</sup> Xala xamani atyo waiyita natyo hoka noxaxikatyasehare tehitija waiyita. <sup>46</sup> Notyoa notyaona halitinai koni xaokanatyakalati akere enomanaha hoka tyakekohenere natyo maisa makaliroti koni tyaona maheta — nexa Jesus.

<sup>47</sup> — Xala xamani atyo sema niraini hoka maisa tyaona exema maniya aokowita hoka maisaiya niraeharetyahitene. Notyoa atyo niyeheta maheta halitinai iniyalahare nonitata maheta. Maisa atyo niraeharetyahitene maheta xini. <sup>48</sup> Xala xamaniya maisa aokita natyo, maisa semaxematy aokowita niraini hoka hatyohare hiyetaite kairaharetyaka miyanitiye xowaka — nexa.

<sup>49</sup> — Maisa niraini xini niraeta. Baba noxaxikatyasehare irai nokakoi hoka noxakaitene xihiye aoka. <sup>50</sup> Iniraene atyo ijita wenati menanehaliti hoka wisaoneta meniya. Hatyohare akiti atyo waiyekehalakita nomani. Wisaona mene aokita. Hatyo hiyeta Baba iraetereharenae nohiye taita niraeta xihiye — nexa Jesus ihiyeha.

## 13

*Jesus Tiha Haxaotyakiraharenai Kiji*

<sup>1</sup> Hatyaoseta haki ferakenetehena hoka hisehaliti Páscoa ferakene tyaohena hoka Jesus kamanaose xane hikoa. Hoka Jesus atyo waiyoreta hakamanaose ferakene hikoane kakoa, exahe hahalakira halitinai hoka haxáneneheta hanexe nali kakoa. Awaiyetya haxaotyakiraharenai hakamane kijiya. <sup>2</sup> Makehena hoka Jesus kanakairita haxaotyakiraharenai kakoa. Exowaka Tihanare koxaka haxahékola moka Simão ityani Judas Iscariotes mahiyasako mátawatya maheta Jesus. <sup>3</sup> Jesus ana atyo waiyekehalakita Enexe tyotya xoalini hare xekohasehare mohenerene kakoa. Exahe waiyoreta tehitija atyo tyohenere Enore nalita kakoa, exahe haxaneneheta Enore nali xeta kakoa.

<sup>4</sup> Hatyaoseta Jesus tityoaheta hanakaira aoseta hoka aitoakisa haima ehaorete hoka iya tirihisoakalati taose hoka olatty hakitako hiye. <sup>5</sup> Hatyaoseta tinihaliti koa one moka hoka tihehena haxaotyakiraharenai kiji hoka tirtyahaheta ikijiha tirihisoakalati kakoa.

<sup>6</sup> Xane kaoka Simão Pedro haliya hoka Simão Pedro nehena ihiye: — Xoana, hatiha nokiji haokowi, Xekohaseti? nexa axa Jesus.

<sup>7</sup> — Há, natihaite hikiji — nexa Jesus. — Kalikini natihehena hikiji hoka maisa waiyekehalakere homana. Hoka haxowakaite waiyekehalaka homana — nexa Jesus.

<sup>8</sup> — Maisaiya hatihita nokiji, xoana hiyekohaseyatya natyo hoka? nexa Pedro ihiye.

— Maisaiya natihita hikiji hoka maisaiya noxaotyakirihare naokita hiso — nexa Jesus.

<sup>9</sup> Nexa Jesus hoka Pedro nexa ihiye: — Nikare atyo hoka hatihehena nokiji, nokahe, noseri hare, Xekohaseti — nexa.

<sup>10</sup> — Xala xamani atyo koxaka koaha hoka iyoma tyaona hoka ikiji taita katihakehitiya hoka ehekore. Koxaka xityotya xikatihakere xisaonita, hatita taita atyo hekota maiyomenehare akereta tyaonita — nexa Jesus Pedro hiye. <sup>11</sup> Jesus atyo waiyoreta hamatawatyasehare kakoa hoka: — Hatita taita atyo hekota maiyomenehare akereta tyaonita — nexa iraeta.

<sup>12</sup> Hatyaoseta Jesus tiha ikijinaiha, miyatya hoka xane isoaheta haima ehaorete ako hoka tyokehetehitiya enekoniha hoka nehena ihiyeha: — Xoana waiyekehalaka xomana natihehenere xikiji? nexa axahene. <sup>13</sup> — Xasemehena: xiso atyo, “Xaotyakisatiye, Xekohaseti”, xita nohiye xiraihena nokakoi hoka. Ehekoreta nikare xita, hatyo terota atyo natyo. <sup>14</sup> Xiyaiya, natyo xakore Xiyaotyakisase, Xiyekohase hoka natiha xikiji xomana. Maika nikare tehitiya xatiha kakoa xikijinai. <sup>15</sup> Xiyaiya, naimenekoita xomana hoka namokitere akereta xamoka maheta. <sup>16</sup> Waiye xasemehena: maisa wakahare haxekohase xahehare xini, exahe exaxikatyakahare hoka haxaxikatyasehare xahehare xini. <sup>17</sup> Exe akiti waiyekehalaka xomana hoka xisaonaiya exema hoka waiyeya xihalahareya xisaona — nexa Jesus irae haxaotyakiraharenai kakoa.

<sup>18</sup> — Maisa atyo xityotya xiyaokaka xini niraeta. Haiyaharenai naothenere nomani kakoa atyo nawaiyoreta. Xakore hoka hatya atyoite nahalakoihare tyaona. Exe Iraiti Waiyexe nanekoa kaxairatyakehenere akeretaite kawenatyaka: Hatya kanakairitete nokakoite nahalakoihare tyaoheta.

<sup>19</sup> — Kalikinita exehare niraeta nikare kawenatyakehenere nahitita hoka nikare kawenatyakehena hoka xityakekohena maheta natyo. Hiyaiya, natyo atyo natyota terota — nexa.

<sup>20</sup> — Xasemehena niraini: Xala xamani waiye mokita noxaxikaliharenai hoka waiye mokita natyo. Nikare waiye mokita natyo hoka noxaxikatyasehare tehitiya waiye mokita — nexa Jesus ihiyeha.

### *Jesus Hotikisa Matawatyatiye*

(Mateus 26.20-25; Marcos 14.17-21; Lucas 22.21-23)

<sup>21</sup> Jesus hatyo tahi irai hoka enajikinita amaikeharenena hoka nehena ihiyeha waiyekehalaka: — Aliterexe niraeta: hatyaite xinekonitare mátawahena natyo — nexa ihiyeha.

<sup>22</sup> Nega ihiyeha hoka exaotyakiraharenai wahakotyakakoaha. — Xala xaokaka nikare iraeta? nexa ahekotyaha.

<sup>23</sup> Exowaka hatya tyokita Jesus haliya Jesus awaiyetititere. <sup>24</sup> Tyokita Jesus haliya hoka Simão Pedro aimenekokoatya enomana axa maheta Jesus.

<sup>25</sup> Aimenekokoatya enomana hoka axeheha Jesus: — Xalaite mátawahena hiso, Xekohaseti? nexa axa Jesus.

<sup>26</sup> Axa Jesus hoka Jesus nexa: — Nakairatite namaika hoka nisa enomana. Hatyo atyoite nomatawatyasehare tyaohena — nexa hoka nakairati maika hoka isa Judas Iscariotes ana. Judas atyo Simão Iscariotes nexarexe ityani.

<sup>27</sup> Isa enomana hoka Judas kanakaira hatyo nakairati hoka Ahalakoahaliti kamilakoretene.

Hatyaoseta Jesus nexa ihiye: — Hiyanehena atyo hoka hisoma haokowitere hisomehena rotita — nexa.

<sup>28</sup> Nega Jesus irai ekakoa hoka nali tyokiterenai semene hoka maisa hatya ana hekoti waiyekehalakita. <sup>29</sup> Judas atyo enoloxaha kaxaikotyasehare tyaonita enomanaha hoka motya Jesus axikatene nakairati iya maheta hisehaliti niyahare aakahitaha. Haiyanai motya Jesus axikatene hoka isa maheta olo maxiyehareharenai ana aakahitaha.

<sup>30</sup> Hoka Judas kanakaira hatyo nakairati isehenere enomana hoka xane rotita. Exowaka koxaka maka.

### *Waitare Xaotyakiyaho*

<sup>31</sup> Judas xaneheta enonyahitaha hoka Jesus nehena: — Kalikini Haliti Ityani kaxaexakerityaka, exahe Enore tehitia hoka kaxaexakerityaka ihiyeta. <sup>32</sup> Enore kaxaexakerityaka ihiyeta hoka Enore hiyeta atyoite Haliti Ityani kaxaexakerityaka. Kalinite Enore nikare mohena — nexa Jesus.

<sup>33</sup> — Exeta atyoite maisa waha notyaohitita xikakoa, nokaxaikoniharenai. Noxanihetaite xonita hoka xatawaite natyo hoka maisaita xikaokita natyo. Noxanihetehena hoka maisaiya xijoita noxanihenere nali. Koxaka noxakai hatyo akiti judeunai hiye.

<sup>34</sup> Hoka kalikini exe iraiti waitare kakoa naotyakihiyta xiso. Maika xawaiyetyakakoa nawaiyetitere xiso akere xawaiyetyakakoa tehitia. <sup>35</sup> Xawaiyetyakakoaiya hoka tyotya halitinai anaiya waiyekehalaka hoka, “Hatyonai atyo Jesus xema nawenatyaseharenai”, nexahaiya xiyaokaka — nexa Jesus.

### *Pedro Hiye Jesus Irae*

(Mateus 26.20-25; Marcos 14.17-21; Lucas 22.21-23)

<sup>36</sup> Hatyaoseta Simão Pedro axehena Jesus: — Alyakoite hiyanehena, Xekohaseti? nexa axene.

— Awisa noxanihena hoka maisaiya atyo kalikinita hiyaneta noxanihenere nali. Hoka haxowaka atyoite hisoa noximi — nexa Jesus.

<sup>37</sup> — Xoana hoka maisa kalikinita notyoa hiyema haokita? Koxaka nomimiye notyaonita nokamani niyahare hikakoa — nexa Pedro irai.

<sup>38</sup> — Xoana, alitere haokita? nexa Jesus. — Hasemehena niraini: Awisa takoira makawiraharenetaite hehena: “Exe haliti atyo maisa nowaiyanihare xini”, hexaite noxaokaki. Exakere ite hanamaki hirae — nexa Jesus Pedro niraine nahalakoa.

## 14

### *Jesus Atyo Ahoti Enexe Xetare*

<sup>1</sup> — Awa atyo ximawaiyehare — nexa Jesus haxaotyakiraharenai hiye. — Koxaka Enore xityakeko. Maika xityakeko tehitia natyo — nexa. <sup>2</sup> — Baba nawenakala nali kahare hati wenati niyahare. Memere ite namoka hati xomanere. Maisaiya nikarexe hoka koxakaiya noxakaini xihiye. <sup>3</sup> Noxanite hoka memere namoka hoka nahaikoahetaite hoka nanoloka xiso hoka xisaona nohaliye — nexa. <sup>4</sup> — Koxaka xawaiyore hatyo noxanihenere nali akiti kakoa, exahe ahotyaho noxanihenere aho kakoa hoka xawaiyoreta — nexa Jesus ihiyeha.

<sup>5</sup> — Maisa wawaiyoreta hatyo hiyanehenere nali akiti kakoa. Aliyakereya hoka wawaiyore hatyo ahotyaho hiyanehenere aho kakoa? nexa Tomé axene.

<sup>6</sup> — Natyo atyo ahoti. Iraiti aliterexe atyo natyo. Nohiyitita haliti tyaona mene matyotenehare. Nohiyitita taita atyo kakáokatyakita Baba Enore nali. <sup>7</sup> Kalikini atyo xiayita natyo hoka xiayiaya tehitiaite Baba. Hoka kalikinitata xiayitene. Xiyaiyanehare terota atyo — nexa Jesus ihiyeha.

<sup>8</sup> — Xekohaseti, hahotikisa Hexe womana hoka ehekore womana — nexa Filipe.

<sup>9</sup> — Wahehena notyaonita xinekoni, Filipe. Xoana, maisa hiyaiyanehare xini natyo, exahe nawenani hoka waiyekehalakere homana? Xala xamani atyo waiyita natyo hoka waiyita tehitia atyo Baba. Xoana hoka, “Hahotikihena Hexe womana”, hita? Koxaka xiayiylene. <sup>10</sup> Xoana motya maisa Baba tyaonare nokakoi haokita? exahe natyo hoka motya maisa notyaonare ekakoa haokita? Niraihena xikakoa hoka maisa natyota xini niraeta. Baba tyaonita nokakoi hoka tyomita hahatene noxaihako maniyita.

<sup>11</sup> Baba tyaonita nokakoi, exahe natyo hoka notyaonita ekakoa. Maika hatyo akiti xityakeko, maisa namaoseraita xini. Maisa xityakekota niraini hoka maika xityakeko natyo maomakahare notyomitere hiyeta. <sup>12</sup> Hatyaiya tyakeko natyo hoka tyomaiya notyomitere akereta. Ekakoitaiya hatyonai xahehare tyomehena. Maikoisa Baba Enore

nali noxanihena hoka hatyaosetaite notyomitere xahehare tyomehena. Alitere naokita, maisa namaoseraita xini — nexa Jesus.

<sup>13</sup> — Nexare kakoaiya xaxehena hoka tyotyaiya notyoma xaokitreharenai xomana. Notyomeniya xomana Baba kaxaexakeretyaka maheta. <sup>14</sup> Xoare xamaniya xaxa nexare kakoa hoka tyotyaiya notyoma xomana.

*Jesus Isa Aokowi Isekohaliti Waiyexe Halitinai Ana*

<sup>15</sup> — Aliterexe xawaiyetita natyo hoka maika xasemaxemaya niraini, xoalini hare naohenai xihiyeh hoka. <sup>16</sup> Xasemaxemaitaiya niraini hoka naxaiya Baba hoka axikatya xomana xikahinaetyase maheta Isekohaliti Waiyexe hoka tyaoneta mene xikakoa. <sup>17</sup> Hatyo Isekohaliti Waiyexe atyo maisa maoseratyaliye xini. Maisa atyo matyakekoneharenai ana kaotyakita. Maisa waiyarahene, exahe waiyekehalakere enomanaha. Hoka hatyo Isekohaliti Waiyexe atyo xiayiyanahare. Maika tyaona mene xikakoa — nexa Jesus.

<sup>18</sup> — Noxanihetehenaite xonita hoka maisaiya ximakaxaikotyakahare nahalakijita. Na-haikoahetaite xomana. <sup>19</sup> Iniraite notyaohtiya hoka hatyohekotaite maisa nokawaiyakihitita, maisaiya matyakekoneharenai waiyihitita natyo. Hoka xiso atyoite xiayiye-heta natyo. Nowainite hoka nokaseheta hoka xiayiye-heta natyo. Nokasehetaite hoka hatyota atyoite maisa nowainihitita hoka xiso tehituyaite xiwaini hoka xikaseheta hoka hatyota maisa xiwainihitita. <sup>20</sup> Exowakehenaite hoka waiyekehalaka xomana notyaonitere Baba kakoa, exahe xiso xisaonitere nokakoi notyaonitere xikakoa akereta — nexa Jesus.

<sup>21</sup> — Hatyaiya tyaonita niraini xema hoka hatyoiya atyo awaiyetita natyo. Hatyo awaiyetitete natyo atyoite Baba awaiyetya, exahiya natyo hoka nawaiyetene hoka nahotikisoawiya enomanha — nexa Jesus aotyakisa haxaotyakiraharenai.

<sup>22</sup> Hatyaoseta Judas iraihena. Maisa Judas Iscariotes xini, hatya Judas nexarexe iraihena Jesus kakoa: — Aliyakeriya hahotikisoahena womana hoka maisa matyakekoneharenai ana hahotikijoita? nexa axa Jesus.

<sup>23</sup> — Xala xamaniya awaiyetita natyo hoka tyaonita niraini xema hoka Babaiya awaiyetene. Hoka Baba natyo xoahaiya wisoa wisaona ekakoa. <sup>24</sup> Xala xamaniya maisa awaiyetita natyo hoka maisaiya tyaonita niraini xema. Hoka exe iraiti xasemitere atyo noxaxikatyasehara Baba niraine, maisa atyo niraini xini. <sup>25</sup> Hekotata notyao-nita xihaliya hoka hatyo akiti niraeta xihiyeh — nexa.

<sup>26</sup> — Baba ite axikatya xomana xikahinaetyase Isekohaliti Waiyexe noxaokalita. Kaokaite xomana hoka aotyakihena xiso kahare hoka xotyaxemaheta tyotyaiya niraihenere xikakoa. <sup>27</sup> Nahalakisaita nomehexaikohalini xikakoa. Nisaite nomehexaikohalini xomana. Nowawi nikare namokita haliti, maisa waikohekoarenai namokitere akereta mokare. Awaira atyo ximawaiyeharehena, exahe ximairehena — nexa.

<sup>28</sup> — Koxaka xasema niraini: “Noxanihetaite hoka na-haikoahetaite xomana”, nomi xihiyeh. Xawaiyetitaiya natyo hoka xasema noxaninheta Baba nali hoka xihalahareya, Baba atyo noxahehare hoka. <sup>29</sup> Kalikinita exeharenai tahi noxakaita xihiyeh enaheta maniyita hoka nikare tyaohena hoka xityakeko maheta — nexa.

<sup>30</sup> — Exeta atyoite maisa waha niraihitita xikakoa. Owene matyakekoneharenai xekohase kaokehena womana, maisa xakore atyo noxahehare niyatere xini hoka. <sup>31</sup> Kasani tyotyaiya waikohekoarenai ana waiyekehalaka Baba nawaiyetitete naokita. Hiyeta hoka aokitere akereta notyomita — nexa. — Xatityoahetehena hoka wiyanahetehena — nexa Jesus.

*Jesus Atyo Uva Kate Akere*

<sup>1</sup> — Natyo atyo uva kate akere hoka Baba Enore atyo uva kate kaxaikotyasehara akerexe. <sup>2</sup> Xiso noximi maniya xisaoniterai atyo ekanohinae akerexe. Hoka uva kaxaikotyasehara irikoita tyotyaiya malihare kanohinae, exahe afiraharetita kalitere kanohinae masakare kali tyaonaha maheta. <sup>3</sup> Hoka xiso atyo ekanohinae exafiraharetita kalitere kanohinae masakare kali tyaonaha maheta. <sup>4</sup> Maika xisaoneta mene nohiye, exahe akere xisaonita, koxaka naotyakisa xiso hoka.

natyo hoka notyaoneta mene xihiye. Hiyaiya, uva kate kanohi taikoahena hakate hiyeta hoka maisa kalihetere. Hoka hekota tyaonita hakate hiye hoka kalita. Nikareya maisa xisaonita nohiye hoka maisaiya aliyakere xoalini hare waiyexe xisomita — nexa Jesus haxaotyakiraharenai hiye.

<sup>5</sup> — Natyo atyo uva kate akerexe, xiso atyo ekanohinae akerexe. Ekanohi hakate hiye tyaonita hoka kahare kalita. Nikarexe xisaona nohiye hoka kahare xoalini hare waiyexe xisoma. Hoka maisaiya xisaonita nohiye hoka maisaiya xoare hare xisomita.

<sup>6</sup> — Uva kate kanohi taikoahena hakate hiyeta hoka haxerore inira tyaonita hoka ekaxaikotyasehare awaiyetolisene hoka keraitene. Maisaiya xisaonita nohiye hoka nikareya xikaxomokaka. <sup>7</sup> Xisaona nohiye exahe niraini xema xisaona hoka xoalini hareya xaxehena Baba hoka tyomeniya xomana. <sup>8</sup> Uva kate kanohi kahare kali hoka waiye. Nikare xisaona noximi maniya hoka kahare xoalini hare waiyexe xisoma hoka Baba kaxaexakerityaka, exahe xiso hoka noximi nawenatyaseharena naoka — nexa Jesus ihiyeha.

<sup>9</sup> — Baba awaiyetita natyo. Hatyo awaiyetitere natyo akereta nawaiyetita xiso. Nawaiyetita xiso. Maika hatyo xema xisaona. <sup>10</sup> Waiye xasemaxemetya niraini hoka nawaiyetyaiya xiso. Xiyaiya, natyo tehitia Baba niraine waiye nasemaxemaita hoka awaiyetita natyo.

<sup>11</sup> — Exe akiti noxakaita xihiye waiye xawenane tyaona maheta xomana hoka xihala-hare kaiserehare xisaona maheta — nexa Jesus.

<sup>12</sup> — Exe tehitia naoka xihiye: Maika xawaiyetyakakoa nawaiyetitere xiso akereta. <sup>13</sup> Hatyiya awaiyetita kaiserehare hahinaeharenai hoka memereya tyaona hoka wainiya hahinaeharenai wenekoare.

<sup>14</sup> — Naokitere akeretaiya xisaona hoka nohinaeharenaiya naoka xiso. <sup>15</sup> Maisaiya wakahare naokita xiso. Wakahare atyo maisa waiyorexe haxekohase xahekola kakoa. Hoka natyo atyo nohinaeharenai naokita xiso. Kahare Baba nalita nasema iraiti hoka tyotya noxakaini xihiye, nohinaeharenai naokita xiso hoka — nexa Jesus ihiyeha.

<sup>16</sup> — Maisa xiso xini xaoka natyo xomana. Natyo atyo naoka xiso nomani. Naoka xiso nomani. Uva kate kanohi kahare kalitere akere xisaona naokita, hoka kahare waiyexe xisoma naokita. Nikareya xisaona hoka maisaiya xománenai waiyexe kamaotyanetyakita, exahe xoalini hare xoahena Baba hiye hoka niraini kakoarenaiya xiso hoka tyomeniya xomana — nexa.

<sup>17</sup> — Hiyeta hoka maika xawaiyetyakakoa. Xawaiyetyakakoa naokita hoka nikare niraeta xikakoa.

### *Jesus Xema Tyaoniterenai Atyoite Kairawaiyakaha*

<sup>18</sup> — Maika matyakekoneharenai kirawanehena xiso hoka xotya natyo. Natyo hotohare kirawanehenahere. <sup>19</sup> Hatyonai akeretaiya xiso hoka awaiyetyahaiya xiso, ihinaeharenai xisaohenere hiyeta. Kalini atyo xiso maisa matyakekoneharenai akereta xini. Koxaka atyo enekonitaha nomániye naoka xiso hoka hatyo hiyeta kirawanahitaha xiso. <sup>20</sup> Xotyaira niraini: “Maisa wakahare haxekohase xahehare xini”, nomi xihiye. Nikare hoka iniyalahariya mokaha natyo hoka iniyalahare tehitiyaiya mokaha xiso. Tyaonahaiya noxaotyakiri xema hoka xiyaotyakira xema tehitiyaiya tyaonaha — nexa Jesus.

<sup>21</sup> — Maika iniyalahare mokaha xiso nohiyiti. Hiyaiya, maisa atyo noxaxikatyasehare Enore ewaiyanehareha xini. <sup>22</sup> Awaiya natyo notyo niraeta ekakoaha hoka maisaiya háomaneha ewaxirahare kehexahitaha, waiyekehalakita enomanaha. Hoka notyo nira ekakoaha hoka maisaiya atyo aliyakere teraharetyoahenahitita — nexa.

<sup>23</sup> — Xala xamani atyo kirawaneta natyo hoka Baba tehitia atyo kirawaneta — nexa.

<sup>24</sup> — Kahare maomakahare waiyexe notyoma enekoniha. Maisa xala harenae notyomitere akere tyomare. Ekoiya awa notyomita enekoniha maomakahare hoka maisaiya kehexareha iniyalahare háomaneha. Enekoniha notyoma hoka waiyaha hatyo hoka ihiyeta kirawanetaha natyo, exahe Baba tehitia kirawanetaha — nexa.

<sup>25</sup> — Exakerexe xairatyoare tyaonita exaotyakisakahoha:  
Maxemerehareta kirawaneha natyo.

— Nikare xairatyoare tyaonita hoka hatyo hiyeta kirawaneha natyo xairatyoare tyaonitere akereta kawenatyaka maheta — nexa.

<sup>26</sup> — Ite Isekohaliti Waiyexe kaoka xomana xikahinaetyase maheta. Aliterexe taita atyo iraeta. Baba nalita atyo tyoita, naxikatenite xomana hoka xakaihenaite notahi akiti xihiye. <sup>27</sup> Xiso tehituyaite xiyakaihena notahi akiti halitinai hiye. Hetati xowakiyata xisaonita nokakoi hoka kahare nománi xiyaiya hoka hatyo akiti ite xiyakai ihiyeha — nexa Jesus aotyakisa haxaotyakiraharenai.

## 16

<sup>1</sup> — Nikare nirai xikakoa hoka maisa xamaikohare, ximawaiyehare maheta xini — nexa Jesus haxaotyakiraharenai hiye.

<sup>2</sup> — Maxisoanityahaite xiso xahohisakoatyakalati hanako. Ekakoitaite aisaha xiso hoka motyaite Enore wini hekoreta aisahitaha xiso aokahitaha. <sup>3</sup> Nikarite mohenaha xiso, maisa Baba akiti waiyekhalakere enomanaha hoka, exahe natyo hoka maisa nawaiyekehalakere enomanaha hoka. <sup>4</sup> Hatyohare akiti noxakaita xihiye hoka nikare tyoahenaha hoka xotyaxematyia niraini maheta hoka, “Hatyohare akiti xakai wihiye”, xexa maheta — nexa Jesus.

### *Isekohaliti Waiyexe Hatene*

— Maisa toahiyita noxakaita exe akiti xihiye, hekotata notyaonita xinekoni hoka. <sup>5</sup> Hoka kalikini atyoite noxanihetehena noxaxikatyasehare nali. Xakore hoka maisa xala harenai axita natyo: “Alyakoite hiyanetehena, Xekohaseti?” maisa nita nohiye. <sup>6</sup> “Awisa noxanihetehena xonita”, nomi noxakai xihiye hoka kalore xamaikohareheta. <sup>7</sup> Maika waiye xasema niraini: ehekore atyo noxaniheta xonita. Nomaxaninihareya atyo xonita hoka maisaiya atyo haliti kahinaetyase Isekohaliti Waiyexe tyoita xomana. Hoka noxanihetaiya atyo hoka naxikatene xomana — nexa.

<sup>8</sup> — Isekohaliti Waiyexe atyoite tyohena hoka matyakekotiterenai hiye iraihena: “Xoana hoka iniyalahare xisomita? Waiye maniyaira xisaona! Enorite iniyalahare nomaseharenai mawenekoaretyaka aohena”, nehenaita ihiyeha hoka semehenaha. <sup>9</sup> Maisa tyakekoahitaha natyo hoka hatyo atyo maisa ehekoreta. <sup>10</sup> Noxanihetaite Baba nali hoka maisaita xiyaiyehitita natyo. Hatyohare akiti kakoa maisa ehekore ahekotyahitaha. <sup>11</sup> Exahe matyakekoneharenae xekohase Tihanare mawenekoaretyaka aoka Enore — nexa Jesus.

<sup>12</sup> — Kaharetata niraini xikakoa, hoka maisaiya atyo kalikini noxakaitene xihiye, waiye aliya hoka kaxiyehare xiyahekola tyaona xomana. <sup>13</sup> Hoka Isekohaliti Waiyexe atyoite kaokehena hoka awaiyekhalakatyia tyotya iraiti aliterexe xomana. Maisaiya atyo haxahekolita iraeta, hasémane atyoite xakaihena xihiye, exahe xakaihena atyoite kahare xoalini hare tahi emakaotyakeneharefa. <sup>14</sup> Iraihenaite xikakoa hoka awaiyekhalakena niraini, notahi akiti xomana hoka ihiyetaite nokaxaexakeretyaki. <sup>15</sup> Tyotya Baba anerenai atyo nomaniye tehituya hoka Isekohaliti Waiyexe ite tya hoka awaiyekhalakatene xomana hoka waiye xasema — nexa Jesus.

### *Xamaikohaliti Exahe Ihalahaliti*

<sup>16</sup> — Ininaitehena hoka ximawaiyanenehena natyo hoka hatyaosetaite mawahaneta hoka xiyaiyehitiya natyo. Hiyaiya, noxanihenaite Baba nali — nexa Jesus haxaotyakiraharenai hiye.

<sup>17</sup> Hatyaoseta exaotyakiraharenai iraikakoahenaha: — Xoare nexala aokowita hoka nikare iraeta wikakoa? Exakere nita: “Ininaitehena hoka ximawaiyanenehena natyo hoka hatyaoseta mawahanetaite hoka xiyaiyehitiya natyo”, nita. Exahe, “Hiyaiya, noxanihenaite Baba nali”, nita xoaha. <sup>18</sup> Xoare nexala aokowita hoka nikare iraeta? “Mawahanetaite”, nita. Maisa waiyekhalakita iniraine womana — nexakakoa exaotyakiraharenai.

<sup>19</sup> Axahene aokowitaha hoka Jesus otene hoka nehena ihiyeha: — Nomikira xihiye: “Ininaitehena hoka ximawaiyanenehena natyo hoka hatyaosetaite mawahaneta hoka xiayaiyehitiya natyo”, nomi xihiye. Xoana, hatyo akiti xaxakakoita? nexa Jesus. <sup>20</sup> — Noxanihetehenaite hoka xitiya xamaikohare kalore hoka matyakekoneharenaite ihalahareha. Alitere atyoite xamaikoharehena hoka hatyaosetaite xiyamaikoharene atyoite tyoteheta xonita hoka xihalahareheta. <sup>21</sup> Ohiro hiye xoima kawehena hoka amaikohalota, ekahe aosehena ihiye hoka. Hoka tyaona ityani ihiye hoka hatyo najikinita ihalalaholhitita, maotyanehitita hawaolitini, tyaona ityani ihiye hoka. <sup>22</sup> Hatyo akereta tehitiya xiso. Kalikini atyo xamaikohareta hoka haxowakiyaita nowaiyehetehitiya xiso hoka xihalaharehetaite hoka maisaiya atyo xala harenai examaikoharenekihitita xiso — nexa Jesus ihiyeha.

<sup>23</sup> — Hatyo ferakene ite xane hikoahena hoka maisaiya xoalini hare xaxita natyo. Hoka nexare kakoia ya xaxa xoalini hare Baba hoka isiniya xomana. <sup>24</sup> Kalikini kijiya maisa xoare hare xaxehenere nexare kakoa. Xaxeniya hoka isiniya xomana masakare xihalahare xisaona maheta — nexa ihiyeha.

#### *Halitinai Jiyahaotyaka Tahi*

<sup>25</sup> — Iraiti metaharexe niraini namokita xomana hoka enaose xane hikoahena hoka maisaiya atyo nikare niraihitita. Hoka waiyekehalaka taita atyoite niraihena xikakoa Baba tahi akiti. <sup>26</sup> Hatyo xowakaite xaxene xoalini hare nexare kakoa. Natyoiya atyo maisa xoare maheta niraeta xitahi ekakoa, Baba koxaka awaiyetita xiso hoka. <sup>27</sup> Baba awaiyetita xiso hoka xaokitete akeretaite mohena xiso nomairainihareta ekakoa. Xiso atyo xawaiyetita natyo, xityakekota notyoanini Baba nalita hoka hatyo hiyeta Baba awaiyetita xiso — nexa Jesus.

<sup>28</sup> — Notyoa Baba nalita hoka notyaona ali halitinai koni hoka kalikini nahalakisa halitinai hoka noxanihetehena Baba nali xeta — nexa Jesus ihiyeha.

<sup>29</sup> Nexa ihiyeha hoka exaotyakiraharenai nehenaha ihiye: — Kalikini atyo hiraine waiyekehalakita womana, maisa atyo metahare hiraine hamohitita womana. <sup>30</sup> Hiso atyo tyotya hakakoare kakoa hawaiyoreta, maisa atyo xoare hare kakoa himawaiyorenexe, hoka maisaiya waxehitita hiso, hiraine waiyekehalakita womana hoka. Hiyeta hoka Enore nalitare terota waoka hiso — nexaha Jesus hiye.

<sup>31</sup> Hatyaoseta Jesus nehena: — Xoana kalikini xityakeko? nexa ihiyeha. <sup>32</sup> — Kalikini atyo xiyexaoetyakaose xane hikoa hoka xiyaorehenaite xihananae nihatyaka hoka nowawite xahalakisa. Xakore atyoite hoka maisa atyoite nowawi xini xahalakisa. Baba atyo tyaonita nokakoi — nexa.

<sup>33</sup> — Exeharenai niraeta xihiye xisaona noximi maniya hoka waiye ximehexaiko xisaona maheta. Matyakekoneharenaite maisa waiye mokahitaha xiso xakore hoka maika xihalahare xisaona. Nojiyahaotya atyo matyakekoneharenai exekohaseha kokoita — nexa Jesus haxaotyakiraharenai hiye.

## 17

#### *Jesus Niraexala Tahi*

<sup>1</sup> Hatyo irai najikinita hoka Jesus wahakota enokoa xeta hoka nexa iraexahena: — Nokamani aose xane hikoa, Abá. Maika haerorehena natyo Hityani hoka natyo tehitiya naeroritya Hiso. <sup>2</sup> Tyotya halitinai xahehare hamoka natyo, tyotya noximi maniya hamohenerenai menanehaliti namoka haokita hoka. <sup>3</sup> Hiso taita atyo Enore, natyo atyo hiyaxikalahare Jesus Cristo. Hatyohareya waiyekehalaka halitinai ana hoka hiyema maniyaiya, noximi maniya xoahaiya tyaonaha hoka menanehalitiya tyaonaha.

<sup>4</sup> — Nohateni haokitete notyoma namiyatya. Namiyatene hoka ihiyeta halitinai aexakerityahitaha hiso — nexa.

<sup>5</sup> — Hetati waikohe maomakaharetatere xowakiya Kalorexe notyaonita hinali, Abá. Kasani kalikini haerorehena natyo naoka hoka hetati xowakiya akereta Kalorexe notyao-heta.

<sup>6</sup> — Haiyanai haliti hiyeheta matyakekoneharenai konita hoka hamokahene nokoamaniye, tyaonaha maheta niraini xema. Hoka natyo atyo nawaiyekehalakatya hiso enomanaha. Homanerenai terota hoka noximi maniya hamokahene hoka hiraine xema tyaonahitaha. <sup>7</sup> Hiso atyo kahare xoalini hare koxaka hisa nomani. Tyotya hatyohare hinalitarenai akiti waiyekehalakita noxaotyakiriharenai ana — nexa.

<sup>8</sup> — Koxaka hiraine hiyakai nohiye hoka noxakai ihiyeha hoka tyaonaha hiraine xema. Natyo atyo notyoa hinalita, hiso atyo haxikatya natyo. Hatyo akiti tehitiya noxaotyakiriharenai tyakekoha.

<sup>9</sup> — Kasani hikaxaikoahene naoka hoka hatyo hiyeta niraexatya etahiha hihiyeha. Maisa atyo tyotya haliti tahi xini niraexatita hihiyeha, maisa matyakekoneharenai tahi xini niraexaita. Exe nokoamaniye hamohenerenai tahi taita atyo niraexatita, homanerenai hoka. <sup>10</sup> Tyotya nokoamaniye tyaohenerenai atyo homanerenae tehitiya hoka homanerenai tehitiya atyo nomaniyenai. Nokoamaniye tyaonahitaha hoka ihiyetaha nokaxaexakerityakita — nexa.

<sup>11</sup> — Kalikini atyoite notyohetehena hinali xeta, maisa atyoite halitinai koni notyaoxitita. Hoka noxaotyakiriharenai atyoite alitehena halitinai koni. Maika hikaxaikohena noximi maniya hamohenerenai, Abá, hoka hiyema maniya tyaonaha waiye, exahe exahekola hoka hakakoa tyaohena enomanaha hoka wiyahekola hakakoa tyaonitere akereta ahekohenaha. <sup>12</sup> Matyakekoneharenai koni notyaonita ekakoaha hoka nokaxaikoahene hijitere kakoa. Hiso atyo nokoamaniye hamokahene hoka waiye nokaxaikoahene hoka maisa hatya hekoti halakijita hawenane hiyaotyakira xema maniya. Hatita taita atyo halakisa hatyakekone, hamawenekoaretyaka xetare terota hoka. Etahi akiti atyo kaxairatyaka Iraiti Waiyexe nanekoa hoka aokitere akereta kawenatyaka maheta hoka halakisa hatyakekone.

<sup>13</sup> — Kalikini notyohetehena hinali xeta. Hekota halitinai koni notyaonita hoka exe akiti noxakai noxaotyakiriharenai hiye, kasani ihalahare tyaonaha naokita hoka. <sup>14</sup> Noxakai hiraine ihiyeha hoka matyakekoneharenai kirawanahene, maisa hatyoha akerexeha xini hoka. Noxaotyakiriharenai atyo maisa matyakekoneharenai akereta xini, exahe natyo hoka maisa matyakekoneharenai akerexe xini — nexa Jesus.

<sup>15</sup> — Maisa hiyehenahitene halitinai konita naokare. Kasani hikaxaikoahene Tihanare xoalini hare iniyalahare nonitata naokita. <sup>16</sup> Natyo atyo maisa matyakekoneharenai akereta xini, exahe noxaotyakiriharenai hoka maisa hatyonai akereta xini. <sup>17</sup> Hiyaotyakira atyo waiyexe, aliterexe. Maika haotyakisa noxaotyakiriharenai hoka waiye tyaonaha hikoamaniya.

<sup>18</sup> — Hiso atyo haxikatya natyo halitinai koni. Nikareta natyo tehitiya naxikatya noxaotyakiriharenai halitinai koni awaiyekehalakatya maheta hiraine.

<sup>19</sup> Noxaotyakiriharenai hiyeta hikoamaniya terota notyaona naokowi. Hikoamaniya terota notyaona naokowi hatyonai sema Iraiti Waiyexe hoka hikoamaniya tehitiya waiye tyaonaha maheta.

<sup>20</sup> — Maisa noxaotyakiriharenai tahi taita xini naxita hiso, Abá. Maikaite haiyanai iniraineha semaha hoka noximi maniya tyaohenerenae tahi tehitiya naxita hiso. <sup>21</sup> Kasani exahekola hoka hakakoa tyaona enomanaha naokita. Hiyaiya, noxahekoli, hiyahekola xoaha atyo hakakoa, Abá. Kasani wikoamaniya tyaonaha naokita, Abá. Hiso atyo haxikatya natyo halitinai koni. Kasani noxaotyakiriharenai hakakoa ahekotyaha naokita hoka matyakekoneharenai hiyaxikalahare terota aokaha natyo maheta.

<sup>22</sup> — Hihiyeta nokaxaiminisakita hoka hatyo hiyeta tehitiya noxaotyakiriharenai kaxaiminisakita hamaniya taita exahekola hoka tyaona maheta wiyahekola hamaniyita tyaonitere akereta. <sup>23</sup> Natyo atyo notyaonita noxaotyakiriharenai kakoa hoka hiso hoka hisaonita nokakoi noxaotyakiriharenai waiye tyaona maheta, exahe hamaniya taita ahekohenaha maheta. Hiso atyo haxikatya natyo halitinai koni, exahe hawaiyetya natyo, exahe hawaiyetya tehitiya noxaotyakiriharenai. Kasani halitinai ana hatyohare akiti waiyekehalaka naokita — nexa.

<sup>24</sup> — Abá, kasani nokoamaniyi hamohenerenai nohaliye tyaonaha naokita hoka nawenani kalorexe waiyaha maheta. Hiyaiya waikohe maomakaharene xowakita atyo hawaiyetita natyo — nexa Jesus.

<sup>25</sup> — Hiso atyo hawaiye, Abá. Xakore hoka matyakekoneharenai maisa waiyare hiso, exahe hitahi akiti hoka maisa waiyekehalakere enomanaha. Hoka natyo atyo nowaiyita hiso. Hiso atyo haxikatya natyo ali xeta. Hatyo akiti waiyekehalakita noxaotyakiriharenai ana. <sup>26</sup> Koxaka naotyakisahitene hitahi akiti kakoa. Naotyakisahenite hoka hatyo akiti waiyekehalaka enomanaha hoka tyaonahitaha hikoamaniya. Hiso atyo hawaiyetita natyo hoka hatyo akereta awaiyetyakakoaha naoka, exahe natyo hoka waiye notyaona ekakoaha naokita — nexa Jesus iraexatya Enore hiye.

## 18

### *Jesus Kaberexotyaka*

(Mateus 26.47-56; Marcos 14.43-50; Lucas 22.47-53)

<sup>1</sup> Jesus halakisa hairaexala hoka hikoa xane haxaotyakiraharenai kakoa one hiyase Cedrom nexarexe halakoiya. Hanakati tyaonitere atya ime kakoare nali Jesus xane ekakoaha. <sup>2</sup> Jesus kahaliki nali xane haxaotyakiraharenai kakoa hoka ematawatyasehare Judas tehitiya waiyita hatyo nali. <sup>3</sup> Jesus xane kaoka hatyo atya, ime iyiti kakoare akiti hoka wahasehena tyaonita hoka Judas tyoa kaokehena hatyo nali sorarenai kakoa, Iraexatyakalati Hana kaxaikotyasanai hare kakoa tyoa kaoka hatyo nali. Sacerdotenai, fariseunai xoaha xekohasenai axikatyahene Judas xema. Kesekase, xaokanatyakalati hare kolatyahitaha.

<sup>4</sup> Koxaka atyo Jesus hatyo nikare mohenaherene akiti otita haheta maniya. Atyahita exahitaha hoka kaokehena enomana hoka xane ahalakoatyahene hoka nexa ihiyeha: — Xala xatawita? nexa axahene.

<sup>5</sup> — Jesus Nazaré tare watawita — nexaha.

— Natyo — nexa Jesus ihiyeha. Exowaka ematawatyasehare Judas enekoniha tyaonita.

<sup>6</sup> — Natyo — nexa taita Jesus ihiyeha hoka haikoahaxahenahitaha hoka exoaha waikoa.

<sup>7</sup> — Xala xatawita? nihiitiya Jesus ihiyeha.

— Jesus Nazaré tare watawita — nehenahitinya ihiye.

<sup>8</sup> — “Natyo”, nomita xihkiye. Aliterexe atyo natyo xatawita hoka maika exenai xahalakisa hoka xanehenahitaha — nexa Jesus ihiyeha.

<sup>9</sup> Jesus iraexaitere Enore hiye xowakiya nexa: “Hiso atyo nokoamaniye hamoka noxaotyakiriharenai hoka nokaxaikoahene hoka maisa hatya hekoti halakijita hawenane hiyaotyakira xema maniya”, nexa hatyo xowakiya. Hoka sorarenai tyoa hikoaha enomana hoka, — Maika exenai xahalakisa hoka xanehenahitaha — nexa Jesus sorarenai hiye, iraexahenere akereta kawenatyaka maheta.

<sup>10</sup> Hatyaoseta Pedro iya hakesarakase initini akota hoka Malco nexarexe tinihe aikotya, ifihini maniya. Malco atyo sacerdote kalorexe wakanehare.

<sup>11</sup> Hatyaoseta Jesus nexa iraehena Pedro hiye: — Hamohetehena hikesarakase initinako. Baba Enore isa nomani erati notera maheta. Xoana, motyaite maisa noteritene haokita? nexa Jesus Pedro hiye, makawati kaxomokakehenere xaokaka nikare iraeta hatahi.

### *Jesus Kakolatyaka Anás Nahalakoa*

<sup>12</sup> Hatyaoseta sorarenai exekohaseha kokoita, Iraexatyakalati Hana kaxaikotyasanai hare otokaha Jesus hoka olatyahene. <sup>13</sup> Otokahene, olatyahene hoka xaneha Caifás nimatyokoe Anás hana xeta ekakoa. Hatyo xowaka terehokoane Caifás sacerdotenai xekohase tyaonita. <sup>14</sup> Koxaka Caifás nexa irai judeunai xekohasenai hiye: “Maika hatya haliti waini tyotya halitinae ana hoka ehekore”, nexa irae.

### *Pedro Maisa Jesus Xaotyakirahare Xini Aokowi*

(Mateus 26.69-70; Marcos 14.66-68; Lucas 22.54-57)

<sup>15</sup> Xaneha Jesus kakoa hoka Simão Pedro hatya Jesus xaotyakirahare xoaha xaneha exema. Hatyo Jesus xaotyakirahare atyo sacerdotenai xekohase waiyanehare hoka hatyo tehitiya atyo isoa Jesus kakoa Anás hana talahokolako. <sup>16</sup> Hoka Pedro atyo hekota hati talahokola kanase nali. Hatyaoseta ihinaehare sacerdote kalorexe waiyanehare hikoaheta hoka irae hati jihola kaxaikotyasero hiye hoka noloka Pedro aisoakisa hati talahokotyakako.

<sup>17</sup> Hatyaoseta jihore kaxaikotolo nehena Pedro hiye: — Xoana hiso tehitiya exe haliti xaotyakirahare? nexa axene.

Hoka Pedro nexa: — Maisa atyo exaotyakirahare xini natyo — nexa ihiye.

<sup>18</sup> Kala tihita wakaharenai, sorarenai hiye hoka airatyaha hoka tyoa hatyo haliya tityoa hoka jijikoaha. Hatyaoseta Pedro isoa enekonyaha jijikoaha maheta.

#### *Jesus Kakolatyaka Sacerdotenai Xekohase Nahalakoa*

(Mateus 26.57-67; Marcos 14.55-65; Lucas 22.66-71)

<sup>19</sup> Hatyaoseta sacerdotenai xekohase axa Jesus exaotyakira, exaotyakiraharenai tahi akiti.

<sup>20</sup> Axene hoka Jesus nexa ihiye: — Tyotyaha ehaotya hitaha niraeta. Nikare naotyak-isahitene Iraexatyakalati Hanako, xahohisakoatyakalati hanako hare. Hoka maisa atyo xoana xowaka xoare metereta niraexe — nexa. <sup>21</sup> — Xoana hoka haxita natyo? Kahare halitinai sema niraini. Maika hatyonai haxa hoka xakaihaha hihiyeh — nexa Jesus sacerdotenai xekohase niraine nahalakoa.

<sup>22</sup> Nikare Jesus iraeta ene hoka hatya sorare mokotene itihokoa. — Xoana hoka nikare hiraeta sacerdotenai xekohase kakoa? nexa.

<sup>23</sup> — Xoare nomi namaoseratyha hoka hamokotya natyo? Aliterexe niraeta hoka xoana hoka hamokotya natyo? nexa Jesus iniraine nahalakoa.

<sup>24</sup> Hatyo najikinita Anás axikatya Jesus olatyoaretata haxaise Caifás hana nali xeta. Exowaka Caifás sacerdotenai xekohase tyaonita.

#### *Pedro Maisa Jesus Xaotyakirahare Xini Aokowihitiya*

(Mateus 26.71-75; Marcos 14.69-72; Lucas 22.58-62)

<sup>25</sup> Hoka Pedro atyo hekota irikati haliya jijikoita hoka axehenahitiyene: — Kala maisa hoka hiso tehitiya exe haliti xaotyakirahare — nexaha.

— Maisa natyo xini — nexa Pedro teraharetyoa.

<sup>26</sup> Hatyaoseta sacerdotenai xekohase wakanehare axehitiyene: — Motya akere hiso hare nowaiya ekakoa etake atya, ime hare kakoare tyaonitere nali. Xoana alitere? nexa ihiye. Pedro aikotinichenere hinaehare nikare iraeta ekakoa.

<sup>27</sup> Hoka Pedro nexa: — Maisa natyo xini — nexa teraharetyoahitiya. — Maisa natyo xini — nexa taita hoka takoira kawisa.

#### *Jesus Kakolatyaka Pilatos Nahalakoa*

(Mateus 27.1-2, 11-14; Marcos 15.1-5; Lucas 23.1-5)

<sup>28</sup> Hatyaoseta xaneha Jesus kakoa Caifás hana nalita kalorexe Pilatos hana nali xeta. Exowaka weta. Xaneha ekakoa hoka maisa isoareha ekakoa kalorexe hanako, hisehaliti Páscoa nakaira kanakairaha aokowihenaha hoka. Isoahaiya majudeuneharenai hanako hoka aiyalaharetyahaiya hawenaneha hoka maisaiya aliyakere kanakairahitaha Páscoa nakaira. Nikare atyo exaotyakisakahoha hoka.

<sup>29</sup> Maisa isoahitaha Pilatos hanako hoka hikoa enomanaha sema maheta enomanaha. — Xoare xemere nikare xamokene? nexa ihiyeha.

<sup>30</sup> — Ekoiya waiyexe haliti hoka maisaiya wotokene hoka wijoita homana ekakoa — nexaha Pilatos hiye.

<sup>31</sup> — Kala xiyane ekakoa hoka waiye xasema etahi hoka xinaho maniya akereta xamokene — nexa Pilatos ihiyeha.

— Maisaiya aliyakere waijita haliti. Waiseniya hoka maisaiya waiyeta Roma yerenai hiye — nexaha.

<sup>32</sup> Koxaka Jesus irai haxaisaka tahi akiti hoka hatyo hakamane aohenere akereta efaharenai mokene, Jesus niraine akereta kawenatyaka maheta.

<sup>33</sup> Hatyaoseta Pilatos isoahetehitiya hahakatyakala ako hoka kawisa Jesus hoka axe-henene: — Xoana alitere judeunai xekohase hiso? nexa axehenene.

<sup>34</sup> — Xoana hisota nikare hahekotya hoka nikare haxita natyo? Hatya kore nikare irae notahi akiti hoka haxita natyo? nexa Jesus ihiye.

<sup>35</sup> — Xoana judeu yatya natyo hoka? Sacerdotenai xekohasenai, haiyaharenai hare, hisoharero makere atyo nolokaha hiso nomani hoka hiyaisaka aokaha nohiye. Xoare hisoma hoka nikarahitaha? nexa Pilatos Jesus hiye.

<sup>36</sup> — Kalorexe xakore atyo natyo hoka maisa atyo aliyere kalorexene xini natyo. Aliyere kalorexeya natyo hoka nowakaniharenaiya xalijinihareha hoka maisaiya judeunai otokahitaha natyo. Hoka maisa atyo aliyere kalorexe xini natyo — nexa Jesus.

<sup>37</sup> — Nikare hoka kalorexe atyo hiso? nexa axehitiyene.

— Hiso atyo kalorexe haokita natyo — nexa Jesus. — Hatyo niyahare terota notyaona halitinai koni noxakai maheta iraiti aliterexe ihiyeha. Tyotya iraiti waiyexe awaititerenai atyo semaxemaita niraini — nexa Jesus.

<sup>38</sup> — Xoare iraiti aliterexe haokita? nexa Pilatos Jesus hiye hoka hikoahitiya hoka xane iraihitiya judeunai hiye.

### *Jesus Kahalakisaka Kaxaisaka Maheta*

(Mateus 27,15-31; Marcos 15,6-20; Lucas 23,13-25)

Hikoahitiya enomanaha hoka nehena ihiyeha: — Maisa xoare iniyalahare nasemita etahi akiti. Maisaiya xoare xemere kaxaisakita — nexa. <sup>39</sup> — Hoka xinaho maniya atyo terehokoakiti nihatyaka hisehaliti Páscoa xowakehena hoka hatya berexo ako tyaonitere nahalakihitita xomana. Hoka xoana judeunai xekohase nahalakiheta xomana xaokita? nexa Pilatos axahene.

<sup>40</sup> — Maisa exe kahalakisakeheta waokare. Maika hahalakiheta Barrabás womana — nexaha kinatyaxa kawiyatyaha enomanha.

Hatyo Barrabás atyo haliti fahare.

## 19

### *Jesus Kamokonasetyaka*

<sup>1</sup> Exowakerota Pilatos Jesus mokonasetyaka aoka. <sup>2</sup> Hatyaoseta sorarenai tyomaha xolatyaoisoakalati katohere kakoare hoka mokahene eseri hiye, exahe imitinase xotere ako aisoakisahene.

<sup>3</sup> — Hawaiyeta womana, judeunai xekohase — nexa koexahaxatyaha ekakoa, itihokoa hare mokotyahene hakahe kakoa.

<sup>4</sup> Hatyaoseta Pilatos hikoahitiya hoka iraihitiya judeunai kakoa: — Naihikoatenite xomana hoka xiayaiya! Hoka xasemehena: Natyo nomani atyo maisa xoare hare iniyalahare tyomare — nexa Pilatos ihiyeha.

<sup>5</sup> Nixa hoka aihikoatya Jesus enomanaha. Katohere seriyeta, imiti xotere nasakoreta hikoa enomanaha.

— Xiayaiyehenira! nexa Pilatos ihiyeha.

<sup>6</sup> Sacerdotenai, Iraexatyakalati Hana kaxaikotyasenai harenai waiyaha Jesus hoka kinatyaxa kawiyatyaha: — Haberekotene atyalihose xaimaholatyaka hiye! Haberekotene atyalihose xaimaholatyaka hiye! nexaha kinatyaxa kawiyatyaha, Jesus xaisaka aokahitaha.

— Maika atyo xiso xiyanehena ekakoa hoka atyalihose xaimaholatyaka hiye xaberekotene. Natyo nomani atyo maisa xoare iniyalahare tyomare — nexa Pilatos ihiyeha.

<sup>7</sup> — Xaotyakisatyaho kakoare wiso. Wiyaotyakisakaho xema wisaoonita hoka exe haliti xaisaka waoka, Enore Ityani aokowita hoka — nexa judeunai Pilatos hiye.

<sup>8</sup> Hatyo akiti sema Pilatos hoka maira kalore. <sup>9</sup> Xane isoahitiya hatyako hoka axehitiya Jesus: — Aliyotare kaisere hiso?

Nexa xakore hoka maisa ekoaxaita enomana.

<sup>10</sup> — Xoana hoka maisa hekoaxaita nomani? Hiyaiya, kalorexe atyo natyo. Hikahalakisakehetaiya naoka hoka hikahalakisakeheta. Hikaxaisakaiya atyalihose xaimaholatyaka hiye naoka hoka hikaxaisakaiya. Xoana eko waiyekehalakita homana? nexa axa Jesus.

<sup>11</sup> — Ekoiya awa Enore kalorexe mokita hiso hoka maisaiya xoana hamokita natyo. Hatyo hiyeta nomatawat�asehare kalore iniyalahare tyoma — nexa Jesus kalorexe hiye.

<sup>12</sup> Pilatos sema iniraine hoka halakiheta Jesus aokowihena. Xakore hoka judeunai kawiyatxa enomana: — Awaira atyo hahalakihetenene. Hahalakiheteniyatyo hoka maisaiya atyo waiyeta Roma yerenai xekohase César ana. Hiyaiya, hatya haliti kalorexe tyaona aokowita hoka César nahalakoahare terota tyaonita — nexaha Pilatos ana kawiyatya.

<sup>13</sup> Hatyo iniraineha sema Pilatos hoka aihikoaheta Jesus menanaka tyaonahitereha nali. Hatyaoseta Pilatos kalorexe nokahakalaose tyokeheta, “Sehalikoa” aokahitere nali. Hebreunai xako maniya atyo: “Gabatá”, nexahitaha hatyo xaokaka. <sup>14</sup> Exowaka okoi totahikoahena. Kamaetali hoka Páscoa ferakene tyaohena.

Pilatos tyokeheta hoka nexa judeunai hiye: — Xiyaiyehena, owene xiyekehase kalorexe — nexa ihiyeha.

<sup>15</sup> — Maisa! Waiye xaisaka atyo! Waiye berekotyaka atyalihose xaimaholatyaka hiye! nexaha kinatyatxa kawiyatya enomana.

— Xoana xiyekehase kaberekotyaka atyalihose xaimaholatyaka hiye xaokita? nexa.

— Maisa exe xini wiyekehase. Roma yerenai xekohase taita atyo wiyekehase — nexaha sacerdotenai nityohalitiranai Pilatos hiye.

<sup>16</sup> Nexaha hoka Pilatos halakisa Jesus sorarenai ana berekotyahene maheta atyalihose xaimaholatyaka hiye hoka exowakerota xaneha ekakoa.

### *Jesus Berekotyaka Tahi*

(Mateus 27.32-44; Marcos 15.21-32; Lucas 23.26-43)

<sup>17</sup> Hatyaoseta xaneha Jesus kakoa Calvário, Seriti nahe aokahitere nali. Hebraico xako atyo, “Gólgota”, nexahita exaokaka. Xanehenaha ekakoa hoka Jesus kolatya atyalihose xaimaholatyaka haberekotyaka niyahare. <sup>18</sup> Xane kaokaha ekakoa hatyo nali hoka berekotyaha Jesus atyalihose xaimaholatyaka hiye. Hinamahare tehitia berekotyaha atyalihose xaimaholatyakanai hiye, hamaniya hahare, hamaniya hahare xoaha atityoakisahene hoka Jesus enenekeseneha tyaona.

<sup>19</sup> Pilatos xairatya taba taose hiye hoka hatyo taba taose berekotyaha Jesus seri hao. Exakerexe xairatyoare, hebraico, grego, latim xoaha xako:

### JESUS NAZARÉ YERE JUDEUNAI XEKOHASE

<sup>20</sup> Wenakalati haliyita berekotyahene hoka kahare judeunai jiyyehenhahatyo nali hoka waiyehenhahatyo xairatise hoka kaixaretyahitene.

<sup>21</sup> Hatyaoseta sacerdotenai xekohasenai xane hoka nexaha Pilatos hiye: — Awaiya atyore, “Judeunai xekohase”, hexa haxairatyare. “Natyo atyo judeunai xekohase”, hexaiya atyore haxairatyare — nexaha Pilatos hiye.

<sup>22</sup> — Nikare naxairatya hoka kotare nikareta — nexa Pilatos ihiyeha.

<sup>23</sup> Sorarenai berekotya Jesus atyalihose xaimaholatyaka hiye hoka hatyaoseta inima ekatyahexete aikosekoatya 4-taose hoka haihatyaka tyaonaha ekakoa. Hoka inimanase atyo maisa itinolatyakahare xini hoka maisa aikosekoatya hitene.

<sup>24</sup> — Kotare maxaikotyakahare wahalakisa inimanase hoka wahasakaharetyakakoa ihiye hoka xala xamani tyaona ekakoa — nexakakoaha.

Nexakakoaha hoka hatyaoseta hasakaharetyakakoa hoka hahare tyaona inimanase kakoa. Hatyo nikare tyaohenahere akiti kaxairatyaka iraeti waiyexe nanekoa hoka nikare tyaona:

Nimi atyoite irakakakoaha hoka niminase hiye atyoite hasakaharetyakakoa.

Hatyo akereta sorarenai tyaona.

<sup>25</sup> Atyalihose xaimaholatyaka haliya Jesus nityo haximalone kakoa, exahe Maria Madalena, Clopas exanityo Maria harenai tityoahitaha hoka <sup>26</sup> hatyaoseta Jesus waiya hanityo. Inityo haliya tyaonita exaotyakirahare awaiyetiterene hoka Jesus waiyene hoka nexa hanityo hiye: — Hiyaiya, exe atyo hityani — nexa hanityo hiye.

<sup>27</sup> Hatyaoseta haxaotyakirahare hiye nihitiya: — Hiyaiya, exe atyo hityo — nexa ihiye.

Nexa ihiye hoka exaotyakirahare noloka Jesus nityo hahanako xeta hoka tyaona ehaliya maheta.

### *Jesus Kamane Tahi*

(Mateus 27.45-56; Marcos 15.33-41; Lucas 23.44-49)

<sup>28</sup> Hatyo najikinita atyo waiyekehalakehena Jesus ana, koxaka atyo tyotya kawenatyakeheta. Hoka nexa: — Noinita — nexa, kasani Iraiti Waiyexe nanekoa xairatyoare tyaonitere akereta kawenatyaka maheta.

<sup>29</sup> Hatyo nali tinihaliti vinhoxa katylaxere kakoare tyaonita hoka xane tiyaharetyoakalati mitoloka hatyoxa hoka atyakase hiye mokene hoka xane Jesus kanase hiye ekaokakisene.

<sup>30</sup> Tera hatyo vinhoxa hoka nexa: — Koxaka tyotya memaka hoka imiyane nahikoa — neheta takita hoka xawinoka haseri hoka waini.

### *Sorare Tonotya Jesus Halatako*

<sup>31</sup> Hatyaoseta judeunai xane axa Pilatos, atyalihose xaimaholatyaka hiye tyaoniterenai kasahe taikaha aohenaha hoka wainiha haxerore hoka atyalihose xaimaholatyaka hiyeta iyehenahitene maheta, memere mokakatyaha sábado ferakene niyahare aokowiyahitaha hoka. Kamaetalí sábado xowaka atyo Páscoa ferakene hoka kasani maisa heko atyalihose xaimaholatyaka hiye tyaonaha sábado xowaka aokareha judeunai hoka nikare iraeha Pilatos hiye.

<sup>32</sup> Xane iraeha Pilatos kakoa hoka axikatyá sorarenai hoka xane atyalihose xaimaholatyaka hiye tyaoniterenae kasahe taikaha maheta. Jesus hakakoane berekohenahere hahare hotohare kasahe taikaha, hatyaoseta hahare taisehehenahitinya. <sup>33</sup> Hoka Jesus ana xane xakore hikoahenaha, koxaka atyo waini hoka maisa ekasahe taikahitaha.

<sup>34</sup> Xakore atyo hoka hahare sorare atyo hatonotyakala kakoa Jesus koihako tonotya. Tonotene hoka hatyo etonolaoseta iratyoa timalati, one xoaha. <sup>35</sup> Ewaiyasehare waiya hatyo nikare mohenahere Jesus hoka xakaini. Maisa maoseraita xini, aliterexe nikare mokaha Jesus. Waiyene hoka xakaini xityakeko maheta.

<sup>36</sup> Exakerexe xairatyoare tyaonita Iraiti Waiyexe nanekoa:  
Maisaiya hanahe hekoti enahe taikoita.

Nikare etahi kaxairatyaka hoka nikare mokaha Jesus iraiti akereta kawenatyaka maheta.

<sup>37</sup> Hakiti tehitia exakerexe xairatyoare tyaonita:  
Wahakotyahaite hatyo hatonolahareha ana.

### *Jesus Xafityaka Tahi*

(Mateus 27.57-61; Marcos 15.42-47; Lucas 23.50-56)

<sup>38</sup> Hatyo najikinita José nexarexe xane irae Pilatos kakoa, iyeheta maheta Jesus háré atyalihose xaimaholatyaka hiyeta hoka fetene maheta. José atyo Arimatéia nalitare, Jesus xema nawenatyasehare. Exema nawenatyasehare xakore hoka mema tyaonita, judeunai amairakijitene hoka.

Xane axa Pilatos hoka: — Ahá, hiyane iyehetene — nexa Pilatos ihiye hoka xane atyalihose xaimaholatyaka hiyeta iyeheta Jesus háré. <sup>39</sup> Nicodemos nexarexe tehitia xane José xema. Hatyo Nicodemos atyo etake makiya xane iraehenere Jesus kakoa. Nicodemos xane José xema, kolatya airaxero ekaketatyakahare aloés, mirra xoaha kakoare. Timena hatyo airaxero kolatya. <sup>40</sup> Xaneha hoka xane iyehenahitaha Jesus háré atyalihose xaimaholatyaka hiyeta hoka olahisityahene imiti kese taosero kakoa hoka

airaxero kaolaxahenahere kakoa airaxehisahene. Judeunai atyo nikare hakamaneha moka hoka fityahitaha.

<sup>41</sup> Hatyo Jesus berekohenahere nali akiti hanakatihaliti kakoare, hoka hatyo nali sehalo kokoakotyaka. Waitare kaomakere hoka maisa xala hare hatyoako kaxafityakehenere.

<sup>42</sup> Maisa sekore hatyo sehalo kokoakotyaka hoka hatyoako xane Jesus háré mokaha. Exowaka okoi sábado ferakenehena judeunai hiye hoka nikare tyaonaha.

## 20

### *Xawatyakalati Firakoheta*

(Mateus 28.1-8; Marcos 16.1-8; Lucas 24.1-12)

<sup>1</sup> Domingo xowaka weta makiyaseta Maria Madalena xane Jesus xawatyakala nali xeta. Xane kaoka, waiyehena atyo, xawatyakalati atyo majiholatyoare. Ijihola sehalo taose atyo koxaka kaiyaka hoka majiholatyoare tyaonita.

<sup>2</sup> Nikare waiya hoka tema xane Simão Pedro, hárare Jesus awaiyetitere xoaha ana hoka nexa ihiyeha: — Iyehenahita Xekohaseti Jesus háré exawatyakala akota hoka kala aliyo xamani ala xane mokahene — nexa Maria xakai ihiyeha.

<sup>3</sup> Nega ihiyeha hoka Pedro hatya exaotyakirahare xoaha xane xawatyakalati nali.

<sup>4</sup> Tema xaneha, hárare atyo Pedro xahe winihare hoka tema xane hoka hatyo hotohare xane hikoa xawatyakalati nali. <sup>5</sup> Xane hikoa hoka tanatyoakotyaka hoka imiti kese taosero waiyeheta hoka maisa atyo ijoita xawatyakalati ako. <sup>6</sup> Enajikinita atyo Pedro xane hikoa hoka isoa xawatyakalati ako hoka waiyeheta imiti taose, nali tyaonita hoka. <sup>7</sup> Jesus seri hiye olalihenahere taose haware tyaonita imiti linho taose eháré hiye olalihenahere nonitata. <sup>8</sup> Hatyaoseta exaotyakirahare hetati xane hikoahenere tehitiya isoa hoka waiya. Waiya hoka tyakeko.

<sup>9</sup> Exowakiya maisa waiyekhalakere enomanaha Iraeti Waiyexe nanekoa xairatyoare tyaonitere, Jesus ite kasehetehenere nitere. <sup>10</sup> Hatyaoseta hatyo hinamanai haikohetaha hahanaha xeta.

### *Jesus Kaotyakeheta Maria Madalena Ana*

(Mateus 28.9-10; Marcos 16.9-11)

<sup>11</sup> Hoka Maria Madalena atyo hekota tyaonita xawatyakalati haliya, tiyita. Haosexa naseta meholokoa tanatyoa waiyakotyaka xawatyakalati. <sup>12</sup> Waiyehena atyo, owene hinama anjo tyaonita iyomere nimere makere. Tyokahita Jesus xomokakaose nali, hatya eseri maniya, hatya ikiji maniya xoaha.

<sup>13</sup> — Xoana hoka hitiyita? nexaha axaha Maria.

— Iyehenahitaha noxekohase háré hoka aliyo xamani xane mokahene — nexa Maria ihiyeha.

<sup>14</sup> Nega hoka ehaikoahaloheta, waiyehena atyo, Jesus atyo owene tityoita hoka motya maisa hatyota xini aokitene.

<sup>15</sup> Hatyaoseta Jesus axene: — Xoana hoka hitiyita? Xala xahita hatawita? nexa.

Motya hatyo naliye hanakati kaxaikotyasehare aokene Maria hoka nexa ihiye: — Xoana, hiso hiyeheta noxekohase háré? Aliyo hamokene? Alitere atyo hakolatene hoka hiyakai nohiye hoka noxani nakolahetene hahalakihenerene nalita hoka hakiti noxani nafehetehitityene — nexa Maria ihiye.

<sup>16</sup> Hatyaoseta: — Maria! nexa Jesus.

Nega hoka ehaikoa enomanha hoka nexa: — Raboni — nexa ihiye, hebreunai xako irai. Wiyako maniya atyo, “Xaotyakisatiye”, nita.

<sup>17</sup> — Awa atyo hotohena natyo noxanini nahitita Baba nali. Hiyane kaisere nohinaeharenai hiye hiyakaihetehena natyo. Maika hexa ihiyeha: “Eno tyaite xanehena Hanexe Enore nali, exahe Xexe Enore nali”, hexa ihiyeha — nexa Jesus Maria Madalena hiye.

<sup>18</sup> Nega ihiye hoka Maria Madalena xane xakaiheta Jesus xaotyakiraharenai hiye: — Nowaiyehetaore Xekohaseti — nexa Maria Madalena ihiyeha, Jesus niraene harenai xakai ihiyeha.

*Jesus Kaotyakeheta Haxaotyakiraharenai Ana  
(Mateus 28,16-20; Marcos 16,14-18; Lucas 24,36-49)*

<sup>19</sup> Hatyo domingone makehena hoka exaotyakiraharenai hohisakoaha hati waiye jihotyakere ako, judeunai nityohalitiranaiha amairakisahitene hoka. Hohisakoaha hoka Jesus kaotyaka enomanaha hoka tityoa enenekeseneha.

— Maika waiye ximehexaikohare xisaona naoka — nexa ihiyeha, <sup>20</sup> hotikisa hakaheko aerekotyakaose, hakoihakore tonotyakaose hare hotikisa enomanaha.

Waiyehenahita haxekohaseha hoka ihalaharehenahita.

<sup>21</sup> — Maika waiye ximehexaikohare xisaona naoka. Baba Enore axikahenere natyo akereta atyoite naxikatya xiso — nexa ihiyeha.

<sup>22</sup> NEXA ihiyeha hoka aomomaharehenahitene. — Isekohaliti Waiyexe tyiona xikakoa naoka — nexa ihiyeha. <sup>23</sup> — Haiyanai nómánenai iniyalahare xemaisatita hoka kamaotyanetyakaiya. Hoka maisaiya xemaisatita hoka maisaiya kamaotyanetyakita — nexa Jesus ihiyeha.

*Jesus, Tomé Xoaha*

<sup>24</sup> Jesus kaotyakehetehenere enomanaha xowaka atyo maisa nali enekoniha aka hähare exaotyakirahare Tomé, Dídimó aokahitere.

<sup>25</sup> Tomé kaokeheta enomanaha hoka exaotyakiraharene haiyanai nehenaha ihiye: — Wiyaiyeheta Xekohaseti — nexaha.

— Kala xamaoseraita. Maisaiya atyo nowaiyita eberekotyakaose ekaheko, exahe namokita nokahihi eberekotyakaose, exahe namokita nokahe etonotyakaose ekoihako akiti hoka maisaiya atyo notyakekota xiraini — nexa Tomé.

<sup>26</sup> Tyaothenaha, hasemanane najikinita kala Jesus xaotyakiraharenai hohisakoahenahitiya, Tomé kakoareha atyo. Hati waiye jihotyakahare ako tyaanahitaha. Hatyaoseta Jesus kaotyakihiya enomanaha. Tityoa enenekeseneha hoka nexa ihiyeha: — Maika waiye ximehexaikohare xisaona naoka — nexa ihiyeha.

<sup>27</sup> Hatyaoseta Tomé hiye nexa: — Wityaira hiyaiya hoka hikahihi hamohena nokahikoi, exahe hikahe hoka nokoihako. Awaira hamatyakekohena. Maika hityakeko — nexa Jesus ihiye.

<sup>28</sup> Hoka nexa ihiye Tomé: — Noxekohase, Nenorixi! nexa taita iniraine nahalakoa.

<sup>29</sup> — Hityakekoheta atyo, hiyaiyeheta tyare natyo hoka. Hoka waiye kaiserehare atyo mawaiyanehareta tyakekotere natyo — nexa Jesus.

*Xoare Niyahare Xamani Exe Iraiti Waiyexe*

<sup>30</sup> Jesus atyo kahare xoalini hare tyoma haxaotyakiraharenai haoti tyakekoha maheta, hoka maisa atyo tyotya etahi kaxairatyakita exe baberanekoa. <sup>31</sup> Haiyanai enómanenai taita kaxairatyaka xityakeko maheta Jesus. Hatyo atyo Enore Ityani. Jesus atyo Enore Kalorexe Aohenere. Xityakekone hiyetaite menanehaliti xisaona.

## 21

*Jesus Kaotyakeheta 7-hare Haxaotyakiraharenai Ana*

<sup>1</sup> Hatyo najikinita Jesus kaotyakehitiya haxaotyakiraharenai ana hokoxa Tiberíades aokahitere nali. Exakere kaotyaka enomanaha: <sup>2</sup> Haiyaharenai exaotyakiraharenai nali tyanonita, Simão Pedro, Tomé Dídimó, Natanael, Zebedeu ityaninai, hinamahare tehitia harenai nali tyanonita. Natanael atyo Caná nalitare, Galiléia koa yere.

<sup>3</sup> Nali tyaanahita hoka Simão Pedro nexa hahinaeharenai ihiye: — Noxani namairatya — nexa.

Nexa hoka: — Wisoa tehitiaite hiyema hoka wamairatya — nexa ihinaeharenai ihiye.

Nexaha ihiye hoka mánene kanowako isoaha hoka xaneha. Hatyo makene mairatyahha heko ferakoa hamairalaha kakoita xakore hoka maisa xoare hare nolokahitaha.

<sup>4</sup> Ferakoahena, waiye waiyakehena hoka, waiyehenaha atyo, owene atyo Jesus one kilihi kaiholokoa tyanonita. Xakore hoka motya atyo maisa Jesus xini aokahene.

<sup>5</sup> — Xoana xanoloka kohase? nexa kawiyatya Jesus enomanaha.

— Maisa xoare — nexaha ihiye.

<sup>6</sup> — Xaxawahena maka kohase hiyakakala kanowa halatako fihi maniya hoka kohase nalita xahiya — nexa ihiyeha.

Exowakerota xawatyaha onexa maka kohase hiyakakala hoka kahare isoa enako. Kahare kohase isoa enako hoka maisa aliyakere noloka aihikoahenahitita kanowako hahiyakakalaha, timena hoka.

<sup>7</sup> Hatyaoseta exaotyakirahare Jesus awaiyetitere nexa Pedro hiye: — Xekohaseti Jesus nikaore — nexa Pedro hiye.

Pedro sema Xekohaseti nali tyaonitere hoka isoaheta haimanasako, maimahiro ene tyaonita hoka. Isoaheta haimanasako, exoa onexa hoka maxakoa xane Jesus tyaonitere nali xeta. <sup>8</sup> Haiyaharenai exaotyakiraharenai atyo kanowakota nolokehexatya tyoahita kohase kakoare hahiyakakalaha. Maisa sekore kaiholokoa nonita.

<sup>9</sup> Tyoa hikoahenahitaha kaiholokoa nali hoka exoahenahitaha kanowakota. Waiyehenaha atyo, kohase jihatyaka tyaonita nakairati kakoare irikatyaose.

<sup>10</sup> — Xamehena nomani kohase xinolokala hiyeta — nexa Jesus ihiyeha.

<sup>11</sup> Exowakerota Pedro nolokihitya kohase hiyakakala kohase kakoare, aihikoatya iyotherotikoa. Kahare kohase, kaise ihiyakakalako. Ihatyahene hoka 153-kohase, kalorexe taita. Kahare, kalorexe taita xakore hoka aihikoatene hoka maisa irikoita ihiyakakalaha.

<sup>12</sup> Hatyaoseta Jesus iraihena: — Witya xikanakairahena — nexa ihiyeha.

Maisa xala hare axarene. Xekohaseti Jesus terota aokahitene hoka waiyekehalakita enomanaha hoka maisa xala hare axarene, haiharahitene hoka.

<sup>13</sup> Hatyaoseta Jesus kaoka ehaliyaha hoka nakairati isa enomanaha. Nikare tehitiya kohase isa enomanaha.

<sup>14</sup> Koxaka hinamaki Jesus kaotyakeheta haxaotyakiraharenai ana hakamane najikinita, kaseheta hoka. Exe kakoita hanamaki kaotyaka enomanaha.

#### *Jesus Irae Pedro Kakoa*

<sup>15</sup> Kanakairaha najikinita Jesus axa Simão Pedro: — Simão, João ityani, xoana hawaiyetita natyo exe haiyanai xahexe? nexa.

— Há, nawaiyetita hiso, Xekohaseti. Hatyo akiti waiyekehalakita homana — nexa iniraine nahalakoa.

— Maikaite hikaxaikohena nokalaneroxi mokosenai nomani — nexa Jesus ihiye, (exema maniya tyaoniterenai xaokaka nikareta iraeta).

<sup>16</sup> Hatyaoseta Jesus axehitiyene: — Simão, João ityani, xoana hawaiyetita natyo?

— Há, nawaiyetita hiso, Xekohaseti. Hatyo akiti waiyekehalakita homana — nehituya Pedro ihiye.

— Maikaite hikaxaiko nokalaneroxinai nomani — nehituya Jesus ihiye.

<sup>17</sup> Hatyaoseta mawaheneta hoka axehitiyene: — Pedro, João ityani, xoana, aliterexe hawaiyetita natyo? nexa axehitiyene.

Hatyaoseta Pedro hanamakihena axita hoka amaikoharehena: “Xoana, hawaiyetita natyo?” nita ihiye hoka. Amaikoharehena mokitene hoka nehena: — Xekohaseti, tyoty hakakoare atyo waiyekehalakita homana. Nawaiyetita kaiserehare hiso. Hatyo akiti waiyekehalakita homana — nexa Pedro ihiye.

— Maikaite nokalaneroxinai hikaxaiko nomani — nehituya Jesus ihiye. <sup>18</sup> — Hiyoimaharene xowakiya ene atyo aliyo xamani hiyane haokowihena hoka himako hisoa hoka hiyaneta ene. Hoka maikaite hinityohalitihena hoka haimatya hikahe haiyanai ana hoka olatyaha hiso hoka kolatyaha hiso, maisa xakorite hiyane ekakoaha haokowiye hoka hiyanite — nexa Jesus ihiye. <sup>19</sup> Pedro kamane xaokaka nikare iraeta Jesus. Pedro kamane hiyetaite Enore kaxaerorityaka.

Hatyaoseta Jesus nehituya Pedro hiye: — Hisaohena noximi maniya — nexa ihiye.

#### *Jesus Irae Hatya Haxaotyakirahare Kakoa*

<sup>20</sup> Hatyaoseta Pedro terehokoa waiya Jesus xaotyakirahare masakare awaiyetiterene ana. Hatyo exaotyakirahare atyo hisehaliti Páscoa xowakiya kanakairahitaha hoka tyokita Jesus haliya hoka nita Jesus hiye: “Xala himatawatyasehare?” nita axita Jesus.

<sup>21</sup> Pedro waiya hatyo Jesus xaotyakirahare hoka nexa Jesus hiye: — Hoka exe ite xoana tyaohena? nexa axa Jesus.

<sup>22</sup> — Hekotaiya makamanehare tyaona naoka hoka hekotaiya tyaona nahaikoahetehenere kijiya. Xoaneretya haoka? hatyo nali, maisa hiso xini. “Hisaohena noximi”, nomita hihiye — nexa Jesus Pedro niraene nahalakoa.

<sup>23</sup> Hatyaoseta xakaikoatyaha hakakoare hatyo exaotyakirahare makamanene akiti, maisa xakore atyo nikare Jesus nexare hoka nexa taita xakore atyo hoka, “Hekotaiya makamanehare tyaona naoka hoka hekotaiya tyaona nahaikoahetehenere kijiya. Xoaneretya haoka? hatyo nali, maisa hiso xini”, nexa taita xakore atyo Jesus Pedro hiye hoka.

<sup>24</sup> Hatyo exaotyakirahare atyo xakaini hatyo Jesus iraitere tyomehenere harenae tahi akiti, exahe xairahetene baberanekoa. Maisa maoseraita xini, aliterexe iraeta. Hatyo akiti waiyekehalakita womana.

*Imiyane*

<sup>25</sup> Hekota Jesus tyomitere akiti maxakaihakatyakahare kahare. Hatyoiya kala tyotya kaxairatyakere hoka kalaiya exahe waikohe hakakoare hoka maisaiyala hatyo babera hakakoaneta naoka, nexa hatyo exaotyakirahare.

## Atos

### *Xairahenerene Niraene (Lucas 1.1-4)*

<sup>1</sup> Koxaka naxairatyab abera homana, Xekohaseti Teófilo, hetatita tyotya Jesus aotyakihenere, tyomehenerenae tahi enokoa kakolatyakehenere kijiya. <sup>2</sup> Enokoa kakolatyakehenere nahitita halaisa hairaene haomanerenae haxaotyakiraharenae aohenerenae ana, Isekohaliti Waiyexe niyatere hiyeta. <sup>3</sup> Hakamane najikinita Jesus kaotyakeheta kahare maniyata haxaotyakiraharenae ana, 40-ki ferakene. Maisa maoserare xini, kaseheta kaiserehare. Exaotyakiraharenae waiyehetene. Jesus irae ekakoaha Enore maniya nawenatyaka tahi.

<sup>4</sup> Hatyo xowaka Jesus tyaonita haxaotyakiraharenae kakoa hoka iraeta ekakoaha: — Hekoirá Jerusalém nali xisaona. Xatyaha Enore isa aokowitere xahita, noxakaitere xkiye xahita. <sup>5</sup> João atyo aliterexe one kakoa batixatya. Hoka xiso atyo ite Isekohaliti Waiyexe kakoa xikabatixatyaka ininaetehena hoka, maisa wahahetere.

### *Jesus Atyo Kakolatyaka Enokoa Xeta (Lucas 24.50-53)*

<sup>6</sup> Jesus niraine kakoarenai, ehaliya hohisakoiterenae xoaha axene: — Xekohaseti, xoana kalikini xowakaite Israel hotyalinae ana ewaikoheraha hisehetehena?

<sup>7</sup> — Maisaiya atyo kaxawaiyekehatalyakita hatyohare akiti xomana. Wexe Enore ana taita atyo waiyekehalakita hatyo haxaokala ximita aemenekohenere ferakene kakoa — nexa Jesus ihiyeha. <sup>8</sup> — Hoka xikaxaiyatelikisaka ite. Isekohaliti Waiyexe exoahena xomana hoka xiyanne notahi ite xiakaihena Jerusalém tyaoniterenae hiye, tyotyaha Judéia koa, Samaria koa tyaoniterenae hiye, exahe sekorenae hiye hoka.

<sup>9</sup> Nexa Jesus irae taita hoka kanolokaka enoxeta tyotyaha ehaotyahitaha. Hatyaoseta kaiminiti talatene enonyahita hoka maisa waiyehenahititene.

### *Cristo Haikoahaneheta*

*(1 Tessalonicense 4.13-18; 5.1-4; 2 Tessalonicense 1.7-10; Hebreus 10.37)*

<sup>10</sup> Hekota wahakotyahitaha enoxeta Jesus xanetere xahita hoka eharehena rotita hinamahare haliti kaotyaka enomanaha iyomere akoreha <sup>11</sup> hoka nehenaha: — Galiléia yerenae, xoana hoka enokoa xeta xawahakotita? Exe Jesus enokoa xinekonita xanehenere eno xeta akereta ite tyoheta — nexaha.

### *Matias Xomokaka Judas Wenekoare*

<sup>12</sup> Hatyaoseta haikoahenahitaha Jerusalém nali xeta, Oliveira tyairiya nalita. Sábado ferakene watohenere akere xikako, maisa sekore xini.

<sup>13</sup> Kaokehahitaha hoka isoahenahitaha hatyako, xaneha enoako. Hatyoako tyaonahitaha Pedro, João, Tiago, André, Filipe, Tomé, Bartolomeu, Mateus harenai, Alfeu ityani Tiago, Simão Zelote, Tiago ityani Judas xoahanae hatyoako tyaonahitaha.

<sup>14</sup> Tyotyaha haxawalita iraexataha minita Enore hiye, ohironae hare kakoa, Jesus nityo Maria harenae kakoa, iximarenenae harenae xoaha kakoa.

<sup>15</sup> Hatyo najikinita 120-hare Jesus xema maniya tyaoniterenae hohisakoahitaha hoka Pedro tityoa hoka nehena: <sup>16</sup> — Xasemehena, nohinaeharenae. Isekohaliti Waiyexe Davi kanasakota aehikoaxatya etake Judas Jesus matawatyasehare tahi akiti, hoka nikare terota kawenatyaka. Hiyaiya, Judas atyo Jesus xotokaseharenae ana matawatene.

<sup>17</sup> Winekoni ene tyaonita, Jesus aokene hairaine kakoare maheta haka haxawalita wikakoa maheta. <sup>18</sup> Judas xane iya waikohe Jesus matawahenere xaimane kakoa. Hatyo waikohe háiyane nali exoa hoka enajiji irikotyoaseko hoka tyotya hikoa enajiji — nexa Pedro ihiyeha.

<sup>19</sup> — Hatyo tahi tyotya Jerusalém tyaoniterenae semaha hoka “Aceldama” nexaha kaixaretyaha hatyokoa waikohe — nexa Pedro ihiyeha. Exakoha atyo “Aceldama”. Wiyako maniya atyo “Timalati koa”, nita.

<sup>20</sup> — Salmo nanekoa exakere hatyo tahi kaxairatyaka:  
Maika ehana firakiti tyaoheta hoka maisa xala hare tyaonehitita nali.  
Nexa tehitiya:  
Hatya atyo ite tyaona ewenekoare hoka ehatene tyoma.

<sup>21</sup> — Hiyeta ite hoka hatya haliti wamoka Judas wenekoare Jesus kaseneheta tahi xakaisasehare maheta. Haiyaharenae waiyehenahere Jesus tyaonitatere winekoni xowaka <sup>22</sup> tyaonaha wikakoa João batixahenereneta enokoa kakolatyakehenere kijiya. Maika hatya hatyoharenai konitare wamoka Judas wenekoare.

<sup>23</sup> Hatyo hekota hotikisha hinamahare, José Barsabás Justo kaexareharenhahere, Matias xoaha enomanaha. <sup>24</sup> Hatyohekota iraexahenaha: — Hiyaiyita atyo wityotya wiyahekola, Xekohaseti. Hahotikihena kalikini womana xala xamani ite haoka <sup>25</sup> haka wikakoa maheta hoka Jesus niraine kakoare tyaona tehitiya. Hiyaiya, Judas atyo halakisa hahatene hoka xane hakiti haomanere nali xeta.

<sup>26</sup> — José xamani, Matias xamani — nexaha hoka hasakaha xala xamani tyaona maheta. Hatyaoseta Matias nexare kaotyaka hoka hatyo tyaona Jesus niraine kakoare 11-harenae koni.

## 2

*Isekohaliti Waiyexe Xexoane**(Atos 8.14-17; 10.44-47; 19.1-7)*

<sup>1</sup> Pentecostes ferakene xowakehena hoka tyotyaha Jesus xema maniya tyaoniterenae hatyo nalita hohisakoahitaha. <sup>2</sup> Tyaonahitaha ene hatyoako hoka semehenaha atyo, kaemaharehena enokoata, motya kinatyawiniti hoholala. Hatyako tyaonahitere tyokahitere ako tya ekaisitya hoka tyotyaha semahene. <sup>3</sup> Hatyaoseta waiyehenaha atyo, motya atyo irikati birobirola kaotyaka. Hatyo irikati birobirola akerehare xaoreko, inihatyakaha xane kaoka enomanaha. <sup>4</sup> Hoka tyotyaha Isekohaliti Waiyexe kaxaihakoretyahene. Hatyaoseta iraihenaha haiyanai xako. Isekohaliti Waiyexe inihatyakaha iniyatereha isa enomanaha hoka nikare tyaonahitaha.

<sup>5</sup> Exowakiya Jerusalém nali tyaonahita judeunae Enore maniya ahekotiterenae. Kox-aka tya kaokaha waikohe nihatyaka maniyata. <sup>6</sup> Hatyo sekotarenae semaha emahaliti hohisakoahitereha nali hoka tema xaneha waiyaha maheta, hisoaka haliti xaneha. Jesus xema maniya tyaoniterenae atyo iraetaha haiyaharenae xako hoka semahenaha atyo, hatyo iraeterenae atyo exakoha iraetaha hoka waiyekahalaka semahene hoka hakaharetyoaha.

<sup>7</sup> Hatyo haliti hisoakerenae hakaharetyoahenaha mairihenaha hoka nehenaha: — Exe halitinae iraiterenae atyo Galiléia yerenae. <sup>8</sup> Hoka aliyakereyala hoka wasemita iniraineha wiyako maniya? <sup>9</sup> Hiyaiya, seko akiyata atyo wisoa: Pártia nalita, Média nalita, Elão nalita, Mesopotâmia nalita, Judéia nalita, Capadócia nalita, Ponto nalita, Ásia nalita, <sup>10</sup> Frígia nalita, Panfília nalita, Egito nalita, Líbia koa maniyata, Cirene haliyata wisoa. Exahe haiyaharenae Romatare xoaha tya. <sup>11</sup> Haiyaharenae atyo judeu, haiyanae majudeunehare xakore atyo hoka judeu akereta atyo tyaonita. Haiyanae atyo Creta nalitare, Arábia nalitare xoaha. Xoanere ala hoka nikare wasema iraiti? Aliyerenae iraihenaha hoka wiyakonae iraiyahitaha? Enore nómame kalore xoalini hare waiyexe tahi — nexaha.

<sup>12</sup> — Xoanere kala? nexaha axakakoaha. Hakaharetyoaha, maisa aliyakere tyaona xaka.

<sup>13</sup> Hoka haiyaharenae atyo koexahalisahene: — Hekahitahata exe halitinaeka — nexaha.

- <sup>14</sup> Hatyaoseta Pedro tityoa 11-harenae kakoa iraihena tyotya halitinae hiye: — Xasemehena niraini, xiso nohinaehare judeunae, exahe xiso xityotya Jerusalém nali tyaconiterenae. Waiye xasema niraihenere. <sup>15</sup> Xoana motya exenae hekahitaha xaokita? Maisa nikare xini. Xiyaiya, kalikini rota enokamaehena. <sup>16</sup> Maisa nikarexe xini kalikini kawenatyakitere. Iraiti semasehare Joel xairatya exe kalikini kawenatyakitere tahi akiti:
- <sup>17</sup> “Exakere ite notyoma miyanitiye xowakehena hoka”, nexa Enore. “Maika ite Nisekohare nexaorekoatya tyotya halitinae ana. Hoka ityaninae ite xakaihena niraini tahi akiti. Maika ite xoimahalitinae ite kaxawaiyanikisaka, inityohalitinae ite kaxekaijihinikisaka.
- <sup>18</sup> Hatyo xowakiya ite nexaorekoatya Nisekohare nowakaniharenae, nowakanihalonae ana hoka xakaihenaha niraini.
- <sup>19</sup> Enokoa maniya ite xoalini hare nahotikisa. Nikareta tehitiya ite ali waikoa namoka hoka hakaharetyoaha. Maika ite timalati irikati hare kaotyaka, irikati niyite kalore tyaona.
- <sup>20</sup> Kamae ite makehekua tyaona, kaimarite xotere tyaona timalati akere Xekohaseti xaimenekola ferakene kaheneharexe nahitita.
- <sup>21</sup> Hoka tyotya haiyanae Enore hiye hakahinaetyaka aohenerenae atyo ite iniyalahare nonitata waiyexe maniya kaxomokaka”.
- <sup>22</sup> — Israel hotyalinae, xasemahenaira niraini. Enore atyo Jesus Nazaré yere kax-ahakoritita hoka xityotya xihaoti kahare xoalini hare maomakahare tyomita, exahe hokakitina hoka aiyatelikijita. Hatyohare waiyekehalakita xomana. <sup>23</sup> Xakore hoka xiso atyo exaisaseharenae xisaona hoka xisene iniyalahare tyaconiterenai ana hoka berekotene atyalihose xaimaholatyaka hiye hoka aisene xomana. Xakore hoka koxaka Enore waiyoreta ekakoa enahetakota, exaokala ximita nikare kaxomokaka. <sup>24</sup> Hoka hatyo najikinita Enore ekasekiheta Jesus. Ekamane kaiserehareta iyehetene, maisaiya waha aliyakere ekamane tyaonita.
- <sup>25</sup> — Exakere Davi Jesus tahi akiti nexa:
- Nowaiyeta minita Xekohaseti, nohaliye tyaonita hoka maisa xoare harenae nomairare.
- <sup>26</sup> Hatyo hiyeta nihalahareta noxahekoli kakoa, nihalahareta niraini kakoa. Exahe ite nowaini hoka nokaseheta. Nikare ite hoka nomehexaiko notyaoneheta.
- <sup>27</sup> Maisa ite hahalakijita nisekohare kamati tyaonitere akitiya, Xekohaseti. Exahe ite Haohenere Waiyexe wainihena hoka maisaiya eháre tokomita.
- <sup>28</sup> Koxaka hahotikisa nomani menanehaliti nahotiraho hoka menanehalitite notyaona. Hihaliyehena ite natyo hoka nihalahare kaiserehena.
- <sup>29</sup> — Nohinaeharenae, awisa hoka waiyekehalaka noxakai xihiye wahetakomaniyere Davi tahi. Waini hoka kaxafityaka, hekotata exawatyakala tyaonita ali winekoni. <sup>30</sup> Davi atyo Enore niraine semasehare. “Nikarexe ite namoka hiso. Maika ite hatya hijikolahare hiwenekoare tyaona kalorexe”, nitere ihiye waiyekehalakita enomana.
- <sup>31</sup> — Davi koxaka enahetako maniyita otita hatyohare hoka, “Ahai, nikarexite Enore tyoma. Kalorexe Aohenere kasehetehenere xaokaka: ‘Maika ite maisa kahalakisakita kamatinae tyaonitere akitiya, exahe eháre hoka maisa ite tokomita’”, nexa.
- <sup>32</sup> — Enore exe Jesus ekasekiheta hoka tyotya hatyo harenae wiayiya. <sup>33</sup> Hatyaoseta kakolatyaka Enore fihini maniya tyoka maheta. Enexe aokitite Isekohaliti Waiyexe isa enomana hoka hatyo kalikini xasemita, xiyaiyita. Inisekohare xaorekoita winekoni.
- <sup>34</sup> Hiayiya, maisa atyo Davi ene xini enokoa xaneta. Xakore hoka nexa atyo irae: Xekohaseti nexa Noxekohase hiye: Hisokehena nohaliye nofihini maniya,
- <sup>35</sup> hahalakoaharenae hikiji katyahe namohenere kijiya (enahalakoaharenai mehotyaka xaokaka nikare iraeta).
- <sup>36</sup> — Waiye xasemehena, xityotya xiso Israel hotyalinae. Exe Jesus xaisehenere atyalihose xaimaholatyaka hiye Enore ekasekiheta hoka Kalorexe Xekohaseti aokene hoka mokene Xekohaseti — nexa Pedro.

**“Xoana Ite Wisaohena?”**  
**(Atos 16.27-33; 22.16; 24.24-26)**

**37** Pedro niraine semaha hoka tyotyaha kalore amaikohareha hoka axaha Pedro exahe tehitiya ihinaenae hoka. — Wihinaeharenae, xoana ite wisaohena?

**38** Hoka Pedro nexa ihiyeha: — Xahalakihena iniyalahare xománe hoka xikabatix-atyaka Jesus Cristo nexare kakoa hoka iniyalahare xománe kaxemaisatyakeheta, kamaotyanetyakeheta. Hoka Isekohaliti Waiyexe kaoka xomana Enexe nalita. **39** Exe iraiti atyo xomanere, xityaninae anere xoaha, exahe seko akiya tyaoniterenai anere tehitiya hoka. Exahe xala xamani Enore aohenha haomana hoka hatyo iraiti enomanere tehitiya.

**40** Pedro aiyateretyoita hairaine kakoa, kahare irae: — Enore maniya xisaohena, awa atyo iniyalahare tyaoniterenae xema xisaona.

**41** Hatyohekota Pedro niraine kahare tyakekoha. Semaxemayaha iniraine hoka kabatixatyakaha. Hatyo xowakiya komita ene 3.000-hare haliti tyaona Jesus xema maniya. **42** Hatyota kinatere tyaonaha Jesus niraine kakoarenai xaotyakira xema, exahe awaiyetyakakoahita. Kanakairehenaha hoka haxawalita tyaonahitaha, exahe iraexahenaha hoka haxawalita tyaonahitaha.

### *Hetatiye Tyakekohatiyenae Nawenane*

**43** Jesus niraine kakoarenai tyomitahare xoalini hare maomakahare waiyexe, hokak-itinae aiyatelikihenahititaha harenai. Hiyeta hoka tyotyaha halitinae hakaharetyoahitaha, waiye aiminisahitaha xoaha. **44** Tyotyaha tyakekoterenae haxawalita tyaonahitaha, exahe haxiyeharenae hoka isakakoahita, **45** betityaha hawaikoheranaeha haxiyeharenae harenae xoalini harenae haomanereha hoka irakahita exaimane maimahiroterenae nakiterenae ana. **46** Ferakiti nihatyaka haxawalita hohisakoahita Iraexatyakalati Hanako, hamaniyita haxahekola mokahitaha. Hahanahanae aka haxawalita kanakairahitaha, ihalahare tyaonahitaha, maisa xalijiniharexeha. **47** Aexakeretyahitaha Enore, exahe tyotyaha halitinai ana hoka waiyahitaha makere. Ferakiti nihatyaka Enore aisoakatyahitene ferakiti nihatyaka, hoka kahare haliti waiyexe maniya tyaonahitaha.

## 3

### *Maetonanehare Xaiyatelikisakeheta*

**1** Haxowaka makakoahena iraexatyati kamae aosehena hoka Pedro, João xoaha xane Iraexatyakalati Hana xeta. **2** Ferakiti nihatyaka hatya haliti Iraexatyakalati Hana kanase nali tyaonita. Maetonanehare terota tyaona. Xisoakalati waiyeharexe nexahitere nali mokahitene axa maheta olo Iraexatyakalati Hanako ijoiterenae nonitata maheta.

**3** Hatyaoseta Pedro, João xoaha isoahena hoka waiyahene hoka axahene olo.

**4** Hatyaoseta Pedro waiye wahakotyaha enomanaha hoka nexa: — Hawahakohena womana.

**5** Hatyo haliti wahakotyaha enomanaha, atyahaharetyoa xoalini hare exekaneha enomanah xahita.

**6** Hatyaoseta Pedro nexa ihiye: — Maisa nokaoloxiye hekoti xakore atyo ite hoka nisa homana, maisaiya nomaxekanita homana. Jesus Nazaré yere nexare hiyeta hainakoa hatohetehehena.

**7** Hatyaoseta Pedro otoka ifihini maniya kahe, kahinaetene hoka ainakihetene. Exowakita kinatere tyaoheta ikinoli ikijinae. **8** Hatyaoseta halaisoa tityoaheta hoka toheta. Hatyo hekota isoa Iraexatyakalati Hanako exemaha. Tonita, halajoita, ihalahareta Enore kakoa. **9** Tyotyaha hatyoako tyaoniterenae waiyaha ehalaisoakola inihalaharene Enore kakoa.

**10** Hatyaoseta waiyekahala enomanaha: — Ahai, etake olo axitere xisoakalati waiyeharexe aokahitere nali tyokitere kore — nexaha. Hakaharetyoaha mairaha, nikare tyaoheta hoka.

*Pedro Xakaihakala Iraexatyakalati Hanako*

<sup>11</sup> Hatyo haliti kaxaiyatelikisakehetehenere Pedro, João xoaha haliya tyona hoka tyotyaha hohisakoaha ehaliyaha Iraexatyakalati Hana tyaisera kilihi Salomão nómame aakahitere nali hoka hakaharetyoaha.

<sup>12</sup> Hatyohekota waiyahene Pedro hoka nehena ihiyeha: — Israel hotyalinae, xoana hoka nikare xahakaharetyoita? Xoana hoka xawahakotita womana? Xoana exe haliti tohetehenere motya wiyaokala wiyatere hiyeta toheta xaokita, exahe hoka motya waiye maniya wawenane hiyeta xaokita? <sup>13</sup> Xasemehena, wahetakomaniyereharenae Abraão, Isaque, Jacó xoaha nEnorexa kalorexe moka hawakanehare Jesus. Xiso atyo xisene xekohaseti Pilatos ana aisene maheta. Pilatos xakore ehalakisakeheta aoka hoka xiso atyo maisa xaoka. <sup>14</sup> Hatyo xakore atyo waiyexe kaiserehare hoka xiso atyo maisa xaokitene. Exahe ehalakisakeheta xakore aoka hoka haliti fahare halakisaka xetatere xaoka Pilatos hiye. <sup>15</sup> Nikare xiso xaisa wenati waikatehare. Xakore atyo hoka Enore atyo ekasekihetene. Wisonae atyo ewaiyasehare wisaona. <sup>16</sup> Jesus nexare, niyatere atyo exe haliti aiyatelikheta, exe xiyayitere. Enexare tyakekotyaka, Jesus tyakekotyaka atyo aiyatelikhete xityotyha xihaoti.

<sup>17</sup> — Maisa Jesus waiyekehalakere xomana hoka nikare xamokene, nohinaeharenae, xiso xinityohalitiranae xoaha. Hatyohare waiyekehalakita nomani. <sup>18</sup> Kalorexe Aohenere makawatini tahi Enore xakai. Koxakereharenae iraiti xakaisaseharenae kanasakota aehikoaxatene. Hoka xakaihenahere akereta kalini kaxomokaka.

<sup>19</sup> — Hoka xahalakihena nikare xawenane hoka Enore maniya xisaohetehena hoka iniyalahare xománe kamaotyanetyakeheta. <sup>20</sup> Hoka ekakoita exahe waitare iyateliti kaoka xomana Enore nalitare. Exahe axikaty Kalorexe Aohenere xomana. Hiyaiya, Jesus atyo Enore Kalorexe Aohenere. <sup>21</sup> Enokoa tyanonita kalikini. Heko atyo ite kotare enokoa tyanonisa. Tyotya xoalini hare hotohare tyomihitiya hoka hatyo xowaka rota atyoite Jesus axikaheta. Hatyo akiki koxakereharenae iraiti xakaisaseharenae kanasakota Enore aehikoaxatya. <sup>22</sup> Hiyaiya, exakere Moisés nexa:

Enore ite maika hatya xinekonita kaoyakatya iraiti xakaisasehare xomana natyo akere.

Hoka maika xasemaxemata iniraine, xoare nehena xamani xihiyeha hoka.

<sup>23</sup> Hoka xala xamaniya atyo maisa semaxemaita iniraine hoka Enore kaxaikone hotyali konita kakikisakeheta hoka kamawenekoaretyaka.

<sup>24</sup> — Tyotyaha iraiti xakaisaseharenae hatyo xaka xakaihahitaha. Samuel hotohare iraine, hatyo hekota enajikini maniyatarenai tyotyaha xakaihaha kalikini wisaonitere akiki. <sup>25</sup> Xiso atyo iraiti xakaisaseharenae jikolaharenae. Xahetakomaniyerenae anere aokiterenae Enore tehitia xomanere. Hiyaiya, nexa atyo Abraão hiye:

Hijikolaharenae hiyetaite tyotya waikoa tyanoniterenae waiye maniya kaxomokaka.

<sup>26</sup> — Nikare Enore hawakanehare axikaty xomana hotohare, waiye maniya moka xiso maheta, xahalakisa iniyalahare xománe maheta — nexa Pedro ihiyeha.

#### 4

##### Pedro, João Kalorexeharenae Haotita Tyanonita

<sup>1</sup> Pedro, João xoaha iraetata ekakoaha hoka tyoa kaoka sacerdotenae, Iraexatyakalati Hana kaxaikotyasesnae xekohase, saduceunae hare kaokaha. <sup>2</sup> Ehareha hatyo hinama Jesus niraene kakoarenanai hiye exaotyakiraha hiyeta. Saduceunae atyo kamati makasene-hare aokiterenae. Hoka, “Koxaka Jesus kaseheta. Nikare ite kamatinae kaseheta”, nexahitere hiyeta ehareha Jesus niraene kakoarenanai hiye.

<sup>3</sup> Hatyaoseta otokahene hoka berexotyahene, mokahene berexo ako kamaetali niyahare. Hatyo xowaka koxaka makehena.

<sup>4</sup> Xakore hoka koxaka atyo kahare haliti semehenerenae iraiti tyakeko, kala 5.000 hare.

<sup>5</sup> Kamaetali hoka ahohisakoatyakaoaha Jerusalém nali judeunae nityohalitiranaeha, judeu xaotyakiraha kakoa waiyoreterenae, exahe wenakalati waikateharenae hare.

<sup>6</sup> Hatyo hohisakoahenahere koni tehitia sacerdotenae xekohasehare Anás, Caifás, João,

Alexandre harenæ. Haiyanae tehitia hatyo sacerdotenæ xekohase hotyali harenæ hohisakoaha.

<sup>7</sup> Hatyaoseta xane nolohenahitene berexo akota hoka mokahene enahalakoaha hoka axalihenahene: — Xoana hoka nikare xisaonita? Xala niyatere kakoa, xala xaokala xema nikare xamokita?

*Waiyexe Maniya Nawenatyakeheta*

(Atos 13.38-39; 16.27-33; Romanos 4.6-8; 6.23)

<sup>8</sup> Hatyaoseta Pedro, Isekohaliti Waiyexe kaxaihakoretene hoka nehena ekoaxahena enomanaha: — Xasemehena, xekohasetinae, judeunai nityohalitiranae xoaha. <sup>9</sup> Kalikini xaxita wiso exe haliti ana waiyexe kaomakehenere tahi, exaiyatelikisakeheta tahi. <sup>10</sup> Xasemehena xityotya, exahe tyotya Israel hotyalinae hoka: Exe haliti kaxajiyakisaka Jesus Nazaré yere niyatere xema, etake xaisehenere atyalihose xaimaholatyaka hiye hoka Enore ekasekihetehenere niyatere xema. <sup>11</sup> Xiso hati nomaseharenai maisa hatya sehalì xaokare hati nomaka niyahare hoka hatyo najikinita kaxomokaka hati hiye hoka kinatere tyaona. Jesus Nazaré yere xaokaka nikreta. <sup>12</sup> Ekoamaniyata takita Enore maniya wikaxomokakita. Hatyo taita iniyalahare wenati nonitata iyehitita haliti. Maisa hatya aka hoka nikare iniyalahare emaisatyare. Enore atyo exe exaliti moka hoka hatyo hiyeta tyotya waiyexe maniya tyaohenahitaha maheta — nexa.

<sup>13</sup> Hoka kalorexenæ waiya Pedro, João xoaha mamairaneharene hoka hakaharetyoaha, maisa Pedro, João xoaha masakare waiyorexeha hoka. Hatyo hiyeta tehitia otehenahitaha Jesus xema tyaonahitere. <sup>14</sup> Waiyaha exaiyatelikirahareha tityoita ehaliyaha hoka maisa aliyakere iniyalahare iraetaha ekakoaha.

<sup>15</sup> Hatyaoseta hatyo hinamahare Jesus niraene kakoarenæ aihikoahetaha tyaonahitereha akota, hoka kalorexenæ makere hatyokakoaha iraikakoahenaha. <sup>16</sup> — Xoana ite wamohenahene? Koxaka tyotyaha Jerusalém tyaoniterenæ semaha exaiyatelikirenenahitaha haliti. Maisaiya aliyakere emaoseralaha waokita — nexaha. <sup>17</sup> — Xakore hoka kala waiyateretyoa ite exahitaha hoka maisa hatyo tahi halitinæ koni xaoreta hoka maisa xala harenæ hiye Jesus tahi iraihititaha.

<sup>18</sup> Hatyaoseta kawihenahitene, iraeha ekakoaha maisa xakaihenahitaha, maisa atyakihenahitaha hekoti maheta.

<sup>19</sup> Hoka nihitiya Pedro, João xoaha, — Enore nahalakoita nikreta wiso wityotya. Xoana xiyema kore wisaona, Enore xema kore? nexaha. <sup>20</sup> — Maisaiya atyo aliyakere wahalakijita wiraine koxaka wasemehenere, wiyaiyehenere tahi.

<sup>21</sup> Hatyaoseta judeunæ nityohalitiranae kinatyaxa iraeha ekakoaha amairakissene maheta. Hatyaoseta axikahenahitahene hoka xanehenahitaha. Maisaiya aliyakere xekohasetinæ iniyalahare mokahitahene, tyotya halitinæ Enore kakoa ihalaharhitere hiyeta, waiyexe kaotyakitere hiyeta. <sup>22</sup> Hatyo kaxaiyatelikisakeheteñenere 40-terehokoane jiyarehena tyaonita.

*Jesus Xema Maniya Tyaponiterenæ Niraexala Tahi*

<sup>23</sup> Halakisaha Pedro, João xoaha hoka xanehenahitaha. Kaokehahitaha hahihenahenæ ana hoka xakaihakatyaha ihiyeha sacerdotenæ xekohasenæ, judeunæ nityohalitiranae xoaha iraihenahere ekakoaha tahi.

<sup>24</sup> Semaha exakaihakalaha nikarexe hoka tyotyaha haxawalita iraexahenaha Enore hiye, nehenaha: — Xekohaseti, Hiso atyo tyotya hisoma enokoa, waikoa, one kaloxere. Exahe tyotya xoalini harenæ tyaponitera harenæ enakoa hoka. <sup>25</sup> Hiso atyo Isekohaliti Waiyexe koamaniyata hirae hiwakanehare Davi wahetakomaniyere hiye hoka exakere irae!

Xoana hoka majudeuneharenæ judeu hare hotyalinae eharahitaha? Xoana hoka nikare hatyaharahitaha?

<sup>26</sup> Xekohasetinæ tyotyaha xalijinhare, kahinaetyakakoaha hoka kahalakoahareha Enore, Kalorexe Aohenere xoaha kakoa.

<sup>27</sup> — Aliterexe ahohisakoatyakakoaha Herodes, Pôncio Pilatos harenae, exahe majude-uneharenae, Israel hotyalinae xoahanae ahohisakoatyakakoaha hoka kahalakoahareha Kalorexe Haohenere Jesus kakoa maheta. <sup>28</sup> Ahohisakoatyakakoaha tyomaha maheta toahiya haokitere akereta kawenatyaka maheta.

<sup>29</sup> — Xekohaseti, xalijinihahrenahere wihiye hiyaiya kalikini. Wimamairanehare hamohena hoka wiyakai hiraine halitinae hiye. <sup>30</sup> Hokakitinae hare haiyatelekihete-hena, exahe xoalini harenae maomakahare hoka hisomehena Hiwakanehare waiyexe Jesus nexare hiyeta hoka waiyaha maheta.

<sup>31</sup> Halakisaha taita hairaexalaha hoka hohisakoahitereha akiti tatakoa ekakoareha hoka tyotyaha Isekohaliti Waiyexe kaxaihakoretyahene. Hatyohekota iraiti xakai-henahitiyaha hamamairaneneha kakoa.

### *Tyotya Irakakakoahitaha Haxiyeharenaeha Tahi*

<sup>32</sup> Hatyo xowaka tyotya tyakekohenerenae hakhoa exahekolanaeha tyona eno-manaha hoka nikare makere ahekotyahitaha. Haxiyeharenaeha maisa aokareha hao-mana hoka hahinaeharenaiha ana irakahitene maxiyeahareharenae ana. <sup>33</sup> Kalore iyateliti kakoa Jesus niraine kakoarenae xakaihaha Xekohaseti Jesus kasehetehenere tahi akiti. Enore kalore waiye mokahene. <sup>34</sup> Maisa atyo xala harenae enekoniha nakere, maimahiro tyaonare. Kawaikohererena hawaikohera betetita, kahanerena hoka betetyahitaha hahanaha hoka exaimane olo <sup>35</sup> isahita Jesus niraine kakoarenae ana. Exowakerota xala xamani nakita maimahirota hare hoka hatyo olo ijita enomanaha aokahitere akereta. <sup>36</sup> Nikare tehitiya José nexarexe betetya hakoa hawaikohera hoka xane exaimane isa Jesus niraine kakoarenae ana. José atyo Levi hotyali, Chipre nalitare. <sup>37</sup> Hoka Jesus niraine kakoarenae “Barnabé”, nita exaokaka. Nere atyo: “Wiyaxaihalahalinikisase”.

## 5

### *Ananias Safira Xoaha Tahi*

<sup>1</sup> Hatya haliti Ananias nexarexe Safira nexalolo kakoa tyaonita. Kawaikoherere hoka hawaikohera betetya. <sup>2</sup> Xakore hoka holini taita isa Jesus niraene kakoarenae ana, holini exaimane kakoa tyaona. Koxaka Safira ana hatyo tahi waiyekehalaka.

<sup>3</sup> Hatyaoseta Pedro nexa Ananias hiye: — Xoana hoka Tihanare koamaniya hisaona? Xoana hoka Isekohaliti Waiyexe hamaoseraty? Xoana hoka holini kakoa hisaona, waikohe habetehenere xaimane kakoa? <sup>4</sup> Himabeteraharenatatere waikohe xowaka hiwaikohera terota, exahe habetetene hoka exaimane holoxa terota. Xoana hoka nikare hisaona? Maisa haliti xini hamaoseraty, Enore atyo hamaoseraty.

<sup>5</sup> Ananias nikare iraiti sema taita hoka exoa, waini. Tyotyaha semehenerenae hatyo akiti mairaha. <sup>6</sup> Hatyaoseta tyoa haiyanae xoimahalitinae hoka olahisetyahene, kolatyahene hoka xane fityahene.

<sup>7</sup> Ekamane najikinita wahasehena hoka exanityo tyoa hikoa, maisa haiyanene kamane semare hekoti.

<sup>8</sup> Exowakerota Pedro axene: — Hiyakaihena nohiye xiwaikohera hexanene betehenere xaimane: Xoana nikarexe xaresebetya exaimane?

— Há, nikarexe — nexa.

<sup>9</sup> Pedro nihitiya ihiye: — Xoana hoka hexanene kakoa nikare xahasakaharetya Enore Nisekohare? Hiyaiya, owehetehena xoimahalitinae hexanene haxaferaha hekota hoka kolahenaha tehitiyaite hiso.

<sup>10</sup> Nixa takita hoka exoa waikoa waini Pedro kinoli haliya. Hatyaoseta xoimahalitinae hikoahenahitehena xakore, waiyehenaha atyo, owene ekamane tyaonita hoka kolahenahitiyahene exanene xawatyakala nahalakoita fehenahitiyahene. <sup>11</sup> Tyotyaha iraiti tyakekoterena, exahe haiyanae hoka semaha etahi akiti hoka kalore mairaha.

### *Maomakahare Waiyexe Tyomahitaha Kaihalaharetyakere*

<sup>12</sup> Hatyo najikinita Jesus niraine kakoarenai kahare xoalini hare maomakahare tyomaha halitinae koni, hokakitinae hare aiyatelekihenahitaha. Tyotyaha hohisakoahitaha Iraexatyakalati Hana tyaisera kilihi Salomão nómane aokahitere nali. <sup>13</sup> Haiyanae atyo maisa enekoniha tyaonaha aokowiyeha, mairahitaha hoka. Xakore atyo hoka waiye atyo iraetaha etahiha akiti.

<sup>14</sup> Ekakoita hisoakaha tyakekoahitaha iraiti, enanae ohironae harenae hoka kahareha tyaonaha.

<sup>15</sup> Hatyo hokakitinae aiyatelekihenahititere hiyeta nali tyaoniterenae hahokakiti-ranaeha kolatayaha ahotiaho kilihi mokahitaha exetolisoakalaha kakoita Pedro naheta, jiyeheha hoka iniyakotini hekoti kaokaha ihiyeha hoka waiyehenahitaha aokahitaha hoka. <sup>16</sup> Hisoaka haliti tyoita Jerusalém haliyatarenae, hahokakitiranaeha kolatayahitaha xoaha enomanaha. Exahe isekohaliti iniyalahare kamilakoreranae hare nolokahitaha enomanaha hoka tyotya aiyatelekihenahitene.

#### *Iraiti Xakaisaseharenae Kairawaiyakita*

<sup>17</sup> Hatyaoseta sacerdotenae xekohase, tyotya ihinaeharenae xoaha haokoawahareneha, ehareha saduceunae kakoita Jesus niraine kakoarenai hiye. <sup>18</sup> Ehareha Jesus niraine kakoarenai hiye hoka otokahene hoka mokahene berexoako.

<sup>19</sup> Berexoako xakore mokahene hoka hatyo xatinita anjo enokoatare exoa hoka majiholaheta berexo hana ekakoareha, aehikoahenahitene menane aka hoka nexa ihiyeha: <sup>20</sup> — Xiyane Iraexatyakalati Hana nali hoka halitinae hiye xiraihitiya Jesus maniya nawenatyaka akiti — nexa. <sup>21</sup> Tyakekoha hoka kamaetali weta xane isoaha Iraexatyakalati Hanako hoka aotyakihenahitiya.

Hatyaoseta sacerdotenae xekohase hahinaeharenae kakoa hohisakoaha, kalorexenae makere. Israel hotyalinae nityohalitiranae tehitija kaexakatyaha hoka tya kaokaha enomanaha. Ahohisakoatyakakoaha hoka axikatyaha sorarenae Pedro, João xoaha nolokaha maheta berexoakota.

<sup>22</sup> Xane kaokaha berexo hana nali hoka xane xakore waiyaha enako, maisa waiyehenahitita Jesus niraine kakoarenai. Hatyaoseta maisa nali aka hoka haikoahenahitaha hoka nexaha kalorexenae hiye: <sup>23</sup> — Wiyane wahikoa berexotyakalati nitini ana. Waiye jihotyakere, owene ekaxaikotyasesnae tyaonita, kaxaikota hati. Wamajiholatene hoka wisoa xakore enako hoka maisa xala hare enako wiyaiyita.

<sup>24</sup> Semahene sacerdotenae xekohasenae, Iraexatyakalati Hana kaxaikotyaseharenae xekohase harenae hoka maisa xoare nexa kakanasahitaha. Ahekotyahitaha, Jesus niraine kakoarenai nikare tyaonaha hoka.

<sup>25</sup> Hatyaoseta hatya tya kaoka enomanaha hoka nehena ihiyeha: — Xasemehena, etake hinamahare haliti xaberexohenere Iraexatyakalati Hana nali tyaonita, aotyakijita halitinae.

<sup>26</sup> Hatyaoseta Iraexatyakalati Hana kaxaikotyaseharenae xekohase xane sorarenae kakoa Iraexatyakalati Hana xeta hoka noloka Jesus niraine kakoarenai. Maisa atyo iniyalahare mokahitene, waiya aliya hoka halitinae sehali kakoa mokotyahene aokaha hoka.

<sup>27</sup> Nolohenahitene, xane kaokehenehitaha ekakoaha kalorexenae nali. Hatyaoseta sacerdotenae xekohase nexa: <sup>28</sup> — Maisa xiyaotyakira waxakoanehetita etake haliti nexare kakoa. Hiyaoreka xiyaotyakira xaore tyotya Jerusalém koa. Exahe hoka wiso waisene xaokita.

<sup>29</sup> Hatyaoseta Pedro, haiyanae Jesus niraine kakoarenai hare nehenaha: — Enore niraine xema atyoite wisaona, maisaiya atyo halitinae niraine xema wisaonita.

<sup>30</sup> Wahetakomaniyerenae nEnorexa ekasekiheta Jesus, etake xaisehenerene najikinita.

<sup>31</sup> Ekasekihetene hoka hafihini maniya mokene Kalorexe maheta. Israel hotyalinae iniyalahare háomaneha halakisaha hoka kaxemaisatyakeheta iniyalahare enómaneha maheta. <sup>32</sup> Wiso atyo ewaiyasehare terotere, Isekohaliti Waiyexe tehitija ewaiyasehare. Xala xamani atyo tyaonita Enore xema maniya hoka ijita atyo Haisekohare enomanaha.

<sup>33</sup> Hatyaoseta inityohalitiranai semaha iniraineha hoka masakare ehareha ihiyeha, kasani aisahene aokowiha. <sup>34</sup> Xakore hoka hatya enekonitareha tityoa, Gamaliel nexarexe. Fariseu, waiyore Moisés xaotyakira kakoa. Tyotyaha tyakekoahitere hoka nehena ihiyeha: — Xaehikoatyahene ininae menane aka.

<sup>35</sup> Aehikoatyahene hoka hatyaoseta nehena: — Xasemehena, Israel hotyalinae. Xiyaira, waiya aliya hoka exe hinamanae xoanani xamoka.

<sup>36</sup> — Toahiyaseta hatya haliti kaotyaka Teudas nexarexe, kalorexe aokowita. Waiyore iraeta hoka 400-hare haliti tyona exema maniya. Hatyohekota kaxaisaka hoka exema tyaconiterenae xaorehenahitaha tyotyaha hoka kamiyane. <sup>37</sup> Hatyo najikinita nikare hatya kaotyakihitiya Judas nexarexe, Galiléia yere, halitinae kaxihatytakitere xowakiya. Nikare kahare haliti tehitija tyona exema. Waini enonyahitaha hoka xaore exema tyaconiterenae.

<sup>38</sup> — Hiyeta hoka awa atyo xoalini hare xisoma exe halitinae kakoa. Xahalaisahene hoka xanehenahitaha. Xiyaiya, exe hateniti atyo ite haliti xahekolita, haliti hateneta hoka maiyareheta. <sup>39</sup> Hoka Enore xaokalaiya atyo hoka maisa aliyakere xemaisahititene, waiya aliya hoka Enore kakoa xikahalakoahare — nexa.

### *Mokonasetyaha Jesus Niraene Kakoarenæ*

(João 15.18-21; Atos 14.21-22; 1 Coríntios 4.9-13; Filipenses 1.28-30)

<sup>40</sup> Nexa ihiyeha hoka tyakekoha iniraene. Xakore hoka kawihenahitaha Jesus niraine kakoarenai hoka isoahenahitaha. Hatyaoseta mokonasetyahene hoka nehenaha: — Waiyehenaira xiyakai Jesus tahi akiti — nexaha ihiyeha hoka hatyo najikinita halaki-henahitene.

<sup>41</sup> Halakisahene hoka Jesus niraine kakoarenai hikoahenahita enonyahita, xane-henahitaha. Mokohekoatyahene xakore hoka ihalahare hikoahenahitaha. — Waiye kaisere. Hiyaiya, Jesus hinaenai terota wiso hoka nikare mokahitaha wiso — nexaha.

<sup>42</sup> Hatyohekota ferakiti nihatytaka Iraexatyakalati Hanako heko aotyakisahitaha halitinae, exahe ehananaihako nihatytaka aotyakisahene minita Jesus Enore Kalorexe Aohenere tahi akiti.

## 6

### *Sete Harenæ Tyaona Iraiti Xakaisaharenæ Xema*

<sup>1</sup> Hatyohekota wahehena hoka ekakoita haliti kaharehena tyaonita Jesus xema maniya. Hatyohekota nehenaha hebreunae xako iraiterena hiye Grego xako iraiterena: — Maisa waiyeta womana winekonitalonae maiyanenehalonae nakairati maxekakene.

<sup>2</sup> Hatyohekota 12-hare Jesus niraine kakoarenai ahohisakoatyaha iraiti tyakekoterenae hoka nehenaha: — Maisaiya ehekoreta xini wahalakisa Enore niraine xakaisaka hoka nakairati hiye wisaona hoka. <sup>3</sup> Kala xinekonitare 7-hare xamoka waiyexeharexe, waiyorexe, Isekohaliti Waiyexe kaxaikonehare hoka exe hateniti wahalakisa enomanaha, wihinaeharenæ. <sup>4</sup> Hoka wiso atyoite wiraexatita, Enore niraine kakoa waotyakijita takita — nexaha.

<sup>5</sup> Tyotyaha Jesus niraine kakoarenai niraene tyakekoha. Hatyaoseta mokaha Estêvão, Filipe, Prócoro, Nicanor, Timon, Pármenas, Nicolau harenæ. Nicolau atyo Antioquia tare. Majudeunehare xakore hoka koxaka judeunae xaotyakira xema tyaonita. Estêvão atyo iraiti tyakekota kaiserehare, Isekohaliti Waiyexe kaxaihakoretitene.

<sup>6</sup> Hatyaoseta xane hotikisahene Jesus niraine kakoarenai ana hoka hakaheha mokaha eseriha heno hoka iraexatyaha etahi akiti waiye hakaha maheta.

<sup>7</sup> Hekota Enore niraine xaoreta, hakakoare semaha. Ekakoita Jesus maniya tyaoniterenae Jerusalém nali hisoaka kaisereharehena tyaonahitaha. Kahare sacerdotenai tehitija tyakekoahitaha hoka tyaonahitaha Jesus xema maniya.

*Estêvão Berexotyaha Aokowitzaha*

<sup>8</sup> Enore kahinaetita Estêvão, hoka waiyore iraeta. Kahare xoalini hare maomakahare tyomita halitinae koni, hokakitinae hare aiyatelikihitita enomanaha.

<sup>9</sup> Xakore hoka haiyanæ ana maisa waiyeta hoka ehareha Estêvão hiye. Xahoisakoatyakalati “Mawakaharenaharenæ xahohisakoatyakala hana” aokahitere nalitarenai. Hatyo judeunae Cirene, Alexandria nalita tyohenerenæ. Hatyonai, exahe haiyanæ judeunai Cilícia koatarenai, Ásia nali koatarenæ xoaha kahalakoahare Estêvão kakoa hoka kinatyaxa iraeha ekakoa. <sup>10</sup> Xakore hoka maisa jiyahaotyahita Estêvão. Isekohaliti Waiyexe kaxaehakoretitene hoka jiyahaotyahene tyotya.

<sup>11</sup> Hatyaoseta haiyaharenæ bakatyaha hoka nexaha maheta: — Wasema exe haliti niraene iniyalahare Enore, Moisés xoaha xaokaka.

<sup>12</sup> Hatyaoseta xane iraharetyahene hoka halitinae, judeu xaotyakiraho kakoa waiyoreterenæ, inityohalitiranæ harenæ ehareha makere Estêvão hiye hoka otokahene, kalorexenæ nahalakoa kolatyahene.

<sup>13</sup> Haiyanæ iniraeharetyase maheta mokaha hoka exakere maoserahenaha: — Exe haliti maisa iniyalahare hairaine halakisare wiraexatyakala hana tahi akiti, exahe Moisés xaotyakiraho akiti hoka. <sup>14</sup> Exakere iniraine wasemita: “Jesus Nazaré yere ite mawenekoaretya hati wiraexatyakala hana, exahe Moisés iraitiya halakihenere womana hoka hahekore moka” — nexaha.

<sup>15</sup> Hatyaoseta tyotya hatyoako kalorexe tyokiterenæ wahakotyaha waiye Estêvão ana, waiyehenaha atyo itiho ana. Motya atyo anjo tiho.

## 7

### *Estêvão Irae Iniraeneha Nahalakoa*

<sup>1</sup> Hatyaoseta sacerdotenæ xekohasehare axehena Estêvão: — Xoana aliterexe iraetaha hitahi?

<sup>2</sup> Hoka nehena Estêvão: — Xasemehena, abá xoimanae, nohinaeharenæ. Enore werokakoa tyaonitere tyaonitakeyaka wahetakomaniyere Abraão ana tyaonitatere Mesopotâmia nali xowakiya, Harã nali mawenaneharetatere xowaka. <sup>3</sup> Enore nexa ihiye: “Hakikisoahena ali hiwaikoherata hihinaeharenæ nonitata. Hiyanehena waikohe nahotikihenere koa homana xeta”.

<sup>4</sup> — Hoka Caldeunæ waikohera nalita xane, xane tyaona wenakalati Harã nali. Hatyaoseta enexe kamane najikini maniya Enore noloka Abraão kalikini ali xisaonitere nali. <sup>5</sup> Xakore hoka maisa Abraão ana ini hekoti waikohe ijita. Hoka nexa atyo Enore ihiye: “Ekakoita ite exe waikohe homanere tyaona, exahe hijikolaharenæ anere hoka waikohe tyaona”, nexa ihiye. Enore iraitere Abraão kakoa xowaka maisa kaisaniye.

<sup>6</sup> — Exakere Abraão hiye irai: “Hijikolaharenæ ite xane tyaonaha hakitiya. Mawaiyahare hotyali, wakahare akere ite tyaonaha. Iniyalahare ite kaxomokakaha waha aka 400-terehokoane”. <sup>7</sup> Enore nehitija: “Hatyo najikinita iniyalahare ite namoka hijikolaharenæ iniyalahare mohenere, wakahare mohenere. Hatyaoseta ite haikohahenahitaha hoka ali tyaohenaha nokoa maniye”.

<sup>8</sup> — Hatyaoseta nehena Abraão hiye: “Maika nomaniye hisaona hoka homanere milihe haikotya hihanako tyaoniterenæ kakoa”, nexa ihiye. Hatyaoseta Isaque kaisani hoka 8-ferakenehena hoka enomanere milihe aikotya. Nikare Isaque Jacó kaisani hoka enomanere milihe aikotya. Nikare tehitija Jacó 12-hare kaisani hoka enomanere milihe aikotya.

<sup>9</sup> Estêvão heko iraeta: — José hiye okoawahare enaxenanenæ wahetakomaniyereharenæ hoka betetyahene Egito nali wakahare tyaona maheta. Xakore hoka Enore atyo kax- aikotene <sup>10</sup> hoka emaisatya enonita examaikoharene, exahe enawenane howitiharexe. Faraó, kalorexe Egito naliyere, José waiyehenere xowaka Enore waiyexe waiyoliniti isa enomana hoka Faraó awaiyetene hoka kalorexe mokene hahanako.

<sup>11</sup> — Hatyaoseta Egito nali Canaã nali nakiti tyaona hoka maisa xoare kanakairi- henahitere wahetakomaniyerenæ. <sup>12</sup> Nakahitaha hoka ekakoita semehena atyo Jacó,

Egitó nali nakairati hoka hetatiye axikahena haisaninae wahetakomaniyerenae Egito nali xeta nakairati iyaha maheta. <sup>13</sup> Hatyota xanehenahitiyaha hoka José awaiyekehalahakaharetyoa haxenanenae ana. Hatyaoseta xekohaseti Faraó ana waiyekehala ihinaeharenae tahi. <sup>14</sup> Hatyaoseta José kawisa hanexe Jacó, tyotyaha ihinaeharenae Egito nali xeta. Hatyo xowakiya Jacó hotyali 75-hare ehohisakoaneha. <sup>15</sup> Jacó xane tyaona Egito nali hoka hatyo nali waini, wahetakomaniyereharenae harenai. <sup>16</sup> Wainiha najikini kolahenahitene Siquém nali xawatyakalati nitinako mohenahititaha, enatyokoeha Abraão niyane Emor jikolaharenae nonitata ako.

<sup>17</sup> — Hatyo hekota Abraão ana Enore afetalatitete terehokoane okoi hikoahena: “Egitó nalite nanoloheta xiso”, nitere aose xane hikoahena hoka hisoakehena Jacó hotyali tyaonita Egito nali. <sup>18</sup> Hatyaoseta hatya tyaohitiya xekohaseti Egito nali, maisa José waiyasehare xini. <sup>19</sup> Hatyo xekohaseti waiyore wahetakomaniyerenae kakoa hoka xalijiniharehena exahitaha, exahe ityani mokosenaiha xawatyaka aokita ihiyeha wainiha maheta. <sup>20</sup> Hatyo xowakiya Moisés tyaona, waiye mokose. Hanamali kaimare inityo, enexe hatyako taita kaxaikotahene. <sup>21</sup> Hatyaoseta halakisahene kanowalise akota, maisa aliyakere xoana mokahene xaka hoka. Hoka Faraó ityani waiyene hoka anaetene haisani kaiserehare akere. <sup>22</sup> Hiyeta hoka Moisés waiyore xoalini hare kakoa Egito yerenae xaotyakira akiti kakoa. Exahe xoalini hare tyoma aokowihena hoka waiyore tyomita, iraeta xoaha.

<sup>23</sup> — Kala Moisés ekakoita 40-wanonehena hoka xane hahinaeharenae Israel hotyali-nae waiya aokowita. <sup>24</sup> Xane hoka waiyehena, owene atyo ihinaehare Egito yere maisa waiye xini mokita. Hatyaoseta kaxemeretya hahinaehare hoka aisa Egito yere. <sup>25</sup> Motya atyoala Moisés xahekola hiye semahitaha exaihako maniyata Enore niyaneheta Israel yerenae aokita Egito nalita. Xakore hoka maisa atyo waiyekehalakere enomanaha.

<sup>26</sup> — Hatyota kamaetali hoka Moisés waiyehena atyo, hinamahare ihinaehare Israel yerenae makere atyo owene mokotyakakoita. Hatyaoseta xane kaoka enomanaha hoka watyalihenahene. “Xoana hoka nikareta xiso, Israel yerenae makere xiso hoka?” nexa. <sup>27</sup> Hoka masakare xalijiniharetere hahinaehare xahita herawaseharetene hoka ekoaxatya enomana: “Xoana hoka hiwatiali wiso? wiyekehase kore hiso? <sup>28</sup> Xoana haisakore natyo haokowita kafaka haijitere Egito yere akere?” nexa. <sup>29</sup> Sema Moisés hatyo haxaisane tahi hoka tekoaheta, xane tyaona Midiā koa nali. Nali hinama mokose ityani tyaona.

<sup>30</sup> — Hatyo nali 40-terehokoanehena Moisés tyaonita hoka anjo kaotyaka enomana atya mokose kiritere koni maharexakiti Sinai tyairiya nali. <sup>31</sup> Moisés wahakotya enomana xakore, maisa kera tyotere hoka: “Xoanere kaisere?” nexa, xane ehaliya kaoka enomana waiye waiya maheta.

— Hatyaoseta Enore niraine semehena: <sup>32</sup> “Natyo atyo hahetakomaniyerenae Abraão, Isaque, Jacó xoaha nEnorexa”. Nexa hoka Moisés tatakoa maira, maisa aliyakere wahakotya xaka enomana.

<sup>33</sup> — Hatyaoseta Enore nexa ihiye: “Haitoakihena hikijitini. Ali hatyahakitere koa atyo notyaonita hoka nikareta natyo. <sup>34</sup> Nowaiyita nokaxaikoni hotyalinae makawatini Egito nali, ewaolitiniha. Hiyeta notyoa niyehenahitene maheta hatyo nalita. Naxikatyia ite hiso kalikini Egito xeta”.

<sup>35</sup> — Hatyo Moisés Israel hotyalinae maxawaiyerehenereta: “Xoana hoka hiwatiali wiso? wiyekehase kore hiso?” Xakore hoka Enore atyo mokene xekohaseti mokene iyehenahitene maheta, anjo atya takoitere koni kaotyakehenere enomana kahinaetene hoka. <sup>36</sup> Hatyo Moisés atyo Israel yerenae iyeheta Egito nalita. Kahare xoalini harenae waiyexe maomakahare tyoma, hatyo waikohe nali, maharexakahare nali, one xotyaxere hare nali, 40-terehokoane.

<sup>37</sup> — Hatyo Moisés ta nexa Israel yerenai hiye: “Enore ite hatya iraiti xakaisasehare xinekonita moka natyo akereta. Maikaite xinekonita kaotyaka xomana”, nexa. <sup>38</sup> Hatyo

Moisés tyaonita hahotalita Israel yerenae kakoa maharexakiti, nali tyaonita wahetakomaniyerenae kakoa. Exahe anjo iraitere ekakoa tyairi Sinai nali kakoa hoka. Hatyo ana atyo kaxekaka iraiti xairatyaka Enore niraine waiyexe womana.

<sup>39</sup> — Xakore hoka wahetakomaniyerenae maisa Moisés xaotyakira xema tyaona aokowiye, kasani haikoahenahita aokowiyahita Egito nali xeta. <sup>40</sup> Hoka nexaha Arão hiye: “Hisoma womana wenorexanae hoka hatyo enorenae xaneha waheta maniya. Kala xoana xamani tyaona Moisés iyehetehenere wiso Egito nalita. Maisa waiyekehalakere womana”.

<sup>41</sup> — Hatyaoseta tyomaha haenorexaha maheta bowi mokose akerehare hoka xoalini hare aisaha hoka fetatya enomana. Hatyo najikinita tyomaha hisehaliti hatyo haenorexaha tyomehenahere kakoa ihalahareha maheta. <sup>42</sup> Hatyo hiyeta Enore kikisoa enonyahitaha, halakisahene. Halakisahene, enokoa xorese tyaoniterenae aokaha haenorexaha maheta. Hiyaiya, owene kaxairatyaka:

Xasemehena, Israel hotyalinae: maisa nomani xini xaisa kirakahare hoka xafetatya 40-terehokoane xisaohenere nase maharexakiti nali.

<sup>43</sup> Xakolatya xenorexa Moloque hanalise. Exahe Renfā xoresera xisoma hoka xakolatya xenorexa maheta, hatyohare xenorexa xaokita. Hatyoharenae xisoma xisaona exemaha maheta. Hatyohare hiyeta ite naxanikisa xiso Babilônia xaihako maniya.

<sup>44</sup> — Hatirise kakoare wahetakomaniyerenae tyaonita maharexakiti nali. “Nikarexe hisoma”, nexo Enore Moisés hiye aotyakijitene, hoka hatyo hotikijitere akere tyomene.

<sup>45</sup> Hatirise kakoarehena wahetakomaniyerenae ityaninai hoka Josué kakoa xane Canaã koa isoahenaha hoka kolatyahene. Kaokaha hoka tyaonaha hatyo Canaã waikoherakoa, hawaikohera aokahene. Nali tyaoniterenae Enore kikisa enonyahitaha.

— Davi tyaohenere xowakiya hekotata hatyo hatirise tyaonita. <sup>46</sup> Enore awaitita Davi hoka Davi hati tyoma enomana aokowi, Jacó hotyali nEnorexa ana. <sup>47</sup> Xakore hoka Salomão atyo tyoma hatyo hati Iraexatyakalati Hana Enore anere maheta.

<sup>48</sup> — Hoka Enore atyo masakare kalorexe kaiserehare hoka maisaiya aliyakere haliti nômane ako tyaonita, iraiti xakaisasehare iraehenere akereta:

<sup>49</sup> Enokoa atyo nokahakali, nexo Enore. Hoka waikoa atyo nokiji namokita. Aliyakereya xisoma hati nomani? Aliyakereya xisoma nomani hoka hatyo nali notyaohena?

<sup>50</sup> Xoana maisa natyo xini tyotya xoalini hare notyoma?

<sup>51</sup> Hatyaoseta nexo Estêvão miyatya haxakaini: — Kaxiyani ximahakaisere, xikinatere xaokowita. Ximatanakoakohare hoka maisa Enore niraine xasemare xaokowiye. Xahetakomaniyerenae akereta xisaonita, Isekohaliti Waiyexe kakoa xikalakohahareta.

<sup>52</sup> Hiyaiya, xahetakomaniyereharenae iraiti xakaisaseharenae xahita xalijinhahahareta, exahe hoka aisahitaha Enore niraine xakaisaseharenae, Waiyexe Wakahare tyoanene tahi xakaiterenae. Exahe xiso atyo kalini xamatawatya hoka xaisa hatyo Iniyalahare Maomanehare — nexo.

<sup>53</sup> — Anjo hiyeta xakore kaotyaka xomana xaotyakisati hoka maisa xisaonare exema — nexo Estêvão miyatya.

### *Estêvão Kamane Tahi*

<sup>54</sup> Hatyaoseta hatyo inityohalitiranae semaha Estêvão niraine hoka masakare ehareha ihiye, haxehareneha haikoliha hiye, “Karai, karai, karai”, nexaha mokaha exahita.

<sup>55</sup> Hoka Isekohaliti Waiyexe kaxaihakoretya Estêvão hoka eno maniya wahakotya. Waiyehena atyo, owene Enore tyaonitereko werokita. Waiya tehitija Jesus, owene tityoita Enore fihini maniya ehaliyita. <sup>56</sup> Hatyaoseta nehena: — Xiyaiyehena! Owene enokoa totakore tyaona hoka nowaiya Haliti Ityani. Tityoita Enore fihini maniya.

<sup>57</sup> Nexo hoka talatya, jihotyaha hatanakoako. Hatyaoseta kawiyatayha toli kinatyaxa hoka tyotyaha jiyyah Estêvão ana. <sup>58</sup> Hatyohekota nolokasekoatyahene, hikoaha menane aka ekakoa, xaneha wenakalati nonitata haware ekakoa hoka sehalli kakoa mokotyahene.

Iniraeharetyasenae Saulo nexarexe xoimahaliti ana isaha haimanasenaiha enomana kaxaikone maheta.

<sup>59</sup> Mokotyahiterene nase Estêvão kawihena: — Xekohaseti Jesus, hiyeheta nisekohare.

<sup>60</sup> Hatyo najikinita hakaoli kakoa tyoka hoka kawiyatya kinatyaxa: — Xekohaseti, awaira atyo iniyalahare hamohenahene exe iniyalahare mohenahere natyo xemere.

Nexa taita hoka waini. Hoka Saulo hiye waiye kaokene exaisaka.

## 8

### *Saulo Kahalakoahareta Jesus Koamaniya Nawenatyaseharenai Kakoa*

<sup>1</sup> Kahenehare tyaconahenaha hatyo xowakita Jesus xema maniya tyaoniterenae xahita Jerusalém nali. Tyotya tyakekoterenai xahita xalijinihareha, aekoakisahene hoka xaoreha. Judéia koa Samaria koa xoaha xaneha, xaoreha. Jesus niraine kakoarenai taita heko tyaonita Jerusalém nali. <sup>2</sup> Hoka haiyanæ haliti waiyexeharexenae fitya Estêvão, kahare tiyaha ekamane hiyeta.

<sup>3</sup> Xakore hoka Saulo Jesus maniya tyaoniterenae mawenekoaretya aokowi. Xane ijoita hatinae nihatyaka, nolokehekoaita enanae, ohironae hare, xane xawatyahitene berexo ako. <sup>4</sup> Hoka hatyo xaoreterenae xane xakaihakatyahitaha iraiti tyotya wenakalatinæ nihatyaka koa.

### *Iraiti Waiyexe Samaria Nali*

<sup>5</sup> Hatyaoseta Filipe xane wenakalati Samaria, xakaihakaty Enore Kalorexe Aohenere tahi akiti nali tyaoniterenae hiye. <sup>6</sup> Xakaihakaty ihiyeha hoka waiye semaxemathyahitaha Filipe niraine. Tyotyaha semahitaha, waiyahitaha xoalini harenæ maomakaharenæ enómane. <sup>7</sup> Isekohaliti iniyalahare kamilakoriterenæ nonita aihikoahitita. Hikoahetehena enonyahitaha hoka awerahalikikoatyahitene. Kahare mawaiyenetonanenhænae, maitonanenhænae hare aiyatelikheta. <sup>8</sup> Nikare hoka tyotyaha ihalaharetaha hatyo wenakalati nali.

<sup>9</sup> Nali tyaonita hatya haliti Simão nexarexe. Haholitaharexe atyo hoka xoalini hare tyomita. Wahakiyehena nikare tyaonita hoka hakaharetya Samaria yerenæ mokita. Kalorexe aokowita <sup>10</sup> hoka tyotya nali tyaoniterenæ waiye semaxemathyahitinae, iraihena hoka waiye tyakekoahitene. — Exe haliti Enore niyatere kakoare kaiserehare. Kalorexe iyateliti aokahitere kakoare — nexahitaha. <sup>11</sup> Wahehena nikare tyaonita, haholitahareta hoka tyakekoahitene, hakaharetya mokahitene, xoalini hare tyomehena hoka.

<sup>12</sup> Xakore hoka Filipe xakaini Iraiti Waiyexe Enore koamaniya nawenatyaka tahi tyakekoha hoka kabatixatyakaha Jesus nexare kakoa, enanae exahe ohironae tehituya hoka.

<sup>13</sup> Hatyaoseta hatyo Simão nikare tehituya tyakeko hoka kabatixatyaka. Hoka Filipe kaxaikota hoka kahare xoalini hare maomakahare, hokakitinae hare kaxaiyatelikisakihititere waiya hoka hakaharetya.

<sup>14</sup> Hatyaoseta Jerusalém nali Jesus niraine kakoarenai tyaoniterenæ semaha wenakalati Samaria tyaoniterenæ nawenane Enore koamaniya hoka hatyo hiyeta Pedro, João xoaha axikatyaha nali xeta. <sup>15</sup> Hatyo hinamanae xane kaokaha hoka iraexatyaha Samaria yerenæ tahi, Isekohaliti Waiyexe kaoka tyakekoterenæ ana maheta. <sup>16</sup> Hatyo xowaka maisa xala harenæ ana exoahenere Isekohaliti Waiyexe. Koxaka taita atyo kabatixatyakaha Jesus nexare kakoa. <sup>17</sup> Hatyaoseta Pedro, João xoaha eseriha heno mokaha hakaheha hoka Isekohaliti Waiyexe exoa enomanaha.

<sup>18</sup> Simão waiya Jesus niraine kakoarenai xekaokakira hakaheha ihiyeha hoka Isekohaliti Waiyexe kaokene hatyo halitinae ana. Hoka hatyo hiyeta aimatya olo Pedro, João xoaha ana <sup>19</sup> hoka nehena: — Owene olo hoka xisa nomani hatyo iyateliti hoka nikare nekaokakihena nokahe hatya hiye hoka Isekohaliti Waiyexe kaoka enomanaha.

<sup>20</sup> Hatyaoseta Pedro nehena ihiye: — Maika Enore axikaty hiso, holoxa xoaha irikati koni! <sup>21</sup> Maisaiya aliyakere wihatene koni hahakita. Hiyaiya, hiyahekola maisa

waiyexe Enore haoti. <sup>22</sup> Hahalakihena exe hiyahekola iniyalahare hoka Enore hiye hiraexatya hoka maotyaoneheta iniyalahare hiyahekola. <sup>23</sup> Nowaiyita hiso, masakare hokoawahareta. Hokoawaharene atyo motya nikanati tihene, exahe iniyalahare hománe atyo tokita hiso.

<sup>24</sup> Hatyaoseta Simão nehena Pedro João xoaha hiye: — Xiraexatya Enore hiye notahi akiti hoka maisa nikare notyaonita exe xiraitere akere.

<sup>25</sup> Hatyaoseta Pedro, João xoaha haikoahenahitaha Jerusalém nali xeta haxakainiha Enore niraine najikinita. Xanehenahitaha ahotyaho hoka xakaihakahohenahititaha Iraiti Waiyexe Samaria koa tyaponiterenae hiye.

#### *Filipe Ahalakoaty Kaxaiko Akatyatiye*

<sup>26</sup> Hatyaoseta anjo Enore nalitare nexa Filipe hiye: — Haxakaiharettyoahena hoka hiyane Jerusalém naho Gaza xeta — nexa. Hatyo naho komita maisa kahare haliti jiyare.

<sup>27</sup> Nexa hoka Filipe xakaiharettyoa hoka xane hatyo maniya. Ahotyaho xaneta ene hoka ahalakoatyatya hatya haliti kaxaiko akatyatiye, Etiópiatare. Haikoahitita hawaikohera xeta. Hatyo haliti komita ene kalorexe tyaponita. Etiópia yerenae xekohasero Candace wakanehare tyaponita. Tyotya ixiyehare enoloxa hare kaxaikotyasehare tyaponita. <sup>28</sup> Koxaka Jerusalém nali xane Enore awaiyetya maheta hoka hatyo nalita haikoahitita, xanehitita hakarosanako hawaikohherakoa xeta. Tyokita hakarosanako hoka ihatita iraiti xakaisasehare Isaías xairala.

<sup>29</sup> Hatyaoseta Isekohaliti Waiyexe nexa Filipe hiye: — Hiyane hikaoka enomana hoka exe karosakore xema hiyane.

<sup>30</sup> Filipe xanehenena, xane okoi kaokehena ekarosane ana hoka semehena atyo, kaixaretita atyo iraiti xakaisasehare Isaías baberanexa. Hoka axehenene: — Xoana waiyekehalakita homana hatyo hakaixaretitere?

<sup>31</sup> — Maisaiya aliyakere waiyekehalakita nomani exe nakaexaretitere nomaxawaiyekahalakatyakinihareta — nexa.

Hatyaoleta nehitija: — Hisohena, hisoka nohaliyi — nexa hoka Filipe kakoha ekarosanako, tyoka ehaliya.

<sup>32</sup> Exakerexe tahi kaexaritita Iraiti Waiyexe nanekoa, hatyo kaxaiko akatyatiye: Kalanero exaisakaose kanolokakitire akereta mokahene, exahe kalanero mokose kaxaikolisakehena hoka haxaikolisasenae ana mema tyaponitrite akereta maisa kakanaseta enomanaha.

<sup>33</sup> Maisa kaxaiminisakita. Maisa aiminisahitene, maisa waiye mokahitene. Xalaiya ijikolahare tahi xakaihena? Hiyaiya, kamiyane atyo enawenane ali waikohekao.

<sup>34</sup> Hatyaoseta hatyo kaxaiko akatyatiye axehena Filipe: — Hawaiyekehalakatyatya nomani: Xala tahi nikare iraeta? Xoana haxaokakita? Hatya xaokaka kore?

<sup>35</sup> Hatyaoseta Filipe awaiyekehalakatyatya hatyo akiti enomana, xakaihena Waiyexe Iraiti Jesus xaka ihiye.

#### *Batixatyati*

(Marcos 16.15-16; Romanos 6.3-5; Colossenses 2.12)

<sup>36</sup> Xanahitaha hoka xane hikoaha one ana hoka hatyo kaxaiko akatyatiye nehena ihiye: — Hiyaiyehena, owene one. Maisaiya xoare hare mahokoanetita nobatixatyaki, alitereka?

<sup>37</sup> — Waiyeya hityakekota kaiserehare hoka ehekoriya nali — nexa Filipe ihiye.

Hoka nexa: — Há, notyakekota kaiserehare. Jesus Cristo atyo Enore Ityani naokita.

<sup>38</sup> Hatyaoseta hatyo kaxaiko akatyatiye amemakisa hakarosane hoka exoaha hatyo onexa hoka Filipe batixatene. <sup>39</sup> Hatyaoseta kenekoahenahitaha onexata hoka Enore Nisekohare kolatya Filipe. Hatyo kaxaiko akatyatiye maisa waiyehititene hekoti, xakore hoka jiya xanehitija haihalaharene kakoa. Ihalahare kaiserehare atyo.

<sup>40</sup> Hatyaoseta Filipe xane eharehenerota kaoka wenakalati Azoto nali. Hatyaoseta xakaita Waiyexe Iraiti tyotya naliyerenae hiye, nikare wenakalati koarencae hiye Cesaréia nali xane hikoahenere kijiya.

*Saulo Waiyexe Maniya Tyaochenere Tahi  
(Atos 22.6-16; 26.12-18)*

<sup>1</sup> Hatyo xowaka Saulo masakare xalijinihare tyaonita Jesus xema maniya tyaoniterenae xahita. Hatyaoseta xane irai sacerdotenae xekohase kakoa, <sup>2</sup> axita baberane iniraine kakoare judeunae xahohisakoatyakala hanakonae niyahare wenakalati Damasco nali hotikisa maheta. Hatyo iraiti hiyeta Saulo otoka aokowita Jesus koamaniya tyaoniterenae ena, ohiro harenae hoka kolahenahitene olatyoare Jerusalém nali xeta maheta.

<sup>3</sup> Hoka Damasco naho xaneta Saulo, okoi kaokehena wenakalati nali hoka enokoata xaokanatyakalati ehoko haliya werokakoa moka. <sup>4</sup> Hatyaoseta exoa waikoa hoka semehena atyo iraitihena ekakoa: — Saulo, Saulo, xoana hoka hiyalijinhare noxahiti? nexa.

<sup>5</sup> — Xala hiso, Xekohaseti? nexa Saulo axene.

— Natyo atyo Jesus hikirawanetere. <sup>6</sup> Hainakoahetehena hoka hiyane hisoahena wenakalatikoa xeta. Nalite iraeha hihiye hawenane tahi akiti.

<sup>7</sup> Halitinae Saulo xema xaneterenae tyotya amematioha, maisa xoare nexa iraetaha. Semaha xakore atyo iraiti hoka maisa atyo xala hore waiyahitaha.

<sup>8</sup> Hatyaoseta Saulo tityoaheta, waiyakahetehena xakore, maisa waiyakahitita. Hatyaoseta otokahisahene ekahe hiyeta hoka xaneha ekakoa Damasco nali. <sup>9</sup> Hanamaki ferakene mawaiyahakalahare tyaona. Hatyo ferakenenae maisa kanakairare, maisa terare hekoti.

<sup>10</sup> Damasco nali tyaonita hatya Jesus xema maniya tyaonitere, Ananias nexarexe. Kaxawaiyanikisaka hoka Xekohaseti kaotyaka enomana hoka kawisa: — Ananias! nexa.

— Xoare haoka, Xekohaseti? nexa.

<sup>11</sup> Hatyaoseta Xekohaseti aotyakisene: — Hiyanehena Judas hana nali xeta hoka ahoti Totahore aokahitere hatawa haliti Tarso tare Saulo nexarexe xahita. Nali iraexatita.

<sup>12</sup> Koxaka kaxawaiyanikisaka: kaotyaka enomana Ananias nexarexe. Isoa hatyako enomana, moka hakahe ihiye hoka waiyakaheta waiyitere akereta maheta.

<sup>13</sup> Nexa xakore hoka Ananias nehena: — Xekohaseti, kahare halitinae xakaita hatyo haliti tahi akiti. Jerusalém nali iniyalahare mokita kahare hiyema maniya tyaoniterenae.

<sup>14</sup> Kalikini ali Damasco tyoa sacerdote xekohasenae baberanexa kakoa olatya hoka berexotya maheta hiyema maniya tyaoniterenae — nexa.

<sup>15</sup> Hatyaoseta Xekohaseti nehitia Ananias hiye: — Hiyanehena enomana. Naoka hatyo haliti nowakanihare maheta hoka xakai maheta notahi akiti tyotya haliti hotyalinae hiye, exahe xekohasetiniae hiye, exahe Israel hotyalinae hiye hoka. <sup>16</sup> Natyotaite Saulo ana nahotikihena exemawatikisaka nohiyeti — nexa.

<sup>17</sup> Hatyaoseta Ananias xane isoa Judas hanako hoka ekaokakisa hakahenae Saulo hiye hoka nehena: — Nohinaehare Saulo, Xekohaseti axikatya natyo ali. Etake hiyaiyehenere Jesus Damasco naho nali axikatya natyo homana hiyaiyahitaya maheta, Isekohaliti Waiyexe kaxaehakoretya hiso maheta.

<sup>18</sup> Nexa taita ihiye hoka exoahetehena kohase tyat�ase akerehare Saulo xose akota hoka waiye waiyeheta. Hatyo najikinita ainakoaheta hoka xane kabatixatyaka.

<sup>19</sup> Kanakairihenere najikinita kinatere tyaoheta hetatiye akereta.

*Saulo Tyona Damasco Nali*

Hatyaoseta Saulo tyaona akaiki ferakene Jesus koamaniya tyaoniterenae kakoa Damasco nali. <sup>20</sup> Xakaihena rotita Jesus tahi akiti ihiyeha judeunae xahohisakoatyakala hananae ako. Nehena: — Jesus atyo Enore Ityani.

<sup>21</sup> Tyotyaha semahitaha Saulo niraine hoka hakaharetyoaha, axakakoahitaha: — Xoana, maisa exe haliti xini aijita tyotya Jesus koamaniya tyaoniterenae Jerusalém nali? Xoana, maisa exe xini ali tyoa hoka olatya Jesus koamaniya tyaoniterenae hoka kolatyahene maheta sacerdotenae xekohasenae ana aokowitere xini?

<sup>22</sup> Xakore hoka Saulo hairaine kakoa aiyateretyoa iraiti kakoa, ekakoita waiyore kaiserehare irai. — Jesus atyo Enore Kalorexe Aohenere terota — nita xakaita ihiyeha. Waiyore xakaita hoka judeunae Damasco nali tyaoniterenae maisa aliyakere xoare nexareha.

*Judeunae Aisa Aokowiha Paulo  
(Atos 9.15-16; 13.45, 50; 14.5-6; 14.19-20)*

<sup>23</sup> Tyaona waha ferakenehena hoka judeunae ahohisakoatyakaoaha hoka aisahene aokowiha. <sup>24</sup> Xakore hoka Saulo atyo sema exahekolaha tahi akiti. Wahatyahene wenakalati xisoakala nali. Ferakoa, makiya xoaha wahatyahitaha aisahene maheta.

<sup>25</sup> Hoka haxowaka makene Saulo hinaeharenae xane ekakoa hoka exoakisahene talare hoko motokoare xowata. Mokahene koho ako hoka exoakisahene.

*Saulo Tyaona Jerusalém Nali*

<sup>26</sup> Hatyaoseta Saulo xane Jerusalém xeta hoka kasani Jesus koamaniya tyaoniterenae kakoa haxawalita tyaona aokowita. Xakore hoka tyotyaha mairahitaha, maisa tyakekoreha Jesus xema maniya enawenane hoka. <sup>27</sup> Hatyaoseta Barnabé xane exema kahinaetene hoka hotikisene Jesus niraine kakoarenanana maheta. Xakai ihiyeha Saulo waiyehenere Jesus ahotyaho, Jesus iraihenere ekakoa tahi hare. Barnabé xakai ihiyeha tehitia Saulo xakaihakala Iraiti Waiyexe tahi akiti, maisa haxakaini kakoa mairita Jesus tahi akiti wenakalati Damasco nali. <sup>28</sup> Hatyo hekota Saulo tyaona enekoniha. Xaneta etalokoita tyotyaha wenakalati Jerusalém koa, aiyateretyoita haxakaini iraiti Xekohaseti tahi akiti kakoa. <sup>29</sup> Hatyo Jerusalém nali haiyananae judeunae hoka grego xako iraiterena kakoa Saulo iraeta hoka komita kinatyaxa iraikakoahitaha. Hatyaoseta kasani aliyakere xamani mokahene hoka aisahene aokowiyahitaha. <sup>30</sup> Hatyaoseta ihinaeharenanae semahene hoka Saulo nolokaha wenakalati Cesaréia nali hoka hatyo nalita axikatyahene wenakalati Tarso nali xeta.

<sup>31</sup> Hatyaoseta Jesus koamaniya tyaoniterenae mehexaiko tyaonahitaha, Judéia koa, Galiléia koa, Samaria koa tyaoniterenai. Ekakoita tyakekoaha kaiserehare. Isekohaliti Waiyexe kahinaera hiyeta hisoakehena, waiye aiminisahitaha Xekohaseti.

*Pedro Xane Wenakalatinai Nali*

<sup>32</sup> Hatyo xowakiya Pedro xaneta tyotyaha wenakalatinanae koa xeta. Ekakoita xane kaoka wenakalati Lida nali waiya maheta Enore kaxaikoneharenanae. <sup>33</sup> Nali Enéias nexarexe ana hikoa. Maitonanehare, 8-terehokoanehena maisa moxomoxore hekoti haxehokotyoakalata.

<sup>34</sup> Hatyaoseta Pedro nehena: — Enéias, Jesus Cristo aiyatelikheta hiso. Hatityoahetehena hoka hiyehokotyoakala haxakaihetehena — nexa. Nexa ihiye hoka Enéias tityoaheta rotita.

<sup>35</sup> Hatyaoseta tyotyaha tyaoniterenae wenakalati Lida, Sarona nali xoaha semaha hatyo tahi hoka Xekohaseti xema maniya tyaonaha.

<sup>36</sup> Exowaka wenakalati Jope nali hatya ohiro tyaonita Jesus koamaniya, Tabita nexalolo. Hatyo enexalo atyo Dorcas Grego xako. Tyaonitere xowakiya waiyexe tyomita, kahare kahinaetita maoloxaharenanae. <sup>37</sup> Hatyo xowakiya Dorcas hokaka hoka waini. Tihaha ehálo. Hatyaoseta kolatyahene xane mokahene hatyako enoako.

<sup>38</sup> Hatyaoseta Jesus koamaniya tyaoniterenae semehenaha atyo, Pedro tyaonita wenakalati Lida nali, Jope haliyita. Hoka axikatyaha hinamahare haliti enomanana kaexakatyahene maheta. — Hisohena rotita Jope xeta, hihalahare — nexaha.

<sup>39</sup> Nexaha ihiye hoka Pedro xane exemaha. Xane kaokaha hoka nolokahene enoako xeta. Tyotyaha maiyanenehalonae exahiyatene hoka tiyahitaha, hotikisahitaha haimaha itinolala kasetatere xowakere enomanaha. <sup>40</sup> Hatyaoseta Pedro aihikoahenahitene tyotyaha hatyoakota. Hatyaoseta tyoka hakaoli kakoa hoka iraexatya. Hatyo najikinita ehaikoaheta kamati maniya hoka nehena: — Tabita, hainakoahetehena — nexaha.

Hatyaoseta Tabita waiyaliheta. Waiya Pedro hoka tyokeheteta. <sup>41</sup> Pedro otokene ekahe hiyeta, kahinaetene hoka atityoakihetene. Hatyaoseta kawisa tyotya Jesus koamaniya tyaoniterenae maiyanenehalonae kakoita hoka isehenahitene enomanaha kasexe.

<sup>42</sup> Hatyo nexaka hakakoare xakaikoatya wenakalati Jope nali hoka kahare haliti Xekohaseti Jesus koamaniya tyaonaha, tyakekoaha hoka. <sup>43</sup> Hatyaoseta Pedro nali waha ferakene tyaona militi xaxotyatyasehare Simão nexarexe hanako.

## 10

### *Cornélio Atyo Tyaonita Xekohaseti Koamaniya*

<sup>1</sup> Hatyo xowaka wenakalati Cesáeria nali tyaonita Cornélio nexarexe, sorarenas xekohasehare. “Itália tarenæ”, nexahitaha hatyo sorarenas xaokaka. <sup>2</sup> Waiyexehare tyaonita, waiye aiminijita Enore, tyotya haisaninae haiyanityo kakoita Enore koamaniya tyaonita. Kahinaetita kahare judeunae maoloxaharenas, Enore hiye iraexata minita.

<sup>3</sup> Haxowaka makakoahena hoka Cornélio kaxawaiyanikisaka. Hatya anjo Enore nalitare tya kaoka enomana. Waiye waiyene. Kaoka ehaliya hoka: — Cornélio! nexa ihiye

<sup>4</sup> Hamairane kakoa waiye wahakota anjo ana hoka axehenene: — Xoare haoka, xekohaseti?

Hoka anjo nehena: — Enore awaitita hiraexaitere, exahe maoloxahare waiye hiyomokala hoka otya hiso. <sup>5</sup> Kalikini haxikahena haiyanæ haliti wenakalati Jope xeta hoka nolokaha maheta Simão Pedro nexarexe. <sup>6</sup> Tyaonita Simão hanako, militi xaxotyatyasehare hanako one kaloxere kilihi maniya — nexo.

<sup>7</sup> Hatyaoseta anjo xaneheta hoka Cornélio kawisa rotita hinama hawakanehare hatya sorare xoaha. Hatyo sorare Enore koamaniya tehitija tyaonita, Cornélio ana hakita.

<sup>8</sup> Hatyaoseta Cornélio xakai ihiyeha hawaiyanæ xaka hoka axikatyahene Jope nali xeta.

<sup>9</sup> Kamaetali hoka totahikoahena hoka Pedro kakoha, xane hati maiyeho iraexatya maheta. Hatyo nase Cornélio wakaneharenas xanehitaha ahoti, owitehena Jope mokahitaha. <sup>10</sup> Hatyaoseta Pedro nakehena, kasani kanakaira aokowita. Hoka tyomahitere nakairati nase kaxawaiyanikisaka. <sup>11</sup> Waiyehena atyo Pedro, enokoa totako tyaona hoka imititaose kalohero olattyore xalakakoa maniya tonone akerehare exoa waikoa. <sup>12</sup> Hatyo nakoako tyotya hotyalihare kirakaharenas tyaonita, xalakakoa kijiye hotyalinae, waikoa nolokoiterekahenae, kotehalanae hare.

<sup>13</sup> Hatyaoseta Pedro semehena atyo, iraitihena atyo: — Pedro, nikahena hoka haisa hoka hanisa.

<sup>14</sup> — Maisaiya, Xekohaseti. Maisa xoana xowaka nanihenere xoalini hare kaiyalaharexe manikakahare — nexo.

<sup>15</sup> Xakore hoka nehitija iraiti: — Awa atyo kaiyalahare manikakahare haoka Enore koxaka waiyexe kanikakere mohenere.

<sup>16</sup> Hanamaki nikare tyaona hoka hatyaoseta hatyo imititaose akerehare kakolatyaketheta enokoa xeta. <sup>17</sup> Pedro amaikohare hatyo waiyehenere akiti kakoa: — Xoare akiti kala nikareta aotyakisa aokowita natyo? nexo.

Pedro nikare ahekotitere nase Cornélio xaxikalanae tya kaokaha. Koxaka axaha hatyo nali tyaoniterenae hoka aotyakisahene hoka tya amematioaha Simão hana kanase. <sup>18</sup> Kawisaha hatya hatyakota hoka axaha: — Xoana ali Simão Pedro nexarexe tyaonita? nexo.

<sup>19</sup> Pedro heko otyaxematitata hawaiyanæ tahi akiti hoka Isekohaliti Waiyexe nexo ihiye: — Hasemehena, owene hanama hare haliti tawita hiso. <sup>20</sup> Hexoaheta hoka haxakaiharetyoahena hoka hiyane exemaha. Hiyane exemaha, awa atyo himawaiyehare hiyanene kakoa. Natyo atyo natyoanikisahene ali.

<sup>21</sup> Hatyaoseta Pedro exoaheta hoka nexo ihiyeha: — Natyo atyo xatawitere. Xoana hoka ali xisoa? nexo.

<sup>22</sup> Hoka nexaha ihiye: — Xekohaseti Cornélio axikatya wiso. Waiyexehare hatyo haliti. Awaitita Enore, exahe judeunae hoka tyotyaha tyakekoahitene. Hatya Enore nalitare

anjo irai ekakoa, aoka hikakawisaka ehana nali xeta, sema maheta hiraine — nexaha.  
 23 Hatyaoseta Pedro aisoakisahene hatyako, hatyo xatini nemakaha Simão hanako.

Kamaetali hoka Pedro xakaiharetyoa, xane exemaha. Haiyanae iraiti tyakekoterenae ihinaeharenae Jope nali tyaoniterenae tehitiya xanha exemaha.

24 Kamaetali hoka xane kaokaha wenakalati Cesáeria nali. Cornélio koxaka kaexakaty hahinaeharenae kaiserehare hoka atyahahitaha Pedro xahita. 25 Xane kaokehena Pedro hoka Cornélio tyoa ahalakoatene, enahalakoa meholokoa hakaoliri kakoa. 26 Xakore hoka Pedro atyo ainakihetene hoka nexa ihiye: — Hatityoahetehena, hiso akerexeta tehitiya haliti natyo — nexo.

27 Iraikakoaha Cornélio kakoa hoka hatyaoseta xane isoa hatyako. Owene atyo kahare haliti koxaka hohisakoita nali. 28 Hatyaoseta Pedro nexa tyotyaha ihiyeha: — Waiyekehala kita atyo xomana judeunae nawenanaho mahokoanititere majudeuneharenae waiyaka exahe xahohisakoatyaka ekakoaha. Xakore hoka Enore atyo hotikisa nomani hoka maisaiya atyo xala hare mahekorenephare naokita. 29 Hiyeta hoka xakawisa natyo hoka nihalahalini kakoa notyoa ali xeta. Xiyakaihena nohiye: xoana hoka xakawisa natyo?

30 Hoka Cornélio nehena: — Ali hanamaki ferakene nahittita niraexaita makakoasehena nohanyako. Hoka eharehena rotita hatya haliti iyomere nimere kaotyaka nomani 31 hoka nexa nohiye: “Cornélio, Enore semita hiraexala. Otita hiso hakahinaetitere maoloxaharenae hiyeta. 32 Haxikatya hatya Jope nali xeta hoka hatya haliti Simão Pedro nexarexe noloka maheta. Militi xaxotyatyasehare Simão hanako tyaonita, one kaloxere kilihi maniya”, nexa nohiye. 33 Hoka nakawisa rotita hiso. Ehekoreta hisoa. Kalikini wisaonita ali, wihohisakoita Enore haoti, wasema waokowi hiraene, xoare nexa xamani Enore airaekihena hiso hoka — nexo.

#### *Pedro Xawaiyekhalakala Tahi*

34 Hatyaoseta Pedro nehena: — Kalikini atyo waiyekhalakehena nomani. Enore ana atyo tyotyha haliti hakakoita. 35 Awaiyetita exema maniya tyaoniterenae, waiye tyaoniterenae, exahe hahotyalihare hoka. 36 Xiso atyo koxaka xasema Enore niraine Israel hotyalinae anere Iraiti Waiyexe, wenati waiyexe Jesus Cristo hiyeta. Hatyo atyo tyotyha halitinae Xekohase. 37 Koxaka xasemita kawenatyakehenere tahi akiti, Judéia koa hakakoare kasemaka. Galiléia koa hotohare nikare tyaona, João xakaihenere batixahenere najikinita.

38 — Xasemita tehitiya Jesus Nazaré yere tahi akiti. Enore isa Isekohahaliti Waiyexe enomana hoka aiyatelikisa halitinai. Tonakoatya, hakakoare xane, waiyexe tyomita, aiyatelikihitita tyotyha tihanare xahokakalanae, Enore atyo kaxaikotene hoka. 39 Wiso atyo tyotyha xoalini harenae enómane wiyaiya judeunae waikoherakoa nali, exahe Jerusalém nali. Xakore hoka atyalihose xaimaholatyaka hiye berekotyahene hoka aisahene. 40 Xakore hoka Enore ekasekihetene hanamaki ferakene najikinita hoka hotikihetene tehitiya womana. 41 Maisa atyo hakakoare haliti waiyehititene hoka wiso atyo wiyaiyehetene. Wiso atyo ewaiyasehare Enore xaokalita. Wiyaiyehetene hoka wikanakairiheta, wisereheta ekakoa ekaseneheta najikinita. 42 Enore atyo axikaty wiso wiyakai maheta halitinai hiye Iraiti Waiyexe. Enore mokene kalorexe, kasexenae eka-manenae xekohase, sema enawenaneha tahi akiti hoka enómanenai akereta mokahene maheta. 43 Tyotyha iraiti xakaisaseharenae Jesus tahi akiti xakai hoka nexaha: Xalanae xamani atyo tyakekone hoka iniyalahare enómaneha kamaotyanetyakeheta ihiyeta — nexo.

#### *Majudeuneharenae Ana Isekohaliti Waiyexe Exoa (Atos 2.1-4; 8.14-17; 19.1-7)*

44 Pedro iraetata hoka Isekohahaliti Waiyexe exoa hoka kaxaihakoretya tyotyha semax-emaiteerenae iraiti. 45 Judeunae Jesus koamaniya tyaoniterenae Jope nalita tyoiterenae Pedro xema hakaharetyoaha. Enore exaoretya Isekohaliti Waiyexe majudeuneharenae ana hiyeta. 46 Semehenaha atyo, iraihenaha atyo xakotinae masemakahare. Ihalahare tyaonaha Enore kakoa.

Hatyaoseta Pedro nehena: <sup>47</sup> — Exe halitinae ana Isekohahaliti Waiyexe kaoka tehitia kaokitere womana akereta. Nikare hoka xalaiya mahokoanehena ebatixatyakaha one kakoa?

<sup>48</sup> Hatyaoseta aoka ebatixatyakaha Xekohaseti Jesus nexare kakoa. Hatyo najikinita akaiki ferakene Pedro nawenane aokaha nali hahaliyaha.

## 11

### *Pedro Awaiyekehalkatya Tyotya Tyomehenere Tahi*

<sup>1</sup> Hatyaoseta Jesus niraine kakoarenai, exahe haiyanae Jesus xema maniya tyaoniterenae semaha Judéia koa nali majudeuneharenae nawenane Enore niraine xema maniya.

<sup>2</sup> Pedro haikoaheta Jerusalém nali hoka haiyanae kinatyaxa irae ekakoa, kasani hao-manere milihi aikotiterenae taita tyaona Enore koamaniya aakahitaha <sup>3</sup> hoka nexaha: — Hisemaka maxaikolahare haomanere milihinae hanako, hikanakaira harenae ekakoaha. Xoana hoka?

<sup>4</sup> Hatyaoseta Pedro xakaihakatya tyotya hawaiyane tahi akiti, hetatiye aoseta, waiye awaiyekehalkatene enomanaha. <sup>5</sup> — Notyaonita wenakalati Jope nali hoka nokaxawaiyanikisaki. Nowaiyehena atyo, motya imiti taose kalohero enokoata tyoa ewaikoatyoa. Olatyoare etonone xalakakoa maniya tyoa amematyoa nohaliye. <sup>6</sup> Waiye atyo nowaiyehena, owene atyo kirakaharenae tyaonita enako, xalakakoa kijiye, xalijini-harexenae, waikoa nolokoiterekare, kotehalanae hare. <sup>7</sup> Hatyota nasemehena atyo, iraiti nexa: “Pedro, haisehena hoka hanisa”, nexa. <sup>8</sup> Hoka nomi: “Maisaiya, Xekohaseti, maisa xoana xowaka nanisare kaiyalaharexe manikakahare”. <sup>9</sup> Hatyaoseta enokoata iraiti nehitia: “Awa atyo kaiyalahare manikakahare hexa Enore koxaka waiyexe kanikakere mohenere xaokaka”. <sup>10</sup> Nikare hanamaki tyaona hoka hatyaoseta tyotya haikoaheta enokoa xeta.

<sup>11</sup> — Hatyonase hanamahare haliti kaxaxikatyakitere nomani Cesaréia nalitarenae tyoa kaokaha hati notyaonitere nali. <sup>12</sup> Isekohaliti Waiyexe noxanini exemaha aoka nohiye. “Awa atyo himawaiyehare exemaha hiyanene kakoa”, nexa nohiye. Exe 6-harenae wihinaeharenae Jope nalitarenae tehitia tyoaha noximi. Wityotya wiyanne wisoa Cornélio hanako. <sup>13</sup> Hatyaoseta Cornélio xakai wihiye hahanako waiyehenenre anjo. Tityoa enahalakoa hoka nexa ihiye: “Haxikatya hatya Jope xeta hoka xane noloka Simão Pedro nexarexe. <sup>14</sup> Hatyo atyoite iraihena hoka Enore koamaniya kaiserehare xikaxomokakehena hexanityo, hityaninai harenai kakoa”, nexa.

<sup>15</sup> — Hatyaoseta niraehena hoka Isekohaliti Waiyexe tyoa exoa enomanaha, hetatiye exoitere womana akereta. <sup>16</sup> Hatyaoseta noteheta Xekohaseti Jesus niraine: “Aliterexe atyo João batixaita one kakoa hoka xiso atyoite Isekohaliti Waiyexe kakoa xikabatix-tyaka”.

<sup>17</sup> — Hiyaiya, wityakeko Xekohaseti Jesus Cristo hoka hatyo hiyeta Enore isa Isekohaliti Waiyexe womana. Majudeuneharenae ana tehitia kaxekaka kaxekakehenere womana akereta. Enore xaokalita hoka xalaiya natyo hoka Enore kakoa nokahalakoiharehena? nexa Pedro ihiyeha.

<sup>18</sup> Semaha iniraine hoka halakisaha hairaehekoalaha. Ihalahare Enore kakoa hoka nexaha: — Ehekoreta Enore nikare moka majudeuneharenae hoka halakisaha tehitia háomaneha iniyalahare hoka waiyexe matyotenehare tyaonaha maheta — nexaha.

### *Antioquia Yerenae Tyaonita Jesus Koamaniya*

<sup>19</sup> Jesus koamaniya tyaoniterenae xaoreha hairawaiyakaha hiyeta, Estêvão kaxaisake-henere najikinita. Haiyanae xane Fenícia, Chipre, Antioquia xoaha nali xeta. Xane kaokaha hoka xakaihaha Iraiti Waiyexe judeunae hiye taita. <sup>20</sup> Xakore hoka haiyanae Chipre tarenae, Cirene nali tarenae xoaha xaneha Antioquia nali xeta hoka xakaihaha Iraiti Waiyexe Jesus tahi akiti majudeuneharenae hiye. <sup>21</sup> Enore niyatere kakoareha hoka kahare haliti tyakeko iraiti hoka tyaonaha Xekohaseti xema maniya.

<sup>22</sup> Hatyo tahi akiti enexakaha semaha Jerusalém nali tyeoniterenae tyakekohatiyena hoka axikatyaha Barnabé Antioquia xeta. <sup>23</sup> Xane kaokehena, waiyehena atyo, koxaka atyo Enore waiye mokahitene hoka ihalahare tyaona ekakoaha, hoka aotyakisahene Xekohaseti koamaniya takita heko kinatere, haihalahareneha kakoa tyaonaha maheta. <sup>24</sup> Barnabé atyo haliti waiyexe, Isekohaliti Waiyexe tyaonita ekakoa, tyakekohatiye harenae. Kahare haliti semaha iniraine hoka tyakekoha hoka Enore koamaniya tyaonaha.

<sup>25</sup> Hatyo najikinita Barnabé xane wenakalati Tarso nali noloheta maheta Saulo. <sup>26</sup> Xane kaoka enomana hoka nolohetene Antioquia xeta. Nali tyaonaha hoka hohisakoaha tyakekoterenae kakoa. Haterehokoane tyaonaha ekakoaha hoka aotyakisahene. Kahare haliti aotyakisaha, heko miyatyaha hatyo terehokoane. Antioquia nali hotohare Cristo koa maniya tyaoniterenae kakaixaretyaka.

<sup>27</sup> Hatyo xowakiya haiyanae iraiti xakaisaseharenae Jerusalém nalita Antioquia nali xeta xaneha. <sup>28</sup> Hatya enekonihatareha Ágabo nexarexe. Tityoa hoka Isekohaliti Waiyexe niyatere hiyeta nehena: — Maikaite kalore nakiti tyaona tyotya hakakoare waikohekua — nexa. Cláudio kalorexe tyaonitere xowakiya nikare nakiti tyaona.

<sup>29</sup> Hatyaoseta Xekohaseti koamaniya tyaoniterenae kahinaetyaha aokowiha hahinae-harenaiha Judéia koa tyaoniterenae hoka haihatyakaha isaha olo. Haiyanae kaoloxerena hoka kalore isaha, haiyanae maoloxaharenae hoka inira isaha. <sup>30</sup> Hoka axikatyaha olo haxekaneha Barnabé, Saulo xoaha xema, tyakekoterenae nityohalitiranae ana Jerusalém nali kaxekaka maheta.

## 12

### *Kairawaiyahitaha Wenati Waiyexe Hiyeta*

<sup>1</sup> Hatyo xowaka terehokoane kalorexe Herodes xalijinihare tyaona haiyanae Iraiti tyakekoterenae xahita. <sup>2</sup> Wakatya sorarenae hoka xane aisaha João naxenane Tiago ke-sekase kakoa. <sup>3</sup> Waiye kaokene judeunae nityohalitiranae ana hoka Herodes wakahitiya sorare hoka olahitiya Pedro. Hisehaliti nakairati makaolatyakahare nomakere xowaka nikare tyaona. <sup>4</sup> Olatyahene hoka berexoako mokene Herodes xaokalita. Xalakakoa hotyali sorare ekaxaikotyasanai tyaona aoka, xalakakoahare makereha. Hisehaliti najikinita Herodes aihikoatene aokowita judeunae ana. <sup>5</sup> Nikare Pedro berexoako tyaonita hoka sorarenae waiye kaxaikoitene. Xakore atyo hoka iraiti tyakekoterenae kahare iraexatyahitaha enomana.

### *Pedro Hikoaheta Berexotyakalati Hanakota*

<sup>6</sup> Makiya, Herodes xaihikoarene hoka hotikisene halitinae ana aokowitere nahitita Pedro nemakita hinamahare sorarenae xikako, hinama maniya olatyoare kamatiherahi kakoa berexo ako tyaonita. Berexotyakalati hana jihola kanase sorarenae tehitia kaxaikota.

<sup>7</sup> Hatyaoseta ehárehena rota anjo kaotyaka Enore nalitare, werokeheko moka hatyo akiti. Totoka Pedro kanoli hiye, kaosetene hoka nexa: — Hihalahare hainakoahetehena — nexa. Hatyaoseta exola kamatiherahi itoaheta ewaotyalinai hiyeta.

<sup>8</sup> — Haiyatyahetehena hijiterone hihiye, hikijitini holahetehena — nexa ihiye anjo hoka Pedro anjo iraitere akereta tyaona.

— Himanase ako hisoahetehena hoka hisohena noximi — nexa anjo Pedro hiye.

<sup>9</sup> Hatyaoseta Pedro hikoaheta berexo akota, xane anjo xema. Xakore hoka komita ene maisa waiyekahalakita enomana anjo niyanahetene, motya kaijihinita aokita.

<sup>10</sup> Hetatiye jiyejenahitaha, hatyotare sorare kaxaikotere aose jiyejenahitayha hoka xane hikoahenahitaha kamatihera jihorere wenakalati xisoakala nali. Jihore kalorexe kamatihera xakore hoka majiholatyoata hawawa hoka hikoahenahitaha. Hatyaoseta jiyyaha ahotoyaho. Hatyaoseta anjo xaneheta, nali halakiheta Pedro.

<sup>11</sup> Hatyaoseta Pedro otyakaheta hoka nehena hawawaharenae: — Kaxiyani, aliterexe Enore axikatya anjo iyeheta maheta natyo Herodes nonitata, exahe judeunae nonitata hoka. Ikoiya awa hoka xoana xamani mokaha natyo.

<sup>12</sup> Pedro ana waiyekahalakenere najikinita xane Maria hanako, João Marcos nityo hanako. Kahare haliti nali tyaonita. Hohisakoahitaha hoka iraexaitaha.

<sup>13</sup> Pedro xane hikoa hati ana hoka mokotya hati jihola hiye hoka wakahalo Rode nexalolo xane waiya exahita, xala xamani hoka. <sup>14</sup> Semehena atyo, Pedro xako sema hoka ihalahalo. Maisa majiholatita hekoti hoka tema haikoaheta, “Pedro owene menanaka”, nexa maheta ihiyeha.

<sup>15</sup> Hatyaoseta nexaha ihiye: — Awa hihatyahalo!

Xakore hoka aiyatolotyoa: — Aliterexe naokita.

— Kala ekaxaikotyase anjo — nexaha.

<sup>16</sup> Hatyo nase Pedro mokoita hati jihola hiye. Ekakoita xane majiholatya hati jihola, waiyehenaha atyo, Pedro terota atyo hoka hakaharetyoaha.

<sup>17</sup> Hatyaoseta Pedro aimenekotya enomanaha hakahe kakoa, mema tyaonaha maheta. Mema tyaonaha hoka xakai ihiyeha Enore niyanehetene berexo akota. — Maika xiyakai hatyo tahi Tiago hiye, exahe haiyanae iraiti tyakekoterenae hiye — nexa. Hatyohekota xanehitiya hakoa xeta.

<sup>18</sup> Ferakoa hoka sorarenae waiyaosetya Pedro hoka maira, tatakoaha, maisa waiyekahalakita nikare Pedro tyahenere akiti enomanaha hoka. <sup>19</sup> Hatyaoseta Herodes axikatya haliti hoka tawehetahene. Xakore hoka maisa kaokehena hitene. Hatyaoseta Herodes, axalihenere ekaxaikotyasesenae sorarenae najikinita, haiyanae wakatya aisaha maheta hatyo sorarenae.

Hatyoseta najikinita Herodes xaneheta Judéia koa nalita, xane tyaona wenakalati Cesaréia nali.

### *Herodes Kamane Tahi*

<sup>20</sup> Hatyaoseta xekohaseti Herodes ehare wenakalati Tiro, Sidom tyaoniterenae hiye. Hoka kahare xaneha waiyahene maheta. Xane iraeha hotohare Herodes hana kaxaikotyasehare Blasto nexare kakoa, kasani kahinaetyahene aokahita. Hatyaoseta xane iraeha Herodes kakoa maisa iniyalahare mokahitene maheta, Herodes waikoherakoata taita nakairati ewaikoheraha nali kaokita hoka.

<sup>21</sup> Hatyaoseta Herodes aimenekotya enomanaha hoka hatyo ferakenehena isoa haimako xekohaseti nimako, tyoka haokahakala koa hoka waha irae ihiyeha.

<sup>22</sup> Hoka hatyo halitinae kawiyataya: — Maisa atyo haliti xini iraeta, enore atyo iraeta — nexaha.

<sup>23</sup> Hatyo xowakita Enore nalitare anjo ahokakatya Herodes, maisa aiminijita Enore hoka. Ahokakatene hoka xoxohi tyaona ihiye, nisene hoka waini.

<sup>24</sup> Hatyo najikinita Enore niraine tahi xaorekoa, exahe kaxakaisaka hakakoare.

<sup>25</sup> Barnabé, Saulo xoaha miyatya hahateneha Jerusalém nali hoka haikoahenahitaha Antioquia nali. Nolokaha João Marcos.

## 13

### *Barnabé Saulo Xoaha Kaxaxikatyaka Hakaha Maheta*

<sup>1</sup> Antioquia nali iraiti tyakekoterenae koni iraiti xakaisasharenae, xaotyakisatiyenaet yaonita: Barnabé, Simão Negro nexarexe, Lúcio, Manaém, Saulo xoaha. Lúcio atyo Cirene nalitare. Manaém atyo xekohaseti Herodes kakoa haxawalita kaxanaityakaha.

<sup>2</sup> Haxowaka iraexatyahitaha Enore hiye manakairahareta hoka hatyaoseta Isekohaliti Waiyexe nexa ihiyeha: — Haware xamoka nomani Barnabé, Saulo xoaha hoka hakaha hateniti. Hatyo niyahare naokahene nomani.

<sup>3</sup> Hatyaoseta manakairahareta iraexahenahitayah, mokaha hakaheha Barnabé, Saulo xoaha seri heno Enore hatene waiye hakaha maheta hoka jinakahene hoka xaneha maheta.

### *Ehateneha Chipre Nali*

<sup>4</sup> Hatyaoseta, Isekohaliti Waiyexe axikatyá Barnabé, Saulo xoaha hoka xaneha wenakalati Selêucia nali. Hatyo nalita kanowa kalorexe aka xaneha iyolirotikoa Chipre nali xeta. <sup>5</sup> Xane kaokaha wenakalati Salamina nali hoka xakaihenaha Enore niraine naliyerenae hiye judeunae xahohisakoatyakala hanako. João Marcos kahinaetyahitene iraiti exakainiha hiye. <sup>6</sup> Hatyaoseta jiyya katalatyaha hatyo iyolirotikoa hoka xane kaokaha wenakalati Pafos nali.

Hatyo wenakalati nali ahalakoatyaha hatya judeu Barjesus nexarexe. Haholitaharexe atyo, iraiti xakaisasehare aokowita xakore hoka maoseraita. <sup>7</sup> Barjesus atyo kalorexe Sérgio Paulo hinaehare. Hatyo Sérgio Paulo atyo Chipre nali xekohaseti tyaonita. Waiyore, irihare ahekotita. Hatyaoseta hatyo xekohaseti kawisa Barnabé, Saulo xoaha, sema aokowita Enore niraine hoka. <sup>8</sup> Hoka hatyo haholitaharexe Elimas kahalakoahare Jesus niraine kakoarenai kakoa. Elimas atyo enexare grego xako. Maisa xekohaseti tyakeko Jesus tahi akiti aokare hoka kahalakoahare ekakoaha.

<sup>9</sup> Hatyaoseta Saulo iraihena. Paulo tehitija atyo masakare kaexaretyahitene. Isekohaliti Waiyexe masakare kaxaehakoretene hoka kinatya wahakotya Elimas ana hoka nexa: <sup>10</sup> — Tihanare ityani, tyotya waiyexe nahalakoahare, haliti ewaxirahare, maoseryatallye! Xoana hoka maisa hahalakisare iniyalahare hománe hoka Enore xaotyakiraho waiyexe kakoa kaxaotyakisaka haokare? <sup>11</sup> Kalinite iniyalahare mohena hiso hoka himaxosehare hisaohena wahakiya, maisaiya hiyaiyehitita kamai xaokanala — nexa.

Nexa taita hoka Elimas haoti makehekua tyaona, hoka hakakoahena hatya xahita, ekahe hiye otokene hoka otokahisene maheta. <sup>12</sup> Xekohaseti Sérgio waiya hatyo nikare hoka tyakeko, hakaharetyoa exaotyakira Enore tahi akiti kakoa.

### *Ehateneha Antioquia Pisídia Koa Nali*

<sup>13</sup> Hatyaoseta Paulo hahinaeharenæ kakoa xane isoaha kanowa kalorexe aka, xanehenahitaha Pafos nalita. Xane wenakalati Perge nali xeta Panfília koa. Xane kaokaha hoka hatyo nalita João Marcos halakisahene hoka haikoaheta Jerusalém xeta.

<sup>14</sup> Hatyaoseta xanehenahitayah Perge nalita hoka xane kaokaha wenakalati Antioquia nali Pisídia koa.

Sábado xowaka xane judeunae xahohisakoatyakala hanako isoaha hoka tyokaha. <sup>15</sup> Hatyoako tyaoniterenæ Moisés xairala, iraiti xakaisaseharenæ baberaxa xoaha kaixaretyaha hotohare hoka hatyo najikinita hatyo xahohisakoatyakala hana xekohasharenæ kawisahene: — Nohinaeharenai, xoare xamani xirai xaokowita hoka witya xiraihena kalikini hoka xaihalahalinikisa wiso — nexaha.

<sup>16</sup> Hatyaoseta Paulo tityoa hoka hakahe kakoa aimenekotya enomanaha hoka mema tyaonaha maheta. Hoka nehena: — Israel hotyalinae, exahe xiso haiyanæ majude-uneharenæ ali Enore awaititerenæ hoka xasemehena. <sup>17</sup> Toahiya Israel nEnorexa wahetakomaniyerenæ haomanere aoka. Egito nali tyaonahitere xowaka hisoaka mokahene. Nalita iyehenahitene haiyatere kakoa. <sup>18</sup> Hatyo halitinae tyaonaha mäharexakiti 40-terehokoane. Maisa Enore xakore aokitere akereta tyaonareha hoka maisa emaxahalikisahitene. <sup>19</sup> Hatyaoseta xane kaokaha Canaã waikohera. Enore mawenekoaretya 7-hotyali haliti hatyo nali hoka Israel hotyalinae waikohe waikatehare tyaonaha. <sup>20</sup> Hatyaoseta 450-terehokoane tyaonaha hatyo waikohekua.

— Hatyo nase ekaxaikotyasanaiha, ewatyalisasedna hoka aotyakisahitene, heko Samuel tyaonitere kijiya. <sup>21</sup> Hatyaoseta axaha xekohaseti haomana hoka Enore moka Saul enomanaha exekohaseha maheta. Saul atyo Quis ityani, Benjamim hotyalihare. 40 terehokoane exekohaseha tyaona. <sup>22</sup> Hatyaoseta Saul emaisaheta hoka Davi moka exekohaseha maheta. Nexa Davi xaokaka: “Jessé ityani Davi atyo waiyeta nomani, nawaiyeta xoaha enomanha. Naokitere akeretaite tyomehena”, nexa.

<sup>23</sup> — Hatyaoseta wahehena hoka hatya Davi jikolahare tyaona, Jesus. Enore mokene Israel hotyalinae niyaseheta maheta, ekoamaniya tyaonaha maheta iraihenere akereta.

<sup>24</sup> Jesus tyoanene nahetakota João Batista xakaita iraiti Israel hotyalinai hiye halakisaha iniyalahare háomaneha, exahe hoka kabatixatyaha maheta. <sup>25</sup> João haxakaini okoi halakihena hoka nexa halitinae hiye: “Xala xaokita natyo? Maisa atyo xatyahitere xini natyo. Najikinita atyoite tyohena. Hatyo atyo noxahehare hoka maisaiya natyonae aliyakere ikijitini nanohi hekoti naolikita”.

<sup>26</sup> — Xasemehena, nohinaeharenæ Abraão mokoseharenæ, exahe xiso majudeuneharenæ awaititerenæ Enore. Xasemehena, exe iraiti wityotya womanere maheta kaxaxikatyaka waiyexe maniya moka maheta wiso. <sup>27</sup> Aliterexe Jerusalém nali tyanoniterenæ, exahe exekohasenaiha hoka maisa waiyekehalakita Jesus enomanaha, motya maisa haliti niyasehareheta xini aokahita. Exahe tehitia hoka maisa iraiti xakaisaseharenæ niraine waiyekehalakita enomanaha, sábado nihatyaka xakore kakaixaretyakita enomanaha hoka. Maisa waiyekehalakere enomanaha hoka Jesus xaisaka aokaha. Koxakereharenai xaokalaoseta mokahene. <sup>28</sup> Maisa xakore xoare xemere hoka aisahene aokowiyahita hoka Pilatos hiye exaisaka aokaha. <sup>29</sup> Hatyaoseta Iraiti Waiyexe nanekoa kaxairatyakehenere etahi akereta mokahene. Hatyo najikinita atyalihose xaimaholatyaka hiyeta iyehenahitene hoka kolatyahene, xane mokahene xawatyakalati nitini ako. <sup>30</sup> Xakore hoka Enore ekasekihetene. <sup>31</sup> Kahaliki kaotyakeheta hahinaenæ ana, Galiléia ta xanehena Jerusalém xeta hoka exema xanehenerenæ ana. Kalikini atyo hatyonae Jesus waiyasehare tyaona Israel hotyalinæ koni hoka Jesus tahi iraetaha ihiyeha.

<sup>32</sup> — Kalikini wisoa ali Iraiti Waiyexe wiyakai xihiye maheta. <sup>33</sup> Enore tyoma womana wahetakomaniyerenæ kakoa iraitere akereta. Hatyo atyo ekasekihetæ Jesus. Hiyaiya, exakerexe kaxairatyaka Salmo nanekoa 2 hiye:

Nityani hiso hoka Hexe notyaona kalikini.

<sup>34</sup> — Exakere Enore Jesus ekasekihetehenere tahi akiti irae, exahe eháre matokomenene akiti hoka:

Davi kakoa niraihenere akeretaite waiyexe maniya hikaxomokaka.

<sup>35</sup> — Nexa tehitia, hakiti Iraiti Waiyexe nanekoa wakaexaretya:

Maisaite hiwakanehare waiyexe háré hahalakisa hoka tokomita.

<sup>36</sup> Paulo nehitia: — Aliterexe atyo Davi Enore aokitere akereta tyoma kasetatere xowaka. Hatyo najikinita waini hoka kaxafityaka hahetakomaniyerenai xawatyakala hijiyita hoka tokoma atyo eháre. <sup>37</sup> Hoka Enore ekasekihetehenere atyo maisa tokomita hakamane xowaka.

### *Waiyexe Maniya Nawenatyakeheta*

(Atos 4.11-12; 16.27-33; Romanos 4.6-8; 6.23)

<sup>38</sup> — Nohinaeharenæ, waiyira xasema iraiti aliterexe Jesus hiyeta kaxakaisaka, iniyalahare kahalakisaka hoka kamaotyanetyakeheta maheta. Hatyo akiti kaxakaisaka xihiye.

<sup>39</sup> Xasema tehitia: xala xamani tyakeko hoka enómane iniyalahare kamaotyanetyakeheta. Hoka Moisés xaotyakira atyo maisa emaisahetere iniyalahare wenati.

<sup>40</sup> — Hiyeta hoka xirihare waiya aliya hoka koxakereharenæ niraine aposetaiyatya xisaona:

<sup>41</sup> Xiyaiyehena, xiso koexahalijiterenæ. Ximairaite, exahe ximaiyare. Hiyaiya, kalikinite notyomehena hatya xoalini hare xakoreya hoka hatyaiya xakaini xihiye hoka maisa xityakekota.

<sup>42</sup> Paulo, Barnabé xoaha hikoahetehena hohisakoahitere hekota hoka hatyo halitinae hatyotare sábadone tyohenahitiyaha hoka hatyo xakita xakaihitayaha ihiyeha aokaha. <sup>43</sup> Hohisakoahitere najikinita kahare judeunæ, exahe judeu xaotyakirahø xema tyaoherenæ tyakekoha Paulo, Barnabé xoaha xaotyakira. Hatyo Jesus niraine kakoarenai iraeha ekakoaha aihalahalinikisahene hoka Enore xawaiyera xema heko tyaonaha maheta.

<sup>44</sup> Haxowaka sábadone hitiya hoka komita ene wenakalati tyaoniterenæ tyotya hohisakoaha semaha maheta Enore niraine. <sup>45</sup> Hoka judeunæ waiyaha hatyo hisoakere

halitinae hoka okoawahareha. Ehareha hoka hatyaoseta Paulo niraene kakoa kahalakoa-hareha hoka kirawanahene.

<sup>46</sup> Xakore hoka Paulo, Barnabé xoaha aiyateretyoaha hairaineha kakoa: — Xiso judeunae ana hotohare atyo kaxakaisaka Enore niraine maheta. Hoka maisa xase-maxematy, maisa xaokarene xomana, maisa wenati matyotenehare xaokare xomana hoka wahalakisaita xiso hoka wiyan majudeuneharenai hiye wiyakai Iraiti Waiyexe.

<sup>47</sup> Exakerexe Enore aoka wihiye iraiti xakaisasehare xaihako maniyata:

Xaokanatyakalati akere namoka hiso halitinae ana hoka hihiyeta hakakoare haliti waiyexe maniya kaxomokakeheta maheta.

<sup>48</sup> Majudeuneharenai semaha hatyo iraiti hoka ihalahareha, waiye enomanaha Xekohaseti tahi akiti. Waiye enomanaha hoka tyakekoha Enore niraine menanehaliti aohenerenai Enore. <sup>49</sup> Enore niraine xaorekoakao hakakoare hatyo nali.

<sup>50</sup> Xakore hoka judeunae matyakekoterenai ehareha hoka xane iraeha wenakalati waikateharenai hiye, exahe majudeunehalonae xekohasetironae Enore tyakekoterenae hiye. Hatyohekota xalijinihare tyaonaha Paulo, Barnabé xoaha xahita hoka hatyo nalita axikahenahitene. <sup>51</sup> Hoka Jesus niraine kakoarenai mokotyahataya hakijitini-naiha waikohe exoakihenahitaha, maisa waiyetera iniraeneha aimenekotyaha maheta. Hatyaoseta Paulo, Barnabé xoaha xaneha wenakalati Icônio nali xeta.

<sup>52</sup> Xakore hoka Jesus xema maniya tyaoniterenae atyo ihalahare tyaonahitaha, Iseko-haliti Waiyexe kaxaihakoretyahitene xoaha.

## 14

### *Icônio Nali Xakaihakatyaha Iraiti Waiyexe*

<sup>1</sup> Icônio nali hoka nikareta tyaohenahitaya. Paulo, Barnabé xoaha xane isoaha judeunae xahohisakoatyakala hanako iraehenahitaya irae ahitere akereta, hoka kahare judeunae, majudeuneharenai hare tyakekoha iniraineha hoka tyaonaha Jesus xema maniya. <sup>2</sup> Xakore hoka judeunae matyakekoneharenai aisatanakotya majudeuneharenai hoka Jesus xema maniya tyaoniterenae kirawaneha. <sup>3</sup> Jesus niraine kakoarenai waha tyaonaha Icônio nali, aiyateretyoahitaha haxakainiha Xekohaseti tahi akiti kakoa. Enore hotikijita hawaiyexehare aliterexe tahi exakaihakalaha hiyeta. Iyateliti ijita Jesus niraine kakoarenai ana hoka waiyexe maomakahare tyomahitaha iniraine katyakekotyaka maheta.

<sup>4</sup> Hoka halitinae wenakalati tyaoniterenae hahekore xakini ahekotyaya. Haiyanae judeunae xema tyaonita, haiyanae Jesus niraine kakoarenai koamaniya tyaonita xoaha.

<sup>5</sup> Hatyaoseta majudeuneharenai, judeunae xoaha ahekotyaya hanityohalitiranae kakoa hoka xalijiniharenahitaya Jesus niraine kakoarenai hiye. Maisa waiye mohenahit-tahene, sehali kakoa mokotyahene aokowiha. <sup>6</sup> Hoka Paulo, Barnabé xoaha semaha hatahiha akiti hoka tekoahenahitaya Listra, Derbe xoaha nali xeta Licaônia koa, exahe hatyonai haliyita wenakalati tyaoniterenae nali. <sup>7</sup> Hatyo nali xane kaokaha hoka xakaihenahitaya Iraiti Waiyexe tahi.

### *Ehateneha Listra, Derbe Xoaha Nali*

<sup>8</sup> Hatyo Listra nali hatya haliti tyaonita, maisa waiyehaliti xini. Tyokita takita, maetonanehare hoka. Nikarexe terota tyaona tyaohenere hekota, maisa tonareta hekoti.

<sup>9</sup> Hatyo maitonanehare Paulo niraine semita hoka tyakekota. Paulo waiyene hoka kaxaiyatelikisakehetere hoka hatyaoseta wahakotya enomanaha hoka nexa kinatyaxa: <sup>10</sup> — Hainakoa! Hatityoahetehena!

Nexa hoka hatyo haliti halaisoa, tityoaheta hoka toheta.

<sup>11</sup> Waiya halitinae, Paulo nikare tyomehenere hoka kawisaha haxakoha: — Enorenai kaoka womana halitinae akerehare!

<sup>12</sup> “Júpiter”, nexaha kaixaretyaha Barnabé, “Mercúrio”, nexaha kaixaretyaha tehitia Paulo. Paulo atyo iraiti xakaita ihiyeha hoka nikare kaexaretyahene.

<sup>13</sup> Júpiter anere iraexatyakalati hana wenakalati nahalakoita tyaonita. Hiyeta hoka sacerdote Júpiter anere xane kolatita bowi, exahe seriti hoko iyiti kakoare hoka mokita wenakalati xisoakala nali. Hatyo halitinae aisa kirakahare aokowiyahitaha fetatyaha Paulo, Barnabé ana xoaha.

<sup>14</sup> Hatyo hinama Jesus niraine kakoarenæ semaha hatyo tahi hoka halalakaha haimaha haxamaikohareneha hoka tema xaneha halitinae koni hoka kawiyatyaha enomanaha: <sup>15</sup> — Xoana hoka nikare xisaona? Xiso akerexeta haliti tehitia wiso — nexaha. — Ali wisaonita wiyakaihakatya Waiyexe Iraiti maheta xihye hoka xahalakisa maheta exehare nikareterenæ hoka Enore menanehaliti koamaniya xisaona maheta. Enokoa, waikoa, one, tyotya xoalini harenæ nomasehare koamaniya xisaona maheta. <sup>16</sup> Toahiya Enore maisa watyaliye halitinae. Aliyakere xamani hawenane kakoa tyaona aokowita hoka nikare tyaona hawenane heko maheta. <sup>17</sup> Xakore hoka maisa haliti ana mahotikirere waiyexe háomanenæ. One enokoata axikatya hoka hanakatihaliti aihatikijita enaose akehena hoka. Nakairati harenæ tehitia ijita, exahe hoka kalore aihalahalinikijita xiso — nexaha.

<sup>18</sup> Hatyo iniraineha najikinita hekota aisaha kirakahare hoka fetatyaha enomanaha aokowiyahitaha. Hoka aiyaterityoa exahitaha, kotare maxaisakahare enomanaha aokahitaha.

#### *Paulo Kamokotyaka Sehali Kakoa*

(Atos 16.22-24; 20.19; 21.27-36; 22.22; 23.12-15)

<sup>19</sup> Hatyaoseta haiyanæ judeunæ tyoaha Antioquia nalita, Icônio nalita. Aisa-tanakotyahitaha halitinai hoka kahinaetyahene hoka mokotyaha Paulo sehali kakoa. Hatyaoseta nolokehekoatyahene haware wenakalati nonitata hoka halakisahene, motya atyo waini aokahitaha.

<sup>20</sup> Hatyaoseta Jesus koamaniya tyaoniterenæ ahohisakoatyakakoa hoka ehoko-haliya tityoaha hoka kaseheta enomanaha. Tityoaheta hoka xanehitia wenakalati xeta. Kamaetali hoka Paulo, Barnabé xoaha xanehitia wenakalati Derbe nali xeta.

#### *Haikoahenahitaha Antioquia Síria Koa Nali*

<sup>21</sup> Paulo, Barnabé xoaha Derbe nali xakaihenahitiya Iraiti Waiyexe tahi akiti hoka hatyo nali tyaoniterenæ semaha iraiti hoka haiyanæ Jesus koamaniya kahare tyaon-aha. Hatyaoseta haikoahenahitaha Listra, Icônio, Antioquia Pisidia koa nali xeta.

<sup>22</sup> Aihalahalinikisa, aotyakisaha harenæ Jesus koamaniya tyaoniterenæ masakare tyakekoha maheta. — Maikaite iniyalahare hotohare wikaxomokaka hoka hatyo najikinitaite wiyanë wikaoka Enore nawenakala nali — nexaha ihiyeha.

<sup>23</sup> Hahotyali konita, hahotyali konita xakini iraiti tyakekoterenæ nityohalitiranae moka enomanaha. Manakairaharahitaha iraexatyahitaha hatyo inityohalitiranaiha tyaohenere ana. Xekohaseti maniya tyaonahitaha hoka iraexatyahitaha Xekohaseti kaxaiko maheta tyakekoterenæ nityohalitiranae.

<sup>24</sup> Hatyaoseta Paulo, Barnabé xoaha xanehenahitaha enonyahitaha hoka katalatyaha Pisidia koa, xane kaokaha Panflilia koa. <sup>25</sup> Xakaihaha iraiti wenakalati Perge nali. Hatyota xanehenahitiyaha Atália nali one kilihi. <sup>26</sup> Hatyo nalita xaneha kanowa kalorexe ako Antioquia xeta Síria koa nali, hetati kaxaxikatyakenahere Enore hatene hiye hakaha maheta nali. Miyatyaha hahateneha hoka haikoahenahitaha hatyo nali xeta.

<sup>27</sup> Nali kaokehena hitaha hoka ahohisakoatyakakoa Jesus koamaniya tyaoniterenæ kakoa hoka xakaihakatya tyotya Enore tyomitere ihiyetaha tahi akiti. — Exakere majudeuneharenæ tehitia tyakekoha Iraiti Waiyexe Enore xaokalita — nexaha.

<sup>28</sup> Hatyaoseta waha tyaonaha hahinaeharenaiha kakoa Antioquia nali.

<sup>1</sup> Hatyaoseta haiyanae judéia koa tarenæ tyoa kaokaha Antioquia nali hoka aotyaki-henaha Jesus xema maniya tyaoniterenæ: — Maisaiya xomanere milihi kaxaikotyakita Moisés xaotyakiraho aokitere akereta hoka maisaiya aliyakere xikaiyakihitita iniyalahare nonitata.

<sup>2</sup> Hoka maisa Paulo, Barnabé xoaha hiye waiyeta hoka kinatyaxa irai kakoaha hatyo tahi akiti. Hatyaoseta ahekotyaha hoka Paulo, Barnabé haiyanae xoaha tehitia xaneha aokaha Jerusalém xeta, hatyo tahi akiti ahekotyaha maheta Jesus niraene kakoarenæ, tyakekohatiyena nityohalitiranaiha xoaha kakoa.

<sup>3</sup> Hatyaoseta Antioquia nali tyakekoterenæ axikatyahene Jerusalém nali xeta. Jiyaha Fenícia koa, Samaria koa harenæ hoka xakaihaha nali tyaoniterenæ hiye Enore koamaniya majudeuneharenæ tyaonitere tahi. Hoka nali tyaoniterenæ tyakekoterenæ ihalahareha exakainiha kakoa.

<sup>4</sup> Hatyaoseta xane kaokaha Jerusalém nali hoka naliyerenæ tyakekoterenæ, Jesus niraine kakoarenæ, inityohalitiranaeha xoaha waiye mokahene. Hatyohekota xakai-hakahenaha Enore xoalini hare exaihakoha maniyata tyomitere.

<sup>5</sup> Xakore hoka haiyanae fariseunæ, tyakekoterenæ tehitia, tityoa hoka nehenaha: — Maika majudeuneharenai nomanere milihe kaxaikotyaka, exahe tehitia hoka Moisés xaotyakiraho xema tyaonaha.

<sup>6</sup> Hatyaoseta Jesus niraine kakoarenai, inityohalitiranaiha harenæ aho-hisakoat�akoko hoka ahekotyaha maheta hatyo tahi akiti. <sup>7</sup> Waha iraesekoahenahere najikinita Pedro tityoa hoka nehena: — Nohinaeharenæ, koxaka waiyekehala kita xomana toahiyita Enore aoka natyo xinekonita noxakai Iraiti Waiyexe maheta majudeuneharenæ hiye hoka semahene hoka tyakekoha maheta. <sup>8</sup> Enore atyo waiyita makere tyotya wiyahekola hoka majudeuneharenæ tehitia aokita haomana. Hiyaiya, Isekohaliti Waiyexe isa enomanaha isehenere womana akereta. <sup>9</sup> Maisa ininæ hekoti hawarehare tyomita ekako hoka, exahe wikakoa hoka. Maotyaneheta iniyalahare enómane ityakekoneha hiyeta.

<sup>10</sup> — Nikare hoka xoana hoka Enore xahasakaharetita? Xoana hoka kolare akere xamoka xaokowita kalini tyakekohenerenæ heno? Hiyaiya, maisaiya wisonae hekoti, wahetakomaniyereharenæ hekoti ana mahowitihareta. <sup>11</sup> Maisa nikare xini. Wityakeko hoka waiyexe maniya wikaxomokaka Xekohaseti Jesus nawaiyexehare hiyeta tyao-henahere akereta — nexa Pedro.

<sup>12</sup> Hatyaoseta tyotya nali tyaoniterenæ mema tyaonaha hoka semaxemayaha Barnabé, Paulo xoaha xakaihakala Enore exaihakoha maniyata maomakahare tyomitere majudeuneharenæ koni.

<sup>13</sup> Halakisaha hairaineha hoka Tiago nehena: — Nohinaeharenæ, xasemehena:

<sup>14</sup> Simão koxaka halakisa hairaine haxawaiyekehala kala, majudeuneharenæ hotohare Enore anere tyaohenere akiti. Hiyaiya, enekonihata hahotyali haomanere maheta aoka.

<sup>15</sup> Iraiti xakaisaseharenæ iraehenere akereta. Exakere Iraiti Waiyexe nanekoa:

<sup>16</sup> “Hatyo najikinitaite nahaikoaheta”, nexa Xekohaseti. “Hoka waitarite notyomehitiya Davi hana, ehana exoahenere akereta. Nahohisakoahetaite eholoxonæ hoka notyomehetene”, nexa.

<sup>17</sup> “Nikare namoka hoka tyotya haliti hotyalinae naoka nomani hoka nomaniye hotyali tyaona maheta hoka Xekohaseti xemaite tyaohenaha”. Exakere nexa Xekohaseti,

<sup>18</sup> toahiyatita exeharenæ tahi xakai.

<sup>19</sup> — Exe atyo noxahekoli: maisaiya wahowitiharekijita majudeuneharenæ Enore xema maniya tyaohenerenæ. <sup>20</sup> Kala maisa hoka waxairatyæ enomanaha hoka waxikatya enomanaha hoka maisa nisahitaha eteti kafetatyakitere enore metalaharenæ anere. Exahe hoka maisa ohiro kakoa iniyalahare tyomahita. Exahe tehitia maisa nisahitaha kirakahare kakirolokasetyaka kaxaisakiterehare, exahe timalati hoka maisa kanakairahitaha.

<sup>21</sup> — Hiyaiya, Moisés xairahenere iraiti toahiyatita kakaexaretyakita kaxawaiyekehalakyakita judeunae xahohisoakoatyakala hanako nihatyaka, sábado nihatyaka, exahe iniraine kaxakaihakatyakita wenakalatinæ nihatyaka — nexa Tiago.

*Babera Majudeuneharenæ Anere Tahi*

<sup>22</sup> Hatyaoseta Jesus niraine kakoarenæ, inityohalitiranaeha, exahe tyotya tyakekoterænae ahekotyaha hoka hinamanae hanekonitareha mokaha, Silas, Judas Barsabás xoaha, hoka axikatyahene Paulo, Barnabé xema Antioquia xeta. Hatyo hinamanae waiye kaxaiminisakita tyakekoterænae hiyeta. <sup>23</sup> Hatyohekota axikatyaha baberane exemaha exakerexe:

Wiso, Jesus niraine kakoarenæ, exahe tyakekoterænae nityohalitiranaeha, xihinaeharenæ, waxikaxatya wiraine xiso wihinaeharenæ majudeuneharenæ ana, Antioquia nali tyaoniterænae Síria koa Cilícia koa xoaha tyaoniterænae ana.

<sup>24</sup> Wasema winekonitareha tyoa nali hoka hairaine kakoa kaxiye mohenahere xawenane xomana. Xakore hoka maisa wirainexa xema xini nikare tyaonaha.

<sup>25</sup> Hiyeta hoka wityotya nikare wahekotyaha hoka hinamahare waxikatya xomana. Tyoahite wixiyakawala Barnabé, Paulo xoaha xema,

<sup>26</sup> etake komita kaxaisakehenerænae Jesus Cristo hatene xema hiyeta.

<sup>27</sup> Waxikatya xomana Judas, Silas xoaha iraeha xikakoa maheta exe waxairatitere xomana tahi akiti xiháre hiyeta.

<sup>28</sup> Isekohaliti Waiyexe, wiso xoaha maisa howithihare xawenane wamoka waokowiye. Xoalini hare waiyexe taita atyo kaomaka waokita. Hatyohavenai maisaiya aliyakere maomakita:

<sup>29</sup> Awa atyo kirakahare efetatyakahare enore metalaharenæ anere xanihena, exahe hoka awa atyo timalati xikanakaira, exahe kirakahare kakirolokasetyaka kaxaisakiterahere awa atyo xanisa hatyohare. Awa atyo iniyalahare xisoma ohiro kakoa. Exeharenæ xisomita hoka waiye xisaona. Maika waiye xikinatere xisaona waokita, eko xoaha.

<sup>30</sup> Axikatyaha hanekonitareha hoka xaneha Antioquia xeta. Xane kaokaha hoka ahohisakoatyaha tyakekohatiyenæ hoka babera isaha enomanaha. <sup>31</sup> Kaixaretyaha hatyo babera hoka ihalahareha, hatyo iraiti aihalahalinikisahene.

<sup>32</sup> Judas, Silas xoaha iraiti xakaisaseharenæ atyo hoka waha iraeha ekakoaha. Xakaihahitaha iraiti Jesus xema maniya tyaoniterenai hiye, aiyaterekisahitene, aihaalahalinikisahitene xoaha. <sup>33</sup> Waha tyaonaha ekakoaha hoka xanehenahitaha aokowiha hoka ihinaeharenaiha waiye exanenehenahitaha aokaha hoka axikahenahitene exakatyasenæ ana. <sup>34</sup> Xakore hoka Silas atyo hekota enaliahitæ, maisa xaneheta aokowita hoka.

<sup>35</sup> Paulo, Barnabé xoaha waha tyaonaha ekakoaha Antioquia nali. Hatyonæ, haiyaharenæ xoaha xakaihakatyaha Iraiti Waiyexe, aotyakisaha tyakekohatiyenæ nali tyaoniterenæ.

*Paulo, Barnabé Xoaha Haware Xakini Tyaona*

<sup>36</sup> Hatyo najikinita Paulo nehena Barnabé hiye: — Nika wahaikoaheta hoka wiyaiyeheta wihinaeharenæ wenakalati nihatyaka wiyakaihenerokoanae iraiti Jesus tahi akiti. Xoana waiye xamani tyaonahitaha hoka — nexa.

<sup>37</sup> Barnabé noloka aokowi João Marcos <sup>38</sup> hoka maisa Paulo wini hekoreta. Koxaka nikare nolokahene iraiti hiye kahinaetyahene maheta hoka holinita halakisahene, Panfflia koa nalita hoka haikoaheta enonyahitaha hoka. <sup>39</sup> Hatyo hiyeta kinatyaxa iraikakoaha. Kinatyaxa iraikakoaha hoka xaoreha. Barnabé noloka João Marcos, isoaha kanowa kalorexe áko hoka xaneha iyolirotko Chipre nali xeta.

<sup>40</sup> Hoka Paulo Silas hahinae maheta noloka hoka xaneha. — Maika Enore kaxaiko xiso — nexaha ihinaeharenæha ihiyeha hoka xaneha.

<sup>41</sup> Paulo Síria koa maniya Cilícia koa jiyaha hoka aihalahalinikijita Iraiti Waiyexe xema maniya tyaoniterenæ.

## 16

*Timóteo Xane Paulo Silas Xoaha Xema*

<sup>1</sup> Ekakoita Paulo xane kaoka wenakalati Derbe, Listra xoaha nali. Listra nali hatya haliti tyaconita, Timóteo nexarexe, Jesus koamaniya tyaconita. Inityo atyo judeunero hoka enexe atyo Grécia yere. <sup>2</sup> Tyotya ihinaeharenae Jesus koamaniya tyaconiterenae Listra, Icônio nali tyaconiterenae waiye irae ahitaha Timóteo tahi akiti. <sup>3</sup> Hoka Paulo noloka Timóteo aokowita hoka enomanere milihe aikotya. Paulo xanehenere nali akitiya judeunae semita Timóteo nexe Grécia yere hoka hatyo hiyeta nikare mokene.

<sup>4</sup> Tona, jiyahitaha wenakalatinæ hoka isahitaha babera Jesus xema maniya tyaconiterenæ ana, Jesus niraine kakoarenae, exahe tyakekohatiyenæ nityohalitiranæ Jerusalém nali ahekohenahere kakoa aotyakisahitene, tyaconaha maheta iniraeneha xema maheta.

*Trôade Nali Paulo Kaxawaiyanikisa Hoka Waiya Haliti Macedônia Tare*

<sup>5</sup> Nikare mokahitene hoka masakare tyakekoahitaha, kinatere tyaconahitaha Xekohaseti koamaniya, exahe haiyanae tyotyaki ferakene tyakekoahitaha hoka hisoaka tyaconita tyakekohatiyenæ.

<sup>6</sup> Hatyaoseta xanehenahitiyaha Frígia, Galácia koa xoaha. Hoka Isekohaliti Waiyexe atyo maisa iraiti xakaihaha aokita Ásia koa nali. <sup>7</sup> Xane kaokehenaha Mísia koa nali hoka hatyaoseta Bitínia nali xakore xane aokowiha hoka maisa Jesus Nisekohare exaneneha aokita. <sup>8</sup> Hatyaoseta jiyya Mísia koa, xane kaokaha wenakalati Trôade nali, one kaloxere kilihi.

<sup>9</sup> Hatyo xatini Paulo kaxawaiyanikisaka. Waiya hatya haliti Macedônia yere. Tityoita hoka nita: — Hisohena Macedônia xeta hoka hakahinaetya wiso — nexa.

<sup>10</sup> Nikare Paulo kaxawaiyanikisaka hoka wiyanæ rota waokowi Macedônia xeta. — Hiyaiya, Enore kawisa wiso naliyerenae hiye wiyakai Iraiti Waiyexe maheta — wexa.

*Filipos Nali Lídia Iraiti Waiyexe Xema Tyaona*

<sup>11</sup> Hatyaoseta Trôade nalita kanowa kalorexe ako wiyanæ fihi iyolirotikoa Samotrácia nali xeta. Kamaetali hoka wiyanæ wikaoka wenakalati Neápolis nali one kilihi.

<sup>12</sup> Hatyohekota wiyanæ wenakalati Filipos nali xeta. Filipos atyo wenakalati kalorexe, Macedônia koa tyaconita. Hatyo nali tehitija atyo Roma yerenae nawenakala. Nali wiyanæ wikaoka hoka akaiki ferakene wisaona.

<sup>13</sup> Hatyaoseta sâbado ferakene wiyanæ one haliya xeta. Motya nali judeunae niraex-attyakala aose waokita hoka. Wisoka hoka wiraihena nali ohironae hohisakoitolonæ kakoa. <sup>14</sup> Hoka hatya ohiro enekonitareha semaxematita wiraine, Lídia nexalolo. Wenakalati Tiatira nalitalo, imiti waiyexe, misaxere betetyasero. Lídia koxaka Enore koamaniya tyaconita. Hatyaoseta Xekohaseti awaiyolonekisene hoka Paulo niraine waiyekahalaka sema maheta. <sup>15</sup> Hatyaoseta tyotya ehanako tyaconiterenæ kokoita kabatixatyakaha.

Hatyaoseta Lídia noloka wiso hoka nehena: — Xekohaseti koamaniyolo xaokita natyo hoka xisohena nohanyako xisaona — nexa wihiye hoka wiyanæ ehanako wisaona.

*Berexo Filipos Naliye Tahi*

<sup>16</sup> Haxowaka wiyaneta iraexatyakalati aose nali xeta hoka tyoa ahalakoatyä wiso hatya wakahalo. Tihanare kamilakoretita hatyo xoimahaloti hoka otita xoalini hare ahetakoti maniya. Hoka exekohasenæ kalore olo resebityahita exakaini hiyeta. <sup>17</sup> Hatyo xoimahaloti Paulo najikinita, wajikinita xoaha tonita hoka kawijita: — Exe halitinae atyo Enore maxaexahityakaharexe wakaneharenæ. Xakaihahitaha iraiti: “Exakere xisaona waiyexe maniya xikaxomokakeheta maheta”.

<sup>18</sup> Nikare kawiyalijita wiso kahareki ferakene. Wahehena hoka Paulo emaxahalikihena hoka terehokoa wahakotya enomana hoka nexa tihanare hiye: — Jesus Cristo nexare kakoa wirai: hahikoahetehena exe xoimahaloti nonitata — nexa. Nexa hoka exowakita tihanare hikoa, xaneheta imilakota.

<sup>19</sup> Hatyaoseta hatyo xoimahaloti xekohasenae amaikoharehenaha, maisa aliyakere resebehenehititaha exakaini hiyeta hoka. Ehareha hoka Paulo, Silas xoaha otokaha, nolokasekoatyahene wenakalati nekesekoa kalorexenae nahalakoa. <sup>20</sup> Xane kaokaha ekakoaha wenakalati kaxaikotyaseharenae ana, Roma yerenae nirainexa kakoarenae ana hoka nehenaha: — Exe halitinae atyo judeunae, hoka tyomahitaha xoalini hare, exahe kahiraharahitaha ali wawenakalakoa hoka hahekore wawenane mokaha aokowiyahitaha. <sup>21</sup> Aotyakisahitaha wiyaotyakisaka nonitata hawarehare. Roma yerenae atyo wiso hoka maisaiya aliyakere wisaonita exaotyakiraha xema — nexaha.

*Mokonasetyaha Iraeti Kakoarenae*

(Atos 9.15-16; 20.19; 21.27-36; 22.22; 23.12-15; 2 Coríntios 4.8-12)

<sup>22</sup> Hatyaoseta halitinae hohisakoa otokaha maheta Paulo, Silas xoaha. Exekohase-naeha halalakasekoatyaha inimanaeha hoka sorarenae hiye emokonasetyakaha aokaha atyakase kakoa. <sup>23</sup> Kahare mokonasetyaha hatyo hinamanae hoka xane mokahene berexotyakalati hanako. Iraeha berexotyakalati hana kaxaikotyasehare hiye hoka waiye kaxaikoahene maheta.

<sup>24</sup> Sema iniraeneha berexotyakalati hana kaxaikotyasehare hoka xane mokahene nekesako, exahe atyalihosena timenerena hiye olatyyaha ikinolinaeha.

<sup>25</sup> Xakore hoka kala wahaxatihena hoka Paulo, Silas xoaha iraexahenaha, xerehenaha Enore ana hoka berexoako tyaoniterena semaxemathyahitene. <sup>26</sup> Xerahitaha ene hoka eharehenerota waikohe tatakoahena, sehalo hati hiyexe amoxomoxokisa. Hatyo xowakita tyotya jihorenae majiholatyoa, kamatiherahinae exolahinaiha irikotyoasekoaheta.

*Xoanaiya Notyaona Hoka Nokaiyakiheta?*

(Atos 2.37-40; 22.16; 24.24-26)

<sup>27</sup> Hatyaoseta berexo hana kaxaikotyasehare kaose. Waiyehena atyo, berexo nitini jiholanae tyotya majiholatyoare taita. Motya atyo koxaka berexoako tyaoniterena tekoaheta aokita hoka kesekase iya hoka alsoawi aokowihena.

<sup>28</sup> Hoka Paulo kinatyaxa kawayatya enomana: — Awaira atyo nikare hisaohena! Wityotya alita!

<sup>29</sup> Hatyaoseta berexo kaxaikotyasehare aokanathyaha enomana aoka hoka kaholawaka isoa enomanaha berexo hanako. Hakaoli kakoa xane tyoka Paulo, Silas xoaha kinoli haliya, tatakoa kalore. <sup>30</sup> Hatyaoseta xane hikoa ekakoaha menanaka hoka nehenaha: — Xoanaiya notyaona hoka iniyalahare nonitata nokaiyakiheta? nexa.

<sup>31</sup> — Hityakekohena Xekohaseti Jesus hoka waiyexe maniya hikaiyaka, hexanityo hityaninae xoaha kakoa — nexaha ihiye.

<sup>32</sup> Hatyaoseta xakaihaha Iraiti Waiyexe ihiye, tyotya ehanako tyaoniterena xoaha hiye. <sup>33</sup> Hatyo xowaka makiyeneta berexo hana kaxaikotyasehare waiye mohenahitene. Wairahenahene, tihaosehetehena emokotyakaosena ihiyeha. Hatyaoseta tyotya haiyanityo, haisaninae harenae kakoita kabatixatayakaha. <sup>34</sup> Hatyaoseta Paulo, Silas xoaha noloka hahanako xeta hoka tyaisahene. Haiyanityo, haisaninae harenae kakoita ihalahareha tyaonaha, Enore koamaniya tyaonaha hoka.

<sup>35</sup> Ferakoa hoka Roma yere xekohasetinae axikatya sorarenae iraiti kakoare berexo kaxaikotyasehare ana. — Hahalakihetehena exe halitinae hoka xanehenahitaha.

<sup>36</sup> Hatyaoseta berexo kaxaikotyase nehena Paulo hiye: — Xekohasetinae xihalakisaka aoheta. Nikare hoka xahikoaheta hoka waiye maika xiyanaheta — nexa.

<sup>37</sup> Xakore hoka Paulo nehena sorarenae hiye: — Maisa xoare harenae wisomare, exahe hoka Roma yerenai tehitija wiso. Xakore hoka maxemerehareta mokonasetyaha wiso tyotya ehaotiha exahe mokaha wiso berexoako. Hoka kalikini axikahetaha wiso aokowihena hametene ahitaha. Maisa nikare xini. Maika xekohasetinae ali tyoa hoka iyeheta wiso berexo akota hoka ehekore — nexa Paulo ihiyeha.

<sup>38</sup> Hatyaoseta sorarenae xane hoka xakaihahene xekohasetinae hiye. Semehenaha atyo, Paulo, Silas xoaha atyo Roma yerenae hoka mairaha.

<sup>39</sup> Hatyaoseta tyoa kaokaha enomanaha. — Kaxiyanira, nikare wamoka xiso — nexaha ihiyeha, haihareha. Aihikoahenahitahene berexoakota hoka aokaha exanenehenahitaha hatyo wenakalatita.

<sup>40</sup> Hatyaoseta Paulo, Silas xoaha hikoaheta berexoakota hoka xaneha Lídia hana nali xeta. Hatyo nali kaokakakoaha hahinaeharenaiha kakoa hoka ihalahareha mokahitene. Hatyo najikinita xanehenahitaha hatyo wenakalati nalita.

## 17

### *Ehateneha Tessalônica Nali*

<sup>1</sup> Hatyaoseta Paulo, ihinaeharenae xoaha hoka jiyya Anfípolis, Apolônia koa xoaha, xane kaokaha Tessalônica nali. Hatyo nali judeunae xahohisakoatyakala hana hoka <sup>2</sup> xane nali xeta hoka isoa. Nikare atyo Paulo nawenane hoka. Hanamaki sábadone Iraiti Waiyexe kaxairatyakehenere tahi iraesekoaty naliyerenae kakoa. <sup>3</sup> Paulo waiye awaiyekehalakaita enomanaha Enore Kalorexe Aohenere tahi akiti: — Nikare terota Enore Kalorexe Aohenere kaxemakawatikisaka hoka waini. Waini xakore hoka kasehete-hitiya. Exe Jesus noxakaitere xihiye atyo Enore Kalorexe Aohenere — nexa.

<sup>4</sup> Paulo, Silas xoaha niraine haiyanae tyakeko hoka exema maniya tyaonaha. Kahare hisoaka Grécia nali tyaoniterenae awaiyetya Enore hoka tyaonaha tehitija Silas, Paulo koamaniya. Ohironae kalorexeneronae tehitija kahare tyakekoha hoka ekoamaniyah tyaonaha. <sup>5</sup> Xakore hoka haiyanae judeunae matyakekotiterenae okoawahareha hoka ehareha ihiyeha hoka xaneha ahotyaho tawaha maheta xalijiniharexenae xahita hoka Jesus koamaniya tyaoniterenae xahita xalijinihareha maheta. Xane ahohisakoatyah xalijiniharexenae hoka kahenehare mokaha hatyo koa wenakalati. Xane kaokaha Jasão hana nali hoka Paulo, Silas xoaha xahita tawaha, nolohenahitene haliti hisoakere koni maheta.

<sup>6</sup> Xakore hoka maisa kaokahitaha Paulo, Silas xoaha hoka xalijinihareha Jasão xahita hoka nolokehekoatyahene, exahe haiyanae iraiti tyakekoterenae harenae noloke-hekoatyah hoka xane hikoaha kalorexenae nali ekakoaha hoka nexa kawiyatya: — Etake halitinae kaokeheneha hoka kirasakihare tyaoniterenae wenakalati nihatuya, kalikini ali kaokaha wawenakala. <sup>7</sup> Exahe Jasão hahanako mokahitene. Hatyonai maisa semaxematyareha xekohaseti Roma yere niraene. Hatya atyo kalorexe xekohaseti Jesus nexarexe aokahitaha — nexaha, kinatyaxa iraeha.

<sup>8</sup> Nikare irae hoka hisoakere haliti, exahe kalorexenae hatyo iraiti semaha hoka maisa waiyeta ihiyeha hoka tyotya haliti kahare iraehekoatyah. <sup>9</sup> Hatyaoseta kalorexenae habakatyakaha aokaha hoka Jasão, ihinaeharenae bakatyahene hoka hatyaoseta halakisahene.

### *Beréia Nali*

<sup>10</sup> Hatyaoseta makehena hoka Paulo, Silas xoaha ihinaeharenae axikatyah Beréia nali xeta. Beréia nali xane kaokaha hoka xaneha judeunae xahohisakoatyakala hana nali.

<sup>11</sup> Nali tyaoniterenae atyo waiyexehare, maisa atyo Tessalônica tyaoniterenae akerexeha xini, sema atyo aokowiyyahitaha iraiti. Ferakiti nihatuya atyo waiye kaixaretyahita babera Enore niraene kakoare. — Xoana aliterexe xamani aokita Paulo, maisa xamani hoka — nexaha.

<sup>12</sup> Nikare kahare tyakekoha Paulo niraine, tyaonaha Iraiti Waiyexe xema. Ekakoita kahare Grécia yerenai, exahe Grécia yolonae kalorexeneronae hoka tyaonaha Iraiti Waiyexe xema.

<sup>13</sup> Hatyaoseta Tessalônica nali tyaoniterenae judeunae semaha Paulo xakaini Enore niraine Beréia nali hoka tyoaha hatyo nali xeta. Nali xaneha aisatanakotyah Beréia nali tyaoniterenae hoka xalijinihare tyaonaha maheta Paulo, ihinaeharenae xoaha xahita.

<sup>14</sup> Hatyaoseta iraiti tyakekoterenae axikatyah rota Paulo one kaloxere kilhi maniya. Xakore hoka Silas, Timóteo xoaha atyo hekota Beréia nali. <sup>15</sup> Paulo hinaenae, kahawaonitaretiterenae xaneha exema Atenas kijiya. Hatyaoseta haikoahenahitaha

Beréia nali xeta hoka Paulo niraine xakaiha Silas, Timóteo xoaha hiye, ihalahareha Atenas nali ahalakoahenahitene maheta.

### *Atenas Nali*

<sup>16</sup> Paulo atyahakaheta Silas, Timóteo xoaha xahita Atenas nali hoka waiya hatyo wenakalati nali kahare enore metalahare xaemenekotyaka hoka maisa waiyeta ihiye.

<sup>17</sup> Hatyo hiyeta xane judeunae xahohisakoatyakala hanako hoka iraeta hatyo tahi akiti judeunae, majudeuneharenæ Enore koamaniya tyeoniterenæ hiye. Exahe ferakiti nihatyaka xane iraeta wetekokoa nali tyeoniterenæ kakoa.

<sup>18</sup> Haiyanæ xaotyakisatiyenæ, epicureu, estoico xoaha aokahiterenæ tehitia irae-sekoatyahitaha ekakoa. Axakakoahitaha hare. — Xoare nexa aokowita exe mawaiyore-hare?

Haiyanæ ekoaxatyahitene: — Motya xamanita hahotyaliharenæ nenorexa tahi iraetaka — nexaha. Nikare irae ahitaha, Paulo xakaita Jesus tahi akiti, exahe kamati kaseneheta tahi iraeta hoka.

<sup>19</sup> Hatyaoseta nolokahene Areópago aokahitere nali, kalorexenæ hohisakoahitere nali hoka axehenene: — Wasema waokowita hiyaotyakira waitare kalikiniye hiyakaitere akiti. <sup>20</sup> Xoalini hare hiyakaitere akiti maisa waiyekehalakere womana hoka hatyohare akiti wasema waokowita — nexaha. <sup>21</sup> Tyotya Atenas nali tyeoniterenæ, exahe hahotyaliharenæ nali tyeoniterenæ hoka awaiyetyahitaha waitare iraiti hoka nikarahitaha. Semaha waitare hoka xakaihakatya mene aokowitaha hoka.

<sup>22</sup> Hatyaoseta Paulo tityoa Areópago nali hoka nehena ihiye: — Xasemehena, xiso Atenas tyeoniterenæ: xikaenorexere, kahare xahekoita xenorexanai akiti kakoa.

<sup>23</sup> Hiyaiya, nojiyehena ali wenakalati koa hoka xahotylikisa kakoitere nali nowaiyita hakiti exakere xairatyoare nowaiyita:

### ENORE MAWAIYAKAHARE ANERE

— Hatyo Enore mawaiyakahare xakoitere waiyexe tahi terota atyo noxakaita xihiye.

<sup>24</sup> Hatyo Enore atyo waikohekoia tyoma, exahe tyotya xoalini hare enakoa tyeoniterenæ tyoma. Hatyo atyo enokoa waikohe waikatehare tyonita hoka maisa atyo haliti nómame hatyako tyonare. <sup>25</sup> Maisaiya atyo xoare maheta xoalini harenæ kaomakita enomana. Hiyaiya, hatyo atyo wenati ijita tyotya ana, xiyawinisoati, tyotya xoalini hare.

<sup>26</sup> Haterore haliti hiyeta kahare hotyalihare haliti tyoma waikohekoia tyonaha maheta. Hatyo atyo aimenekotyaka ferakiti, halitinae nawenakala aose harenæ. <sup>27</sup> Nikare Enore moka tawaha exahita maheta, xoana xamani hoka kaokahene maheta. Hiyaiya, maisa seko xini tyonita wonita. <sup>28</sup> Hiyaiya, ihiyeta atyo wisaonita. Wimoxomoxota, wikinaseta wisaonita haiyanæ xinekonitarenæ iraetere akere:

Wiso tehitia atyo Enore ityaninai

### *Miyanitiye Xaxalisati (Apocalipse 20.11-15)*

<sup>29</sup> — Hiyeta hoka maisaiya aliyakere Enore halitinae hawaiyoreha hiyeta tyomahitere enore metalahare ouro, prata, sehalli akerehare waokita. <sup>30</sup> Hetati ene maisa Enore xoare nexare exehare mawaiyoliniti xakaka. Hoka kalikini atyo kasani tyotya hakakoare haliti halakihena hawenane iniyalahare aokita. <sup>31</sup> Koxaka aimenekotyaka: miyanitiye xowakehenaite semehena tyotya halitinae nómame, hatya haliti waiyexe aohenere xaihako maniyata. Hoka tyomahiterene akereta mokahene. Hatyo harenæ hotikisa tyotya halitinai ana hatyo haliti ekasekihetehenere xowaka — nexo.

<sup>32</sup> Paulo niraine semaha kasetyatiheta tahi hoka haiyanæ koexahalisahene. Xakore hoka haiyanæ atyo nexaha: — Haxowakaite wasemehitiya waokowi hatyo hiraitere akiti.

<sup>33</sup> Hatyaoseta Paulo nalita xaneheta. <sup>34</sup> Hoka haiyaharenæ tyakeko hoka tyonaha iniraine xema maniya. Dionísio, hatya ohiro Damáris nexalolo, exahe haiyanæ tehitia hoka tyakekoha. Dionísio atyo kalorexe, kalorexenæ kakoa hohisakoita Areópago nali.

## 18

*Ehateneha Corinto Nali*

<sup>1</sup> Hatyo najikinita Paulo xaneheta Atenas nalita hoka xane kaoka Corinto nali. <sup>2</sup> Nali ahalakoatya hatya judeu, Áquila nexarexe, wenakalati Ponto naliyere. Kaokeheta taita Itáliata haiyanityo Priscila kakoa. Tyotya judeunae kikisoaneheta Roma nalita aoka kalorexe Cláudio hoka hatyo hiyeta tyoheta. <sup>3</sup> Paulo xane waiyahene hoka hatyaoseta hekota ehaliyaha haka ekakoaha maheta. Paulo, hatyonae xoaha hati bojirise nomase-hareha makere hoka. <sup>4</sup> Hoka sábadohena nihatyaka Paulo xaneta xahohisakoatyakalati hanako hoka iraeta judeunae, Grécia yerenai xoaha kakoa, iniraene akereta tyeonaha maheta.

<sup>5</sup> Hatyaoseta Silas, Timóteo xoaha tyoa kaokeheta enomana Macedônia nalita hoka Paulo halakisa hahatene hoka iraiti haxakaini maniya taita tyona. Iraeta judeunae kakoa: — Jesus atyo Enore Kalorexe Aohenere — nita.

<sup>6</sup> Xakore hoka Paulo xakaini maisa waiyeta enomanaha hoka kirawanahene. Hatyaoseta Paulo xaxakatetya haimanase niyaxate exahitaha hoka nehena: — Hoka iniyalahare atyoite xikaxomokakehena hoka maisa natyo xini nikare nokaxomokakihena xiso. Xisota atyoite nikare xamokoawihena — nexa. — Hoka kalikini atyoite noxani noxakaihena iraiti majudeuneharenae hiye.

<sup>7</sup> Hatyaoseta halakisahene hoka xaneheta enonitaha, xane tyona Tício Justo haliya. Majudeunehare xakore hoka Enore koamaniya tyeonita. Ehana atyo judeunae xahohisakoatyakala hana haliyita. <sup>8</sup> Hatyaoseta Crispo, judeunae xahohisakoatyakala hana xekohasehare tyakeko Xekohaseti tahi, tyotya haiyanityo, haisaninae harenae kokoita. Kahare Corinto nali tyeoniterenae semaha iraiti, tyakekoha hoka kabatixatyakaha.

<sup>9</sup> Hamakiyene Paulo kaxawaiyanikisaka. Xekohaseti iraeta ekakoa: — Awa atyo himairehena. Hekoira hirae, awa atyo hahalakisa hiraene. <sup>10</sup> Hiyaiya, nokaxaikota hiso. Maisaiya xala hare iniyalahare mokita hiso. Aliyerenae kahare nomaniye — nexa Xekohaseti ihiye.

<sup>11</sup> Nali Paulo haterehokoane mokotexe tyona, awaiyekehalakaita Iraiti Waiyexe nali tyeoniterenae ana.

<sup>12</sup> Hatyaoseta, Gálio xekohaseti tyoahenere Grécia nali xowaka, judeunae ahohisakoatyakako hoka Paulo otokaha, xaneha kalorexenae ana ekakoa <sup>13</sup> hoka nexaha kalorexe hiye: — Exe haliti kasani halitinae jiyahaotya hoka Enore koamaniya tyeonaha aokita. Xakore hoka maisa Roma yerenai xaotyakisakaho akereta xini aotyakijita. Nikare hoka maisa waiyeta — nexaha.

<sup>14</sup> Paulo xakore irae aokowihena hoka Gálio nehena judeunae hiye: — Ikoiya xoalini hare tyomita iniyalahare hoka xaokitere akeretayi notyoma. <sup>15</sup> Hoka iraiti xemere, xahetakomaniyerenae xaotyakira tahi xemere taita hoka maisaiya xoare notyomita. Xisota hatyo akiti xahekotya. Maisa nasemene naokowiye — nexa. <sup>16</sup> Hatyaoseta aehikoahenahitene xekohaseti hana nalita.

<sup>17</sup> Hatyaoseta otokaha Sóstenes, judeunae xahohisakoatyakala hana kaxaikotyashare, hoka mokohekoatyahene kalorexe hana nahalakoita. Xakore hoka maisa atyo kalorexe Gálio watyalyahitene.

*Haikoahetehenere Antioquia Xeta Tahi*

<sup>18</sup> Paulo waha tyona Jesus koamaniya tyeoniterenae kakoa Corinto nali. Hatyo najikinita jinahetahene hoka xaneheta kanowa kalorexe ako Síria xeta, Priscila, Áquila xoaha kakoa. Xane kaoka wenakalati Cencréia nali hoka talowalisa hakaiyehe, Enore kakoa iraehenere akereta.

<sup>19</sup> Hatyaoseta jiyehenahitinya hoka xane kaokaha Éfeso nali hoka Priscila, Áquila xoaha halakisa hatyo nali. Paulo xane judeunae xahohisakoatyakala hanako isoa hoka iraesekoatya naliyerenae kakoa. <sup>20</sup> Hatyaoseta, kasani waha tyona ehaliyaha aokaha xakore hoka maisa aoka.

<sup>21</sup> Xanehitiya hoka nexa ihiyeha: — Enore xaokalitaiya hoka haxowakiya notyoa nowaiyihitiya xiso — nexa.

Hatyaoseta Paulo kanowa kalorexe ako xanehitiya Éfeso nalita. <sup>22</sup> Hatyaoseta xane kaoka Cesáréia nali, hoka hixeroreta jiyejitiya Jerusalém xeta waiya maheta Jesus koamaniya tyaoniterenae hoka hatyaoseta jiyejitiya Antioquia xeta Síria koa maniya. <sup>23</sup> Nali tyaohena mene hoka jiyejitiya. Xane Galácia koa Frígia koa aihalahalinikijita Jesus koamaniya tyaoniterenae.

### *Apolo Kaoka Éfeso Nali*

<sup>24</sup> Hatyaoseta hatya judeu Apolo nexarexe wenakalati Alexandria nalitare kaoka Éfeso nali. Waiyore xakaihakaita, awaiyekehala kaita iraiti, tyotya hakakoare Iraiti Waiyexe nanekoa tyaonitere waiyekehala kaita enomana hoka. <sup>25</sup> Xekohaseti koamaniya nawenatyaka kakoa tehitiya exaotyakisakahare. Haihalaharene kakoa iraeta, waiyekehala aotyakijita Jesus tahi akiti. Xakore hoka João batixaitere akiti taita atyo waiyekehala kaita enomana. <sup>26</sup> Xakaihakahena judeunae xahohisakoatyakala hanako, haihalaharene kakoa hoka Priscila, Áquila xoaha semaha iniraine hoka nolokahene hahanako, waiye awaiyekehala kaita maheta enomana Enore koamaniya nawenatyakaho akiti.

<sup>27</sup> Hatyaoseta Apolo xane aokowi Grécia xeta hoka tyakekohatiyena kahinaetyahene hoka babera xairatyaha. Xane kaokehena hoka waiye mokahene maheta. Xane kaoka hoka kahare kahinaetya Enore xawaiyerahene hiyeta tyakekohenerenae. <sup>28</sup> Apolo aiyateretyoa iraeta judeunae xahita. Waiyore iraeta ekakoaha hoka jiyahaotyahitene halitinae haotita. — Jesus atyo Enore Kalorexe Aohenere — nexa, kaxairatyakehenere Iraiti Waiyexe nanekoa tyaonitere tahi hotikijita enomanaha.

## 19

### *Paulo Tyaponita Éfeso Nali*

<sup>1</sup> Apolo Corinto nali tyaonitere nase Paulo xane hamaniya hoka xane kaoka Éfeso nali hoka haiyaharenae tyakekohatiyena ahalakoatya. <sup>2</sup> Hoka Paulo axahene: — Xoana xityakekohenere xowaka Isekohaliti Waiyexe kaoka xomana?

— Maisa Isekohaliti Waiyexe akiti wasemare ini hekoti — nexaha.

<sup>3</sup> — Hoka xoare nawenatyaka xema maniya xikabatixatyaka? nexa Paulo axahene.

— João Batista batixahenere akereta atyo wikabatixatyaka — nexaha Paulo hiye.

<sup>4</sup> Hatyaoseta Paulo nehena: — João batixaitere xowaka atyo halitinae iniyalahare háomane halakihititreharenae anere. João tehitiya aotyakijita Israel hotyalinae, kasani enajikinita tyohenere tyakekoha aokita hoka. Hatyo enajikinita tyohenere atyo Jesus.

### *Hawarehare Xakoti*

(Atos 2.4-8; 10.45-46; 1 Coríntios 14.1-40)

<sup>5</sup> Hatyo akiti semaha najikinita kabatixatyakaha Xekohaseti Jesus nexare kakoa.

<sup>6</sup> Hatyaoseta Paulo ekaokakisa hakahe ihiyeha hoka Isekohaliti Waiyexe exoa tyotya enomanaha. Hoka iraehenaha rotita iraeti masemakahare, hoka Enore tahi tehitiya xakaihenaha. <sup>7</sup> Exe halitinae 12-hareha.

<sup>8</sup> Paulo hanamali kaimare xane minita judeunae xahohisakoatyakala hanako. Hoka hamamairanenehare kakoita iraeta halitinai kakoa. Iraeta ekakoaha, kasani Enore koamaniya mokahene aokowita hoka. <sup>9</sup> Xakore hoka haiyaharenae atyo maisa semaxematyare, maisa tyakekoreha, iniyalahare iraetaha Xekohaseti koamaniya nawenatyakaho tyotya haiyaharenae haotita. Hatyaoseta Paulo nalita hikoaheta hoka noloka tyakekohatiyena. Hatyaoseta ferakiti nihatyaka xakaihakahena ihiyeha hatya haliti Tirano nexarexe xaotyakisakala hanako.

<sup>10</sup> Nikare aotyakisahitene hinama terehokoane. Ekakoita tyotya Ásia koa tyaonitere-nae, judeunae, majudeuneharenae hare semaha Enore niraine.

### *Ceva Ityaninae*

<sup>11</sup> Enore kahare xoalini hare waiyexe tyoma Paulo xaihako maniyata. <sup>12</sup> Paulo mokitere hahiye imiti taose kolatyahitaha hokakitinae ana otokahene maheta. Otohenaha hatyo hoka kinaterehenahititaha rotita. Exahe hatyo kakoa tihanare kamilakoretiterenae nonita tihanare axanikihenahititaha.

<sup>13</sup> Haiyaharenae judeunae hakoa wenakalati xaneta, hakoa wenakalati xaneta xoahita hoka axikahenahititaha isekohaliti ewaxiraharenae. Hatyaoseta Xekohaseti Jesus nexare kakoa irae ahitaha, kasani Paulo tyomitere akereta tyomaha aokowiyahitaha hoka. Nexahitaha isekohaliti ewaxiraharenae hiye: — Jesus nexare, Paulo xakaitere kakoa naxikaheta xiso xiyanaheta maheta — nexaha. <sup>14</sup> Hatyo nikare tyaoniterenae atyo 7-hare judeunae, Ceva nexarexe ityaninae. Ceva atyo sacerdotenae xekohase.

<sup>15</sup> Xakore hoka isekohaliti ewaxirahare nexa ihiyeha: — Nowaiyita Jesus, exahe Paulo hoka nowaiyita. Hoka xalanai atyo xiso? nexa. <sup>16</sup> Hatyaoseta hatyo haliti kakaxaihakoretyakitere jiya enomanaha, mokohekoatyahene hoka aekoakisahene hatyakota. Inimanaiha halalaka, kawe mokahene. <sup>17</sup> Tyotya Éfeso nali tyaoniterenae, judeunae, majudeuneharenae xoaha semaha hatyo tahi akiti hoka kalore mairaha hoka exowakerota exahehara aiminisaha Xekohaseti Jesus nexare.

<sup>18</sup> Hatyaoseta haiyanae iraiti tyakekoterenae iraehetehena tyotya haiyaharenae haotita hetati iniyalahare tyomahitere tahi. <sup>19</sup> Exahe haiyanae haholitaharexenae tehitiya ahohisakoatyaha hababeranexaha, keratyahene maheta tyotya haiyaharenae haotita. Ihatehenahitaha hatyo hababeraxaha kerahenahere xaimane hoka 50.000 hokose prata xaimanexe xane tyaona. <sup>20</sup> Nikare Xekohaseti niraine kinatere xaore hoka kahare haliti tyaona exema maniya.

### *Emawaiye Nawenaneha Éfeso Nali*

<sup>21</sup> Hatyo najikinita Paulo xane aokowi Macedônia koa, Acaia koa xoaha. Hatyota xane aokowi Jerusalém nali xeta. — Jerusalém ite noxani hoka hatyo najikinita noxani Roma nali xeta — nita.

<sup>22</sup> Hatyaoseta axikatya Macedônia xeta hinamahare hahinaenae haheta maniya Timóteo, Erasto xoaha. Hoka wahase atyo tyaona Ásia koa nali.

<sup>23</sup> Hatyo xowaka maisa waiyihitita wenati tyaohitita Éfeso nali Xekohaseti koamaniya nawenatyaka hiyeta. <sup>24</sup> Hatya ouro, prata hiye hakatyasehare Demétrio nexarexe nali tyaonita, hoka hatirisena tyomita haenoloxa Diana anere hoka betetyahene. Nikare haiyaharenae hakiterenae ekakoa tyaonaha hoka kalore kaoloxita. <sup>25</sup> Demétrio eharehena hoka hatyaoseta kawisa hatyohare hiye hakiterenae hoka nexa: — Nohinaeharenae, xasemehena. Exakere wahakita hoka waiye wikaoloxita. <sup>26</sup> Xasemehena, waiye nikare wisaonita ene hoka exe Paulo kaoka. Koxaka xasema etahi. Halitinae nômane atyo maisa Enore kaiserehare xini aokita. Hoka kahare haliti alitare, exahe Ásia koatare tyakekoha iniraene. <sup>27</sup> Exakerite hoka ekakoita halitinae matyakekotya wixiyyaharenae. Maisa exe taita xini. Nikarite hoka hati Diana anere ite kahalakisaka hoka nikaretaite maika kahalakisaka tehitiya enolo Diana. Tyotyaha Ásia koa tyaoniterenae ene haenoloxa aokahitene, exahe seko tyaoniterenae tehitiya hoka — nexa.

<sup>28</sup> Hatyo akiti halitinae sema hoka ehareha kawerahare hoka kawisaha: — Maika tyaona mene Éfeso tyaoniterenae nenoloxa Diana.

<sup>29</sup> Hatyaoseta werahaliti xaorekoia wenakalati koa. Hatyaoseta halitinai otoka Gaio, Aristarco xoaha. Hatyo hinamanae atyo Macedônia yere hoka Paulo hinaenae. Nolokehekoatyahene, xane isoaha ekakoia xoalini hare ana halitinae wahakotitere nali. <sup>30</sup> Hatyaoseta Paulo xakore xane irae aokowihena hisoakere halitinae kakoa hoka ihinaeharenae mahokoanitya iniraene. <sup>31</sup> Paulo hinaehare kalorexe tyaoniterenae axikatya hairaeneha enomanha, emaxisoanene aokaha hisoakere halitinae tyaoniterenae nali. <sup>32</sup> Hatyaose nikare tyaonahitaha hoka kahare haliti maisa waiyekhalaka tyaonare. Hatya hahekore kawisa, hatya hahekore kawisa xoahita. Hoka kaharexe haliti ana atyo maisa waiyekhalakere xoare hiyeta xamani nali tyaonahitaha hoka.

<sup>33</sup> Hatyaoseta haiyaharenae motya Alexandre nikare enawenaneha mokita aokahitaha hoka judeunae axikatene irai maheta ekakoaha. Hatyaoseta Alexandre isoa enekoniha hoka hohotya hakahe kakoa enomanaha mema tyaonaha hoka irae ekakoaha maheta, kasani awaiyekehala katya aokowita hatahi halitinae ana hoka.

<sup>34</sup> Hatyaoseta waiyahene hoka waiyekehala kahare enomanaha, judeu nika hoka haxawalita kinatyaxa kawiyatyaha: — Maika tyaota mene Éfeso tyaoniterenae nenoloxa Diana — nexaha, waha kinatyaxa kawiyatyaha.

<sup>35</sup> Hatyaoseta wenakalati kaxaikotyasehare wakanehare, babera xairatyasehare, irae ekakoaha mema tyaonaha hoka nehena: — Xasemehena, Éfeso tyaoniterenae. Wenoloxa Diana hana atyo ali tyaonita hoka waiye kakaxaikotyakere tyaonita, exahe sehalil taose enokoata exoahenere tehitia hoka waiye kakaxaikotyakere tyaonita. Hatyohare akiti atyo tyotyaha ana waiyekehala kaita. <sup>36</sup> Hoka maisaiya xala hare hatyohare maho koanetita. Hatyo hiyeta xahalakihena nikare xisaonitere. Awa atyo xoalini hare xisoma ximaxahekolahareneta. <sup>37</sup> Hiyaiyaore, xanoloka exe halitinae ali, maisa xakore xoare hare iniyalahare tyomareha wenoloxa Diana hana kakoa, maisa xakore kirawanexahene hekoti hoka. <sup>38</sup> Maika Demétrio, exahe ekahinaetyaseharenae hatya kakoa kahalakoaharehena hoka hatyohare niyahare atyo kaferakenexe kaxahohisakoatyakakoita, hatyohare niyahare atyo kalorexenae. Hoka hatyo nali atyoite waiye hatyo nali iraeha. <sup>39</sup> Hoka maika xoalini hare xirae xaokowihitiya hoka hatyoharenae atyoite kairalityaka halitinae ahohisakakoatyaoahena hoka wawenanaho akereta hoka. <sup>40</sup> Hiyaiya, kahenehare xamokita wawenane. Exakereya xisaona hoka maisaiya waiyeta kalorexe hiye. Wikairawaiyakaiya kalikini exakere tyaonitere hiyeta. Maisa ene kaxiye hare kawenatyaka maheta xini. Aliyakereya tyoty exeharenae wawaiyekehala kaita kalorexe ana, axehena wiso hoka? nexa ihiyeha.

<sup>41</sup> Nixa taita irae hoka xahotyalikisakakoati miyatya.

## 20

### *Paulo Jiya Macedônia Koa, Grécia Koa Nali*

<sup>1</sup> Tyotya hatyo werahaliti hoka Paulo kawisa hahinaeharenae hoka aihalahalinikisahene. Hatyaoseta jinakahene hoka xane enonyahitaha Macedônia xeta. <sup>2</sup> Hatyaoseta Macedônia koa jiya, aotyakijita, aihalahalinikijita harenae tyakekohatiyena. Hatyaoseta xane kaoka Grécia nali hoka <sup>3</sup> nali hanamali kaimare tyaona. Xanehena ene Síria nali xeta aokowi hoka judeunae aisahene aokowiterehare tahi sema hoka haikoaheta Macedônia maniya. <sup>4</sup> Hatyaoseta haiyaharenae xane exema: Pirro ityani Sópatro, Aristarco, Segundo, Gaio, Timóteo, Tíquico, Trófimo xoaha. Sópatro atyo Beréia nalitare. Aristarco, Segundo xoaha atyo Tessalônica nalitarenai. Gaio atyo Derbe nalitare. Timóteo, Tíquico, Trófimo xoahanae atyo Ásia koa nalitarenai. <sup>5</sup> Hatyonae xane wahítita, atyahaha wiso wenakalati Trôade nali. <sup>6</sup> Hisehaliti nakairatinae makaketatyakahare kaomakehenere aokahitere najikinita wiijiyehtiya wenakalati Filipos nalita kalorexe kanowako. Hatyaoseta 5-ki ferakene najikinita wiyanne wikaokehenahitene wenakalati Trôade nali. Hatyo nali hasemanane wisaona.

### *Paulo Xane Trôade Nali*

<sup>7</sup> Domingo makiyene wahohisakakoakoa wihinaeharenae kakoa hoka wirakakakoa nakairati. Paulo xakaihakahena wihiye, heko wahaxati ihiye haxakaihakala kakoita. Kamaetalii xanehetehena hoka.

<sup>8</sup> Hati ehaore ako wiho hisakoitire nali kahare xaokanatyakalati takoare tyaonita.

<sup>9</sup> Hatya xoimahaliti Éutico nexarexe tyokita janela kanase. Hoka Paulo heko xakaihakaita hoka ekakoita xoimahaliti nemaka kawehena. Hatyaoseta nemaka hoka exoa enoakota. Ainakihetehenahene xakore koxaka waini.

<sup>10</sup> Hatyaoseta Paulo exoaheta meholokoa xakoloharetya xoimahaliti hoka nehena: — Awa atyo ximawaiyehare, kasetata.

<sup>11</sup> Hatyaoseta Paulo enoako kakohaheta, iraka nakairati hoka kanakaira. Heko waha aka iraeta, heko hairaene kakoita ferakoa ihiye. Hatyaoseta xaneheta. <sup>12</sup> Hatyaoseta xoimahaliti kakoa ehanako xanehenahitaha. Kinatere tyaoheta hoka ihalaharehenahitaha ekakoa.

*Xaneha Trôade ta Mileto Xeta*

<sup>13</sup> Hatyaoseta wiyanehitiya kanowa kalorexe ako. Wiyane wahikoa wenakalati Assôs nali kanowa xamematyaoakala nali. Hatyo nali Paulo wiyatayahane hoka. Nali haxatyahaka aoka, tonare tyoita hoka. <sup>14</sup> Tyoa hikoaheta womana Assôs nali hoka kanowa kalorexe ako haxawalita wiyanehitiya Mitilene nali xeta. <sup>15</sup> Hatyaoseta kamaetali hoka wiyyiehitiya nalita, wiyaneyirotikoa tyaohenere Quios haliya wiyyi. Kamaetali hoka wiyaneyirotikoa Samos nali, nikare kamaetali hoka wiyaneyirotikoa Mileto nali wahikoa. <sup>16</sup> Paulo maisa Éfeso nali tyaona aokowita, exahe Ásia koa hoka maisa waha tyaona aokowita. Kasani haxerore kaoka aokowita Jerusalém nali hisehaliti Pentecostes ferakene nahitita hoka. Hatyo hiyeta kaholawakita.

*Paulo Xakaihakala Tahi*

<sup>17</sup> Paulo Mileto nali tyaonita hoka kawisa iraiti tyakekoterenae nityohalitiranae Éfeso nali tyaoniterenae ahalakoatyahene maheta.

<sup>18</sup> Tyoa kaokaha hoka Paulo nexa: — Waiyekehala kitala atyo nawenani akiti xomana. Hetati nokaokihenere Ásia koa xowaka, exahe kalikini kijiya hoka waiyekehala kitala xomana.

<sup>19</sup> — Xekohaseti wakanehare natyo hoka nohateni notyoma nomaxaheniriharene kakoa. Haiya xowaka notiyita, howithare nawenani tyaona, judeunae kahalakoahare ahitere nokakoi hiyeta. <sup>20</sup> Xiyaiya, noxakai atyo Iraiti Waiyexe xihiye. Naotyakisa xiso halitinae haotita, exahe hatinae nihatayakako hoka naotyakisa nakahinaetya maheta xiso. Exeharenanae atyo waiyekehala kitala xomana. <sup>21</sup> Naiyateretyoa judeunae, majudeuneharenanae hiye, halakisaha iniyalahare háomaneha hoka Enore koamaniya tyaonaha hoka tyakekoha Xekohaseti Jesus maheta.

<sup>22</sup> — Hoka kalikinite noxanihena Jerusalém xeta Isekohaliti Waiyexe xaokala ximita. Maisa notyare nahiti maniya, xoana xamanite nali notyaoehena. <sup>23</sup> Isekohaliti Waiyexe xakaita nohiye, tyotya wenakalatinæ koa nojiyehena hoka. Noberexotyaki, exahe nawenani howitharexe nahiti maniya tyaonita aoka. <sup>24</sup> Xakore hoka maisa atyo hatyohare hiyeta nomawaiyeharexe nokakoi. Kasani atyo namiyatya naokowita nohateni, Xekohaseti Jesus isehenere nomani. Hatyo nohateni atyo exe: Iraeti Waiyexe exahe Enore xawaiyera halitinae tahi akiti xakaisaka.

<sup>25</sup> — Notyaonita xinekoni hoka noxakaita xihiye Enore koamaniya nawenatyaka tahi akiti. Hoka kalikini atyoite maisa xiyaiyehitita natyo. <sup>26</sup> Hiyeta hoka kalikini aliterexe niraeta xihiye: xala xamani atyoite hamawenekoaretyakaho xane hoka maisa atyoite nohiyiti xini nikare tyaona. <sup>27</sup> Xiyaiya, noxakai atyo xihiye tyotya Enore ahekoitreharenanae tahi akiti.

<sup>28</sup> — Maika xikaxaikoawi, exahe tyakekohatiyenæ hoka xikaxaiko. Hiyaiya, Isekohaliti Waiyexe ekaxaikotyaseha maheta moka xiso hoka maika waiye xikaxaikotahene. Hiyaiya, Haisani timalaxa hiyeta iyehetehenerenae atyo. <sup>29</sup> Exe akiti kakoa nawaiyore: noxanihene najikinite ahoxa xalijiniharexe akerehare haiyanæ haliti kaokehena xomana hoka maisaya airakoaneharetahitaha tyakekohatiyenæ. <sup>30</sup> Exahe haxowakaite hoka haiyaharenanæ xinekonitarenanæ maoserahenaha, hahinaeharenanæ hawenaneha akereita mokaha maheta.

<sup>31</sup> — Hiyeta hoka maika xiriharira. Xotyaxematyæ hanamaki terehokoane naotyakihenere xiso, ferakoa, makiya xoaha kakoita. Haiya xowaka nosexi kakoita naotyakijita xiso. <sup>32</sup> Kalikini atyo nahalakihena xiso Enore ana kaxaiko maheta xiso. Koxaka xasema exawaiyera xiso akiti. Hatyo atyoite kahinaetya xiso hoka heko xikinatere xisaona, exahe tehitiya hoka waiyexe isa xomana hakaxaikone hotyali ana mokitere.

<sup>33</sup> — Maisa atyo hatya xiyebare nomaiyasexe, maisa ouro, prata, imiti harenae hekoti naokare nomani. <sup>34</sup> Hiyaiya, nokahe kakoita nahaka hoka niya naokitereharenae exahe nohinaeharenae aokitereharenae hoka. Hatyohare akiti waiyekehala xomana.

<sup>35</sup> — Tyotya xoalini hare hateniti hiye nahotikisa nawenani xomana. Nikareya atyo hoka maxiyebareharenae wakahinaetya. Xotyaxematy Xekohaseti Jesus niraene: “Waiye kaiserehare atyo ijitaterehare hatya resebetiterehare nonitata”.

<sup>36</sup> Hatyaoseta Paulo halakisa hairaine ekakoaha hoka hakaoli kakoa tyoka hoka iraexatya hahinaeharenae kakoa. <sup>37</sup> Hatyaoseta xakoloharetya, sohitankolihenaha Paulo hoka tyotyaha tiyaha. <sup>38</sup> Tyotyaha kalore amaikeharenahene aohenere hiyeta. Hatyaoseta xane mokaxematyahene kanowa kalorexe nali.

## 21

### *Paulo Xane Jerusalém Xeta*

<sup>1</sup> Hatyaoseta wijnahenahitene hoka wiyanaheta enonyahitaha kanowa kalorexe ako. Wiyane fihi iyolirotikoa tyahenere Cós nali xeta. Kamaetali wiyanne wamematyoa wenakalati Rodes nali. Hatyaoseta wiyanahitiya wenakalati Pátara nali xeta. <sup>2</sup> Nali hatya kanowa kalorexe wahalakoatya Fenícia koa xetare hoka hatyoako wiyanahitiya. <sup>3</sup> Hatyaoseta wiyanne wahikoa hakiti hoka nalita wiyaiya Chipre iyolirotikoa, xakore hoka fihi wijiya wiwatone maniya Síria koa maniya. Wikaoka wenakalati Tiro nali. Hoka hatyo nali wexoa hoka kolare exoakisaha kanowa akota. <sup>4</sup> Nali haiyaharenae Jesus koamaniya tyaniterenae ana wahikoa hoka hasemanane wisaona ehaliyaha.

Hatyaoleta Isekohaliti Waiyexe aotyakisa hatyo naliyerenae hoka Paulo hiye iraeha hoka maisa xaneta maheta Jerusalém xeta. <sup>5</sup> Xakore hoka wiyanene ferakene hikoa hoka wiyanahitiya. Hoka tyoaha wihinaeharenae wiyma, haiyanityonaiha, haisaninaiha harenae kakoa. Hatyaoseta sekose wenakalati nonitata wityotya wisoka wikaolise kakoa one kilihi hoka wiraexatya. <sup>6</sup> Hatyo najikinita wijnakahene hoka wiyanne wakakoha kanowa ako hoka hahanaha xeta haikoahenahitaha.

<sup>7</sup> Hatyaoseta wijiyeitiya Tiro nalita wenakalati Ptolemaida nali xeta. Hatyo nali Jesus koamaniya tyaniterenae wahalakoatya hoka wikitawaxa ihiyeha, haki ferakene wisaona ehaliyaha. <sup>8</sup> Kamaetali wijiyeitiya hoka wiyanne wikaoka wenakalati Cesáréia nali hoka wiyanne Filipe iraeti xakaisasehare hanako wisoa hoka wisaona. Filipe atyo Jerusalém nali 7-harenae kaxomokakehenerenae konitare. <sup>9</sup> Kaisaniye 4-halo, maiyanenehalo makereha, Enore niraene xakaisasehalonae.

<sup>10</sup> Wahasehena wikaokene najikinita wisaonita hoka tyoa kaoka Judéia koa nalita hatya iraiti xakaisasehare Ágabo nexarexe. <sup>11</sup> Tyoa kaoka womana hoka iya Paulo jiterone hoka olatya hakiji, hawaotyali xoaha hiye hoka nehena: — Exakere nexa Isekohaliti Waiyexe: “Exakerite exe jitero waikate kaxolatyaka Jerusalém nali. Judeunae hiyeta kaxekakaite majudeuneharenae ana xoalini hare tyomaha maheta ekakoa” — nexa.

<sup>12</sup> Wasema hatyo hoka wamaikohare wityotya naliyerenae wihinaeharenae kakoa hoka Paulo máxanene waoka Jerusalém nali xeta.

<sup>13</sup> Xakore hoka nexa wihie: — Xoana hoka nikare xitiyita hoka xexamaikoalinikijita natyo? Xiyaiya, maisa noxolatyaki maheta taita xini nomimiye notyaonita. Nomimiye tehiitiya notyaonita noxaisaki Jerusalém nali niyahare Xekohaseti Jesus hiyeta — nexa.

<sup>14</sup> Wiwatyalini xakore hoka maisa semaxemaita wiraine hoka hatyaoseta wexa: — Maika Enore aokitere akereta kaomaka.

<sup>15</sup> Wahase nali wisaona hoka hatyo najikinita wakaiseheta wixiyebareharenae hoka wiyanahitiya Jerusalém xeta. <sup>16</sup> Haiyanae wihinaeharenae wenakalati Cesáréia nalitarenae tyoaha wiyma. Nolokaha wiso hatyako hoka nali wisaona. Hatyo hati xekohasehare atyo Menasom nexarexe. Chipre nalitare, toahiyita Jesus koamaniya tyanonita.

### *Paulo Xane Waiya Tiago*

<sup>17</sup> Wiyane wikaoka Jerusalém nali hoka wihinaeharenae waiye mokaha wiso haihalaharenahene kakoa. <sup>18</sup> Kamaetali hoka Paulo tyoa wiyma Tiago waiya maheta. Tyotya

Jesus koamaniya tyaoniterenae nityohalitiranae nali makere hohisakoita. <sup>19</sup> Hatyaoseta Paulo katyawaxa ihiyeha hoka xakaihakaty ihiyeha, tyotya Enore xoalini hare tyomehenere ihiyeta majudeuneharenae koni tahi akiti. <sup>20</sup> Hatyo exakaihakala semaha hoka ihalahareha Enore kakoa.

Hatyaoseta nexaha Paulo hiye: — Hiyaiyehena, kahare wihinaehare judeunae tyaonaha Jesus koamaniya hoka Moisés xaotyakira xema kinatere tyaonahitaha. <sup>21</sup> Exakere haiyanai semahitaha hitahi: haotyakijita judeunae hawaikoherakoa nonitata haware tyaoniterenai kasani maisa tyaonaha Moisés xaotyakira xema haokare aokaha. Haotyakijita tehitiya maisa ityaninaeha nomanere milihi xaikotyaka haokare, exahe maisa tehitiya ityaninaeha judeunae nawenanaho tyaona haokare aokaha. <sup>22</sup> Hoka kala kalikini koxaka semaha ali hikaokene tahi. Xoare ite wisomehena hoka tyakekohenaha hiso? <sup>23</sup> Kala maisa hoka exakere hisaona: ali 4-hare haliti tyaonita winekoni, Enore ana xoalini hare iraihenahere tyomaha aokowihenahere akereta tyaonaha maheta. <sup>24</sup> Hiyane exemaha hoka tiyaharetyoahenahitehenere nali hatihaharetyoaheta tehitiya. Hatyaosetaite habakaty enomanaha hoka talowalisaha hakaiyeheha. Hatyo hiyetaite iraehenahere hitahite maisa aliterexe xini aohenahitaha. Hoka tyotyahaite Moisés xaotyakiraho xema nawenatyasehare aohenahitaha hiso.

<sup>25</sup> — Hoka Jesus koamaniya tyaohenere majudeuneharenae ana atyo koxaka babera waxikatya. Exakerexe: “Awa atyo xanisa eteti enore metalaharenae ana fetatyaka. Awa atyo kirakahare timalane xikanakaira, exahe kirakahare kakirolokasetyaka kaxaisakiterehare nete. Awa tehitiya atyo ohiro kakoa iniyalahare xisoma”, wexa.

<sup>26</sup> Hatyaoseta Paulo irae hatyo 4-harenae kakoa hoka kamaetali xane exemaha tiyaharetyoahenahitaha maheta. Hatyo najikinita xane Iraexatyakalati Hanako isoa kaexakaty maheta hatihaharetyoaneha ferakene miyane hoka kirakahare xaisaka fetatyaka ferakene aose xane hikoa.

*Paulo Otokaha Iraexatyakalati Hanakota  
(Atos 22.22; 23.12-15; 2 Coríntios 4.8-12; 11.22-33)*

<sup>27</sup> Hatyaoseta exaimenekolaose etake 7-ki ferakenexe tiyaharetyoati okoi tyotehena hoka haiyaharenae judeunae Ásia koa nalitarenae waiyaha Paulo Iraexatyakalati Hanako hoka hatyaoseta iraetanakotyaha haliti hisoakerenae hoka otokaha Paulo.

<sup>28</sup> Hoka kawihenahitaha: — Xakahinaehena wiso, Israel yerenae! Exe haliti atyo tonakoita, aotyakijita tyotya hakakoare koa, majudeuneharenae kahalakoahare Israel yerenae kakoa maheta. Kasani maisa judeunae xaotyakiraho tyakekoha aokare, exahe maxaimanisaka Wiraexatyakala Hana aokita. Hiyaiya, kalikini ali majudeuneharenae nolokita Iraexatyakalati Hanako hoka aiyalakotya exe waiyexe ako — nexaha. <sup>29</sup> Koxaka waiyaha Trófimo Paulo kakoa Jerusalém nali, hoka motyala Paulo isoa ekakoa Iraexatyakalati Hanako aokahitaha hoka nikarahitaha. Trófimo atyo Éfeso nalitare.

<sup>30</sup> Hatyo mawaikehalakiti kasemaka hakakoare Jerusalém nali hoka hatyo nali tyaoniterenae tema tyoaha. Hatyaoseta otokaha Paulo, nolokehekoatyahene Iraexatyakalati Hanakota. Aihikoahenahitene hoka jihohenahitaha Iraexatyakalati Hana.

<sup>31</sup> Okoi halitinae aisehena Paulo hoka sorarenae xekohasehare sema hatyo Jerusalém tyaoniterenae xalijiniharene. <sup>32</sup> Hatyaoseta kaholawaka ahohisakoatya sorarenae exeko-hasenai kakoita hoka tema xane hikoaha haliti hisoakere koni. Hatyo halitinae waiyaha sorarenae xekohasehare, sorarenae xoaha hoka halakisaha Paulo hamokohekoalaha. <sup>33</sup> Hatyaoseta sorarenae xekohase xane hikoa Paulo ana hoka otokene hoka exolatyaka hinamahi kamatiherahi kakoa aoka. Hatyaoseta axehenahene: — Xala exe haliti? Xoare tyoma?

<sup>34</sup> Hatyaoseta halitinae kawayahena kinatyaxa, haiyanae hahekore, hahekore xakini. Kaxiyehare irae ahitaha hoka sorarenai xekohase ana maisa waiyekehalakere nikare enawenaneha. Hoka Paulo kolatyaka aoka sorarenae tyaonitere hati kalorexe ako nali.

<sup>35</sup> Xane kaokaha ekakoa kakohakalati haliya hoka sorarenae kolatyaha Paulo halitinae nonitata, exaisaka aokahitaha hoka. <sup>36</sup> Exemaha tyoahitaha kawiyatyahitaha: — Xaisehenene, xaisehenene — nexahitaha.

*Paulo Irae Kahawaonitaretyoawi Maheta*

<sup>37</sup> Paulo xane mohenaha sorarenae tyaonitere ako hoka nehena sorarenae xekohasehare hiye: — Xoana waiyehenaiya nirae hikakoa?

— Xoana hawaiyore Grécia yerenai xako hiraeta? <sup>38</sup> Xoana maisa etake Egito tare xini hiso hoka toahiyaseta xalijininiharexenae taita 4.000-hare hanoloka hoka hiyane maharexakahare nali hoka hikirakaharetere xini?

<sup>39</sup> Hatyaoseta Paulo nehena ihiye: — Natyo atyo judeu, wenakalati Tarso nali atyo notyaona, Cilícia koa nali. Tarso atyo wenakalati masakare waiyexe. Xoana, waiyehenaiya hahalakisa natyo hoka nirae exe halitinae kakoa?

<sup>40</sup> Hatyaoseta sorarenai xekohasehare halakisene irae maheta hoka Paulo tityoa kakohakalati heno hoka hakahe kakoa aimenekota mema tyaonaha hoka irae ekakoaha maheta. Hatyaoseta tyotya halitinae mema tyaonaha hoka iraehena ekakoaha hebreu xako hoka nehena:

## 22

<sup>1</sup> — Nohinaeharenae, inityohaliti harenae, xasemehena niraini nakahawaonitaretyoawi maheta — nexa.

<sup>2</sup> Iniraene hebreu xako semaha hoka mema kaiserehare tyaonaha.

Hatyaoseta Paulo nehena: <sup>3</sup> — Natyo atyo judeu, notyaona Tarso, Cilícia koa nali. Xakore hoka ali Jerusalém atyo nokaxanaetyaki, Gamaliel atyo noxaotyakisase. Hoka wahetakomaniyereharenae nawenanaho nokaxaotyakisahenere maisa mahowitihare xini xakore hoka notyaona exema kaiserehare. Enore koamaniya ene notyaonita, ali kalikini xiso xisaonitere akereta.

<sup>4</sup> — Naisa naokowita, noxalijinihareta ene Jesus koamaniya tyaoniterenae xahita. Ena ohiro harenae nolatya hoka berexo ako namoka. <sup>5</sup> Sacerdotenae xekohasehare, judeunae nityohalitiranae ana atyo exe niraeterahenai waiyekahalakita. Hiyaiya, xairatyaha babera wihinaeharenae judeunae Damasco nali tyaoniterenae ana hoka isahitaha nomani. Hatyo babera kakoa noxani nali naberexotya maheta Jesus xema maniya tyaoniterenae kamatiherahi kakoa hoka Jerusalém xeta nakolatyahitene, iniyalahare kaxomokakaha maheta.

*Paulo Kakai Jesus Koamaniya Tyaohenere Tahi*

(Atos 9.1-19; 26.12-18)

<sup>6</sup> — Noxanita Damasco xeta hoka okoi nokaokihena hoka kala totahikoahena hare hoka eharehena rota enokoata werokakoa moka noxahiti. <sup>7</sup> Hatyaoseta nexoa waikoa hoka nasema iraiti: “Saulo, Saulo, xoanere hoka hiyalijinihareta noxahiti?” nexa. <sup>8</sup> “Xala hiso, Xekohaseti?” nomi. Hoka nehena: “Natyo atyo Jesus Nazaré yere hikirawanetere”, nexa.

<sup>9</sup> Nohinaeharenae tyoiterenae noximi waiyaha exaokanala xakore atyo hoka maisa atyo semahitaha iraehenere nokakoi niraene.

<sup>10</sup> — Hatyaoseta naxehitiyene: “Xekohaseti, xoanaite notyaohena?” “Hainakohetehena hoka hiyanehena wenakalati Damasco xeta. Nalite iraehenaha hikakoa, aliyakere xamani hisaona aokita Enore hoka”, nexa. <sup>11</sup> Hatyo xaokanatyakalati weroka nowaiyehenere mawaiyahakalatya natyo. Hatyo hiyeta nohinaeharenae otokahisaha natyo Damasco xeta.

<sup>12</sup> — Hatyo nali hatya haliti tyaonita, Ananias nexarexe. Waiyexehare, wiyaotyak-isakaho maniya tyaonita, exahe tyotya judeunae Damasco nali tyaoniterenae hoka aiminijitene. <sup>13</sup> Tyoa kaoka nohaliye hoka nehena: “Nohinaehare Saulo, hiyaiyakahetehena”, nexa nohiye hoka nowaiyakahetehena rotita hoka nawahakotya enomana.

<sup>14</sup> — Hatyaoseta nehena nohiye: “Saulo, wahetakomaniyereharenae nEnorexa aoka hiso haomana, aokitere akereta hisaona maheta. Hatyo Waiyexeharexe Aohenere hiyaiya, exahe iniraine hikakoa hoka hasema aokita. <sup>15</sup> Hoka hiso atyoite hiyakaihena

etahi tyotya halitinae hiye, tyotya xoalini hare hiyaiyeheneraharenae, hasemehenere-harenae xoaha”, nexa. <sup>16</sup> “Xoare hatyahita? Haxehena Xekohaseti kahinaetya maheta hiso hoka hikabatixatyaka hoka iniyalahare hománe kamaotyanetyakeheta maheta”, nexa nohiye.

#### *Paulo Hatene Tahi*

<sup>17</sup> — Hatyaoseta nahaikoaheta Jerusalém xeta. Niraexatita ene Iraexatyakalati Hanako hoka nokaxawaiyanikisaki. <sup>18</sup> Nowaiya Xekohaseti hoka nexa nohiye: “Hiyanehetehena rota ali Jerusalém nalita. Hiyaiya, aliyerenaе atyoite maisa semaxematya aokowiyahita hiyakaini notahi akiti”, nexa.

<sup>19</sup> — Hoka nomihena: “Xekohaseti, waiyekehalakita atyo enomanaha judeunae xahohisakoatyakala hanako nihatyaka noxani hoka naberexoitere namokonasetitire hikoamaniya tyaoniterenaе namokonasetiterehare akiti. <sup>20</sup> Exahe Estêvão hitahi xakaisasehare aisehenahere xowaka natyo tehitia nali notyaonita, nakahinaetyahitene. Nokaxaikota exaisasenai nima”, nomi.

<sup>21</sup> — Xakore hoka Xekohaseti nehena: “Hiyanehena, natyo atyoite naxikahena hiso seko akiya majudeuneharenae koni”, nexa.

<sup>22</sup> Hatyo kijiya Paulo niraene halitinae semaxematya hoka hatyaoseta nexa kawiyanahena: — Xaisehenene. Waiye xaisaka. Maisaiya xoare maheta maxaisakita — nexaha. <sup>23</sup> Kwiyatyahitaha, xaxakahitaha haimanasenaeha, iyaxati harenae eno maniya xawatyahitaha.

<sup>24</sup> Hatyaoseta sorarenae xekohasehare Paulo xaisoakisakeheta aoka sorarenae tyaoniteraе hanako nali. Emokonasetya аока, xakai maheta xoare hiyeta xamani judeunae kirawanetene hoka kwiyalijiterene tahi.

<sup>25</sup> Olatyahene mokonasetyahene maheta hoka Paulo nehena haxotokasehare sorarenae kaxaikotyasehare hiye: — Xoana ehekoretaiya xamokonasehena Roma yere? Xoana ehekoretaiya xamokonasehena hatya, etahi masemakahareta?

<sup>26</sup> Iniraene sema hatyo sorarenae kaxaikotyasehare hoka xane haxekohase ana hoka nexa ihiye: — Hiriharíra exehare hisomiterehare kakoa. Exe haliti atyo Roma yere — nexa.

<sup>27</sup> Hatyaoseta sorarenae xekohasehare xane irae Paulo kakoa maheta hoka nexa axene: — Hiyakaihena nohiye. Xoana aliterexe Roma yere hiso?

— Há, aliterexe — nexa Paulo.

<sup>28</sup> Hoka hatyo xekohaseti nehena: — Natyo tehitia Roma yere. Kalore nabakatya nikare notyaona maheta — nexa.

Xakore hoka Paulo nehitia ihiye: — Roma yere terota atyo natyo notyaonehenereta — nexa.

<sup>29</sup> Hatyaoseta Paulo axaha maheta haiyaharenae ehaliya tyaoniterenaе kikisoaheta rotita. Hatyo sorarenae xekohasehare maira, Paulo nawenane tahi sema hoka exolatyaka aohenere hiyeta.

#### *Paulo Mokaha Kalorexenai Nahalakoa*

<sup>30</sup> Hoka sorarenae xekohasehare waiyekehalaka sema aokowita, xoare hiyeta xamani Paulo xaisaka judeunae aokahitaha hoka. Hatyaoseta kamaetali kamatiherahi niyakeheta Paulo hiyeta aoka. Hatyaoseta sacerdote xekohaseharenae, inityohalitiranaе harenae xahohisakakoatyane aoka. Hatyaoseta wakatya sorarenae hoka kolatyaha Paulo hoka enahalakoaha mokahene.

<sup>1</sup> Hatyaoseta Paulo kinatyа wahakotya judeunae inityohalitiranaе ana hoka nehena: — Nohinaeharenae, kalikini kijiya maisa xoare iniyalahare Enore haoti notyomare.

<sup>2</sup> Hoka sacerdotenae xekohasehare Ananias, Paulo kanasako mokotyaka aoka ehaliya tityoiterenaе hiye.

<sup>3</sup> Hoka Paulo nehena Ananias hiye: — Teraharetyoare! Maika Enore iniyalahare moka hiso. Hatyaose hisokita Xaotyakiyaho aokitere akereta hasema haokowita notahi akiti. Xoana hoka nomokotyaki haokita? Maisa atyo nikarexe xini Xaotyakiyaho.

<sup>4</sup> Hatyaoseta halitinae Paulo haliyita tityoiterenae nehena: — Xoana hoka iniyalahareta hiraeta sacerdotenae kalorexe, Enore wakanehare kakoa?

<sup>5</sup> Hoka Paulo nehena: — Nohinaeharenae, motya atyo maisa sacerdotenae kalorexe xini naokita. Hiyaiya, Iraeti Waiyexe nanekoa atyo nexa:

Awa atyo hikaxaikone hotyali xekohase tahi iniyalahare hirae.

<sup>6</sup> Hatyaoseta waiyekhalaka Paulo ana. Hatyo kalorexenai koni haiyanae saduceunae hotyali, haiyanae fariseunae hotyali xoaha. Hatyaoseta Paulo kinatyaxa irae: — Nohinaeharenae, fariseu ityani atyo natyo, fariseu tehitija natyo. “Maikaite kamatinae kaseheta”, nomitere hiyeta kalikini exakere nokaxomokakita — nexa.

<sup>7</sup> Nexa Paulo irae hoka fariseunae, saduceunae kinatyaxa irae kakoaha hoka hahekore xakini kalorexenae ahekotya. <sup>8</sup> Maisa atyo saduceunae tyakekore kamatinae kaseneheta akiti, exahe maisa atyo anjo, isekohaliti aka enomanaha hoka maisa tyakekoreha. Hoka fariseunae atyo tyotya hatyohare tyakekota.

<sup>9</sup> Hatyaoseta masakare kinatyaxehena iraekakoahitaha. Haiyanae fariseunae Xaotyakiyaho kakoa waiyoreterenae tityoaha hoka nehenaha iraehenaha kinatyaxa: — Womana atyo exe haliti maisa xoare hare iniyalahare tyomare. Kalaiya maisa hoka isekohaliti xamani, anjo xamani iraeta ekakoa — nexaha.

<sup>10</sup> Kahenehrehena hoka sorarenae xekohasehare mawaiyeharehena. Aisahaiya Paulo aokita hoka sorarenae axikaty iyehetahene maheta enekonitaha hoka kolahenahitene sorarenae tyalonitire nali maheta.

<sup>11</sup> Hatyo najikinita makiya Paulo ana Xekohaseti kaotyaka hoka nexa ihiye: — Awa atyo himaira! Koxaka atyo hirae notahi ali Jerusalém. Nikareta tehitijaite Roma nali hiraehitiya.

*Paulo Aisaha Aokowihenahere Tahi  
(Atos 9.15-16; 22.22; 2 Coríntios 4.8-12; 11.22-33)*

<sup>12</sup> Kamaetali haiyaharenae judeunae ahohisakoatyakakoaha hoka maxaisaneharetatahaiya Paulo maisa kanakairahitaha, maisa terahitaha hekoti aokowiha. <sup>13</sup> Hatyo nikare ahekoiterenae atyo 40-hare jiyare.

<sup>14</sup> Hatyaoseta xane iraeha sacerdotenae xekohasenae, judeunae nityohalitiranae xoaha kakoa hoka nexaha: — Exakerexe owa wirae kakoa: maisaiya xoare wikanakairihitita Paulo wimaxaisaneharetia. <sup>15</sup> Hoka maika xiso kalorexenae xiraehena sorarenae xekohasehare kakoa hoka Paulo ali noloka. “Maika waiye wasema waokowita etahi akiti”, xexa ihiye. Hoka wimemerite wisaona kaokehenere nahitita waisene maheta — nexaha.

<sup>16</sup> Xakore hoka Paulo nahahalo ityani sema nikare exahekolaha hoka xane sorarenae tyalonitire nali hoka tyotya xakaini Paulo hiye. <sup>17</sup> Hatyaoseta Paulo kawisa hatya sorarenae kaxaikotyase hoka nexa ihiye: — Hiyane exe xoimahaliti kakoa xiyekehase nali. Hoka xoalini hare tahi xakai maheta — nexa.

<sup>18</sup> Hatyaoseta sorarenae kaxaikotyase xane ekakoa haxekohase nali hoka nexa ihiye: — Etake Paulo berexoako tyalonitire kawisa natyo hoka exe xoimahaliti nanoloka homana xoalini hare tahi xakai hihiyeha aoka.

<sup>19</sup> Hatyaoseta exekohase otoka xoimahaliti ekahe hiye hoka xane ekakoa hamaniya hoka axehenene: — Xoare hiyakai haokowita nohiye?

<sup>20</sup> Hoka nehena: — Judeunae kasani makani Paulo hakolatya kalorexenae ana aokaha. Kasani waiye kaiserehare sema aokowitaha, hamaoseralaha. <sup>21</sup> Hoka awa atyo hityakekohena iniraeneha. Hiyaiya, 40-hare jiyare ite wahahena Paulo aisaha maheta. Tyotya nikare ahekohenerenae maisa kanakairaha, maisa teraha aokowihenahitita Paula hamaxaisanenehareha nahitita. Nikare tyalonaha aokowiha. Kalikini memere tyalonahitaha, atyahahita hiraine xahita taita.

<sup>22</sup> Hatyaoseta sorarenae xekohasehare nehena ihiye: — Awa atyo hatya hiye hiyakai-hena exe hiyakaitere nohiye — nexa hoka axikaheta xoimahaliti.

*Paulo Kaxaxikatyaka Kalorexe Félix Ana*

<sup>23</sup> Hatyaoseta sorarenae xekohase kawisa hinamahare sorare kaxaikotyasenae hoka nehena ihiyeha: — 200-hare sorarenae, 70-hare kawalo henore, 200-hare tonotyakalatikase kakoarenas xoaha memere xamoka hoka Cesaréia xeta xaneha. Maika ximemere xisaona hoka awisa makiya xiyane. <sup>24</sup> Maika Paulo ana tehituya kawalo memere xamoka ehainali maheta hoka waiye xiyane ekakoa kalorexe Félix nali — nexa wakatyahene.

<sup>25</sup> Hatyo hekota sorarenae xekohasehare xairatya babera exakerexe:

<sup>26</sup> Xoana waiye hisaonita, kalorexe Félix?

<sup>27</sup> Judeunae otoka exe haliti hoka komita ene aisahene. Hoka nasemehena atyo, Roma yere atyo hoka nosorarexinae kakoa wiyehetene hoka maisa aisahitene.

<sup>28</sup> Hatyaoseta kasani waiye nasema naokowita etahi akiti hoka noxani judeunae nityohal-itiranae ana ekakoa, xoare hiyeta xamani kirawanahitene hoka.

<sup>29</sup> Hatyaoseta waiyekehalaka nomani. Maisa xakore nika xoare tyomare hoka kaberex-tyaka, kaxaisaka harenas aokahitaha. Haxaotyakisakahola hiyeta nika nikare mokahitene.

<sup>30</sup> Hatyaoseta nasemehitiya judeunae aisene aokowitere akiti hoka hatyo hiyeta naxikatene homana. Exahe nirae ekakoaha hoka xaneha hinali xeta hoka hihaotisa iraeharehenahitiyene naoka hoka. Eko xoaha, Cláudio Lírias.

<sup>31</sup> Hatyaoseta haxekohaseha aokitete akereta sorarenae tyaona. Makiya xaneha Paulo kakoa wenakalati Antipátride nali kijiya. <sup>32</sup> Kamaetali hatyo nalita sorarenae haikoaheta sorarenae tyaonitere nali xeta, hoka kawalo henorenas taita xanehitiya Paulo kakoa.

<sup>33</sup> Xane kaokaha ekakoa Cesaréia nali hoka babera isaha kalorexe ana hoka Paulo tehituya halakisaha enomana.

<sup>34</sup> Hatyaoseta kalorexe kaixaretya babera hoka axa Paulo nawenakalakoa tahi ak-iti. Waiyekehalaka enomana Paulo atyo Cilícia koa tare hoka nexa ihiye: <sup>35</sup> — Hiraeharetyasenaita kaokehena hoka nasemehitiya hitahi — nexa ihiye. Hatyaoseta eberexotyaka aoka Herodes hana hati wahaharexe ako.

## 24

*Judeunae Iraeharetyaha Paulo*

<sup>1</sup> Hatyaoseta 5-ki ferakene najikinita sacerdotenae xekohase Ananias xane Cesaréia nali, haiyanas judeunae nityohalitiranae, hatya Tértulo nexarexe xoaha kakoa xane. Tértulo waiyore iraeta hoka. Xane kaokaha kalorexe Félix ana hoka iraeharehenaha Paulo.

<sup>2</sup> Hatyaoseta kawisaha Tértulo hoka hatyo iraeharehena Paulo hoka nehena: — Xeko-haseti kalorexe Félix, waiye hamokita wiso judeunae hoka wimehexaikohare wisaonita, haxakaihitita wawenane waiye wisaona maheta. <sup>3</sup> Wihalahareta hikakoa taita tyotya wenakalatinai koa, xoalini hare hijiterekarenas wonita womania hiyeta. <sup>4</sup> Hoka kasani maisa nahowitihalikisa naokowiye hiso. Hatyo hiyeta ininaitaite noxakai exe haliti tahi hoka hasemehena niraini.

<sup>5</sup> — Exe haliti maisa waiyexe! Judeunae koni hakakoare koa xane hoka kaxiyehare mokita enawenaneha. Hatyo Nazaré yere koamaniya tyaoniterenae xekohase tehituya tyaonita. <sup>6</sup> Maisa tehituya aiminijita Iraexatyakalati Hana. Hatyo hiyeta wotokene hoka wiyaotyakisakaho akereta ene wamokene waokowi <sup>7</sup> xakore hoka sorarenae xekohase-hare Lírias tya iyehetene wonita sorarenae kakoa, komita ene maisa waiye xini mokita wiso. <sup>8</sup> Hatyaoseta hatyo Lírias ali hahalakoa tya iniraeharetyasenae hoka iraeharetene aoka. Kalikiniya exe haliti haxa hoka tyotya wiraeterekarenas taitaiya aliterexe hasema etahi — nexa.

<sup>9</sup> Hatyaoseta judeunae kahinaexatya iniraene hoka nehenaha: — Alitere aokita — nexaha.

*Paulo Irae Félix Nahalakoa Kahawaonitaretyoawi Maheta*

<sup>10</sup> Hatyaoseta kalorexe aimenekotya Paulo ana irae maheta iniraeneha nahalakoa hoka hatyaoseta Paulo nehenaha: — Wahehena kalorexe hisaoniterekhare akiti judeunae koni atyo waiyekehalakita nomani. Hiyeta hoka nihalahalini kakoa niraehena iniraineha nahalakoa hihaoita, kalorexe. <sup>11</sup> Kalikini 12-ki ferakenehena notyaohitita Jerusalém nali noxani Enore kakoa nihalaharehenere najikinita. Haxaiya haiyanae ana hoka, “Aliterexe aokita”, nexahaiya hihiye. <sup>12</sup> Maisa exe aokahiterekha akereta xini notyaonita. Maisa kinatyaxa niraexe xala harenae kakoa Iraexatyakalati Hanako, exahe xahohisakoatyakalati hanako. Maisa hakiti hekoti xoalini hare iniyalahare notyomare wenakalati Jerusalém nali. <sup>13</sup> Hoka maisaiya aliyakere exehare notahi iraeterehareha hatyonaiha aliterexe aokahitaha hihiye. <sup>14</sup> Xakore hoka exe taitaite noxakai hihiye: aliterexe atyo “Wenati Waiyexaho” xema notyaonita hoka hatyohare atyo judeunae iniyalahare aokahitaha. Exakere atyo notyaonita Enore koamaniya: Notyakekota Moisés xaotyakiraho tyotya, exahe Iraiti Xakaisaseharenae xairala harenae hoka.

*Kamatinae Atyoite Kaseheta*

*(João 5.25-29; Atos 26.8; Apocalipse 20.11-15)*

<sup>15</sup> — Atyahahitere akereta natyahita Enore xahita: “Tyotyaite kamatinai kaseheta, waiyexeharexenae, mawaiyexehareharenae xoaha”, nitere hakakoa wityakekota.

<sup>16</sup> Hiyeta hoka nawenani kakoa naiyaterityoita, kasani Enore haoti waiye notyaona naokowita, exahe halitinai haoti hoka — nexa.

<sup>17</sup> — Waha terehokoane nomaxaninitere Jerusalém najikinita noxani nali xeta olo nakolatya nohinaeharenae maoloxaharenae ana maheta, exahe kirakahare naisa hoka nafetaty Enore ana maheta. <sup>18</sup> Nikare notyaonita hoka hatyo kirakahare nafetahenere najikinita haiyahare judeunae waiya natyo Iraexatyakalati Hanako. Hatyo xowaka maisa kahare haliti tyoare noximi, exahe hoka maisa xoare hare iniyalahare notyomare.

<sup>19</sup> Xakore hoka haiyahare judeunae Ásia koatarenae exowaka nali tyaoita hoka waiyaha natyo. Hatyonaiya atyo ali tyoaha iraeharetyaha natyo hihiye hoka ehekoriya, iniyalahare xamani aliterexe notyomita hoka.

<sup>20</sup> — Exahiya exe halitinae xoare xamani inityohalitiranae sema iniyalahare nománi tahi enahalakoaha noxanihenere xowaka hoka xakaihahene hihiye. <sup>21</sup> Hatyo xowaka natityoa enahalakoaha hoka kinatyaxa nomi taita: “Maikaite kamatinae kaseheta. Hiyeta hoka kalikini exakere xamokita natyo” — nexa Paulo.

<sup>22</sup> Hatyaoseta Félix, Wenati Waiyexe koamaniya nawenatyaka akiti waiyekehalakita enomana hoka nehenaha: — Maikaite sorare xekohasehare Lísias kaokehena hoka nahekotya hitahi hoka kamyane — nexa. <sup>23</sup> Hatyaoseta sorare xekohase hiye irae hoka sorare moka Paulo kaxaikotyase maheta aoka. Kasani waiye kaxaikone aoka, exahe hoka ihinaeharenae kotare tyoa waiyahene hoka kahinaetyahene xoalini harenai kakoa aoka.

*Paulo Tyaoita Félix Drusila Xoaha Nahalakoa*

<sup>24</sup> Hatyo najikinita, wahehena hoka Félix tyoa haiyanityo Drusila kakoa. Judeunero atyo exanityo. Hoka kawisa Paulo, semaha iniraine Jesus Cristo koamaniya nawenatyaka akiti maheta.

<sup>25</sup> Hatyaoseta Paulo iraehena wenati waiyexe tahi, kaxaikoawiti, exahe xaxalisati miyanitiye xowakehena harenae tahi hoka Félix maira hoka nehenaha: — Kalikini hiyanetehena, haxowakaite nakawihitiya hiso hoka waiye nasemehitiya hiraine — nexa.

<sup>26</sup> Motyalaite Paulo olo isa enomana aokita hoka hatyo hiyeta fera kawijitene hoka iraeta ekakoa.

<sup>27</sup> Hatyaoseta hinama terehokoane najikinita hatsa kalorexe tyaoita hoka Félix wenekoare, Pórcio Festo nexarexe. Hoka Félix xanehetehena hoka Paulo berexo akota halakisa judeunae aihalahalinikisa maheta.

## 25

*Paulo Xane Roma Yere Kalorexe Ana Aokowi*

<sup>1</sup> Festo kaoka hoka hanamaki taitata tyeonita Cesaréia nali hoka xane Jerusalém xeta. <sup>2</sup> Xane kaoka hoka sacerdotenae xekohasehare, judeunae nityohalitiranae xoaha iraehena ekakoa, Paulo kakoa kahalakoaharahitereha tahi akiti. Hoka axaha Festo, <sup>3</sup> kasani Paulo Jerusalém xeta axikatya aokaha. Kasani Paulo tyoa hoka ahotita aisahene aokowiyahitaha hoka.

<sup>4</sup> Hoka Festo nehena ihiyeha: — Paulo atyo berexo ako tyeonita Cesaréia nali. Nahaikoahetehenaite nali xeta hoka <sup>5</sup> maika xinityohalitiranae tyoa noximi hoka iraeharetyahene nohaotita, xoare xamani iniyalahare tyoma xaokita hoka — nexa.

<sup>6</sup> 8-ki ferakene xamani, 10-ki ferakene xamani ala Festo tyona ekakoaha hoka hatyaoseta haikoaheta Cesaréia xeta. Kamaetali hoka xane tyoka kalorexe nokahakalaose hoka kawisa Paulo.

<sup>7</sup> Paulo kaoka hoka judeunae, Jerusalém nalita tyohenerenae exahiyatyahene hoka iraeharehenahene hairawaneha. Xakore hoka maisa xoare hotikisare Festo tyakeko-hena maheta iniraeneha. <sup>8</sup> Hatyaoseta Paulo nehena kahawaonitaretyoawi maheta: — Maisa atyo xoare hare notyomare iniyalahare Moisés xaotyakiraho kakoa, maisa Iraexatyakalati Hana nomaxaiminirere, maisa Roma yerenae xekohase tahi akiti hoka iniyalahare niraexe — nexa.

<sup>9</sup> Hatyaoseta Festo aihalahalinikisa maheta judeunae hoka nexa Paulo axa: — Xoana maisa Jerusalém nali hiyane hoka hatyo nali naxalisa hiso haokare hatyohare hiyeta?

<sup>10</sup> Hoka Paulo nehena: — Ali notyaonita kalorexe nokahakala Roma yere nahalakoa nokaxaxalisaki mahetare aose. Hiyaiya, maisa atyo xoare hare iniyalahare notyomare judeunae ana. Hatyo hare akiti atyo waiyekhalakita homana. <sup>11</sup> Maisaiya atyo naiminijita Roma yerenae xaotyakiyaho, exahe iniyalahareya notyoma hoka nawaiye xaisaki haokita hoka nomimiye atyo notyaonita nokamani niyahare. Hoka exe irae ahitere notahi atyo maisa aliterexe xini hoka maisaiya xala hare aliyakere halakijita natyo enomanaha. Hatyo hiyeta noxani naokowita Roma nali Kalorexe sema maheta notahi hoka kamiyane maheta — nexa.

<sup>12</sup> Hatyaoseta Festo hakahinyasenae kakoa irae hotohare hoka hatyaoseta nehena: — Hiyane tyare haokowita Kalorexe ana Roma nali hoka nalite hiyane — nexa.

*Paulo Tyeonita Agripa, Berenice Xoaha Nahalakoa*

<sup>13</sup> Hatyo najikinita xekohaseti Agripa, Berenice kakoa kaoka Cesaréia nali waiyaha exahe katyawaxaha maheta Festo hiye. <sup>14</sup> Hatyo nali akaiki ferakenehena tyeonahitaha hoka Festo xakaihena Agripa hiye Paulo tahi hoka nehena: — Félix halakisa hatya haliti ali berexo ako. <sup>15</sup> Noxani Jerusalém hoka sacerdote xekohasenae, judeunae nityohalitiranae xoaha xakai nohiye kahalakoahare ahitere ekakoa tahi akiti. Hoka aokaha exaisaka nohiye. <sup>16</sup> Hoka nomi ihiyeha: “Roma yerenae maisa nikare masemakahareta aisetere. Iniraeharetyasenaeaya hotohare atyo iraeharetene ehaotita hoka kairaeharetyakitire tehitiya irae hatahi, xoare xamani tyoma hoka”.

<sup>17</sup> — Hatyaoseta ali kaokaha hoka maisa nohowithihareta. Kamaetali noxani kalorexe nokahakala heno notyoka hoka hatyo haliti nakawisa. <sup>18</sup> Hatyaoseta enahalakoaharenai kaoka xakore hoka maisa iniyalahare enómane tahi xakaitaha, nahekohenere akere. <sup>19</sup> Hawenanahoha xemere taita nika nikare mokahitene. Hatya haliti koxaka wainihenere Jesus nexarexe xemere tehitiya nikare mokahitene. Hoka Paulo atyo hatyo haliti kaseta aoka. <sup>20</sup> Hoka komita ene maisa waiyekhalakita nomani hatyo akiti. Hatyo hiyeta Paulo naxa, xoana Jerusalém nali xamani xane aokowita hoka hatyo tahi akiti kakoa kaxaxalisaka hatyo nali aokita hoka. <sup>21</sup> Xakore hoka Paulo Roma nali xane aokowi Kalorexe sema maheta etahi hoka kamiyane maheta. Hoka hatyaoseta berexo ako exomokaka naoleta naxikahenerene Kalorexe Roma nali tyeonitire ana kijiya.

<sup>22</sup> Hatyaoseta Agripa nexa Festo hiye: — Kasani natyo tehitiya nasema naokowi hatyo haliti niraene.

— Maika ite makani hasema iniraene — nexa Festo.

<sup>23</sup> Kamaetali Agripa Berenice kakoa mokaharetyoa hoka isoa kahare haliti, sorarenae, xekohassetinae hare kakoa. Wenakalati kalorexe tyaconiterenae hare kakoa isoa semaxe-matyaha maheta. Hatyaoseta Festo Paulo kawisa.

<sup>24</sup> Paulo isoa hoka hatyaoseta Festo nehena: — Xekohaseti Agripa, exahe xiso ali tyaconiterenae hoka xiayiyeheha exe haliti! Exe kakoa aliyere judeunae, exahe Jerusalém nali tyaconiterenae hoka kahalakoahareta hoka exaisaka aokahitaha nohiye.

<sup>25</sup> Xakore hoka nomani atyo maisa xoare hare tyomare hoka exaisaka aokahitaha. Hoka haxaxikatyaka aoka Roma nali Kalorexe ana hoka exaokala akeretaite namokene.

<sup>26</sup> — Hoka kalikini kakoita maisa waiyekehalakere nomani noxaxikali niyahare nox-airali etahi akiti Kalorexe ana. Hatyo hiyeta ali nanolokene xahalakoa, exahe hiso xekohaseti Agripa nahalakoa kaisere hoka haxene maheta. Nikare ite hoka nawaiyore naxairatya etahi akiti. <sup>27</sup> Hiyaiya, nomani atyo hoka maisaiya aliyakere hatya eberexotyakahare tyaconitere haxikaita Kalorexe ana maxawaiyekehalakatyakahareta etahi akiti.

## 26

### *Paulo Irae Agripa Nahalakoa Kahawaonitaretyoawi Maheta*

<sup>1</sup> Hatyaoseta Agripa nexa Paulo hiye: — Hiraihena iniraineha nahalakoa.

Hatyaoseta Paulo aimaty ahae irae maheta iniraine nahalakoa: <sup>2</sup> — Xekohaseti Agripa, kalikini nihalahare hihaoita niraihena notahi akiti judeunae niraeharera natyo nahalakoa. <sup>3</sup> Hiso homana judeunae nawenane, xaotyakiraho harenae masakare waiyekehalakita. Hoka maika hasema niraini himaholowakeneta.

<sup>4</sup> — Tyotya judeunae waiyita nawenani noxoimahalenitita kalikini kijiya, exahe Jerusalém nali hoka noxoimaharenitita kalikini kijiya. Noxoiminita nowaikohiri exahe Jerusalém nali notyaona, hatyo hare waiyekehalakita enomanaha. <sup>5</sup> Waiyekehalakita enomanaha, xakaihaiya aokowiha hatyo akiti hoka xakaihaha: noxoiminita atyo fariseunae nawenana no notyaona. Fariseu nawenane atyo maisa mahowitiharexe xini. <sup>6</sup> Hoka kalikini ali notyaonita hoka exakere nokaxomokakita Enore isa aokowihenerehare wahetakomaniyereharenae ana natyahitare hiyeta. <sup>7</sup> Hiyaiya, wiso Israel yerena hotyaliharenae atyo 12-hare hoka wawayetyahitaha Enore ferakoa, makiya harenae. Atyahahitaha tehitia atyo natyo akereta Enore isa aokowiterehare xahita. Hoka hasemehena, Xekohaseti, hatyo natyahitare hiyeta exakere judeunae kahalakoahareta nokakoi.

<sup>8</sup> — Xoanere hoka maisa xityakekore Enore xekasekiriheta kamatiniae?

<sup>9</sup> — Natyo tehitia hetati ene nikare nahekoita hoka kalore nokahalakoiharea Jesus Nazaré yere koamaniya tyaconiterenae kakoa. <sup>10</sup> Jerusalém nali nikare notyaonita. Naberexotya kahare Enore kaxaikone hotyali, sacerdotenae xekohasenae niraene kokoare notyaona hoka. Exaisakaha aohenaha hoka natyo tehitia naokita exaisaka. <sup>11</sup> Kahareki iniyalahare namokahitene xahohisakoatyakalati hananae nihatyaka, exahe namahokoanetita etyakekoneha. Aehalikisahitaha natyo hoka noxanita haiyanae wenakalatikoanae iniyalahare namokahene maheta.

### *Paulo Xakai Jesus Koamaniya Hawenane Tahi*

(Atos 9.1-19; 22.6-16)

<sup>12</sup> Heko Paulo iraeta: — Nikare iniyalahare namokahene maheta, noxanita Damasco xeta sacerdotenae xekohaseharenae niraenexa xema hoka <sup>13</sup> exakere notyaona, xekohaseti. Totahikoahena hoka nowaiya xaokanatyakalati tyoanene enokoata, kamae xahehare werokene. Hoka hatyo xaokanatyakalati werokakoa moka nohoko haliya, exahe haiyaharenai tyoiterenai noximi hoko haliya hoka. <sup>14</sup> Wityotya wexoa waikoa hoka nasemehena atyo, iraehena atyo nokakoi hebreu xako: “Saulo, Saulo, xoana hoka hiyalijinihare noxahiti? Hisota atyo iniyalahare haxomokanikijoita. Bowi hatotokakala

kase xahita tyahakahiyakatya hoka kawe mokoawitere akere atyo hisaonita”, nexa nohiye.

<sup>15</sup> — Hatyaoseta naxene: “Xala hiso, Xekohaseti?” nomi. Hoka nexa nohiye: “Natyo atyo Jesus hikirawanetere”, nexa nohiye. <sup>16</sup> Hatyaoseta: “Hainakoahetehena, hatityoahetehena. Nowakanihare naoka hiso maheta nokaotyaki homana hiyakai maheta halitina hiye kalikini hiyaiterehare, exahe exe najikinita nahotikihenerehare homana tahi akiti hiyakai maheta. <sup>17</sup> Nokaxaiko ite hiso judeunai nonitata, exahe majudeuneharenai nonita. Hiyaiya, hatyonai konite naxikatya hiso. <sup>18</sup> Hiso atyo ite haotyakihenahene hoka iniyalahare wenati nonitata wenati waiyexe maniya hamohenahitehenahene. Hoka Tihanare nonitata Enore koamaniya haxomokanikihenahitehenahene. Hoka tyakekohenahere natyo hiyeta ite iniyalahare enómaneha kamaotyanetyakeheta hoka Enore aohenere haomanere hotyalinai koni tehitia tyaohenahitaha”, nexa.

#### *Paulo Xakai Hahatene Tahi*

<sup>19</sup> Hatyaoseta Paulo hairaene halakihena maheta hoka nehena: — Xekohaseti Agripa, enokoata nokaxawaiyanikisakihenere atyo maisa nomatyakekonita. <sup>20</sup> Damasco nali hotohare noxani noxakai iraeti. Hatyaoseta Jerusalém nali, exahe Judéia koa hakakoare. Majudeuneharenae hiye noxakaihitiya. Hoka nomita ihiyeha, halakisaha iniyalahare háomaneha hoka Enore koamaniya tyaohenahita hoka waiye maniya tyaohenahitaha hoka katyakekotyakaha maheta.

<sup>21</sup> — Hatyo hiyeta Iraexatyakalati Hanakota judeunae otoka natyo hoka aisaha aokowiha natyo. <sup>22</sup> Xakore hoka kalikini kijiya Enore kahinaetita natyo. Hiyeta hoka noxakaita iniraine tyotya halitinae hiye, wakaharenae, kalorexenae harenae hiye. Iraiti xakaisaseharenae Moisés xoaha xoalini hare kaotyakene tahi xakaihenahere akereta atyo noxakaita. <sup>23</sup> Hiyaiya, exakere atyo xakaihaha: “Enore Kalorexe Aohenere ite kaxaisaka hoka hatyo hotohare ite kaseheta. Hoka hatyota wenati waiyexe xaka kaxakaisaka judeunae hiye, majudeuneharenae xoaha hiye”.

<sup>24</sup> Exakere Paulo hatahi iraeta ene hoka Festo kinatyaxa irae: — Hihatyahareta, Paulo. Kalore hikaxaotyakisaka hoka hihatyaharexe moka.

<sup>25</sup> Paulo nexa Festo hiye: — Maisa atyo nohatyahareta xini, xekohaseti Festo. Waiye atyo noxahekoli tyaponita hoka aliterexe niraeta.

<sup>26</sup> Hatyaoseta nexa xekohaseti hiye: — Xekohaseti Agripa, hihaoitita niraeta hoka ni-halahareta niraitere akiti kakoa, hawaiyore tyare exeharenae akiti kakoa hoka. Hiyaiya, maisa atyo hatyoharenae hakiti metaharexe akiti xini kaotyaka.

<sup>27</sup> — Xekohaseti Agripa, xoana hityakeko Iraiti Xakaisaseharenae xakaini? Hityakekota terota naoka, xekohaseti.

<sup>28</sup> Hoka Agripa nexa ihiye: — Xoana motya hiyahekola hiye hoka haxerore Cristo koamaniya nawenatyasehare notyaona haokita?

<sup>29</sup> Hoka Paulo nexa: — Enore xaokalita ite hoka xoana haxerore xamani, xoana waha najikinita xamani ite Cristo koamaniya hisaona. Exahe maisa hiso taita xini hoka kalikini ali tyotya semaxemaiterenae kakoitaite natyo akereta Cristo koamaniya xisaona. Xakore hoka maisaiya atyo exehare kamatiherahi kakoa xikaberexotyakita.

<sup>30</sup> Hatyaoseta xekohaseti Agripa, Festo, Berenice exahe tyotya haiyaharenae nali tyaponiterenae tityoahenahitaha hoka hikoahenahitaha. <sup>31</sup> Hikoahenahitaha hoka irae-sekoatyaha hatyo tahi: — Exe haliti maisa xoare tyomita. Maisaiya xoare maheta kaxaisakita, kaberexotyakita harenae.

<sup>32</sup> Hatyaoseta Agripa nexa: — Ikoiya awa Roma nali kalorexe tyaponitera ana kax-axikatyaka aokita hoka kalikiniya kaxaihikoatyakeheta berexo akota.

<sup>1</sup> Hatyaoseta axikatyaha aokowiha wiso Itália xeta. Hoka Paulo, haiyaharenai berexo ako tyaoniterenai harenai isaha sorare xekohasehare Júlio nexare ana. Júlio hotyaliharenai xaokaka atyo, “Kalorexe Augusto sorarexanai”, nexahitaha. <sup>2</sup> Hatyaoseta wakakoha kanowa ako wenakalati Adramítio nalitare.

Ásia koa xetare hatyo kanowa. Hatyaoseta wiyaneta. Aristarco, Macedônia yere, wenakalati Tessalônica tare tyoa wiymena. <sup>3</sup> Kamaetali hoka wiyaneta wikaoka wenakalati Sidom nali. Júlio waiye mokita Paulo hoka halakisene, xane waiya hahinaeharenai hoka xoalini hare aokitereharenai isaha enomana maheta.

<sup>4</sup> Hatyaoseta Sidom nalita wijiyeitiya hoka iyolirotikoa tyaohenere Chipre haliya wijiya, hoholati ehaikoawini wiyahita hoka. <sup>5</sup> Hatyaoseta wiyaneta wakatalatya Cílcia xa, Panfília xa xoaha. Hoka wiyaneta wikaoka wenakalati Mirra, Lícia koa nali. <sup>6</sup> Hatyo nali Júlio ahalakoatya kanowa wenakalati Alexandria nalitare. Itália xetare hoka hatyoako aisoakisa wiso. <sup>7</sup> Wiyaneta akaiki ferakene, wawaiyexakahare wiyaneta. Howithihare xakore hoka nikareta wiyaneta wikaoka wenakalati Cílcia haliya. Hatyaoseta hoholati, ehaikoawinheta wiyahita hoka wexahiyatya Creta iyolirotikoa tyaohenere nali. Hatyaoseta wijiya wenakalati Salmoda maniya. <sup>8</sup> Nikare one kilihi makere, howithihare wiyaneta. Ekakoita wiyaneta wikaoka Xamematioakalati Waiyexe aokahitere nali, wenakalati Laséia haliya.

<sup>9</sup> Waha nali wisaona. Hoka hatyo xowakiya kahenehare netonatyaka tyaonita kinatyawinita hiyeta, exahe koxaka Iniyalahare Maotyanityaka hisehare ferakene kajiyane.

Hatyohiyeta Paulo nexa: <sup>10</sup> — Xasemehena, exe taite wijiyeitiya hoka kahenehare-hena witonane tyaonita womana. Kolare ite meta, exahe kanowa ite hoka. Haiyanai ite waini tehitia — nexo.

<sup>11</sup> Nexo hoka Júlio, eberexotyakaharenai kolatyasehare maisa tyakekota Paulo niraene. Hoka kanowa kaxaikotyasehare, exahe kanowa xekohasehare xoaha niraene atyo tyakekota.

<sup>12</sup> Hatyo xamematioakalati nali maisa waiye xatyahakere tihere tyoteneheta xahita. Hiyeta hoka nalita wijiyeitiya aokahitaha hoka nikare konita wiyaneta wikaoka Fenice nali aokahitaha. Hatyo xamematioakalati atyo Creta nali. Hatyo nali atyo kanowa xamematioakalaose tihalo maniya, exahe one holola maniya hoka tyaonita. Hoka hatyo nali tihere tyoteneheta xahita watyaha akatya aokahitaha.

#### *Kinatyawiniti Kahenehare Tyaona Onexa*

<sup>13</sup> Hatyaoseta Egito maniyata inira hoholati kaokehena hoka ahekohenahere akereta kaxanetyaka aohenaha. Hoka wanoloheta kanowa xamemakisakala hoka wiyaneta Creta kilihi maniya. <sup>14</sup> Wiyaneta ene hoka eharehena rota hoka kinatyawiniti kaoka womana iyolirotikoa tyaohenere maniyata. <sup>15</sup> Hoka hoholasekoatya kanowa hoka hamaniyatere axanikisene hoka maisa aliakere wiyaneta waokowitere notota wamohititene. Hatyaoseta wahalakisene hoka hoholati hoholatene wikakoare.

<sup>16</sup> Hatyaoseta iyolirotikoa tyaohenere, Cauda nexarexe katyahe maniya wijiya. Hoka hatyo nali wijiyeheni hoka howithihare wiyehteta kanowase. <sup>17</sup> Hatyaoseta kanowa xaitonakisasehareni ainakihenahitaha kanowase. Hatyaoseta olatetyaha kanowa kalorexe olawahi kakoa kinatere tyaona maheta.

Mairahitaha kanowa hoholatya kaiholokoa Líbia kilihi maniya xeta hoka exoakinhenahitaha kanowa xaitonakisakala imiti taose hoka hoholati xema taita kanowa toná.

<sup>18</sup> Hatyaoseta kahenehare kinatyawiniti heko tyaonita. Kamaetali hoka xawahenaha kolare kanowa akota onexaiya. <sup>19</sup> Nikare kamaetali hoka kanowa kaxaikotyasehareni kanowa xiye hare xawayaha onexaiya. <sup>20</sup> Kahareki ferakene maisa aliakere wiyanetare hekoti kamai, xoresenai. Hoka hekota hoholati hoholaita. Hatyaoseta wimakamanene xahita wahekoitere tyotya wonita hoka wimakamanene xahita watyahahena.

<sup>21</sup> Wahehena wimanakairahare wisaonita hoka Paulo enenekeseneha tityoa hoka nehena: — Xasemehena, ikoia niraini xasemaxemathyare hoka Creta nalita wisaonare hoka maisaiya kalikini exakere wisaonare. <sup>22</sup> Hoka awa atyo ximawaiyeharehena.

Maisaiya xala hare wainita. Kanowa taita ite meta. <sup>23</sup> Hiyaiya, exe xatini anjo Enore nalitare kaotyaka nomani. Enore kaxaikonehare atyo natyo, exahe enomana atyo nahakita. <sup>24</sup> Anjo kaotyaka nomani hoka nexa nohiye: “Paulo, awa atyo himaira. Hiyaiya, hiyanite hikaoka Roma yere xekohaseti nali. Maisaiya hiwainita, exahe exe xaneterenai hikakoa hoka maisaiya xala hare wainita”, nexa nohiye. <sup>25</sup> Hiyeta hoka awa atyo ximawaiyeharehena. Enore atyo notyakekota hoka iraehenere nokakoi akeretaite tyoma. <sup>26</sup> Xakore hoka hakiti iyolirotikoa tyaohenere nalite wiyanne wahikoa hoka wikaxawatyaka – nexa Paulo ihiyeha.

<sup>27</sup> Nikare makere wiyaneta. Hinama semanane najikinita, makiya, kinatyawini hoholasekoaita wiso Mediterrâneo xa nali. Kala wahaxatihena hoka kanowa xaitonakisaseharenai ana waiyekahalakehena wahikoahena waikohe ana.

<sup>28</sup> Hatyaoseta olawahi timenere kakoare xawatayaha one xaiya hoka 36-metrone hatekonexa hatyaose akiti. Wijiyeitiya hoka aimenekohenahitiyaha hoka 27-metrone hatekonexa taitehena. <sup>29</sup> Hatyaoseta mawaiyeharehenaha kanowa sehalinai hiye mokox- atyoane kakoa. Hatyo hiyeta 4-hi olawahi timenere kakoare exoakisaha kanowa tyokoli maniya maetonanetene maheta. Hatyaoseta iraexatayaha haxerore ferakoa maheta. <sup>30</sup> Hatyaoseta kanowa xaetonakisaseharenai tekoaha aokowihenaha kanowa akota hoka exoakisaha kanowase onexa. Hoka kanowa xamemakisakala exoakisahitaha enaheta maniya aokowiha, hamaoseralaha.

<sup>31</sup> Hatyaoseta Paulo nehena Júlio, exahe sorarenai xoaha hiye: — Kanowa xaitonakisaseharenai halakisa kanowa hoka xiwaini — nexa.

<sup>32</sup> Nexa hoka hatyaoseta sorarenai irikotya kanowase xola hoka halakisahene onexa.

<sup>33</sup> Ferakoahena hoka Paulo iraehena ihiyeha, kasani kanakairaha aokita hoka nehena: — Koxaka 14-ki ferakenehena xatyahita taita hoka hatyoki ferakenenai maisa xoare hare xikanakairare. <sup>34</sup> Hoka maika kalikini xoalini hare xikanakairehena naoka. Xikanakairehena hoka maisa xiwainita. Hiyaiya, maisaiya xala hare sekase hakase hekoti mitita — nexa.

<sup>35</sup> Hatyaoseta Paulo iya nakairati hoka ehaotyahitaha iraexatayaha Enore hiye. — Ehekore waiye hamokita wiso, Abá — nexa. Hatyaoseta iraka nakairati hoka kanakairahena. <sup>36</sup> Hatyaoseta aihalahalinikisahene hoka kanakairehena. <sup>37</sup> Kanowa akiwihohisakoane 276-hare.

<sup>38</sup> Kanakairehenahere najikinita trigose sakone tyotya xawatayaha one xaiya, kanowa amala tyaona maheta.

### *Tyotyaha Waiyeta Kaokaha*

<sup>39</sup> Ferakoahena hoka kanowa xaitonakisaseharenai ana maisa waiyekahalakihitita waikohe. Xakore hoka waiyaha one talakoanexa kaiholokoa hoka hatyo nali kanowa atakoakisaha aokowiha. <sup>40</sup> Hatyaoseta irikotyaha kanowa xamemakisakala nanohi hoka halakisahene one xaiya hoka aolikaha eremo, kanowa xaimoakisakala. Hatyaoseta kanowa nimitira taose ainakihenahitaha enaheta maniyere hoka kaiholokoa notota xane maheta. <sup>41</sup> Xakore hoka kanowa kolatyoa kaiholo waiyetoli tyaonitere hiye. Enaheta maniyere kolatyoa kaiholo hiye hoka ityokoli maniyere kinatayaxere taikakoahena.

<sup>42</sup> Hatyaoseta sorarenai aisaha aokowihena eberexotyakaharenai, kasani maisa hatya hekoti enekonitareha kaiholokoa nali xane hikoa hoka tekao aokareha hoka. <sup>43</sup> Xakore hoka sorare xekohasehare, kasani Paulo maisa kaxaisaka aokita hoka watyali ahene. Hoka hatyaoseta irae waiyore maxakoiterenai hiye hoka hatyonai hotohare one xaiya halaisoaha hoka maxakoaha kaiholokoa xeta aoka. <sup>44</sup> Irae tehitiya haiyaharenai maxakoaneharenai hiye. Hoka atya taose xamani, kanowa hiyetare taose hiye xamani otokoaha hoka malaloaha hoka maisa wainyahitaha aoka. Hatyo aokitere akereta wiyanne wityotya watákoahena kaiholokoa nali, maisa xala hare wainita.

<sup>1</sup> Wiyane watákoahenere waikohekoा najikinita waiyekehalaka womana. Hatyo iyolirotikoa tyaohenere nexare nika atyo Malta.

<sup>2</sup> Nali tyaoniterenai waiye moka wiso. Oneta hoka tiha aka tyaonita hoka kalore fakihityaha. <sup>3</sup> Hoka Paulo xane olahisetya mowisati hoka tyoа xawatita ene irikatyaose hoka owi tekoahena watere nonitata hoka alalatyoа Paulo kahe hiye hoka tyalokene.

<sup>4</sup> Hatyaoseta hatyo iyolirotikoa nali tyaoniterenai, waiyaha owi xalalatyoane Paulo kahe hiye hoka nexaha: — Exe haliti ala ajitaterehare. Maisa wainita one xaiya, xakore hoka maisaiya maxaisakita — nexaha.

<sup>5</sup> Xakore hoka Paulo xaxakahisa hakahe hoka owi irikatyaose exoa hoka maisa xoare kihixita hahiye. <sup>6</sup> Wahakotyahitaha taita enomana, motyaite faka ihiye xamani, xoana wainihena rota xamanite aokahitaha. Wahakohenaha mene enomana hoka maisa xoana tyaonare hoka hawarehare ahekohenahitiya hoka nehenaha: — Kala enore — nexaha.

<sup>7</sup> Hatyo haliyaseta Públío nexarexe kawaikoherere. Hatyo atyo iyolirotikoa tyaohenere xekohasehare. Waiye moka wiso hahanako hoka hanamaki ferakene wisaona ehanako.

<sup>8</sup> Enexe hokakita hoka ehokotyoita taita kamakoa, watyahiseta exahe ityako hare kaweta. Hoka Paulo xane isoa hoka iraexatya enomana, hakahe ekaokakisa ihiye hoka aiyatelikihetene.

<sup>9</sup> Hatyo najikinita tyotya hatyo iyolirotikoa nali hokakiterenai tyoaha hoka aiyatelikihetene.

<sup>10</sup> Hatyaoseta nali tyaoniterenai kahare xoalini hare isaha womana. Wijiyehtiya hoka wiyanene niyahare tyotya waokitereharenai isaha womana.

### Xaneha Malta ta Roma Xeta

<sup>11</sup> Hanamali kaimare iyolirotikoa wisaohenere najikinita wijiyehtiya hatya kanowa Alexandria tare ako, “Haximarene Kakoa Haxawalita Tyahenerenai” nexarexe ako. Hatyo kanowa atyo iyolirotikoa nali atyahaheta tihere tyoteneheta xahita.

<sup>12</sup> Hatyaoseta wiyanene wikaoka wenakalati Siracusa nali hoka hanamaki ferakene wisaona. <sup>13</sup> Hatyaoseta wijiyehtiya hoka wiyanene wikaoka wenakalati Régio nali. Kamaetalí hoka África maniyata hoholati hoholahena hoka hatyo hiyeta hinamaki ferakene kakoita wiyanene wikaoka wenakalati Puzuoli nali. <sup>14</sup> Hatyo wenakalati nali haiyaharenai tyakekohatiyenai ana wiyanene wikaoka hoka hasemanane wisaona ehaliyaha aokaha.

<sup>15</sup> Wihinaeharenai Roma nali tyaoniterenai sema wikaokene hoka tyoа ahalakoatyaha wiso wenakalati Ápio nali, exahe wenakalati Hanama Betetyakalati aokahitere nali akiti tehitiya haiyaharenai ahalakoatyaha wiso. Paulo waiyahene hoka ihalahare Enore kakoa, exahe ihalahare tyaona.

### Paulo Kaoka Roma Nali

<sup>16</sup> Wiyane Roma nali wikaoka hoka Paulo halakisaha hoka haxaokala ximita tyaona. Xakore hoka hatya sorare kaxaikotene. <sup>17</sup> Hanamaki ferakene najikinita Paulo kawisa judeunai nityohalitiranai, Roma nali yerenai, ahalakoatyahene maheta. Ahohisakoatyakakoah hoka nehena: — Nohinaeharenai, maisa nokahalakoiharexe wihi-naeharenai kakoa, exahe maisa nokahalakoiharexe wawenanaho, wahetakomaniyere harenai aotyakihenere wiso kakoa. Xakore hoka judeunai berexotyaha natyo Jerusalém nali hoka Roma yerenai ana isaha natyo. <sup>18</sup> Hoka hatyonai axalisaha natyo hoka halakihenahitaha natyo aokowiha, maisa maxemerehareta nokaxaisaki aokahitaha hoka.

<sup>19</sup> Xakore hoka judeunai atyo maisa nohalakisahita aokita ihiyeha. Hatyo hiyeta naxahene hoka Kalorexe ana notyoа hoka sema notahi maheta. Xakore hoka maisa atyo natyohotyalihare niraeharetya maheta xini. <sup>20</sup> Hatyo hiyeta naxa xiso, nowaiyeheta xiso, exahe wirae kakoa maheta. Israel hotyalinai atyahitere xahita hiyeta nokaxolatyaki exe kamatiherahi kakoa — nexa.

<sup>21</sup> Hatyaoseta nehenaha ihiye: — Maisa babera kaokare womana Judéia koа nalitare hitahi akiti. Exahe maisa wihinaeharenai hatyo nalita kaokehenehaha hoka xakaiye wihiye hitahi akiti, exahe maisa iraeharetyareha hekoti hiso. <sup>22</sup> Xakore hoka wasema

waokowita hiyahekola. Hiyaiya, wasemita atyo hakakoare hatyo hisaoniteraho kakoa kahalakoahare ahitere tahi akiti taita — nexaha ihiye.

<sup>23</sup> Hatyaoseta aimenekotyaha haxahalakoatyakakoaneha ferakene Paulo kakoa. Hatyaoseta exaimenekolahha ferakenehena hoka kahareha xaneha Paulo tyaonitere nali. Witita hoka heko maka ihiye haxakaihakala ihiyeha kakoa hoka awaiyekehala katya enomanaha wenati Enore koamaniya tahi akiti. Moisés xaotyakiraho, iraeti xakaisas-eharenai xairala harenai tahi kakoa awaiyekehala katya enomanaha hoka hotikisa Jesus tahi akiti enomanaha. — Hiyaiya, hatyo atyo Enore Kalorexe Aohenere — nexa ihiyeha, aiyateretyoa exahitaha.

<sup>24</sup> Haiyaharenai atyo tyakeko iniraene hoka haiyaharenai atyo maisa tyakekota iniraene. <sup>25</sup> Hatyaoseta tyotya xanehenahitaha enonita hoka hatyo kakoa makere irae kokoaha. Xanehenahitehenere nahitita Paulo nexa ihiyeha:

— Aliterexe nika Isekohaliti Waiyexe kaxaihakoretya Isaías hoka iraeta xahetako-maniyereharenai hiye. <sup>26</sup> Hiyaiya, exakere atyo nexa:

Hiyanehena hoka hexa judeunai hiye: Xasemenite, xakore hoka maisaite waiyekehala kita xomana. Xawahakotyaita, xiayienite xakore hoka maisaite waiyekehala kita xomana.

<sup>27</sup> Hiyaiya, hatyo halitinai xahekola atyo maisa waiyexe. Jihotyahita hatanakoakonaeha, exahe jihotyahitaha haxosenaeha. Ikoiya awa nikare tyaonahitaha hoka haxosenaiha kakoaiya waiyehenahitaha, exahe hatanakoakonaiha kakoaiya semahita hoka waiyekehala kaiya enomanaha. Hoka tyaohenahitahaiya nokoamaniye hoka naiyatelikihenahiteniya, nexa Enore.

<sup>28</sup> Hatyoseta Paulo halakihena hairaene hoka nexa: — Xasemehena, Enore atyo axikaty Iraeti Waiyexe majudeuneharenai ana kaiyakenahitaha maheta. Hoka semahenite hoka aokahenite haomanaha — nexa ihiyeha.

<sup>29</sup> Hatyaoseta semaha iniraene hoka xanehenahitaha. Hoka hatyo kakoaha makere kinatyaxa irae kakoaha.

<sup>30</sup> Hatyo najikinita hinama terehokoane Paulo tyaona hati axehenere ako. Hoka kahare haiyaharenai xane waiyitene hatyo nali. <sup>31</sup> Xakaita ihiyeha Enore koamaniya nawenatyaka tahi akiti, exahe Xekohaseti Jesus Cristo tahi hare xakaita ihiyeha hamairanenehare kakoita. Maisa xala hare mahokoanityare iniraine.

## Romanos

### *Iraiti Waiyexe Tyotya Halitinai Anere*

<sup>1</sup> Natyo Paulo naxairatya exe babera. Natyo atyo Jesus Cristo wakanehare exahe iniraene kakoare. Enore atyo aoka natyo hawakanehare maheta hoka axikatya natyo noxakai Iraiti Waiyexe maheta halitinai hiye.

<sup>2</sup> Toahiya xowaka exe Iraiti Waiyexe kaxakaisaka iraiti xakaisaharenae hiyeta. “Exe Iraiti Waiyexe halitinae anere”, nexa Enore hoka Iraiti xakaisaharenae xairatene babera waiyexe nanekoa. <sup>3</sup> Enore irae Haisani Wiyekohase Jesus Cristo tahi, xekohaseti Davi hotyalihare nerekati exaokaka. Haliti waiyekoarehare akereta tyaona Davi ene nawenakala nali. <sup>4</sup> Enawenane waiyexe atyo kaotyaka kasehetehenere haiyatere kakoa xowaka hoka hatyo hiyeta Enore Ityani kaxaokaka.

<sup>5</sup> Ihiyeta atyo Enore iraiti kakoare moka natyo Cristo hatene nahaka maheta. Tyotya haliti hotyaliharenai hiye noxakaini hoka tyakekoha exahe tyaonaha exema maheta.

<sup>6</sup> Hoka hatyonai konitare atyo xiso Roma nali tyaoniterenai. Xisonai tehitiya atyo Enore aoka Jesus Cristo anerenai xisaona maheta. <sup>7</sup> Hiyeta exakere naxairatya xiso Roma yerenai ana, xiso Enore awaiyetiterenai exahe hahotyaliharenai aohenerenai ana.

Maika wenati waiyexe, Wexe Enore mehexaikoharene exahe Wiyekohase Jesus Cristo xoaha nalitare tyaona xikakoa.

### *Paulo Niraexala*

<sup>8</sup> Exe hotohare nirae naokowita: Jesus Cristo hiyeta nihalahareta Enore kakoa xiihiyeta. Hiyaiya, hakakoarehena xityakekone tahi semahitaha. <sup>9</sup> Xasemehena, Enore ana nahakita nihalahalini kakoa, Waiyexe Iraiti noxakaita Ityani tahi akiti. Natyo atyo niraexatya xomana tyotyaki ferakene. Hatyo akiti waiyekehalakita Enore ana. <sup>10</sup> Niraexaita xomana. Naxita Enore hoka exaokalitaiya hoka notyoa nowaiyeheta xiso. <sup>11</sup> Kasani nowaiyeheta xiso hoka naotyakisa naokowita xiso waiyexe kakoa hoka xikinatere xisaona maheta. <sup>12</sup> Exakere atyo nirae naokowita, kasani atyo wityotya, natyo, xiso xoaha atyo haxowakita wakahinaetyakakoa naokita hoka xikinatere xisaona notyakekoni hiyeta, exahe natyo tehitiya hoka nokinatere notyaona xityakekone hiyeta.

<sup>13</sup> Nohinaeharenae, kasani exeharenae waiyekhalaka xomana naokita. Kahaliki xakore notyoa nowaiyeheta xiso naokowita hoka xoalinihare tyaonita nomani hoka maisa aliyakere notyoare. Kasani nohateni tehitiya kekoare xinekoni naokita, haiyaharenai majudeuneharenae koni nohateni kekoaretere akereta. <sup>14</sup> Nikarexe terota atyo nohateni: owiteneta tyaoniterenae, exahe seko tyaoniterenae, exahe koxaka kaxaotyakisakitereharenae, exahe mawaiyoreharenae harenai atyoite naotyakihena. <sup>15</sup> Hatyo hiyeta kalikini atyo nomimiye notyaonita Iraiti Waiyexe noxakaini kakoa xiso Roma tyaoniterenae hiye.

### *Wityakekone Hiyeta Atyo Enore Haliti Waiyexe Aokita Wiso*

(*Romanos 3.21-26; 4.5; 5.1; 8.1; Gálatas 3.1-7*)

<sup>16</sup> Maisa atyo nohaiharexe Iraiti Waiyexe noxakaini kakoa. Hiyaiya, hatyo atyo Enore niyatere iyeheta maheta tyotya tyakekohenerenena. Judeunai hotohare ite, hatyaosetaite majudeuneharenai. <sup>17</sup> Hiyaiya, Iraiti Waiyexe atyo hotikijita womana hoka Enore atyo haliti waiyexe aokita wiso wityakekone hiyeta, hetatita, imiyane kijiya, Iraiti Waiyexe iraetere akereta:

“Xala xamani atyoite Enore haliti waiyexe aoka ityakekone hiyeta hoka tyaota mene atyoite”, nitere akereta.

### *Halitinai Nómame Iniyalahare Tahi*

<sup>18</sup> Hiyaiya, Enore xeharene atyo enokoata tyoita tyotya iniyalahare nomaseharenae ana. Hatyo iniyalahare háomaneha hiyeta atyo talatitaha Iraiti Waiyexe, kasani haiyanai

maisa semahene aokareha hoka. <sup>19</sup> Enore atyo iniyalahare mokahitene. Hiyaiya, halitinai ana waiyekehala kita etahi akiti. Enore ta atyo hatyoharenai hotikisa enomanaha. <sup>20</sup> Hetati Enore waikohe tyomehenere xowakiyita, enawenane mawaiyahare, iniyatere matyotenehare, enawaiyore harenai waiyekehala enómanenai hiyeta. Halitinai tyoty hatyoharenai waiyaha hoka hatyo hiyetaiya maisa xoare maheta teraharetyoahitaha. <sup>21</sup> Enore xakore waiyahitaha hoka maisa aiminisarahene, exahe hoka maisa ihalaharexeha ekakoa. Hatyo hiyeta exahekola maisa waiyexe, motya makaliroti exahekola tyaonita. <sup>22</sup> Waiyore xakore aokowitaha hoka hatyaharexeha atyo. <sup>23</sup> Enore makamanehare xema tyaonareha mahetare ene hoka enomakahare xema tyaonahitaha. Haliti xaimenekotyaka, kotehala, kirakahare, owi harenae xaimenekotyaka xema tyaonahitaha. Hatyoharenae atyo haenorexa aokahitaha.

<sup>24</sup> Nikare atyo hatyo halitinai tyaonita hoka Enore atyo halakisahene hoka haxahekola iniyalahare ximita tyaonaha hoka xoalini hare iniyalahare kahiharetyakere tyomaha hahinaeharenai kakoa maheta. <sup>25</sup> Enore niraene aliterexe atyo halakisaha hoka maoseratyati xema tyaonahitaha. Enore tyomehenereharenae xema atyo tyaonahitaha, maisa enomasehare xema tyaonareha. Enore nómnanenai hiyeta ene atyo kaihaharetyakehena ekakoa maheta ene.

### *Wenati Iniyalahare*

(1 Coríntios 3.3-4; 10.6-10; 2 Coríntios 12.20-21; 1 Timóteo 1.9-10)

<sup>26</sup> Hatyoharenae tyomahitereharenae hiyeta Enore halakisahene hoka kahiharetyakere tyomahitaha, exahe ohironae kakoita hoka haohironehatyanae kakoa iniyalahare tyomita. Maisa ene hatyoharenae kaomaka maheta ene xini.

<sup>27</sup> Exahe enanae tehitiya hoka halakisaha ohironai hoka xane hatya haenanehatya kakoa iniyalahare, kahiharetyakere tyomahitaha, kalore maiyasekakoahitaha hoka nikare tyaonahitaha. Nikare tyaonahitaha hoka hatyotaha atyo iniyalahare axomokanikisoahitaha hoka iniyalahare kaxomokakahitaha hatyoharenai hiyeta.

<sup>28</sup> Maiha Enore tahi akiti aliterexe semaha aokowiyeha hoka iniyalahare xahekotyati isa enomanaha hoka tyomaha maheta xoalini hare hamaomanenehareha niyahare maheta. <sup>29</sup> Maisa waiye ahekotyareha, maisa waiyexeha. Xiyehaliti maiyasahitaha. Okoareha, aisahitataha, mokotyahitataha, maoseratyahitataha, xekahatiharetaha harenai. <sup>30</sup> Iraeharetyahitataha, exahe iniyalahare iraetaha hahinaeharenai tahi. Kirrawanahitaha Enore exahe kinatere aokowitaha. Ahinityareha exahe aokowiharetyoareha. Kahare iniyalahare aomatikisaha hoka tyomahitaha. Maisa hanexenai niraene tyakekoreha.

<sup>31</sup> Ohiroareha, enatyalo ha tyaonahitaha, maisa hairaene akereta tyaonareha, maisa kaisereha, exahe maisa haiyanai airakoaneharetyleha. <sup>32</sup> Waiyekehala kita atyo Enore xaotyakiraho enomanaha. Hiyaiya, xala xamaniya atyo nikare tyaonita hoka waiye xaisaka atyo, nitere. Hatyoharenae xakore waiyekehala kita enomanaha hoka hekota hatyoharenai tyomahitaha hoka haiyanai hatyo tyomahitare akereta tyomiterenai atyo awaiyetyahitaha.

### *Enore Xaxalira Tahi*

<sup>1</sup> Nohinaehare, xoana hoka haiyaharenai hiraeharetita? Exahe atyo xala xamani hiso hoka maisaiya atyo hateraharetyoita. Hiyaiya, haiyanai xakore atyo hiraeharetita enawenaneha hiyeta hoka hatyo tyaonahitare akereta atyo hisaonita hoka hisota atyo iniyalahare maniya haxomokanikijoita. <sup>2</sup> Exe atyo waiyekehala kita womana: Enore atyo maisa iniyalahare nomasehare xini hoka ehekoreta atyo hatyoharenai tahi iraeta. <sup>3</sup> Hoka hiso nohinaehare atyo hisomita iniyalahare, haiyanai tahi hiraetere akereta. Hoka xoana hiyahekola hiyetaite hoka motylaite Enore axalihenere xowaka maisa iniyalahare mokita hiso haokita? <sup>4</sup> Xoana himatyakekoneheta kore Enore nawaiyexehare, maxeharenehare, exahe emamaxahareneharene? Waiyekehala kita atyo enawaiyexehare

homana, kasani hahalakiheta iniyalahare hománenai aokita. <sup>5</sup> Hoka hiso atyo maisa waiye hahekotyare, exahe maisa hityakekohatiye. Hatyo hiyeta aeroretyoitata atyo iniyalahare hiyomokaka Enore haxeharene, exahe haxahekolanai waiyexenai hotiki-henere ferakene niyahare.

<sup>6</sup> Hiayiya, tyotya haliti ana, hatya xakini ana atyoite isehetehena tyomehenere akereta. <sup>7</sup> Hoka isaite wenati matyotenehare waiyexe tyomitereharenai ana, waiyexe tawitereharenai ana, aiminisarenai ana, wenati matyotenehare tawitereharenai ana. <sup>8</sup> Hoka hawawa aokowitereharenae, waiyexe mahokoanititreharenae hoka iniyalahare xema tyaonitereharenae ana atyoite haxeharene hotikihena. <sup>9</sup> Hatyo xowakehenaite hoka wenati howitharexe, exahe xamaikohaliti harenaite kaotyakehena tyotya iniyalahare nomaseharenae ana. Judeunae ana hotohare ite kaotyaka, hatyaosetaite majude-uneharenae ana. <sup>10</sup> Hoka Enore ite ihalaliti, xaiminisati, mehexaikohaliti harenai isa tyotya waiyexe tyomitereharenae ana. Judeunae ana hotohare ite isa. Hatyaosetaite majudeuneharenae ana. <sup>11</sup> Hiayiya, Enore ana atyo tyotya halitinae hakakoa hoka tyotya halitinae hakakoa mokita.

<sup>12</sup> Majudeuneharenae atyo maisa Moisés xaotyakiraho kakoare xini hoka iniyalahare tyomehenaha hoka maisa atyo Moisés xaotyakiraho xema xini kamawenekoaretyakahitaha. Hoka judeunae atyo Moisés xaotyakiraho kakoare hoka iniyalahare tyomehenaha hoka hatyo xaotyakiyaho aokitere akereta atyo iniyalahare kaxomokakahitaha. <sup>13</sup> Hiayiya, Enore atyo maisa haliti waiyexe aokare Xaotyakiyaho semaxemaiterehare xini. Xaotyakiyaho aokitere akereta tyaonitereharenae atyo haliti waiyexe aokita.

<sup>14</sup> Majudeuneharenae atyo maisa Xaotyakiyaho kakoare xini. Hoka haxahekola ha ximita atyo tyaonahitaha Xaotyakiyaho aokitere akereta hoka hatyoha terota atyo haxaotyakira xema tyaonahitaha, maisa xakore atyo Moisés xaotyakiraho kakoareha xini hoka. <sup>15</sup> Hawenaneha hiyeta atyo hotikisahitaha Xaotyakiyaho xairatyoare tyaonitere hamahiyaseha hiyexe. Exahekola ha atyo hatyoharenai aliterexe aokita ihiyeha. Hoka haiya xowaka examaikohalinikisahitene, exahe haiya xowaka hoka aihalahalikisahitene xoaha. <sup>16</sup> Hoka hatyo akeretaite, exe Iraiti Waiyexe noxakaitere akereta, hatyo ferakenehena hoka Enore ite Jesus Cristo hiyeta hotikihetehena tyotya halitinai xahekola metaharexenai.

#### *Judeunai, Xaotyakiyaho Xoaha*

<sup>17</sup> Xoana kaisere hisaonita? Hiayiya, judeu haokowita, Moisés xaotyakiraho hityakekota, exahe hahinitita Enore kakoa xoaha. <sup>18</sup> Enore xahekola kakoa hawaiyoreta, exahe Xaotyakiyaho kakoa hikaxaotyakisakita waiyexe xema hisaona maheta.

<sup>19</sup> Aliterexe atyo maxoseharenai xotokahisase hiso, xaokanatyakalati akereta hisaonita makaliroti koni tyaoniterenai ana, <sup>20</sup> haotyakijita atyo mawaiyoreharenae, xoimanae xaotyakisase atyo hisaonita. Aliterexe atyo hiraeta, xaotyakiyaho nali atyo tyotya waiyoliniti tyaonita, exahe xoalini hare aliterexe.

<sup>21</sup> Hiso haiyanai haotyakijitere, xoana hoka maisa hisota haotyakisoawiye? Kaiwati xakore hamahokoanetita hoka xoana hoka hiso atyo hikaiwita? <sup>22</sup> Ohiro mawatyalisakenne xakore haokita hoka xoanere atyo hoka hiwatyalita? Maisa xakore hawaiyetyare enore metalaharenai hoka xoana hoka hikaiwita hatyo enore metalaharenai hanakotare xiyehalitinai? <sup>23</sup> Hiso atyo hihalahareta Enore xaotyakiraho waiyekelakiterehare homana kakoa hiyeta, xakore hoka hehaihalikijita atyo Enore, maisa exaotyakiraho akereta hisaonare hoka. <sup>24</sup> Hiayiya, exakere atyo Iraiti Waiyexe kaxairatyaka: Majudeuneharenae atyo iniyalahare iraeta minita Enore tahi xiso judeunae hiyeta.

<sup>25</sup> Xaiko nomanere milihisati xoalini hare tyoma homana, hiso judeu ana, Xaotyakiyaho aokitere akereta hisaona hoka. Xakore hoka maisaiya aokitere akereta hisaonita hoka motyaiya maxaikotyakahare ene hisaona. <sup>26</sup> Hoka majudeuneharenai atyo maxaiko nomanere milihesakahareha, xakore hoka xaotyakiyaho aokitere akeretaiya tyaonaha hoka Enoreya atyo exaiko nomanere milihesakaharenai akereta mokahene. <sup>27</sup> Nikare ite hoka xiso judeunaite xikairaeharetyaka majudeuneharenai

hiyeta. Hiyaiya, maisa atyo xaotyakiyaho akereta xisaonare, exairatyakahare xakore xaotyakiyaho xomana, exahe exaiko nomanere milihisakahare xakore xiso hoka. Xakore hoka majudeuneharenai atyo tyaonahitaha xaotyakiyaho xema, maisa xakore atyo kaxaiko nomanere milihisakereha xini eháreha hiye hoka.

<sup>28</sup> Nikare hoka xala kaisere judeu, exahe aliterexe exaiko nomanere milihisakahare? Judeu kaiserehare atyo maisa etakehare henekoa maniya taita haháre hiyexe aikotiterehare xini. <sup>29</sup> Xakore hoka judeu kaiserehare atyo etakehare waiye ahekoiterekerehare, etakehare iniyalahare halakijiterekerehare. Enore Nisekohare atyo nikare mokitene hoka Xaotyakiyaho exairatyakahare atyo maisa xala hare nikare mokare. Hatyohare haliti atyo Enore tyakekota, maisa atyo halitinai xini.

### 3

<sup>1</sup> Nikare hoka xoare maheta judeu kaxaokowisaka? Exahe hoka xoare mahetaiya womanere milihi kaxaikotyaka? <sup>2</sup> Waiyehenaiya kahare maniyata. Exe hotohare: Enore halakisa hairaene judeunai ana. <sup>3</sup> Hoka hatyaoseta? Nikare ite hoka haiyanaita maisa tyakekotene hoka hatyo hiyetaite Enore tehitiaite maisa tyakekohatiye xini tyaohena?

<sup>4</sup> Maisa atyo nikare xinil! Exahe atyoite tyotyaha maoseratyareha taita hoka Enore atyoite hekota aliterexe niraetyasehare tyaohena. Hiyaiya, exakere atyo nexa Iraiti Waiyexe etahi:

“Maika himamaoseralahare hikaxaokaka hiraehena hoka exahe maika maisa xoare kawaiyakita hihiyehikairaeaharetyakehena hoka”, nexa.

<sup>5</sup> Nikareya hoka iniyalahare wománe hiyetaiya, Enore maomaneharene iniyalahare hotikijita hoka xoare wehenaita? Nikarala hoka Enore ala maisa waiyexe, iniyalahare moka aokowihena wiso hoka? Kalini niraeta haiyanae iraetere akereta. <sup>6</sup> Maiha nikarexe xini! Enoreya maisa waiyexe hoka aliyakereya axalihena halitinai? <sup>7</sup> Nomaoserali hiyetaiya Enore katyakekotyaka, exahe xoalini hare tyomiterekerehare waiyexe waiyekahalaka hoka xoanaiya hoka hekotata iniyalahare nokaxomokakihena, iniyalahare nomasehare akereta? <sup>8</sup> Xoanere hoka maisa wexare: “Nika iniyalahare wisoma hoka hatyo iniyalahare hiyeta waiyexe kaotyaka”, wexare? Haiyaharenai atyo nikare niraeta aokahitaha hoka maoseratyahitaha. Hoka hatyonai atyoite maisa waiye xini kaxomokaka.

#### *Maisa Xala Hare Waiyexe Aka*

<sup>9</sup> Nikarala hoka wiso judeunae, majudeuneharenae xahehare nawaiye wisaonita? Maiha nikare xini! Hiyaiya, judeunae, majudeuneharenae xoaha atyo tyotyaha iniyalahare nomasehare makere. Koxaka hatyoharenae noxakai xihye. <sup>10</sup> Hiyaiya, exakere Iraiti Waiyexe nexa:

Maisa atyo xala hare waiyexe aka, maisa hatya hekoti.

<sup>11</sup> Maiha xala hare ana Enore akiti waiyekahalakere, maisa xala hare taware Enore xahita.

<sup>12</sup> Tyotyaha haware tyaonahitaha Enore nonita, maisa xoare tyomareha, metaha atyo. Maisa xala hare waiyexe xema tyaonare, maisa hatya hekoti.

<sup>13</sup> Etororoneha atyo xawatyakalati majiholatyoare akereta tyaonita. Ininiseha hiyeta emaoseralaha hikoita hoka komaniyaita haliti.

Ekanasakotaha iniyalahare iraiti hikoita, owi naikoli xata kahe akerehare.

<sup>14</sup> Ekanasenaiha ako atyo iniyalahare taita tyaonita.

<sup>15</sup> Kaholawakahitaha hamokolaha exahe haxaisaneha haliti kakoa.

<sup>16</sup> Aliyo xamani xane tyaohenaha hoka nali mawenekoaretyahitaha, exahe xamaikohaliti harenae halakisahitaha.

<sup>17</sup> Maisa atyo wenati waiyexe akiti waiyekahalakere enomanaha.

<sup>18</sup> Exahe maisa atyo Enore aiminisareha.

<sup>19</sup> Hiyaiya, exehare atyo waiyekahalakita womana. Tyotyaha xaotyakiraho iraeterekerehareni atyo xaotyakiyaho xema tyaoniterekerehareni anere. Hatyo hiyeta tyotyaha materaharetyoanehareha tyaonaha maheta, exahe tyotyaha halitinai hoka iniyalahare nomasehareni makere tyaona maheta Enore nahalakoa. <sup>20</sup> Hiyaiya, Enore ana atyo

maisa xala hare waiyexe aka xaotyakiyaho aokitere akereta tyaonitere hiyeta. Hiyaiya, xaotyakiyaho atyo haliti ana hotikijita iniyalahare enómaneha.

*Waiyexe Maniya Nawenatyakeheta Tyakekotyati Hiyeta*

(*Romanos 1.16-17; 4.5-8; 5.1; 8.1; Gálatas 3.1-7*)

<sup>21</sup> Hoka kalikini atyo Enore hotikisa halitinai ana haxaokane haomana akiti hoka haliti waiyexe aokahene maheta. Maisa atyo xaotyakiyaho hiyeta xini. Moisés xaotyakiraho, exahe iraiti xakaisaseharenai xoaha hatyohare tahi xakai. <sup>22</sup> Enore atyo haliti waiyexe aokita halitinae ityakekoneha Jesus Cristo hiyeta. Nikare atyo mokita tyotya tyakekohenerenai. Hiyaiya, maisa atyo hatya hawareharexe xini hatya nonitata. <sup>23</sup> Hiyaiya, tyotyaha atyo iniyalahare tyomaha hoka haware atyo tyaonahitaha wenati masakare waiyexe nonitata Enore nali. <sup>24</sup> Xakore hoka Enore atyo hawaiyexehare hiyeta maisa xoare aokita ihiyeha. Hoka haliti waiyexe aokahene, Jesus Cristo hiyeta waiye maniya mohenahitene hoka. <sup>25</sup> Enore atyo axikatya Cristo, atyalihose xaimaholatyaka hiye wainihenere hiyeta halitinai tyakekone hoka, Cristo hiyeta kaxemaisatyakeheta iniyalahare enómanenaiha maheta. Nikare Enore tyoma hotikisa maheta waiyexe háomane. Toahiya xowaka maisa kaholawakita halitinai nómanenai iniyalahare kakoa. <sup>26</sup> Xakore hoka kalikini atyo axikatya Cristo hotikisa maheta waiyexe háomane. Nikare hoka Enore atyo waiyexe nomasehare hoka tyakekoterenai Jesus haliti waiyexe aokita.

<sup>27</sup> Nikare ite hoka hatyoharenae hiyeta waokowiharetyoahena? Mahaiya! Xoanereya hoka maiha? Xoana wisaonitere Xaotyakiyaho hiyeta? Maisa nikarexe xini! Wityakekotere Cristo hiyeta. <sup>28</sup> Hatyoharenai hiyeta waiyekehalaka womana. Hiyaiya, Enore atyo haliti waiyexe aokita ityakekoneha hiyeta, maisa atyo xaotyakiyaho aokitere akereta tyaonitere hiyeta xini.

<sup>29</sup> Hoka nikarala hoka Enore ala judeunai Nenorexa taita? Nikarala hoka maisala majudeuneharenae Nenorexa tehitia xini? Hái! majudeuneharenae Nenorexa tehitia atyo. <sup>30</sup> Hiyaiya, Enore atyo haterore. Hoka haliti waiyexe aokita judeunae, majudeuneharenae harenae, ityakekoneha hiyeta. <sup>31</sup> Nikarala hoka wityakekohenere hiyetala wemaisatya Xaotyakiyaho? Maiha atyo nikarexe xini. Hekota atyo Xaotyakiyaho kakoaretata wisaonita, wikaiyakehetenere najikinita.

#### 4

*Abraão Nawenane Tahi*

<sup>1</sup> Hoka xoare wehenaité wahetakomaniyerehare Abraão xaokaka? Xoarala tyoma? <sup>2</sup> Hiyaiya, enómane waiyexe hiyetaiha haliti waiyexe aokene Enore hoka nikareya hoka ehekoreya aokowiharetyoa. Xakore hoka mahaiya atyo Enore haotita xini. <sup>3</sup> Hiyaiya, Iraiti Waiyexe atyo nexa:

Abraão tyakeko Enore hoka ityakekone hiyeta haliti waiyexe aokene.

<sup>4</sup> Xala xamani atyo hahena hoka kabakatyakita atyo. Hatyoharenae atyo maiha ekahinaetyaketere xini, enomanere terota atyo hatyoharenae. <sup>5</sup> Hoka xala xamaniya atyo maisa hakare Xaotyakiyaho aokitere akereta hoka Enoreya atyo ityakekone hiyeta haliti waiyexe aokene. Iniyalahare nomasehare xakoreya hoka haliti waiyexeya aokene Enore.

*Waiyexe Maniya Nawenatyakeheta*

(*Romanos 6.23; 8.1-10; 1 Coríntios 15.2-4; 2 Coríntios 5.20-21*)

<sup>6</sup> Exeharenai tahi Davi xakai aokowita etake Enore waiyexenai aohenerenai nihalaharene tahi iraehenere xowaka. Iniyalahare enómaneha maotyaneheta hoka hatyo hiyeta haliti waiyexe aokahene.

<sup>7</sup> Waiye kaiserehare atyoite tyaothena haiyaharenae. Enore atyo iniyalahare enómane naeha maotyaneheta, exahe enómane iniyalahare hoka emaisaheta.

<sup>8</sup> Waiye kaiserehare atyoite hatya haliti tyaothena, Enore atyo iniyalahare enómane maotyaneheta hoka.

<sup>9</sup> Hoka xoana exe ihalahaliti tahi Davi iraeheneralu exaiko nomanere milihisakaharenae anere taita? Maiha. Maxaiko nomanere milihisahakaharenae anere tehitiya. Hatyo hiyeta Iraiti Waiyexe nehenere wiraehitiya:

Abraão tyakeko Enore hoka hatyo hiyeta haliti waiyexe aokene.

<sup>10</sup> Xoana xowaka Enore awaiyetene? Xoana Abraão kaxaiko nomanere milihisakehenere nahitita, xoana enajikinita kore? Enahitita, maisa enajikinita xini. <sup>11</sup> Wahehena atyo hoka kaxaiko nomanere milihisaka. Hoka hatyo aikonomanere milihisohahenere atyo Abraão hotikisa maheta taita hatyakekone. Enore ityakekone hiyeta haliti waiyexe aohenerene, emaxaiko nomanere milihisakitatere nahitita hiyeta. Hatyo hiyeta Abraão atyo tyotya Enore tyakekohenerenai nexe, exahe haliti waiyexe aokahene, maisa xakore atyo kaxaiko nomanere milihisakereha hoka. <sup>12</sup> Exahe tyotya exaiko nomanere milihisakaharenae nexe tehitiya tyona. Maiha exakonomanere milihisakehenahere hiyeta xini. Xakore hoka Abraão tyakekone akereta tyaoehenahere hiyeta. Hiyaiya, Abraão tyakeko Enore hamaxaikonomanere milihisakaharene nahitita.

#### *Enore Irae Abraão Hiye Hoka Tyakeko Iniraene*

<sup>13</sup> Enore atyo halakisa aokowi waikohe Abraão ana, ijikohalaharenai xoaha ana. Nikare isa Abraão ana aokowi, xakore hoka maisa atyo Xaotyakiyaho xema tyaonitere hiyeta xini. Ityakekone hiyeta Enore haliti waiyexe aokene hoka waikohe isa enomana aokowi. <sup>14</sup> Enore xoalini hare isa aokowihenereya Xaotyakiyaho xema tyaoriterenae anere taita hoka nikareya hoka halitinae tyakekoneya maisa xoare tyomita. Exahe Enore xoalini hare isa aokowitreharenaiya maisa xoare tyomita. <sup>15</sup> Hiyaiya, Xaotyakiyaho hiyeta atyo Enore xeharene kaotyakita. Xakore hoka alyako xamani atyo maisa Xaotyakiyaho aka hoka maisa tehitiya atyo nali Xaotyakiyaho matyakekotyaka aka.

<sup>16</sup> Hiyaiya, tyakekoti hiyeta taita atyoite Enore tyotya xoalini hare isa aokowihenereharenae Abraão jikolaharenae ana isa maxaimanehareta. Hatyohahrenae maisa Xaotyakiyaho xema tyaoriterenae anere taita xini. Tyotya Abraão tyakekone akereta tyakekohenerenae anere tehitiya. Hiyaiya, Abraão atyo wityotya wexe. <sup>17</sup> Exakere atyo nexa Iraiti Waiyexe:

“Kahare haliti hotyalinai nexe atyo namoka hiso”, nexa Enore Abraão hiye.

Hatyohahrenae maisa aokowihenerehare xekohasehare tyona, hatyo Abraão tyakekonehare, Enore kamatinai ekasekihititere, exahe xoalini hare makaotyakenehare hoka ekaotyakatitrite. <sup>18</sup> Maisa xakore aliyakere atyahaheta xaka hoka Abraão heko tyakeko, heko atyaha. Hatyo hiyeta kahare hotyalihare halitinae nexe tyona. Exakere atyo nexa Iraiti Waiyexe:

“Hijikolaharenaite hisoaka tyona”, nexa.

<sup>19</sup> Abraão xakore okoi 100-wanonehena hoka maisa matyakekoneta. Ohiyehena, okoi xakore wainihena hoka heko tyakekota. Exahe exanityo Sara hoka ohiyehena hoka maisaiya aliyakere kaisanita. Maisanityakohalo xakore hoka maisa Abraão matyakekoneta. <sup>20</sup> Abraão maisa halakijita hatyakekone, maisa matyakekotita Enore isa enomana aokowitreharenae. Ityakekone aiyatelikisene hoka hatyo hiyeta aexakeretya Enore. <sup>21</sup> Waiyekehalakita atyo enomana Enore tyoma aokowitreharenae kakoa hoka. <sup>22</sup> Hatyo hiyeta, “Enore haliti waiyexe aoka Abraão ityakekone hiyeta”.

<sup>23</sup> “Haliti waiyexe”, nehenere iraiti atyo maisa exaokaka taita xini iraeta. <sup>24</sup> Wiyaokaka tehitiya iraeta. Hiyaiya, wityakeko Wiyekohase Jesus xekasekisasehare Enore. Hatyo hiyeta Enore haliti waiyexe aoka wiso. <sup>25</sup> Jesus atyo kaxaxikatyaka iniyalahare wománe hiyeta waini maheta. Hatyaoseta kaxekasekisakeheta haliti waiyexe Enore aoka maheta wiso.

<sup>1</sup> Kalini atyo Enore haliti waiyexe aoheta wiso wityakekone hiyeta hoka mehexaiko-haliti akeheta atyo womana, Wiyekohase Jesus Cristo hiyeta. <sup>2</sup> Cristo atyo kolatya wiso wityakekone hiyeta Enore ana hoka waiye mokita wiso, hoka kalikini wikinatere wisaonita exema. Hatyo hiyeta wihalahareta Enore nali wiyanene akiti kakoa. <sup>3</sup> Exahe wihalahareta tehitija howitihare wisaoniterekarenai kakoa. Hiyaiya, waiyekehalakita atyo womana: hatyohare howitihare wisaoniterekarenai hiyeta atyo wimehexaikohare wisaonita. <sup>4</sup> Hoka wimehexaikohare wisaoniterekarenai hiyeta atyo Enore tyakekota wiso. Hoka tyakekotere wiso hiyeta atyo watyahita Xekohaseti xahita. <sup>5</sup> Hoka watyahiterekarenai hiyeta atyo maisa wamaikoharexe. Hiyaiya, Enore atyo isa womana hawaiyexehare, Isekohaliti Waiyexe isehenere womana hiyeta.

#### *Cristo Atyo Waini Womana*

*(Romanos 4.24-25; 1 Coríntios 15.2-4; Gálatas 1.4; Tito 2.11-14)*

<sup>6</sup> Enore xaimenekolaose xane hikoa hoka Cristo waini womana, wiso iniyalahare nomaseharenai ana. Hatyo nahitita maisa ene waiyexe wisomare. <sup>7</sup> Hiyaiya, komitaineyea maisa xala hare wainita hatya haliti waiye maniya tyaoniterekarenai wenekoare. Kala xoana xamaniya hoka nikarehare hiyetai ya hatya kinatyatyako waini hatya haliti waiyexe wenekoare. <sup>8</sup> Hoka Enore atyo hotikisa hawaiyexehare womana. Hiyaiya, iniyalahare nomaseharenai xakore wiso hoka Cristo waini womana. <sup>9</sup> Kalikini atyo Enore haliti waiyexe aoheta wiso Cristo wainihenare atyalihose xaimaholatyaka hiye hiyeta. Hoka waiye kaiserehare atyo ite wisaohena ihiyeta Enore xeharene nonitata. <sup>10</sup> Enore nahalakoaharenai ene wiso, xakore hoka haisani kamane hiyeta hahinaehare aoheta wiso. Kalikini atyo Enore hinaeharenai wisaoheta hoka wikaikayeketehena atyo ite Cristo kasehetehenare hiyeta. <sup>11</sup> Hatyo hiyeta kalikini wihalahareta Enore kakoa, Wiyekohase Jesus Cristo hiyeta. Hatyo atyo Enore hinaeharenai moheta wiso.

#### *Adão, Cristo Xoaha*

<sup>12</sup> Iniyalahare atyo waikohekao kaotyaka haterore haliti hiyeta. Hoka hatyo iniyalahare hiyeta kamati kaotyaka. Hoka kamati exaoretyoa tyotya halitinae ana. Hiyaiya, tyotyaha atyo iniyalahare tyomaha. <sup>13</sup> Halitinai ana Xaotyakiyaho makaotyakeneharetatere nahitita atyo koxaka terota iniyalahare tyaonita ali waikohekao. Xakore hoka iniyalahare atyo maisa kawatyalisakere, maisa Xaotyakiyaho aka hoka.

<sup>14</sup> Hiyaiya, Adão xowakiyata kamati jiyahaotya tyotya haliti Moisés kijiya hoka waini tyotyaha. Maisa xakore atyo iniyalahare tyomareha Adão Enore niraene masemaxemala hoka iniyalahare tyomehenere akereta xini hoka.

Hoka Adão atyo aimenekoita kaotyakehenere tyaonene. <sup>15</sup> Xakore hoka hatyo hinamaharenai atyo hawareharexe makere. Hiyaiya, Enore waiyexe ijitereharenai kakoaiya atyo maisa aliyakere Adão iniyalahare tyomehenere kakoa kaxaimenkotyakita. Aliterexe atyo kahare haliti waini haterore haliti iniyalahare tyomehenere hiyeta. Xakore hoka Enore waiyexe ijitereharenai atyo exahehare, hoka hatyo hiyeta wenati waiyexe maxaimanahareta ijita kahare haliti ana haterore haliti xawaiyera wiso hiyeta. Hatyo haliti atyo Jesus Cristo.

<sup>16</sup> Hahekorexe atyo Enore waiyexe ijiterehare nonitata hatya haliti iniyalahare tyomehenere. Iniyalahare tyomehenere hiyeta atyo mawenekoaretyati aho kaotyaka haterore iniyalahare tyomehenere hiyeta. Xakore hoka hawaiyexeharene hiyeta atyo Enore maxaimanahareta haliti waiyexe aokita kahare iniyalahare tyomiterekarenai.

<sup>17</sup> Aliterexe atyo haterore haliti nōmane iniyalahare hiyeta kamati kaotyaka tyotya halitinae ana. Xakore hoka Jesus Cristo tyomehenere atyo exahehare tyaona. Hatyo hiyetaite Enore tyotya aohenerenae, exahe wenati waiyexe isehenere enomanaha hiyetaite waiye tyaonaha Cristo hiyeta.

<sup>18</sup> Hiyaiya, haterore iniyalahare tyoma hoka hatyo atyo tyotya halitinae nawenane aiyalaharetya. Nikare tehitija hatya haliti waiyexe taita tyoma hoka tyotyaha iye-henahitene hoka wenati waiyexe isa enomanaha. <sup>19</sup> Haterore haliti matyakekohenere

Enore hiyeta tyotya halitinae iniyalahare nomasehare tyaonaha. Nikareta tehitia ite haterore haliti tyakekone hiyetaite Enore haliti waiyexe aokahene.

<sup>20</sup> Xaotyakiyaho atyo kaotyaka iniyalahare aeroretya maheta. Hatyo iniyalahare aeroretyoahenere hiyeta atyo Enore xawaiyera exahehare tyaona. <sup>21</sup> Hiyaiya, iniyalahare kinatere tyaona kamati hiyeta. Nikareta tehitia Enore xawaiyera kinatere tyaona wenati waiyexe hiyeta hoka ijita womana wenati matyotenehare, Wiyekohase Jesus Cristo hiyeta.

## 6

*Cristo Hiyeta Waitare Wenati Tyaona*

<sup>1</sup> Xoare wehenaite hatyo hiyeta? Nikare ite hoka heko iniyalahare wisomehena, Enore xawaiyera exahehare tyaona maheta? <sup>2</sup> Maiha nikare xini. Koxaka atyo wenati iniyalahare ana wiwaini hoka aliyakereya heko iniyalahare wisomehena? <sup>3</sup> Exehare akiti ala waiyekehala kita xomana naoka. Hiyaiya, wikabatixatyakehena atyo haxawalita wisaona maheta Jesus Cristo kakoa, exahe wikabatixatyaka tehitia atyo haxawalita ekakoa wainitere akereta wiwaini maheta. <sup>4</sup> Hatyo hiyeta wikabatixatyakehenere xowaka atyo ehakakoaneta wikaxafityaka, wainihenere akereta atyo wiwaini. Nikare wisaona Cristo kaxekasekisakehetehenere Enexe niyatere waiyexe hiyeta akereta tehitia wikaseheta hoka waitare wenati xema wisaoheta maheta.

<sup>5</sup> Hiyaiya, haxawalitaiya atyo wiwaini ekakoa ekamane akereta hoka nikare tehitiaite kasehetehenere akereta haxawalita wikaxekasekisakeheta. <sup>6</sup> Hiyaiya, exehare atyo waiyekehala kita womana. Toahiyere iniyalahare wománe hiyeta wikaxaisaka Cristo kakoa atyalihose xaimaholatyaka hiye, wawenane toahiyere kamawenekoaretyakeheta maheta. Hoka hatyo hiyeta maisa atyo iniyalahare anerenaiheta xini wiso.

<sup>7</sup> Hiyaiya, hatyaiya atyo waini hoka maisaiya atyo aliyakere iniyalahare tyomehitita. <sup>8</sup> Koxaka atyo Cristo kakoa wiwaini hoka wityakekota tehitia atyo wikaseneheta ekakoa. <sup>9</sup> Cristo atyo kaxekasekisakeheta hoka maisaiya atyo wainihitita, makamanehare atyo tyaona. Hoka hatyo kamati atyoite maisa xoana mohenahititene. Hatyohare akiti atyo waiyekehala kita womana. <sup>10</sup> Wainihenere atyo iniyalahare ana waini hoka hakirore atyo nikare tyaona matyotenehare niyahare. Hoka kalikiniye enawenane atyo Enore anere.

<sup>11</sup> Maikaira nikareta tehitia ekamane akereta xisaohena iniyalahare xománe ana, xakore hoka xikaseta atyoite Enore koamaniya, Jesus Cristo kakoa haxawalita xisaonitere hiyeta. <sup>12</sup> Hiyeta hoka awa atyo iniyalahare jiyahaotya xiháre wainiterehare hoka toahiyere iniyalahare kaxawaiyetyakitereharenae xema moka xiso. <sup>13</sup> Awaira atyo ininae hekoti xiháre hiyetare iniyalahare ana xahalakihena, iniyalahare xisoma maheta. Xakore hoka Enore koamaniya taitaira xamohena xawenane, kaxaisakehenerenai kaiyakihititere exaisakaha nonitata akereta. Maika Enore maniya taita xamoka xawenane, xoalini hare waiyexe xisoma maheta. <sup>14</sup> Maika maisa iniyalahare jiyahaotita xiso. Hiyaiya, maiha atyo Xaotyakiyaho xema xini xisaonita, xakore hoka Enore xawaiyero hoka atyo xisaonita.

*Enore Wakaneharenae*

<sup>15</sup> Xoanere? Iniyalahare ite wisomehena, maiha tyare atyo judeunae Xaotyakiraho xema xini wisaonita hoka? Xakore hoka Enore xawaiyero hoka tyare atyo wisaonita hoka? Maisa nikarexe xini. <sup>16</sup> Waiyekehala kita atyo xomana exeharenai: Hiyaiya, hatya haliti wakanehare atyo xisaohena hoka xityakekota iniraene, aliterexe ewakanehare xiso hoka. Hatyo hiyeta xoana xityakekohenaite iniyalahare hoka hatyo hiyeta xiwainihena, xoana xityakekohena xamanite Enore hoka haliti waiyexe aohena xiso. <sup>17</sup> Toahiya ene atyo iniyalahare xema taita xisaonita. Hoka kalikini atyo Enore xaotyakira kaxakaisaka xihíye hoka xihalaharene kakoa xisaonita exema. Hatyo hiyeta nihalahareta Enore kakoa. <sup>18</sup> Iniyalahare nonitata atyo xikaiyakeheta hoka Enore wakanehare xisoma hoka aokitere akereta xisaona maheta. <sup>19</sup> Maisa atyo metahare xini niraeta xikakoa ximaiyaterene hiyeta. Toahiya ene iniyalahare xema taita xisaonita, iniyalahare xisoma

maheta. Hoka maika kalikini Enore xema xisaohena hoka ewakaneharenai xisaona hoka waiyexe wenati xema xisaoheta maheta.

*Waiyexe Maniya Nawenatyakeheta*

(Atos 4.11-12; Romanos 4.6-8; 8.1-10; 2 Coríntios 5.20-21; Efésios 1.7)

<sup>20</sup> Iniyalahare xema xisaonitere xowaka maisa Enore aokitere akereta xisaonare ene. <sup>21</sup> Xoareharenae kaotyaka xomana toahiya iniyalahare xisoma hoka kalikini hatyoharenae kakoa xihaiharehititere? Hatyoharenae hiyeta atyo kawainisakita. <sup>22</sup> Xakore hoka kalikini atyo iniyalahare nonitata xikaiyakeheta hoka Enore wakaneharenai atyo xisaoheta. Kalikini atyo enomanerena terota xisaoheta hoka hatyo hiyeta wenati matyotenehare ite tyaona xomana. <sup>23</sup> Iniyalahare wisomitere hiyeta atyo wiwainita. Xakore hoka Enore maxaimanehareta ijiterehare atyo wenati matyotenehare ekaotyakahitita, Wiyekohase Jesus Cristo koamaniya wisaonitere hiyeta.

7

*Wenakakoati Hiye Aimenelekota*

<sup>1</sup> Nohinaeharenae, kalaite niraehena hoka waiyekehalaka xomana, xawaiyoretyare Xaotyakiyaho kakoa hoka. Hatya haliti kasetatere xowaka taita atyo halitinai xaotyakiyaho xema tyaonita. <sup>2</sup> Hatya ohiro kaiyanenero atyo exanene kasetatere xowaka haiyanene niraene xema tyaonita. Exanene atyo wainihena hoka maisa atyo haiyanene niraene xema xini tyaohitita. <sup>3</sup> Exaneniya kasetata hoka xane hatya ena kakoa tyaona hoka iniyalahare nomasehaloya atyo kaxaokaka. Exaneniya waini hoka xane hatya ena kakoa tyaohitiya hoka ehekore, maisaiya atyo iniyalahare nomasehalo kaxaokakita. <sup>4</sup> Hiyaiya, nikare atyo xisaonita, nohinaeharenae. Xiso tehitia atyo koxaka xiwaini Cristo kakoa haxawalita hoka hatyo hiyeta Xaotyakiyaho atyo maisa xoare tyomehetere xomana. Hoka kalikini atyo enomanerena xisaona. Kaseheta atyo waiye wawanane tyaona maheta Enore koamaniya. <sup>5</sup> Hoka toahiya wiyahekola ximita wisaonitere xowaka atyo Xaotyakiyaho atyo hotikisa womana iniyalahare wiyahekola tyaonitere wiháre hiye hoka hatyo hiyeta wiwaini. <sup>6</sup> Xakore hoka kalikini atyo maisa Xaotyakiyaho xema xini wisaonita. Hiyaiya, koxaka atyo wiwaini mawaiye nawenanititere wiso ana. Kalikini atyo waiye wisaoheta Enore aokitere akereta wisaona maheta. Enore nisekohare atyo wenati waitare iseheta womana. Hatyo hiyeta maisa atyo toahiyere Xaotyakiyaho exairatyakahare tyaonitere anereheta xini wiso.

*Xaotyakiyaho, Iniyalahare Xoaha*

<sup>7</sup> Xoare wehenaita? Xaotyakiyaho ala nikare hoka iniyalahare? Maiha nikare xini. Xaotyakiyaho atyo awaiyekehalakatya nomani iniyalahare akiti. Hiyaiya, Xaotyakiyaho atyo nexa: "Awa atyo hatya xiyehare himaiyase hoka haokene homana", nexa hoka ikoiya awa hatyo hoka maisaiya waiyekehalakita nomani hatyo akiti. <sup>8</sup> Hoka iniyalahare atyo Xaotyakiyaho hiyeta hoka tyotya xoalini hare nomaiyasetereharenai hotikisa nomani. Hiyaiya, iniyalahare atyo haware tyaonita Xaotyakiyaho nonitata hoka maisa xoare tyomita. <sup>9</sup> Hiyaiya, toahiya Xaotyakiyaho nomásemaniharetatere xowaka waiye ene notyaonita hoka nasemehenere Xaotyakiyaho xowakata iniyalahare aeroretyoa hoka aisa natyo. <sup>10</sup> Xaotyakiyaho atyo wenati waiyexe isa nomani mahetareta ene hoka axaisakisa natyo. <sup>11</sup> Hiyaiya, iniyalahare atyo Xaotyakiyaho hiyeta maoseratya natyo hoka hatyo Xaotyakiyaho hiyeta iniyalahare aisa natyo.

<sup>12</sup> Hiyaiya, Xaotyakiyaho atyo aliterexe waiye, exahe iraiti hoka waiyexe kaiserehare. <sup>13</sup> Nikarala hoka waiyexe hiyeta noxaisaki kaotyaka? Maiha atyo nikare xini! Iniyalahare atyo nikare axomokanikisa natyo. Hiyaiya, iniyalahare atyo waiyexe hiyeta noxaisaki ekaotyakatya nomani. Nikare tyaona iniyalaharaho kahotikisaka maheta. Hatyo hiyeta, Xaotyakiyaho hiyeta, iniyalahare exahehare henehare tyaota.

*Maisa Notyoma Naokowitrehare Notyomare*

<sup>14</sup> Xaotyakiyaho atyo Enore nalitare hoka natyo atyo haliti maiyaterehare. Hiyeta hoka iniyalahare ana nokahalakisaki. <sup>15</sup> Maisa atyo notyomitereharenae waiyekehalakere nomani. Hiyaiya, maisa atyo notyoma naokowitereharenae xini notyomita, xakore hoka nomaomani naokowiterehare taita atyo notyomita.

<sup>16</sup> Nomaomani naokowiterehare notyomitere hiyeta atyo Xaotyakiyaho notyakekota, exahe aliterexe waiyexe. <sup>17</sup> Hatyohare hiyeta waiyekehalaka nomani. Maiha atyo natyo xini hatyohare notyomita. Iniyalahare tyaonitere nohiye atyo nikare axomokanikijita natyo. <sup>18</sup> Hiyaiya, waiyexe atyo maisa tyaonare nohiye. Hatyo atyo nawenami. Waiyexe noxahekoli xakore notyoma naokowita hoka maisa terota hatyoharenae notyomare. <sup>19</sup> Hiyaiya, maisa atyo waiyexe notyoma naokowitereharenae notyomare xakore hoka nomaomani iniyalahare naokowitereharenae atyo notyomita. <sup>20</sup> Nomaomani naokowitereharenae atyo notyomehena hoka maisa atyo natyo xini hatyoharenae notyomita. Iniyalahare tyaonita nohiye hoka hatyo atyo nikare axomokanikijita natyo.

<sup>21</sup> Hatyo hiyeta exakerala nawenani tyaonita naoka: notyoma naokowihena xoalini hare waiyexe hoka iniyalahare taita notyomita. <sup>22</sup> Enore Xaotyakiraho atyo waiyeta nomani, hatyohare kakoa nawaiyoreta. <sup>23</sup> Xakore hoka hatya xaotyakiye hawareharexe atyo heko aiyateretyoita noxahiti, waiyexe notyoma naokowitereharenae maisa notyoma aokare hoka. Hatyo hiyeta atyo iniyalahare tyaonitere noháre hiye wakanehare notyaonita. <sup>24</sup> Natyo atyo haliti maihalaharenehare. Xalaita iyehetehena natyo exe nomawenekoaretyakaho nonitata? <sup>25</sup> Wiyekohase Jesus Cristo ite iyehetehena natyo, hatyo hiyeta nihalahareta Enore kakoa.

Hiyeta hoka exakerexe tyaonita nawenani: noxahekoli hiye hoka Enore xaotyakiraho notyaonita, xakore hoka iniyalahare xaotyakiye xema kaisere atyo notyaonita.

## 8

### *Isekohaliti Waiyexe Xema Nawenatyaka (Romanos 1.16-17; 3.21-26; Efésios 2.8-9)*

<sup>1</sup> Hiyeta hoka kalikiniya atyo maisa xoare xemere kamawenekoaretyakihitita Jesus Cristo koamaniya tyaoniterenae. <sup>2</sup> Enore Nisekohare aotyakisa wiso hoka exaotyakira atyo Cristo koamaniya moheta wiso. Exahe hoka iyeheta natyo wenati iniyalahare nonitata, exahe nomawenekoaretyaki xoaha nonitata. <sup>3</sup> Wiso halitinae atyo maisa wikinaterexe hoka hatyo hiyeta Moisés Xaotyakiraho maisa aliyakere kahinaetita wiso. Xakore hoka Enore atyo haisani axikatya iniyalahare halitinae tyomitereharenae emaisaheta maheta. Ityani atyo wiso halitinae akereta tya hoka iniyalahare wisomiterehare emaisaheta maheta.

<sup>4</sup> Nikare Enore tyoma Xaotyakiyaho iraehenere aokitere akereta kaiserehare wisaona maheta. Hiyaiya, Xaotyakiyaho iraetere atyo waiye. Hoka Enore Nisekohare aokitere akereta atyo wisaonita hoka maisa atyo haliti xahekola iniyalahare xema xini wisaonita.

<sup>5</sup> Haiyanae atyo haxahekola xema taita tyaonahitaha hoka hatyo aokitere akereta atyo tyaonahitaha. Hoka Enore Nisekohare xema tyaoniterenae atyo Isekohaliti aokitere akereta exahekola tyaonita. <sup>6</sup> Haliti xahekola xema taita kawenatyakitehare atyo axaisakisare. Hoka Isekohaliti aokitere akereta kawenatyakitehare atyo wenati waiyexe, exahe mehexaikohaliti xoaha maniya mokita haliti.

<sup>7</sup> Hiyeta hoka hatya haliti Enore nahalakoahare tyaonita, haliti xahekola xema taita tyaohena hoka. Maisa atyo Enore Xaotyakiraho xema tyaonare hoka, exahe maisaiya aliyakere tyaonita exema. <sup>8</sup> Xalanae xamaniya atyo haxahekola xema taita tyaonita hoka maisaiya atyo aliyakere Enore aihalahalinikijita.

<sup>9</sup> Hoka xiso atyo maisa halitinae xahekola akereta xini xisaonita, xakore hoka Enore Nisekohare aokitere akereta atyo xisaonita, aliterexe hareya atyo Enore Nisekohare tyaonita xikakoa hoka. Xalanae xamani atyo maisa Cristo Nisekohare kakoare xini hoka maisa atyo Cristo anerenai xini. <sup>10</sup> Hoka aliterexeya atyo Cristo tyaonita xikakoa hoka xihárenae xakoreya atyo waini iniyalahare xománe hiyeta hoka Enore Nisekohareya atyo

wenati waiyexe isa xomana. Hiyaiya, Enore atyo haliti waiyexe aoka xiso. <sup>11</sup> Enore atyo ekasekiheta Jesus. Hatyo Nisekohareya atyo tyaonita xikakoa hoka Cristo ekasekihete-henere akereta tehituyaite ekasekiheta xiháre wainitere, Inisekohare tyaonitere xihye hiyeta.

<sup>12</sup> Xasemehena nohinaeharenae, maisaiya aliyakere wiyahekola xema taita wisaonita. <sup>13</sup> Xiyahekola xema taitaiya xisaona hoka xikamane ana atyo xiyaneta. Xakore hoka Enore Nisekohareya atyo emaisatya iniyalahare xisomitere hoka wenati waiyexe anaite xiyanane xahikoa. <sup>14</sup> Hiyaiya, tyotya Enore Nisekohare kaxaikoneharenai atyo Enore ityaninae. <sup>15</sup> Isekohaliti Enore isehenere xomana atyo maisa wakahare akereta mokare xiso, exahe ximamairanahare atyo mokita. Hatyo Isekohaliti hiyeta atyo Enore ityaninae xisaona. Exahe Isekohaliti hiyeta tehituya hoka wihalaharene kakoa Enore hiye, “Abá, Abá”, wita.

<sup>16</sup> Enore Nisekohare atyo haxawalita tyaonita wisekoharenae kakoa hoka Enore ityaninai terota waokowi maheta. <sup>17</sup> Enore ityani tyare atyo wisaona hoka xoalini hare waiyexe ite womanere tyaona hakaxaikoneharenae ana mokitereharenae. Nikare tehituyaite xoalini hare waiyexe Enore Cristo ana mokitere womanere tehituya tyaona. Iniyalahare kaxomokakehenere Cristo akereta wikaxomokakehenere hiyeta atyoite xoalinihare waiyexe, tyaonitere enomanere tehituya womanere tyaona.

### *Waiyexe Wattyahitere*

<sup>18</sup> Nomani atyo iniyalahare wikaxomokakitereharenai ali waikohekoakakaoiaya maisa aliyakere kaxaimenekotyakita wenati waiyexe kahotikisakehenere womanakakonaokita. <sup>19</sup> Tyotya xoalini hare Enore nómnanenai haholawaka kakoa atyahahitaha Enore ityaninae kaokeneheta xahita. <sup>20</sup> Hiyaiya, tyotya Enore nómnanenai atyo maisa waiye tyaohitita. Maiha atyo haxaokalahitaha xini nikare tyaonaha, Enore xaokala ximita atyo nikare tyaonaha. Xakore hoka exehare atyo kaxatyahakita: <sup>21</sup> Haxowakaite tyotya Enore tyomehenerenaite kaiyakeheta iniyalahare kaxomokakahitare nonitata, hoka Enore haisaninai waiye mohenere xowakaite, waiye tehituya kaxomokakehenahitaha. <sup>22</sup> Hiyaiya, Enore tyomehenerena atyo kalikini kijiwaalitita, ohiro ityani kawehena hoka waalititere akereta.

<sup>23</sup> Maisa atyo Enore tyomehenerenai taita xini waalitita. Wiso tehituya xakore Enore Nisekohare kokoare hoka wiwaalitita. Wattyahitere Enore haisani aohenere wiso nase, exahe wiháre hoka waiyexe maniya mohetehenere nase. <sup>24</sup> Hiyaiya, wiyatayahane hiyeta atyo wikaikayeheta. Xakore hoka wiyaitaiya atyo wattyahitere hoka hatyohare atyo maisa xatyahati xini. Hiyaiya, xala hare ala atyahita xoalini hare waiyitereharenai xahita? <sup>25</sup> Xakore hoka xoare xamani atyo maisa wiyaiyare hoka wimamaxaharenahareneta kakoa atyoite wattyahahena exahita.

<sup>26</sup> Nikare tehituya Enore Nisekohare kahinaetita wiso wimaiyatereharenai hiyeta. Maisa wawayorexe wiraexala kakoa, xakore hoka Enore Nisekohare, wiwaalitita akereta mokita wiso hoka axita witahi, komita maisa eneya maisa aliyakere wiraene kakoa hatyoharenai wawayekehalaakaita. <sup>27</sup> Enore atyo halitinae xahekola waiyita, exahe Isekohaliti Waiyexe xahekola hoka waiyekahalaakita enomana. Hoka Isekohaliti Waiyexe atyo kahinaetita Enore kaxaikoneharenae hoka axita witahi Enore aokitere akereta. <sup>28</sup> Hiyaiya, waiyekahalaakita atyo womana: Exahe tyotya xoalini hare kaotyakiterenae womana hoka Enore hakita tyotya hatyoharenae koni, exawaiyetyaseharenai, exahe haomana aoheneraharenai waiye tyaonaha maheta. Haxaokala ximita.

<sup>29</sup> Toahiya xowakita atyo Enore koxaka haiyanae haomanere terota aokita hoka haware tehituya mokahitahene hoka Ityani Jesus akereta tyaonaha maheta. Jesus Cristo ximarene kahare halitinai tyaona maheta nikare Enore mokahene. <sup>30</sup> Nikare Enore haomanere aohenerenai kawisa. Maisa kawisahene taita xini, haliti waiyexe aokahene tehituya. Maisa haliti waiyexe taita xini aokahene, exahe iraka tehituya enomanaha waiyexe tyaonitere enáli maheta.

*Enore Xawaiyera Wiso Jesus Cristo Hiyeta  
(Romanos 16.25; 1 Coríntios 1.8; Filipenses 1.6; Judas 24-25)*

<sup>31</sup> Exeharenae hiyetaite xoare wehena? Enoreya atyo kahinaetita wiso hoka xalaiya jiyahaohena wiso? <sup>32</sup> Maisa atyo Haisani makamanene hekoti aokita hoka axikatene iniyalahare wománe hiyeta waini maheta. Hiyaiya, Haisani atyo axikatya, waini maheta iniyalahare wománe hiyeta hoka xoana maisaiyaka tyotya xoalini hare waiyexe maxaimanehareta ijita tehitia womana? <sup>33</sup> Xalaiya iraeharehena Enore kaxaikoneharenæ? Maisaiya xala. Enoreta atyo iniyalahare maomaneharenai aokahene. <sup>34</sup> Hoka xalaiya iniyalahare exomokaka aohenæ? Hiyaiya, Cristo atyo waini enomanaha, exahe kaxekasekisakeheta hoka Enore fihini maniya tyaonita. Hoka iraeta witahi Enore hiye. <sup>35</sup> Nikare hoka xalaite kikihena wiso Cristo xawaiyera nonitata? Xoana, kirakoane wisaoniterekare, howitiharexe wawenane, wirawaiyaka, winaka, wimaxiyehareharenæ, kaheneharexe, exahe xoana wikamane kore ite kikihena wiso?

<sup>36</sup> Exakere atyo Iraiti Waiyexe nanekoña nexa:  
Wawaiyetitere hiso hiyeta waha aka wikaxaisakita, motya etakehare kalanero kakkalyaka hoka kaxaisakiterare xaisakalati hana nali akereta wikaxomokakita.

<sup>37</sup> Nikare xakore atyo wikaxomokakita hoka hatyoharenai atyo wijiyyaotya, awaiyeheneræ wiso niyatere hiyeta. <sup>38</sup> Hiyaiya, nomani atyo maisaiya xoare hekoti kikihitita wiso Enore xawaiyera nonitata. Mahaiya wikamane, wikasene, anjonai, haiyanai xekohasetinai, xoana tihanarenai, exahe kalikiniye wawenane, wahetakomaniyere wawenane hekoti hoka kikihitita wiso enonita. <sup>39</sup> Mahaiya wihaokoña maniya tyaoniterekare, wikitayhe maniya tyaoniterekare harenai hekoti kikihitita wiso. Hakákoare exe enokoña, waikohekota tyaoniterekare konitareya, maisa hatya hekoti hatyonai kikihitita wiso Enore xawaiyera nonitata, Wiyekohase Jesus Cristo awaiyetitere wiso hiyeta.

## 9

*Enore, Ekaxaikone Hotyalinai Xoaha*

<sup>1</sup> Exe niraeterehare atyo aliterexe. Cristo anere atyo natyo hoka maisa namaoserat-yare, Isekohaliti Waiyexe ana atyo waiyekahalakita exe niraetereharenæ hoka tyakekota niraini. <sup>2</sup> Kalore namaikohareta, noxamaikohalini maisa tyotere, nohinaeharenæ nohotyaliharenai kaiserehare hiyeta. <sup>3</sup> Waiyeya tyaonaha maheta komitaene atyo natyo Enore iniyalahare moka naokita, exahe Cristo nonitata hoka haware notyaohetæ naokowita. <sup>4</sup> Enore kaxaikone hotyali terota atyo Israel hotyalinæ. Haomanerænæ atyo aokahene hoka wenati masakare waiyexe isa enomanaha aokowi. Iraiti Waiyexe xairatyoare, exahe Xaotyakiyo hoka isa enomanaha hoka waiyoreha wenati Enore koamaniya kakoa. Xoalini hare waiyexe Enore isa enomanaha aokowihenerenai atyo enomanereha terota. <sup>5</sup> Toahiyereharenæ jikolahareha atyo, exahe Cristo tehitia hoka toahiyereharenæ jikolahare. Haliti tyaohenere hiyeta, hatyo halitinae hotyalihare atyo tyaona. Hiyaiya, Enore atyo tyotya halitinae xekohasehare tyaona. Hoka maika kaihalaharetyaketa mene ekakoa. Nikare naoka.

<sup>6</sup> Maihatya Enore iraehenere atyo maisa xoare tyomita, nomita xini. Hiyaiya, maisa atyo tyotya Israel hotyalinæ Enore kaxaikoneharenai xini. <sup>7</sup> Exahe maisa atyo tyotya Abraão jikolaharenæ Enore ityaninæ xini. Hiyaiya, Enore atyo nexa Abraão hiye: “Isaque jikolaharenæ taita atyoite hijikolaharenæ kaxaokaka”, nexa.

<sup>8</sup> Hatyo hiyeta Abraão jikolaharenai terota atyo kaxaokaka Enore iraehenere hiyeta tyaohenerenai. Hoka maisa atyo tyaotehenerenai xini ijikolaharenai kaxaokakita.

<sup>9</sup> Exakere atyo Enore irae:  
“Notyohetaite hoka hatyo xowakaite Sara kaisanihena”, nexa.  
<sup>10</sup> Exe tehitia: hinamahare Rebeca ityaninai nexa atyo haterore, wahetakorehare Isaque. <sup>11</sup> Xakore hoka Enore atyo hähare nawenane waiyexe maniya moka hoka nexa Enore Rebeca hiye, hatyo xoimanae nawenane nahitita:  
“Inityohaliti atyoite xoimere wakanehare tyaona”, nexa.

<sup>12</sup> Exakere nexa Enore iniyalahare, waiyexe xoaha enómaneha nahitita. Nikare atyo Enore tyoma exahe haxaokala ximita. Maiha atyo xoalini hare enómaneha hiyeta xini.

<sup>13</sup> Hiyaiya, exakere tehitiya Iraiti Waiyexe nexa:

Jacó atyo nawaiyitya hoka Esaú atyo maisa nawaiyetita, nexa.

<sup>14</sup> Nikare ite hoka xoare wehenaita? Enore maisa waiyexe wehenaita? Maisa nikarexe xini. <sup>15</sup> Hiyaiya, exakere atyo nexa Moisés hiye:

Nairakoaneharetya naokowihenere ite nairakoaneharetya, exahe nakanakaharetya naokowihenere ite nakanakaharetya, nexa.

<sup>16</sup> Hatyo hiyeta maisa atyo wiyaokalita, exahe wománenai hiyeta xini, xakore hoka Enore xairakoaneharera wiso hiyeta taita atyo waiye wisaonita. <sup>17</sup> Hiyaiya, exakerexe atyo xairatyoare tyaconita Iraiti Waiyexe nanekoa: Enore nexa Faraó hiye:

“Niyatere nahotikisa, exahe waikohekao hakákoareko ayaoniterenai semaha notahi maheta kalorexe namoka hiso”, nexa.

<sup>18</sup> Hiyeta Enore atyo xala xamani airakoaneharetya aokowihena hoka airakoaneharetita, exahe xala xamani maxahekolata aokowita hoka maxahekolaita.

#### *Enore Xairakoaneharera, Iniyalahare Exomokala*

<sup>19</sup> Hoka xinekonitare ite nehena nohiye: “Nikarexe hoka aliakereya Enore hatya haliti iniyalahare nomasehare aohena? Xalaiya Enore aokiterehare mahokoanehena?”

<sup>20</sup> Hoka xala atyo hiso hoka Enore kakoa kinatyaxa hirae haokowita? Nikarala hoka kamohese nomaka tinihaliti haomasehare kakoa iraeta? “Xoana hoka exakere hisoma natyo?” nita. <sup>21</sup> Hiyaiya, hatya haliti atyo kamohese tinihaliti tyomehena hoka aliakere xamani mokene aokowihena hoka nikare mokitene. Kamohese heterore hiyetai ya hinama tinihaliti enomasehare tyoma, hatya maisa waiyexe xoahaiya.

<sup>22</sup> Nikare atyo Enore tyoma haxeharene hotikisa maheta, exahe haiyatere hotikisa maheta. Nikare maisa maxahareta iniyalahare nomaseharenai kakoa, maisa xoare hare tyomita ekakoaha. Hamawenkoaretyakaho terota xakore xanahitaha hoka.

<sup>23</sup> Hotikisa tehitiya aokowi Waiyexe Wenati maniya mohetehenere wiso. Hatyo hiyeta airakoaneharetya, exahe memere moka wiso isa maheta wenati waiyexe womana. Toahiyita atyo memere moka hatyoharenai hoka kalikini isene womana. <sup>24</sup> Hiyaiya, Enore atyo haomanerena aoka wiso. Maisa judeunae taita xini haomanerena aoka, majudeuneharenai tehitiya hoka haomanerena aoka.

<sup>25</sup> Nikarexe atyo Oséias nanekoa kaxairatyaka iniraene:

Xalanae ene xamani atyoite, exahe maisa nomaniye hotyalinae xini hoka nomaniye hotyalinae atyoite naokene. Xala hotyali xamani ene atyoite maisa nawaiyetyare hoka noxawaiyiriharenai atyoite naokahene.

<sup>26</sup> Hatyo nanekoita exakerexe tehitiya:

“Xiso atyo maisa nokaxaikoni hotyali xini”, nexa xakore hoka Enore makamanehare ityaninae nerekatite exaokakaha.

<sup>27</sup> Exakere Isaías irae Israel hotyali tahi:

Exahe xakore ite Israel hotyali hisoaka waikohese one kaloxere kilahi tyaconitere akereta hoka haiyanae taitaite waiyexe maniya tyaohera.

<sup>28</sup> Enore ite hairaene akereta tyoma hakákoare waikohekao. Maisaite wahita hekoti hoka nikare tyoma hairaene akereta.

<sup>29</sup> Hatyo Isaías tehitiyita atyo koxaka nikare irae:

“Ikoiya awa Xekohaseti kinaterexe wijikolaharenai maheta haiyaharenai halakijita hoka wenakalati Sodoma akeretai ya moka wiso, Gomorra akeretai ya wisaona”, nexa.

#### *Israel Hotyalinai, Iraiti Waiyexe*

<sup>30</sup> Nikare hoka xoare wehenaita? “Majudeuneharenai ana ene atyo maisa Enore koamaniya nawenatyaka waiyekhalakere, xakore hoka Enore atyo haliti waiyexe aokahene ityakekoneha hiyeta”, wehenaita. <sup>31</sup> Hoka Enore haomanere aohenerena Israel xakore

atyo xaotyakiyaho xema tyaona aokowiyahitaha, kasani hatyo hiyeta haliti waiyexe aokahene aokahitaha xakore hoka maisa atyo haliti waiyexe aokahitene.

<sup>32</sup> Xoana hoka nikare tyaonaha? Motya maisa ityakekoneha hiyeta xini haliti waiyexe aokahene aokahitaha. Motya atyo enawenaneha xaotyakiyaho hiyeta Enore haliti waiyexe aokahene aokahitaha hoka. Nikare tyaonaha hoka “hisehityoaha hatyo sehalí hisehityoakalati” hiye. <sup>33</sup> Hiyaiya, exakere atyo Iraiti Waiyexe nexa:

Namokaite Jerusalém nali sehalí hoka hatyo hiye ite hisehityoaha hoka exoaha. Xakore hoka xala xamani atyoite tyakekone hoka maisaiya maihalahareneta ekakoa.

## 10

<sup>1</sup> Xasemehena, nohinaeharenæ, kasani Israel hotyali waiyexe maniya kaiyakeheta naokita. Hatyo hiyeta Enore hiye niraexaita etahiha. <sup>2</sup> Enore koamaniya xakore atyo tyaona aokowiyahitaha hoka maisa atyo Enore koamaniya nawenatyakaho kakoa waiy-orahitaha. Hatyoharenæ waiyekehalakita nomani. <sup>3</sup> Maisa waiyekehalakere enomanaha Enore aokiterekere haliti haomana akiti kakoa hoka tyaonahitaha haxahekolaха ximita. Maisa waiyeta enomanaha Enore aokiterekere haliti haomana. <sup>4</sup> Hiyaiya, Cristo atyo xaotyakiyaho kamiyanetya, hoka tyotya tyakekohenerenai haliti waiyexe aoka maheta.

### *Waiyexe Maniya Nawenatyaka Atyo Tyotya Halitinae Anere*

<sup>5</sup> Moisés atyo exakerexe xairatya Enore aokiterekere haliti haomana tahi akiti, Xaotyakiyaho xema tyaonitere hiyeta:

Xala xamani atyoite Xaotyakiyaho aokiterekere akereta taita tyaona hoka tyaota mene atyoite.

<sup>6</sup> Xakore hoka nexa atyo Enore aokiterekere haliti haomana ityakekone hiyeta akiti: “Awa atyo hisota haxoawi: Xalaite enokoa xeta xanehenæ?” Exakerexe atyo exe akiti: “Xalaite xane enokoata Cristo nolohetehena?” nita atyo.

<sup>7</sup> Awa atyo exakerexe hekoti haxehena: “Xalaite exoahena toloko hatekoakore?” Exakerexe atyo exe akiti: “Xalaite xane kolahetehena Cristo kamatinæ tyaonitere nalita?” nita atyo.

<sup>8</sup> Exakerexe atyo nexa: “Enore niraene atyo hihaliya tyaonita, hikanasako, himahiyasako xoaha”. Exe Iraiti wiyakaihenere atyo katyakekotyaka maheta. <sup>9</sup> “Notyakekota Xekohaseti Jesus”, hexaiya hiraeta hikanase kakoa, exahe hityakeko kaiserehare, Enore ekasekihetehenerene xoaha akiti hoka waiyexe maniyaiya hikaiyakeheta. <sup>10</sup> Hiyaiya, wityakekota kaiserehare atyo hoka haliti waiyexe Enore aokita wiso. Wikanase kakoa atyo wiraeta wityakekone tahi hoka waiye maniya wikaxomokakihitita.

<sup>11</sup> Hiyaiya, exakerexe atyo Iraiti Waiyexe nexa:

Xala xamani atyoite tyakekone hoka maisaiya maihalahareneta ekakoa, nexa.

<sup>12</sup> Tyotya haliti hotyalinae xaokaka atyo nikare iraeta. Hiyaiya, judeunae, majude-uneharenæ xoaha atyo maisa hawareharexeha makere xini. Enore atyo tyotya haliti Xekohase, exahe waiye mokita hoka xalanae xamani hakahinaetyaka aokita ihiyeta hoka kahinaetyahitene.

<sup>13</sup> Hiyaiya, exakerexe atyo Iraiti Waiyexe xairatyoare tyaonita:

Xala xamani atyoite hakahinaetyaka aoka Enore hiye hoka waiyexe maniyaite kaxomokakeheta, nexa.

<sup>14</sup> Hoka aliyakereya axehenaha, maisa xakore tyakekorahene hoka? Hoka aliyakereya tyakekohenahene, maisa xakore iraite semareha hoka? Hoka aliyakereya semehenaha Iraiti xakore, maisa xalahare xakaiye ihiyeha hoka? <sup>15</sup> Hoka aliyakereya xakaihenaha, maxaxikatyakahare iraite xakaisaseharenai hoka? Hiyaiya, exakerexe atyo Iraiti Waiyexe nexa:

“Waiye kaiserehare atyo iraite xakaisaseharenai kaokehetehehena hoka waiyexe tahi xakaihakahenaha hoka”, nexa.

<sup>16</sup> Xakore hoka maisa atyo tyotyaha tyakekoreha Iraiti Waiyexe. Isaías exakerexe irae: “Xekohaseti, xala tyakeko Iraiti Waiyexe wiyakaihenere?” nexa.

<sup>17</sup> Nikare tyakekoti kaotyaka Iraiti semaka hiyeta, exahe Iraiti atyo kaotyaka Cristo tahi kaxakaisakitere hiyeta.

<sup>18</sup> Hoka natyo atyo naxita: Xoana maisa ala semahitaha Iraiti tahi? Koxaka atyo semaha Iraiti. Exakere Iraiti Waiyexe nexa:

“Tyotya waikohekoa, tyotya wenakalatinaekoa tyaoniterenae semaha iniraeneha, exahe seko akiya tyaoniterenae hoka semahene”, nexa.

<sup>19</sup> Hoka naxehitiyaite: Xoana Israel hotyalinai anala maisa exeharenae waiyekehalakita? Hiyaiya, Moisés hotohare atyo nexa:

“Naokoawahalinikisaite xiso halitinai hahotalita mawenaneharenai hiyeta, exahe naxehalinikisaite xiso halitinai mawaiyoreharenai hiyeta”, nexa.

<sup>20</sup> Isaías maisa mairita hekoti hoka nexa:  
Haiyaharenae xakore atyo maisa Enore tawareha hoka ekoamaniya tyaonaha, exahe maisa xakore axareha etahi akiti hoka kaotyaka enomanaha, nexa.

<sup>21</sup> Hoka exakere atyo Isaías nexa Israel hotyali tahi:  
Fera nokahe naimatyá exe halitinae masemaxemalaharenai, matyakekoneharenae ana hoka maiha terota, nexa.

## 11

### *Enore Xairakoaneharera Israel Yerenai*

<sup>1</sup> Hatyo hiyeta kalikini naxehitiya: Xoana Enore ala hakaxaikonehare hotyalinai maisa aokita haomana? Maisa nikarexe xini! Hiyaiya, natyo tehitiya atyo Israel hotyalihare, Abraão jikolahare, exahe Benjamim hotyalihare konitare. <sup>2</sup> Enore atyo maisa maxaokalita haomanere hotyalihareni, hetati xowakita aohenerenai haomana. Iraiti Waiyexe iraehenere akiti atyoala waiyekehalakita xomana Enore haotita, Elías Israel hotyali iraeharehenere tahi akiti. Exakere nexa:

<sup>3</sup> Xekohaseti, hiraene xakaisaseharenae atyo aisaha, exahe xoalini hare kafetatyakitere homana aose hoka mawenekoaretyaha. Hoka nowawitehena nokasetata hoka kalini aisaha natyo aokowitzaha.

<sup>4</sup> Xoare nexa Enore ekoaxatene? Exakere nexa:  
Waiye atyo namoka 7.000-hare halitinai nomaniye maheta, enore metalahare Baal koamaniya mawenaneharenai.

<sup>5</sup> Hatyo akereta atyo kalikini tyaonita: Enore nawaiyexehare hiyeta haiyanai tyaonita exema haomanere aohenerenai. <sup>6</sup> Hawaiyexehare hiyeta atyo Enore aokahene haomana, maisa atyo enómaneha hiyeta xini. Haliti tyomiterehare hiyetaiya aokahitene haomana hoka enawaiyexehareya atyo maisa xoarehare tyomare.

<sup>7</sup> Xoare wehenaita? Israel hotyali tawiterehare maisa kaokahitaha. Hiyaiya, Enore haomanere aohenerenai taita kaokahene hoka haiyaharenae atyo matanakoakohare akereta tyaonaha, Enore niraene semaha hoka.

<sup>8</sup> Hiyaiya, Iraiti Waiyexe atyo nexa:  
Enore atyo kinatere moka emahiyaseha, exahe exahekola ha xoaha, hoka kalikini kijiuhena maiha waiyakatyareha haxosenaiha kakoa, maiha semakatyareha hatanakoakonaiha kakoa, nitere akereta.

<sup>9</sup> Hoka Davi atyo nexa:  
Maikaite hisehaliti heko kaxotokakaha hoka kamaoseratyakaha. Nikare ite tyaonaha hoka iniyalahare ite kaxomokakaha.

<sup>10</sup> Maikaite exosenaeha jihotyoare tyaona hoka maisa waiyakahenahititaha. Exahe maika aonikoakoataha mene hawenaneha howithiharexe hiyeta, nexa.

<sup>11</sup> Kalikini naxehitiya: judeunae hisehityoahenere xowakala hisehityoaha hoka hamahakaisereneha ana hikoaha? Maisa nikarexe xini. Iniyalahare tyomaha hoka hatyo hiyeta wenati waiyexe tyaona majudeuneharenae ana hoka judeunae okoawahareha ihiyeha maheta. <sup>12</sup> Judeunae iniyalahare tyomehenahere hiyeta atyo kalore wenati waiyexe kaotyaka tyotya haliti hotyalinae ana. Exahe ematyakekoneneha hiyeta atyo majudeuneharenae tyakekone kaotyaka enomanaha. Hoka judeunae haiyaharenai

tyakekohetehenerenai Enore anaite xane hikoaheta hoka hatyo xowakaite masakare waiye kaiserehare wenati tyahetehena.

### *Waiyexe Maniya Nawenatyakeheta Majudeuneharenai Hiyeta*

<sup>13</sup> Kalikini atyo niraeta xiso majudeuneharenae kakoa. Natyo tyare atyo majudeuneharenae ana terotere iraiti xakaisasehare notyaona hoka hatyo hiyeta nihalahareta nohateni kakoa. <sup>14</sup> Xoana xamaniya hoka exakere notyaona hoka nohinaeharenaiya okoawahare hoka hatyoharenai hiyetaiya haiyanee waiyexe maniya namoheta. <sup>15</sup> Hiyaiya, judeunae maxawaiyityakehenere hiyeta atyo tyotya haliti hotyalinae Enore hinaehare tyona. Hoka xoanaite tyoahenaha, kaxawaiyetyakehenahere xowaka? Hatyo xowaka atyoite kamatinne kasehetitrehare akereta tyahetehena enawenaneha.

<sup>16</sup> Hetatiye tohase nakairati hiyetaiya kaxekaka Enore ana hoka mainikere tehitia atyo enomanere. Nikare tehitiyaiya atya tyahare Enore ana kaxekaka hoka ekanohinae tehitiyaiya enomanere terota. <sup>17</sup> Haiya kanohinai kataikaka oliveira exafityakahare kate hiyeta hoka hatya atya maxafityakahare kanohitare kaxomokaka ihiye. Xiso majudeuneharenae atyo hatyo atya maxafityakahare kanohi akereta hoka kalikini atyo judeunae niyatere, exahe enawenaneha xoaha xomanere tyaheta. <sup>18</sup> Hatyo hiyeta awaira atyo ximaxawaiyerehena atya exafityakahare kanohinae kataikakehenerenae kakoa. Xoanereya hoka xaokowiharetyoahena? Xisonae atyo atyakate kanohinai akereta taita. Maisa atyo xiso xini xaiyatelikijita atya tyahare. Atya tyahare atyo aiyatelikijita xiso.

<sup>19</sup> Xakore hoka xehenaite: “Atya kanohinae atyo kaxirikotyaka hoka hatyonae wenekoare wisaona maheta”, xehenaite. <sup>20</sup> Hiyaiya, ematyakekoneneha hiyeta atyo kaxirikotyakaha. Hoka xiso atyo atyakate hiye xikahiyalatyaka xityakekone hiyeta. Hatyoharenai waiyekehalakita xomana hoka awa atyo xaokowiharetyo, xakore hoka maika ximairehena kaisere. <sup>21</sup> Hiyaiya, Enore atyo maisa iniyalahare maxomokalita judeunai, atya kanohi kaiserehareha xakore atyo hoka. Hoka xoana xiyahekola hiye, motyaiyala maisa iniyalahare tehitia mokita xiso xaokita?

<sup>22</sup> Enore atyo waiyexehare, exahe xalijinihare tehitia. Kaxirikotyakehenerenae xahita atyo xalijinihareta hoka waiyexehareta atyo xihie, hekoiya enawaiyexehare xema xisaona hoka waiyeya mota mene xiso. Mahaiya hoka irikoty tehitiyaiya xiso.

<sup>23</sup> Hiyaiya, judeunaiya halakisaha hamatyakekoneha hoka haikoahenahitahaiya hetati tyaonahitere akiti xeta. Hiyaiya, Enore atyo kinatere hoka ehaikoahenahiteniya.

<sup>24</sup> Xiso majudeuneharenae atyo atya maxafityakahare kanohi kaxirikotyaka hoka atyakate exafityakahare hiye kahiyalatyakitere akereta. Hoka judeunae atyo atyakate exafityakahare kanohinai kaiserehare akereta. Hatyo hiyeta Enore anaiya atyo maisa howithihare hiyalatyakehitita atya kanohinai ekate hiyeta kaxirikotyakehenereharenai.

### *Enore Awaitita Tyotya Halitinae*

<sup>25</sup> Nohinaeharenae, kasani exe Iraiti Waiyexe metaharettere waiyekehalaka xomana naokita, maisa xaokowiharetyo maheta, xawaiyore xaokowita maheta: Israel hotyalinai matyakekonene atyoite maisa tyaota minita. Majudeunehare hotyalinae konitarenai tyotya tyakekohenahere Enore kijiya taitate. <sup>26</sup> Hatyaosetaite tyotya Israel hotyalinai waiyexe maniya kaxomokakeheta Iraiti Waiyexe iraehenere akereta:

Haliti niyaseharehetaite Sião nalita tyoheta hoka tyotya Jacó hotyaliharenae iniyalahare tyomitere emaisaheta.

<sup>27</sup> Nikare ite namokahene iniyalahare enómaneha nemaisahetehenere xowaka.

<sup>28</sup> Judeunae atyo maisa Iraiti Waiyexe aokahita haomanaha hoka hatyo hiyeta Enore nahalakoahare tyaonaha, xiso majudeuneharenae hiyeta. Xakore hoka Enore atyo aokahene haomanaha enahetakomaniyereharenae hiyeta, hoka ihinaeharenae atyo tyaonaha.

<sup>29</sup> Hiyaiya, Enore atyo xala xamani aohena haomanaha, exahe waiye moka aokowihena hoka maisa atyo hahekore haxahekola mokare.

<sup>30</sup> Hoka xiso majudeuneharenae atyo toahiya maisa Enore niraene xityakekota. Xakore hoka kalikini atyo Enore airakoaneharetya xiso, judeunai matyakekonene hiyeta. <sup>31</sup> Nikare hatyo airakoaneharehenere xiso hiyeta, kalikini judeunai matyakekonahitaha Enore, hoka haxowakehenaite Enore airakoaneharetyahene maheta xihiyeta. <sup>32</sup> Hiayiha, Enore atyo tyotya matyakekoneharenai mokahene, hotikisa maheta haxairakoaneharera tyotya haliti hotyalinai ana.

#### *Enore Xaexakeretyaka*

<sup>33</sup> Kaxiyani, Enore atyo waiye kaiserehare! Tyotya waiyekehalakita enomana, exahe waiyore. Xalaiya awaiyekehalakaty ahahekolanai? Xala anaiya waiyekehalaka enawenane? <sup>34</sup> Exakere atyo Iraiti Waiyexe nanekoa nexa:

Xala anaite waiyekehalakehena Xekohaseti xahekola? Xalaiya aotyakihenene?

<sup>35</sup> Xala koxaka xoalini hare Enore ana isa, Enore bakatene maheta?

<sup>36</sup> Hiayiha, tyotya xoalini hare atyo enómanenai taita. Ihiyeta atyo tyotya xoalini hare kaotyaka, exahe hoka enomanerena makere atyo. Hatyo hiyeta maika Enore kakoa kaihalaharetyaka matyotenehare! Nikare waoka. Eko xoaha.

## 12

#### *Wenati Waitare*

<sup>1</sup> Hatyo hiyeta, nohinaeharenai, maika Enore airakoaneharetitere xiso hiyeta ni-raehena xikakoa: maika xiháre xisehena Enore ana, kinasetatere isoawitere akereta, ehatene xisoma maheta, exahe aokitere akereta xisaohena. Nikareya atyo xisaona hoka hatyoiya atyo aliterexe xisaonita ekoamaniya. <sup>2</sup> Hoka awa atyo matyakekoneharenai tyaconitere akereta xisaona, xakore hoka maika kotare Enore waiye maniya moheta xiyahekolanai. Nikare ite hoka waiyekehalaka xomana Enore aokitereharenai, xoare xamani waiyexe, ehekorexe, exahe awaiyetitereharenai.

<sup>3</sup> Enore hawaiyexehare hiyeta iyateliti isehenere nomani hiyeta niraehena xikakoa: Awa atyo hatya xinekonitare hatahi taita ahekohena, exahe hoka haiyanæ xahexe nawaiye aokowihena. Maika waiye ahekotya, Enore hatya ana xakini tyakekoti isehenere hiyeta. <sup>4</sup> Hiayiha, wihré kaxiyehare hoka hatya xakini atyo kahatenexe. <sup>5</sup> Nikare tehitia wiso tyakekohenerena. Wikahare xakore hoka Cristo hiyeta haterore wisaona. Hoka wityotya hahotyalita wisaonita haiyanæ hawareharexe haríti kaomakere kakoa.

#### *Waiyoliniti, Iyateliti Waiyexe Enore Isa Halitini Ana*

(1 Coríntios 12.4-11; Efésios 4.9-12)

<sup>6</sup> Hatyo hiyeta nika wisomehena wihatene hawareharexe xakini, Enore isehenerehare womana hawaiyexehare hiyeta. Wihatene atyoite wiyakaini Enore niraene tahi hoka hatyoharenai atyoite wisomehena wityakekone hakakoaneta. <sup>7</sup> Wahaka mahetaiya hoka wahaka. Waotyakisa mahetaiya hoka waotyakisa. <sup>8</sup> Exahe waihalahalinikisa mahetaiya haiyanai hoka waihalahalinikisahene. Hatyaiya haxiyehare hiyeta isa aokowita haiyanæ ana hoka maika haihalaharene kakoa isa. Xala xamaniya xekohaseti hoka hahatene kakoa irihare. Exahe xala tehitia xamaniya haiyanæ kahinaetya hoka haihalaharene kakoa kahinaetyahene.

#### *Wenati Waiyexe*

(Atos 10.35; Gálatas 5.22-24; Efésios 4.1-3; 4.25-5.2)

<sup>9</sup> Maika xawaiyetya kaiserehare haiyanai. Xahalakihena iniyalahare hoka waiyexe xema taita xisaohena. <sup>10</sup> Maika xihinaeharenæ xihalaharene kakoa xawaiyetya, Cristo xema tyaconahitare hiyeta. Exahe maika waiyexe taita xisomehena haiyanai kakoa, xaiminisakakoa maheta. <sup>11</sup> Maika kalore xahaka, awa atyo ximaxahare. Xihalaharene kokoaira xahaka Xekohaseti ana. <sup>12</sup> Heko xatyahahena Xekohaseti xahita xihalaharene kakoa, exahe xakore haiya xowaka xawenane howitihare tyaconita hoka heko ximaxaharenehare xisaona hoka awa atyo xahalakihena xiraexala. <sup>13</sup> Haiyanæ Enore koamaniya tyaconiterena xoalini hare aokitereharenæ kakoa xirakakaoahena xoare

xamani xikaxiyehareta hoka. Exahe haiyanae kaokehena hoka waiye xamokahene xihanako.

<sup>14</sup> Enore hiye xiraehena kirawanetereharenai xiso waiye moka maheta. Xaxehenene hoka waiye mokene hoka awa atyo iniyalahare exomokakaha xaoka. <sup>15</sup> Maika ihala-hareterenai kakoa xihalahare, exahe tiyitereharenai kakoa hoka xitiya. <sup>16</sup> Haiyanae kakoa ximehexaiko xisaohena hahotyalita. Awa atyo xaokowiharetyoa, awa atyo ximaxawaiyera wakaharenai, awa atyo kalore xawaiyore xaokowi.

<sup>17</sup> Awa atyo haiyanae iniyalahare mohena xiso hoka hatyo nahalakoa iniyalahare xamokene. Maika xisomehena tyotya halitinai waiyexe aokitereharenai. <sup>18</sup> Exahe xoana xamani xikaxomokakehena hoka maika xaiyateretyoa hoka ximehexaikohare xisaona haiyanai kakoa. <sup>19</sup> Nohinaeharenai, maika hatya iniyalahare moka aokowihena xiso hoka awa atyo xikatolikoa xaokowi. Maika Enore ana xahalakisene hoka katolikoaretya xiso. Exakere atyo Iraiti Waiyexe nanekoa nexa:

“Natyo atyoite nakatolikoarehena xiso, exahe nabakahenahene”, nexa Xekohaseti.

<sup>20</sup> Iraiti Waiyexe nanekoa iraehenere akereta xisaona:

Maika halalakoahare nakita hoka nakairati hisa enomana hoka kanakaira, oinita hoka one hisa enomana hoka tera. Nikareya hisaona hoka halalakoahare hehaihalikisa, nexa.

<sup>21</sup> Awa atyo iniyalahare xahalaisa hoka jiyahaotya xiso. Xaiyateretyoa hoka waiyexe kakoa iniyalahare xijiyahaotya.

## 13

### *Kalorexenai Xaiminisaka Tahi*

<sup>1</sup> Maika tyotya halitinai kalorexenai niraene tyakeko. Hiyaiya, maisa atyo hatya kalorexe tyaotere Enore maxaokalahareneta. Kalorexe tyaoniterenai atyo Enore xomokalanai. <sup>2</sup> Nikareya xala xamani kalorexenai mahokoanetita hoka Enore axikan-henerehare atyo mahokoanetita. Nikareya tyaoniterenai atyo hatyoahitaha iniyalahare maniya axomokanikisoahitaha. <sup>3</sup> Hiyaiya, iniyalahare tyomiteraharenai taitaiya atyo mairihena xekohasetinae. Hoka waiye tyaoniterenai atyo maisa xoare maheta mairahitaha. Maika atyo maisa himaira haokowiye xekohasetinae hoka waiyexe taita hisoma. Nikareya hisaona hoka ihalaharehaiya hikakoa. <sup>4</sup> Enore ana atyo hakahitaha, kasani waiye maniya hisaona aakahitaha hoka. Iniyalahareya atyo hisaonita hoka himaira. Kalorexenai atyo kinatere hoka iniyalahareya mokaha hiso. Enore hatene atyo tyomahitaha hoka hatyo hiyetiya iniyalahare mohenaha xala xamani iniyalahare tyomita hoka. <sup>5</sup> Hiyeta hoka maika xekohasetinae niraene hityakekohena. Maisa iniyalahare mokahitere Enore aokitere akereta hiyeta taita xini. Xakore hoka xahekore hiyeta tehitia.

<sup>6</sup> Hiyeta hoka kalorexenai aokitereharenai xabakatya. Hiyaiya, hahateneha atyo tyomehenaha hoka Enore hatene atyo tyomahitaha. <sup>7</sup> Hatyo hiyeta xabakahenaira xikakotanetereharahene. Xabakahena xekohasetinae xabakatya aokitereharenai, exahe xixiyeharenai hiyeta aokitereharenai xaimane hoka xabakahena. Maika xaiminisaka tyotya kalorexenai, exahe xityakekoahene.

### *Xawaiyetyakakoati Tahi*

<sup>8</sup> Awa atyo haiyanai ximabakalahare xisaona. Awa atyo haiyanae ximaxawaiyerahare xisaona. Hiyaiya, xala xamaniya atyo haiyanae awaiyetita hoka Xaotyakiyaho xema atyo tyaonita. <sup>9</sup> Exakere atyo Xaotyakiyaho nexa:

Awa atyo haiyanae nohiroxa hiwatyal, awa atyo haisa haliti, awa atyo hikaiwa, awa atyo hatya xiye-hare himaiyase, nexa.

Tyotya exenai, exahe haiyanai xoaha atyo kaxakiranetyaka hoka haterore Xaotyakiyaho tyaonaha hoka nexa:

Hawaiyehena haiyanae hawaiyetyoawitere akereta, nexa.

<sup>10</sup> Xala xamaniya atyo xawaiyetyati kakoare hoka maisaiya atyo iniyalahare mokita hahinaehare. Hatyo hiyeta wawaiyehena atyo hoka Xaotyakiyaho xema atyo wisaonita.

<sup>11</sup> Maika nikare xisaohena, hiyaiya, waiyekehalkita atyo xomana kalikini wisaonitere-harenai. Xiyaiya, kaosetyaoe ferakene atyo xane hikoa. Hiyaiya, waiyexe maniya wiymokakeheta atyo maisa sekohetere kalikini, maisa atyo etake wityakekohenere xowaka akereta xini. <sup>12</sup> Hiyaiya, makiya atyo tyotehena hoka ferakoahena atyo wihiye. Hatyo hiyeta nikahena hoka wahalakisa makaliroti koni anerenai hoka wiayiatelil-isakala wiya hoka wikinatere wisaona xaokanatyakalati xema. <sup>13</sup> Nikahena hoka waiyexe maniya taita wisaona haiyanae ferakoa tyaonitere akereta. Hoka wahalakihena kaisere wimaxaloharene, weratetoane, ohiro hiye wawenane, xoalini hare kehaisakere, wiyalijinhare kakoane, wokoawahare kakoane harenae. <sup>14</sup> Maika Wiyekohase Jesus Cristo niyatere kako xisaona, awa atyo iniyalahare kaxawaiyetyakitere xema xisaona.

## 14

### *Awa Atyo Iniyalahare Hihinaehare Hamoka Haokowi*

<sup>1</sup> Maikaira kotare xinekoni xamoka xala xamani maisa kalore tyakekore hoka. Xakore hoka awa atyo exahekolanai hiyeta kinatyaxa xirae ekakoa. <sup>2</sup> Hiyaiya, haiyanaiya atyo hatyakekoneha hiyeta kanakairaha tyotya xoalini harenai. Hoka haiyanaiya atyo maisa kalore tyakekoreha hoka atyali, exahe hananehaliti taitaiya atyo kanakairaha. <sup>3</sup> Hoka maika hatyo tyotya xoalini harenai kanakairiterenai awa hahinaeharenai manakairiterenae maxaiminira. Exahe awa atyo hatya hananehaliti taita kanakairitete iraesekoatya hatyo tyotya xoalini harenai kanakairiterenai tahi. Hiyaiya, Enore atyo haomanere aokene. <sup>4</sup> Xala atyo hiso hoka hiraeharetita hatya wakanehare? Exahiya, xoana heko xamani kinatere tyaona, exahe xoana maisa xamani kinatere tyaonita hoka exekohase atyoite ahekohena etahi. Hekoite kinatere tyaona. Xekohaseti atyoite aiyatelikisene.

<sup>5</sup> Haiyanae xahekola hiye atyo hoka haferakene atyo haiyanai ferakenenai xahexe nawaiye aokahitaha. Hoka haiyanai xahekola hiye atyo hoka ferakinai nihatyaka atyo hakakoa ferakeneta. Hoka maika nikarehena hoka hatya xakini haxahenkola xema tyaona. <sup>6</sup> Xala ana xamani atyo haferakene masakare waiyeta hoka hatyo atyo Xekohaseti aiminijita, exahe ihalahareta atyo ekakoa. Xala xamani atyo kanakairita tyotya xoalini harenai hoka Xekohaseti atyo aiminijita, Enore kakoa atyo ihalahareta nakairati hiyeta. Nikare xala xamani maisa eteti harenai nisare hoka Xekohaseti atyo aiminijita, exahe Enore kakoa atyo ihalahareta.

<sup>7</sup> Maisa atyo womanita xini wisaonita, exahe maisa atyo womanita xini wiwainita. Xekohaseti anaiya atyo wisaonita hoka enomanere atyo wisaonita, <sup>8</sup> exahe wiwainihena hoka Xekohaseti anere atyo wiwainita. Exaheya xoana wika seta xamani, wiwainihena xamani hoka Xekohaseti anere atyo wisaonita. <sup>9</sup> Hatyoharenae niyahare atyo Cristo waini, exahe kaseheta hoka kamatinae, kaseterenae xoaha Xekohase tyaona maheta. <sup>10</sup> Hatyo hiyeta xoana hoka hihinaehare tahi hiraesekoita? Exahe hatya, xoana hoka himaxaiminirita hihinaehare? Hiyaiya, wityotya atyoite Enore nahalakoa wiyan hoka hatyo atyoite wisomitere akereta mohena wiso. <sup>11</sup> Hiyaiya, exakere atyo Iraiti Waiyexe nexa:

“Aliterexe niraeta”, nexa Xekohaseti. “Tyotyaite halitinae hakaoli kakoa meholokoahena nahalakoi hoka nehenahaite: ‘Aliterexe nika hiso Enore’, nexahaite”, nexa.

<sup>12</sup> Hatyo hiyeta wityotyaite hatya xakini wiyakaihena wawenane tahi Enore hiye.

### *Awa Atyo Iniyalahare Maniya Hihinaehare Hamoka*

<sup>13</sup> Hatyo hiyeta nikareta kaisere wiraeharetya haiyanai. Hoka awa atyo xoalini hare xisoma hoka iniyalahare maniya xihinaeharenai xaxomokanikisa. <sup>14</sup> Xekohaseti koamaniya notyaonitere hiyeta, nomani atyo maisa xoarehare manakairatyakahare aka. Hoka xala ana xamaniya atyo xoalini hare manakairatyakahare tyaonita hoka manakairatyakahare terota atyo tyaonita enomana. <sup>15</sup> Hexamaikohalinikijitaiya hihinaehare, hikanakairiterehare hiyeta hoka maisa atyo hihinaehare hawaiyetyare. Awa atyo

hikanakairiterehare hiyeta hihinaehare iniyalahare maniya haxomokanikisa. Hiyaiya, Cristo atyo waini enomana. <sup>16</sup> Awa atyo xoalini hare xisoma hoka haiyanai iniyalahare iraeha, xoalini hare waiyexe xaokitere tahi. Xiriharira hatyohare kakoa. <sup>17</sup> Hiyaiya, Enore koamaniya nawenatyaka atyo maisa nakairati, erati xoaha xini. Xakore hoka waiyexe wenati, mehexaikohaliti, ihalahaliti atyo. Isekohaliti Waiyexe atyo hatyohare-nae ijita. <sup>18</sup> Hoka xala xamani atyo nikare tyaonita Cristo ana hoka aihalahalinkijita atyo Enore, exahe halitinai atyo tyakekotene.

<sup>19</sup> Hatyo hiyeta nika kaisere wisaohena xoalinhare amehexaikohalikijitere wiso, exahe kahinaetya wiso hoka haiyanai tyakekohatiyenai waiyatelikijiterehare ityakekoneha kakoa xema. <sup>20</sup> Hoka awa atyo nakairati hiyeta Enore hatene hemaisatya. Tyotya nakairatinai atyo kakanakairatyakere taita, xakore hoka maisa atyo ehekoreta nakairatyaka xini etakehare hatyohare hiyeta hatya iniyalahare maniya axomokaniki-jiterehare. <sup>21</sup> Waiye atyo eteti manikakene, exahe vinhoxa maerakene, exahe xoalini hare maomakene, maisa hihinaehare iniyalahare maniya haxomokanikijita maheta. <sup>22</sup> Hiso atyo hawaiyoreta hityakekone kakoa, exahe Enore hoka waiyoreta hityakekone kakoa. Waiye kaiserehare atyo xala xamani hatyakekone kakoa tyomita xoalini hare hoka. <sup>23</sup> Hoka hatya anaiya atyo maisa waiyekhalakere hoka mahaiya atyo nijita eteti. Maisaiya hatyakekone kakoa xoalini hare kanakairita hoka maisaiya Enore ana waiyeta. Xoare xamani atyo maisa hityakekone kakoa xini hisomita hoka hatyo atyo iniyalahare.

## 15

### *Haiyanai Waiye Xomokaka Tahi*

<sup>1</sup> Wiso wikinatere wityakekone kakoa wisaoniterenai atyoite wakahinaehena inira tyakekoterenai, hakolalaha kolatyaha maheta. Maisaiya atyo witahi taita wahekoita.

<sup>2</sup> Nika hoka waihalahalinkisa wihinaehare waiye tyaona maheta, exahe ityakekoneha kekoare maheta. <sup>3</sup> Hiyaiya, Cristo atyo maisa hatahi taita xini ahekotya. Iraiti Waiyexe atyo exakere nexa:

Xaljiniharexenai kirawanehenere hiso atyo exoa noheno, nexa.

<sup>4</sup> Tyotya kaxairatyakenere Iraiti Waiyexe nanekoa atyo aotyakisa wiso maheta hoka wimamaxaharenehare watyaha maheta Xekohaseti xahita. Exahe wimamairanehare mokitere Iraiti xairatyore tyaonitere kakoa maheta. <sup>5</sup> Kasani Enore, mehexaikohaliti, iyateliti xekasehare kahinaetya xiso hoka waiye xamokakakoa naokita, Jesus Cristo haiyanae waiye mohenere akereta. <sup>6</sup> Nikare ite hoka xityotya haxawalita xaexakeritya Wiyekohase Jesus Cristo Nexe Enore.

### *Waiyexe Iraiti Majudeuneharenai Ana*

<sup>7</sup> Hatyo hiyeta haiyanae xaohena xomana, Enore kakoa ihalahareha maheta, Cristo aohenere xiso akereta. <sup>8</sup> Cristo atyo judeunae wakanehare tyaona, Enore katyakekotyaka maheta, exahe hoka Enore toahiya iraehenereharenae enahetakomaniyereharenaha hiye kaotyaka maheta. <sup>9</sup> Exahe majudeuneharenae hoka Enore aexakerityaha maheta enawaiyexehare hiyeta. Exakere atyo Iraiti Waiyexe nexa:

Hiyetaite hoka naexakeritya hiso majudeuneharenae koni, exahe noxaexakiliri kakaite noxera homana, nexa.

<sup>10</sup> Exakere nehitia Iraiti Waiyexe:

Xiso majudeuneharenae, maika xihalaharehena Enore haomanere aohenerenae kakoa, Israel hotyalinai kakoa.

<sup>11</sup> Exakere tehitia nexa:

Xiso majudeuneharenae, xityotya xaexakerehena Xekohaseti. Xityotya xiso haliti hotyalinae xaexakerehenene.

<sup>12</sup> Isaías tehitia nexa:

Jessé jikolahare ite tyoa. Kaotyakaite hoka majudeuneharenae Xekohase tyaona hoka exahita atyoite atyahaharetyoahenaha.

<sup>13</sup> Maika Enore, axatyahanikijiterekare wiso, kalore aihalahalinikisa, amehixaikohalikisa xiso, xityakekoterene hiyeta hoka xiyatyahane heko kekoare Isekohaliti Waiyexe niyatere hiyeta.

### *Paulo Xawaiyekehala*

<sup>14</sup> Nohinaeharenai, noxahekoli hiye hoka kalikini ala xawaiyexehare, exahe xawaiyore xoalini hare kakoa, exahe xawaiyore xaotyakisakakoita naoka. <sup>15</sup> Hoka kalikini exe babera naxairatya nomamairanini kakoa, haiya akili Iraitinae xotyaxematy maheta Enore iyateliti isehenere nomani hiyeta.

<sup>16</sup> Iyateliti isa nomani Jesus Cristo wakanehare notyaona hoka majudeuneharenae nakahinaetya maheta. Sacerdote akereta atyo notyaonita Waiyexe Iraiti Enore niraene noxakaitere hiyeta. Nikare notyaonita, kasani majudeuneharenae, Enore aokahene haomana efetatyakaharenai akereta naokita, Isekohaliti Waiyexe hiyeta.

<sup>17</sup> Hatyo hiyeta Jesus Cristo kakoa haxawalita notyaonita hoka nahakitere Enore hatene hiyetaite naokowiharetyoahena. <sup>18</sup> Hiyetaite hoka niraehena Cristo xoalini hare tyomitere nohiyeti tahi akili taita, majudeuneharenae Enore tyakeko maheta. Hatyoharenai atyo kaomaka Iraiti hiyeta, wenati waiyexe hiyeta, <sup>19</sup> exahe metaharexe nomaka hiyeta, exahe Enore Nisekohare niyatere xoaha hiyeta. Nikare, Jerusalém nalita, exahe Ilíria nali kijiya, Waiyexe Iraiti noxakaita tyotya Jesus Cristo tahi halitinai hiye. <sup>20</sup> Naiyateretyoa minita atyo noxakaini Iraiti Waiyexe kakoa haiyanakoa Cristo tahi masemaneharenai hiye. Maisa noxakai maheta xini koxaka haiyanai xakaihenereharenai hiyeta maheta xini.

<sup>21</sup> Hiyaiya, exakere atyo Iraiti Waiyexe nexa:  
Haiyanae Jesus Cristo tahi masemaneharenae ite waiyehenahene, exahe haiyanae masemanetereharenae etahi ana ite waiyekehala.

### *Paulo Xane Waiyeheta Roma Yerena Aokowi*

<sup>22</sup> Kahaliki xakore notyoa nowaiyeheta xiso naokowita hoka maisa aliyakere xaka. <sup>23</sup> Xakore hoka koxaka tyare atyo nohateni alikoanai namiyatya hoka toahiyita tyare nowaiyeheta naokowita xiso hoka <sup>24</sup> kalikini atyoite notyoa nowaiyehetehena xiso. Kasani Espanha noxanihenere xowaka nowaiyeheta naokowita xiso, exahe kasani tehitiya xakahinaetya natyo naokita noxanini nali xeta kakoa, nowaiyehetehenere xiso najikinita.

<sup>25</sup> Xakore hoka kalikini atyoite noxanihenere Jerusalém xeta Enore kaxaikoneharenai nakahinaetya maheta. <sup>26</sup> Macedônia, Grécia nali xoaha Enore xema tyanoniterenae ahotalikisaha xiyehaliti, kahinaetyaha aokowiha Jerusalém nali Enore kaxaikonehare hotyalinai maxiyeharehare tyanoniterenae maheta. <sup>27</sup> Hatyoahitaha nikare ahekotyaha, nikare terota atyo ehateneha judeunae kahinaetyaha maheta. Hiyaiya, judeunae atyo Enore koamaniya nawenatyaka kakoa kahinaetyaha majudeuneharenae. Hiyeta hoka majudeuneharenae ite kahinaehena judeunae haxiyehareha xoalini hare waiyexe kakoa.

<sup>28</sup> Exe hateniti ite namiyatya, exahe exahe ahohisakoahenahere xiyehaliti hotohare ite nisa namiyatya hoka hatyo najikinitaite noxani Espanha xeta hoka notonani heko nowaiyeheta xiso. <sup>29</sup> Nowaiyehenere xiso xowakaite waiyexe xoalini hare Cristo nalitare kaotyakehena xomana. Hatyoharenae waiyekehala noman.

<sup>30</sup> Naxa xiso, nohinaeharenae, Wiyekohase Jesus Cristo hiyeta, exahe Isekohaliti xawaiyetyati ijitere womana hiyeta. Maika xakahinaetya natyo xiraexala kakoa.

<sup>31</sup> Xiraexatya nomani hoka Judéia nali matyakekoneharenai tyanoniterenae maisa xoana mokita natyo, exahe Enore kaxaikoneharenae Jerusalém naliyerenai hoka nohateni kakoa ihalahareha. <sup>32</sup> Nikare ite, Enore xaokalita hoka nokaokihena xomana hoka nihalahare, exahe xaihalahalinikisaite natyo. <sup>33</sup> Maika Enore, mehexaikohaliti ijitere womana, kaxaiko xityotya naoka. Xoaha taita.

## 16

*Haxakaisakeheta Aoka Hahinaeharenae Hiye*

- <sup>1</sup> Wihinaehalo Febe tahi niraе xihie. Cencréia nali Cristo xema tyeoniterenae kahinaetyasero tyeonita. <sup>2</sup> Maika exe wihinaehalo waiye xamoka. Nikare atyo Enore koamaniya tyeoniterenae hahinaeharenae mokita. Maika xisa enomana, xoarenai hiye xamani xakahinaetene aohena hoka. Hiyaiya, koxaka atyo kahare haliti kahinaetya, exahe natyo tehitia hoka koxaka kahinaetya.
- <sup>3</sup> Maika xiyakaiheta natyo Priscila, Áquila xoaha hiye. Hatyonai atyo haxawalita hakaha nokakoi Jesus Cristo hatene hiye. <sup>4</sup> Hakahinaeraha natyo hiyeta komita kaxaisakaha. Hatyoharenai hiyeta nihalahare ekakoaha. Maiha natyo taita xini. Majudeuneharenae Cristo koamaniya tyeoniterenae hotyalinai tehitia halahareha ekakoaha.
- <sup>5</sup> Maika xiyakaiheta tehitia natyo Cristo koamaniya tyeoniterenae ehanakoha nali hohisakoiterenae hiye. Maika xiyakaiheta tehitia natyo noxiyakawalihare nohinaehare Epêneto hiye. Hatyo hotohare atyo Cristo koamaniya hawenane moka Ásia koa nali.
- <sup>6</sup> Maika xiyakaiheta natyo Maria hiye. Hatyo atyo kalore haka xinekoni.
- <sup>7</sup> Maika xiyakaiheta natyo Andrônio, Júnias xoaha hiye. Hatyonai atyo nohinaeharenai judeunai atyo. Haxawalita kaberexotyakaha nokakoi. Cristo niraene kakoarenas waiyaneharenai kaiserehare atyo tyeonaha. Nahitita atyo Cristo koamaniya tyeonaha.
- <sup>8</sup> Maika xiyakaiheta natyo noxiyakawali Amplíato hiye. Xekohaseti koamaniya tyeonita hoka hatyo hiyeta nakakawatene.
- <sup>9</sup> Maika Cristo hatene hiye kahinaetitere wiso Urbano hiye xiyakaiheta natyo. Exahe tehitia noxiyakawalihare nohinaehare Estáquis hiye hoka xiyakaiheta natyo.
- <sup>10</sup> Maika Apeles, Cristo koamaniya masakare tyeonitere hiye xiyakaiheta natyo. Aristóbulo exanityo, ityaninae harenae hiye hoka xiyakaiheta natyo.
- <sup>11</sup> Maika nohinaehare kaiserehare judeu Herodião hiye xiyakaiheta natyo, exahe Narciso hotyali Cristo koamaniya tyeoniterenae hiye hoka xiyakaiheta natyo.
- <sup>12</sup> Maika xiyakaiheta natyo Trifena, Trifosa, Xekohaseti ana hakiterenae hiye. Exahe tehitia noxiyakawaliha nohinaehalo Pérsida hiye xiyakaiheta natyo. Hatyo tehitia atyo kalore haka Xekohaseti ana.
- <sup>13</sup> Maika xiyakaiheta natyo Rufo hiye. Hatyo atyo kalore haka Xekohaseti ana. Exahe inityo hiye hoka xiyakaiheta natyo. Inityo waiye mokita natyo haisani akereta.
- <sup>14</sup> Maika xiyakaiheta natyo Asíncrito, Flegonte, Hermes, Pátrobas, Hermas, xoahanae hiye, exahe wihinaeharenai nali tyeoniterenae hiye hoka.
- <sup>15</sup> Maika xiyakaiheta natyo Filólogo, Júlia, Nereu, enahahalo xoaha hiye. Exahe tehitia Olimpas, tyotya Enore kaxakoneharenai nali tyeoniterenae hiye hoka xiyakaiheta natyo.
- <sup>16</sup> Maika xikatyawaxakakoahena hoka xasohitanakolisakakoa xiyawaiyetyakakoane hiyeta. Tyotya Cristo koamaniya tyeoniterenae tehitia haxakaisakeheta aokaha xihie.

*Maika Xirihare Xaotyakisatiyenae Metalahare Kakoa**(2 Coríntios 11.12-15; 1 Timóteo 1.6-7; 4.1-3)*

- <sup>17</sup> Nohinaeharenai, maika xirihare haiyaharenai exaoretitereharenai wenati kakoa, exahe haiyanai tyakekone ahowitikijiterenai, exahe xikaxaotyakisakehenere hare mahokoanetitereharenai kakoa. Maika xakikisoaheta enonitaha. <sup>18</sup> Hiyaiya, nikare tyeoniterenai atyo maisa Wiyekohase Jesus Cristo xema xini tyeonahitaha, haxahekolaha ximita atyo nikare tyeonahitaha. Exahe waiyore iraetaha hoka aihalahalinikisa haliti maotikonexe hoka maoseratyahitene.

*Xaotyakisati Miyane*

<sup>19</sup> Iraiti Waiyexe xema xikinatere xisaonitere atyo tyotya halitinae ana waiyekehalakita. Hiyeta hoka nihalahareta xikakoa. Kasani xawaiyore waiyexe kakoa naokita, exahe hoka maisa xawaiyorexe iniyalahare kakoa naokare. <sup>20</sup> Enore mehexaikohaliti ijitere womanaite haxeroreta xikiji katyahe moka Ahalakoahaliti hoka xatyahakahekoatene.

Maika Wiyekohase Jesus Cristo waiye moka xiso naoka.

<sup>21</sup> Timóteo, nokahinaetyase hateniti hiye, haxakaisakeheta aoka xihiye. Lúcio, Jasão, exahe Sosípatro, judeunae tehitiya, haxakaisakehenahitaha aokaha xihiye.

<sup>22</sup> Natyo Tércio exe babera Paulo axikahenere naxairatyia hoka maika xiyakaiheta natyo Cristo koamaniya tyaoniterenae hiye.

<sup>23</sup> Gaio haxakaisakeheta aoka xihiye. Ehanako atyo notyaonita, ehanako nali atyo Cristo koamaniya tyaoniterenae ahohisakoatyakakoita hoka haxakaisakeheta aokaha xihiye. Ali wenakalatikoa olo kaxaikotere Erasto haxakaisakeheta aoka xihiye, exahe wihinaehare Quarto tehitiya hoka haxakaisakeheta aoka. <sup>24</sup> Maika Wiyekohase Jesus Cristo waiye kaxaiko xiso naoka.

#### *Iraexatyati Xaexakeretyati Miyane*

<sup>25</sup> Maika waexakerehena Enore. Hiyaiya, Waiyexe Iraiti noxakaihenere Jesus Cristo tahi hiyeta Enore aiyatelinikisa xiso, xityakekone hiyeta. Exahe toahiya Iraiti Waiyexe metahare tyaonitere kalikini kaotyakehenere xoaha hiyeta. <sup>26</sup> Kalikini exe Iraiti Waiyexe kaotyaka toahiya Iraiti xakaisasharenae xairahenere hiyeta. Enore menanehaliti xaokalita atyo kasemaka exe Iraiti hoka tyotya haliti hotyalinae semene hoka tyakekone maheta. <sup>27</sup> Kasani, Enore haterore, exahe waiyorexe kakoa kaihalaharetyaka mene naoka, Jesus Cristo hiyeta. Xoaha taita.

## 1 Coríntios

### *Paulo Tyawaxa*

<sup>1</sup> Natyo, Paulo, Jesus Cristo niraene kakoare notyaona Enore xaokalita. Wihinaehare Sóstenes kakoa <sup>2</sup> naxairaty a exahe babera Enore koamaniya tyaoniterenae wenakalati Corinto yerenae ana. Xiso Cristo koamaniya xisaona hoka Enore aohenerenai haomanexe ana. Exahe exahe babera atyo tyotya Jesus Cristo kahinaera axiterenai anere, exahe hatetere awaiyitita Jesus hoka exahe babera enomanere tehitia. Xekohaseti Jesus Cristo atyo Exekohaseha, exahe wityotya Wiyekohase.

<sup>3</sup> Maika Wexe Enore, exahe Wiyekohase Jesus Cristo xoaha nalitare waiyexe wenati, exahe mehexaikohaliti xoaha tyaona xikakoa naoka.

### *Waiyexe Nomaka Cristo Hiyeta*

<sup>4</sup> Nihalahareta Enore kakoa tyotyaki ferakene xihiyeta. Hiyaiya, Enore kahare waiyexe tyomita xomana Jesus Cristo hiyeta. <sup>5</sup> Cristo koamaniya xisaona hoka xawenane waiye kaiserehare tyaona. Xawaiyore xiraeta, exahe xawaiyore xahekotita harenae. <sup>6</sup> Cristo tahi xasema hoka xityakeko hoka xikinatere xisaonita ekoamaniya, <sup>7</sup> hoka maisa xoare waiyexe maxekaneta xomana, exahe xatyahita Wiyekohase Jesus Cristo haikoahaneheta xahita.

### *Enore Ite Waiye Kaxaiko Wiso*

(*Romanos 8.31-39; 16.25; Filipenses 1.6; Judas 24-25*)

<sup>8</sup> Hatyo atyoite waiye kaxaiko xiso hoka xikinatere moka miyanitiye ferakene kijiya niyahare, Wiyekohase Jesus Cristo tyohetehenere xowaka maisa xoare hare iniyalahare kawaiyakita xihiye maheta. <sup>9</sup> Enore atyo iraehena hoka aliterexe atyo iraeta, maisa maotyanexe hairaene. Hiyaiya, hatyo atyo kawisa xiso, Ityani Wiyekohase Jesus Cristo kakoa hahotalita xisaona maheta.

### *Hahekore Xakini Corinto Yerenai Ahekotya*

<sup>10</sup> Nohinaeharenai, niraehena xikakoa Wiyekohase Jesus Cristo xaokalita: Maika hakakoa xiraehena, awa atyo haware hahotalita ahekotya hahotalita nonitata hoka maisa awaiyetyakakoita. Maikaira hahotalita xahekotya hatita hiye, exahe hatita xisoma xaokowitere tahi. <sup>11</sup> Nohinaeharenai, Cloe hotyalihare konitarenai kaoka nomani hoka xakai xitahi nohiye hoka xikirawanekakoita aokaha.

<sup>12</sup> Exakere nomita xihiye: hahekore xakini xahekotya. Hatya nita: “Natyo atyo Paulo xaotyakira xema notyaonita”. Hatya hoka: “Natyo atyo Apolo xaotyakira xema notyaonita”. Hatya hoka: “Natyo atyo Pedro xaotyakira xema notyaonita”. Exahe hatya hoka: “Natyo atyo Cristo xaotyakira xema notyaonita”, nita. <sup>13</sup> Xoana Cristo kaxekasekoatyaka kahare taose? Xoana Paulo kaberekotyaka atyalihose xaimaholatyaka hiye xomana? Xoana xikabatixatyaka Paulo nexare kakoa?

<sup>14</sup> Maisa xala hare xinekonitare nabatixaita hoka hatyo hiyeta Enore kakoa nihalahareta. Kala Crispo exahe Gaio hare taita nabatixatya. <sup>15</sup> Nikarite hoka maisa xalahare Paulo nexare kakoa xikabatixatyaka aokita. <sup>16</sup> (Nabatixatya tehitia nika Estéfanis, exahe exanityo, ityaninai harenai hoka, motya akere maisa hatehitia nobatixalihare aka.) <sup>17</sup> Cristo atyo maisa nabatixatya maheta xini axikatya natyo. Axikatya atyo natyo noxakai Waiyexe Iraiti halitinai hiye maheta. Maisa nawaiyolini kakoa xini noxakaihakatyaka aoka. Kasani maisa Cristo wainihenere atyalihose xaimaholatyaka hiye tahi kaxemaisatyaka aokare hoka maisa xoare tyomare.

### *Cristo Atyo Enore Niyatere, Enawaiyore*

<sup>18</sup> Hiyaiya, hamawenekoaretyakaho xaneterenae ana atyo Cristo atyalihose xaimaholatyaka hiye wainihenere tahi atyo hatyahalitita enomanaha. Hoka wiso koxaka

wikaiyakehetehenerenae ana atyo Enore niyatere waokitene. <sup>19</sup> Hiyaiya, exakere atyo Iraiti Waiyexe nexa:

“Namiyatyaite waiyorexenai nawaiyore, nemaisatyaite waiyore ahekoiterenae xahekola”.

<sup>20</sup> Hiyeta hoka aliyo waiyorexenae, waiyore ahekoiterekarenai? Aliyo waiyore iraetererekarenai ali waikohokoarenai? Enore ana atyo halitinae nawaiyore hatyahalitita! <sup>21</sup> Enore, hawaiyore hiyeta, maisa halitinae waiyorahitaha etahi akiti hawaiyoreha kakoa aokita. Xakore hoka waiye maniya atyo moheta aokowi tyakekohenerenai. Nikare tyoma iraiti “hatyahaliti” aokahitere wiyakaitere hiyeta.

<sup>22</sup> Judeunae atyo xoalinhare nomaka aokahitaha, waiyaha hotohare hoka tyakekoha maheta. Hoka gregonae atyo waiyoliniti tawita. <sup>23</sup> Hoka wiso atyo Cristo kaberekotyakenere atyalihose xaimaholatyaka hiye tahi wiyakaihakaita hoka hatyo tahi aehalikijita judeunae, hoka majudeuneharenai ana atyo hatyohare tahi hatyahaliti aokahitaha.

<sup>24</sup> Hoka Enore aohenerenae haomanerena ana atyo, xoana judeunae xamani, xoana majudeuneharenai xamani hoka, Cristo atyo Enore niyatere, Enore nawaiyore aokahitaha. <sup>25</sup> Hiyaiya, Enore hatyaharene aokahitere atyo haliti nawaiyore xahexe, exahe Enore maiyaterene kaxaokakiterekhare atyo halitinai niyatere xahehare.

<sup>26</sup> Xasemehena, nohinaeharenai, xotehenaira xawenane Enore haomana aohenere xiso nahitita. Exowakiya komita ene maisa xala hare waiyorexe aka, xekohaseti hare aka, kaoloxere aka xinekoni. <sup>27</sup> Ehaihalikisa maheta haliti waiyorexenai, Enore aoka haomana etakehare hatyahaliti aokiterekhare halitinai. Ehaihalikisa maheta xekohasetinai, aoka haomana etakehare maiyaterere aokiterekhare halitinai. <sup>28</sup> Enore aoka tehihiya haomana halitinae nirawanakorenai, exahe kirakoane tyaoonitere hoka maxoare-waikatehare aokahitere hoka haomana aokahene emaisatya maheta halitinai ana waiyeteraharenai. <sup>29</sup> Hatyoharenai hiyetaiya maisaiya xala hare aokowiharetyoita Enore nahalakoa.

<sup>30</sup> Xakore hoka Enore terota atyo moheta xiso Jesus Cristo koamaniya, exahe hoka Cristo hiyeta wawaiyorene isa womana. Exahe hoka Cristo hiyeta haliti waiyexe Enore aoka wiso, Enore hotyalihare wisaona, waiyexe maniya wikaiyakeheta. <sup>31</sup> Hiyaiya, exakere Iraiti Waiyexe nexa:

“Xala xamani aokowiharetyo aokowita hoka, aokowiharetyoahena Xekohaseti tyomenere kakoa”, nexa.  
Kasani nikare wisaona aoka.

## 2

### Cristo Kaberekohenere Tahi

<sup>1</sup> Nohinaeharenai, notyoa noxakaihenere xihiye Enore metaharene tahi xowaka, maisa waha tahi niraeta, maisa kalore nowaiyolini kakoa xini noxakaihakatya xihiye.

<sup>2</sup> Nali notyaohenere xinekoni xowaka tyotya xoalinhare nomaotyani naokowita, Jesus Cristo wainihenere atyalihose xaimaholatyaka hiye tahi taita notya naokowita. <sup>3</sup> Notyoa nowaiyehenere xiso xowaka maisa nokinatere notyaonare, natatakoita nomairani hiyeta. <sup>4</sup> Naotyakijitere, noxakaihakaitere atyo maisa halitinae nawaiyore akereta xini. Xakore hoka Enore Nisekohare atyo aiyatelikijita natyo, hoka hatyo hiyeta niraehena xikakoa hoka iniyatere xikihixita xihiye. <sup>5</sup> Hatyo hiyeta xityakekone atyo maisa halitinae nawaiyore hiyeta xini. Enore niyatere atyo aiyatelikijita xityakekone.

### Enore Nawaiyore

<sup>6</sup> Xakore hoka niraeta atyo etakehare waiyexe maniya hawenane mohetehenerenai nawaiyore tahi. Hoka maisa atyo exe waiyoliniti ali waikohokoare xini, maisa etakehare xekohasetinai haiyatere ximita kaxaikoakaiterekarenai hoka ekalorexeneha nonitata kakikisakihiterekarenai xini. <sup>7</sup> Exe waiyoliniti metaharexe atyo Enore nalitare, kaxateroakisaka atyo halitinai nonitata. Waikohe kaomakehenere nahitita atyo Enore womanere terota aokene wisaona maheta. <sup>8</sup> Maisa xala hare kalikini kalorexe

tyaoniterenae ana waiyekehalkere hatyo waiyoliniti. Waiyekehalkitaiya enomanaha hoka maisaiya berekotyahitaha atyalihose xaimaholatyaka hiye enokoatare Xekohaseti.

<sup>9</sup> Hiyaiya, exakere Iraiti Waiyexe nexa:

“Enore xoalinihare waiyexe memere moka awaiyetitereharenae ana. Xakore hoka maiha xala hare waiyarene, semarene. Maisa xalahare ahekotita hatyohare kaotyakene tahi akiti”.

<sup>10</sup> Xakore hoka Enore atyo hotikisa womana hametaharene Haisekohare hiyeta. Isekohaliti Waiyexe atyo tyotya tawihitita xoalini hare, Enore xahekola metaharexe tyaoniterehare kakoita waiyoreta. <sup>11</sup> Hiyaiya, haliti nisekohare taita atyo waiyoreta hatyo haliti ahekoiterekahare kakoa. Nikareta Enore Nisekohare taita waiyoreta xoalinihare ahekoiterekahare kakoa. <sup>12</sup> Maisa atyo isekohaliti ali waikohekoatare kaxekakita womana xakore hoka Isekohaliti Enore axikahenere womana atyo awaiyekehalkaita tyotya xoalinihare Enore isehenerehare womana.

<sup>13</sup> Hatyo hiyeta wiraeta Enore Nisekohare aotyakihenere wiso kakoa, maisa atyo haliti waiyoliniti kakoa aotyakihenere wiso kakoa xini wiraeta. Wawaiyekehalkaita Iraiti Aliterexe waiyexe maniya tyaonitereharenai ana.

<sup>14</sup> Hoka xala xamani atyo maisa Enore Nisekohare kakoare hoka maisaiya atyo aliyakere Enore Nisekohare xaotyakira waiyekehalkita enomana. Hatyohare aliterexe xakore hoka hatyo atyo hatyahaliti enomana. Hiyaiya, hatyohareya atyo kawaiyoretyaka wenati waiyexe maniya kawenatyakehenere hiyeta. <sup>15</sup> Haliti Isekohaliti Waiyexe kakoare atyo waiyore ahekoita tyotya xoalini hare kakoa. Waiyoreta haiyaharenai nawenane kakoa hoka haiyaharenae atyo maisa waiyorexe enawenane kakoa.

<sup>16</sup> Hiyaiya, exakere Iraiti Waiyexe nexa:

“Xala waiyoreta Xekohaseti xahekola kakoa? Xalaiya aotyakisene?”

Hoka wisonai atyo Cristo xahekola kakoare.

### 3

#### *Enore Wakaneharenae*

<sup>1</sup> Nohinaeharenae, maisaiya aliyakere niraeta xikakoa Enore Nisekohare kakoarenai namokitere akereta. Hatyo hiyeta niraeta xikakoa matyakekoneharenai kakoa kairalityakitere akereta. Xoima akereta atyo xisaonita xawenane Cristo koamaniya kakoa hoka. <sup>2</sup> Exowaka xoima kaxaerakisakitere totonexati kakoa akereta naotyakisa xiso, maisa atyo nakairati kinaterexe kakoa katyaisakitere akereta xini naotyakisa xiso. Maisa atyo hatyohare niyahare ximemehenere hoka. Exahe kalikini hoka maisa ximemehenere.

#### *Enore Maxawaiyerene*

(*Romanos 1.26-32; 1 Coríntios 10.6-10; 1 Timóteo 1.9-10; Tiago 3.10-16*)

<sup>3</sup> Hiyaiya, matyakekoneharenae tyaonitere akereta atyo xisaonita: Xokoawaharekakoahena, xikirawanekakoahena harenai hoka hatyohare hiyeta matyakekoneharenae akereta xisaonita, haiyanae tyaonitere akereta xisaonita. <sup>4</sup> Hiyaiya, hatya nehena: “Natyo atyo Paulo xaotyakira xema notyaonita”, exahe hatya hoka, “Natyo atyo Apolo xaotyakira xema notyaonita”, nita. Nikare xisaonita hoka matyakekoneharenae tyaonitere akereta atyo xisaonita.

<sup>5</sup> Hiyaiya, xala atyo Apolo? Xala atyo Paulo? Wiso atyo Enore ana wahakita hoka wiyaotyakira hiyeta atyo xityakeko Xekohaseti. Xekohaseti isehenere womana wihatene wihatyaka atyo wisomita. <sup>6</sup> Natyo hotohare atyo nafetene hoka Apolo atyo horeraharetya hatyo hananehaliti, hoka Enore atyo akekoaretene. (“Hananehaliti”, nita Iraiti Waiyexe xaokaka.) <sup>7</sup> Hiyaiya, nikare hoka fehenerene, ehoreraharetyase xoaha komita ene maisa xoare hare tyomitita. Xakore hoka Enore atyo akekoarenikisene. <sup>8</sup> Hatyo hiyeta maiha atyo hawareharexe xakini xini exafityasehare exahe ehoreraharetyasehare xoaha hoka. Enore atyoite isehena enomanaha hahenahere akereta. <sup>9</sup> Hiyaiya, wiso

atyo wikhinaehare kakoita hoka haxawalita wahakita Enore ana, exahe xiso atyo emasenekoa akereta.

Xiso tehitia atyo Enore hana wahaharexe akereta. <sup>10</sup> Enore nawaiyolini isehenere hiyeta atyo hati nomasehare waiyexe akereta notyaonita. Notyoma hati kilihi hoka hoka hatya tyomiterene eheno akereta. Maika xirihare xihatene xisomitere kakoa. <sup>11</sup> Hiyaiya, Enore atyo koxaka Jesus Cristo hati kilihi hoka akereta moka hoka maisaiya atyo aliyakere hatya kaxomokakita. <sup>12</sup> Hoka haiyaharenae atyo ouro, prata, exahe hoka sehalise kaxaimanexe kakoa hati tyomitere akereta. Hoka haiyaharenai atyo atyakase, ime, atya niyali harenai kakoa hati tyomitere akereta.

<sup>13</sup> Hoka Cristo tyohetehenere xowakaite waiyekehalakeheta ehateneha. Hatyo xowakaite kahotikisaka hatya, hatya xakini hatene. Irikati atyoite hatyohare ehateneha hotikihena: xoana waiyexe xamani, xoana maisa xamani. <sup>14</sup> Hoka xala xamani atyoite waiye hahatene tyoma hatyo hati hiye hoka maisaite kerita hoka hatyo ana atyoite waiyexe kaxekaka. <sup>15</sup> Hoka xala hatene xamani atyoite kera hoka maisaiya atyo xoarehare waiyexe kaxekakita enomana. Xakore hoka hatyo atyoite kaiyakeheta, hatya irikati koni jiya hoka makeralinitere akereta atyoite tyaona.

<sup>16</sup> Xasemehena, xiso atyo Enore hana akereta hoka Enore Nisekohare atyo tyaonita xikakoa. Hatyohare akiti kakoala xawaiyoreta naoka. <sup>17</sup> Hiyaiya, xala xamaniya mawenekoaretya Enore hana hoka Enoreya mawenekoaretene. Hiyaiya, Enore hana atyo waiyexe hoka xiso terota atyo ehana.

<sup>18</sup> Awa atyo hatya hatyota maoseratyoawi. Maika hatya xinekonitare waiyore aokowi-hena halitinai nawaiyore akereta hoka maika hatyaharexe tyaohena hoka hatyaosetaite aliterexe waiyorexe tyaona. <sup>19</sup> Xoalinhare waiyoliniti tyaoniterekare halitinae ana atyo Enore ana hatyahalitita. Hiyaiya, exakere Iraiti Waiyexe nexa:

“Enore atyo otokita waiyorexenai enómanenaiha hiyeta”.

<sup>20</sup> Exe tehitia:  
“Xekohaseti atyo waiyoreta waiyore aokowiterekare xahekola kakoa. Hatyoharenae atyo maisa xoare hare tyomare enomana”.

<sup>21</sup> Hiyeta hoka maisaiya xalahare aokowiharetyoita xoalini hare halitinae tyomitere-hare kakoa. Hiyaiya, tyotya xoalini harenai atyo xomanere. <sup>22</sup> Paulo, Apolo, Pedro, exahe waikohekoa, wenati, kamati, kaliniye, exahe haxowaka harenai, tyotya hatyoharenae atyo xomanere. <sup>23</sup> Hoka xiso atyo Cristo anere, hoka Cristo atyo Enore anere.

#### 4

##### *Cristo Niraene Kakoarenæ*

<sup>1</sup> Maika Cristo wakanehare akere xamoka wiso, hiyaiya, wiso atyo wawaiyekehalakaita Enore xahekola metaharexe. <sup>2</sup> Hiyaiya, hahakita hiyekohase ana hoka hiyekohase tyakekota hiso hoka ehekoreya. Hoka maisaiya tyakekota hiso hoka maisaiya aliyakere hahakita enomana. <sup>3</sup> Natyo atyo nahakita noxekohase ana hoka xoare xamani atyo xahekotita notahi, exahe kalorexenae hoka axahitaha notahi hoka nomani atyo maisa xiyahekola, exahe exahekola hoka xoare tyomare. Exahe noxahekoluta notahi tehitia hoka maisa xoare tyomare. <sup>4</sup> Nomani atyo maisa xoare hare iniyalahare notyomare, xakore hoka hatyo atyo maisa hotikijita nawenani waiyexe halitinai ana. Hoka Xekohaseti atyoite ahekohena notahi, aliyakere xamani moka natyo aokowi hoka.

<sup>5</sup> Hiyeta hoka awa atyo xahekotya iniyalahare hatya haliti tahi Xekohaseti makaokene-hareta. Hatyo atyoite kaokeheteheha hoka hotikihena halitinae nōmane, xoalinhare tyomitereharenæ metaharexe, halitinae xahekola xoare xamani tyomaha aokowiterekare hoka hotikihena. Hatyo najikinitaite aliyakere xamani tyomaha hoka hatyo tyomehenahere akereta makere mohenahene.

<sup>6</sup> Nohinaeharenæ, natyo Apolo xoaha hiye naimenekoita, wiso wihinamanai hiye. Xawaiyore maheta hatya iraiti nitere: “Xaiminis xairatyoare tyaonitere”. Maisaiya xala hare aokowiharetyoita hatya haliti hiyeta, hoka hatya maxaiminirita. <sup>7</sup> Xala kalorexe

moka hiso haiyanai ana? Maisa kore Enore xini tyotya xoalinihare isa homana? Xoanere hoka haokowiharetyoita, motya etakehare maisa Enore xekane kakoa ene xini?

<sup>8</sup> Koxaka tyotya xoalini hare xaokiterehare kakoare xiso! Koxaka xikaoloxahare xisaona! Xisonai atyo koxaka xekohaseti xisaona, hoka wiso atyo maiha! Waiye kaiserehariya atyo aliterexe xekohaseti xiso hoka wiso tehitia xekohaseti wisaona xihakakoane.

*Jesus Tyakekohenerenae Kakoa Atyoite Kakahalakoaharetyoaka  
(João 15.18-21; 16.1-4; Atos 5.40-41; 14.21-22; Filipenses 1.28-30)*

<sup>9</sup> Hiayiaya, noxahekoli hiye hoka motya akere Enore moka wiso Jesus niraene kakoarenæ miyanitiye aose. Wiso atyo etakehare haliti kahalakisaka hoka kaxaisakiterehare kahare halitinai nahalakoa akereta, hakakoare tyaooniterenae waiyane maheta akereta, anjonai exahe halitinai xoaha waiyane maheta akereta.

<sup>10</sup> Cristo xema wisaonitere hiyeta atyo wihatyaharene aakahitaha, xakore hoka xiso atyo xawaiyore, exema xisaonitere hiyeta. Wiso atyo maisa wakinaterexe hoka xiso atyo xikinatere. Wiso atyo maisa wikaxaiminisakere hoka xiso atyo xikaxaiminisakita.

<sup>11</sup> Kalikini kijiyehe na xirakone wisaonita winaka, woinane kakoa. Imiti xololohare aki wijoita, wikanokonasetyakita, maisa wikananere hakitina. <sup>12</sup> Wikirahareta wihatene kakoa xoalini hare wiya womana maheta. Kirawanehenaha wiso hoka wenati waiyexe waokita enomanaha. Wikaxiholakehena hoka mema wisaonita. <sup>13</sup> Watoxaharehenaha wiso hoka wawaiyexeharene kakoa wekoaxaita enomanaha. Imexati atyo wikaxaokakita hoka kalini kijiyehe na iyaxati tyaoonitere exe waikoheko akereta mokahitaha wiso.

<sup>14</sup> Maisa exakere naxairatya xomana hoka nehalhalikisa maheta xini xiso. Naotyaisa maheta xiso, nityaninae kaisereharenai noxiyakawalihare naokita, Xekohaseti koamaniya kinatere tyaoonitere hiyeta. Kahinaetyaite xiso xotyaxemaheta maheta waitare wenati xema notyaonitere Jesus Cristo hiyeta tahi. Hatyohare tahi naotyakijita tyotya tyakekohatiye hotyalinae hiye.

<sup>15</sup> Hoka haiyaharenæ xinekoni tyaooniterenæ aokowiharetyoahitaha, motyalaite maisa nali nojiyita aakahitaha hoka. <sup>16</sup> Xakore hoka Enore xaokalitaiya hoka haxerore notyoa nowaiyeheta xiso. Hoka nasema hatyo aokowiharetyoiterenai niraene. Maisa iniraeneha taita xini nasema maheta, nowaiya maheta xoalini hare iniyatere. <sup>17</sup> Hiayiaya, Enore koamaniya nawenatyaka atyo maisa iraiti taita xini, xakore hoka iyateliti atyo. <sup>18</sup> Aliyakerexe notyoa namoka xiso xaokita? Xoana mokonasetyakalatihi kakoa, xoana kalorexe xawaiyetyati kakoa, waiyexehaliti kakoa kore notyoa xomana xaokita?

## 5

*Tyakekohatiyenæ Nómane Iniyalahare*

*(1 Coríntios 6.15-20; 1 Tessalonicense 4.3-7; Hebreus 13.4)*

<sup>1</sup> Nasemita xinekoni wenati iniyalahare tyaoonitere tahi. Exahiya matyakekoneharenæ hoka maisaiya nikare tyomita. Hiayiaya, nasema hatya haliti xinekoni tyaoonitere hanexe exanityo kakoa nawenane tahi. <sup>2</sup> Nikare hoka xoanere hoka xaokowiharetyoita? Hatyohare ene atyo kalore xamaikohaliti, hatyohare hiyeta atyo hatyohare haliti xikikiriheta ene xinekonita.

<sup>3</sup> Maiha xakore atyo kalikini xinekoni notyaonare hoka nisekohare atyo tyaoonita xinekoni. Hoka motya ene nali notyaonita hoka Wiyekohase Jesus Cristo nexare kakoa koxaka nahekotya hatyo haliti iniyalahare tyomehenere tahi.

<sup>4</sup> Xahohisakoatyakakoahenere xowakaite xinekoni nisekohare tyaoonita, Wiyekohase Jesus Cristo niyatere tehitiaite tyaoonita wikakoa hoka <sup>5</sup> xisehena hatyo haliti

Ahalakoahaliti ana hoka eháre kamawenekoaretyaka maheta. Hoka Xekohaseti tyohetehenere xowaka inisekohare kaiyakeheta.

<sup>6</sup> Maiha atyo waiyexe xini xaokowiharetyoita! Xasemita atyo etake iraiti nitere: “Inira xakore kaorehetyakalati hoka kaorehitita hakakoare trigo”, nitere. <sup>7</sup> Xaxawahena toahiyerehare kaorehetyakalati. (Wenati iniyalahare xaokaka “Kaorehetyakalati”, nita). Hoka waiyexe maniya kaiserehare xisaoheta. Nikare ite hoka waitarehe ketehe makaorehetyakahare akereta xisaoheta. Koxaka nikare xisaoheta, hatyohare waiyekehala kita nomani. Hiyaiya, wihi sehare nakairati makaorehetyakahare atyo koxaka kalikini mema hoka Cristo wikalaneroxa mokose nakairati makaorehetyakahare nakairatyaka ferakene niyahare atyo koxaka kaxaisaka. <sup>8</sup> Nikahena hoka wimaxalohare nakairati makaorehetyakahare hiye. Hatyo nakairati atyo maisa ekaorehetyakahare xini hoka wenati waiyexe kakoare atyo. Kaorehetyakalati toahiyere atyo iniyalahare, ohiro watyalisaka harenae kakoare. (Wenati waiyexe xaokaka “Nakairati makaorehetyakahare”, nita).

<sup>9</sup> Hane baberane naxikahenere xomana nanekoa nirae xihije: Maika xakikisoaheta haliti etakehare ohiro watyalitrehare nonitata. <sup>10</sup> Xakore hoka maisa matyakekoneharenae nonitata xakikisoaheta maheta xini, tyotya ohiro watyalisaseharenai, maiyasehatiyanai, kaiwarexenae, xalijiniharexenae, xoana enore metalahare xema tyaoniterenai nonitata maheta xini. Maisaiya aliyakere ximawaiyaneta matyakekoneharenae. Ameteniya atyo xakikisoaheta exe waikohekoata rotita hoka ximawaiyanahene. <sup>11</sup> Exakere atyo niraeta xihije: kasani atyo xakikisoaheta Cristo koamaniya tyaona aokowitere xakore hoka ohiroarexe, maiyasehatiye, enore metalahare xema nawenatyasehare, hekaliye, iraehkoaitaterehare, xalijiniharexe xoaha tyaonitere nonitata. Nikare tyaoniterenai kakoa atyo kasani maisa xikanakaira hekoti naokare.

<sup>12</sup> Maisa exaxikatyakahare xini natyo nasema maheta Enore koamaniya mawenaneharenai tahi. Enore atyoite semehena etahiha. <sup>13</sup> Xakore hoka xoana maisaiya xisota xiwatyalita xihinaeharenai Cristo koamaniya tyaoniterharenai? Hiyaiya, exakere atyo Iraiti Waiyexe nexa:

“Xakikhete hena hatyo haliti iniyalahare tyomitere xinekonita”, nexa.

## 6

### *Paulo Niraene Hahinaeharenae Tahi*

<sup>1</sup> Xoana hoka hatya xihinaehare kakoa maisa waiye xisaonare hoka xiyaneta ekakoa kalorexenai nahalakoa awaiyekehala kattyah maheta xawenane xomana, maisa xakore atyo Cristo koamaniya tyaonareha hoka? Hiyaiya, xaxehenaine atyo Enore anere hotyalinai hoka watyalihenaha ene xiso, xala xamani ehekore tyaonita, xala xamani maisa ehekore tyaonare hoka. <sup>2</sup> Xoana maisa kore waiyekehala kere xomana miyanitiyehena xowaka Enore kaxakone hotyalinai semane halitinai tahi? Hiyaiya, xasemehenaite halitinai tahi. Hoka xoanaiya hoka hatyo inirere tahi maisa xisota xawaiyore hoka xiwatyalikakoita? <sup>3</sup> Xoana maisa waiyekehala kere xomana anjonai tahi kakoita wiseman, miyanitiyehena xowaka? Hoka xoanereya hoka maisa kalikiniye wawenane maisa waxakajita?

<sup>4</sup> Hatyo hiyeta maika xoalini hare inirere hiyeta xiraeharetyakakoahena hoka awa atyo xatawa Enore koamaniya tyaoniterenai matyakekolaharenai hoka watyalihena xiso.

<sup>5</sup> Xoana hoka kahiharetyaka xisaonita? Xoana maisa xala hare xinekoni waiyorexe aka hoka aotyakisare xiso, awaiyekehala kattyare xawenane xomana? <sup>6</sup> Hiyaiya, haiyaharenai waiyorexe tyaonita xinekoni. Xakore hoka xoalini harehena hoka xihinaeharenae xakolaita matyakekoneharenae ana, kalorexenae ana hoka xiyaneta awaiyekehala kattyah xomana xawenane maheta.

<sup>7</sup> Xoalini hare tahi kaotyakehena xinekoni hoka hatyoharenai atyo koxaka hotikijita ximawaiye nawenane. Xoana maisaiya atyo kotare iniyalahare xikaxomokakita? Xoana maisaiya atyo kotare xikakaiwaharetyakita? <sup>8</sup> Xakore hoka xiso atyo iniyalahare

xamokita xihinaeharenae, xikaiwaharetyahitene hare, xityotya xakore tyakekohatiyenai xaokowita hoka nikare xisaonita.

*Iniyalahare Nomaseharenae Atyoite Maisa Xaneta Enore Nawenakala  
(Gálatas 5.19-21; Efésios 5.1-7; Colossenses 3.5-6; Apocalipse 21.8, 27)*

<sup>9</sup> Hiyaiya, iniyalahare tyomiterenae atyoite maisa Enore waikoherakoa xane tyaonahitaha. Koxaka atyo xawaiyoreta hatyohare tahi kakoa. Awa hatya maoserahena xiso hoka hatyo xema xisaona. Hiyaiya, maisaiya atyo Enore waikoherakoa xane tyaonita: ohiroarexenai, enatyalolonai, ohiro hiye tyaonitereharenai, enore metalahare xema tyaonitereharenai, haenanehatya hiye tyaoniterenai, <sup>10</sup> kaiwarexenai, xiyejaliti xawaiyetyaseharenai, hekatikarenai, haliti niraetyaseharenai, xalijiniharexenai harenaiya atyo maisa Enore waikoherakoa xane tyaonahitaha.

<sup>11</sup> Toahiya ene haiyaharenae xinekonitarenai nikare tyaonahitaha. Xakore hoka xikatihakeheta atyo iniyalahare nonitata, Enore anere xisaoheta maheta, haliti waiyexe aoka xiso maheta, Wiyekohase Jesus Cristo hiyeta, Enore Nisekohare xoaha hiyeta.

*Enore Aokitere Akereta Nawenatyaka Kaihalaharetyaka Ekakoa Maheta*

<sup>12</sup> Hatyaiya nehena: “Notyomaiya tyotya notyoma naokowitereharenai”. Aliterexe, xakore hoka maisa tyotya waiyexe xini homana. Natyo tehitiyaiya nomi: “Notyomaiya xoalini haretere”. Xakore hoka maisaiya atyo nahalakisoawi hoka hatyohare jiyahaotita natyo. <sup>13</sup> Hatyaiya nehena: “Nakairati atyo waji niyahare, waji atyo nakairati niyahare maheta”. Aliterexe, xakore hoka Enore atyoite mawenekoaretya hatyo hinamanai. Hiyaiya, wiháre kakoa atyo maisa iniyalahare wisoma maheta xini ohiro kakoa. Xakore hoka Xekohaseti anere atyo wiháre, ehatene wisoma maheta. <sup>14</sup> Hiyaiya, Enore atyo ekasekiheta Xekohaseti Jesus, hoka nikareta tehituyaite ekasikeheta wiso haiyatere kakoa.

*Xikaxaikoawi Iniyalahare Ohiro Kakoa Xománe Nonitata*

*(1 Coríntios 5.1-5; 1 Tessalonicenses 4.3-7; Hebreus 13.4)*

<sup>15</sup> Xoana maisa kore waiyekahalakere xomana xiháre Cristo háré hiyetare? Nikareya hoka Cristo háré hiyetareya niya hoka ohiro enatyalolo hiye namoka? Maisaiya aliyakere nikare namokita! <sup>16</sup> Xoana maisa kore waiyekahalakere xomana hatya haliti tyaohena hatya enatyalolo hiye hoka haterore eháreha tyaoniterehare? Hiyaiya, Iraiti Waiyexe atyo nexa:

“Hinamanai háré atyoite haterore tyaona”, nexa.

<sup>17</sup> Nikare xala xamani Xekohaseti kakoa haxawalita tyaonita hoka haterore atyo tyaonahitaha, inisekoharenaeha hiyeta.

<sup>18</sup> Xisekoahena ohironae hiye xawenane nonitata! Hiyaiya, xoalini hare iniyalahare hatya tyomehena hoka hatyo atyo maisa haháre aiyalaharetyare. Hoka ohiro kakoa atyo iniyalahare wisomehena hoka wiháre atyo waiyalaharetita. <sup>19</sup> Xoana maisa kore xawaiyorexe? Hiyaiya, wiháre atyo Isekohaliti Waiyexe hana. Hatyo atyo tyaonita xikakoa, Enore xekane atyo. Maisa atyo xomanereta xini xisaonita. <sup>20</sup> Hiyaiya, Enore atyo iya xiso hoka bakatya xiyaimane. Hatyo hiyeta aokitere akereta xisaohena xiháre kakoa, kaihalaharetyaka Enore kakoa maheta.

*Wenkakoati Tahi*

<sup>1</sup> Kalikini ite nekoaxahetehena xaxairahenere nomani tahi. Waiye kaiserehareya atyo ena maiyanityohare hoka. <sup>2</sup> Xakore hoka kahare atyo ohiro hiye nawenatyaka tyaonita, hoka hatyohare hiyeta hatya haliti ite kaiyanityore terota tyaohena, exahe ohiro hoka kaiyanenero terota ite tyaohena. <sup>3</sup> Maika exanene hoka tyomehena enomana tyotya aokiterehare. Nikare tehitiya exahe exanityo hoka haiyanene aokitere akereta tyomehena enomana. <sup>4</sup> Exanityo atyo maisa hahalo waikatyo xini tyaonita. Exanene anere atyo ehálo tyaonita. Nikare tehitiya exanene hoka maisa hahare waikate xini tyaonita.

Exanityo anere atyo eháre tyaonita. <sup>5</sup> Maika hatyo hinamanai maisa maxikakoahitaha, ameteniya atyo hatyohare tyomaha aokowiha haware xakini hoka iraexatyaha aokowiha maheta hoka. Hatyaosetai ya atyo kaokakakoahenahitaha hetatiye akereta hoka maisa Ahalakoahaliti hasakaharetyahitene emawaiye kaxaikoawininiha hiyeta.

<sup>6</sup> Hoka maisa atyo nawakaita xini xiso, exe atyo noxahekoli. <sup>7</sup> Natyo akeretai ya xisaonita hoka waiyeya. Xakore hoka Enore atyo hahekore xakini wenati moka, hatya nawenane hahekorexe, hatya nawenane hahekorexe xoaha.

<sup>8</sup> Maiyanityoharenai, wainyaneneronai ana atyo niraehena: waiye kaiserehare kotare maiyanityohareha, maiyanenehaloha tyaonaha natyo akereta. <sup>9</sup> Hoka maisaiya atyo xisonai xahalakisare xiyahekola hoka maika xisaonakakoa. Hiyaiya, waiye nawenakanakoatyaka atyo nikareya hoka maisaiya xamaikohareta.

<sup>10</sup> Hoka koxaka tyaonakakoahenerenai ana owene xaotyakiye, xakore hoka maisa atyo noxaotyakiri xini, Xekohaseti xaotyakira atyo: ohiro kaiyaneneroiya maisa aliyakere halakihitita haiyanene. <sup>11</sup> Hoka halakihetaiya haiyanene hoka maika maisa kaiyanenehitita, xoana haiyanene kakoita xamani awaiyexeharetyakakoahetaha hoka tyaonakakoahenahitaha. Exahe exanene hoka maika maisa halakihitita haiyanityo.

<sup>12</sup> Haiyaharenai hiye atyo natyota niraehena, maisa atyo Xekohaseti niraene xini: hatya haliti tyakekohatiye tyaonita hatya ohiro matyakekonehalo kakoa hoka haxawalitaiya tyaona ekakoa aokowi hoka awairatyo halakihetehenene. <sup>13</sup> Hoka hatya haloti tyakekohatiroiya tyaonita hatya ena matyakekonehare kakoa hoka haxawalitaiya tyaona ekakoa aokowi hoka awairatyo halakihetehenene. <sup>14</sup> Hiyaiya, exanene matyakekonehare atyo Enore waiye mokita, haxawalita tyaonitere haiyanityo kakoa hiyeta. Exanityo matyakekonehalo atyo Enore waiye mokita, haxawalita tyaonitere haiyanene tyakekohatiye kakoa hiyeta. Awaiya nikare tyaonahitaha hoka ityaninahaiya matyakekoneharenai ityaninai akereta tyaonaha. Xakore hoka nikare atyo tyaonaha hoka Enore atyo waiye mokita ityaninai.

<sup>15</sup> Matyakekonehalo tyaona tyakekohatiye kakoa hoka halakieta haiyanene aokowi hoka kotare halakihetene. Nikare tehitayaiya ena matyakekonehare tyaona ohiro tyakekohatiro kakoa hoka halakieta haiyanityo aokowita hoka kotareya xaneheta. Hatya xowaka atyo exanene tyakekohatiye, exahe exanityo tyakekohatiro xoaha atyo maisa xoare hare akeheta ihiyeha, xoalini hare tyomaha maheta. Hiyaiya, Enore atyo aoka wiso haomana wimehexaikohare wisaona maheta.

<sup>16</sup> Hoka hasemehena, tyakekohatiro: xoana hihiyetaiya hexanene waiyexe maniya tyaoheta xamani, maisa xamani. Hatyohare maisa waiyekehalakere. Hasemehena, tyakekohatiye: xoana hihiyetaiya hexanityo waiyexe maniya tyaoheta xamani, maisa xamani. Hatyohare maisa waiyekehalakere.

### *Maika Xiyaiminira Enore Kakoa Xisaona*

<sup>17</sup> Maika hatya xakini tyaohitiya, Xekohaseti enawenane isehenere enomana akereta, hetati Enore aohenerene haomana akereta. Exehare kakoa atyo naotyakijita tyotya tyakekohatiyenai. <sup>18</sup> Hatya haliti exaiko nomanere milihisakahareya Enore koamaniya tyaona hoka maisaiya xoare maheta haxaiko nomanere milihisaka emaisahitita. Exahe hatya haliti maxaiko nomanere milihisakahareya Enore koamaniya tyaona hoka maisaiya xoare maheta aiko nomanere milihijoita. <sup>19</sup> Maisa atyo xoarehare tyomare, xoana exaiko nomanere milihisakahare xamani hiso, xoana maiha xamani. Hoka Enore xaotyakiraho xema nawenatyaka atyo waiye.

<sup>20</sup> Enore aohenerere xiso haomana xowakiya nahitita aliyakere xamani xisaonita hoka maika kotare nikareta xisaohitiya. <sup>21</sup> Enore haomana aohenerere hiso xowakiya ene wakahare hisaonita? Awa atyo himawaiyehare hatyoharenai kakoa. Hoka maisaiya wakahare hisaohitita aokaha hoka haiyateretyoahena hoka maisa wakahare hisaohitita. <sup>22</sup> Hiyaiya, wakahare ene hatya tyaonita hoka Enore haomanere aokene hoka mawaharenehahare tyaoheta, hoka Enore anere tyaona. Nikare tehitayaiya hatya haliti mawaharenehahare tyaonita hoka Cristo aokene haomana hoka Cristo wakanahare

tyaona. <sup>23</sup> Enore atyo iya xiso, exahe xiayimane hoka bakatya, hoka awa atyo halitinae wakanehare xisaona. <sup>24</sup> Nohinaeharenai, maika Enore haotita hetati xisaonitere akereta xisaona, Enore haomanere ahenere xiso nahitita xisaonitere akereta.

*Maiyanityoharenae, Wainiyaneneronae*

<sup>25</sup> Maiyanityoharenae ana atyo maisa xoare nita Xekohaseti. Xakore hoka niraehena atyo noxahekoli. Hiyaiya, Enore xairakoaneharera natyo hiyeta waiye nahekoita hoka nokatyakekotyakita. <sup>26</sup> Noxahekoli hiye atyo hoka waiye kaiserehareya atyo hatya haliti tyaonitere akereta kotare tyaona, kalikini howitihare wisaoniterehare hiyeta.

<sup>27</sup> Xoana hikaiyanityore? Hikaiyanityore hoka awa atyo hahalakihetene haokowi. Xoana himaiyanityohare? Himaiyanityohare hoka awa atyo hikaiyanityo haokowi. <sup>28</sup> Xakore hoka hikaiyanityoiya atyo hoka maisa iniyalahare hisomita, exahe maiyanenehalo tehitiyaiya kaiyanene hoka maisaiya iniyalahare tyomita. Xakore hoka kasani atyo nairihalinikisa xiso naokowita, howitihare xawenane tyaohenerehare xisaonakakoa-henerehare najikinita kakoa.

<sup>29</sup> Nohinaeharenae, exakerexe niraeta: maisa wahere waheta maniya. Hatyo hiyeta maika exehekota kaiyanityorenai hoka motya maisa kaiyanityoreha ene xini tyaohenaha. <sup>30</sup> Exahe amaikohareterenai hoka motya maisa amaikoharetaha ene xini tyaohenaha. Exahe ihalahareterenai hoka motya maisa ihalaharetaha ene xini tyaohenaha. Exahe iyakatiterenai hoka motya maisa iyahitreharenai kakoare ene xini tyaohenaha. <sup>31</sup> Exahe exe waikohekoata xoalinhare tyomitreharenai hoka maika motya maisa xoarehare ene xini ihiyeta tyomahitaha ene xini tyaohenaha. Hiyaiya, tyotyaito xoalini hare kalikini ali tyaonitereharenai maiyareheta rota.

<sup>32</sup> Kasani nakahinaetya xiso hoka maisa ximawaiyehare xawenane kakoa naokare. Hiyaiya, maiyanityohare atyo Xekohaseti aokiterehare tahi ahekoita, kasani aihala-halinikisene maheta. <sup>33</sup> Hoka haliti kaiyanityore atyo waikohekoare tahi ahekoita, haiyanityo aihalahalonikisa maheta. <sup>34</sup> Hatyo hiyeta hinama maniya ahekoita, haiyanityo, Xekohaseti tahi xoaha hoka.

Nikare ohiro maiyanenehalonae exahe wainiyaneronae atyo ahekotitaha Xekohaseti tahi taita, kasani ehatene tyomaha aokowitaha hoka. Hoka ohiro kaiyanenero atyo waikohekoare tahi ahekoita, haiyanene aihalahalinikisa maheta.

<sup>35</sup> Nikare niraeta kasani nakahinaetya xiso maheta, maisa nahowitiharetya maheta xini xiso. Xakore hoka kasani atyo xisoma xoare xamani waiyexe, ehekorexe xoaha naokita, hoka Enore hatene xiayiateretoane kakoa xisoma naokita.

<sup>36</sup> Tyeonakakoa aokowiha hoka hatyo najikinita maisa tyaonakakoa aokowi-henahitreharenai ana atyo niraehena: xoimahaliti xahekola hiyeya hoka nikare atyo maisa ehekoreta xini haiyanityohenere kakoa tyaonita, masakareya kalore hekota awaiyetitene, tyaonaiya ekakoa aokowiheta hoka maika tyaonakakoa. Maisa atyo hatyohare iniyalahare xini. <sup>37</sup> Xakore hoka xoimahalitiya maisa kaiyanityo aokowita, kotareya maiyanityohare tyaona aokowi, waiyeya kaxaikoawita, exahe koxakaiya ahekotya háomane tahi kakoa hoka ehekoretaiyia maisa tyaonita xoimahaloti kakoa. <sup>38</sup> Nikare atyo haiyanityohenere kakoa tyaona hoka ehekoreta atyo, xakore hoka xala xamani atyo maisa tyaonita haiyanityohenere kakoa hoka hatyo atyo masakare waiyexe tyomita.

<sup>39</sup> Hoka ohiro kaiyanenero atyo maisa aliyakere hatya ena kakoa tyaonita, exanene kasetata hoka. Exaneneya atyo waini hoka hatyo najikinitaiya tyaona aokowi hatya kakoa hoka ehekore atyo. Xakore hoka tyakekohatiye kakoa taitaiya atyo tyaona.

<sup>40</sup> Xakore hoka kotareya atyo maiyanenehalota tyaona hoka waiyeya atyo tyaona. Exe atyo noxahekoli. Hiyaiya, Enore Nisekohare tehitija atyoala tyaonita nokakoi naoka.

<sup>1</sup> Kalikinite niraehena nakairati kafetatyakiterehare enore metalahare ana tahi. Aliterexe atyo “Wityotya wawaiyore”, nerekatita. Xakore hoka hatyo waiyoliniti atyo axaheneratyakijita hatya haliti. Hoka xawaiyetyati atyo kahinaetita haliti kekoareheta maheta Enore koamaniya. <sup>2</sup> Hatyaiya haxahekola hiyeta xoalini hare kakoa waiyoreta aokowi hoka maisa atyo waiyekehalakehenere enomana waiyekehalakehenerehare enomana mahetare kakoa. <sup>3</sup> Xakore hoka xala xamani atyo Enore awaiyitita hoka ewaiyanehare atyo tyaconita.

<sup>4</sup> Hatyo hiyeta nakairati kafetatyakiterehare enore metalaharenai ana tahi atyo waiyekehalakita womana. Hiyaiya, enore metalahare xaimenekotyaka atyo aimenekoita etakehare xoalini hare makaotyakenehare. Hoka waiyekehalakita atyo womana: haterore atyo Enore. <sup>5</sup> Halitinai atyo, “Enorenai”, nexaha exaokakaha. Exahelolahia hiye hoka kahare “enorenai”, exahe “xekohasetinai” hoka tyaconahitaha enokoa, waikohekao xoaha aakahitaha. <sup>6</sup> Hoka womana atyo haterore Enore. Wexe tyota xoalini hare nomasehare atyo, enomana atyo wisaonita. Haterore atyo Xekohaseti, hatyo atyo Jesus Cristo. Ihiyeta atyo tyota xoalini harenae kaomaka, ihiyeta atyo wikaotyaka.

<sup>7</sup> Xakore hoka exeharenai atyo maisa waiyekehalakere tyota halitinae ana. Haiyaharenai atyo koxaka otyahareha enore metalahare kakoa, hoka kalikini kijiuhena, kanakairehenaha hoka motya exahelolahia hiye hoka hatyo nakairati enorenai metalahare anere kaiserehare aakahitaha. Exahelolahia atyo maisa kinaterexe. Hatyo hiyeta kanakairahenaha hoka kehexaharetyoahenahitita rota. Hatyo nakairati hiyeta iniyalahare tyomahitaha. <sup>8</sup> Hiyaiya, maisa nakairati hiyeta xini Enore aokita wiso haomana. Exahe wikanakairita xamani, xoana maisa xamani wikanakairare xoaha hoka maisaiya xoare hare hatyohare kakoa wisomita, maisaiya xoare hare wimetita.

<sup>9</sup> Kawaiyore hatyohare kakoa hoka maika xirihare xawenane kakoa hoka maisa hatyoharenai hiyeta ininaitata tyakekoterenai iniyalahare maniya xaxomokanikijita.

<sup>10</sup> Hiyaiya, xala xamaniya maisa kalore tyakekore, hoka hiso “waiyekehalakite homanaiya” ehaotita enore metalahare hanako hisoa hoka hikanakairehena hoka xoana maisaiyaka isoa hoka kanakaira enore metalahare nakaira aokowita tehitia? <sup>11</sup> Nikare ite hoka hatyo haliti inira tyakekotere, hatyo hihinaehare ana Cristo wainihenere ite iniyalahare maniya haxomokanikiheta, hatyo “hawaiyorene” hiyeta. <sup>12</sup> Nikare ite hoka iniyalahare maniya tyare haxomokanikiheta hihinaehare, exahe exahelolahia tyare haiyahahrenay hoka iniyalahare atyo hisomita Cristo ana.

<sup>13</sup> Hatyo hiyeta nakairati hiyetai ya nohinaehare iniyalahare maniya naxomokanikijita hoka maisaiya xoana hekota nanihitita eteti, maisa iniyalahare maniya naxomokanikijitene maheta.

## 9

### *Iraiti Xakaisasehare Hatene, Nómane Tahi*

<sup>1</sup> Xoana motya wakahare xaokita natyo? Xoana motya maisa iraiti kakoare xini natyo xaokita? Xoana motya maisa nowaita Xekohaseti Jesus xaokita? Xoana motya maisa nohateni Xekohaseti ana hiyeta xini exema maniya xisaona xaokita? <sup>2</sup> Exahe atyoite haiyahahrenai maisa Iraiti kakoare xini aoka natyo hoka xiso atyoite Iraiti kakoare xaohena natyo. Xiso terota atyoite Iraiti kakoare xaohena natyo, Wiyekohase xema maniya xisaonitere hiyeta.

<sup>3</sup> Haiyahahrenae iraeharetita natyo hoka exakere nekoaxatita enomanaha: <sup>4</sup> Xoana natyo xakoaniya atyo maisa nokanakairita, noterita harenai nohateni heko isehenaha nomani hoka? <sup>5</sup> Xoana, nokaiyanityoreya hoka noxanitere heko maisa nanoloitene xaokita? Hiyaiya, haiyahahrenae iraiti kakoarenae kolatyahitaha haiyanityonaeha. Xekohaseti Jesus ximarenenae, exahe Pedro hare hoka nolokahitaha haiyanityonae. <sup>6</sup> Xoana, Barnabé, natyo xoaha taitaite wahahena womanita xaokita?

<sup>7</sup> Xala koxaka sema hatya sorare bakala haxiyehahrenae xaimane hakitere nali? Exahe hatya masene nomasehare manakairehenere haxafirita uvali? Exahe hatya bowi

xanaityasehare maeranehenere habowiya totonexa tahi? (Maisa atyo xala hare nikare tyaonare.)

<sup>8</sup> Maisa exeharenae wenati tahi akiti taita xini. Moisés xaotyakira tehitija nikare irae.

<sup>9</sup> Exakere atyo Moisés xaotyakiraho kaxairatyaka:

Awa atyo bowi kanase xolatya trigo kase tyahakita hoka.

Xoana Enore ala bowi xahekola taita ahekoita xaowita? <sup>10</sup> Xoana wiyaokaka kore nikare iraeta? Aliterexe atyo wiyaokaka nikare iraeta! Exahe fititerehare, imexehititerehare xoaha atyo hakita hoka atyahahitita atyo holini haoxekakeheta.

<sup>11</sup> Xinekoni wisaonita hoka wawayekehalakatita Iraiti xomana, hanakatise xafityaka akereta. Xoana maisaiyaka nakairati exahe imiti harenai hoka waxita xiso wihatene xaimane xaowita? <sup>12</sup> Hiyaiya, haiyanae ana atyo xoalinhare xiyekane xahita atyahahitaha hoka xoana maisa atyoala wiso exahehareha xini xoalinhare waokita xihije? Xakore hoka maisa atyo xoarehare xekaka womana waokare, maisa wahowitiharetya waokowita Iraiti Waiyexe Cristo tahi hoka.

<sup>13</sup> Waiyekehalakita atyo xomana Iraexatyakalati Hanako hakiterenai ana nakairati kaxekakiterekare Iraexatyakalati Hanakotare hiyeta. Waiyekehalakita tehitija atyo xomana kirakahare fetatyaseharenai ana kaxekakiterekare holini nete efetalaha hiyeta.

<sup>14</sup> Nikareta tehitija Xekohaseti axikatya Iraiti Waiyexe xakaisaseharenai hoka exakainiha Iraiti Waiyexe hiyeta kakahinaetyaka auka.

<sup>15</sup> Hoka maisa atyo hatyo aokitere akereta notyaonita, maisa kalikini exakere naxairatita hoka maisa hatyoharenai xini naokita nomanita. Kasani atyo heko nikare notyaona naokowita nokamani kijjiya. Hoka maisaiya atyo xalahare nihalalahalini iyehitita nikare notyaonitete hiyeta. <sup>16</sup> Maisaiya atyo Iraiti Waiyexe noxakaitere hiyeta naokowiharetyoita. Hiyaiya, hatyoharenai atyo nohateni. Hoka kirakoaniya atyo notyaona maisa Iraiti Waiyexe noxakaita hoka. <sup>17</sup> Hatyo hiyeta noxaokali ximitaiya nahakita hoka xoana natyahahenaite nobakatyaki xahita. Xakore hoka nowakatyakiya atyo notyomitita hoka hatyo hateniti atyo Enore isa nomani. <sup>18</sup> Nikare hoka xoare ite nokaoxekakihena nohateni xaimane? Maxaimanahare atyo Waiyexe Iraiti noxakaita nihalalahalini kakoa, maisa xoare naxare nohateni xaimane. Hatyo nihalalahalini kakoa nahakitete atyo noxekaki.

<sup>19</sup> Natyo atyo maisa wakahare xini, maisa xalahare wakanehare xini natyo. Xakore hoka wakahare akere atyo notyaonita tyotya halitinae ana. Kahare halitinae nawenane namoka Cristo koamaniya naokowita hoka nikare notyaonita. <sup>20</sup> Nahahena atyo judeunai koni hoka judeu akereta atyo notyaonita, enawenaneha Cristo koamaniya namoka maheta. Maisa atyo Moisés xaotyakira xema notyaonare, xakore hoka judeunai koni atyo notyaohena hoka Moisés xaotyakira xema akereta atyo notyaonita, enawenaneha Cristo koamaniya namoka maheta. <sup>21</sup> Nikare tehitija majudeuneharenai koni notyaohena hoka maisa Moisés xaotyakira xema notyaonare, enawenaneha namoka maheta Cristo koamaniya. Nikare atyo notyaonita hoka maisa atyo nomatyakekonita xini Enore xaotyakira. Hiyaiya, aliterexe atyo Cristo xaotyakira xema notyaonita.

<sup>22</sup> Haiyaharenae maisa kinaterexe hatyakekone kakoa hoka enawenaneha akereta notyaonita, Cristo koamaniya enawenaneha namoka maheta. Nikare halitinae koni nahakita hoka xoare xamani tyomehenaha hoka nikareta notyomitita, haiyaharenae hekoti Cristo koamaniya namoka maheta. <sup>23</sup> Nikare notyaonita Iraiti Waiyexe noxakaitere hiyeta, wenati waiyexe nahikoa maheta.

<sup>24</sup> Xawaiyoreta atyo temati xowakehena hoka kahare tematiyenai temitere akiti kakoa, xakore hoka hatita xane hikoahetehena enahitita hoka hatyo ana taita kaxekakita xoalini hare. Hatyo temati akereta xaiyateretyoa xawenane kakoa hoka kaxekaka xomana Cristo nalitare xoalini hare waiyexe.

<sup>25</sup> Tyotya tematiyenae kaxaotyakisakiterekarenai atyo haxaotyakisakahoha howitiharexe akereta tyaonahitaha, seritihoko kaxekaka enomanaha maheta. Xakore hoka hatyoharenae atyo haxeroreta tyotita. Hoka wiso atyo Cristo aokitere akereta wisaonita

hoka seritihoko matyotenehare kaxekaka womana maheta. <sup>26</sup> Hatyo hiyeta fihi natemita imiyanaose xeta. Natyo tehitiya atyo hatya mokotyarexe mokohena hoka maxekoala-hare tyaonitere akereta notyaonita. <sup>27</sup> Noháre nakawexomokakijita mokotyatina kaka, exahe waiye nokaxaikoawita hoka noxakaihenere Iraiti Waiyexe haiyanai hiye najikinita maisa natyota nahalakisoawityakijoita maheta.

## 10

### *Xaotyakisati Enore Metalahare Nonitata*

(1 Coríntios 8.1-13; 10.14-29; 1 João 5.21)

<sup>1</sup> Nohinaeharenæ, kasani xotyaxematy naokita toahiyere wahetakomaniyerenæ nawenane, Moisés xema tyaohenahere xowakere. Tyotyaha atyo tonaha kaiminiti katyahe, exahe One Xotyaxere iyoaho hoka hatyoaho imahotyoaha. <sup>2</sup> Nikare kabatix-tyakaha hatyo kaiminiti katyahe, onexa xoaha, Moisés xaotyakiraharenai tyaonaha maheta. <sup>3</sup> Tyotyaha hatyo nakairati Isekohaliti isehenahere enomanaha kanakairaha, <sup>4</sup> tyotyaha teraha tehitiya one Isekohaliti isehenahere enomanaha. Hatyo terehenahere atyo sehalì xanetere exemaha hiyetare Isekohaliti xekane. Hatyo sehalì atyo Cristo. <sup>5</sup> Xakore hoka kahare haiyaharenæ axamaikohalinikisaha Enore, hoka hatyo hiyeta wainaha hoka ehárenaiha kaxawatyaka maharexakti nali.

### *Wenati Iniyalahare*

(1 Coríntios 3.3; 2 Coríntios 12.20-21; 1 Timóteo 1.9-10; Tiago 3.10-16)

<sup>6</sup> Tyotyaha hatyoharenai kaotyaka, hotikisa womana hoka maisa hatyoaha akereta ewaxirahare waokita womana maheta, <sup>7</sup> exahe maisa wawaiyetita enore metalahare maheta, haiyaharenai awaiyehenere enore metalahare akereta. Hiyaiya, exakere atyo Iraiti Waiyexe nexa:

“Hatyo halitinae tyokaha hoka kanakairaha, teraha maheta hoka hatyaoleta ainakoahenahitaha holikoaha maheta”.

<sup>8</sup> Hoka wisoiya atyo maisa ohironae hiye tyaonahitiera akereta wisaonita. Hiyaiya, haiyanai nikare tyaonahitaha hoka hatyo hiyeta haferakeneta 23.000-hare halitinai waini. <sup>9</sup> Hoka wisoiya atyo maisa wahasakaharetita Xekohaseti. Hiyaiya, haiyaharenæ hasakaharetyaha Enore hoka hatyo hiyeta kahare halitinae owi tyaloka hoka waini. <sup>10</sup> Awa atyo tyaonahitiera akereta xisaona. Hiyaiya, haiyaharenæ ehare hoka irae-hekoatyaha Enore tahi hoka hatyo hiyeta anjo aisarexe kaoka enomanaha hoka aisahene.

<sup>11</sup> Koxaka nikare kaotyaka wahetakomaniyerenæ ana, hotikisa maheta haiyaharenæ ana hoka maisa nikare tyaonahitaha maheta. Hatyo tahi kaxairatyaka womana hoka airihalikisa wiso maheta. Hiyaiya, kalini atyo okoi imiyanaosehena wahikoita. <sup>12</sup> Hiyeta hoka maika xala xamani kinatere tityoita aokowita hoka maika waiye kaxaikoawi hoka maisa exoita. <sup>13</sup> Xikahasakaharetyakehenaite haiyaharenæ kahasaharetyakitera akereta, xakore hoka Enore atyo maisa maotyanexe hairaine, exahe maotyanexe xiso. Xikahasakaharetyakaite hoka maisaité xiaytere xahexe xikahasakaharetyakita. Xikahasakaharetyakaite hoka Enore ite isa xomana iyateliti hoka hatyo kakaite xikinatere xisaona, xijiyaotene maheta.

<sup>14</sup> Hatyo hiyeta, nohinaeharenæ noxiyakawalinae, xisekoahena enore metalahare xawaiyetyaka nonitata. <sup>15</sup> Kalini niraehena xikakoa haiyaharenai ana xoalinhare metaharexe waiyekehalakitera hare akereta. Hoka xiso atyoite xahekohena niraehenenre xikakoa kakoa. <sup>16</sup> Xahekohena exe vinhoxa waiyexe wiseritere hiyeta. Xoana, wiserehena ala exe vinhoxa hoka maisala Cristo timalaxa xini wiserita? Exahe hatyo nakairati wikanakairehena hoka Cristo háré xaimenekola atyo. Exahe hatyo nakairati wirakakakoahena hoka maisala wikanakairita xini Cristo háré? <sup>17</sup> Wikahare xakore atyo hoka nakairati haterore atyo wikanakairita. Hatyo hiyeta hahotyalihare wisaonita. Cristo háré atyo wiso.

<sup>18</sup> Xahekohena judeunai nawenane tahi: etakehare xoalini hare efetatyakahare tyaoñiterahare Enore anere nijitereharenai atyo nikare tyaonahitaha hoka Enore koamaniya atyo tyaonahitaha.

<sup>19</sup> Exakere nomita xihye: enore metalahare, exahe nakairati kafetatyakitere ala xoalinihare tyomita? <sup>20</sup> Hatyohare atyo maisa xoare tyomare. Exakere nomita: enore metalaharenae ana kafetatyakitere atyo tihanare ana kafetatyakita, maisa Enore ana xini. Hoka kasani atyo maisa tihanare koamaniya xisaona naokare. <sup>21</sup> Enore anereya xiserehena hoka maisaiya atyo aliyakere xiserita tehitia tihanare nolone. Exahe nakairati Enore anereya xikanakairihena hoka maisaiya atyo aliyakere tihanare anere tehitia xikanakairita. <sup>22</sup> Xoana waokoawahalinikisa ala Xekohaseti waokowita? Xoana Enore niyatere xahehare ala wiyatere xaowita?

### *Mehxaikohaliti Xawaiyetyati Xoaha*

<sup>23</sup> Haiyaharenae exakere nita: “Xoare xamaniya atyo wisoma waokowita hoka wi-someniya”, nexahitaha. Há, xisomeniya, xakore hoka maisa atyo tyotya xoalinihare kaomakiterehate waiyexe xini. “Xoare xamaniya atyo wisoma waokowi hoka wi-someniya”. Xakore hoka maisa atyo tyotya xoalini hare kaomakiterehate kahinaetyare xini. <sup>24</sup> Mahaiya atyo xalahare aokiterehate tahi taita ahekoita, xakore hoka ahekohena tehitia atyoite haiyanai aokitereharenai tahi.

<sup>25</sup> Ehekoretaiya atyo xanisa tyotya kabetatyakitereharenai eteti hanakore, xakore hoka maisaiya atyo xikatyakoiyahareta. <sup>26</sup> Hiyaiya, exakere atyo Iraiti Waiyexe nexa: “Waikohekota, tyotya enakoa tyaonitereharenai atyo Xekohaseti anere”.

<sup>27</sup> Hatya matyakekonehareya noloka xiso hahanako xikanakaira maheta ekakoa hoka maika xiyane xoakowi exema hoka xiyane. Exahe nakairati mohena xahalakoa hoka kotare xikanakairene, hoka awa atyo xaxakakoahena xityakoiyaharenai hiyeta. <sup>28</sup> Hoka hatyaiya nehenaiya: “Exe nakairati atyo enore metalahare ana kafetatyaka”, nehenaiya xihye hoka awairatyo xikanakairehenene iraehenere hiyeta, exahe ityakoiyahare xoaha hiyeta tehitia. <sup>29</sup> Hiyaiya, maisa atyo hityakoiyahare hiyeta xini hoka hatya tyakoiyahare hiyeta atyo.

Xakore hoka hatyaiya axehena: “Xoanereya hoka nawenani kamahokoanetyake-hena hatya tyakoiyahare hiyeta? <sup>30</sup> Koxakaiya niraexatya Enore hiye nakairati nokanakairite tahi hoka xoanereya hoka iniyalahare kairaetyaka notahi, koxaka Enore kakoa nihalahare hoka?” nehenaiya.

<sup>31</sup> Xakore hoka xikanakairitaiya, xiserita, xoana xisomita xamaniya xoaliniharetere hoka maika xisomehena tyotya hatyoharenai kaihalaharetyaka maheta Enore kakoa.

<sup>32</sup> Maika xirihare xawenane kakoa hoka maisa xamawaiye nawenanihita judeunae, majudeuneharenae, Enore maniya nawenatyaseharenae xoaha. <sup>33</sup> Maika notyomitere akere xisoma. Hiyaiya, tyotya notyomitereharenai kakoa naihalahalinikisa naokowita tyotya halitinai hoka maisa atyo nawenani tahi taita xini nahekotita. Xakore hoka tyotya enawenaneha tahi atyo nahekotita, kaiyakehenahitaha iniyalahare nonitata maheta.

## 11

<sup>1</sup> Maika noxamotyayahasehare xisaohena. Hiyaiya, natyo tehitia atyo Cristo xamotyayahasehare.

### *Ohironae Nawenane Xahohisakoatyakalati Hanako Tahi*

<sup>2</sup> Nihalahareta xikakoa, xotita natyo hoka naotyakihenere xiso akereta xisaonita hoka. <sup>3</sup> Xakore hoka kasani exehare waiyekahala xomana naokita: Cristo atyo tyotya halitinae xahekola xahehare, exahe ohiro kaiyanenero hoka exanene atyo exahenkola xahehare tyaonita. Nikare Enore tehitia atyo Cristo xahekola xahehare tyaonita.

<sup>4</sup> Hatya halitiya talatya haseri, iraexahena xamani, xoana xakaihena xamani iraiti Enore tahi xahohisakakoati heko hoka maisaiya atyo aimsare Cristo. <sup>5</sup> Nikare tehitiyaiya hatya ohiro xakaihakahena Enore tahi, xoana iraexahena xamani xahohisakakoati heko

hoka maisaiya haseri talaita hoka maisa atyo haiyanene aiminisare. Nikareya hoka motyaiya hatya ohiro etalowakaiyehityakahalo akereta tyaonita. <sup>6</sup> Ohiroiya maisa haseri talatya aokowita hoka hasekaseya aikotya hoka ehekoreya. Hoka haihalotaiya hatalowa kaiyehetyaka, hasekase xaikotyaka kakoa hoka haseriya talatya hoka ehekoreya.

<sup>7</sup> Enaiya atyo maisa xoare maheta haseri talaita. Hiyaiya, ena atyo Enore háré akerehare kaomaka, exahe ihalahareta atyo ekakoa. Hoka ohiro kakoa atyo ena ihalahareta. <sup>8</sup> Hiyaiya, ena atyo maisa ohiro hiyeta nomakere xini, hoka ohiro atyo ena hiyeta nomakere. <sup>9</sup> Ena atyo maisa ohiro waiyakahare xini kaomaka, hoka ohiro atyo kaomaka ena waiyakahare. <sup>10</sup> Hatyo hiyeta anjonai hiyeta atyoite ohiro mohena haseri hiye imiti taose walawalere, hotikisa maheta haiyanene katyahakoreta hawenane.

<sup>11</sup> Xekohaseti koamaniya wisaonitere hiyetaiya atyo maisa aliyakere ohiro hawawahalonai tyaonita ena nonitata, exahe ena hoka maisaiya aliyakere hawawaharenai tyaonita ohiro nonitata. <sup>12</sup> Hiyaiya, ohiro atyo ena hiyeta kaotyaka. Nikareta tehitia ohiro hiyeta ena tyaona. Hatyoharenai atyo Enore nalita tyoita.

<sup>13</sup> Xahekohena xisota: xoana ehekoretala, xahohisakoatyakalati hanako ohiro iraex-  
aite Enore hiye, maisa xakore xoare haseri hiye mokare hoka? <sup>14</sup> Hiyaiya, wawenaneta  
atyo aotyakijita wiso hoka hatya ena atyo kasehokohena hoka kahiharetyakita atyo  
womana. <sup>15</sup> Xakore hoka ohiro kakoa kaihalaharetya maheta atyo esekase wahaharexe  
kaxekaka enomana. Esekase wahaharexe atyo kaxekaka enomana imiti taose walawalere  
akereta eseri talatya maheta.

<sup>16</sup> Xakore hoka hatyaiya hatyoharenai tahi iraehekoatya hoka exakere taitaiya nomi  
ihkiye: hiyaiya, maisa atyo exahe Enore koamaniya tyaoniterenai hekoti hoka haware-  
harexe xini wahekoita xahohisakakoati heko. “Hatyo terota atyo wawenane”, nomiya  
ihkiye.

### *Xekohaseti Timalaxa Neraka, Eháré Nakairatyaka Tahi*

<sup>17</sup> Kalikini naotyakihena xiso hatahi akiti kakoa hoka maisaiya atyo nihalahareta  
xikakoa. Hiyaiya, xahohisakoatyakakoahena hoka iniyalahare xisomita waiyexe xa-  
hexe. <sup>18</sup> Hiyaiya, exakerexe xakaiha nohiye haiyaharenai kirawanekakoahiterenai  
iraexatyakalati ako xahohisakoatyaka heko tahi. Hoka notyakeko hatyoharenai, kala  
aliterexe nikare xisaonita. <sup>19</sup> Nikare atyo xisomita hoka waiye atyo haware xakini  
xomokaka xiso hoka kawaiyaka maheta waiye tyaonitereharenai.

<sup>20</sup> Xihohisakoahena xikanakaira maheta nakairati Xekohaseti anere aokahitere hoka  
maisa atyo aokitere akereta xini xisaonita. <sup>21</sup> Xiyaiya, xikanakairehena maheta hoka  
xikaholawakita xinakaira kakoa hoka jikiniti kaokehene hanaka kakoa tyaonita. Exahe  
haiyanae hoka hekahitaha. <sup>22</sup> Xoana maisa xikahanere hoka hatyoakota xikanakairare,  
xiserare? Nikare atyo xisaohena hoka maisa atyo xaminisare Enore koamaniya  
tyaoniterenai, exahe maxiyehareharenae hoka xehaihalikijita. Xoare nomihenaite  
xihiye? Nihalaharehena korite xikakoa? Maisaiya atyo nihalahareta xikakoa!

<sup>23</sup> Hiyaiya, Xekohaseti atyo aotyakisa natyo hoka hatyo kakoa atyo naotyakisa xiso.  
Xekohaseti Jesus kamatawatyakehenere xatini iya nakairati <sup>24</sup> hóka iraexaty Enore  
ihkiye. Hatyo najikinita taikasetene hoka isene enomanaha hoka nexa ihiyeha: “Exe  
atyo noháre, kaxekakehenere kahawaonitaretya xiso maheta. Maika exakere xisoma  
xotyaxemaheta natyo maheta”, nexa. <sup>25</sup> Nikareta tehitia kanakairehenehajere najikinita  
iya erakakalati hoka nexa: “Exe erakakalati akore atyo waitare wenati tyaohetehene  
halitinai ana Enore naliye aimenekoita, kakaferoxatyaka atyo notimalaxi kakoa. Maika  
exe erakakalati akore xiserehenere nihatyaka xotyaxemaheta natyo”, nexa. <sup>26</sup> Hiyaiya,  
xikanakairehene hatyo nakairati exahe xiserehenere hatyo erakakalati akore ni-  
hatyaka atyo xiyakaita Xekohaseti kamane. Tyohetehene kijiyaite nikare xisaona.

<sup>27</sup> Hatyo hiyeta, xala xamaniya kanakaira nakairati Xekohaseti anere hiyeta, xoana  
tera xamani erakakalati akore hiyeta, maisa xakore waiye tyaonare hoka iniyalahareya

atyo tyoma Xekohaseti háré, timalaxa xoaha kakoa. <sup>28</sup> Hatyo hiyeta maika xikanakaire-henere nakairati, xiserehenere erakakalati akore nahitita, maika hatya xakini ahekotya hawenane tahi.

<sup>29</sup> Xala xamaniya kanakaira hatyo nakairati, tera erakakalati akore xoaha hoka motypaiya maisa Xekohaseti háré tahi xini aimenekoita aoka hoka kanakairita, terita xoaha iniyalahare haxomokaka niyahare atyo. <sup>30</sup> Hatyohare hiyeta terota kahare haiyaharenai xinekonitarenai hokakahitaha, maisa kinaterehetere tyaonareha, exahe haiyaharenai hoka koxaka wainiha.

<sup>31</sup> Wahekotya hotohareya atyo wawenane kakoa hoka maisaiya atyo Enore xoare tyomita wikakoa. <sup>32</sup> Hoka maisaiya waiye maniya wawenane wamokita hoka Xekohaseti atyo ahekoita witahi, exahe howitihare kakoa aotyakijita wiso, kasani maisa matyakekoneharenai kakoa haxawalita wikamawenekoaretyaka aokare hoka.

<sup>33</sup> Hatyo hiyeta, nohinaeharenai, xahohisakakoatyoahena Xekohaseti anere xikanakaira maheta hoka maika xatyahakakoa hoka haxawalita xikanakaira. <sup>34</sup> Hoka maika xala xamani nakita hoka maika kanakaira hahanakota. Nikareya xisaona hoka maisaiya Enore xoare tyomita xikakoa xihohisakoitere hiyeta.

Haiyanai tahi atyoite nawaiyekehala katya xomana nali nokaokihena hoka.

## 12

### *Isekohaliti Waiyexe Ijita Iyateliti Waiyoliniti Xoaha*

<sup>1</sup> Nohinaeharenai, kasani xawaiyore naokita Isekohaliti Waiyexe ijiterehare iyateliti harenai kakoa naokita. <sup>2</sup> Toahiya ximatyakekonehare xisaonitere xowakiya ene enore metalahare mairaenehare xema xisaonita, hoka haware ene Enore nonita mokita xiso, hoka exemaha xisaonita. <sup>3</sup> Hiyeta hoka waiye xasema niraini: Xala xamaniya atyo nexa: “Jesus atyo maisa waiyexe”, nexa, hoka maisaiya atyo Enore Nisekohare xini tyaonita ekakoa. Hoka nexaiya: “Jesus atyo Xekohaseti”, nexaiya atyo hoka Isekohaliti Waiyexeya atyo tyaonita ekakoa. Awaiya Enore Nisekohare tyaonita ekakoa hoka maisaiya nikareiraeta.

### *Waiyoliniti, Iyateliti Waiyexe Xoaha Enore Isa Halitini Ana*

(Romanos 12.6-8; Efésios 4.9-12)

<sup>4</sup> Haterore atyo Isekohaliti Waiyexe, xakore hoka kahare atyo hawareharexe xakini ijita iyateliti harenai. <sup>5</sup> Hawareharexe xakini atyo wahakita, xakore hoka haterore Xekohaseti ana atyo wahakita. <sup>6</sup> Hawareharexe xakini atyo iyateliti ijita hateniti niyahare, xakore hoka haterore Enore atyo ijita iyateliti, hatya ana xakini ehatene tyomaha maheta.

<sup>7</sup> Waiye atyo tyaonaha maheta Enore atyo ijita hatya ana xakini xoalini hare Isekohaliti Waiyexe nalitare kahinaetyahene maheta. <sup>8</sup> Hatya ana hoka Isekohaliti waiyexe ijita waiyoliniti, hatya ana hoka hatyo Isekohalitita ijita irihaliniti. <sup>9</sup> Hatya ana hoka Isekohaliti ijita tyakekoti, hatya ana hoka ijita iyateliti aiyatelikiheta maheta hokakiterenai. <sup>10</sup> Hatya ana atyo Isekohaliti ijita iyateliti tyoma maheta maomakahare. Hoka hatya ana atyo ijita waiyoliniti xakaihakatya maheta Enore tahi. Hatya ana atyo ijita irihaliniti waiyekehala enomana maheta hawareharexe xakini waiyolinitai tyoitereharenai Isekohaliti Waiyexe nalitare, exahe maisa Isekohaliti Waiyexe nalitare xini tyoitereharenai xoaha. Hatya ana atyo ijita iyateliti irae maheta haiyaharenai xako, hoka hatya ana atyo ijita iyateliti awaiyekehala katya maheta hatyo xakotinai. <sup>11</sup> Xakore hoka haterore atyo hoka hatyo Isekohalitita atyo tyotya hatyoharenai tyomita. Hawareharexe xakini atyo ijita waiyoliniti hatya ana haxaokala ximita.

### *Haterore Haréti Hoka Kahare Akiti Atyo*

<sup>12</sup> Hiyaiya, Cristo atyo haréti kahare kaxiyekeharexe tyaonitere akerexeta. Hoka hatyo xiyekehala enomana maheta hawareharexe xakini waiyolinitai tyoitereharenai Isekohaliti Waiyexe nalitare, exahe maisa Isekohaliti Waiyexe nalitare xini tyoitereharenai xoaha. (Wiso tyakekohatiyenai atyo Cristo háré). <sup>13</sup> Nikareta tehitia, wityotya wiso, judeunae exahe

majudeuneharenae, wakaharenai exahe mawakahareneharenae xoaha, wikabatixatyaka haterore Isekohaliti kakoa hoka Cristo háré hiye wisaona maheta. Hoka hatyo hiyeta Isekohaliti wityotya womana kaxekaka.

<sup>14</sup> Hiyaiya, haréti atyo maisa haterore nomakere xini, xakore hoka kahare xiyebarexe atyo kaomaka. <sup>15</sup> Kijitiya nexa: “Maisa atyo kahiti xini natyo. Hiyeta hoka maisa atyo haréti hiyexe xini natyo”, nexa xakoreya hoka maisa atyo haréti hiye xini mawenaneta. <sup>16</sup> Nikare tehitiyaiya tanakoakoti nexa: “Maisa xositi xini natyo. Hiyeta hoka maisa atyo haréti hiyexe xini natyo”, nexa xakoreya hoka maisaiya atyo haréti hiye xini mawenaneta. <sup>17</sup> Tyotya harétiya xositi taita hoka aliyakeriya wasemakahena? Hoka tyotya harétiya tanakoakoti taita hoka aliyakeriya waexe akahena?

<sup>18</sup> Nikare Enore tyoma haliti háré hahkorexe xikini mokene haréti hiye aokitere akereta maheta. <sup>19</sup> Harétiya hatyota jiyane makere hoka maisaiya atyo haréti tyeonita. <sup>20</sup> Nikare kahare akiti xakore hoka haterore atyo haréti.

<sup>21</sup> Hatyo hiyeta xosetiya maisa aliyakere nita kahiti hiye: “Maisa atyo naokare hiso nomani”, nita. Exahe seriti hoka maisaiya aliyakere nita kijiti hiye: “Maisa naokare hiso nomani”, nita. <sup>22</sup> Exahe haiya akiti wihiáre hiye tyeoniterere maisa kinatere tyeonare xakore hoka waokitene womana. Ekoiya awa hatyo haréti hiye maiyaterehare xiyehalitina tyeonita hoka maisaiya aliyakere wisaonare. <sup>23</sup> Hoka etakehare ekatyahakohareta waiyeterahenai womana atyo waiye wikaxaikota. Haiya akiti maisa waiyeharexe, xakore hoka waiye atyo wikaxaikotene. <sup>24</sup> Hoka haiya akiti masakare waiyehare tyeoniterere atyo maisa nikare kakaxaikotyakere. Nikare Enore tyoma haréti hoka haiya akiti maxawaiyetyakiterenai akiti masakare waiye kaxomokaka maheta.

<sup>25</sup> Hatyo hiyeta maisa atyo haréti hiyexe haware xakini xini tyeonita, xakore hoka tyotya xiyejalitinai atyo hakakoa kahinaetyakakoahitaha. <sup>26</sup> Hakitiya haréti hiye kawe hoka tyotya haiyakininai hiye tehitiyate kawe. Hakiti kakoaiya kaihalaharetyaka hoka tyotya haiyakininai tehitiya atyoite ihalahareha ehakakoaneta.

<sup>27</sup> Xasemehena, xisonae atyo Cristo háré. Hoka haxiyehare xakini atyo eháré hiye xisaonita. <sup>28</sup> Hatyo hiyeta tyakekohatiyenai ana Enore isa ehateneha makere: Iraiti kakoarenai hotohare kaxomokakaha, ihiyetare Iraiti xakaisaseharenai. Ihiyetare tyakekohatiyenai xaotyakisaseharenai. Hatyaoseta maomakahare tyomiterenai. Enajikinita etakehare wairatyarenai, kahinaetiterehare, aotyakijitreharenai, hawareharexe xakoti iraetereharenai xoaha. <sup>29</sup> Maisa atyo tyotyaha xini Iraiti kakoarenai. Maisa atyo tyotyaha Iraiti xakaisaseharenai, exahe tyakekohatiyenai xaotyakisaseharenai xini. Maisa atyo tyotya xini maomakahare nomasehareha. <sup>30</sup> Maisa atyo tyotyaha xini hokakiterenai wairatyaseharenai, hawareharexe xákore Iraiti xawaiyekahalakatyaseharenai xini. <sup>31</sup> Hatyo hiyeta xaiyateretyoahenaira iyateliti waiyexe, waiyoliniti waiyexe kaxekakehenere xomana kakoa.

Xakore hoka nahotikisaite xomana ahoti. Hatyo atyo haiyanai xahehare nawaiye.

## 13

### Xawaiyetyati

<sup>1</sup> Niraiya naokowita halitinai xako, exahe anjonae xako hoka niraeya. Xakore hoka maisaiya nawaiyetyare halitinae hoka niraeniya atyo maisa xoarehare tyomare, kamathera kamokotyakehena hoka tai, tai, nitere akereya atyo notyaonita. <sup>2</sup> Exahiya atyo nawaiyore noxakaihakaty Enore tahi, nawaiyore tyotya xoalini hare kakoa, nawaiyore tyotya metaharexe tyeoniterenae kakoa, exahe kalore notyakeko hoka hatyo hiyeta nakikiheta tyairinae. Xakore hoka maisaiya atyo halitinae nawaiyetyare hoka maisaiya atyo xoare notyomare. <sup>3</sup> Exahiya atyo tyotya noxiyehare nisa maxiyehareharenai ana, exahe noháre kakeratyaka harenai hoka maisaiya atyo halitinae nawaiyityare hoka maisaiya atyo xoare notyomare.

<sup>4</sup> Xawaiyetyati atyo mehexaikohare, waiyexehare. Xawaiyetyati atyo maisa okoawaharexe, maisa ahinityarexe, maisa jiyahaotyare. <sup>5</sup> Maisa atyo kaweraharexe, maisa

aokowiharetyoare. Maisa atyo eharehatiye, maisa tiyaharexe. <sup>6</sup> Xawaiyetyati atyo maisa ihalaharexe haiyanai nómanenai iniyalahare kakoa, xakore hoka iraiti aliterexe kakoa atyo ihalahareta. <sup>7</sup> Xawaiyetyati atyo maisa xoana xowaka amaiyaharexe wenati howithaharexe kakoa, xakore hoka heko atyo tyaonita hatyakekone kakoa, haxatyahane kakoa, hamehexaikoharene kakoa.

<sup>8</sup> Xawaiyetyati atyo maisa tyotere xini. Kahare atyo xakaihakere waiyexe, xakore hoka maisa atyoite waha xini tyaonaha. Wawaiyore atyo hahotyaliharenai xako wiraeta, xakore hoka tyotya rotitaite. Kalore atyo wirihareta, xakore hoka kamyane tehitiaite.

<sup>9</sup> Hiayiaya, maisa atyo tyotya wiriharene kakoa wawaiyorexe kaisere, Iraiti Waiyexe wiyakahakiterenai xoaha kakoa hoka maisa wawaiyorexe kaisere. <sup>10</sup> Hoka wenati waiyexe kaiserehare ite tyaohena womana hoka hatyo wimawaiyorene ite maiyareheta.

<sup>11</sup> Noxoimitatere xowaka ene niraini, nawenani, noxahekoli harenai xoima akereta tyaonita. Hoka kalikini atyo nonityohaliti hoka maisa atyo xoima nawenane akereta notyaohitita. <sup>12</sup> Kalikini wiyaiterehare atyo motya etakehare waiyakakalatikoa xoalini hare niyakotini mawaiyenai wiyaitere akereta, xakore hoka hatyo najikinita atyoite hakakoare wiyaiyene. Hoka kalikini atyo haiyakitinaeta nowaiyetene, xakore hoka hatyo najikinita atyoite hakakoare nowaiyene, kalikini Enore waiyanehare notyaonitere akereta.

<sup>13</sup> Hoka kalikini atyoite heko tyaohena tyakekoti, xatyahati, xawaiyetyati xoaha. Hoka exenai konitare masakare waiyexe atyo xawaiyetyati.

## 14

### *Hawarehare Xakoti (Atos 2.4-8; 10.45-46; 19.5-6)*

<sup>1</sup> Hatyo hiyeta xawaiyetyati atyoite xaohena. Maika xoahitiya xomana iyateliti waiyoliniti xoaha Isekoaliti Waiyexe nalitare. Exahe hoka maika xaiyateretyoa hoka Iraiti Waiyexe kakoare xisaona, hoka Enore niraene xiyakai.

<sup>2</sup> Xala xamani atyo iraehena masemakahare xako hoka iraeta atyo Enore kakoa, hoka maisa atyo halitinae kakoa xini iraeta. Hiayiaya, maisa xala hare ana waiyekahalakere. Aliterexe metaharexe tahi atyo iraeta Isekoaliti Waiyexe niyatere hiyeta.

<sup>3</sup> Hoka xala xamani atyo xakaita Enore niraene hoka halitinae hiye atyo iraeta hoka kahinaetyahitene, aihalahalinikisahitene, emaxalokisahitene harenai atyo. <sup>4</sup> Hoka xala xamani atyo masemakahare xako iraehena hoka hatyota atyo kahinaetyoawita. Hoka xala xamani atyo xakaita Enore niraene hoka hatyo atyo kahinaetita tyotya tyakekohatiyena.

<sup>5</sup> Kasani xityotya masemakaharenae xakonae xawaiyore xirae naokita. Xakore hoka xityotyaiya xawaiyore xiyakaihakatya Enore niraene hoka hatyoya atyo waiye kaiserehare. Hiayiaya, xala xamani atyo Enore niraene xakaita hoka hatyo atyo masemakahare xako iraetere xahehare nawaiye kaiserehare. Hoka ameteniya atyo hatya awaiyekahalakatya hatyo iraetere hoka ehekoreya. Nikareya atyo hoka tyotya tyakekohatiyena kakahinaetyaka enawenaneha kakoa.

<sup>6</sup> Nohinaeharenai, nokaokiya xomana hoka niraiya xikakoa masemakahare xako hoka aliyakereya nakahinaehena xiso? Maisaiya nawaiyekahalakaita xomana Enore tahi, xaotyakiye tahi, wenati tahi harenai hoka maisaiya xoare hare notyomita.

<sup>7</sup> Hiayiaya, xerati nonitata, haiyaharenai xerati niyahare kaomaka flauta, harpa xoaha. Hoka maisaiya waiye kaxaemahalikisakita hatyo xerati anerenai hoka aliyakereya hatya ana waiyekahalakehena, xoarexa xamani kaxaemahalikisakita hoka? <sup>8</sup> Nikareya sorarenai konetaxa xaemahalikisase maisa waiyore aimahalikijita hoka aliyakereya sorarenai ana waiyekahalakehena hoka memere tyaohenaha xaisakakoati ana?

<sup>9</sup> Hatyo akereta tehitiaite, aliyakereya haiyanai ana waiyekahalakehena xiraetereharenai haiyanai xako, maisa waiyekahalaka xiraexe hoka? Xiraenai atyoite motya hati firakore ana xiraetere akereta tyaona.

<sup>10</sup> Waikohekoa hakakoare atyo kahare hawareharexe makere xakotinai, xakore hoka hatyohotyaliharenai makere atyo semakakoahitaha haxakonaiha. <sup>11</sup> Xakore hoka hatyaiya iraeta hoka maisaiya waiyekehala kere noman iiniraene hoka noman atyo hatyo hahotyalihare. Exahe natyo hoka hahotyalihare atyo notyaonita enomana.

<sup>12</sup> Hatyo hiyeta kasani tyare Isekohaliti nalitare waiyoliniti xaokita xomana hoka maika xaiyateretyoahena hoka xawaiyore waiyoliniti kakoa hoka xakahinaetya tyakekohatiyenai enawenaneha kakoa. <sup>13</sup> Hatyo hiyeta hatyaiya iraeta masemakahare xako hoka maika iraexaty hoka waiyore hoka awaiyekehala katene maheta hahinaeharenae ana.

<sup>14</sup> Hiyaiya, niraexaitaiya atyo hahotyalihare xako hoka nisekohare atyo iraexaita hoka nirihalini ana atyoite maisa waiyekehala kere. <sup>15</sup> Hoka xoana ite notyaohena? Nisekohare kakoa atyoite niraexahena, xakore hoka nirihalini kakoa tehitia atyoite niraexahena. Hoka noxerehena atyoite nisekohare kakoa, xakore hoka nirihalini kakoa tehitia atyoite noxerehena.

<sup>16</sup> Hisekohare kakoa taitaiya hihalahareta Enore kakoa hoka aliyakoreya hatya tyao nita hihaliya hoka “Ehekore”, nehena, hiraexala najikinita? Xoare hexa xamani atyo hiraexaita hoka maisa atyo waiyekehala kere enomana. <sup>17</sup> Exahe xakoreya atyo Enore ana hihalaharene niraexala waiyexe xakore hoka hatyo haliti atyoite maisa ini hekoti hakahinaetita.

<sup>18</sup> Xiyahehare atyo niraeta masemakahare xakotinai hoka hatyo hiyeta nihalahareta Enore kakoa. <sup>19</sup> Xakore hoka tyakekohatiyenai atyo hohisakoahena hoka haiyasenai taita atyo niraeta, waiyekehala kere enomanaha maheta, hoka xakahinaetyakaha hoka hatyo atyo waiye. Xakore hoka waha tahi masemakahare xako nira hoka maisa waiyekehala kere enomanaha hoka maisa atyo xoare notyomare.

<sup>20</sup> Nohinaeharenai, awa atyo xoima xahekola akereta xahekota. Hoka maika atyo iniyalahare ana xoima akereta xisaona, xakore hoka maika xiyahekola inityohaliti xahekola akereta tyona. <sup>21</sup> Xiyaiya, exakere atyo Iraiti Waiyexe nanekoa xairatyoare tyao nita:

“Niraehenaite Israel hotyalinae kakoa”, nexa Xekohaseti. “Niraehena ite hahotyaliharenai kanasakota ekakoahena, hahotyaliharenai xako maniyata. Xakore hoka maisaiya xoana xowaka niraini xema tyao nita”, nexa Xekohaseti.

<sup>22</sup> Hatyo hiyeta hawareharexe xakoti kairaetyakitererehare atyo kahinaetya maheta matyakekoneharenai, hoka maisa atyo kahinaetya maheta xini tyakekohatiyenai. Hoka kairaetyakitererehare Enore niraene atyo kahinaetya maheta tyakekohatiyenai, hoka maisa atyo kahinaetya maheta xini matyakekoneharenai.

<sup>23</sup> Xahekohnaore, xihohisakoitaiya hoka xityotyaiya xiraeta masemakahare xakotinai. Hoka kaokehena atya hatyatere, exahe xoana matyakekonehare xamani hoka xoana maisaiyaka xihatyaharene aokahitaha. <sup>24</sup> Xakore hoka xityotyaiya atyo xiyakaita Enore niraene hoka isoahenaiya nali matyakekonehare exahe hatyatere hoka semehenaiya xiyakaini hoka halakisaiya iniyalahare hámome. Hoka hatyo semehenere hiyetai waiyexe maniya tyao heta. <sup>25</sup> Hoka exahekolanai metaharexenaiya kahotikisaka, hoka hatyaosetaiya waikoa tyoka hakaolise kakoa hoka awaiyehena Enore hoka nehenaiya: “Aliterexe atyo Enore tyao nita xinekoni”, nexaiya.

#### *Maika Xirihare Xisaona Xahohisakoatyakalati Hanako*

<sup>26</sup> Nohinaeharenai, exakere atyo nira naokowita: Xihohisakoahena atyo xahohisakoatyakalati hanako hoka hatya xihinaehare atyo xera aokowita. Hatya hoka xoalini hare kakoa aotyakisa aokowita. Hatya hoka Enore hotikihene tahi xakai aokowita. Hatya hoka iraiti masemakahare xakoti xakai aokowita. Exahe hatya hoka awaiyekehala kere aokowita hatyo Iraiti xakoti masemakahare xakaihene tahi. Xirihare xisomehenere kakoa xakahinaetya tyakekohatiyenai maheta. <sup>27</sup> Maika xinekonitare iraehena masemakahare xakoti hoka maika hinama xamani, xoana hanama taita irae, maika hatya iraehenere najikinita, hatya irae xoaha, hoka hatya awaiyekehala kere hatyo kairaetyakehenerenai. <sup>28</sup> Hoka maisaiya atyo xalahare aka awaiyekehala katene

maheta hoka maika kotare ximairaenehare, hoka maika xiraehena hoka xikakoita exahe Enore xoaha kakoa taita.

<sup>29</sup> Hoka hinamahare, hanamahareya atyo Enore niraene kakoareha hoka hatyonai atyoite iraehenaha, hoka haiyanai atyoite semaxemahenaha iniraeneha, xoana waiyexe xamani, maisa xamani. <sup>30</sup> Hatya tyokitere hiyeya Enore hairaene xakaisaka aoka hoka maika iraetere mema tyaona. <sup>31</sup> Hiyaiya, waiyehenaiya atyo xityotya xiyakai Enore niraene, xakore hoka hatya xakiniya xirae, tyotyaha waiyoreha hoka ihalahareha maheta. <sup>32</sup> Maika xala xamani Enore niraene xakaita hoka maika waiye kaxaikoawi hoka waiye Enore niraene xakai. <sup>33</sup> Hiyaiya, Enore atyo aoka wiso haomana maisa kaxiyehare wamoka maheta xini wawenane, xakore hoka waiye atyo wisaona maheta.

Maika haiyaharenai tyakekohatiyenai hotyalinai tyaonitere akereta xisaohena. <sup>34</sup> Maika ohironai mema tyaonaha xahohisakakoati xowaka. Hiyaiya, maisa atyo xala hare iraeha aokare. Hiyaiya, exakere atyo judeunai xaotyakisakaho nexa: maisaiya atyo ohironai wakatyati niyahare kaxomokakahitaha, nexa. <sup>35</sup> Maika xoare tahi xamani waiyekhalaka semaha aokowitzaha hoka maika hahanaha nali axaha haiyaneneha. Hiyaiya, kahaiharetakere atyo ohiro iraeta xahohisakakoati heko.

<sup>36</sup> Xoana Enore niraene xinalita kaotyaka xaokita? Xoana xomanere ala taita kaotyaka? <sup>37</sup> Hiyaiya atyo Enore niraene xakaisasehare aokowita, exahe xoana Iseko-haliti nalitare waiyoliniti kakoare aokowita hoka waiyekhalakaiya atyo enomana exe naxairitere. Hiyaiya, exe atyo Xekohaseti xaotyakira.

<sup>38</sup> Hoka hatyaiya atyo maisa semaxematya aokowita exeharenai hoka maika xahalaisene, hoka awa atyo xasemaxemahena iniraene. <sup>39</sup> Hoka maika nikare xisaona, nohinaeharenae. Maika xaiyateretyoa xiyakaini Enore niraene kakoa. Hoka awa atyo hatya masemakahare xako iraeterehare xamahokoanetya. <sup>40</sup> Hatyo hiyeta maika tyotya xisomehena waiyexe, ehekorexe xoaha taita.

## 15

### Cristo Atyo Waini Iniyalahare Wománe Hiyeta

(Romanos 6.23; 8.1-10; 2 Coríntios 5.20-21; Efésios 1.7; 2.8-9)

<sup>1</sup> Nohinaeharenae, kasani xotyaxematyá Waiyexe Iraiti noxakaihenere xihiye naokita. Hatyo iraiti atyo xaoka xomana, exahe heko xityakekota. <sup>2</sup> Iraiti noxakaihenere xihiye atyo Waiyexe Iraiti. Hoka hatyo Waiyexe Iraiti hiyeta atyo xikaiyakeheta, hekotaiya xikinatere xisaona exema maniya hoka. Hoka ameteniya atyo xityakekohenere maisa xoarehare tyomita xomana hoka.

<sup>3</sup> Tyotya kaxakaisakenere nohiye atyo noxakai xihiye. Hatyo atyo masakare waiye kaiserehare: Cristo atyo waini iniyalahare wománe hiyeta, kaxairatyakehenere Iraiti Waiyexe nanekoa akereta. <sup>4</sup> Waini hoka kaxafityaka, hatyaoseta ehanamakini ferakene hiye kaseheta, kaxairatyakehenere Iraiti Waiyexe nanekoa akereta. <sup>5</sup> Kaseheta hoka kaotyakeheta Pedro ana, hatyaoseta kaotyakehetehitiya 12-hare hairaene kakoarenai ana. <sup>6</sup> Hatyaoseta kaotyakehetehitiya 500-hare jiyare exaotyakira xema tyaoniterahenae ana. Hekota atyo hatyonai konitare haiyaharenae kasetata hoka haiyaharenae atyo koxaka waini. <sup>7</sup> Hatyo najikinita kaotyakehetehitiya Tiago ana, hatyaoseta kaotyakehetehitiya tyotya hairaene kakoarenai ana.

<sup>8</sup> Hatyaoseta kaotyakehetehenere enomanaha najikinita, miyanitiye kaotyaka nonmani, etakehare hatya hawenane nahitita tyaona hoka komita wainitere akereta notyaona exema. <sup>9</sup> Hiyaiya, natyo atyo iraiti kakoarenai katyahakohare, komitaene atyo maisa iraiti kakoare nokaexaretyaki naokare. Hiyaiya, Enore xema tyaoniterenai xahita atyo noxalijinhareta ene. <sup>10</sup> Xakore hoka Enore nawaiyexehare hiyeta atyo exakere notyaona, hoka hatyo waiyexehaliti atyo maisa maomaxetahare xini isa nomani. Xakore hoka nahakita atyo tyotya iraiti kakoarenai xahexe. Xakore hoka maisa atyo natyo xini hatyoharenai notyoma, hoka Enore nawaiyexehare atyo nikare ahakakisa natyo. <sup>11</sup> Hatyo hiyeta xoana natyo xamani, xoana hatyoaha xamani, xakaiha xihiye

hoka hatyohare atyo maisa xoanerenai xini. Xakore hoka aliterexe atyo hatyo tahi makere wiyakaihenere xihye, hoka hatyohare atyo xityakeko, hoka hatyo atyo waiye kaiserehare.

### *Wikaseneheta Tahi*

(1 Coríntios 15:35-58; 2 Coríntios 4:14; 1 Tessalonicenses 4:13-18; Apocalipse 20:4)

<sup>12</sup> Hoka wiyakaitere iraiti xihye atyo Cristo kaseneheta tahi hoka xoanere hoka haiyanai xinekonitarenai kamatinaiya atyo maisa kasehitita aokahitaha? <sup>13</sup> Hoka maisaiya atyo kamatinai kasehetere hoka nikare atyoala hoka Cristo maisa kasehitita. <sup>14</sup> Hoka maisaiya atyo Cristo kasehitita hoka maisaiya atyo xoarehare wiyaka, exahe xiso hoka maisaiya atyo xoarehare xityakekota. <sup>15</sup> Exe tehitiya: nikareya hoka wamaoseraitaiya atyo Enore tahi. Hiyaiya, hatyo atyo ekasekiheta Cristo waoka. Hoka aliterexeya atyo maisa kamatinai kasehitita hoka Enore atyo maisa ekasekihita Cristo. <sup>16</sup> Hiyaiya, maisa atyo kamatinai kasehetere hoka Cristo tehitiya atyo maisa kasehitita. <sup>17</sup> Hoka maisaiya atyo Cristo kasehitita hoka xityakekoniya maisa xoarehare tyomare, hoka hektaiya atyo xiyaneta ximawenekoaretyakaho iniyalahare xománenai kakoa. <sup>18</sup> Hoka nikare atyoala hoka Cristo tyakeko hoka wainihenerenai atyoala mitita. <sup>19</sup> Kalini niyahare taitaiya wisaona Cristo koamaniya hoka wiso atyo tyotya halitinai koniyata maihalahareharenai kaiserehare.

<sup>20</sup> Hoka aliterexe atyo Cristo kaseheta hoka hatyo akereta tehitiaite kamatinai kaseheta. <sup>21</sup> Hiyaiya, heterore haliti hiyeta atyo kaotyaka kamati hoka nikareta tehitiya hatya haliti hiyeta kaotyaka kasetyatiheta. <sup>22</sup> Hiyaiya, tyotyaha atyo wainiha tyaonahitere Adão xema hiyeta. Nikareta tehitiaite tyotyaha kasehenahitaha tyaonahitere Cristo xema hiyeta. <sup>23</sup> Hatya xakini ite kamatinae kaseheta. Cristo atyo koxaka kaseheta. Hoka Cristo tyohetehenere xowakaite exema maniya tyaoniterenae kasehetehena. <sup>24</sup> Hatyaosetaite kaotyakehena miyanitiye ferakene. Cristo ite mawenekoaretya tyotya tihanarenai xekohaseti tyaoniterenai, kalorexenai, iyateliti kakoarenai xoaha, hoka waikohe ite iseheta Hanexe Enore ana. <sup>25</sup> Hiyaiya, Cristo atyoite kalorexe tyaona, Enore jiyahaotya enahalakoaharenai tyotya hoka ikiji katyahe mohenere kijiya. <sup>26</sup> Miyanitiye ahalakoahaliti atyoite kajiyahaotyaka atyo hatyo kamati.

<sup>27</sup> Hiyaiya, exakere atyo Iraiti Waiyexe nexa:  
“Enore atyo tyotya xoalini harenai ikiji katyahe moka”, nexa.

Hoka hatyo iraitinai “tyotya xoalini harenai”, nehenere atyo maisa Enore xaokaka xini iraeta. Hiyaiya, hatyo atyo Cristo kalorexe moka hoka ekatyahe tyotya mokita. <sup>28</sup> Hoka tyotyaitaite Cristo kaxaikone taitehena hoka hatyo Ityanitaite Enore kalorexene katyahe mokoawihena. Hiyaiya, hatyo atyo Cristo kalorexe moka hoka ekatyahe tyotya moka. Hatyaosetaite Enore tyotya xoalini harenai kaxaikohena.

<sup>29</sup> Hoka kalikini atyoite etakehare halitinai batixatyoiterenai kamatinai ana naxehena: maisaiya kamatinai kasehetere hoka xoanere hoka hatyo halitinai batixatyoawitaha enomanaha? <sup>30</sup> Exahe wiso, xoanere ala hoka ferakiti nihatayaka kahenehare wisaonita, maisaiya kamatinai kasehitita hoka? <sup>31</sup> Nohinaeharenai, ferakiti nihatayaka komita nokaxemereharetyakita. Exakere atyo niraeta nihalaharetere xikakoa, Wiyekohase Jesus Cristo koamaniya wisaonitere hiyeta. <sup>32</sup> Naiyateretyoa ali Éfeso nali nahalakoiharenae xahita, kirakahare xahita kaxaiyateretyoakitere akereta. Hatyoharenai atyo notyoma halitinai waiyakahare taita, hoka xoarehare ala hatyohare kakoa notyoma? Aliterexeya atyo kamatinai maisa kasehetere hoka maika iraiti nehenere akereta wisaona: “Nika wikanakaira, wisera. Hiyaiya, makani atyoite wiwainihena”, nitere akereta.

<sup>33</sup> Awa atyo ximaotikone. “Iniyalahare wenati atyo aiyalaharetita waiyexe wenati”. <sup>34</sup> Xisaohetehena xawenane waiyexe, ehekorexe xema, hoka xahalakihena iniyalahare xománe. Exakere niraeta, nehaihalikisa xiso maheta: hiyaiya, haiyaharenai xinekonitarenai atyo maisa Enore koamaniya tyaonareha.

*Tyakekohatiyena Kaseneheta**(1 Coríntios 15:12-23; 2 Coríntios 4:14; 1 Tessalonicenses 4:13-18; Apocalipse 20:4)*

<sup>35</sup> Xala xamaniya axehena: “Aliyakerexe kamatinae kasehitita? Aliyakerexe ite eháreha kaotyakehetehena?” nehenahaiya.

<sup>36</sup> Maotikonitina! Xafehena atyo hanakatise waikohekao hoka wainiya atyo hoka hikoa. <sup>37</sup> Hatyo kaxafityakehenere atyo ese taita, xoana trigose xamani, xoana hatetere hanakatise xamani, hoka maisa atyoite ekate koxaka memere tyanonitere xini kaxafityakehenere. <sup>38</sup> Enore atyo hatyo hananetise aliyakerexese xamani tyomene aokowita hoka tyomitene. Hiyeta hoka hikoahena hoka hawareharexe makere tyonita ekatenai.

<sup>39</sup> Exahe iyawinisoarenai hoka maisa hakakoa netexeha xini: halitinai atyo hawareharexe nete, kirakaharenai atyo hawareharexe nete, kotehalanai atyo hawareharexe nete, exahe kohasenai hoka hawareharexe nete.

<sup>40</sup> Enokoarenai atyo kahá-rexeha tehituya, exahe waikohekoarenai hoka kahárexeha. Hahekorexe nawaiyehare atyo enokoarenai háre, hoka hahekoharexe nawaiyehare atyo waikohekoarenai háre. <sup>41</sup> Hiyaiya, kamae atyo haxaokanala terota aokanatita, exahe kaimare hoka hahekorexe aokanatita, exahe xoresenae hoka hahekorexe aokanatitaha. Hoka hatyo xoresenaita hawareharexe makere aokanaitaha.

<sup>42</sup> Hiyaiya, nikareta atyoite kamatinai kaseheta. Eháreha atyo kaxafityakehenere hoka ekamane atyo. Xakore hoka kasehetehena atyoite hoka maisaiya atyo wainihitita.

<sup>43</sup> Kaxafityakehenere xowaka atyo ewaxirahare, maisa kinaterexe. Xakore hoka kasehetehenere xowaka atyoite waiyehareheta, kinaterite. <sup>44</sup> Kaxafityakehenere xowaka atyo eháre nitini kaxafityakita. Xakore hoka kasehetehenere xowaka atyoite eháre nitini ako tyahetehena inisekohare. Hiyaiya, eháre nitini akaiya hoka eháre nisekohare nitini aka tehituya atyo.

<sup>45</sup> Hiyaiya, Iraiti Waiyexe atyo nexa:

Hetatiyehare haliti Adão atyo wenati kakoare terota.

Xakore hoka miyanitiyehare Adão atyo Isekohaliti hoka ijita atyo wenati halitinai ana.

<sup>46</sup> Maisa atyo isekohaliti nitini hotohare xini tyoita, xakore hoka haréti nitini hotohare atyo. Enajikinita atyo tyoita isekohaliti nitini. <sup>47</sup> Hetatiyehare Adão atyo kaomaka waikohekoatare waikohese hiyeta. Hoka ihiyetare atyo enokoata tyoa.

<sup>48</sup> Waikohekao anerenai atyo motya etake waikohe hiyeta kaomakehenere akereta tyaonahitaha. Hoka enokoa anerenai atyo motya etake enokoata tyohenere akereta tyaonahitaha. <sup>49</sup> Hiyaiya, nikareta tyare atyo waikohekoata kaomakehenere haliti harero akereta wisaonita kalikini hoka nikareta tehituyaite Haliti enokoatare harero akereta wisaona.

<sup>50</sup> Nohinaeharenai, kasani exakere terota niraehitiya xihiyehare naokowita: maisaiya aliyakere eteti, timalati xoaha nomakere xane tyaonita enokoa, maisaiya aliyakere wihiáre wainiterehare aliyakere makamanehare tyaonita.

<sup>51</sup> Waiye xasemehena exe metaharexe tahi: maisaite wityotya xini wiwaini, xakore hoka ehárehena rotitaite wityotya hawareharexe wikaxomokaka. <sup>52</sup> Haxerore wamaojihakoitere akeretaite nikare wisaona. Exowakaite koneta kaimaharehena. Kaimaharehenaite hoka kamatinai kasehetehena, makamaneharenai akereta hoka wityotyaite hawareharexe wikaxomokaka. <sup>53</sup> Hiyaiya, haréti wainiterehare atyoite kakaimatyakehena makamanehare kakoa hoka etakehare wainihenerehare atyoite kaxaisoakisakehena etakehare makamanehare kakoa. <sup>54</sup> Nikare ite hatyo haréti wainiterehare kakaimatyaka makamanehare kakoa, etakehare wainihenerehare ite kaxaisoakisaka makamanehare ako hoka kaotyakehenaita Iraiti Waiyexe nitere akereta:

Kamati atyo kamawenekoaretyaka, kajiyahaotyaka kaiserehare! nitere akereta.

<sup>55</sup> “Kamati, aliyo hijiyahaotyakala? Aliyo hiyayaterekisakala?”

<sup>56</sup> Iniyalahare hiyeta kamati kinatere tyaonita hoka aijita. Hatyo iniyalahare atyo hayatere kaokita Xaotyakiyaho hiyeta. <sup>57</sup> Xakore hoka wihalahare Enore kakoa, hatyo atyo isa womana jiyahaotyati, Wiyekohase Jesus Cristo hiyeta.

<sup>58</sup> Hatyo hiyeta, nohinaeharenai, maika xikinatere xisaona xawenane Xekohaseti koamaniya kakoa. Maika heko xahata mene Xekohaseti hatene. Hiyaiya, tyotya xisomitereharenai Xekohaseti hatene atyoite maisa metita xini.

## 16

### *Olo Xahohisakoatyaka Tyakekohatiyenae Maoloxaharenae Ana*

<sup>1</sup> Hoka olo kakoa xakahinaetya xaokowitere Enore anere hotyalinai Judéia nali tyeoniterenai tahi atyo: maika xisomehena niraehenere tyakekohatiyenai Galácia nali tyeoniterenai hiye akereta. <sup>2</sup> Maika domingo nihatyaka haware xatyakaisa inira olo, xikaoloxitere hakakoaneta. Nikarite hoka maisa xoare maheta olo xahohisakoatita nali nokaokihenere xowaka. <sup>3</sup> Ite nokaokihena xomana hoka xalanae xamani olo kolatyase xaoka hoka baberane notyoma enomanaha hoka olo kolatyaha Jerusalém yerenae ana. <sup>4</sup> Noxaniya atyo exemaha xaoka hoka noxani hoka tyoaha noximi.

#### *Paulo Xahekola*

<sup>5</sup> Nokaokaite xomana, Macedônia nali nojiyehenere najikinita. Hiyaiya, hatyoaho atyuite notyoa. <sup>6</sup> Xoana xamanite hoka ininai notyaona xihaliya, tihakiti tyotehetehenere kijiya. Nikarite hoka xakahinaetya natyo noxani naokowitere nali noxanini kakoa. <sup>7</sup> Hiyaiya, maisa atyo nojiyani kakoa taita xini nowaiya xiso naokowita. Xekohaseti xaokalitaiya atyo hoka wahaiya atyo notyaona xihaliya.

<sup>8</sup> Xakore hoka ali Éfeso nalita notyaona naokowi Pentecostes ferakene kijiya. <sup>9</sup> Hiyaiya, nokaoki kalore, waiyexe nohateni ali. Kahare xakore atyo haiyaharenai kahalakoahareta nokakoi hoka.

<sup>10</sup> Maika Timóteo kaokehena nali hoka waiye xamokene. Hiyaiya, Timóteo atyo hakita Xekohaseti hatene nahakitere akereta. <sup>11</sup> Awa atyo ximaxaiminirehenene. Xakore hoka maika xakahinaetene ehaikoahaneheta kakoa hoka ali xeta mehexaikohare aiheta. Hiyaiya, ali natyahita ekaokeneheta xahita haiyaharenae wihinaeharenae kakoa.

<sup>12</sup> Koxaka wihinaehare Apolo hiye kahareki niraeta, tyoa waiya maheta xiso haiyaharenai wihinaeharenae kakoa. Xakore hoka maisa kalikini tyoa aokowita. Haxowakaite tyoa aokowihena hoka tyoa.

#### *Maika Heko Xityakekone Xema Xisaona*

*(1 Coríntios 15.58; Gálatas 6.9-10; Efésios 6.10-18)*

<sup>13</sup> Maika xirihare xawenane kakoa, xikinatere xisaona xityakekone kakoa. Maika ximamairanehare, xikinatere xisaona. <sup>14</sup> Maika tyotya xihatene xisomehena xiyawaiyera kakoa.

<sup>15</sup> Kala xiyaita Estéfanas, exanityo, ityaninai harenai. Hatyonae hotohare atyo tyakekohatiyenai tyeonaha Grécia koa nali. Hoka Enore anere hotyalinai kahinaetyahitaha. <sup>16</sup> Hatyo hiyeta, nohinaeharenai, maika xasemehena Estéfanas niraene, ihinaeharenae hakiterenae ekakoa xoaha niraene.

<sup>17</sup> Estéfanas, Fortunato, Acáico xoaha kaoka nomani hoka aihalahalinikisaha natyo. Hiyaiya, tyomaha atyo ximakane xománe niyahare maheta ximaomanehenerehare.

<sup>18</sup> Kalore aihalahalinikisaha natyo, hoka kala aihalahalinikisaha tehitiya xiso naoka. Nikare tyeoniteraharenai atyo waiye xaixakeretyaka.

<sup>19</sup> Kahare tyakekohatiyenae Ásia koa tyeoniterenae noxakaihetahene xihije aokaha. Áquila, Priscila xoaha, exahe ehanako haiyaharenae tyakekohatiyenae hohisakoiterenai noxakaihetahene xihije aokaha. <sup>20</sup> Tyotya wihinaeharenae ali tyeoniterenae noxakaihetahene xihije aokaha.

Maika xikatyawaxakaoahena hoka xasohitanakolisakakoa.

<sup>21</sup> Natyo Paulo naxairaty a nokahe kakoa: kasani waiye xisaona naokita.

<sup>22</sup> Maika xala xamani maisa awaiyetyare Xekohaseti hoka hatyo atyoite maisa waiye kaxomokakita.

“Maranata”: “Hisohena, Xekohaseti!”

<sup>23</sup> Maika Wiyekohase Jesus Cristo nawaiyexehare tyaona xikakoa. <sup>24</sup> Kasani nox-awaiyiri akereta xisaona naokita, Jesus Cristo koamaniya wisaonitere hiyeta.

## 2 Coríntios

<sup>1</sup> Natyo atyo Paulo, Jesus Cristo niraene kakoare Enore xaokalita, naxairatya exe babera haxawalita wihinaehare Timóteo kakoa, wenakalati Corinto nali tyaooniterenae tyakekohatiyenae ana, exahe tyotya Enore koamaniya tyaooniterenae Grécia naliyerenae xoaha ana. <sup>2</sup> Kasani Wexe Enore, Wiyekohase Jesus Cristo xoaha nawaiyexehare, mehexaikoharene xoaha akereta xisaona naokita.

### *Paulo Ihalahare Enore Kakoa*

<sup>3</sup> Maika kaihalaharetyaka Wiyekohase Jesus Cristo Nexe kakoa. Hatyo atyo waiyexehare, hatyo Enore atyo tyotya halitinai kahinaetita.

<sup>4</sup> Hatyo atyo kahinaetita wiso tyotya howitiharetereharenai womana hiye, wakahinaetya maheta howitiharetere womana akereta haiyanai ana howitihareterehare hiye maheta. Hoka wakahinaetita atyo haiyaharenai, Enore kahinaehenere wiso akereta.

<sup>5</sup> Hiyaiya, Cristo kaxemakawatikisakehenere akereta atyo wikaxomokaka hoka nikareta tehitiyaite ihiyeta kalore wikakahinaetyaka. <sup>6</sup> Kirakoane atyo wisaonita, wakahinaetya, waiye maniya wamoheta xiso maheta. Wikakahinaetyakita atyo hoka xiso tehitiya atyo xikakahinaetyakita, exahe iyateliti kaxekakita xomana heko xisaona maheta howitihare xikaxomokakitereharenai kakoa wiso akereta.

<sup>7</sup> Hatyo hiyeta wityakekota atyo xiso xawenane kakoa. Hiyaiya, iniyalahare atyo xikaxomokakita wikaxomokakitere akereta, exahe xikakahinaetyakita Enore kahinaetitere wiso akereta.

<sup>8</sup> Nohinaeharenai, kasani xasema howitihare wawenane tyaochenere Ásia koa naliye waokita. Kalore atyo iniyalahare wikaxomokaka, exahe howitihare. Maisa atyo watyahaharetyoare wikikisoaneheta wikasene kakoa xahita nalita. <sup>9</sup> Kaxaisakehenereharenai akereta wikehexoawi. Nikare atyo wikaxomokaka maisa wisota wityakekoawi maheta xini, xakore hoka Enore wityakeko maheta. Hatyo atyo ekasekihitita kamatinai. <sup>10</sup> Hatyo atyo iyeheta wiso, exahe iyehetaite wiso kaheneharexenai wikamane nonitata. Hatyo hiyeta exahita atyo watyahita, kasani heko iyeheta mene wiso maheta.

<sup>11</sup> Hoka xiso atyoite xakahinaetya wiso xiraexala kakoa. Nikareya kahare haliti iraexatyawomanahoka xiraexala hiyetaiya Enore kahinaetya wiso hoka hatyo hiyetaiya kahare halitinae ihalahare Enore kakoa.

### *Paulo Hahekore Haxahekola Moka*

<sup>12</sup> Exehare hiyeta atyo wihalahareta: Wiyahekola atyo xakaita wihiye hoka wawenane xikakoa atyo Enore isehenere waiyexe, aliterexe xoaha akereta tyaonita, enawaiyexehare niyatere akereta, hoka maisa atyo halitinai nawaiyore akereta xini.

<sup>13</sup> Hiyaiya, waxairatya atyo xomana etakehare xakaixaretya hoka waiyekehalakiterehare xomana taita. Hoka kasani tyotya waiyekehalaka xomana naokita. <sup>14</sup> Koxaka holini waiyekehalaka xomana. Kasani tyotya waiyekehalaka xomana hoka Wiyekohase Jesus haikoahetehenere xowaka xihalahare wikakoa, exahe wiso wihalaharetere xikakoa akereta.

<sup>15</sup> Ehekoreta ene nika hetatita notyoa nowaiyeheta xiso hoka exahexe xikakahinaetyaka naokita. <sup>16</sup> Hoka noxahekoli hiye ene atyo hoka nojiyehena Macedônia xeta hoka nowaiya naokowita xiso, exahe nohaikoahaniheta xoaha kakoa, hoka xakahinaetya natyo noxanini Judéia koa nali xeta maheta ene.

<sup>17</sup> Nikare ala nahekotya hoka xoana namaoseratyare ala notyaona? Xoana nohateni tahi ala nahekotya etakehare maxihataye haxowakita, “Há”, nitere, exahe “Maiha”, nitere akereta? <sup>18</sup> Enore mamaoseralahare nexare kakoa niraeta, maisa namaoseraita. Niraehenere xihiyemaisa, “Há”, nomita, exahe “Maiha”, nomita haxowakita. <sup>19</sup> Hiyaiya, natyo, Silas, Timóteo xoaha wiyakaita xihiyemaisa, “Há”, nomita, exahe “Maiha”, nomita haxowakita, “há”, nere, exahe “maiha”, nere xini. Xakore hoka hatyo atyo Enore “há”, niterehare.

<sup>20</sup> Hiyaiya, hatyo “há”, nitere atyo Enore tyotya xoalini harenai isa aokowihenere. Hatyo hiyeta, “nikare waokita”, wita, Jesus Cristo hiyeta kaihalaharetyaka maheta Enore kakoa. <sup>21</sup> Hiyaiya, Enore atyo awaiyekehala kaita womana wawenane, exahe xawenane xoaha Cristo koamaniya. Hiyaiya, Enoreta atyo haware moka wiso haomanita maheta. <sup>22</sup> Wiyekohase tyare hoka moka wihije haferoxa, hoka moka Isekohaliti Waiyexe wimahiyase hiye hotikisa maheta womana tyotya xoalinihare haxekane aokitere.

<sup>23</sup> Kasani atyo maisa xamaikohareta maheta maisa wenakalati Corinto nali noxanita. Maisa namaoseraita xini. Nakawijita atyo Enore xakai maheta notahi. Hiyaiya, waiyoreta atyo noxahekoli kakoa. <sup>24</sup> Maisa atyo waiyateretyoita xini xityakeko maheta. Hiyaiya, koxaka atyo xikinatere xisaonita xityakekone kakoa. Xakore hoka wakahinaetita atyo xiso xihalahare xisaona maheta.

## 2

<sup>1</sup> Nahekota hoka maisa notyoa nowaiyeheta xiso hoka nexamaikohalinikisa xiso naokowihitita. <sup>2</sup> Hiyaiya, nexamaikohalinikijita taitaiya xiso hoka xalaiya aihalahaliniki-hena natyo? Xiso nexamaikohalinikijiterenai taitaiya atyo xaihalahalinikisa natyo.

<sup>3</sup> Hatyo hiyeta naxairatyta etake babera, kasani maisa notyoa hoka nokaxexamaikohalinikisaki naokare etakehare halitinai noxaihalahalinikisasenai mahetarenai hiyeta. Hiyaiya, aliterexe ala naokita. Nihalaharehena ala hoka xiso tehitia xihalahareta naoka.

<sup>4</sup> Hatyo babera naxairatyta kalore nomawaiyehalini, noxamaikohalinikisa maheta xini xiso naxairatyta xomana. Xityotya nawaiyetita, kasani hatyohare kakoa xawaiyore naokita hoka.

*Kamaotyanityakeheta Iniyalahare Hoka Kakehexaharetyoakeheta Maheta*

<sup>5</sup> Hoka hatyaiya examaikohalinikisa hatya haliti hoka maisa atyo natyo xini nikare mokita, xakore hoka xiso atyo, exahe maisa xityotya xini hoka haiyanai ana. Exakere atyo naxairatyta hoka maisa atyo nawatoxaharitita xini xiso. <sup>6</sup> Xakore hoka maika xityakekohena koxaka tyotyaha iniyalahare mohenaherene. <sup>7</sup> Hoka maika kalikini xawaiyehetehenene hoka xaihalahalinikihetehenene hoka maisa kalore amaikohare hoka ahekokoaita maheta. <sup>8</sup> Hoka hatyo hiyeta niraeta xikakoa hoka maika waiye xamokene hoka xahotikisa enomana xiyawaiyerene.

<sup>9</sup> Hatyo hiyeta tehitia etake babera naxairatyta. Nahasakaharetya xiso maheta hoka nawaiyore maheta, xoana ximemere xamanila ala xisaonita niraini xasemaxematya maheta.

<sup>10</sup> Hatya nómane iniyalahare atyo ximaotyanehetehena hoka natyo tehitia atyo nomaotyanihititene. Aliterexeya iniyalahare tyomitahoka nomaotyaniheteney. Hoka xihiyeta atyo nikare notyaonita hoka hatyoharenai atyo notyomitahoka haotita.

<sup>11</sup> Nomaotyanihititene atyo, maisa Ahalakoahaliti jiyahaotya wiso naokare hoka. Hiyaiya, exahekola atyo waiyekohala kaita womana.

*Paulo Mawaiyeharene Trôade Nali*

<sup>12</sup> Nokaokihenere wenakalati Trôade nali xowaka noxakai Waiyexe Iraiti Cristo tahi hoka nowaiya Xekohaseti memere hateniti mohenere nomani hatyo wenakalati nali.

<sup>13</sup> Xakore hoka kalore nomawaiyehareta, maisa wihinaehare Tito nowaiyita nali hoka. Hatyo hiyeta nojinahenahitene hoka noxani Macedônia koa nali.

*Jiyahaotyati Cristo Hiyeta*

<sup>14</sup> Xakore hoka nihalahareta atyo Enore kakoa. Hiyaiya, hahotalita wisaonitere Enore Kalorexe Aohenere kakoa hiyeta atyo Enore nolokita wiso exolatyaharenae akereta, Enore Kalorexe Aohenere jiyahao akahenere xanetere xema. Airaxero nexe xaorettere hakakoare akereta atyo Enore mokita wiso, hoka Enore Kalorexe Aohenere tahi tyotya halitinai sema maheta. <sup>15</sup> Hiyaiya, wiso atyo etakehare incenso nexe airaxexe Enore Kalorexe Aohenere ijitere Enore ana akerexe, hoka xaorettere waiyexe maniya tyaohititreharenai koni, exahe iniyalahare maniya tyaoniterenai koni xoaha akereta. <sup>16</sup> Hoka

iniyalahare maniya tyeoniterenai ana atyo exeti katawanexe wikaexeta, hoka waiyexe maniya tyaohititerenai ana atyo airaxero waiyexe nexexe wenati ijiterehare wikaexeta. Hatyo hiyeta xalaiya waiyorexe hoka exehare hateniti tyomehena? <sup>17</sup> Hiyaiya, wiso atyo maisa haiyaharenai Enore niraene xakaihenaha hoka motya etakehare xiyealiti betetiterehare akereta xini wisaonita. Xakore hoka Enore atyo axikatya wiso hoka hatyo hiyeta aliterexe wiraeta enahalakoita, Enore Kalorexe Aohenere ana wahakitere hiyeta.

## 3

*Waitare Wenati Aho*

<sup>1</sup> Exakere ala wiraehena hoka xoana wisotala waexakeretyoita? Xoana, haiyaharenai tyeoniterenai akereta ala babera witahi kakoare waokita hoka wahotikisa xomana waokowita, exahe xoana xiyairala kakoare xamani ala waokita? <sup>2</sup> Xisonai terota atyo wibaberanexa xairatyore tyeonita wimahiyase akonai, tyotyaha waiyahene exahe kaexaretyahene maheta. <sup>3</sup> Enore Kalorexe Aohenere terota atyo exe babera xairaty hoka axikatene wiyma. Maisa atyo kaneta kakoa xairatyakere xini, maisa sehali taose hiye hekoti xairatyakere xini. Xakore hoka xairatene atyo halitinae mahiyase hiye Enore Nisekohare kakoa.

<sup>4</sup> Exakere atyo wiraeta. Enore Kalorexe Aohenere hiyeta wityakekota Enore hoka. <sup>5</sup> Maisa atyo xoarehare kahinaetyare wiso hoka maisaiya aliyakere wawaiyorene tahi wiraehena hoka wisoya atyo hoka exe hateniti wisoma waokowita. Hiyaiya, wawaiyorene atyo Enore nalita tyoita. <sup>6</sup> Hatyo atyo waiyoliniti ijita womana hoka wahakita waitare wenatyaho kakoa. Maisa atyo xaotyakiyaho exairatyakahare akereta xini, xakore hoka Enore Nisekohare atyo. Xaotyakiyaho exairatyakahare atyo axaisakijita haliti, xakore hoka Enore Nisekohare atyo ijita wenati waiyexe matyotenehare.

<sup>7</sup> Moisés Xaotyakiraho atyo kaxairatyaka xairatise kakoa sehali taose hiye. Hatyaoseta Israel yerenai ana kaxekakehena hoka Enore xaokanala kaotyaka hoka Moisés tiho weroka. Hoka Moisés tiho werokene xakore maiyarehetehena hoka hekota kalore werokita hoka maisa aliyakere Israel hotyalinai wahakotyare enomana. Hiyaiya, Xaotyakiyaho axaisakijite tyare atyo kaotyakehenere xowaka kalore aokanatya hoka <sup>8</sup> xahenkohenaore, Enore Nisekohare hatene hiyeta exahehare xaokanatyakalati kaotyakehenerehare naheta maniya. <sup>9</sup> Hateniti halitinai axaisakihenere atyo kalore aokanatya. Hoka exahehare atyoite aokanahena hateniti halitinai iniyalahare mao-manehare aohititerehare. <sup>10</sup> Hiyaiya, hetati kalore aokanatitire atyo maisa hakakoa aokanahetere kalikini xaokanatyakalati exahehare aokanatitire kakoa. <sup>11</sup> Hiyaiya, kaloreya aokanatya inita tyona hoka tyotehenere hoka exahehare atyoite aokanahena matyotenehare maheta tyeoniterenai.

<sup>12</sup> Hatyohare watyahitere hiyeta atyo kalore wimamairanehare wisaonita. <sup>13</sup> Maisa atyo Moisés tyeoniterenai akereta xini wisaonita. Hiyaiya, talatihotyoa atyo imiti taose walawalere kakoa, kasani Israel hotyalinai maisa waiyaha maheta itihi werokene tyoteneheta. <sup>14</sup> Aliterexe atyo Israel hotyalinae maisa waiyore ahekotyareha. Hoka kalikini kijiuhena kaexarehenaha Iraiti Toahiyere nanenai hoka exahkolanaia motya hekota talatyoare tyeonita hatyo inimitira taose walawalerene kokoita. Hoka hatyo imiti taose walawalereya atyo kaiyakeheta, haliti Enore Kalorexe Aohenere koamaniya tyona hoka. <sup>15</sup> Hoka kalikini kijiuhena kaexarehenaha Moisés Xaotyakiraho hoka imiti taose walawalere talatita exahkolaha. <sup>16</sup> Xakore hoka kaiyakehetaiya atyo Iraiti Waiyexe nehenere akereta:

“Moisés talatihotyoakala taose atyo kaiyakeheta, Xekohaseti xema tyaoleta hoka”, nitere akereta.

<sup>17</sup> Iraiti “Xekohaseti” nitere atyo Enore Nisekohare xaokaka nikare iraeta. Hoka aliye xamani atyo Enore Nisekohare tyeonita hoka nali atyo mehexaikohaliti tyeonita.

<sup>18</sup> Hatyo hiyeta wityotya witihi matalatyakahare tyaoleta hoka tihoti waiyakakala xaokanala akereta Xekohaseti xaokanala werokita wihiye. Hatyo witihi awerokaitere

atyo Xekohaseti nalitare, hatyo Xekohaseti atyo Isekohaliti Waiyexe. Hatyo atyo Xekohaseti akerehare mokita wiso hoka hatyo hiyeta wiwerokene exaherrehena aerorityoita.

## 4

*Xiyehaliti Waiyexe Kakoare Atyo Wiso*

<sup>1</sup> Nikare wisaonita hoka maisa wamaikoharexe. Enore atyo airakoaneharetya wiso hoka isa womana exe hateniti. <sup>2</sup> Maisa atyo wawaietyare etakehare metereta kao-makiterehare, exahetakehare kahiharetyakere xoaha. Maisa atyo wamaosseratita xini haliti, maisa Enore niraene wehawareharetyare. Xakore hoka aliterexe aokitere akereta atyo wisaonita, hoka ihiyeta halitinae tyakekoahitaha wiso Enore nahalakoita.

<sup>3</sup> Hoka Iraiti Waiyexe wiyakaitereya atyo metahareta hoka metahareta atyo iniyala-hare maniya tyaoniterenai ana taita. <sup>4</sup> Hatyonae atyo maisa tyakekoreha. Enore metalahare ali waikoheko tyaonitere atyo exahekolanaika moka makaliroti koni hoka. Maisa atyo halakisahene hoka waiyareha xaokanatyakalati ehaoha werokitere, xaokanatyakalati tyoiterekahre Iraiti Waiyexe hiyeta, Enore Kalorexe Aohenere werokene tahi. Hatyo atyo aliterexe Enore hárero akerehare.

<sup>5</sup> Hiya, maisa atyo witahi xini wiyakaita. Wiyakaita atyo Jesus Cristo Xekohaseti tahi. Hoka wiso atyo xiwakanelhare akereta wisaonita Jesus hiyeta. <sup>6</sup> Hoka Enore atyo nexa: “Makaliroti konitaite aokanatya xaokanatyakalati”, nexa, hoka hatyota atyo xaokanatyakalati axaokanatyakisa wimahiyase ako. Nikare atyo moka wiso hoka wawaiyore maheta xaokanatyakalati werokitere Enore hiyexe kakoa maheta. Hatyo atyo werokita Enore Kalorexe Aohenere tiho hiye.

<sup>7</sup> Hiya, xoalini hare waiyexe kakoare atyo wiso. Xakore hoka wiso atyo waikohé kamalohero nomaka tinihaliti akereta wisaonita, wahotikisa maheta Enore niyatere kalorexe. Hatyohare atyo maisa wiyatere xini.

*Enawenaneha Howitihare Tyaonita*

(Atos 21.27-36; 22.22; 23.12-15; 2 Coríntios 11.22-33)

<sup>8</sup> Kahaliki howitihare tyaonita wawenane, xakore hoka maisa atyo wikajiyahaotyakere. Haiya xowaka maisa waiyekehalakere womana, xakore hoka maisa atyo masakare wimawaiyeharexe. <sup>9</sup> Kahare atyo wahalakoaharenai, xakore hoka maisa atyo wimahi-naeharehare wisaonare. Haiya xowaka kawe wikaxomokakita, xakore hoka maisa atyo mawenekoaretyareha wiso. <sup>10</sup> Wakolata minita atyo wiháre wainiterekahre hiye Jesus kamane, hoka kawaiyaka tehituya maheta enawenane wiháre hiyeta maheta. <sup>11</sup> Wikasetatere xowaka kaheneharexe wiyaisaka kakoa wisaonita Jesus xema wisaonitere hiyeta, hoka kawaiyaka maheta enawenane wiháre wainiterekahre hiye. <sup>12</sup> Hoka hatyohare wiyakaitere hiyeta atyo wiyaisaka konita wisaonita, xakore hoka hatyohare atyo wenati matyotenehare maniya axomokanikiheta xiso.

<sup>13</sup> Exakere atyo Iraiti Waiyexe nexa:

“Notyakeko atyo, hoka hatyo hiyeta noxakaitene”, nexa.

Hiyaiya, nikareta tehituya wiso, hatyo tyakekohenahere akereta wityakeko hoka wiraeta wityakekone hiyeta. <sup>14</sup> Hiyaiya, Enore atyo ekasekiheta Xekohaseti Jesus. Hatyohare atyo waiyekehalakita womana. Hoka nikareta tehituyaite ekasekiheta wiso ekakoa, hoka xikakoaite hahotalita kolatya wiso enahalakoa. <sup>15</sup> Tyotya atyo hatyoharenai kaotyaka waiye xisaona maheta. Nikarexe hiyeta Enore nawaiyexehare xema kahare-hena halitinai tyaonita, hoka hatyonaite hamaxaloneha hiyeta iraexatayha enomana, Enore kakoa kaihalaharetyaka maheta.

*Wityakekone Xemaité Wisaohena*

<sup>16</sup> Hatyo hiyeta, maisa wamaikoharexe. Exahetakehare atyoite wiháre tyotehena hoka wisekohare atyoite tyotyaki ferakene ewaitaretyoahitita. <sup>17</sup> Exe inirere exahetakehare wiyamaikoharene wikihixiterekahre atyoite ekaokakisa womana kalorexe, waiyexe

wenati, howitihare wikaxomokakitere xahehare. <sup>18</sup> Hiyaiya, maisa atyo wahekotyare xoalini hare kawaiyakiterahare tahi, xakore hoka wahekoita atyo mawaiyahahrenae tahi. Hiyaiya, kawaiyakiterahare atyo maisa waha tyaonare, xakore hoka mawaiyahahrenae atyo tyaota minita.

## 5

<sup>1</sup> Hiyaiya, exe hati taose ako wisaonitere ite kahatakaka. (Wimili xaokaka nikareta “Hati taose”, nita.) Hatyohare atyo waiyekehalkita womana, hatyohare atyo exe wiháre ali waikohekoa tyaoniterehare, hoka Enore ite isa womana hati enokoa nali wisaona maheta. Hatyota atyo tyoma hatyo hati, hoka hatyo atyo matyotenehare. <sup>2</sup> Kasani wiyané wawenakala enokoa wisaona waokowitere tahi atyo kalore wahekoita hoka haiya xowaka wiwaolitita. Hiyaiya, hatyo atyoite wiháre enokoare, <sup>3</sup> hoka wisoahenaite enako hoka maisaiya atyo wimaimahiro wikawaiyakihitita. <sup>4</sup> Exe hati taose ako wisaonitere xowaka atyo wiwaolitita wamaikohareta. (Wiháre xaokaka “hati taose”, nita). Maisa atyo wimaxaokalita xini waikohekoare wiháre jinakala. Kasani atyo wikaxaisoakisaka waokita wiháre enokoare kakoa, hoka wenati emaiyareheta maheta kawainisakiterahare. <sup>5</sup> Hoka Enore atyo memere moka wiso hatyo wiyehawareharetyaka niyahare, hoka isa womana Haisekohare, wityakeko maheta tyotya xoalinihare isehenerehare womana.

<sup>6</sup> Hatyo hiyeta kalore wihalahareta. Hiyaiya, ali exe wimilako wisaonitere xowaka atyo seko wisaonita wawenakala Xekohaseti naliye nonitata. Hatyohare atyo waiyekehalkita womana. <sup>7</sup> Hiyaiya, wityakekone hiyeta atyo wisaonita. Hoka maisa atyo wiyaiterehare xema xini. <sup>8</sup> Kalore atyo wihalahareta. Kasani wahalakisa exe wiháre hoka wiyané Xekohaseti nali wisaona waokowita. <sup>9</sup> Xakore hoka kasani atyo exahe xoana ali waikohekoa xamani wisaonita, exahe xoana enokoa xamani wisaonita hoka Xekohaseti atyo waihalahalinikisa waokowita. <sup>10</sup> Hiyaiya, haxowakaite Cristo ana wityotya wahotikisoa, sema maheta waikohekoa wisaonitere xowakiyere wawenane tahi. Hoka xoana waiyexe xamani, exahe xoana iniyalahare xamanite wisomita hoka hatyo wisomehenere akeretaite mohena wiso.

### Kakahinaeharetyaka Enore Kakoa Enore Kalorexe Aohenere Hiyeta

<sup>11</sup> Xekohaseti mairaka akiti waiyekehalkita womana. Hatyo hiyeta iraiti aliterexe wiyakaita halitinai hiye. Enore atyo waiyoreta tyotya wiyahekola kakoa, hoka kasani xiso tehitia xawaiyore wawenane akiti kakoa naokita. <sup>12</sup> Maisa atyo witahi xini haki wiyakaihitiya waokowita xihiye. Xakore hoka kasani atyo xasema hoka xihalahare wikakoa waokita, exahe xekoaxatya maheta etakehare maisa háomane kakoa xini ihalahareta hoka haxomokaharetyoane kakoa ihalaharetereheara ana.

<sup>13</sup> Hiyaiya, wihatyaharetaiy akiti hoka Enore atyo wakahinaetita. Exahe waiyeya atyo wahekotyare hoka wakahinaetita atyo xiso. <sup>14</sup> Hiyaiya, Cristo xawaiyera wiso xema atyo wisaonita. Hiyaiya, waiyekehalka atyo womana haterore haliti wainihenere tyotya halitinai ana. Hatyo hiyeta wainihenere tyotya halitinai ana akereta atyo tyotyaha wainiha. <sup>15</sup> Hatyo atyo waini tyotya halitinai ana hoka kasetaterenai maisa haomanitaha tyaohenahitaha maheta, xakore hoka etake wainihenere, exahe kasehetehenenre enomanaha hoka waiye maniya mohenahitehenerene xema tyaonaha maheta.

<sup>16</sup> Hatyo hiyeta maisaiya atyo exaoseta xalahare nawenane tahi wiraehitita. Exahe hetatitaiya Enore Kalorexe Aohenere tahi nikare wiraeta hoka maisaiya atyo kalikini nikare wisaohitita. <sup>17</sup> Hatya haliti atyo Enore Kalorexe Aohenere koamaniya tyaohetehena hoka waitare haliti atyo. Enawenane toahiyere atyo tyotya, hoka waitare atyo tyaoneheta enawenane. <sup>18</sup> Tyotya hatyohahrenae atyo Enore nómanc. Enahalakoaharenae ene wisaonita hoka Enore Kalorexe Aohenere hiyeta hahinaeharenai aoheta wiso. Exahe isa womana wihatene hoka kasani haiyanai tehitia Enore Kalorexe Aohenere hiyeta Enore hinaeharenai wamoheta aokita. <sup>19</sup> Wiraetere iraiti atyo exe: Enore atyo maisa otya aokowita halitinai nómancenai iniyalahare, hoka Enore Kalorexe Aohenere

hiyeta atyo tyotya halitinai hahinaeharenai aohitita. Hoka Enore atyo axikatya wiso wiyakai maheta iraiti halitinai hahinaeharenai aohititere tahi.

*Waiyexe Maniya Nawenatyakeheta*

(Atos 4.11-12; Romanos 4.6-8; 1 Coríntios 15.2-4; Efésios 1.7)

<sup>20</sup> Hatyo hiyeta ali wisaonita hoka wiraeta Enore Kalorexe Aohenere nexare kakoa, hoka motya akere Enoreta ene wikoamaniyata iraeta: Enore Kalorexe Aohenere nexare kakoa wiraehena. Xaohena hoka Enore hahalakoaharenaita moheta xiso hahinaeharenai maheta, nita ene. <sup>21</sup> Enore Kalorexe Aohenere atyo maisa iniyalahare kakoare ene xini. Xakore hoka Enore atyo moka iniyalahare wománenai eheno, hoka wisaohenere exema hiyeta, Enore aokitere akereta, wenati waiyexe kakoare wisaona maheta.

## 6

<sup>1</sup> Hatyo hiyeta wiso wakahinaetiterenai Enore ehatene hiye exakere wiraeta xikakoa: Awa atyo xahalakihena waiyexe Enore koxaka isehenere xomana.

<sup>2</sup> Xasemehena Enore nehenere:  
Xikahinaetyaka xaohenere xowaka nasema xikawira hoka niyeheta xiso iniyalahare nonitata.  
Xasemehena: kalini atyo Enore kahinaera xiso xowaka, kalini atyo waiyexe maniya xiymokakeheta ferakene.

<sup>3</sup> Kasani haiyaharenai maisa waiyaha mawaiyexe wihatene hiye waokare, hatyo hiyeta maisa xalahare nawenane wahowithiharetya waokowiye. <sup>4</sup> Xakore hoka tyotya wisomitereharenai hiye atyo wahotikisoawita hoka wiso atyo Enore wakaneharenai, hoka wimehexaikohare wisaonita wiyamaikoharene kakoa, wimaxiyehareharene kakoa, exahe howithihareterehe wawenane kakoa. <sup>5</sup> Koxaka wikamokonasetyaka, wikaberex-tyakita, exahe maisa waiye xini wikaxomokakita halitinai xahohisakoatyone heko. Kalore wahakita, haiya xowaka maisa wisemakare, exahe maisa wikanakairare hekoti. <sup>6</sup> Waiye wisaonitere, wawaiyorene, wimehexaikoharene, exahe wahakitere xoaha hiyeta atyo wahotikisoawita hoka wiso atyo Enore wakaneharenai. Hatyoharenai atyo wahotik-isa halitinai ana Isekohaliti Waiyexe hiyeta, wiyawaiyera aliterexe hiyeta, <sup>7</sup> iraiti aliterexe hiyeta, exahe Enore niyatere xoaha hiyeta. Enore nawaiyexehare kakoare atyo wiso. Hatyo atyo wokolanase akereta, aisakatya maheta, exahe kahawaonitaretya xoaha wiso maheta.

<sup>8</sup> Haiya xowaka wikaxaiminisakita, exahe wimaxaiminisakita xoaha. Wikairae-haretyakita, xakore hoka haiya xowaka wikaxaexakeretyakita atyo. Maoseratyaliyenai atyo aokahitaha wiso xakore hoka aliterexe atyo wiraeta. <sup>9</sup> Hamawaiyaneneharefa atyo aokahitaha wiso, xakore hoka ewaiyanehareha atyo wiso. Ekamane akere ene wisaonita, xakore hoka kalikini atyo xiyyita wiso, wikaseta atyo. Haiya xowaka iniyalahare wikaxomokakita, xakore hoka maisa atyo wikaxaisakere. <sup>10</sup> Haiya xowaka wikaxexamaikohalinikisakita, xakore hoka hekota atyo wihalaharetta. Motya akere wimaxiyeharehare wisaonita, xakore hoka kahare halitinai wakaxiyeharetita. Motya akere maisa xoarehare aka ene winali, xakore hoka aliterexe atyo tyotya xoalini harenae kakoare wiso.

<sup>11</sup> Nohinaeharenai Corinto nali tyaoniterenae, wiyakai atyo xihiye tyotya wahekoi-tereharenai, exahe wahekotita atyo xitahi. <sup>12</sup> Maisa atyo wimaxahekolere xitahi. Hoka xiso atyo maisa xahekotya witahi. <sup>13</sup> Nityaninai kakoa niraetera akereta atyo niraehena xikakoa. Xahotikihena xiyahekola womana, wiso wahekoitere xitahi akereta hoka xahekotyare witahi.

*Paulo Xaotyakira Tyakekohatiyena, Matyakekohatiyena Tahi*

<sup>14</sup> Awa atyo xahohisakoatyakakoa matyakekoneharenae kakoa xahaka maheta haxawalita. Aliyakereya ehekorexe, exahe ehaikoarexe xoaha haxawalita tyaohena? Aliyakereya xaokanatyakalati, exahe makaliroti xoaha haxawalita tyaohena? <sup>15</sup> Aliyakereya Cristo, exahe Tihanare xoaha hakakoa ahekohenaha? Hoka aliyakereya tyakekohatiye

hakakoa ahekota matyakekonehare kakoa? <sup>16</sup> Hoka aliyakereya Enore hana akerehare tyaohena enore metalahare hana? Hiyaiya, wiso atyo Enore makamanehare hana. Hoka Enoreta atyo koxaka nexa:

“Noxanite notyaona tyakekohatiyena koni. Enenorexahaite notyaona, hoka hatyoa-haite nomaniye hotyalinae tyeonaha”, nexa.

<sup>17</sup> Exahe Xekohaseti nehitiya:

“Maika xahalakihenahene exahe xakikisoahena enonitaha. Awa atyo xisaonehena iniyalahare xema, hoka naoka xiso nomani.

<sup>18</sup> Xexe atyo ite notyaona, exahe xisonai atyoite nityaninae xisaona”, nexa Xekohaseti tyotya iyateliti kakoare.

## 7

<sup>1</sup> Nohinaehare noxiyakawaliharenai, tyotya exe iraitinai atyo womanere. Hatyo hiyeta nika watihaharetyoaheta tyotya iniyalahare maniya axomokanikijiterekare wiháre exahe wisekohare xoaha nonitata, hoka wiyma haliya wisaohera, exahe wimairehena Enore.

### *Paulo Nihalaharene*

<sup>2</sup> Xahekohena witahi. Hiyaiya, maisa atyo xalahare wakomaniyaita, maisa atyo xalahare nawenane waiyaharetita, exahe maisa atyo xalahare noloxa wametakisare. <sup>3</sup> Exakere niraeta hoka maisa atyo ximahakaiseren xini naokita. Hiyaiya, enahitita atyo niraet xihije, wawaietita atyo xiso hoka haxawalita atyo wisaotha minita, wikasetatere xowaka niyahare, exahe wikalmane xoaha niyahare. <sup>4</sup> Notyakekota atyo xiso, naokowiharetyoita atyo xikakoa. Haiya xowaka xakore howitihare wawenane tyeonita hoka hekota nomaxaloni, nihalahalini xoaha kakoa notyaonita.

<sup>5</sup> Wiyane wikaokehenere Macedônia koa nali hekota maisa wikkawiniye hekoti. Tyotyakitinai wiyanhenere nali howitihare womana, xalijinikakoati, exahe wimairane harenai kaotyaka womana. <sup>6</sup> Xakore hoka Enore, aihalahalinikijitamaikoharetere-harenai atyo aihalahalinikiheta wiso Tito kaokene kakoa. <sup>7</sup> Exahe maisa ekaokene xoaha kakoa taita xini wihalahare, xakore hoka xaihalahalinikihenerene tahi kakoa tehitia wihalahare. Xakai xakakawaitere natyo tahi, hoka xamaikohareta aoka, exahe ximemere xisaonita xikahawaonitarera natyo kakoa aoka. Hatyo hiyeta kalikini atyo exahehare nihalahareta.

<sup>8</sup> Maisa atyo nokehaharetyoahitita hatyo babera naxikahenere hiyeta, examaikohalinikisa xakore atyo xiso hoka. Nasema hatyo babera ininai examaikohalinikihenere xiso hoka nokehaharetyoahetehena ene atyo. <sup>9</sup> Xakore hoka kalikini atyo nihalahareta. Maisa atyo nobaberanixi hiyeta xamaikoharehenere hiyeta xini, xakore hoka hatyo xiyamaikoharene hiyeta xikehexaharetyoahetehenere hiyeta atyo. Hatyo xiyamaikoharene atyo Enore nalitare. Hiyeta hoka maisa xala hare hekoti wamolaita. <sup>10</sup> Hiyaiya, xamaikohaliti Enore nalitare atyo ekaotyakatita kehexaharetyoatiheta hoka waiyexe maniya axomokanikihita wiso, hoka hatyohare hiyetaiya maisa xoare maheta wamaikohareta. Xakore hoka ali waikohekoare xamaikohaliti atyo ekaotyakatita kamati.

<sup>11</sup> Xiyaiyehenaore xiyamaikoharene hiyeta Enore mohetehenere xiso: haliti waiyexenai atyo moheta xiso, hoka kasani xahasaka rotita xawaiye nawenane xaokowi. Kalore atyo xehare! Kalore atyo ximaira. Xakakawayta natyo, exahe waiye xikaxaikoawi, kasani haxerore xemaisatya xaokowi iniyalahare. Tyotya hatyoharenai hiyeta xahotikisa xawaiye nawenane. <sup>12</sup> Hatyo hiyeta, etake babera xakore atyo naxairatya hoka maisa atyo hatya iniyalahare tyomehenere hiyeta xini, exahe maisa hatya iniyalahare kaxomokakitete hiyeta xini. Xakore hoka nikare atyo naxairatya, Enore waiye awaiyekehalakaty maheta xomana kalore waiye xamokiterekare wiso tahi. <sup>13</sup> Hatyo hiyeta atyo wihalahare wisaonita.

Exe wihalaharene xahexe atyo wihalahare Tito nihalaharene kakoa. Hiyaiya, xityotya atyo xakahinaetene. <sup>14</sup> Waiye atyo niraet xitahi ihiye hoka xiso atyo maisa xehaihalikijita natyo. Hiyaiya, aliterexe taita atyo wiykaita xihije. Nikareta tehitia aliterexe

waexakeritya xiso Tito hiye. <sup>15</sup> Hoka exawaiyera atyo kekoaretata otyaxemahetehena xityakekone, exahe waiye xamohenerene xiyliminirene, xawaiyexeharene xoaha kakoa hoka.

<sup>16</sup> Hatyo hiyeta kalore atyo nihalahareta. Notyakekota kaiserehare atyo xiso hoka.

## 8

### *Xisá Xihalaharene Kakoa*

<sup>1</sup> Nohinaeharenai, kasani xasema Enore nawaiyexehare hiyeta tyakekohatiyenai Macedônia koaiyerenai tyomehenere tahi waokita. <sup>2</sup> Wihinaeharenai nali tyaconiterenai kahasakaharetyakaha howitiharexe kakoa. Xakore hoka kalore atyo ihalaharetaha, hoka maoloxahareha xakore hoka isaha olo haxahohisakoalaha niyahare kalore haihalahareneha kakoa. <sup>3</sup> Aliterexe naokita xihije, háomaneha xahexe tyomaha, exahe kajijanexe. Exahe haxaokalitaha <sup>4</sup> axaha wiso hoka kasani wahalakisahene hoka kahinaetyaha aokowiha Judéia koa nali Enore koamaniya tyaconiterenai, hoka tihityoaha wihiye. <sup>5</sup> Hoka wahekoitere xahexe atyo tyomaha. Hetati Xekohaseti koamaniya hawenne mokaha, hatyo najikinita Enore xaokalita wiyaotyakira xema tehitija tyaconaha.

<sup>6</sup> Hatyo hiyeta wira Tito kakoa, hatyo tyare atyo tyoma hatyo hateniti hetati hoka kasani tyomehitiya, exahe kahinaehitiya xiso hoka hatyo hateniti waiyexe xiyawaiyera kokoita xisomitere xamematya waokita. <sup>7</sup> Tyotya xoalinhare hiye atyo haiyanai xahexe xahotikijita xawenane: xityakekone hiye, xiraene hiye, xawaiyorene hiye, xiyaokalita haiyanai xakahinaetya xaokowitere hiye, exahe xawaiyetitere wiso xoaha hiye. Kasani kalikini memere xamohena olo waokita haiyaharenai mokitere olo xahexe kaxaxikatayaka maoloxaharenai ana maheta.

<sup>8</sup> Maisa atyo nawakatyta xini xiso naokowita. Kasani atyo haiyaharenai nihalaharene taita waiyekehalaka xomana naokita, hoka waiyaha maheta, xoana aliterexe xamani xiyawaiyera aliterexe hoka.

<sup>9</sup> Hiyaiya, koxaka atyo xasema Wiyekohase Jesus Cristo kalore awaiyetitere wiso: Kaoloxere, kaxiyeharexe ene atyo, xakore hoka maxiyeharehare akereta tyaoleta xihiyeta, hoka xikaxiyeharexe xisaona maheta kalore emaxiyehareharene hiyeta.

<sup>10</sup> Exe atyo hatyo tahi noxahekoli: Kafaka maniya terehokoane xisomehenere kasani xisoma xamematya naowita. Hetati xowaka xiso hotohare xakahinaetya maoloxaharenai. Maisa hatyo taita xini, xiso hotohare xakahinaetyahene xaokowi. <sup>11</sup> Hatyo hiyeta hekota xisomehena, xamemahena hatyohare hateniti. Xisomehenaira hatyoharenai hetati xihalaharetere akereta. Maika xisa xikaoloxitere hakakoaneta. <sup>12</sup> Hiyaiya, xala xamaniya atyo isa aokowita hoka Enoreya aoka exekane kaoloxitere hakakoaneta. Enore atyo maisa axare hatya emaoloxene nali. <sup>13</sup> Maisa atyo haiyanai nawenane waiye tyaoleta xikahinaerahene hiyeta hoka howitihare xini xawenane namoka naokowita. <sup>14</sup> Hoka kalikini tyare atyo kalore xikaoloxita hoka ehekoretaiya atyo xakahinaetya maoloxaharenai. Hoka haxowaka ximaoloxaharehena hoka hatyoaha kaoloxerehenaha kalore hoka hatyaosetaite kahinaehenahita xiso. Nikare ite hoka hakakoa xakahinaetyakakoa.

<sup>15</sup> Hiyaiya, Iraiti Waiyexe atyo nexa:

“Hatya kalore imexehenere ana atyo maisa xoare kamawaneta. Hoka hatya inira imexehenere atyo maisa nakita”, nexa.

### *Tito Exahe Ihinaeharenai*

<sup>16</sup> Kalore nihalahareta Enore kakoa Tito axahetianikisa hoka kahinaetya aokowitere xiso hiyeta, wiso wakahinaetya waokowitere xiso akereta. <sup>17</sup> Wira ekakoa hoka aoka. Hoka exahexe kasani kahinaetya aokowita xiso hoka haihalaharene kakoa tyoheta xinali.

<sup>18</sup> Hoka exema waxikahena hatya wihinaehare. Hakakoare tyakekohatiyenai waiye aminisahitene Waiyexe Iraiti xakaitere hiyeta. <sup>19</sup> Exahe exe wihinaehare atyo tyakekohatiyenai xaokalita, xaxikala ximita tyoita wiwema. Exaokalahitaha atyo tyoa kahinaetya maheta wiso hateniti wiyawaiyera kakoita wisomitere hiye, kaihalaharetyaka maheta

Xekohaseti kakoa, exahe wahotikisa maheta aliterexe wakahinaetya waokowiterekarenai. <sup>20</sup> Exakere wisaonita, kasani maisa haiyaharenai iraeharetyaha wiso waokare exe kalore olo wamokitere hiyeta hoka. <sup>21</sup> Wiyahekola hiye atyo hoka kasani ehekorexe taita wisoma waokowita, maisa Xekohaseti nahalakoa taita xini hoka halitinai nahalakoa tehtiyta.

<sup>22</sup> Exemaha waxikahena hatya wihinaehare. Kahaliki wahasakaharetene hoka wiayia memere enawenane ekahinaera niyahare. Hoka kalikini tyare atyo kalore tyakekota xiso hoka exahehare tyoa kahinaetya aokowita xiso haxaokala ximita.

<sup>23</sup> Hoka Tito tahi atyo niraehena hoka nohinaehare terota atyo, exahe hakita nokakoi kahinaetya maheta xiso. Hoka exe wihinaeharenai tyohenerenai exema atyo tyakekohatiyenai xaxikala, exahe waiye aiminisahitaha Cristo. <sup>24</sup> Hatyo hiyeta haiyakoanai tyakekohatiyenai semane maheta xahotikihena exe wihinaeharenai ana xiwayaiyerahene, exahe, “Aliterexe Paulo iraetere akereta Corinto yerenai tyaonita”, nexaha maheta.

## 9

### *Olo Xahohisakoatyaka Judéia Koa Yerenai Tyakekohatiyenai Ana*

<sup>1</sup> Etake olo xaxikahenere Judéia koa yerenai ana tahiya atyo maisa xoare naxairahitita xomana. <sup>2</sup> Waiyekehalakita atyo nomani xakahinaetyahene xaokowitere tahi akiti, hoka hatyo hiyeta naexakeretya xiso wihinaehare Macedônia yerenai hiye. Noxakai xiso wihinaeharenai Grécia nali tyaoniterenai memere xisaonitere xikahinaerahene kakoa hetatiye jiyejhene terehokoane tahi. Hoka tyotyaha ihalahareha xiyaokalita xakahinaetya maoloxaharenai xaokowitere tahi kakoa.

<sup>3</sup> Hoka kalikini naxikahena exe wihinaeharenai hoka naexakerehenere xiso hatyo tahi akiti kakoa maisa xoare makaotyakeneta maheta. Hoka maika niraetere akereta ximemere xisaona xikahinaerahene kakoa.

<sup>4</sup> Hiyaiya, Macedônia yerenaiya tyoaha noximi hoka maisa ximemere xisaonare hoka wihaihareya, exahe tehitiyaiya hoka xihaihare. Maisa xihaiharene tahi wiraeta maheta, wityakekotere xiso hiyeta nahekotya. <sup>5</sup> Hatyo hiyeta waiye xaxikatyakala wihinaeharenai nahiti maniya hoka memere mokaha maheta olo xisa xaokowiterekare. Hoka nali nokaokihena hoka koxaka memere tyaonita maheta, hoka tyotyaha semaha maheta xiyaokalita xisa xaokowihenere xiyeckane, hoka maisa xiwakatyaka xema xini xisehenerahare tahi.

<sup>6</sup> Xotyaxematyaira exeharenai: Xala xamaniya atyo inira fitya hoka iniraiya atyo imexaheta. Hoka xala xamaniya atyo kalore fitya hoka kaloreya atyo imexaheta. <sup>7</sup> Hoka maika hatya xakini, aliyakere xamani ahékotya hoka nikarexe isa. Maisa haxamaikoharene, hawakatyaka xema hekoti xini. Hiyaiya, xala xamani atyo haihalaharene kakoa ijita hoka Enore atyo awaiyetitene. <sup>8</sup> Hoka Enoreya atyo isa xomana xaokiterekarenai xahexe hoka xaokiterekarenai kakoare xisaota mene maheta, exahe xaokiterekare xahexe isa xomana hoka waiyexe xisomehitiya maheta.

<sup>9</sup> Hiyaiya, exakere atyo Iraiti Waiyexe nexa:

“Kahare atyo xoalinhare ijita maoloxaharenai ana. Enawaiyexehare atyo maisa tyotere xini”, nexa.

<sup>10</sup> Enore atyo hanakatise ijita kaxafityaka maheta, exahe nakairati hoka ijita kakanakairatyaka maheta. Hoka isa tehitiyate xomana tyotyha hanakatise xaokiterekarenai. Hoka akekoaretya ite hatyo hanakatise hoka kalore ite ximexehetene maoloxaharenai xikahinaera hiyeta. <sup>11</sup> Xikaoloxahare ite moka mene xakahinaetya maheta halitinae. Nikare ite hoka kahareha ite ihalahareha Enore kakoa olo xaxikaitere wiyma hiyeta.

<sup>12</sup> Hiyaiya, exakere atyo xisomita hoka maisa atyo xakahinaetita taita xini Enore koamaniya tyaoniterenae maxiyehareharenai, xakore hoka xisomiterekarenai hiyeta atyo kalore ihalaharahitaha Enore kakoa. <sup>13</sup> Ihalaharehenahaite Enore kakoa. Hiyaiya, exe xikahinaera atyo hotikijita xityakekone, exahe xawenane Cristo nalitare Iraiti

Waiyexe xema. Hokaolo xaxikaitere enomanaha, exahehaiyaharenanana xoahahiyeta iteihalahareha tehitia Enore kakoa.

<sup>14</sup> Iraexatyaha ite xomana haxawaiyeraha xiso hiyeta, exaheEnore kalore awaiyetitere xiso xoahahiyeta. <sup>15</sup> Nikahena hoka wihalahare Enore kakoa, hatyo kalore awaiyetitere wiso maxaimenekotyakahare kakoa hiyeta.

## 10

*Paulo Aiyateretyoa Hairaene Kakoa Tyakekohatiyena Xahita*

<sup>1</sup> Natyo Paulo terota koxaka niraexikakoa. Haxawalita notyaohena xikakoa hoka nawaiyexehare notyaonita xiyyahita. Seko akiya notyaohena xonita hoka noxalijinihareta xiyyahita. Kalikini Cristo nawaiyexehare hiyeta niraexihiye hoka waiye xasema.

<sup>2</sup> Nali notyohena hoka awa atyo xexalijinihalikisa natyo. Hiyaiya, xoana xamaniya hoka noxalijinihalini kakoaiya nekoaxatya naokita etakehare haliti xahekola xema akereta wisaoniterekahare aokiterekahenai xahita.

<sup>3</sup> Aliterexe atyo haliti wiso. Xakore hoka maisa atyo waiyateretyoita xini halitinainawenane akereta. <sup>4</sup> Iyateliti kakoa waiyateretyoitere atyo maisa waikohekoatare xini. Enore nalitare iyateliti kakoa atyo waiyateretyoita wamawenekoaretya maheta kinatere akokowiterekahenae. Exahe iraiti metalaharenai wamawenekoaretita. <sup>5</sup> Exahe halitinaxahenera mahalakirahitene hoka maisa Enore koamaniya nawenatyaka mawaiyekhalakatititere enomanaha harenai wamawenekoaretita. Wijiyyahaotita atyo tyotyahalitinae xahekola hoka Cristo koamaniya wamohenahititene. <sup>6</sup> Hoka kalore xityakekohenere najikinitaite wimemere wisaohena iniyalahare kakoa waotyakisa maheta hatyatere matyakekonehare.

<sup>7</sup> Xiso atyo xoalinhare henekoa maniya taitixiyyahita. Hoka hatyaiya aliterexe Cristo anere akokwita hoka maika ahekohtiya hatyo tahi. Hiyaiya, wiso tehitia atyo Cristo anerenai, hatyo hatya haliti akereta. <sup>8</sup> Maisa atyo nohaiharetaxini, kalore xakore nahinitya Xekohaseti iyateliti isehenerewomana kakoa hoka. Exe iyateliti atyo akekoarekisa xiso maheta xawenane kakoa, hoka maisa atyo mawenekoaretya maheta xini xiso. <sup>9</sup> Kasani atyo maisa naxahekotyanikisa xiso hoka namairakisa taitamaheta xiso exe babera naxikaitaxomana xaoka naokare.

<sup>10</sup> Hatya ite nehena: “Paulo axikaitere baberanenai womana nanekoa atyo kaheneharexe, exahekinatere hairaene axikaitawomana. Xakore hoka kaokehena atyo womana hoka kaxonasiri atyo tyaonita, exahe iniraene hoka maisa xoare tyomare”, nehenaite.

<sup>11</sup> Xakore hoka maika hatyo haliti ana waiyekehalakehena: hiyaiya, maisa atyo xoarehare hawareharexe aka waxairaiterekahare baberanenaikoseko wisaoniterekahare nali xinekonihenawiso xoahahowaka, exahe wisomiterekahare nali xinekonihenawiso xoahahowaka.

<sup>12</sup> Maisaiya aliyakere wehakakoatita exahe waimenekotita wawenane etakehare masakare waiyore akokwiterenae nawenane kakoa. Hatyotaha atyo aimenekotyaoawitaha háomaneha xaimenekotyakalati kakoita. Maisa atyo waiyorexeha. <sup>13</sup> Hoka wiso wiyaokowiharetyoane atyoite maisa wiyahenerajiyare tyaonita. Enore isehenerewomana aosexeta atyoite tyaona, exahe xinekoni wihatene hoka. <sup>14</sup> Hatyo isehenerewomana aosexeta atyo xisaonita hoka maisa atyo exahexe xini wisoma, nali wikaoka hoka Waiyexe Iraiti wiyakaihenere Cristo tahi xowaka. <sup>15</sup> Hatyo hiyeta maisawaokowiharetyoita haiyanai hahatene tyomehenere Enore isehenerewomana xahexekakoa. Xakore hoka kasani atyo xityakekone kekoare waokita. Hoka exahehare hateniti wisoma xinekoni waokowita Enore isehenerewomana aosexeta akereta. <sup>16</sup> Hatyaosetaite wiyakaihenere Iraiti Waiyexe haiyakoanai wenakalatikoanai xisaoniterekahahatene tyomehenere kakoa.

<sup>17</sup> Hiyaiya, exakere atyo Iraiti Waiyexe nexa:  
“Maika xala xamani akokowiharetyoaaokowita hoka maika akokowiharetyoahena etakehare Xekohaseti tyomiterekahare kakoa”, nexa.

<sup>18</sup> Hiyaiya, hatya atyo katyakekotyakita, Xekohaseti tyakekohenene hoka. Maisa atyo hatyota tyakekoawihena xini hoka.

## 11

### *Paulo Exahe Iraiti Xakaisaseharenae Metalahare*

<sup>1</sup> Kasani exahe niraehena hatyahaliti akereta hoka heko xasemaxemaya niraeni naokita. Hatyo hiyeta xasemaira niraeni. <sup>2</sup> Enore waiye kaxaikotere xiso akereta tehtiya atyo natyo nokaxaikota xiso. Hiyaiya, xiso atyo hatya mawatyalisakahalotatare kaiserehare hoka nakaiyanenetya naokowitere hatya haliti kakoa akereta xisaonita. Hatyo haliti atyo Cristo. <sup>3</sup> Nomawaiyehareta xikakoa, xoana xamani hoka owi kinohare maoserahenere Eva akereta xikamaoseratyaka hoka maisa waiye xahekotyare hoka xahalakisaiya xawenane waiyexe Cristo koamaniya. <sup>4</sup> Hiyaiya, xasemita atyo xihalaharene kakoa hatyatere kaokehena hoka xakaihena Jesus hawareharexe tahi xihiye hoka. Hatyo atyo maisa Jesus aliterexe wiyakaitere xihiye tahi xini. Exahe xaokita atyo xomana isekohaliti, exahe iraiti waiye hawareharexe, wiso wiyakaihenere Enore nalitare Isekohaliti exahe Iraiti Waiyexe nonitata.

<sup>5</sup> Noxahekoli hiye hoka maisa atyoala exe “iraiti kakoarenai” katyahakohare xini natyo naoka. <sup>6</sup> Exahe atyoala maisa nawaiyore niraexe naoka, xakore hoka kalore atyo waiyekehalakita nomani. Hatyoharenai atyo tyotyaki nihatyaka wahotikisa xomana.

<sup>7</sup> Noxakaihenere xihiye Iraiti Waiyexe Enore nalitare xowaka maisa nobakatyaki naokita xihiye. Nikare nahakita hoka wakahare akereta notyaonita hoka kalorexe xisaona maheta. Xoana hatyo xowaka ala maisa ehekore xini nikare notyaonita xomana? <sup>8</sup> Nahahenere xinekoni xowaka haiyaharenae tyakekohatiyena hakoa wenakalatitarenae bakatyahitaha natyo. Kala xoana xamani hoka nokaiwahitene naoka nakahinaetya xiso maheta. <sup>9</sup> Notyaohenere xinekoni xowaka haiya xowaka olo hare naokita, xakore hoka maisa xalahare nahowitikijita. Wihinaeharenae Macedônia nalita tyohenerenai atyo kolatyaha nomani xoalinhare naokiterekarenai. Nikare notyaona kafaka maniya hoka nikareta tehtiya ite notyaonehitiya nahiti maniya. Maisaiya hatyoharenae hiyeta nahowitikijita xiso. <sup>10</sup> Cristo niraene aliterexe tyaonitere nohiye hiyeta niraehena, hoka tyoty Grécia koa tyaoniterenai konitareya maisa xalahare emaisahitita exe nihalahalini kakoa maxaimanahareta noxakaitere Iraiti Waiyexe. <sup>11</sup> Xoanere ala hoka exakere niraeta? Xoana maisa ala nawaiyetyare xiso hoka? Enore atyo waiyoreta noxawaiyiri xiso kakoa.

### *Maika Xirihare Xaotyakisatiyena Metalahare Kakoa*

*(1 Timóteo 1.6-7; 1 Timóteo 4.1-3; 2 Pedro 2.1-19)*

<sup>12</sup> Kalikini nahakitere akereta ite nahahitiya hoka etakehare “iraiti kakoarenai” xahenera namiyatya, exahe wihatene akereta hakahitaha aokowiyahitere xoaha. <sup>13</sup> Hatyo halitinai atyo iraiti kakoarenai metalaharenai, maisa atyo ekaiserehareni xini. Hahateneha tahi atyo maoseryahitaha hoka Cristo niraene kakoarenai kaiserehare atyo aokowiyahitaha. <sup>14</sup> Xakore hoka maisaiya atyo xahakaharetyoita. Xiyaiya, Ahalakoahaliti kakoitaiya atyo aikawatyoa hoka motyaiya anjo waiyexe ene kaotyaka. <sup>15</sup> Nikare ite hoka exema maniya tyaoniterenai nikareta tyaonaha hoka motya ite haliti waiyexe nomasehareha ene tyaonaha. Xakore hoka imiyaniki xowakehenaite hoka tyomahitere akereta kaxomokakehenahitaha.

### *Paulo Iraiti Xakaisasehare Makawatini*

<sup>16</sup> Haki ite niraehitiya: awa atyo nohatyahalini xaoka. Nohatyahareta atyo xaowita hoka maika hatyahaliti xomokaka akereta xamohena natyo hoka hatyohare hiyeta naokowiharetyo. <sup>17</sup> Aliterexe exe niraetere atyo maisa Xekohaseti xaotyakira xini. Exe noxaokowiharetyoani tahi niraetere atyo aliterexe motya hatyahaliti akereta niraeta.

<sup>18</sup> Haiyaharenae atyo hawenaneha waikohekoare kakoa aokowiharetyoahitaha, hoka natyo tehtiya ite naokowiharetyoahena nawenani kakoa. <sup>19</sup> Xiso atyo xirihare, xakore

hoka waiye xasemaxemaita hatyaharexenai niraene. <sup>20</sup> Haiyanae atyo wakahare akere mokita xiso, xixiyehare miyatayhitaha xonita, maoseratyahitaha xiso, hairawaneha kakoa kaxaikoahitaha xiso, exahe mokotyayhitaha harenai xiso xitihokoa. Nikare xakore atyo mokahitaha xiso hoka waiye xasemaxemaita iniraeneha.

<sup>21</sup> Komitaene ene nohaiharefa exakere niraeni xikakoa: maisa wiyalijinharexe hoka hatyonai akereta wamokare xiso. Hiyaiya, maisa xakore wikinaterexe hoka exakere wiraeta xikakoa.

Xakore hoka haiyanaiya atyo aokowiharetyoaha xoalini hare kakoa hoka natyo tehi-tyaite naokowiharetyoa. Hiyaiya, aliterexe atyo hatyahaliti akereta niraeta. <sup>22</sup> Xoana Hebreu hotyaliharenai? Natyo tehi-tya atyo. Xoana Israel hotyaliharenai? Natyo tehi-tya atyo. Xoana Abraão jikolaharenai? Natyo tehi-tya atyo.

*Paulo Nawenane Howithihare Tyona*

(Atos 14.19-22; 21.27-36; 23.12-15; 2 Coríntios 4.8-12)

<sup>23</sup> Xoana Cristo wakaneharenai? Natyo tehi-tya atyo Cristo wakanehare, hatyo xaheharefa atyo natyo. Alatyia atyo hatyahaliti akereta niraeta hoka. Hiyaiya, exaheharefa atyo nahaka, exaheharefa atyo berexoako nokaxomokaki. Exaheharefa atyo nokamokonasetya, exahe kahaliki komitaene nowaini. <sup>24</sup> Judeunae 5-ki mokonasetya natyo hoka 39-xa mokotyayhitaha natyo hatyo 5-kinai mokohenahere natyo xowaka. <sup>25</sup> Hanamaki atyakase kakoa Roma yerenai mokonasetya natyo. Haki sehalii kakoa mokotyaya natyo. Hanamaki kanowa kalorexe tabobokoa nokakoi. Haxatini, haferakene xoaha notyaona one kaloxere xaiya. <sup>26</sup> Kahaliki notonani xowaka kahenehare nawenani tyona one morene, exahe kaiwarexenai xoaha koni. Exahe kahenehare notyaonita nohinaeharenai Judeunai, exahe majudeuneharenai xoaha koni. Kahenehare notyaonita wenakalatikoanai, maharexakiti, one kaloxere xaiya, exahe kahenehare nokaxomokakita nohinaeharenai metalaharenai hiyeta. <sup>27</sup> Kahare hateniti tyona one nomani, nokiraharefa. Haiya xowaka maisa aliyakere notemakare hekoti. Haiya xowaka nonakita, nomaimihare, exahe maisa tihere niyahare nokaimiye hoka tihita nohiye. <sup>28</sup> Maiha hatyoharenai taita xini. Ferakiti nihatayaka nomawaiyehareta tyota tyakekohatiyenae kakoa. <sup>29</sup> Haiyaharenae maotikone tyona one hoka nomaoikonni tehi-tya notyaonita. Haiyaharenai iniyalahare tyomehena hoka kalore namaikoharefa.

<sup>30</sup> Naokowiharetyoaiya atyo naokowita hoka naokowiharetyoahena atyoite etakehare nomaoikonni hotikijiterehare kakoa. <sup>31</sup> Enore, Xekohaseti Jesus Nexe, etake kaihalaharetyaketa menehenere ana atyo waiyekehala hoka maisa atyo namaoseraita xini.

<sup>32</sup> Notyaohenere wenakalati Damasco xowaka kalorexe kaxaikoakaitere xekohaseti Aretas wenekoare moka sorarenai wenakalati kaokatyakala nali tokaha natyo maheta.

<sup>33</sup> Xakore hoka nohinaeharenae mokaha natyo koho kalorexe ako hoka exoakihenahitaha natyo talarehoko motokoare ahota hoka maisa sorarenae xoana mokita natyo.

## 12

*Paulo Kaxawaiyanikisakenere Tahi*

<sup>1</sup> Naokowiharetyoahena atyoite, exahe maiha xakore xoarehare hatyohare tyomare nomani hoka. Xakore hoka kalikini atyoite noxakaihena xihije nowaiyehenerehare tahi, exahe Xekohaseti hotikihenerehare nomani xoaha tahi. <sup>2</sup> Nowaiya hatya tyakekohenera hoka toahiya 14-terehokoane najikini xowakiya eharehena rota kakolatyaka enokoa xeta, xoana tyota eháre kakoita xamani ala kakolatyaka, xoana inisekohare taita xamani ala kakolatyaka. Maisa atyo waiyekehala hoka nomani, Enore taita ana atyo waiyekehala hoka. <sup>3</sup> Niraehitiya ite: aliterexe atyo hatyo haliti eharehena rotita kakolatyaka Wenakalati Waiyexe nali. Xoana aliterexe xamani ala eháre kakoita kakolatyaka, xoana inisekohare taita xamani ala kakolatyaka. Maisa atyo waiyekehala hoka nomani, Enore taita ana atyo waiyekehala hoka. <sup>4</sup> Kakolatyaka enokoa nali hoka iraiti sema xakore hoka maisaiya xala hare ali waikohetka awaiyekehala kaitene. <sup>5</sup> Hatyo hiyeta hatyo haliti kakoa ite naokowiharetyoahena. Xakore hoka maisaiya atyo nokakoi

naokowiharetyoita, hoka etakehare nomaiyatelihalini hotikijitereharenai kakoa atyo ite naokowiharetyoahena. <sup>6</sup> Naokowiharetyoaiya naokowita hoka maisaiya atyo nohatyahareta xini, xakore hoka aliterexeya atyo niraeta. Xakore hoka maisaiya atyo naokowiharetyoita, kasani maisa xalahare ahekotya notahi naokare waiyehenere natyo exahe semehenere niraeni xahexe naokare.

<sup>7</sup> Kahare waiyexe kahotikisaka nomani hoka hatyo hiyeta kahehaliti kawéro kaxekaka nomani maisa masakare naokowiharetyoita maheta. Ahalakoahaliti niraene kakoare akereta kaoka nomani hoka maiyateretya natyo maheta, hoka maisa naokowiharetyoita maheta. <sup>8</sup> Hanamaki niraexatya Xekohaseti hiye hoka naxene, kasani emaisaheta maheta noniti hatyo kahehaliti.

<sup>9</sup> Xakore hoka Xekohaseti nexa nohiye: “Mahaiya naiyatelikihitita hiso. Nakahinaetya taitaite hiso hoka waiye hisaona. Hiyaiya, niyatere atyo exahehare kalore tyaonita, himaiyaterehare hisaonitere xowaka”, nexa nohiye. Hatyo hiyeta exahehare atyo nihalahareta naokowiharetyoitere nomaiyatelinai kakoa hiyeta. Kasani Cristo niyatere tyaoneta mene nohiye naokita hoka. <sup>10</sup> Nihalahareta atyo exe nomaiyatelinai, nirawaiyaki, nomaxiyeharehalini, niraeharetyaki, exahe Cristo hiyeta hoka howitihare nawenani tyaonitere xoaha hiyeta. Hiyaiya, nomaiyaterehenere xowaka nokinatere notyaonita Xekohaseti hiyeta.

#### *Paulo Mawaiyeharene Corinto Yerenae Kakoa*

<sup>11</sup> Hatyahaliti akereta atyo notyaonita, xakore hoka xiso atyo exakere xaxomokanikisa natyo. Xiso ene atyo waiyexe xiraehena notahi. Hiyaiya, maisa xakore atyo noxoare waikaterehare xini hoka maisa atyo exe “iraiti kakoarenai” xawaiyetiterenai katyahakohare xini natyo. <sup>12</sup> Xoalinharenai hotikihenere hoka aliterexe iraiti kakoa aohenere natyo atyo kaomaka maholawakereta xinekoni. Hatyoharenai atyo xoalinhare waiyexe, exahe xoalinhare maomakahare nomaka harenai. Hatyoharenai kaomaka halitinai tyakekoha maheta niraeni. <sup>13</sup> Xoare hiye iniyalahare xikaxomokaka haiyaharenai tyakekohatiye xahexe? Hatita hiye taitala maisa nemaxahalikijita xiso: maisa nokahinaetyaki naohenere xihiye hiye. Maika hatyohare ximaotyaneheta.

<sup>14</sup> Kalikini ehanamakini hiye koxaka nomimiye notyaonita nowaiyeheta xiso maheta. Hoka maisaiya xoareharenai naokita xihiye. Maisa atyo xoloxa naokare nomani, hoka xiso taita atyo naokita nomani. Hiyaiya, mahaiya atyo aliyakere xoimanai hanexe ana olo mokita, enexeha atyoite mohena olo haisaninai ana. <sup>15</sup> Nihalahalini kakoitaite nakahinaehena xiso tyotya noxiyehare kakoita, exahe niyatere xoaha kakoa tehitiaite nakahinaehena xiso. Masakare atyo nawaiyettita xiso hoka xoana hatyo hiyetaite inira taita xawaiyehena natyo?

<sup>16</sup> Maiha atyo xoare hare hiye nahowitihalikijita xiso. Hatyoharenai waiyekehalakita xomana, xakore hoka haiyanaita namaoseraita xiso aohenaha. <sup>17</sup> Xoana naxikahenerenai xomana hiye ala xikolaharetyaka naoka? <sup>18</sup> Aliterexe atyo Tito naxikaty xomana, hoka hatya wihsinaehare tehitia naxikaty exema. Xoana Tito kore kolaharetya xiso? Xoana maisa kore wiso hinamanai hakakoa wisaonita, wahekotita?

<sup>19</sup> Xoana motya ala wakahawaonitaretyoita xahalakoa xaokita? Maisa nikare xini wisaonita. Wiraeta atyo motya Cristo wakatya wiso hoka wirae Enore nahalakoa akitere akereta. Hoka tyotya wisomitereharenai atyo wakahinaetya maheta xiso, nohinaeharenai, noxiyakawaliharenai.

#### *Enore Maxawaiyerene*

*(Romanos 1.26-32; 1 Coríntios 3.3; 10.6-10; 1 Timóteo 1.9-10; Tiago 3.10-16)*

<sup>20</sup> Kalikini atyo nomawaiyehareta xikakoa. Naliya nokaokihena hoka mahaiya naokitere akereta xini nowaiya xiso, exahe natyo hoka maisaiya xiyahekola akereta xini xiayiya natyo. Motya akere tehitia ite nowaiya mokohetyakakoati, okoati, xaiminiharetyoati, maxiti, irawaniti, werahaliti, xahenityati, wenati mahekorenerehare xoaha naokita. <sup>21</sup> Hoka nomawaiyehareta tehitia etakehare notyoa nowaiyehenere xiso

xowaka Enore xexamaikoharerera natyo xihaotita kakoa. Hoka nosexi kakoa, kahare haiyaharenai toahiya xowaka iniyalahare tyomaha hoka maisa kehexaharetyoahenahititere iniyalahare ohiro hiye hawenaneha, exahe xoalinihare maiyasehenahere xoaha hiyet.

## 13

### *Xaotyakisati Miyane*

<sup>1</sup> Exe kokoaité hanamakihena notyoa nowaiyita xiso. Hiyaiya, exakere atyo Iraiti Waiyexe nexa:

“Hinama, hanamaiya atyo iraehena hawaiyaneha tahi hoka hatyoiya atyo katyakekotyaka”, nexa.

<sup>2</sup> Nirae naokowita xiso iniyalahare tyomehenerenai nahitita hiye, exahe xiso haiyaharenai xoaha kakoa. Ihinamakini notyohenere xinali xowaka koxaka nirae xihije hoka kalikini seko notyaonita hoka niraehitiya xihije: “Etarekityaite nali notyohitiya hoka maisa xalahare nairakoanehahitita”, nomi. <sup>3</sup> Hatyaoseta atyo ite xityakekohena Cristo iraetere nohiyeti. Cristo atyo waiye mohena xiso xakore hoka maisa atyo maiyaterehahre xini. Hotikijita atyo haiyatere xomana. <sup>4</sup> Alitere atyo kaberekotyakehenere atyalihose xaimaholatyaka hiye xowaka maisa kinaterexe ene, xakore hoka Enore niyatere hiyeta atyo kaseheta. Hatyo akereta wiso tehitia emaiyareterene akereta wisaonita. Xakore hoka hahotalita wisaonitete ekakoa hiyeta atyoite wikinatere wisaohena Enore niyatere hiyeta wakahinaetya maheta xiso.

<sup>5</sup> Xisota xahekoharetyoahena, xahasakaharetyoahena xawenane kakoa, xoana aliterexe xamani ala xikinatere xisaonita xityakekone kakoa hoka. Hoka aliterexe atyo waiyekehalakita xomana Jesus Cristo kaxaikota minitereharenai xiso, hoka ameteniya atyo maisa xityakekohititene hoka maisa waiyekehalakihitita xomana. <sup>6</sup> Hoka kasani waiyekehalaka xomana naokita. Hiyaiya, wiso atyo maisa wamatyakekotyarene.

<sup>7</sup> Enore hiye wiraexaita xomana, kasani maisa iniyalahare xisoma waokare. Maisa atyo hatyohahrenae hiyeta wihatene katyakekotyaka maheta xini. Exahe wiso akere atyo wamatyakekotene, hoka kasani atyo xoalinihare waiyexe taita xisoma waokita. <sup>8</sup> Hiyaiya, maisaiya atyo xoarehare aliterexe nahalakoa wisomita, xakore hoka aliterexe taita atyoite wisomehena. <sup>9</sup> Hatyo hiyeta atyo wihalahareta, wiso maisa wikinatere wisaonare xiso xikinatere xisaonitete hiyeta kakoa. Wiraexaita tehitia xomana waiyexenai xisaona maheta.

<sup>10</sup> Notyoa nowaiyehenere xiso nahitita naxairaita exe babera xomana. Kasani nali notyohenere xowaka maisa kinatyaxa nirae xikakoa naokowiye Xekohaseti isehenere iyateliti nomani kakoa hoka. Xakore hoka exe iyateliti atyo kahinaetya maheta xiso xawenane kakoa, maisa atyo namawenekoaretya maheta xini xiso.

### *Tyawaxati Miyane*

<sup>11</sup> Xoaha taita nohinaehahrenae, waiyexe maniya taita xisaohena. Waiye xasema niraeterehahrenae. Hakakoaira xisaohena, exahe ximehexaikohare xoaha xisaona. Nikare ite xisaona hoka Enore xawaiyetyati kakoare, wenati waiyexe kakoare xoaha heko kaxaiko xiso. <sup>12</sup> Xikatyawaxehena xihinaehahrenae hiye hoka xasohitanakolisahene.

Tyotya Enore anere hotyalinai haxakaisakehenahitaha aoka xihije.

<sup>13-14</sup> Kasani Xekohaseti Jesus Cristo kaxaiko xiso, exahe Enore awaiyitya xiso, exahe Isekohaliti Waiyexe aihalahalinikisa xoaha xiso naoka, xoaha taita.

## Gálatas

### *Tyawaxati*

<sup>1</sup> Natyo Paulo naxairaty a exa babera. Nokakawasaki iraiti kakoare notyaona maheta. Maiha atyo halitinai xaokalita xini, xakore hoka Jesus Cristo, Enexe Enore ekaseki-hetehenerene xoaha xaokala ximita atyo. <sup>2</sup> Tyotya ali wihinaeharenai tyaaniterenai nohaliye haxakaisaka aokaha tyakekohatiyenai Galácia yerenai hiye. <sup>3</sup> Kasani waiye, mehexaikohare xisaona naokita Wexe Enore hiyeta, Wiyekohase Jesus Cristo xoaha hiyeta.

### *Cristo Atyo Waini Womana*

(1 Coríntios 15.2-4; Tito 2.11-14; 1 Pedro 2.21-25; Apocalipse 1.5)

<sup>4</sup> Wexe Enore xaokalita Xekohaseti Jesus waini womana hoka iniyalahare wománe emaisaheta wonita maheta hoka waiyexe maniya moheta wiso maheta. <sup>5</sup> Hatyo hiyeta maika Enore kakoa kaihalaharetyaketa mene, xoaha.

### *Haterore Iraiti Waiyexe*

<sup>6</sup> Nahakaharetyoa xamokita haxerore xahalakijitere kawijitere xiso Cristo nawaiyexehare hiyeta hoka hatya “iraiti waiyexe” xema xisaonitere hiyeta. <sup>7</sup> Aliterexe atyo maisa hatehitiya “iraiti waiyexe” aka. Exakere atyo niraeta, haiyaharenai emaxahalikijitere xisonae atyo éhawareharetyaha Cristo nalitare Iraiti Waiyexe aokowitaha. <sup>8</sup> Xakore hoka hatyatereya, exahe wiso, exahe xoana anjo enokoatare xamaniya xakai xihije hatya “iraiti waiyexe”, hawareharexe etake wiyakaihenere nonitata hoka hatyoiya atyo waiye mawenekoaretyaka. <sup>9</sup> Koxaka atyo exakere wirae, xakore hoka wiraehitiyene: hatyaiya xakai hatya “iraiti waiyexe” hawareharexe etake wiyakaihenere nonitata hoka hatyoiya waiye mawenekoaretyaka.

<sup>10</sup> Xoana exakere ala niraeta hoka kasani halitinai tyakeko natyo naokita? Maiha nikarexe xini. Kasani atyo Enore tyakeko natyo naokita. Xoana kalikini ala halitinai nemaxalokisa naokowita? Nikarexeya atyo hoka maisaiya atyo Cristo wakanehare xini natyo.

### *Paulo Iraiti Xakaisasehare Tyaohenere Tahi*

<sup>11</sup> Xasemehena, nohinaeharenai: Waiyexe Iraiti noxakaitere xihije atyo maisa halitinai xaomatikira xini. <sup>12</sup> Maisa atyo hatya xini isene nomani, exahe maisa xala hare aotyakijita natyo, xakore hoka Jesus Cristo terota atyo hotikisene nomani.

<sup>13</sup> Kala koxaka xasema nawenani toahiya judeunae xaotyakira xema maniya notyaonitatere xowakiyere. Hatyo xowakiya Enore koamaniya tyaoniterenae xahita noxalijinjharet kalore. Naiyateretyoita exahitaha, kasani namehotyahene naokowita hoka.

<sup>14</sup> Hatyo xowakiya judeunai xaotyakisakaho xema notyaonita. Naiyateretyoita nohinaeharenai xahexe, kasani wahetakomaniyerenae xaotyakira xema terota notyaona naokowita hoka.

<sup>15</sup> Xakore hoka Enore hawaiyexehare hiyeta, nomawenaniharetatere xowakiya haomanere aoka natyo nahaka enomana maheta. <sup>16</sup> Hatyaoseta Haisani hotikisa nomani hoka majudeuneharenai hiye Waiyexe Iraiti Ityani tahi noxakai aohenerere xowaka, maisa xala hare natawita aotyakisa natyo maheta. <sup>17</sup> Exahe tehitija hoka maisa noxani Jerusalém xeta, nahitita iraiti kakoarenai tyaohenerenae nowaiya maheta xini. Xakore hoka Arábia koa noxani. Hatyaoseta nahaikoaheta Damasco xeta. <sup>18</sup> Hatyohekota hanama terehokoane najikinita noxani Jerusalém xeta, Pedro nowaiya maheta, hoka hinama semanane notyaona ehaliya. <sup>19</sup> Maisa atyo hatyanae hekoti iraiti kakoarenai nowaiyita. Xekohaseti ximarene Tiago taita atyo nowaiya.

<sup>20</sup> Hiyaiya, Enore haotita atyo niraeta hoka naxairaitere atyo aliterexe.

<sup>21</sup> Hatyaoseta noxani Síria koa, Cilícia koa xoaha xeta. <sup>22</sup> Hatyo xowaka tyakekohatiye hotyalinae Judéia koa nali tyaoniterenae maisa waiyareha natyo. <sup>23</sup> Haiyaharenæ nexa iraetere notahi taita semahitaha: “Etake xalijiniharetere wiyahita hoka wityakekone mawenekoaretya aokowitere atyo kalikini xakaihakaita halitinai hiye”, nexahitere. <sup>24</sup> Hoka ihalaharahitaha Enore kakoa nohiyeti.

## 2

*Paulo, Haiyaharenæ Iraiti Kakoare*

<sup>1</sup> Hatyaoseta 14-terehokoane najikinita nahaikoaheta Jerusalém xeta Barnabé kakoa, exahe Tito tehitia nanoloka. <sup>2</sup> Enore hotikisa nomani, nali noxanini aoka hoka noxani. Nali wahohisakoatyakakoa wihinaeharenæ tyakekohatiyenæ nityohalitiranai kakoa hoka nawaiyekehala katya Iraiti Waiyexe noxakaitere majudeuneharenæ hiye akiti enomanaha. Kasani maisa nohateni notyomehenrehare, exahe notyomiterehare xoaha meta naokare hoka nirae ekakoaha.

<sup>3</sup> Nohinae Tito atyo grego, xakore hoka maisa atyo kaxaikotyaka enomanere milihe kaxaokakita. <sup>4</sup> Xakore hoka haiyaharenæ enomanere milihe xaikotyaka aakahitaha. Hatyo halitinai tyakekohatiyenæ aokowita hoka isoaha tyakekohatiyenai kaiserehare koni. Hatyo halitinai atyo isoaha tyakekohatiyenai koni wahakotiterenai akereta, waiyaha maheta waiye wisaonitere Jesus Cristo koamaniya hiyeta. Kasani atyo wakahare akereta mohenahitaha wiso aokowitaha hoka. <sup>5</sup> Xakore hoka maisa ini hekoti wasema iniraineha waokowita, kasani kalikini Iraiti Waiyexe aliterexe kakoare xisaona maheta.

<sup>6</sup> Xakore hoka haiyaharenæ motya kaxaikotyatiyenai. Hoka exakere atyo niraeta: Hiayiha, exahe atyo xoarehareha ene xamani hoka Enore atyo maisa halitinai hokoane-harene hiyeta xini aokitene haomana. Haki ite niraehitiya, hatyo kaxaikotyatiyenai maisa xoare hare waitare haxahekola tahi iraetaha nohiye. <sup>7</sup> Xakore hoka waiyekelaka enomanaha, Enore isehenere Iraiti Waiyexe noxakaini niyahare majudeuneharenæ ana maheta, Pedro ana isehenere ehatene hoka xane xakaihenere iraiti judeunae hiye akereta akiti. <sup>8</sup> Enore niyatere hiyeta atyo iraiti kakoare notyaona majudeuneharenæ ana, Pedro iraiti kakoare kaxomokakehenere judeunae anere akereta.

<sup>9</sup> Hatyo hiyeta Tiago, Pedro, João xoaha kaxaikotyatiyenæ aakahiterenai ana waiyekelaka Enore isehenere nomani nohateni hoka hahinaehare aokaha natyo, Barnabé xoaha. Wihinaehare tyare atyo waokakakoa hoka wiso atyo majudeuneharenæ koni wahaka waokowi hoka hatyoha atyo judeunae koni hakaha aokowiha. <sup>10</sup> Kasani haiyaharenæ tyakekohatiyenæ maxiyehareharenæ tyaoniterenæ judeunai koniyer-enai taita kahinaetyaka aokaha. Hatyohare akiti terota nahekoita hoka hatyohare notyoma naokowi.

*Paulo Watyali Pedro*

<sup>11</sup> Hatyo najikinita, Pedro tyohenere Antioquia nali xowaka, nowatalini tyotya naliyerenæ haotita, maisa ehekore tyaonare hoka. <sup>12</sup> Tiago axikahenerenæ haiyaharenæ makaokeneharene nahitita, Pedro kanakairita ene wihinaeharenai majudeuneharenæ kakoa. Hatyaoseta kaokaha hoka maisa kanakaira aokowihitita majudeuneharenæ kakoa, mairita majudeuneharenæ nomanere milihi xaikotyaka aakahitere kakoa hiyeta hoka. <sup>13</sup> Haiyaharenæ wihinaeharenæ judeunae tehitia mairaha hoka Pedro tyaonitere akereta tyaonaha, exahe Barnabé kakoita hoka nikare tyaona.

<sup>14</sup> Hatyaoseta nowaiyehena atyo, maisa ehekore tyaonareha, maiha Iraiti Waiyexe aliterexe aokitere akereta xini tyaonitaha hoka nomi Pedro hiye tyotya ehaotyahitaha: “Hiso atyo judeu, xakore hoka maisa atyo judeu akereta xini hisaonita, majudeunehare akereta atyo hisaonita. Xoanere hoka haiyateretyoita majudeuneharenæ xahita, hoka kasani judeunai tyaonitere akereta tyaonaha haokita?” nomi ihiye.

*Judeunae, Majudeuneharenæ Waiyexe Maniya Kaxomokake henahitaha Ityakekoneha Hiyeta*

<sup>15</sup> Wiso atyo judeunae konitare nawenaneharenae hoka maisa atyo iniyalahare no-maseharenai xini wiso majudeuneharenae akereta. <sup>16</sup> Xakore hoka waiyekehalakita atyo womana, tyotya tyakekohenerenai Jesus Cristo hiyeta Enore haliti waiyexenai aohititereharahene, hoka maisa atyo judeunai Xaotyakiraho hiyeta xini. Nikareta tehitiya wiso judeunae wityakeko Jesus Cristo hoka Enore haliti waiyexenai aoheta wiso maheta, Cristo wityakekohenere hiyeta, hoka maisa atyo judeunai Xaotyakiraho hiyeta xini. Hiyaiya, maisa atyo xala hare Enore haliti waiyexe aokare, judeunai Xaotyakiraho aokitere akereta tyaonitere hiyeta. <sup>17</sup> Kasani Jesus Cristo hiyeta Enore haliti waiyexenai aoheta wiso waohena hoka wahotikisoawita atyo hoka aliterexe iniyalahare nomaseharenai wiso, majudeuneharenae akereta. Xoana nikare ala hoka Cristo kahinaetita iniyalahare? Maisa nikarexe xini!

<sup>18</sup> Hoka notyomehetehitiyaiya koxaka nahatahenerehare hoka hatyohare atyo hotikijita nomawenanehalini judeunai Xaotyakiraho xema. <sup>19</sup> Hatyo hiyeta, hatyo Xaotyakiyaho hiyeta, nowaini. Nokaxaisaki hatyo Xaotyakiyaho hiye, nawenani tyao-heta Enore anere maheta. Nokaxaisaki atyo Cristo kakoa atyalihose xaimaholatyaka hiye. <sup>20</sup> Nikare hoka maisa atyo natyoheta xini notyaonita, xakore hoka Cristo atyo tyaonita nohiye. Exahe exe kalikini nawenani tyaonitere atyo notyakekotere Enore Ityani xema tyaonita. Hatyo atyo awaiyetya natyo hoka hatyota isoawihare nomani. <sup>21</sup> Maisa atyo Enore xawaiyera natyo namahokoanetyare. Hoka hatyo judeunae Xaotyakiraho hiyetaiya atyo Enore haliti waiyexe aohitita hoka nikare atyoala hoka Cristo kamane maisa xoarehare tyomare.

## 3

*Wityakekone Hiyeta Atyo Enore Haliti Waiyexe Aokita Wiso  
(Romanos 1.16; 3.21-26; 4.5; 5.1; 8.1)*

<sup>1</sup> Kaxiyani, xiso Galácia yerenae, ximaotikone! Xala maoseratyat xiso? Hiyaiya, xiyo-sehaotita kaxawaiyekehalakatyaka kaiserehare Cristo kamane atyalihose xaimaholatyaka hiyexe tahi. <sup>2</sup> Exe taita xekoaxahena: Xoana Enore Nisekohare kaxekakehenere xomanala Xaotyakiyaho aokitere akereta xisaonitere hiyeta, xoana xasema, exahe xityakekohenere Iraiti Waiyexe hiyeta korála? <sup>3</sup> Xoana hoka ximaotikone xisaonita? Hetati ene Enore Nisekohare niyatere xema xisaonita hoka kalikini atyo xi-yatere xema taitehena xisaona xaokowita? <sup>4</sup> Xoalinhare howitihare tyaohenere xomana maisa xoarehare aotyakijita xiso? Maisa atyo aliyakere xaka. <sup>5</sup> Xoana Enore ala haisekohare isehena xomana, exahe maomakahare harenae tyomehena xinekoni hoka Xaotyakiyaho aokitere akereta xisaonitere hiyetalá? Maiha kore atyoala xasemehenere, xityakekohenere Iraiti Waiyexe hiyeta xini?

<sup>6</sup> Exakere atyo Iraiti Waiyexe nexa Abraão tahi:  
“Abraão atyo tyakeko Enore niraene hoka ityakekone hiyeta atyo Enore haliti waiyexe aokene”, nexa.

<sup>7</sup> Hatyo hiyeta waiyekehalakenaite xomana. Hiyaiya, Abraão jikolaharenai kaiserehare atyo etakehare tyakekotereharenai. <sup>8</sup> Iraiti Waiyexe nanekoa koxaka xairatyoare tyaonita majudeuneharenae tyakekone hiyeta, Enore haliti waiyexe aohenaherene tahi. Hatyo hiyeta, hatyo nahitita Abraão hiye Iraiti Waiyexe kairaetyaka hoka nexa:

“Maika hihiyeta tyotya haliti hotyalinae waikohekua tyaoniterenai Enore waiye moka”, nexa.

<sup>9</sup> Abraão atyo tyakeko Enore niraene hoka ityakekone hiyeta waiye mokene. Nikare tyotya tyakekohenerenae tehitiya waiye kaxomokakita hatyo akereta. <sup>10</sup> Judeunae Xaotyakiraho xema tyaoniterenae atyo Enore xeharene katyahe tyaonahitaha. Hiyaiya, exakere atyo Iraiti Waiyexe nexa:

“Tyotya etakehare matyakekone miniterehare, tyotya xairatyoare tyaoniterehare Xaotyakiyaho Baberanexakoa atyo Enore xeharene katyahe tyaonita”, nexa.

<sup>11</sup> Maisa atyo xalahare Enore haliti waiyexe aokare enawenane Xaotyakiyaho xema hiyeta. Hiyaiya, exakere atyo Iraiti Waiyexe nexa:

“Enore ityakekone hiyeta haliti waiyexe aohetehenere atyoite tyaota mene hatyakekone hiyeta”, nexa.

<sup>12</sup> Hoka Xaotyakiyaho atyo maisa tyakekoti hiyeta xini kaotyaka. Xakore hoka exakere atyo Iraiti Waiyexe nexa:

“Xala xamaniya atyo tyotya Xaotyakiyaho aokitere akereta tyaonita hoka tyaota meniya atyo Xaotyakiyaho hiyeta”, nexa.

<sup>13</sup> Xakore hoka Cristo atyo iniyalahare kaxomokaka wiwenekoare hoka iyeheta wiso Xaotyakiyaho iniyalahare mokitere wiso nonitata. Hiyaiya, exakere atyo Iraiti Waiyexe nexa:

Xala xamani atyo kaxerahokaka atya hiye hoka hatyo atyo maisa waiyexe xini, nexa.

<sup>14</sup> Nikare tyaona Enore waiyexe wenati aohenere Abraão hiye kaxekaka majudeune-harenae ana maheta Jesus Cristo hiyeta, exahe Isekohaliti Enore axikatya aokowihenere hoka kaotyaka wityotya womana maheta wityakekone hiyeta.

### *Xaotyakiyaho Xekati Xoaha Xaokaka*

<sup>15</sup> Nohinaeharenae, tyotyaki nihatyaka kaomakiterehare hiye ite naimenekota: Hinamahareya xoalinihare tahi iraekakoaha hoka hakakoaiya ahekotyaha tyomahitere tahi hoka haexareha kakoare mokahene hoka mahaiya xalahare jiyahaotitene, exahe aexahitita hatyo hinamanae xahekola. <sup>16</sup> Nikare Abraão ana Enore wenati waiyexe isa aokowi, exahe ijikolahare ana xoaha. Maisa atyo Iraiti Waiyexe nita xini: “Exahe ijikolaharenai ana xoaha”, motya etakehare kahare haliti xaokaka ene xini iraeta. Xakore hoka nexa atyo: “Exahe ijikolahare ana xoaha”, hatyo atyo haterore xaokaka. Hatyo atyo Cristo.

<sup>17</sup> Exakere atyo nirae naokowita: Enore atyo irae Abraão kakoa hoka iraetere akereta tyoma aokowi. Hoka Xaotyakiyaho 430-terehokoane najikinita kaotyakehenereya atyo maisa aliyakere jiyahaotita Enore ahekohenere, exahe emaisahitita isa aokowihenere-hare. <sup>18</sup> Hiyaiya, étakehare Enore ijitereharenaiya atyo Xaotyakiyaho hiyeta hoka nikare atyoala hoka ijitereharenai atyoala maisa isa aokowitreharenai hiyeta xini ijita. Xakore hoka Enore isehenerehare Abraão ana atyo isa aokowihenere hiyeta isa.

<sup>19</sup> Nikare hoka xoare niyahare Xaotyakiyaho kaotyaka? Kaotyaka atyo hotikisa maheta Enore xahekola kakoa kahalakoaharetere-hare. Hoka Xaotyakiyaho ene atyo kinatere tyaohena tyohenere Abraão jikolahare kijiya taita. Hatyo ana atyo Enore xoalinihare waiyexe isa aokowi. Hoka anjonai atyo isene hatya haliti ana, hoka hatyo atyo ekaxaikotyase tyaona. <sup>20</sup> Xakore hoka haterore tahi atyo kairaetyakehena hoka maisa atyo ekaxaikotyase aka. Hoka Enore atyo haterore.

### *Xaotyakiyaho Akiti*

<sup>21</sup> Xoana nikare ala hoka xaotyakiyaho mahokoanetita Enore isa aokowitere harenae? Maisa nikarexe xini. Hiyaiya, hatya xaotyakiyaho atyo kaxekakere haliti waiyexe maniya moheta maheta hoka xaotyakiyaho hiyetaiya atyo Enore haliti waiyexe aohitita.

<sup>22</sup> Xakore hoka Iraiti Waiyexe atyo xakaita hoka tyotya halitinai atyo iniyalahare niyatere konita tyaonahitaha aoka. Nikarexe kawenatyakita, kasani Jesus Cristo katyakekotyakitere hiyeta tyotyaha ana kaxekaka maheta Enore isa aokowitreharenai tyakekotereharenai ana.

<sup>23</sup> Xakore hoka tyakekoti kaotyakehenere nahitita atyo xaotyakiyaho kaxaikota wiso hoka berexo ako tyaonitere akereta moka wiso, tyakekoti kaotyakene kahotikisake-henere kijiya. <sup>24</sup> Wikaxaikotyase akereta xaotyakiyaho kaxaiko wiso Cristo tyoanene kijiya, hoka wityakekone hiyeta Enore haliti waiyexe aoka wiso maheta. <sup>25</sup> Hoka kalikini atyo tyakekotyati ferakene kaotyaka hoka maisaiya atyo xoare maheta wikakaxaikotyase wisaohitita hoka kaxaikohitita wiso.

<sup>26</sup> Hiyaiya, xityakekohenere hiyeta atyo Enore ityaninae xisaona, Jesus Cristo kakoa hahotalita xisaonitere hiyeta. <sup>27</sup> Hiyaiya, hahotalita xisaonitere Cristo kakoa hiyeta

atyo xikabatixatyaka. Nikare hoka Cristo hárero akereta terota atyo xisaona. <sup>28</sup> Hatyo hiyeta maisa atyo hawareharexe xini: judeunae exahe majudeuneharenae, wakaharenae exahe mawakaharenaharenae, enanae exahe ohironae xoaha hoka. Xityotya atyo xihaterore, Jesus Cristo kakoa hahotalita xisaonitere hiyeta. <sup>29</sup> Koxaka atyo Cristo anerenae xisaona hoka hatyo hiyeta Abraão jikolaharenai atyo xisaona hoka kaxekakaite xomana Enore isa aokowihenereharenai xomana.

## 4

<sup>1</sup> Exakere niraehitiya naokowita: Kalorexe ityani xoimitatere xowaka atyo wakahare akereta tyaonita, tyotya hanexe xiyehare xekohasehare tehitia xakore hoka.

<sup>2</sup> Xoimitatere xowaka haiyaharenae aotyakijitene, exahe ixiyehare harenae kaxaikota enexe xaimenekolaose kijiya. Hoka hatyo enexe xaimenekolaose hikoahena hoka kalorexe tyaonita.

<sup>3</sup> Nikareta tehitia wiyoimitatere wawenane kakoa xowaka isekohaliti ali waikohekoa kaxaikotyasehare aokitere akereta ene wisaonita. <sup>4</sup> Hatyaoseta xane enaose hikoa hoka Enore axikatya Haisani. Haloti tyakota tyaona hoka judeunae xaotyakisakaho xema tyaona, <sup>5</sup> iyeheta maheta judeunae xaotyakisakaho xema tyaoniterenai hoka Enore ityaninae wisaona maheta.

<sup>6</sup> Hotikisa maheta womana haisaninai aohenere wiso, Enore axikatya Haisani Nisekohare womana hoka hatyo Isekohaliti kawijita: “Abá, abá”, nita. <sup>7</sup> Nikare hoka maisa atyo wakaharenaeheta xini xiso. Ityaninae atyo xiso. Koxaka atyo ityaninae xisaona hoka haisaninae ana isa aokowitreharenai atyo ite isa xomana.

*Paulo Mawaiyehare Gálatas Yerenai Kakoa*

<sup>8</sup> Toahiya Enore maniya ximawenaneharetatere xowaka ene enore metalaharenae wakaneharenae xisaonita. Maisa atyo aliterexe enoreha xini. <sup>9</sup> Xakore hoka kalikini atyo Enore maniya xisaonita, exahe Enore aoka xiso haomanere maheta. Nikare hoka xoana hoka xahaikoaheta xaokowita hatyo isekohaliti maiyaterehare tyaoniterenae ana, exahe xoalini hare maomanehare ana xaokowita? Xoana hoka ewakaneharenae xisaona xaokowihitiya? <sup>10</sup> Xoana hoka haiyaki ferakene, mijini, kamaikene, enonene, terehokoane masakare waiyeta xomana?

<sup>11</sup> Nomawaiyehareta kalore xikakoa. Xoana naotyakihenere xiso ala maisa xoarehare tyomita xomana?

<sup>12</sup> Nohinaeharenae, kasani natyo akereta xisaona naokita. Xiyaiya, xiso akerexeta natyo. Exahe maisa xoare iniyalahare xisomita nokakoi. <sup>13</sup> Xoana xotita hetati Iraití Waiyexe noxakaihenere xihije? Hatyo xowaka nohokakita hoka notyoa xinali hoka noxakai xihije Iraití Waiyexe. <sup>14</sup> Nohokakita hare hoka kahare nahakakisa xiso xakore hoka maisa xahalakijita, maisa xikirawaneta natyo. Waiye xamoka natyo, anjo Enore nalitare akereta, Jesus Cristo akereta xamoka natyo.

<sup>15</sup> Exowaka ene xihalahare xisaonita. Exakere ite nomi: kaxaitoakisakereya xiyosenai hoka xaitoakiseniya hoka xiseniya nomani! Hoka hatyo najikinita xoana xisaona?

<sup>16</sup> Xoana kalikini ala xahalakoahare notyaona aliterexe niraihenere hiyeta?

<sup>17</sup> Exe halitinae waiyexehare tyaonahitaha xiyahita, xakore hoka maisa atyo waiye maniya xini exahekolaha tyaonita. Kasani atyo kikihenahitaha xiso nonitita aokowitaha hoka exemaha xisaona maheta noximi maniya xisaonitere akereta. <sup>18</sup> Waiyeya mokahitaha xiso, waiyeya ahekotyaha xikakoa nohaotita, exahe nomakanihena hoka ehekoreya.

<sup>19</sup> Nohinaehare, noxiyakawalinae: hatya ohiro kaisaniro hiye ityani kawetere akereta noxamaikohalini nokihixita xihiyeta. Heko ite namaikoharehena Cristo koamaniya xikinatere xisaohenere kijiya. <sup>20</sup> Kalikiniya nali xihaliya notyaonita hoka hahekoreya niraе xikakoa. Kalore nomawaiyehareta xikakoa.

*Agar, Sara Xoaha Xaimenekola*

<sup>21</sup> Xiso xaotyakiyaho xema xisaona xaokowiterenae: xiraihena hoka nasema. Xoana maisala xasemita xaotyakiyaho iraehenerehare? <sup>22</sup> Exakerexe xakai: Abraão hinama

mokose kaisani aoka. Hatya atyo wakahalo Agar ityani, hatya atyo exanityo kaiserehare Sara ityani xoaha. <sup>23</sup> Wakahalo ityani atyo ekaisanisakahare kaiserehare hoka exanityo ityani atyo Enore isa enomana aokowihenere.

<sup>24</sup> Hatyoharenai atyo aimenekoita: Hinamahalo atyo aimenekoita hinama wenati tahi akiti. Tyairi Sinai atyo Agar hotikijita. Hatyo aimenekoitete hiyeta nawenanenae atyo wakaharenae. <sup>25</sup> Agar atyo aimenekoita tyairi Sinai, Arábia koa nali, exahe Agar aimenekoita tehitiya wenakalati kalikiniye Jerusalém. Hatyokoare hotyalinai atyo tyotyaha wakahare tyaonahitaha.

<sup>26</sup> Hoka Sara atyo aimenekoita wenakalati Jerusalém enokoa tyaonitere. Hatyo atyo maisa wakahalo xini hoka wityo atyo. <sup>27</sup> Hiyaiya, exakere atyo Iraiti Waiyexe nexa:

Hiso ohiro, maisa kahare kaisanihenolo: Maika hihalahalohena! Hiso maisa xoana xowaka xoima kahe kakoa hiwaolitihenolo: Maika hakawiyahena hihalahalone kakoa. Hiyaiya, ohiro ehalakisakahalo atyo ite kahare kaisanihena exanene kakoa tyaonitolo nonitata.

<sup>28</sup> Hoka xiso nohinaeharenae atyo Isaque akereta, Enore ityaninai, iraehenere Abraão kakoa hiyeta. <sup>29</sup> Hatyo xowakiya ekaisanisakahare tyaohenere kirawaneta xoima Enore Nisekohare hiyeta tyaohenere. Nikare atyo kalikini kawenatyakita.

<sup>30</sup> Xakore hoka aliyakerexe Iraiti Waiyexe nexa? Exakerexe atyo nexa: Haxikahetehena wakahalo, ityani kakoita. Hiyaiya, wakahalo ityani atyo ite maisa hanexe wenekoare tyaonita. Mawakahalonehalo ityani atyo ite hanexe wenekoare tyaona.

<sup>31</sup> Hatyo hiyeta, nohinaeharenai, maisa atyo wakahalo ityani xini wiso, xakore hoka ohiro mawakahalonehalo ityaninae atyo wiso.

## 5

### *Xaotyakiyaho Xamani Mehhexaikohaliti Xamani*

<sup>1</sup> Cristo atyo iyeheta wiso wiwakaharene nonitata hoka mawakaharenehare moheta wiso. Hiyeta hoka heko mawakaharenehare xisaona, awa atyo wakahare maniya xisaohitiya.

<sup>2</sup> Xasemehena, natyo Paulo niraeta xihije: Xomanere milihe xaikotyaka xemaiya xisaona xaokowita hoka Cristo atyoala maisa xoarehare tyomare xomana. <sup>3</sup> Niraihitia xikakoa: Hatyatere nomanere milihiya kaxaikotyaka hoka xaotyakiyaho aokitete akereta atyoite tyaohena. <sup>4</sup> Haiyaharenai xaotyakiyaho xema hawenaneha hiyeta Enore haliti waiyexe aokahene aokiterenai atyo haware tyaonita Cristo nonitata, exahe Enore xawaiyera xoaha nonitata. <sup>5</sup> Hoka wiso atyo watyahaharetyoita Enore haliti waiyexe aohenere wiso xahita. Hatyohare xahita atyo watyahita, Enore Nisekohare tyaonitere wikakoa hoka wityakekoterene hiyeta. <sup>6</sup> Hiyaiya, hahotalita atyo wisaohena Jesus Cristo kakoa hoka maisa atyo ehawareharetyare wiso, xoana exaiko nomanere milihisakahare xamani wiso, maisa xamani hoka. Hoka wityakekone hiyeta xawaiyetyati tyaonitere wihiye atyo masakare waiye.

<sup>7</sup> Waiye ene xisaonita. Xala nikare moka xiso hoka maisa xityakekohitita aliterexe?

<sup>8</sup> Aliyakere hoka nikare moka xiso? Enore atyo aoka xiso haomana hoka maisa atyo hatyo xini nikare moka xiso.

<sup>9</sup> Hiyaiya, exakere Iraiti Waiyexe nexa:

Inira trigohe kaoretyakala, xakore hoka hakakoare etalokoehetita trigohe.

<sup>10</sup> Xakore hoka notyakekotata atyo xiso. Hahotalita wisaonitere Xekohaseti kakoa hiyeta atyo waiyekehalakita nomaní hoka waiyexe maniya ite xahekoheta naoka. Hoka xala xamani ite hatyo haliti nikare axomokanikisa xiso hoka Enore ite iniyalahare mokene.

<sup>11</sup> Nohinaeharenae, hekoya niraeta xaikonomanere milihisati atyo masakare waiye nomitaiya hoka xoanere hoka kirawanahitaha natyo? Hatyoharenaiya aliterexe nox-akaita hoka maisaiya xala hare ana enawenane howitihare tyaonare Jesus Cristo

atyalihoce xaimaholatyaka hiye wainihenere tahi noxakaitere hiyeta. <sup>12</sup> Hatyo haliti ahowitzihalikijitere xisoiya tyotya matakolasetyoawi haxowakita hoka ehekoreya!

<sup>13</sup> Nohinaeharenae, Enore atyo aoka xiso haomana hoka mawakaharenehare xisaona maheta. Mawakaharenehare xakore atyo xiso hoka xirihare, awatyo iniyalahare xawaiyetitrehare jiyahaotya xiso. Maika xawaiyetya kakoa, xakahinaetya kakoa harenne taita. <sup>14</sup> Hiyaiya, tyotya xaotyakiyaho atyo kaxakiranetyakeheta hoka haterore tyona:

Hawaiyetya haiyanae hawaiyetoawitere akereta.

Nikareya wisaona hoka xaotyakisatyaho aokitere akereta wisaona.

<sup>15</sup> Hoka haiyanai kakoaiya kawe xamokakakoa, xakomaniyatayakakoa harenai taita, kirakahare akereta hoka maika xirihare hoka maisa xisota xaisakakoita.

#### *Enore Nisekohare Exahe Halitinai Xahekola*

<sup>16</sup> Exakere atyo nomita: maika Enore Nisekohare xema xisaona, awa atyo xiyahekola halitinae awaiyititreharenae xema xisaona. <sup>17</sup> Hiyaiya, wawaiyetitreharenai atyo Isekohaliti aokitereharenai mahokoanetita, exahe Isekohaliti aokitereharenai atyo wawaiyetitreharenai mahokoanetita. Hatyo hinamanai atyo kahalakoahare kakoahitaha. Hatyo hiyeta maisaiya xisomitata xaotereharenai. <sup>18</sup> Hoka Isekohalitiya atyo kaxaikota xiso hoka maisa atyo xaotyakiyaho xema xini xisaonita.

#### *Iniyalahare Nomaseharenae Atyoite Maisa Xaneta Enore Nawenakala*

(1 Coríntios 6.9-10; Efésios 5.1-7; Colossenses 3.5-6)

<sup>19</sup> Wawaiyetitreharenae atyo mametaharenehare tyonita: ohiro watyalisaka, iniyalahare xahekore, kehaisaka kawenatyakitere, <sup>20</sup> enore metalahare kaxawaiyetyakiterehare, iroxare kakoare, ahalakoahare kakoiti, xalijini kakoiti, xehaliti, okoawahaliti, kalorexe xoakowisaka, haware xakini xahekotyaka, <sup>21</sup> okoawahare kakoati, hekiterehare, kehalahaliti tyomitrehare, exahe xoalini harenae nikaretereharenae hoka. Niraehitiya ite koxaka niraehenere: Nikare tyonitreharenai atyo ite maisa Enore nawenakala nali xane tyonita.

<sup>22</sup> Hoka Isekohaliti hiyeta atyo kaotyakita xawaiyetyati, ihalahaliti, mehexaikohaliti, maholawakiti, maxalijiniti, waiyexehaliti, tyakekoti, <sup>23</sup> maxahenerahaliniti, kaxaikotoyati harenae. Maisa atyo xoare xaotyakiraho exeharenae mahokoanetyare.

<sup>24</sup> Cristo koamaniya tyaoiterenae atyo atyalihoce xaimaholatyaka hiye eberekotyakahare akere haxahekolaha iniyalahare, ewaxirahare harenae mokaha. <sup>25</sup> Maika Isekohaliti wenati isehenere womana, kaxaiko tehitiya wawenane. <sup>26</sup> Maisaiya waokowiharetyoita, hatya waihalikijita, wokoawahare kakoita harenae.

## 6

#### *Maika Xakahinaetyakakoa*

<sup>1</sup> Nohinaeharenae, hatya iniyalahare tyomehena hoka xiso Enore Nisekohare maniya xisaoniterenae xiwatyalini, exahe xakahinaetene xoaha. Maika hatyoharenae xisomehena hoka ximixaokowiharetyoane kakoa xisoma. Maika xirihare, waiye aliya hoka xikahasakaharetyaka tehitiya. <sup>2</sup> Maika xakahinaetyakakoa. Nikareya atyo xisaona hoka Cristo xaotyakiraho xemaiya atyo xisaonita. <sup>3</sup> Xala xamaniya kalorexe aokowita, maisa xakoreya kalorexe xini hoka hatyota atyo maoseratyawita. <sup>4</sup> Maika hatya xakini hahatene hiye waiya. Ehateneya atyo waiye hoka hatyo háomane kakoa taitaiya atyo ihalahare, maisaiya xoare maheta hatya hatene kakoa aimenekoita hahatene. <sup>5</sup> Hiyaiya, hatya xakini atyo ite kolahena hakolala terotere.

<sup>6</sup> Maika Jesus Cristo niraene kalikinihena semitrehare haxaotyakisase kakoa irakakoahena xoalini hare waiyexe. <sup>7</sup> Awa atyo xamaoseratyawita, awa atyo Enore kakoa xikoexahaxatya. Hiyaiya, hatya haliti ite fehenereta imexeheta tehitiya. <sup>8</sup> Hafityaiya iniyalahare hahekoitere hoka hatyo iniyalahare hafehenere hiyeta ite hiyaisakaho

aimexanikiheta hiso. Xakore hoka hafityaiya atyo Enore Nisekohare aokiterehare hoka hatyo Isekohaliti hiyeta ite wenati matyotenehare aimexanikiheta hiso.

*Maika Heko Xityakekone Xema Xisaona  
(1 Coríntios 15.58; Efésios 6.10-18; Filipenses 4.1; 2 Timóteo 2.1-3)*

<sup>9</sup> Maisaiya waiye wománe kakoa wikirahareta. Hiyaiya, maisaiya wamaikohareta hoka enaoseya xane hikoahena hoka kalore ite kaxekaka womana. <sup>10</sup> Hatyo hiyeta maika tyotya haiyaharenae waiye wamoka, exahe Enore koamaniya tyaoniterenae masakare waiye wamoka.

*Tyawaxatinae, Xaotyakisatinae Miyane*

<sup>11</sup> Xiayiehena, kalose naxairaitere nokache kakoa.

<sup>12</sup> Haiyaharenae atyo hotikisoawiha hoka kaihalaharetyaka ekakoaha aokahitaha hoka aiyateretyoahitaha xiayahita, kasani xomanere milihi kaxaikotyaka aokahitaha hoka maisa kairawaiyakitaha Cristo atyalihose xaimaholatyaka hiye wainihenere hiyeta aokahitaha. <sup>13</sup> Xakore hoka hatyo exaiko nomanere milihiskaharenae maisa xaotyakiyaho aokitere akereta tyaonareha. Kasani kaxaikotyaka xomanere milihe hoka ahinityaha hatyo nikare xiháre hiye xakaferoxahenere kakoa aokahitaha.

<sup>14</sup> Hoka natyo atyo ite naokowiharetyoahena Wiyekohase Jesus Cristo wainihenere atyalihose xaimaholatyaka kakoa taita. Hiyaiya, atyalihose xaimaholatyaka hiyeta tyotya xoalini hare iniyalahare waini nomani, exahe hoka iniyalahare ana nowaini.

<sup>15</sup> Maisa atyo ininae hekoti hahekorexe xini xala xamani exaikonomanere milihiskahare, exahe xoana maisa xamani hoka. Xakore hoka wawenane atyo waitarehare tyaoheta hoka hatyo atyo masakare waiye kaiserehare. <sup>16</sup> Tyotya exehare xema tyaonitereharenae ana maika mehexaikohaliti, xairakoaneharetyati harenae tyaohena, exahe tyotya Enore koamaniya tyaonitereharenae ana xoaha. <sup>17</sup> Hiyeta hoka kasani maisa xala hare ahowitiharetya nawenani naokare. Hiyaiya, nokakaxoseharetyakitere noháre hiyexe atyo hotikijita Jesus wakanehare notyaonitere.

<sup>18</sup> Nohinaeharenae, maika Wiyekohase Jesus Cristo waiye moka xiso xityotya naoka, eko xoaha.

## Efésios

<sup>1</sup> Natyo Paulo, Jesus Cristo niraene kakoare notyaonita Enore xaokalita. Hoka naxikaty akeleka Enore koamaniya tyaaniterenae wenakalati Éfeso nali tyaaniterenae ana, exahe tyotya Jesus Cristo koamaniya tyaaniterenae ana xoaha. <sup>2</sup> Kasani waiye ximehexaiko xisaona wexe Enore hiyeta, Xekohaseti Jesus Cristo xoaha hiyeta naokita.

### *Enore Waiye Xomokareheta Wiso Cristo Hiyeta*

<sup>3</sup> Maika wihalahare Enore Wiyekohase Jesus Cristo Nexe kakoa. Hiyaiya, Cristo koamaniya wisaonitere hiyeta atyo waiye mokita wiso hoka ijita womana tyotya xoalinihare waiyexe enokoa nalitare. <sup>4</sup> Toahiya waikohe maomakaharetatere xowaka, Enore koxaka terota aoka wiso haomana, enomanerenai wisaona maheta, Cristo xema maniya wisaohenere hiyeta, hoka waiyexe maniya taita wisaona maheta ehaotita. Haxawaiyera wiso hiyeta <sup>5</sup> Enore koxaka terota haisaninae aowita wiso, Jesus Cristo xema maniya wawenane hiyeta. Haxaokala ximita nikare mokita wiso. <sup>6</sup> Hatyo hiyeta maika wihalahare Enore kakoa exawaiyera waiyexe hiyeta, exahe maxaimanehareta isehenere womana Haisani haxiyakawalahare xoaha hiyeta.

### *Waiyexe Maniya Nawenatyakeheta*

(1 Coríntios 15.2-4; Efésios 2.8-9; Hebreus 7.25-27; 10.10-14)

<sup>7</sup> Hiyaiya, Cristo wainihenere atyalihose xaimaholatyaka hiyeta atyo wikaiyakihitita, hoka iniyalahare wománenai atyo kamaotyanetyakihitita. Kaxiyani, waiye kaiserehare Enore xawaiyera, <sup>8</sup> kalore isehenere womana! Enore tyotya kalore hawaiyore exahe haxahekola kakoa, <sup>9</sup> tyoma aokowitere tyoma, hoka hotikisa womana hameteneta tyoma aokowiterehare Jesus Cristo hiyeta. <sup>10</sup> Hatyo tyoma aokowitere atyo ite haxowaka xane hikoahena enaose ferakene hoka ahohisakoahetehena tyotya enokoa, waikohekoa harenai tyaaniterenai hoka Cristo taita Exekohaseha tyohenenai.

<sup>11</sup> Hiyaiya, tyotya atyo kaomaka Enore xahekola exahe tyoma aokowitere akereta. Aoka wiso haomana enomanere hotyali wisaona maheta, Cristo xema wisaonitere hiyeta. Exahekola akereta, exahe hetati tyoma aokowihenere akereta. <sup>12</sup> Hatyo hiyeta wiso hotohare tyare atyo Cristo xahita watyahita hoka maika wihalahare Enore nerore kakoa.

<sup>13</sup> Nikare tehitia xisaona. Waiyexe iraiti xasemehenera isekohaliti niyasehare tahi iraetera xowaka xityakeko Cristo. Hoka Enore aokitere akereta kaferoxaty xiso haxiyehare akereta, Isekohaliti Waiyexe isehenere xomana xowaka. <sup>14</sup> Isekohaliti Waiyexe hiyeta ite Enore haomanerena ana isa aokowihenereharenai kaxekaka womana. Haomanere hotyalinae ana atyo ite wenati waiyexe isa. Hatyo hiyeta maika wihalahare Enore nerore kakoa.

### *Paulo Niraexala Éfeso Yerenae Ana*

<sup>15</sup> Hatyo hiyeta nasemehenera Jesus Cristo xityakekone, exahe xawaititere tyotya wihinaeharenai tyakekohatiyena. <sup>16</sup> hekota maisa niraexali Enore hiye nahalakisare. Notyaxemanya minita xiso niraexali kakoa. <sup>17</sup> Exahe naxita Enore, Wiyekohase Jesus Cristo Nexe waiyexe: kasani Haisekohare isa xomana hoka airihalinikisa, awaiyoloni kisa xiso, hotikisa xomana Enore hoka xawaiyore ekakoa maheta. <sup>18</sup> Naxitene, kasani axahekotyanikisa xiso hoka xiyaiya maheta xaokanatyakalati, exahe waiyekahalaka tehitia xomana kaxatyahakitere ana kawihenere xiso. Exahe waiyekahalaka maheta tehitia xomana xoalinihare waiyexe isa aokowiterehare haomanere hotyalinai ana. <sup>19</sup> Kaxiyani! Kalore atyo iniyatere tyaanita wiso tyakekoterenai kakoa. Kasani hatyohare waiyekahalaka xomana naokita.

<sup>20</sup> Hatyo iyatelite atyo etake Enore hotikihenere haiyatere mawayakahare hoka ekasekihetehenere Cristo hoka hafihini maniya mohenerene enokoa nali terota. <sup>21</sup> Cristo

atyo kaxaikota tyotya kalorexenai enokoa tyaoniterenai, xekohasetinai exahe iyatelitinaí kakoarenai harenai. Exe waikohekota tyotya xekohasetinai tyaoniterenai, exahe waitare waikohekota tyohenere xoaha xahehare atyo. <sup>22</sup> Enore atyo moka tyotya xoalinihare Cristo kiji katyahe, exahe Cristo hoka kaxekaka tyakekohenerenae ana, Exekohaseha tyaona maheta. <sup>23</sup> Cristo atyo kaiyihiti akereta enomanaha hoka tyakekohenerenae atyo Cristo háré akereta tyaonita hoka etalokoatitene tyotya akiti.

## 2

*Iniyalahare Wenati Maniyata Waiyexe Wenati*

<sup>1</sup> Toahiya ene ekamane akereta xisaonita, Enore ximatyakekonene hiyeta, exahe iniyalahare xománe xoaha hiyeta. <sup>2</sup> Hatyo xowaka ene iniyalaharaho xisaonita, exahe xityakekota ene etake isekohalitinae kaxaikotyasehare kaholahekoare tyaonitere. Hatyo atyo kalikini matyakekoneharenai kaxaikota. <sup>3</sup> Wiso tehitiya hatyoha akereta ene wisaonita hoka wiyahekola ewaxirahare xema ene wisaonita, exahe xoalini hare wahekoiterekare, wawaiyetiterekare xoaha xema ene wisaonita. Nikareta hatyo haiyaharenai akereta ene Enore iniyalahare xomokala mahetare ene wiso. <sup>4</sup> Xakore hoka kalore atyo xairakoaneharetyati kakoare exahe xawaiyetyati xoaha kakoare atyo. <sup>5</sup> Ekamane akereta ene wisaonita wimatyakekonene hiyeta, hoka ekasekiheta wiso Cristo wityakekohenera hiyeta. Hiyaiya, Enore nawaiyexehare hiyeta atyo xikaiyakeheta. <sup>6</sup> Enore atyo ekasekiheta wiso Jesus Cristo wityakekohenera hiyeta, exahe hahotalita moheta wiso enokoa nali xekohasetinai wisaona maheta haxawalita Cristo kakoa.

<sup>7</sup> Nikare Enore tyoma hotikisa maheta haiyanai wajikinita tyaohenerenai kahare xoalinihare waiyexe xema ana, haxawaiyera hiyeta atyo hotikisa hatyoharenai Jesus Cristo hiyeta. <sup>8</sup> Hiyaiya, Enore xawaiyera hiyeta atyo xikaiyakeheta xityakekone hiyeta. Hatyoharenai atyo maisa xinalitare xini tyoita, xakore hoka Enore xekane maxaimanehare atyo. <sup>9</sup> Xikaiyakehetehenere atyo maisa xaiyateretyoa xahahenere xaimane xini, hoka hatyo hiyeta maisaiya xala hare aokowiharetyoita. <sup>10</sup> Hiyaiya, Enore atyo tyoma wiso, hoka Jesus Cristo kakoa hahotalita wisaohenere hiyeta aenaetya wiso waiyexe wisoma maheta. Hatyo waiyexe atyo koxaka memere terota mohenera womana.

*Cristo Kakoa Haxawalita Nawenatyaka*

<sup>11</sup> Xotyaira toahiyere xawenane: maisa atyo judeunae xini xiso. Hatyo hiyeta atyo maxaikonomanere milihesakaharenai aokahita xiso judeunae. Hoka judeunae atyo haxaokakahita, "Kaxaikonomanere milihisakerenae", nita. Nikare atyo iraeta judeunae halitinae nómane xaokaka. <sup>12</sup> Hatyo xowaka ene haware xisaonita Cristo nonitata, mawaiyakahare hotyalinae ene xiso. Exahe maisa ene Enore haomanere hotyalinai aokiterenai koniye ene xiso, mawaiyakahare hotyalinae ene xiso. Exahe iraiti Enore haomanerena ana aohenere ene atyo maisa xomanere ene xini. Maisa ene xoare xatyahare, exahe ximaenorexahare ene xisaonita.

<sup>13</sup> Xakore hoka kalikini atyo Cristo kakoa hahotalita xisaonita hoka xiso seko Enore nonita tyaoniterenae atyo xikakolatya ehaliya xeta, Cristo atyalihose xaimaholatyaka hiye wainihenere hiyeta. <sup>14</sup> Hiyaiya, Cristo terota atyo mehexaikohaliti isa womana hoka judeunae, majudeuneharenai harenai hahotaliharerota moheta. Wainihenere hiyeta emaisaheta wirawaiyakakoane talare akerehare haware xakini mokitere wiso. <sup>15</sup> Hoka judeunae xaotyakiraho, ewakanahoha xoaha miyatya, hoka hinama hotyali tyaoniterenae atyo hahotaliharerota moheta, waitare hotyali exahe exema maniya nawenatyaseharenai. Nikare mehexaikohare mohenahitene. <sup>16</sup> Wainihenere atyalihose xaimaholatyaka hiyeta Cristo emaisatya irawanekakoati. Hoka atyalihose xaimaholatyaka hiyeta ahohisakoaheta hinama hotyali halitinae hoka hahotaliharerota mohenahitene hoka ekaokakihenahitiyene Enore haliya.

<sup>17</sup> Nikare Cristo tyoa hoka xakaihakaty tyotya ihiyeha Iraiti Waiyexe amehhexaikohalikisare. Xiso majudeuneharenai, seko xisaoniterenai Enore nonitata ana, exahe judeunai, koxaka ehaliya tyaoniterenai xoaha ana. <sup>18</sup> Wityotya judeunai, majudeuneharenai kakoita Cristo hiyeta wiyanne wikaokehena Wexe Enore nahalakoa Isekohaliti isehenere womana hiyeta. <sup>19</sup> Hatyo hiyeta xiso majudeuneharenae atyo maisa hahotalihareheta, exahe mawaiyahahrenae xini. Xiso atyo kalikini Enore anere hotyalinai terota xisaonita. Ehotyalihare atyo xisaona.

<sup>20</sup> Xiso atyo hati waharexe akereta. Jesus niraene kakoarenas, exahe toahiyere iraiti xakaisaseharenai atyo ehokolikase akereta. Hoka Jesus Cristo atyo ekotaxanekase akereta. <sup>21</sup> Hatyo ekotaxanekase atyo aiyatelikijita hati hoka hatyaoseta kinatere tyaonita. Ekakoitaite memere tyaonita hoka Xekohaseti hana waiyexe terota tyaona. <sup>22</sup> Nikareta tehitia xiso. Hahotalita Cristo kakoa xisaonitere hiyeta xikaomakita, hahotalita haiyanai kakoa hali hati xisaona maheta, hoka hatyo hati ako atyo Enore tyaonita Haisekohare maniyata.

## 3

*Paulo Hatene Majudeuneharenae Koni*

<sup>1</sup> Hiyeta hoka niraexaita Enore ana. Hiyaiya, natyo Paulo Jesus Cristo tahi akiti noxakaitere xiso majudeuneharenae hiyeta kalikini berexo notyaonita. <sup>2</sup> Kala koxaka waiyekhalaka xomana, Enore haxawaiyera hiyeta, exe hateniti isehenere nomani waiyexe xawenane niyahare tahi akiti naoka.

<sup>3</sup> Enore atyo hotikisa nomani haxahekola metaharexe. Awaiyekhalakatene nomani hoka ininae naxairatene. <sup>4</sup> Xakaexaretyaiya naxairahenere hoka waiyekhalaka xomana Cristo xahekola metaharexe waiyekhalakitere nomani.

<sup>5</sup> Toahiyia xowaka exe metaharettere maisa xala hare ana waiyekhalakere hoka kalikini atyo Enore hotikisa exe metaharexe Haisekohare hiyeta, waiyexe haxaotyakiraharenas exahe iraiti xakaisaseharenae xoahanae ana. <sup>6</sup> Exakerexe atyo exe iraiti metaharexe: Iraiti Waiyexe hiyeta atyo majudeuneharenae anere tehitia tyaona judeunai anere waiyexe tyaonitere enokoare. Haterore häre hiyeta atyo tyaonahitaha hoka Enore isa aokowihenereharenae enomanaha, Jesus Cristo hiyeta atyo enomanereha terota.

<sup>7</sup> Exomokakahare atyo natyo Iraiti Waiyexe noxakai maheta Enore xaokalita. Waiyoliniti, iyateliti harenae Enore isa nomani, kalore haiyatere hiyeta. <sup>8</sup> Natyo atyo tyotya Enore anerenae katyahakoreta, xakore hoka iraiti waiyexe xakaisasehare atyo aoka natyo. Cristo tahi wenati masakare waiyexe noxakai maheta majudeuneharenae hiye. <sup>9</sup> Nawaiyekhalakaty tehitia tyotya halitinae ana exahekola metaharexe maheta. Hatyo atyo tyotya xoalini hare tyoma, xakore hoka hatyo metaharexe wahakiya maisa hotikisare hekoti. <sup>10</sup> Exakere moka hoka kalikinita kalorexenae enokoa tyaoniteraharenas exahe anjonae xoaha ana waiyekhalaka maheta Enore nawaiyore, tyakekohatiyenae nawenane hiyeta. <sup>11</sup> Nikare Enore ahekotya, haxahekola matyotenehare hiyeta hoka hatyo haxahekola akereta tyoma mematene Wiyekohase Jesus Cristo hiyeta.

<sup>12</sup> Hoka Cristo xema maniya wisaonitere, wityakekohenerene xoaha hiyeta atyoite wimamairanehareneta wiyanne wikaoka Enore nahalakoa. <sup>13</sup> Hatyo hiyeta awatyo xamaikohare iniyalahare nokaxomokakitire xihiyeta hiyeta kakoa. Hiyaiya, exakerexe atyo nokaxomokakita waiye xikaxomokaka maheta.

*Cristo Nawaiyexehare*

<sup>14</sup> Hatyo hiyeta nokaolise kakoa notyoka wexe Enore nahalakoa hoka niraexaita. <sup>15</sup> Ihiyeta atyo kahotalihareharenai enokoa, waikohetka xoaha tyaoniterenai kakaexaretyakita. <sup>16</sup> Hoka Enore naxita hoka kasani kalore waiyexe kakoa tyaonitere hiyeta, isa iyateliti xomana naokita Haisekohare maniyata hoka xikinatere xisaona maheta. <sup>17</sup> Naxitene tehitia, kasani xityakekone hiyeta, Cristo tyaona xikakoa naokita. Exahe niraexaita xomana, kasani atya akereta xikatyaharexe xisaona, exahe hati hokoli

kase akereta xikinatere xisaona xiyawaiyetyakakoane kakoa hoka <sup>18</sup> waiyekehalaka xomana naokita tyotya Enore kaxaikoneharenae kakoa Cristo xawaiyera: enerokoa, enowahahare, ewahaharene, ehatekone harenai naokita. <sup>19</sup> Nikare hoka waiyekehalaka xomana maheta exawaiyera, exahe xakore atyoite maisa masakare waiyekehalakita xomana hoka. Hoka hatyo hiyetaite Enore tyaona xikakoa kaiserehare.

<sup>20</sup> Kasani Enore kakoa kaihalaharetyaka kaiserehare naokita. Hoka iniyatere tyaonitere winekoni hiyeta, waxitere, wahekoitere xahexe tyoma womana. <sup>21</sup> Maika Enore kakoa kaihalaharetyaka tyakekohatiyenae hiyeta, Jesus Cristo hiyeta xoaha tytyaki ferakene, exahe matyotenehare.

## 4

*Cristo Háre Tahi*

<sup>1</sup> Hatyo hiyeta natyo tyare berexo notyaonita nahakitere Xekohaseti Jesus Cristo ana hiyeta hoka niraeta xihiye. Maika hetati Enore aohenere xiso xowaka waiye xisaona aohenere akereta xisaona. <sup>2</sup> Maika ximaxahenerahare, xasemaxematyare, ximehexaikohare xisaona. Awa atyo kinatyaxa xirae haiyaharenai kakoa. Xahotikisa enomanaha xiyawaiyerahene. <sup>3</sup> Maika xaiyateretyoahena hoka mehexaikohaliti hiyeta hahotalita Isekohaliti mokitere xiso xema xisaona.

<sup>4</sup> Cristo hare atyo haterore, Isekohaliti Waiyexe hoka haterore. Enore aoka xiso haomana hoka haterore atyo xiyatyahane. <sup>5</sup> Haterore atyo Xekohaseti, haterore atyo tyakekoti, haterore atyo batixat�ati. <sup>6</sup> Haterore atyo Enore, tyotya Nexe atyo, exahe tyotya Xekohase atyo. Hakita atyo tyotya ihiyetaha, exahe tyaonita atyo tyotya ekakoaha.

<sup>7</sup> Wityota, hatya ana xakini xoalini hare waiyexe kaxekaka, Cristo isehenere womana hakakoaneta. <sup>8</sup> Hiyaiya, exakere atyo Iraiti Waiyexe nexa:

Enokoa xanehenere xowaka kahare kolatya berexoako tyaoniterenae hoka isa xoalini hare waiyexe halitinae ana.

*Waiyoliniti, Iyateliti Waiyexe Enore Isa Halitini Ana*

(Romanos 12.6-8; 1 Coríntios 12.4-11)

<sup>9</sup> Xoare nere “enokoa xane”, nita? Exakerexe atyo: hetati exoa ako katyahe hotohare. Hatyo najikinita eno xeta xane. <sup>10</sup> Exoa ako katyahe hoka hatyo najikinita enokoa xaneheta hoka enokoa xaihako xane hoka tyotya waikoheko, enokoa xoaha ekaisetya hawenane kakoa maheta.

<sup>11</sup> Hatyo atyo isa xoalini hare waiyexe halitinae ana. Hoka haiyanai hairaene kakoare moka, haiyanai iraiti xakaisahare moka, haiyanai xakaihakatya maheta iraiti moka, exahe haiyaharenai hoka tyakekohatiyenai kaxaikotyase, xaotyakisase maheta moka.

<sup>12</sup> Nikare mokahene, Enore kaxaikoneharenai awaiyolinikisha hoka waiyore hakaha maheta Cristo hatene hoka Cristo háre waiye kekoare maheta.

<sup>13</sup> Nikare ite haxawalita wityakeko hoka waiyekehalaka ite womana Enore Ityani tahi akiti. Nikarite hoka wawenane waiyexe hiyetaite wikekoareta akereta wisaona hoka Cristo aokitere akereta wisaona. <sup>14</sup> Nikare ite wisaona hoka maisa xoima akereta wisaohitita. Hiyaiya, xoima atyo hoholati one ainakiyahena hoka nolokehekoaitene, exahe kinatyawiniti hoka herawasekoaitene. Hatyo akereta atyo haliti maoseratyaliyennai tyaonita hoka hahinaeharenai nawenane aiyalaharetyahitaha. Waiyore maoseratyahitene hoka xaotyakisati ehaikoare xema maniya mokahitene. <sup>15</sup> Iraiti waiyexe tahi taitaiya wirae, exahe wawaiyexeharene kakoa hoka wikekoareya wawenane Cristo koamaniya kakoa. Hiyaiya, hatyo atyo wiseri. <sup>16</sup> Eháre atyo iniyatere hiyeta waiye kinatere haxawalita tyaonita. Tyotya tyaonitere eháre hiyeta haxawalita tyaonita, kahinae tyakakoahitaha, hoka waiye tyaonahitaha. Hiyaiya, hakititere atyo waiye tyaonehena eháre hiyexe hoka tyotya eháre atyo waiye kekoareta xawaiyetyakakoati hiyeta.

*Wenati Waitare Cristo Hiyeta*

<sup>17</sup> Hatyo hiyeta Xekohaseti nexare kakoa niraetene, naiyateretyoahena: Awa atyo Enore maniya mawenaneharenae akereta xisaona. Hiyaiya, exahekolaha atyo maisa xoare tyomare. <sup>18</sup> Exahekolaha atyo makaliroti akerehare tyaonita. Maisa atyo Enore waiyexe aokitere xema maniya tyaonareha, maisa waiyorexeha, exahe semaxematyareha. <sup>19</sup> Tyotya ehiahreneha enonitaha, exahe isoawiha haxawaiyeraha ewaxirahare ana, tyotya kahaiharetakiterehare xoaha ana.

<sup>20</sup> Maisa atyo hatyohare tahi kakoa xini xawaiyore Cristo koamaniya xisaona maheta. <sup>21</sup> Aliterexe ala xasema etahi, exahe xisaonitere exema hiyetala xawaiyore aliterexe Jesus hiye tyaonitere kakoa.

<sup>22</sup> Xahalakihena toahiyere xawenane toahiya ewaxirahare xisomitere, xahekoitere. Hiyaiya, hatyoharenai atyo iniyalahare xiyahekola mawenekoaretita. <sup>23</sup> Maika xiyahekolanai tyotya xewaitareheta. <sup>24</sup> Xisaohena waitare wenati xema, hatyoharenai atyo kaomaka Enore aokitere akereta, hatyoharenai atyo kawaiyakita wenati aliterexe hiye, hatyohare atyo tota, waiye xoaha.

#### *Wenati Waiyexe*

(*Gálatas 5.22-24; Efésios 4.1-3; Filipenses 4.8; Colossenses 3.12-17*)

<sup>25</sup> Hatyo hiyeta nikareta xamaoseratya. Xiraehena xihinaehare kakoa hoka aliterexe taita xirae ekakooha. Hiyaiya, wityotya atyo Cristo háré hiyetare. <sup>26</sup> Xeharehena hoka maika xirihare xisaona hoka maisa iniyalahare xisomita. Awa atyo xeharekoata mene. <sup>27</sup> Awa atyo ini hekoti xahalakihena xawenane Tihanare ana. <sup>28</sup> Xala xamani ene kaiwita hoka nikareta kaiwa hoka hahena kaisere hoka waiye tyaona, exahe kahinaetya maxiyejharenai. <sup>29</sup> Awa atyo ewaxirahare kehaisakere xirae. Maika waiyexe iraiti taita xirae hoka haiyaharenae kekoare Cristo koamaniya hawenaneha kakoa, exahe aokahitere harenai akereta tyaonaha, hoka xiraeterreharenae semehenerenae ana waiye.

<sup>30</sup> Awa atyo xexamaikohalinikhena Enore Nisekohare Waiyexe. Hiyaiya, Isekohaliti atyo Enore feroxa akereta tyaonita xihiye. Heko ite tyaona xikakoa Enore iyehetehenere xiso kijiya. <sup>31</sup> Xahalakihena irawaniti, xehaliti, xahenexatyati, xiholakakoati, iraharetyati harenai. Awa atyo xiyalijinihat. <sup>32</sup> Awa atyo hatyoharenai xema xisaona. Xawaiyexehare xisaohena, waiye xamokakoa haiyaharenai kakoa. Ximaotyanekakoaahetehena iniyalahare xománe kakoanae, iniyalahare xománe Enore maotyanehetehenere Cristo hiyeta akereta.

## 5

#### *Maika Waiye Xisaona, Awa Atyo Iniyalahare Xisoma*

(*1 Coríntios 6.9-10; Gálatas 5.19-21; Colossenses 3.5-6; Apocalipse 21.8, 27*)

<sup>1</sup> Xisonae atyo Enore ityaninae, ixiyakawalaharenai. Hiyeta hoka Enore tyaonitere akereta xisaohena. <sup>2</sup> Maika xawenane xawaiyetyati xema tyaona, Cristo awaiyehenere wiso akereta, hoka wainihenere wihiyeta akereta, hoka airaxero airaxexe, exahe Enore awaiyetitere jihat yati xoaha akereta xisaona. <sup>3</sup> Enore anere hotyalinai tyare atyo xiso hoka maisa atyo ehekoreta xini xiraekakoita ohiro watyalisaka, masemaxematyati, maiyasetyati xoaha tahi. <sup>4</sup> Awatyo xiraeta iraiti kehaisakere, maomaxetahare, ewaxirahare. Hiyaiya, hatyoharenai atyo maisa xomanere xini. Xakore hoka maika xihalaharehena Enore kakoa.

<sup>5</sup> Waiye xasema exeharenai: maisaiya hatya ohiro hiye tyaonitererehare, mahaiharenahare, mahakaiserexe, maiyasehatiye harenai xane tyaonita Cristo, Enore xoaha nawenakala nali. Hiyaiya, maiyaseti atyo enore metalahare xema nawenatyaka akerehare.

<sup>6</sup> Hoka maika maisa xalahare hairaene maomaxetahare kakoa maoseraita xiso. Hiyaiya, hatyoharenai hiyeta atyoite Enore iniyalahare mohena hamatyakekotyasanai. <sup>7</sup> Hatyo hiyeta awa atyo nikare tyaoniterenae xema xisaona.

<sup>8</sup> Hiyaiya, toahiyera ene xisonai makaliroti koni xisaonita, xakore hoka Enore anerenai hotyalinai xisaohenere aoseta atyo xaokanatyakalati koni xisaonita. Hatyo hiyeta maika xaokanatyakalati koni nawenatyaseharenai akereta xisaohena. <sup>9</sup> Hiyaiya,

xaokanatyakalati atyo kalore ekaotyakatita waiyexehaliti, waiyexe wenati, exahe aliterexe xoaha. <sup>10</sup> Xaiyateretyoa hoka xawaiyore Xekohaseti aokitereharenae kakoa.

*Maika Awa Iniyalahare Xema Xisaona  
(Colossenses 3.7-9; Hebreus 3.7-13; 1 João 2.15-17)*

<sup>11</sup> Awa atyo haiyaharenae iniyalahare tyomiterenai akereta xisaona, hatyohare atyo makaliroti koniye. Xakore hoka maika xahotikihena tyotya hatyoharenai xaokanatyakalati ana. <sup>12</sup> Hoka aliterexe atyo kahaiharetyakere kairaetyakita hatyohare hameteneta tyomahitereharenah tahi. <sup>13</sup> Hoka tyotya kahotikisakenenre xaokanatyakalati ana xowaka atyoite kawaiyakehena hatyohare enómanenai. <sup>14</sup> Hiyaiya, waiye kawaiyakehetehenre atyoite xaokanatyakalati tyaona. Hatyo hiyeta exakere nexa:

“Hiso, nemakitere, hikaosehena! Hatityoahetehena hikamanaoseta, hoka Cristo ite aokanatya homana”.

<sup>15</sup> Hatyo hiyeta waiyira xiyaiyehena xawenane. Awa atyo mawaiyoreharenai akereta xisaona, xakore hoka maika waiyorexenai akereta xisaona. <sup>16</sup> Awatyo haferakene hekoti xametaisa. Hiyaiya, kalikini wisaoniterenai ferakenenai atyo maisa waiyexe. <sup>17</sup> Awa atyo xihatyahare. Xaiyateretyoa Xekohaseti aokitereharenae waiyekahalaka xomana hoka aokitere akereta xisaona maheta.

<sup>18</sup> Awa atyo vinhoxa xiserahena hoka xaheka. Hiyaiya, hatyoharenai atyoite ximawaiye nawenanekisase maheta. Xakore hoka maika Enore Nisekohare kakoa kaisere xisaona. <sup>19</sup> Xiyakaihakatyakaoahena haiyanai kakoa salmos nanekoare tahi, exahe xeratinai waiyexenai tahi. Xiyerehena xeratinai Xekohaseti anere xiyawaiyerene kakoa. <sup>20</sup> Maika xihalahare menehena Wexe Enore kakoa, tyotya xoalini hare hiyeta, Wiyekohase Jesus Cristo koamaniya xawenane hiyeta. <sup>21</sup> Xaiminijitere Cristo akeretaira xaiminisakakoahena.

*Kaiyanityorenae Exahe Kaiyaneneronae  
(Colossenses 3.18-19; 1 Pedro 3.1-7)*

<sup>22</sup> Ohironae, xexanenenaira xaiminisa, Xekohaseti xaiminijitere akereta. <sup>23</sup> Hiyaiya, ena atyo haiyanityo xahehare, Cristo tyakekohatiyenae xahehare tyaonitere akereta. Cristo terota atyo waiyexe maniya mohenahitahene hoka hatyo terota eháreha. <sup>24</sup> Hatyo hiyeta xasemaxematya xexanenenae niraene, tyakekohatiyenae semaxemaitere Cristo niraene akereta.

<sup>25</sup> Xasemehena, xiso exanenenae: xawaiyetyaira xexanityonae, Cristo awaiyetya haomanerena hoka wainihenere enomanaha akereta. <sup>26</sup> Nikare tyoma haware mokahene Enore ana maheta. Tihehetahene one kakoa, hoka iyoma mohenahitene hairaene kakoa. <sup>27</sup> Nikare moka tyakekohatiyenai exema maniya tyaoniterenai, kasani hotikisaha hawaiyexehare, hawaiyene, makawe xomokoanehare, exahe maiyalaharehare enomana aoka hoka. <sup>28</sup> Maika enanae awaiyehena haiyanityonaeha, haháreha awaiyetyahitere akereta. Ena awaiyetiterehare haiyanityo atyo awaiyetyoawita. <sup>29</sup> Hiyaiya, maisa xala hare kirawanexe haháre, hoka tyajitene, kaxaikotene harenai. Nikareta Cristo waiye kaxaikota hakaxaikoneharenae. <sup>30</sup> Hiyaiya, Cristo hare hiyetare atyo wiso. <sup>31</sup> Exakere Iraiti Waiyexe nexa:

Hatyohare hatya enaite halakisa hanexe, hanityo xoaha tyaona maheta haiyanityo kakoa hoka hatyo hinamanai atyoite haterore tyaoheta.

<sup>32</sup> Kalore atyo exe metaharexe xakore hoka nomani atyo Cristo, exahe tyakekohatiyenae harenae tahi iraeta naoka. <sup>33</sup> Xomanere tehitia: Maika xiso exanenenae hoka xawaiyehena xexanityonae xawaiyetyoawitere akereta, exahe xiso exanityonae hoka xaiminihena xexanenenae.

<sup>1</sup> Xasemehena xiso xoimanae: Cristo koamaniya atyo xisaonita hoka xityakekohena atyoite xexe, xityo xoaha niraene. Hatyoharenae atyo waiye. <sup>2</sup> Exakerexe atyo xaotyakiyaho nexa: “Xaiminihena xexe, xityo xoaha”, nexa. Hatyo iraiti hotohare xoalini hare waiyexe xekaka tahi kakoare aoka Enore. <sup>3</sup> “Xaiminihena xexe, xityo xoaha hoka waiye xisaona, exahe wahakiya xoaha xisaona waikohetka”, nita xoaha.

<sup>4</sup> Xasemehena xiso irityo, enexe xoaha: awa atyo xityaninae maxemereharefa xoana xamani xamoka hoka xaihalikisahene. Xainaetyahene kaisere Xekohaseti xaotyakiraho waiyexe kakoa.

*Wakaharenae, Exekohasenae  
(Colossenses 3.22-4.1; 1 Timóteo 6.1-2; Tito 2.9)*

<sup>5</sup> Xasemehena, xiso wakaharenae: xasemaxematya xiyekohasenae niraene ximairane, xiyliminira kakoa. Maika nikare xisaona, motyaira aliterexe Cristo ana ene xahakita. <sup>6</sup> Awa atyo ehaotiha taita waiye xahaka ihalahare xikakoa maheta. Hiyaiya, Cristo wakaneharenae atyo xiso hoka Enore aokitere akereta xahaka enomanaha. <sup>7</sup> Xihalaharene kakoa xahahena enomanaha, Xekohaseti ana kahakatyakitere akereta, maisa halitinae ana kahakakitere akere xini. <sup>8</sup> Xasemehena, xotyaxematyaira exeharenai: Hatya ana xakini atyoite, wakahare exahe mawakaharenehare xoaha ana, Xekohaseti isehena tyomehenahere akereta.

<sup>9</sup> Xiso xekohasetinae tehitia hoka waiye xamoka xiwakaneharenae, waiyehena xikirawanahene. Hiyaiya, xiso exahe xiwakaneharenae harenai atyo Xekohaseti enokoare anere makere hoka hatyo atyo hakakoa mokita halitinae.

*Maika Heko Xityakekone Xema Xisaona  
(1 Coríntios 16.13-14; Gálatas 6.9-10; Filipenses 4.1; 2 Timóteo 2.1-3)*

<sup>10</sup> Hoka maika kalikini xikinatere xisaona Xekohaseti koamaniya xisaonitere hiyeta, exahe kalorexe iniyatere xoaha hiyeta. <sup>11</sup> Xamokaharetyoahena xaisakakoati anere Enore ijitere xomana kakoa hoka xikinatere xisaona, hoka xahalakoahare Tihanare maisa xoana mokita xiso maheta. <sup>12</sup> Hiyaiya, maisa atyo halitinai xahita xini waiyatertyoita, xakore hoka isekohalitinai iniyalaharenai enokoa tyaoniterenai niyatere xahita atyo. Hatyonai atyo: kalorexenai, xekohasetinai, totakorako iyatelitinai tyaoniterenai harenai, kalikini makaliroti hetehena xowakiyerenai. <sup>13</sup> Hatyo hiyeta xamokaharetyoahena xaisakakoati anere Enore ijitere xomana kakoa. Nikare ite hoka iniyalahare ferakene kaokehena hoka xikinatere xisaona xahalakoahare xahita, hoka xiyalijinhare kakoahenere najkinitaite hekota xikinatere xisaona, ximaekoaneharella.

<sup>14</sup> Hatyo hiyeta maika ximemere xisaona. Iraiti aliterexe xema xisaohena hoka hatyo atyo ite xiyolakitakohi akereta tyaohena xomana. Waiyexe maniya xisaona hoka hatyo atyo ite xitikolali talatyakala akereta tyaohena xomana. <sup>15</sup> Xihalaharene kakoa xiakaihakahena Iraiti Waiyexe amehexaikotyakisare hoka hatyo atyoite xikijitini akereta tyaohena xomana. <sup>16</sup> Hoka maika heko xityakekone xema xisaona hoka hatyo atyo ite xitalatyoakala xaiyakoti akereta hoka xewakatya maheta tyotya Tihanare nokolanai takoiterenai. <sup>17</sup> Xisekohare niyasehare xema maniya xisaohena hoka hatyo atyo ite xiseri talatyakala akereta tyaohena xomana. Exahe Enore niraene xema maniya xisaona hoka hatyo atyo ite kesekase akereta tyaohena xomana. Hiyaiya, hatyohare atyo Isekohaliti Waiyexe ijita xomana.

<sup>18</sup> Tyotya hatyoharenae xisomehena xiraexala kakoa, xaxehena Enore hoka kahinaetya xiso. Xiraexata menehena Isekohaliti Waiyexe hotikijitere xiso akereta. Xirihare xisaona. Awa atyo xamaikoharehena, xiraexata menehena tyotya Enore koamaniya tyaoniterenae ana. <sup>19</sup> Xiraexatya tehitia notahi hoka waiyekehalaka iraiti noxakai halitinae hiye, exahe hoka nomamairanihare noxakaihakatya Iraiti Waiyexe metahare tyaonitere, exahe waiyekehalaka noxakaini maheta. <sup>20</sup> Natyo atyo Iraiti Waiyexe kakoare xakore hoka kalini atyo berexo notyaonita. Hiyeta hoka xiraexatya nomani

hoka nomamairanihare noxakaihakatya iraiti halitinai hiye, noxakaini kaxaokakehenere akereta.

*Tyawaxakakoati Miyane*

<sup>21</sup> Tíquico ite xakai xihiye nawenani tahi hoka waiyekehala xomana. Tíquico atyo waiye kahinaetya wiso Xekohaseti hatene hiye. <sup>22</sup> Hatyo niyahare terota naxikatene xomana hoka xakaihakatya wawenane tahi akiti xihiye hoka xasema witahi hoka xihalahare maheta.

<sup>23</sup> Maika Wexe Enore, Wiyekohase Jesus Cristo hoka mehexaikohaliti, xawaiyetyakakoati, tyakekoti harenae isa xomana. <sup>24</sup> Kasani Enore waiye moka tyotya Wiyekohase Jesus Cristo awaiyetiterenae haxawaiyera matyotenehare kakoa naokita, eko xoaha.

## Filipenses

<sup>1</sup> Natyo Paulo, Timóteo, Jesus Cristo wakaneharenae, waxikatya exe baberane Enore koamaniya tyaoriterenae, exahe Jesus Cristo koamaniya tyaoriterenae wenakalati Filipos yerenae ana. Exahe ekaxaikotyaseharenaeha, ekahinaetyaseharenaeha xoaha anere tehitiya exe baberane. <sup>2</sup> Maika Wexe Enore, Wiyekohase Jesus Cristo xoaha kaxaiko xiso, mehexaikohaliti xoaha isa xomana.

### *Paulo Niraexala*

<sup>3</sup> Nihalahareta Enore kakoa notyaxemahenere xiso nihatyaka. <sup>4</sup> Tyotyaki niraexahena xitahi hoka niraexaita nihalahalini kakoa. <sup>5</sup> Hetati noxakaihahenere Iraiti Waiyexe xowakata xakahinaetya natyo kalikini kijiya. Hatyo hiyeta nihalahareta xikakoa. <sup>6</sup> Enore atyo koxaka hakita xinekoni hoka nikare ite heko haka xinekoni Jesus Cristo tyoaneneheta kijiya. Hatyoharenae waiyekehalakita nomani.

<sup>7</sup> Heko atyo notyaxemata minita xiso, ehekoreta atyo notyaxemaita xiso. Hiayi, xakahinaetita atyo natyo exe hateniti Enore isehenere nomani hiye. Nikare atyo kalikini berexoako notyaonita hoka xakahinaetita natyo, exahe nomaberexotyakiharetatere xowaka xakahinaetya natyo, nakahawaonitaretya exahe niyatere kakoa noxakai maheta Iraiti Waiyexe. <sup>8</sup> Enore atyo waiyoreta nawaiyetitere kalore xiso kakoa. Jesus Cristo atyo nikare axomokanikijita natyo.

<sup>9</sup> Niraexaita xomana, xiyawaiyetyakakoane exahehare tyona maheta. Exahe masakare waiyekehalaka iraiti xomana maheta, exahe xawaiyore maheta <sup>10</sup> hoka waiyexe taita xaoka xomana maheta, hoka xifirahaliya xisaona, exahe ximahaiharenahre xisaona maheta Cristo tyohetehenere ferakene. <sup>11</sup> Exahe kahareya xoalini hare waiyexe xisoma maheta. Jesus Cristo taitaiya atyo nikare moka xiso. Enore kakoa kaihalaharetyaka, kamaxalotyaka maheta.

### *Nomani Atyo Wenati Cristo*

<sup>12</sup> Nohinaeharenae, kasani nawenani waiyekehalaka xomana naokita. Tyotya xoalini hare kaotyakiterenae nomani hiyeta kahare haliti Iraiti Waiyexe sema. <sup>13</sup> Hatyo hiyeta atyo sorarenai, kalorexe hana kaxaikotyasesnae ana, exahe haiyanee ana hoka waiyekehalaka Jesus Cristo wakanehare notyaonitere hiyeta berexoako notyaonitere tahi. <sup>14</sup> Exahe kahare wihinaeharenae waiya nawenani berexoako hoka tyakekoha kaisere Xekohaseti hoka haihalahareneha, hamamairaneharenah kakoa Iraiti Waiyexe xakaitaha.

<sup>15</sup> Aliterexe atyo haiyaharenae xakaihakatyahitaha Cristo tahi akiti, xakore hoka okoawaharahitaha, kirawanahitaha atyo natyo. Hoka haiyaharenae atyo waiye ahekotyahitaha notahi hoka haihalaharene kakoa xakaihakatyahitaha. <sup>16</sup> Hatyonai atyo awaiyetyahitaha natyo hoka nikare tyaonahitaha. Waiyekehalakita atyo enomanaha Enore isehenere hateniti nomani, nakahawaonitaretya maheta Iraiti Waiyexe. <sup>17</sup> Hoka haiyaharenae atyo Cristo tahi xakaihakatyahitaha xakore hoka maisa atyo waiye ahekotyareha. Motyaiyala exahkolaha hiye hoka exakaihakalaha hiyeta exahehare iniyalahare nokaxomokaki berexoako nali aokahitaha.

<sup>18</sup> Nikare xakore atyo iraetaha hoka enenaharenae atyo. Cristo tahi atyo kaxakaihakatyakita waiyexe xahekore, exahe iniyalahare xahekore xoaha hiyeta hoka hatyohare atyo ehekoreta kaiserehare. Hatyo hiyeta nihalahare hoka exakere ite heko nihalahare notyaona. <sup>19</sup> Xiraexala, exahe Jesus Cristo Nisekohare kahinaera natyo hiyeta ite nahikoaheta berexoakota. Hatyohare atyo waiyekehalakita nomani.

<sup>20</sup> Exakere atyo notyoma naokowita: kasani maisa xoare hare mametyakahareta nahalakisa nohateni naokowiye. Nikare ite heko nihalahare kalikini, nomamairanahare ite notyaona. Nikare ite Cristo naeroretya nawenani kakoa exahe nokamani xoaha kakoa. <sup>21</sup> Hoka xoare hare ala wenati? Nomani atyo Cristo xema nawenatyaka, hoka

kawainisakiterehare atyo waiyexe ana kakaokatyakiterehare. <sup>22</sup> Hekotaiya nokaseta hoka hateniti waiyexeya notyomehitiya. Maisa waiyekehala kere nomani xoare kaisere xamani ite naohena nomani. <sup>23</sup> Hinama maniya nokatalatyakita. Kasani nahalakisa aliye wenati hoka Cristo nali noxani hoka waiye kaiserehare notyaona naokowita. <sup>24</sup> Xakore hoka masakare atyo xiwaiyakahare heko nokaseta notyaona naokowita.

<sup>25</sup> Nawaiyore hatyohare kakoa hoka hekota ite notyaonehitiya xikakoa. Heko ite notyaona xikakoa, nakahinaetya xiso hoka xikekoare exahe xihalahare xoaha. <sup>26</sup> Nikare ite nokaokihitiya xomana hoka nowaiyehitiya xiso hoka xihalahare ite nokakoi, Jesus Cristo kakoa hahotalita xisaonitere hiyeta.

<sup>27</sup> Cristo aokitere akereta xisaona hoka hatyo atyo waiye kaiserehare. Nikareya xisaonita hoka notyoa xamani, maisa xamani nowaiyehitita xiso hoka waiyekehala kere nomani heko xikinatere xisaonitere Iraiti Waiyexe xema. Waiyekehala tehitia ite nomani haxawalita xaiyateretyoitere xityakekone kakoa Iraiti Waiyexe aokitere akereta.

<sup>28</sup> Awaira atyo ximairehena xahalakoaharenae. Maika xikinatere xisaona. Nikareya xisaona hoka xaimenekoita atyo enomanaha ijiyahaotyakaha exahe xijiyahaolahene. Hiayi, Enore atyo kahinaetita xiso xijiyahaotyakaha maheta. <sup>29</sup> Enore atyo aeroretita xiso Cristo wakanehare xisaona maheta. Exahe maisa xityakekotene taita maheta xini, iniyalahare tehitia xikaxomokaka ihiyeta maheta. <sup>30</sup> Kalikini ite noximi xisaona nawenani akereta hoka waiyateretyoa. Nikare kafaka maniya noxaiyateretyoani xiayi, exahe kalikini hoka hekota naiyateretyoita. Exe harenae waiyekehala kita xomana.

## 2

### *Cristo Maxaokowiharetyoanene Exahe Exairoretyaka*

<sup>1</sup> Cristo xema wisaonita hoka wikinatere wisaonita, exahe exawaiyera wiso hiyeta wihalahareta. Enore Nisekohare atyo kahinaetita wiso hoka hatyo hiyeta wairakoaneharetya kakoita, wawaiyetyakakoita harenae. <sup>2</sup> Hiyeta hoka maika hatyo xema xisaona hoka nihalahare xamoka. Maika xawaiyetyakakoa, hakakoa xiyahekola xamoka, haxahekoluta xahekotya. <sup>3</sup> Awa atyo xiyahekoluta xisomakoatehena, xahekore maotikonexe kakoa kaihalaharetyaka xikakoa maheta. Maika ximaxaokowiharetyoanehare xisaona hoka xiyahehare xihinaeharenae xaoka. <sup>4</sup> Maika hatya xakini haiyanai aokitere akereta tyaoanaha, hoka awatyo haxahekola xema taita tyaoanaha.

<sup>5</sup> Maika Jesus Cristo nawenane akereta xisaona. <sup>6</sup> Xiyaiya, Cristo atyo Enore akereta terota xakore hoka maisa Enore akerehare tyaona aokowita. <sup>7</sup> Hoka haxaokala ximita halakisa tyotya hawenane waiyexe hoka wakahare tyaona. Hoka haliti akereta tyaona, hoka haliti akereta kaotyaka. <sup>8</sup> Hoka wakahare akere mokoawi hoka semaxematyare tyaona hakamane kijiya, wainihenere atyalihose xaimaholatyaka hiye kijiya. <sup>9</sup> Hatyo hiyeta Enore aeroretene hoka kalorexe tyaona. Maisa xala harenae nikarehare ehakakoanehare aka. <sup>10</sup> Aeroretene hoka tyotya enokoa, waikohakoa tyaoniterenae, ako katyahet yaooniterekarenae harenaita exoaha hakaolise kakoa, semehenaha Jesus nexare hoka, <sup>11</sup> “Jesus Cristo atyo Xekohaseti”, nexahaite kahare halitinai haotita Enexe Enore kakoa kaihalaharetyaka maheta.

### *Tyakekohatiyena Atyo Xaokanatyakalati*

<sup>12</sup> Xasemehena, noxiyakawaliharenae, nohinaeharenae, nali notyaonitere xowaka xityakekota niraini. Kalikini atyo maisa nali aka natyo hoka maika exahexe xityakeko niraini. Maika heko xahahena ximairane, xiyaiminira xoaha kakoa hoka ximemere xisaona xisekohare niyakeheta naheta maniya. <sup>13</sup> Hiayi, Enore atyo hata minita xikakoa, xisaona maheta aokitere akereta, hoka xiyahekola, xihatene xoaha hoka aokitere akereta tyaona maheta.

<sup>14</sup> Tyotya xoalini hare xisomehena hoka ximawerahareneta exahe ximaxiholakaoanehareta xisoma. <sup>15</sup> Nikareya hoka iniyalahare maomaneharenai, exahe firahaliyerenaiya xisaona, Enore ityaninae waiyexenai terotaiya xisaona, iniyalahare,

ewaxirahare nomaseharenae konita. Maika xiyakaihena Iraiti Waiyexe tahi ihiyeha hoka xorese werokitere enokoa akeretaira xisaona enekonyaha. <sup>16</sup> Nikareya xisaona hoka Cristo tyohetehenere ferakiniya kalore nihalahare xamoka. Nikare ite xisaona hoka noxaiyateretyoani exahe nohateni xikakoa atyo maisa mitita xini.

<sup>17</sup> Xoana xamaniya hoka notimalaxi kaxiratyaka. Nikareya nokaxaisaki hoka motyaiya Enore ana nokafetatyakita ene xityakekone hiyeta. Nikareya nokaxomokaki hoka ehekoreya, exahe nihalahareya xikakoa. <sup>18</sup> Maika xiso tehitiya xihalaharehena, ximaxalohena nokakoi.

### *Timóteo, Epafroditu Xoaha*

<sup>19</sup> Xekohaseti Jesus kahinaetya natyo hoka naxikaheta rotaiya Timóteo hoka haikoha-heta hoka xakaihena xitahi hoka nihalahare naokowita xikakoa. <sup>20</sup> Maisa atyo xala hare ali nohaliye Timóteo akereta ahekotyare xitahi, exahe kaxaiko aokowiye xiso. <sup>21</sup> Tyotya haiyaharenae atyo mawaiyeharahitaha haxiye-hareha kakoa taita hoka maisa atyo Cristo anere kakoa mawaiyeharexeha. <sup>22</sup> Timóteo atyo waiye, exahe waiyekahalakita xomana enawenane. Natyo, hatyo xoaha hanexe kakoarenae hakitere akereta wahakita hoka Iraiti Waiyexe wiyakaita. <sup>23</sup> Hiyeta hoka nawenani ite waiyekahalakehena hoka naxikatya Timóteo xomana. <sup>24</sup> Notyakekota atyo Xekohaseti hoka xoana xamanite hoka haxeroreta ite natyota xamani xinali notyota.

<sup>25</sup> Xoana xamani ite hoka wihinaehare Epafroditu naxikatya xomana. Hatyo atyo nokahinaetyasehare, exahe haxawalita atyo waiyateretyoa wahakita. Xiso terota atyo xaxikatene kahinaetya maheta natyo. <sup>26</sup> Kasani waiyeheta aokowita xiso. Kalore mawaiyehareta xasemehenere ehokakene tahi hiyeta. <sup>27</sup> Aliterexe hokaka, komita waini. Xakore hoka Enore atyo airakoanehare-tene. Maisa hatyo taita xini airakoaneharetya. Natyo tehitiya airakoaneharetya, maisa exahe-hare namaikohare aokare hoka. <sup>28</sup> Hatyo hiyeta kasani Epafroditu naxikaheta xomana hoka xiayiehetene hoka xihalaharehete-hitiya maheta. Nikare ite hoka noxamaikohalini tyoteheta. <sup>29</sup> Maika kaokehetehena Epafroditu xomana hoka xihalahare ekakoa, Xekohaseti koamaniya tyaonitere hiyeta. Exakerehare halitinai xaiminihena. <sup>30</sup> Komita waini Cristo hatene hiyeta, maisa atyo mawaiyeharexe hawenane kakoa. Nikare tyaona kahinaetya natyo maheta, exowaka maisa aliyakere xakahinaetita natyo hoka.

### 3

#### *Waiyexe Wenati Tahi*

<sup>1</sup> Exe taitehena, nohinaeharenae. Maika Xekohaseti kalore aihalahalinikisa xiso. Maisa atyo nomaxaharexe noxairali koxaka naxairahenereharea. Hiyaiya, hatyohare atyo kahinaetita xiso. <sup>2</sup> Xiriharíra iniyalahare tyomiterenai kakoa, hatyo kajolonai aiyateretyoahitare halitinae háré hiyexe haxaikolaha kakoa. <sup>3</sup> Wiso taita atyo wirikotya iniyalahare wománe, maisa atyo hatyoaha xini. Hiyaiya, wihalahareta Enore kakoa Inisekohare hiyeta. Haxawalita wawenane Jesus Cristo kakoa tyaonita hoka hatyo hiyeta wihalahareta. Maisa atyo wityakekore haliti nomanere milihe kaxaikotyakitere hoka iniyalahare wawenane wirikohenere atyo wityakekota.

<sup>4</sup> Notyakekoya hatyoharenae naokowi hoka notyakekoya. Xala xamaniya haliti nomanere milihi xaikotyaka tyakeko hoka natyoiya notyakeko naokowi hoka notyakekoya.

<sup>5</sup> Nokaxaiko nomanere milihisaki 8-kihena notyaonita notyaohenereta hoka. Natyo atyo Israel hotyali konita nawenanehare, Benjamim hotyali konitare terota atyo natyo. Hebreu hotyali atyo natyo. Judeunae xaotyakiraho xema notyaonitere xowaka farise-unae hotyali konitare terota ene natyo, <sup>6</sup> hoka noxalijinhareta Cristo koamaniya tyaoniterenae xahita. Hatyo xowakiya judeunae xaotyakisakaho notyaonita hoka xoalini hare kaomaka aokitere akereta notyomita, maisa xoare nomaomaniye.

<sup>7</sup> Hatyo xowakiya tyotya hatyoharenae notyakekota, kalore waiyeta noman. Hoka kalikini atyo Cristo xema notyaona hoka maisa atyo xoare hare tyomare nomani hatyoharenai. <sup>8</sup> Maiha hatyoharenae taita xini. Noman atyo xiye-haliti, exahe tyotya xoalini

harenae maisa xoare tyomare. Noxekohase Jesus Cristo xema nawenatyaka atyo waiye kaisere, hatyo taita atyo xoalini hare tyomita. Hatyo hiyeta tyotya nahalakisa xoalini hare. Nomani atyo tyotya hatyoharenae exawatyakahare tyaona. Kasani Jesus xema masakare notyaona naokowita hoka.<sup>9</sup> Cristo xema terota notyaona naokowita. Maisaiyi xoare maheta judeunae xaotyakisakaho xema notyaonihitita haliti waiyexe notyaona maheta. Kalikini atyo notyakekota Cristo hoka hatyo notyakekoni hiyeta atyo Enore haliti waiyexe aokita natyo.<sup>10</sup> Tyotya Cristo tahi waiyekehala nomani naokita, exahe ekaseneheta niyatere harenai. Kasani tehitiya makawatihenere akereta nomakawati naokowita, exahe wainihenere akereta nowaini naokowita,<sup>11</sup> exahe hatyaoseta nokax-ekasekisakeheta naokita hoka nawenani matyotenehare tyaona maheta.

#### *Temati Imiyane Niyahare*

<sup>12</sup> Maisa atyo koxaka nojiyahao akatya, exahe koxaka waiyexe notyaoheta nomita xini, xakore hoka hekota atyo natemita nahikoa maheta kaxekakehenere nomani ana. Hiayiya, Cristo atyo koxaka aoka natyo haomana.<sup>13</sup> Xiyaiya, nohinaeharenae, maisa kox-aka xini nahikoa wenati waiyexe ana, xakore hoka exakere ite notyaona: Nomaotyani ite xoalini hare najikini maniya tyaoniterenae hoka noxani ite nahiti maniya tyaoniterenae ana.<sup>14</sup> Natemita atyo imiyanaose xeta, nahikoa maheta kaxekakehenere nomani ana. Hatyo atyo Enore kawira natyo, Jesus Cristo hiyeta, wenati matyotenehare isa nomani maheta.

<sup>15</sup> Maika wiso wityotya waiyexe wawenane kakoa inityohaliti akereta wisaoniterenai, nahekoitere akereta wityotya wahekotya. Hoka haiyaharenaeuya atyo hahekorexe ahekoita hoka Enore atyo ite awaiyekehala katene xomana.<sup>16</sup> Nikahena hoka waheta maniya wiyan, kalikini wisaonitera akereta.<sup>17</sup> Nohinaeharenae, notyaonitera akere-tairia xisaonehena. Xiyaiya tehitiyaira haiyaharenae nawenane waotyakihenere xiso akereta tyaoniterenai.

<sup>18</sup> Kahare haiyaharenae Cristo atyalihose xaimaholatyaka hiye wainihenere kakoa kahalakoaharahitaha. Koxaka éxeharenae nirae xihiye, xakore hoka kalikini niraihitia nosexi kakoa.<sup>19</sup> Irikati mawakenehare koni ite xaneha hoka kamawenekoaretyakaha. Enenorexaha atyo iniyalahare awaiyetiterekare. Aokowiharetyoahita atyo etakehare kahaiharetakere niyahare kakoa, exahe ali waikohekua anere tahi taita atyo ahekotyahi-taha.

<sup>20</sup> Xakore hoka wisonae atyo enokoa xetarenae. Watyahita atyo wisekohare Niyase-hare, Xekohaseti Jesus Cristo, tyoaneneheta nalita xahita.<sup>21</sup> Hawarehare ite moheta wiháre maiyateretaterehare, wainitaterehare, hoka haháre akereta ite makamanehare mokahene. Hiyaiya, haiyatere kakoa ite tyotya xoalini hare hakatyahakohare moka.

#### 4

#### *Xaotyakisati*

<sup>1</sup> Nohinaehare, noxiyakawalinae, kalore nakakawatita xiso. Xaihalahalinikijita natyo, naokowiharetyoita xikakoa. Maika heko xikinatere xisaona xawenane Xekohaseti koamaniya kakoa, noxiyakawalinae.

<sup>2</sup> Xasemehena, nohinaehalonae Evódia, Síntique xoaha: maika Xekohaseti wakane-halonae makere xisaonitera hiyeta waiye xamokakakoa.<sup>3</sup> Hasemehena, hiso no-hinae waiyexe: maika hakahinaetya hatyo hinamahalo ohironai. Hatyonae, ha-hotyalita Clemente, tyotya haiyaharenae nohinaeharenae xoaha kakoa kalore hakaha, exaoretyaha maheta Iraiti Waiyexe tahi. Enexareha atyo xairatyoare tyaonita Enore baberanexa waiyexe nancko, hoka makamaneharenae tyaonaha maheta.

<sup>4</sup> Xihalahareta menehenaira xawenane kakoa, Xekohaseti koamaniya xisaonitera hiyeta. Niraehitiya: Xihalahareta menehenaira!<sup>5</sup> Maika xawaiyexehare xisaona tyotya haiyaharenae kakoa. Xekohaseti ite tyoheta rotita.<sup>6</sup> Awa atyo xoalini hare kakoa ximawaiyehare. Xiraexahena hoka Enore xaxa, xoare xamani xaokita hoka xihalaharene kakoa xiraexatya.<sup>7</sup> Nikareya xisaona hoka Enore mehexaikoharene tyaona xikakoa,

Jesus Cristo koamaniya xisaonitere hiyeta, hoka ximahiyase, xiyahekola waiye tyaona. Hatyohare maisa waiyekehalakere halitinae ana.

*Wenati Waiyexe*

(Efésios 4.1-3; 4.25-5.2; Colossenses 3.12-17; 1 Tessalonicense 5.14-18)

<sup>8</sup> Hiyeta hoka maika waiye maniya xahekohena, nohinaeharenae. Xoalini hare aliterexe, waiyexe, ehekorexe, kaxaimisakitere, maiyalaharehare, xawaiyetyati, mamaoseralahareti harenae taita xahekohena. <sup>9</sup> Koxaka niraini, noxaotyakiri harenae xasema, exahe nawenani hoka xiayi. Maika nikareta xisaona hoka Enore mehexaikohaliti ijitere tyaona xihaliya.

*Paulo Nihalaharene*

<sup>10</sup> Kalore nihalahareta Xekohaseti koamaniya notyaonitere hiyeta. Wahakiya najikinita xakahinaehitiya natyo. Maisaiya, "Kaxiyan, maisa kahinaetyareha natyo", nomita. Seko atyo xisaonita hoka maisa aliyakere xakahinaetita natyo. <sup>11</sup> Exakere atyo niraeta maisa nowawiharenai nokehexoawitere hiyeta xini. Hiyaiya, nawaiyore atyo nihalahareta koxaka xoalinhare tyaoniterehare nomani kakoa. <sup>12</sup> Waiyekehalakita atyo nomani xoalini hare naokiterekare akili kakoa, exahe waiyekehalakita tehitia atyo nomani kahare naokiterekare akili kakoa. Koxaka exe metaharexe waiyekehalaka nomani: exahe hakititere, xoana xamani notyaonita hoka nihalahareta. Exahenofakatehareta, xoana nonakita xamani hoka nihalahareta. <sup>13</sup> Tyotya xoalini hareya, exahe howitihare mokita nawenani hoka nojiyahotenya, Cristo iyateliti ijitere nomani kakoa.

<sup>14</sup> Howitihare nawenani tyaonita hoka xakahinaetita natyo, hoka waiyexe atyo xisoma. <sup>15</sup> Exe akili waiyekehalakita xiso Filipos nali tyaoniterenae ana: Macedônia nahalakihenere, hetati Iraiti Waiyexe noxakaihenere xowaka, xiwawita xakahinaety natyo. Haiya xowaka waiye notyaonita, haiya xowaka maisa waiye notyaonare harenae hoka xakahinaetita natyo. <sup>16</sup> Tessalônica nali nokakahinaetyaki naokita hoka xaxikaty nomani. Maisa hakirore taita xini, komita kahareki xaxikaty nomani.

<sup>17</sup> Maisa xisa taita maheta xini nomani naokita. Xakore hoka kasani kahare xiye kane katyahe kaotyaka xomana naowita. <sup>18</sup> Tyotya xoalini hare xaxikaitere kaoka nomani, naokitere xahexe kaoka nomani. Epafroditio atyo kolatya nomani xaxikahenerenae hoka kalikini atyo maisa xoare naokare. Hatyoharenae atyo motya xijita ene Enore ana. Hatyohare awaiyetita, waiyeta enomana kirakahare kaxaisakitere enomana akereta. <sup>19</sup> Nenorexi atyo ite isehena xomana tyotya xoalini hare xaokiterenae. Kahare atyo kaxiyeharexe tyaonita, hatyoharenai atyo Jesus Cristo hiyeta tyaonita. <sup>20</sup> Maika Wexe Enore kakoa kaihalaharetyaketa mene, eko xoaha.

*Tyawaxati Miyane*

<sup>21</sup> Maika xiakaiheta natyo Enore kaxaikoneharenae Jesus Cristo anerenae hiye. Wihinaeharenae ali tyaoniterenae haxakaisakehahitaha aokaha xihiye. <sup>22</sup> Tyotya aliyerenae Enore koamaniya tyaoniterenae haxakaisakehetaha aokaha xihiye. Kalorexe César wakaneharenae, sorarenae hare masakare haxakaisakehahitaha aokaha xihiye. <sup>23</sup> Maika Xekohaseti Jesus Cristo nawaiyexehare tyaona xikakoa. Eko xoaha.

## Colossenses

<sup>1</sup> Natyo Paulo, Jesus Cristo niraene kakoare notyaonita Enore xaokalita hoka nax-airatya exe babera nohinaehare Timóteo kakoa hoka waxikatene <sup>2</sup> wihinaeharenae Cristo koamaniya tyaoniterenae ana, wenakalati Colossos naliyerenae ana. Kasani waiye, ximehexaiko xisaona Wexe Enore hiyeta, wihekohase Jesus Cristo xoaha hiyeta waokita.

### *Iraexatyati Ihalahaliniti Kakoa*

<sup>3</sup> Wiraexahena xitahi hoka wihalahareta Jesus Cristo Nexe Enore kakoa xihiyeta. <sup>4</sup> Wasema xityakekone Jesus Cristo, exahe xawaiyetitere tyotya Enore kaxaikoneharenae hoka. <sup>5</sup> Hetati xasema Iraiti Aliterexe, Waiyexe xoaha, wenati waiyexe xaheta maniya tyaonitere enokoa naliye tahi hoka xityakeko. Nikare xityakekone, xiyawaiyetyakakoane hare xatyahitere hiyeta kaotyaka. Hiyaiya, kaxomoka atyo xaheta maniya enokoa nali. <sup>6</sup> Hatyo Iraiti Waiyexe xasemehenereta xaorekoita tyotya halitinae koni hoka waiyexe maniya mohitita enawenaneha. Nikare tehitija tyaona xinekoni hetati xasemehenere Enore iniyalahare nomaseharenae nawenane waiyexe maniya mohititere tahi. Hatyo xowaka hatyohare akiki waiyekahalakita xomana.

<sup>7</sup> Epafras hotohare aotyakisa xiso. Hatyo atyo wixiyakawalahare, wikhinaetyasehare waiyexe Cristo hatene hiye. <sup>8</sup> Xakai wihiye xawaiyetyati Enore Nisekohare isehenere xomana tahi.

<sup>9</sup> Wasemehenere xitahi najikinita maisa wimairaexalita xini xomana. Exakere wiraexaita xitahi: kasani xawaiyore Enore xahekola kakoa hoka aokitire akereta xisaona, exahe Enore Nisekohare awaiyolinikisa, airihalinikisa xiso hoka aokitereharenae taita xisoma maheta, <sup>10</sup> exahe waiye aokitire akereta xisaona, xisoma maheta, hoka Enore ihalahare maheta xikakoa. Nikareya xisaona hoka xoalini hare waiyexe xisoma kahare, exahe ekakoitaite Enore tahi hoka kalore waiyekahalaka xomana. <sup>11</sup> Maika xikinatere xisaona iyateliti waiyexe Enore nalita tyoitere hiyeta hoka xoare xamani kaotyakehena xomana hoka maisa xikaholawakita ekakoa.

<sup>12</sup> Maika xihalahare Wexe Enore kakoa. Hiyaiya, hatyo atyo aoka xiso haomana hoka isa xomana haomanere hotyalinai ana mokitire hawenakala werokakoare nalitare hiyeta. <sup>13</sup> Iyeheta atyo wiso makaliroti niyatere konita hoka Haisani haxiyakawala haliya waiye moheta wiso. <sup>14</sup> Hatyo atyo iyehitita wiso hoka ihiyeta atyo iniyalahare wománenae kamaotyanetyakihitita.

### *Haliti Waiyexe Cristo Tahi*

<sup>15</sup> Cristo atyo kawaiyakere. Hatyo atyo Enore mawaiyakahare akerehare. Enore Ityani hetatiye atyo, xoalini hare kaomakehenere xahehare atyo. <sup>16</sup> Ihiyeta atyo Enore tyoma tyotya xoalini hare. Enokoa, waikohekao xoaha, kawaiyakitereharenai exahe mawaiyakitereharenae, xekohasetinae, kalorexenae, iyateliti kakoarenai harenae. Ihiyeta exahe enomana xoaha tyotya kaomaka. <sup>17</sup> Cristo atyo koxaka terota tyaona tyotya xoalinhare nahitita, hoka ihiyeta atyo tyotya xoalinhare waiye kaxomokakita, kaxamehexaikoharetyakita. <sup>18</sup> Hatyo atyo tyakekohatiyenae seri hoka tyakekohatiyenai atyo eháre. Cristo hiyeta eháre tyaona. Hatyo hotohare kaxekasekisakeheta hoka tyotya xoalini hare nonitata hetatiye tyaona maheta. <sup>19</sup> Nexe Enore xaokalita atyo Cristo Hanexe hakakoanehare terota tyaonita. <sup>20</sup> Haisani hiyeta Enore tyotya xoalini hare hakoamaniya makere moka aokowita. Haisani kamane atyalihose xaimaholatyaka hiyeta mehexaikohaliti tyoma hoka tyotya xoalini hare waikohekao, enokoa harenae hakoamaniya makere moheta.

<sup>21</sup> Hetati ene seko xisaonita Enore nonitata, enahalakoahare ene xisaonita iniyalahare xisomitere, xahekotitere hiyeta. <sup>22</sup> Hoka kalikini atyo Haisani kamane hiyeta Enore hahinaehare aoheta xiso, hoka hahaliya moheta xiso hoka waiyexenai, firahaliyerenai, exahe iniyalahare maomaneharenai xisaoheta maheta. <sup>23</sup> Hoka aliterexe atyoite heko

xikinatere xisaohena Cristo xema xawenane kakoa, hoka maisaiya xakikijoita kaxekaka xomana kaxaokakehenere xasemehenere Iraiti Waiyexe xowaka nonitata. Hiyaiya, hatyohare Iraiti Waiyexe hiyeta atyo natyo Paulo wakahare notyaona, hoka hatyoharenai noxakaita tyotya halitinai hiye.

### *Paulo Hatene Tyakekohatiyenae Hiyeta*

<sup>24</sup> Hoka kalikini atyo nihalahareta iniyalahare nokaxomokakitere xihiyeta hiyeta. Hiyaiya, iniyalahare nokaxomokakitere hiyeta atyo nakahinaetita, namematya maheta Cristo iniyalahare kaxomokakehenere mawane. Tyakekohatiyenai wanahiya atyo nahakita. Hiyaiya, hatyonai atyo eháre. <sup>25</sup> Enore atyo tyakekohatiyenai wakanehare moka natyo. Hatyo atyo exe hateniti isa nomani, waiye xisaona maheta. Aliterexe exe nohateni atyo noxakaihakali, waiyexe noxakai maheta iniraene. <sup>26</sup> Exe iniraene metaharexe atyo ateroakihenere tyotya halitinai nonitata kahare terehokoane najikini maniya hoka kalikini atyo hotikisene hakaxaikoneharenai ana. <sup>27</sup> Enore xahekola atyo exakerexe: Kasani ehotyaliharenai ana waiyekahalaka exahekola metaharexe aokita, hatyo exahekola atyo waiye kaiserehare tyotya haliti hotyaliharenai anere. Hoka exahekola metaharexe atyo exakerexe: Cristo atyo tyaonita xikakoa hoka hatyo hiyetaite Enore nali wenati waiyexe tyaonitere ana ite xiyane xahikoa.

<sup>28</sup> Nikare wiyakaita Cristo tahi tyotya halitinae hiye. Waotyakijita, wawaiyekelakaita hatya xakini ana wawaiyorene kakoa. Enore ana tyotya wahotikisahene maheta, Cristo xema waiye tyaonehenahere hiyeta. <sup>29</sup> Notyomehena maheta nohateni hoka naiyateretyoita, Cristo iyateliti isehenere nomani kakoa. Hatyo iyateliti atyo tyaonita nohiye.

## 2

<sup>1</sup> Kahare nahaka xihiyeta, Laodicéia koa tyaoniterenae hiyeta, exahe haiyaharenai nonmawaiyaninharenai xoaha hiyeta. Kasani hatyo hare waiyekahalaka xomana naokita.

<sup>2</sup> Nahakita, kasani mamairanehare tyaonaha maheta. Nahakita tehitia haxawalita tyaonaha maheta xawaiyetyati hiyeta. Exahe tyotya Enore akili masakare waiyekahalaka enomanaha hoka waiye tyaonaha maheta. Nikare hatyo metaharexe akili waiyekahalaka enomanaha maheta. Hatyo metaharexe atyo Cristo. <sup>3</sup> Hatyo atyo tyotya xoalini hare waiyexe metahare tyaonitere majiholatyakala. Irihaliti, waiyoliniti xoaha, Enore nalita tyoiterehare majiholatyakala.

<sup>4</sup> Hatyo hiyeta nomita xihiye: Awa atyo haiyanae maoseratya xiso hairaeneha kakoa, exahe motya aliterexe haliti waiyexeharexenai eneha hoka. <sup>5</sup> Hiyaiya, seko xakore notyaonita hoka nisekohare atyo tyaonita xikakoa. Hoka nihalahareta xikakoa, hahotyalita exahe xikinatere xityakekone Cristo kakoa hiyeta.

### *Cristo Kakoa Haxawalita Nawenatyaka*

<sup>6</sup> Koxaka atyo Jesus Cristo koamaniya xisaona. Xiyekohase xaokene hoka maika ekoamaniya taita xisaona. <sup>7</sup> Xikatyaharexera xisaohena ihiye, xawenanira xamohenia ekoamaniya, exahe exaheharira xikinatere xisaohena xityakekone kakoa, xikaxaotyakisakehenere akereta. Exahe xihalaharehena tehitia ekakoa.

<sup>8</sup> Maika xirihare xisaona hoka maisa xala hare maoseraita xiso haliti nawaiyoretere kakoa. Hatyoharenai maisa xoare tyomareha. Hatyoharenai atyo halitinae, exahe isekohaliti ewaxirahare tyotya xoalini hare kaxakotere xaotyakira. Maisa Cristo xaotyakira xini. <sup>9</sup> Hiyaiya, Enore terota atyo tyaonita Cristo milako.

<sup>10</sup> Ekoamaniya xisaonitere hiyeta waiyexe maniya xawenane tyaonita. Hiyaiya, Cristo atyo tyotya xekohasetinae, isekohaliti ewaxiraharenai harenai xahehare niyaterexe.

<sup>11</sup> Ekoamaniya xisaonitere hiyeta atyo xikaxaiko nomanere milihisaka. Maisa atyo halitinae hiyeta xini xikaxaiko nomanere milihisaka. Cristo hiyeta atyo wikaxaiko nomanere milihisaka hoka iniyalahare nonitata waiyexe maniya wikaxomokakeheta.

<sup>12</sup> Hiyaiya, xikabatixatyakehenere xowaka atyo xikaxafityaka Cristo kakoa. Xikabatixatyakehenere hiyeta tehitia xikaxe kasekisakeheta ekakoa xityakekohenere Enore niyatere hiyeta. Hiyaiya, hatyo Enore terota atyo ekasekiheta Cristo. <sup>13</sup> Toahiya ene ekamane akereta xisaonita xawenane kakoa, iniyalahare xománe hiyeta, exahe maisa exaiko nomanere milihisakahare xini xiso hoka. Xakore hoka kalikini atyo Enore ekasekiheta xiso hahotalita Cristo kakoa. Hoka emaisaheta atyo tyotya iniyalahare wománenai, <sup>14</sup> exahe emaisaheta wikitinanenai, tyaoniterekarenai exahe akiterekarenai. Mawenekoaretya atyo hatyo wikitinanenai, berekotyahene atyalihose xaimaholatyaka hiye hoka. <sup>15</sup> Hakamane atyalihose xaimaholatyaka hiyeta Cristo emaisatya kalorexenae, isekohaliti ewaxiraharenae xoaha niyatere. Hatyo iyatelitinai kakoa olatyoare haotikatita jiyahao akahenere xowaka.

<sup>16</sup> Nikare ite hoka maisa xala hare xikanakairiterehare, xiseriterekarenai, mahateniti ferakene, hisehaliti ferakene, kaimare tyaohetehena, sábado ferakene harenae hiyeta iraehekoahitita xitahi. <sup>17</sup> Tyotya hatyoharenae atyo tyohenere maxakatyahene. Hoka ekaiserekarenai atyo Cristo.

<sup>18</sup> Awatyo hatya kaxawaiyanikisaka aohena, exahe hamaoserala kakoa waiyexehare aokowihena, exahe anjonae kakoa kaihalaharetya aohena, exahe xiyaheharenai aokowihena hoka awatyo xityakekone. Hatyohare haliti atyo maisa xoare tyomare, ahinityare tyaonita halitinae xahekola akereta ahekoitire hiyeta. <sup>19</sup> Hatyohare haliti atyo maisa Cristo, tyakekohatiyena hotyali seri koamaniya tyaohetehare. Hiyaiya, Cristo atyo eseriha. Iniyatere hiyeta atyo haréti exekaokakikoatyakahare tyaonita, hahotalita tyaonita, ekaokakakoane hiyeta exahe ihiyetare tyoitire hiyeta, hoka kekoareta Enore ekekoarene akitere akereta.

### *Wainisati Atyo Cristo Kakoa Kasetyakeheta*

<sup>20</sup> Koxaka atyo xiwaini Cristo kakoa hoka maisa atyo isekohalitinae iniyalahare waikohekoaxaikotyaseharenae anereheta xini xiso. Hatyo hiyeta xoanere hoka motya exe waikohekoanerena akereta xisaonita? Xoanere hoka xityakekota exakerekarenai iraitinae: <sup>21</sup> “Awaira atyo xotohena exehare”, “Awaira atyo hatyohare xahasahena”, “Awaira atyo hatyoharenae xiwatyalihena”, niterekarenai.

<sup>22</sup> Tyotya hatyohare mahokoaneterekarenai atyo etakehare xoalini hare kakoa kahakaka hoka enajikini maniya xololoterekarenai xaokaka. Hatyohare xaotyakiye atyo halitinae xahekola hiyeta kaotyakene. <sup>23</sup> Aliterexe atyo motya waiyoreha ene, aiyateretyoa tyaonahitaha anjonae haxawaiyeraha kakoa, motya waiyexeharexenae ene tyaonahitaha, haháreha waiye kaxaikoahitaha harenae. Xakore hoka tyotya hatyoharenae atyo maisa xoare tyomare. Maisa atyo wiháre awaiyetiterekarenai emaisatya.

## 3

<sup>1</sup> Koxaka xikaseheta Cristo kakoa xikamane nonitata, xawenane matyotenehare tyaona maheta. Hatyo hiyeta xoalini hare enokoa tyaoniterekarenai taita xaohera. Hiyaiya, hatyo nali atyo Cristo tyokita haokahakalakoa Enore fihini maniya. <sup>2</sup> Xahekohena enokoatire tahi taita hoka awa atyo xahekota ali waikohekoaxaikotyaseharenai tahi.

<sup>3</sup> Koxaka atyo xiwaini hoka xawenane atyo exateroakisakahare tyaonita Cristo kakoa Enore nali. <sup>4</sup> Cristo kakoa atyo wawenane tyaonita hoka haikoahetehena ite kalorexe tyaona maheta hoka nali tehitia ite xisaonita hoka hatyo akereta waiye xisaona.

### *Iniyalahare Nomaseharenai Atyoite Maisa Xaneta Enore Nawenakala (Gálatas 5.19-21; Efésios 5.1-7; Apocalipse 21.8, 27)*

<sup>5</sup> Hatyo hiyeta xahalakihena ali waikohekoaxaikotyaseharenai tyaoniterekarenai xihije: ohiro watyalisaka, kehaisakiterekarenai, mahaihaliniti, maiyaseti harenai. Hiyaiya, maiyaseti atyo enore metalahare xema nawenatyaka akerekarenai. <sup>6</sup> Hatyoharenai hiyeta atyoite masemaxemalaharenai Enore iniyalahare moka.

*Maika Awa Iniyalahare Xema Xisaona  
(Efésios 5.11-12; Hebreus 3.7-13; 1 João 2.15-17)*

<sup>7</sup> Toahiya ene xisaonita hatyo xawaiyetiterehare aokitere akereta, xawenane ekoamaniya tyaconitire xowaka. <sup>8</sup> Xakore hoka kalikini xahalakihena exeharenai: xehaliti, ohiro maiyasetyaka, irawaniti kaxahekotyakiterehare harenai. Hoka maika maiha ini hekoti iraiti examaikohalinikisare, mahekorenrehare hikoita xikanasakota. <sup>9</sup> Waiyehena atyo xamaoseratya kakoa. Koxaka atyo xahalakisa xawenane toahiyere xawenane waiyexe hiyeta, <sup>10</sup> hoka kalikini atyo xawenane waitare xema xisaonita. Hatyo xawenane atyo haliti waitare. Xomasehare Enore ewaitareharetita xiso hatyo akereta xisaona maheta, exahe xawaiyoreheta ekakoa maheta. <sup>11</sup> Hatyo hiyeta maisa majudeuneharenae, judeunae aka. Maisa exaikonomanere milihisakaharenae, maxaikonomanere milihisakaharenae aka. Maisa wakaharenae, xekohasetinae aka. Maisa mamasotyakahare, exahe hágako iraetereharenae aka. Cristo atyo wityotya Wiyekohase. Hatyo atyo tyaonita wityotya wikakoa.

*Wenati Waiyexe  
(Atos 10.35; Filipenses 4.8; 1 Tessalonicense 5.14-18; Tito 3.1-2)*

<sup>12</sup> Xiso atyo Enore hotyaliharenae. Hatyo atyo awaiyitya xiso hoka aoka xiso haomana. Hiyeta hoka xairakoaneharetya kakoa, haiyaharenae waiye xamoka, ximasaokowiharetyoanehare, ximehexaikohare xisaona. <sup>13</sup> Maika hatya eharehena xihiyehetene. Maika hatya xihinaehare hatya kakoa kirawane kakoita hoka maika maotyanehetene, Xekohaseti maotyanehetehenere iniyalahare xománe akereta. <sup>14</sup> Maika xawaiyitya kakoa kaisere. Hiyaiya, xawaiyetyati atyo tyotya xoalinihare hahotyalita axomokanikijita.

<sup>15</sup> Maika Cristo mehexaikohaliti ijitere hiyeta ximehexaikohare xisaona. Hatyo mehexaikohaliti ana atyo Enore kawisa xiso, haterore háré hiye hahotyalita xisaonitere hiyeta. Maika xihalahare Enore kakoa. <sup>16</sup> Hoka maika Jesus niraene waiyexe kaiserehare tyona ximahiyase hiye. Maika xaotyakisa, exahe xawaiyolinikisa kakoahena haiyanai kakoa tyotya xawaiyorene kakoa. Xiyera salmo, xerati waiyexe, xerati keharere Enore anere. Xiyera Enore ana xihalaharene kakoa. Maika xihalaharehena ekakoa. <sup>17</sup> Hatyo hiyeta maika tyotya xoalini hare xisomehenerehare, xiraehenerehare Xekohaseti Jesus nexare kakoa xisoma, exahe hoka ihiyeta xihalahare Xexe Enore kakoa.

*Kaiyanityorenae, Kaiyaneneronae  
(Efésios 5.22-33; 6.1-4; 1 Pedro 3.7)*

<sup>18</sup> Xiso ohironae, xasemaxemata xexanenena niraine. Cristo koamaniya atyo xisaonita hoka maika nikare xisaona.

<sup>19</sup> Xiso exanenena, xawaiyetya xexanityonae, awa atyo xiyalijinihare exahitaha.

<sup>20</sup> Exahe xiso ityaninae hoka xasemaxemata xexe, xityo niraine, waiye xaiminihenahene. Hatyoharenae atyo Enore ana waiyeta.

<sup>21</sup> Xiso inityonai, enexenae hoka awa atyo xityaninae xaihalikisa, waiye aliya hoka hatyo hiyeta amaikohareha hawenaneha kakoa.

*Xekohasetinae, Hatenitiyena  
(Efésios 6.5-9; 1 Timóteo 6.1-2; Tito 2.9)*

<sup>22</sup> Xiso wakaharenae, xityakeko xiyekohasenae. Xoalini hare nomaka aohena xihiyehoka xisoma. Awa atyo ehaotiha taita xisoma ihalahareha maheta xikakoa. Exahe ehaotyaha, emakanaha hoka waiye xahaka enomanaha. Maika aliterexe xiyaiminira kakoa xaiminisahene, Xekohaseti xaiminijitere hiyeta.

<sup>23</sup> Xoalini hare xisomehena hoka maika xihalaharene kakoa xisomene. Exahe halitinae ana xakore xahakita hoka maika motya Enore ana ene xahakita akereta xisoma hatyoharenai. <sup>24</sup> Xotyaxematyaira: Xekohaseti atyo ite bakatya xiso. Hoka kaxekakaite xomana xoare xamani hakaxaikonehare hotyalinai ana mokita hoka. Hiyaiya, hatyo

Xekohaseti ana xahakitere kaiserehare atyo Cristo. <sup>25</sup> Hoka xala xamani atyo ite iniyalahare tyoma hoka bakatyaite hatyo iniyalahare tyomehenere. Hiyaiya, Enore atyo hakakoa mokita tyotya halitinae, maisa atyo xalahare hawareharexexe aka enomana.

## 4

<sup>1</sup> Xekohasetinae, maika waiye xamoka xiwakaneharenae, awa atyo xiyalijinihare ihiyeha. Xotyaxematy: xiso tehitiya xikaxekehase enokoa nali.

*Taotyakisati*

<sup>2</sup> Maika xaiyateretyoa xiraexala kakoa. Xiraexahena hoka xirihare xisaona, xihalahare Enore kakoa. <sup>3</sup> Hatyo xowakita tehitiya xiraexahena witahi hoka Enore kahinaetya wiso hoka waiye wiyakaihakaty Cristo metaharene. Hatyohare hiyeta atyo berexo ako notyaonita. <sup>4</sup> Hiyeta hoka xiraexaty nomani hoka waiyekehala noxakaihakaty emetaharene akiti kahare halitinae hiye, nohateni kaxaokakehenere akereta.

<sup>5</sup> Maika xirihare xisaona matyakekoneharenae kakoa. Exahe xiyakai harenae iraiti ihiyeha xiayiehenahene hoka. <sup>6</sup> Xakore hoka maika waiyexe taita xirae, haiyanee ana iraiti waiyetere harenae taita xirae. Maika waiye xekoaxatayahene.

*Tyawaxati Miyane*

<sup>7</sup> Wihinaehare wixiyakawalahare Tíquico ite notahi xakai xihiye. Hatyo atyo hakare, exahe kahinaetita natyo Xekohaseti hatene hiye. <sup>8</sup> Naxikahenene xomana aihala-halinikisa xiso maheta, exahe hoka xakai ali wisaonitere tahi xihiye maheta. <sup>9</sup> Onésimo ite tyoa exema hoka xakaihaha xihiye aliye wisaonitere tahi. Onésimo atyo wihinaehare waiyexe, wixiyakawala, exahe xinekonitare atyo.

<sup>10</sup> Aristarco berexo ako tyaonitere nokakoi haxakaisakeheta aoka xihiye. Barnabé ximarene Marcos hoka haxakaisakeheta tehitiya aoka xihiye. Koxaka Marcos tahi xikaxaotyakisaka, nali tyohetehena hoka waiye xamokene maheta.

<sup>11</sup> Josué, haliti waiyexe kaxaokakitere, tehitiya haxakaisakeheta aoka xihiye. Exe hanamanee atyo judeunae. Jesus koamaniya hawenaneha mokaha hoka hakahitaha nokakoi Enore ana. Kahare kahinaetyahitaha natyo.

<sup>12</sup> Epafras tehitiya haxakaisakeheta aoka xihiye. Xinekonitare atyo, Jesus Cristo wakanehare atyo. Masakare iraexaty minita xomana, kasani Enore kahinaetya xiso hoka xikinatere xisaona ekoamaniya, exahe xawenane kakoa hoka xikekoare maheta, ximemere xisaona Enore aokiterehare xisoma maheta. <sup>13</sup> Noxakaiya hahatene how-itiharexe tyomehenere xihiyeta, Laodicéia nali tyaoniterenae hiyeta, Hierápolis nali tyaoniterenae xoaha hiyeta tahi. Hatyo harenae nowaiya.

<sup>14</sup> Lucas, Demas xoaha haxakaisakehenahitaha aokaha xihiye. Lucas atyo wi-wairatyasehare.

<sup>15</sup> Maika xiakaiheta wiso wihinaeharenae Laodicéia nali tyaoniterenae hiye. Xiyakaiheta wiso Ninfa hiye, exahe tyakekohatiyenae ahohisakoatyakakoiterenae ehanako nali hiye hoka xiyakai wiso.

<sup>16</sup> Xakaixarehenere exe babera najikinita, maika xaxikatene tehitiya Laodicéia naliyerenai tyakekohatiyenai ana hoka kakaixaretyaka. Xakaixaretya tehitiya babera kaoke-henere xomana Laodicéia nalitare.

<sup>17</sup> Maika xirae Arquipo hiye: — Haiyateretyoa hoka waiye hihatene hisoma Xekohaseti isehenere homana.

<sup>18</sup> Nokahe kaka terota naxairatya exe: “Paulo katyawaxita xihiye”. Awaira atyo ximaotyanehena berexoako nawenani.

Kasani Enore waiye kaxaiko xiso naokita, eko xoaha.

## 1 Tessalonicenses

<sup>1</sup> Natyo Paulo, Silas, Timóteo xoaha kakoa naxairatya exe babera Xekohaseti koamaniya tyaoniterenai ana wenakalati Tessalônica tyaoniterenae ana. Wexe Enore koamaniya, Xekohaseti Jesus Cristo koamaniya xoaha xisaonita. Kasani waiye, ximehexaiko xisaona naokita.

### *Tessalônica Yerena Tyakekone, Nawenane*

<sup>2</sup> Wihalahareta minita Enore kakoa xihiyeta, exahe wotyaxemaita xiso wiraexala kakoa. <sup>3</sup> Wotyaxemaita xiso Wexe Enore haotita: aokitere akereta xisomita xityakekone hiyeta. Xiyawaiyetyakakoane hiyeta kalore xahakita enomana, exahe heko xatyahita Wiyekohase Jesus Cristo xahita.

<sup>4</sup> Nohinaeharenai, exe akiti waiyekehalakita womana: Enore awaitita xiso, exahe aoka terota xiso haomana. <sup>5</sup> Hiyaiya, Iraiti Waiyexe wiyakaita xihiye hoka maisa wiraene kakoa taita xini. Enore niyatere exahe Isekohaliti Waiyexe kahinaetya wiso hoka xityakeko kaiserehare iraiti. Wisaothenere xinekoni xowaka wawenane waiyekehalaka xomana hoka hatyo hiyeta tehitia xityakeko hoka <sup>6</sup> wisaonitere akereta, exahe Xekohaseti nawenane akereta hoka xisaona. Xityakeko iraiti hoka Isekohaliti Waiyexe aihalahalnikisa xiso, iniyalahare xakore matyakekoneharenai mokahitaha xiso hoka. <sup>7</sup> Nikare xisaona hoka tyakekohatiyena Macedônia koa, Grécia koa nali tyaoniterenai xisaonitere akereta tyaona aokowiha. <sup>8</sup> Xiyeta Macedônia, Grécia xoaha tyaoniterenai sema Xekohaseti tahi, exahe xityakekone Enore tahi exaorekoatyaha tyotya wenakalatinaekoa. Hiyeta hoka maisaiya xoare maheta wiraehitita. <sup>9</sup> Hoka tyotya hatyo wenakalatikoa tyaoniterenai iraetaha wisoa wiyaiyehener xiso tahi, exahe xakaihakatyahitaha waiye xamohenere wiso akiti, exahe xahalakihenere xawenane enore metalahare koamaniya hoka Enore aliterexe koamaniya wisaothenere tahi akiti. <sup>10</sup> Exahe xakaihakatyahitaha tehitia Jesus, Enore ityani haikoahaneheta xiyatyahane enokoata tahi. Hatyo atyo waini hoka Enore ekasekihetene. Hatyo atyo waiyexe aniya moheta wiso iniyalahare tyohetehenere nonitata.

## 2

### *Paulo Hatene Tessalônica Nali*

<sup>1</sup> Nohinaeharenai, waiyekehalakita atyo xomana nali wisoa wiyaiyehener xiso xowakiyere. Hatyo xowaka Iraiti wiyakaihenere atyo katyakekotyaka.

<sup>2</sup> Wimakaokeneharet xomana Tessalônica nali, maisa waiye xini wikaxomokaka, exahe wikamokonasetyaka wenakalati Filipos nali. Aiyateretyoahitaha xakore wiyahita hoka Enore atyo iyateliti isa womana hoka Iraiti Waiyexe tyoitere enalitare wiyakaita.

<sup>3</sup> Tyotya wiyakaiterena atyo aliterexe taita wiyakaita xihiye, maisa wamaoseraita xini xiso. Maisa wametakisa maheta xini, maisa waiyalaharetya xawenane maheta xini. <sup>4</sup> Tyotya wiraeterena Enore aokitere akereta taita wiraeta. Exaokala ximita nikare wisaoita hoka wiyakaita iniraine. Exahe wiso hoka kasani Enore ihalahare wikakoa waokita, maisa halitinai ihahalare wikakoa waokare. Hiyaiya, Enore atyo tyotya wiyahekola kakoa waiyoreta.

<sup>5</sup> Hiyaiya, waiyekahalaka xomana wiraehener: maisa wraihekoata xini wemaxalotya maheta xiso hoka xityakeko wiraene, exahe maisa wamaoseratya xiso hoka olo kaxekaka womana maheta xini. Enore ana tehitia hatyoharenai waiyekahalakita. <sup>6</sup> Maisa xoana xowaka haiyanai aexakeritya wiso waokare, maisa xiso, exahe haiyaharenai hekoti hoka. <sup>7</sup> Wiso atyo Cristo niraene kakoarenai hoka kinatyaxaiya wiraet xikakoa waokowita hoka kinatyaiyaiya wiraet. Xakore hoka xinali wisaonitere xowaka waiye wamokita xiso, hatya ohiro haisani waiye mokitere akereta. <sup>8</sup> Kalore wawaiyetita xiso. Kasani maisa

iraiti Enore nalitare taita xini wiyakai xihiye waokowita. Exahiya wikaxaisaka xihiyeta hoka ehekoreya, wiyawaiyera xiso hiyeta.

<sup>9</sup> Nohinaeharenai, xotehena! Wisaonitere xinekoni xowaka wahakita kalore, waiyateretyoita. Ferakoa, makiya hoka wahakita winakaira niyahare, maisa wiyakaihenere Iraiti Waiyexe xihiye xowaka haiyanae waxa waokowiye hoka. <sup>10</sup> Xiso atyo wawenane xiyaia, Enore tehitiya hatyoharenae waiya. Waiyexe, totere, ekaiserehare harenae wisaona xiso tyakekoterenai koni. <sup>11</sup> Wisaonitere xinekoni xowaka waiye wamokita xiso, hatya haliti waiye mokitere haisani akereta. Hatyo harenae akiti waiyekelalakita xomana. <sup>12</sup> Waihalahalinikisa, wemaxalokisa, waotyakisa harenae xiso hoka Enore aokitere akereta xisaona hoka ihalahare xikakoa maheta. Hatyo atyo aoka xiso haomana hoka kawisa xiso xiyanne xisaona ewaikoharakoa hoka waiye kaiserehare xisaona ehaliya maheta.

<sup>13</sup> Hiyeta hoka wihalahareta minita Enore kakoa xihiyeta. Nali xinekoni wisaonita hoka Enore niraene wiyakai xihiye hoka xasemene hoka xaokene xomana. Maisa halitinai niraene xaokitene hoka Enore niraene terota xaokene. Hoka aliterexe atyo Enore niraene. Hiyaiya, Enore atyo xiso tyakekoterenae koni hakita. <sup>14</sup> Nohinaeharenae, Judéia koa nali tyaconiterenae Jesus Cristo kaxaikoneharenae Enore koamaniya tyaconiterenae kaxomokakitere akereta xikaxomokakita. Judeunai matyakekoneharenae iniyalahare mokahiterene akereta xawenakala tyaconiterenae matyakekoneharenae iniyalahare mokahitaha xiso. <sup>15</sup> Hiyaiya, judeunae atyo aisa Xekohaseti Jesus, exahe iraiti xakaisaseharenae hoka aisaha, hoka iniyalahare mokaha wiso. Hatyohare maisa waiyeta Enore ana. Exahe nikare tyaconaha hoka tyotya haliti nahalakoahare tyaconaha. <sup>16</sup> Kasani maisa Iraiti Waiyexe isekohaliti niyasehareheta tahi wiyakai aokareha majudeuneharenae hiye hoka hatyo hiyeta aeroretyaha minita iniyalahare tyomahitere. Hoka kalikini atyo Enore ehareta ihiyeha hoka kalorite iniyalahare mokahene.

### *Paulo Haki Waiyehitiya Aokowi Tessalônica Yerenae*

<sup>17</sup> Nohinaeharenae, wiyanne xonita hakiti hoka kalore wakakawaita xiso, hoka kalore wahekoita xitahi. Exahe waiyateretyo wiyaiyehitiya xiso maheta. <sup>18</sup> Kasani wiyaiyehitiya xiso waokowita. Natyo, Paulo hekoti kasani nowaiyeheta xiso naokowita. Xakore hoka Ahalakoahaliti talaita wiso. <sup>19</sup> Xiso terota wihalahare xamokita. Wiyekohase Jesus Cristo haikoahetehenere xowaka ite masakare wihalahare xihiyeta heko xikinatere xisaohenere ekoamaniya hiyeta. <sup>20</sup> Aliterexe atyo xiso wiyakowiharetyoane, wihalaharene xoaha.

## 3

<sup>1</sup> Wahehena wimawaiyaneta xiso hoka mahaiya aliyakere watyahahitita hoka wiwawa Atenas nali wisaona hoka <sup>2</sup> wihinaehare Timóteo waxikatyta xomana. Hakita tehitiya wikkakoa Enore hatene hoka xakaihakaita Iraiti Waiyexe Cristo tahi hoka waxikatene xomana aihalahalinikisa xiso hoka masakare xityakeko maheta, <sup>3</sup> exahe maisa xala hare halakijita hatyakekone iniyalahare xikaxomokakitere hiyeta. Enore xaokalita haiya xowaka nikare wikkakita, hatyoharenae waiyekelalakita xomana. <sup>4</sup> Xinekoni wisaonitere xowaka wiyakai xihiye: “Iniyalahare ite wikkakita”, wexa xihiye hoka nikare wikkakita.

<sup>5</sup> Hatyo hiyeta Timóteo naxikatyta xomana, maisaiya aliyakere natyahahitita xitahi akiti hoka naxikatene xomana xityakekone tahi nasema naokowit hoka. Xoana xamani hoka Tihanare hasakaharetita xiso emaisatya maheta wihatene xinekoni aokowita hoka.

<sup>6</sup> Hatyaoseta Timóteo haikoaheta wenakalati Tessalônica nalita hoka xakai wihiye xityakekone, xiywaiyetyakakoane tahi xakai wihiye. Xawaiyetitere wiso, kasani xiayeheta wiso xaokowit, wiso wiyaiyeheta tehitiya xiso waokowit akereta xakai wihiye. <sup>7</sup> Hiyeta hoka wihalahare xamoka, wasema xitahi hoka. Howitihare tyaconita wawenane, iniyalahare harenae wikkakita xakore hoka xityakekone wasemita

hoka wihalahare xamoka, xityakekone aihalahalinikijita wiso. <sup>8</sup> Xisoiya atyo Wiyekohase koamaniya xikinatere xisaonita hoka wihalahare kaiserehare wisaona.

<sup>9</sup> Nikare hoka wihalahareta Enore kakoa xihiyeta. Wihalahare Enore haotita xaihalahalinikijitete wiso hiyeta. <sup>10</sup> Wiraexaita ferakoa, makiya harenae waxita Enore, kasani halakisa wiso hoka wisoa wiyaiyeheta xiso hoka xoalini hare wimaxaotyakiraharene xiso kakoa waotyakisa xiso hoka xityakekone exahexe tyona maheta.

<sup>11</sup> Maika Wexe Enore, Wiyekohase Jesus Cristo hoka memere moka waheta maniya hoka wisoa wiyaiyeheta xiso. <sup>12</sup> Maika Xekohaseti kahinaetya xiso hoka masakare xawaiyetya kakoita, exahe tehitia tyotya halitinae xawaiyetya, kalore wawaiyetitere xiso akereta. <sup>13</sup> Nikare ite aiyatelikisa xiso hoka waiye, iyoma, iniyalahare ximao-manehare wexe Enore nahalakoa xisaona Wiyekohase Jesus Cristo tyohetehenere tyotya haomanerena kakoa xowaka.

## 4

### *Wenati Enore Aokitere Akereta*

<sup>1</sup> Nohinaeharenae, kalikini atyo wihiyeta waiyekehalaka xomana wenati waiyexe Enore awaiyetitere. Alitere nikare xisaonita. Hiyeta hoka wirae xihije waotyakisa harenae xiso, Xekohaseti Jesus niraene kakoare wiso hoka. Maika masakare heko nikare xisaona. <sup>2</sup> Xekohaseti Jesus xaokalita waotyakihenere xiso atyo waiyekehalakita xomana.

### *Awa Atyo Iniyalahare Xisoma Ohiro Kakoa*

(1 Coríntios 5.1-5; 6.15-20; Hebreus 13.4)

<sup>3</sup> Exakere xisaona aokita Enore: kasani waiye xawenane xamoka ekoamaniya hoka maisa iniyalahare xisoma ohiro kakoa aokare. <sup>4</sup> Maika waiye xamoka xexanityonae, xaiminisahene hare Enore aokitere akereta. <sup>5</sup> Awa atyo Enore koamaniya mawenaneharenae iniyalahare ahekoitere akereta xisaona. <sup>6</sup> Nikare hoka maisa xala hare komaniyaita hahinaehare, exahe maxaiminirita hahinaehare. Koxaka wiyakai xihije exe akiti xakore hoka kalikini wiyakaihitiyene xihije: Enore ite iniyalahare moka hatyohare iniyalahare tyomitereharenae. <sup>7</sup> Hiyaiya, Enore haomanere aoka wiso, maisa iniyalahare wisoma maheta xini. Waiyexe taita wisoma maheta. <sup>8</sup> Xala xamaniya exe xaotyakisati maisa awaiyetita hoka maisaiya haliti xini maxawaiyirita. Isekohaliti Waiyexe Enore ijitere xomanaiya atyo maxawaiyirita.

<sup>9</sup> Xawaiyetita xihinaehare tyakekohatiyene. Enore aotyakisa xiso hoka maisaiya xoare maheta hatyo akiti waxairahitita xomana. <sup>10</sup> Xisonae koxaka xawaiyetita tyotya xihinaeharenae Macedônia koa tyaoniterenae. Hoka maika exahexe xawaiyetya kakoa.

<sup>11</sup> Maika xaiyateretyoa ximehexaikohare xisaona maheta. Maika xawenane takita xikax-aiko hoka waiye xisaona. Xihatene maniya taita xisaona hoka hatyo xihatene hiyeta xisaona. Koxaka hatyo tahi wirae xihije. <sup>12</sup> Nikareya xisaona hoka matyakekoneharenae aiminisa xiso, exahe maisaiya xala hare hiye xikahinaetyaka xaokita.

### *Xekohaseti Tyoaneneheta*

(Atos 1.10-11; 1 Tessalonicenses 5.1-4; 2 Tessalonicenses 1.7-10; Hebreus 10.37; Apocalipse 1.7)

<sup>13</sup> Nohinaeharenae, kasani waiyekehalaka xomana koxaka wainihenerenae tahi waokita, maisa xamaikohareta matyakekoneharenae akereta maheta. Matyakekoneharenae atyo kalore amaikoharetaha, motyalaita maisa waiyehenahititahene aowitaha hoka. <sup>14</sup> Waiyekehalakita atyo womana Jesus kamane hoka kaxekasekisakehetehenere. Hoka Jesus haikoahetehenere xowaka ite tyotya tyakekoterenae wainihenerenae ekasekiheta Enore hoka ehaikoakihetahene ekakoa. <sup>15</sup> Xekohaseti aotyakihenere akereta wirae: Xekohaseti haikoahetehenere xowaka ite hekotata wiso haiyaharenae wikasetata hoka maisaiya atyo wiyaneta kamatinæ nahitita. <sup>16</sup> Xekohaseti haikoahetehenere enokoata xowaka ite hoka kinatyaxa kawisa, exahe anjo xekohase kawisa kinatyaxa. Enore konetane ite kaemaharehena hoka hatyaoseta ite Xekohaseti exoaheta enokoata hoka ekasekiheta hotohare Cristo tyakeko hoka wainihenerenae. <sup>17</sup> Hatyaoseta ite wiso

kasetaterenae kasehetehenerenae kakoa wahalakoatyakakoaheta kaiminiti tyaoonitere nali wahalakoaty maheta Xekohaseti enoakiya nali. Nikare ite wisaota mene ekakoa.

<sup>18</sup> Hiyeta hoka xaihalahalinikisa kakoa exe iraiti kakoa.

## 5

### *Memere Tyaoonahitaha Xekohaseti Haikoahaneheta Niyahare*

(1 Tessalonicenses 4.13-18; 2 Tessalonicenses 1.7-10; Hebreus 10.37; Apocalipse 1.7)

<sup>1</sup> Nohinaeharenae, maisaiya atyo naxairaita, exahe naimenekoita hatyoharenae kaotyakene xomana. <sup>2</sup> Koxaka xasema Xekohaseti haikoahaneheta tahi. Hatyoharenae waiyekehalakita xomana. Haikoaheta maxaimenekotyakahareta, kaiwarexe makiya maxatyahakaharetere ijoitere hatyako akereta. <sup>3</sup> Halitinae ite hatyo xowakehena hoka nehena: — Waiye wimehexaiko wisaonita — nehenahaite hoka hatyaoseta ite eharehena rotita kamawenekoaretyakaha hoka maisaiya aliyakere tekoahitaha. Hatyo xowakehena ite hoka motya ohiro ityani kaweta hoka maisa aliyakere tekoare akereta ite maisa aliyakere tekoahitaha.

<sup>4</sup> Xakore hoka maisa atyo makaliroti koni xini xisaonita, nohinaeharenae. Hoka Xekohaseti ite haikoahetehena hoka maisaiya atyo eharehena rotita kaotyakihitita xomana kaiwarexe akereta. <sup>5</sup> Xityotya atyo xaokanatyakalati, ferakoiti anerenae. Maisa atyo makiyere, makaliroti anerenae xini wiso.

<sup>6</sup> Hiyeta hoka maisaiya wisemakitere akereta wisaonita wawenane kakoa haiyaharenae akereta. Maika heko wikaosetere akereta wisaonita hoka waiye wikaxaikoawita. <sup>7</sup> Hiayi, makiya tyotya nemakahitaha, makiya tehitiya hekahitaha. <sup>8</sup> Hoka wiso atyo ferakoare hoka hatyo hiyeta maika wikaxaikoawi. Hoka tyakekoti, xawaiyetyati xoaha kakoa ite wimemere wisaohena tikolaliti talala akereta watalatya maheta witikolali. Exahe hoka wiyatyahane waiyexe maniya mohetehenere wiso ite seriti talala akereta talatya wiso. <sup>9</sup> Hiayi, Enore atyo haomanere aoka wiso maisa iniyalahare moka maheta xini wiso omati iniyalahare nahalakoa. Wikaiyakeheta maheta atyo Wiyekohase Jesus Cristo hiyeta. <sup>10</sup> Hiayi, Cristo atyo waini womana hoka wisaona ehaliya maheta, tyohetehenere xowaka ite wikasetata xamani, xoana koxaka xamani wiwaini. <sup>11</sup> Hatyo hiyeta xaihalahalinikisa kakoa, xakahinaetya kakoa kalikini xisaonitere akereta.

### *Xaotyakisati, Tyawaxati Miyane*

<sup>12</sup> Nohinaeharenae, Xekohaseti axikaty haiyaharenae xinekoni kahinaetyaha, aotyakisaha maheta xiso. Maika xaiminisa hatyo hakiterenae xinekoni. <sup>13</sup> Waiye xamoka hatyo hakiterenae xinekoni. Xaiminisahene, exahe xawaiyetyahene hatyo ehateneha hiyeta. Maika ximehexaikohare xisaona haiyanae kakoa.

### *Wenati Waiyexe*

(Colossenses 3.12-17; Tito 3.1-2; Tiago 1.19-22; 3.17-18)

<sup>14</sup> Xasemehena: Xaotyakisa maxahalitikarenae xiyltere kakoa. Xaihalahalinikisa amaikohareterenae. Xakahinaetya inira tyakekoterenai. Maika ximamaxaharenehare xisaona tyotya halitinai kakoa. <sup>15</sup> Maika xirihare hoka maisa xala hare emaisahitita iniyalahare, iniyalahare kakoa. Waiye xamoka kakoa, exahe hoka tyotya halitinai hoka waiye xamoka.

<sup>16</sup> Maika xihalahareta mene, <sup>17</sup> exahe xiraexata mene. <sup>18</sup> Maika exahe xoana xamani xisaonita hoka xihalahareta mene Enore kakoa. Haxawalita atyo xawenane tyaoonita Jesus Cristo kakoa hoka nikare xisaona aokita Enore. <sup>19</sup> Awa atyo xahowitihalikisa Isekohaliti Waiyexe hatene. <sup>20</sup> Awa atyo Enore niraene xakaisase xakaihena xihiyeh hoka xikoexahalisene. <sup>21</sup> Maika tyotya xoalini hare akiti waiye xahekotya hoka waiyexe xema taita xisaona. <sup>22</sup> Hoka tyotya xoalini hare maisa waiyexe hoka awa xaokene.

<sup>23</sup> Maika Enore mehexaikohaliti ijitere womana xawenane waiyexe maniya taita moka. Maika xisekohare, xiyawahare, xihare harenae waiye kaxaiko iniyalahare nonitata

Wiyekohase Jesus Cristo haikoahaneheta kijiya. <sup>24</sup> Kawihenere xiso ite nikare tyoma, maisaiya maotyaneta xiso.

<sup>25</sup> Nohinaeharenæ, maika xiraexaita tehitiya womana.

<sup>26</sup> Xikatyawaxehena wihinaeharenæ Cristo koamaniya tyaoniterenæ hiye hoka xasohitanakolisahene.

<sup>27</sup> Enore xaokalita nomita xihiye: Maika exe babera kakaexaretyaka tyotya tyakeko-henerenæ ana.

<sup>28</sup> Maika Wiyekohase Jesus Cristo waiye kaxaikota xiso, eko xoaha.

## 2 Tessalonicenses

<sup>1</sup> Natyo Paulo, Silas, Timóteo xoaha kakoa naxairatya exe babera Xekohaseti koamaniya tyaconiterenai ana wenakalati Tesselônica tyaconiterenae ana. Wexe Enore koamaniya, Xekohaseti Jesus Cristo koamaniya xoaha xisaonita. <sup>2</sup> Kasani waiye ximehexaikohare xisaona Wexe Enore hiyeta, Xekohaseti Jesus Cristo hiyeta waokita.

### *Xaxalisati Cristo Haikoahaneheta Xowaka*

<sup>3</sup> Nohinaeharenai, wihalahareta menita Enore kakoa xihiyeta, xityakekone kekoaretere, exahe xiyawaiyetyakakoane tehitia hoka kekoaretere hiyeta.

<sup>4</sup> Hiyeta hoka waokowiharetyoita xikakoa Enore tyakekoterenae hotyalinae koni. Waokowiharetyoita xikakoa, ximamaxaharenahareta xisaonitere, exahe xityakekone hiyeta. Matyakekoneharenai iniyalahare xakore mokahitaha xiso, exahe kirakoane xakore xikaxomokakita hoka.

<sup>5</sup> Nikare xikaxomokakita hoka ehekore Enore iniyalahare moka aokowita iniyalahare nomaseharenai. Iniyalahare xikaxomokakita xawenane ekoamaniya hiyeta hoka ewaikoherakoa xetarenae terota atyo xiso. <sup>6</sup> Enore ite waiyexe taita tyoma hoka iniyalahare mokiterenae xiso ite iniyalahare moka. <sup>7</sup> Xekohaseti Jesus haikoahetehenere enokoata anjonai kinaterexenae kakoa xowaka. Hatyo xowaka tehitiaite xikawinihena, exahe wiso iniyalahare wikaxomokakiterenae tehitia hoka.

<sup>8</sup> Irikati kakoa ite haikoaheta hoka iniyalahare mohena Enore koamaniya mawenaneharenai, matyakekoneharenai, masemaxemalaharenai Iraiti Waiyexe Wiyekohase Jesus tahi. <sup>9</sup> Kalore ite iniyalahare kaxomokakaha matyotenehare, kamawenekoaretyakaha maheta. Exahe haware ite Xekohaseti nonitata, exahe iniyatere waiyexe nonitata hoka kaxomokakaha. <sup>10</sup> Hatyo xowaka ite nikare tyaona tyohetehenere xowaka. Hoka ekoamaniya tyaconiterenae ite ihalahareha ekakoa, exahe aiminisahenite tyotya tyakekohenerenai. Hatyo xowaka ite xiso tehitia enekoniha xisaonita iraiti wiyakaihenere xihiye hoka xityakekohenerenai.

<sup>11</sup> Hatyo hiyeta heko wiraexaita xomana. Wenorexa atyo aoka xiso haomana waitare wenati maniya xisaona maheta hoka waxita hoka kahinaetya xiso aokitire akereta xisaona maheta. Hatyo hiyeta waxita tehitia kasani kahinaetya xiso hoka tyotya xoalini hare waiyexe xisoma xaokowitere xisoma xamematya xityakekone kakoa waokita. <sup>12</sup> Nikare ite hoka Wiyekohase Jesus kaxaiminisaka xihiyeta. Xiso tehitia ite hoka xikaxaiminisaka ihiyeta, Wiyekohase Jesus Cristo nawaiyexehare, wEnorexa nawaiyexehare hiyeta.

## 2

### *Haliti Matyakekonehare*

<sup>1</sup> Nohinaeharenai, Wiyekohase Jesus Cristo tyoaneneheta, exahe wiyahohisakakoatyoane ekakoa akiti wirae xikakoa: <sup>2</sup> Awa atyo xiyahekola xexawareharetya haxerore, exahe hoka awa atyo ximawaiyehare haiyaharenai: “Koxaka Xekohaseti haikoaheta”, nehena hoka. Xoana iraiti semasehare xamani, xoana Iraiti Waiyexe xakaisasehare xamani iraehena, xoana wiyairala xamani aohena hoka awa atyo xityakeko. <sup>3</sup> Awa atyo nikare maoserahena xiso hoka xityakekohena. Hiyaiya, Xekohaseti kaokeneheta nahititaite halitinae kahalakoahare Enore kakoa hoka Iniyalahare Nomasehare aokahitare kaotyaka. Hatyo haliti atyo irikati mawakenahare koni xetare terota. <sup>4</sup> Tyotya Enore kaxaokakiterehare nahalakoahare ite tyaona, exahe xoalini hare Enore anere kaxaokakiterehare nahalakoahare ite tyaona. Tyotya xoalini hare xaehare ite tyaona aokowi hoka xane isoa Enore hanako hoka Enore aokowihena. <sup>5</sup> Xoana maisa xotyare? Tyotya hatyoharenai noxakai xihiye notyaonitatere xihaliya xowaka.

<sup>6</sup> Xakore hoka xoalini hare talaitene hoka maisa kalini aliyakere kaotyakere hoka hatyohare waiyekehalakita xomana. Hoka ekaotyakene xowakaite hatyo Iniyalahare Nomasehare kaotyakehena. <sup>7</sup> Hoka Metaharexe Iniyalahare aokahitere koxaka kaotyakehena. Xakore hoka kaotyaka aokowitere ite kaotyaka, kakikisaka hotohare ite haware hatyo talaiterene hoka. <sup>8</sup> Hatyaoseta ite Iniyalahare Nomasehare kaotyakehena hoka Xekohaseti Jesus haiyatere kakoa haikoahetehenere xowaka ite haxaohomane kakoa ite aisene, exahe mawenekoaretene ite haxaokanala kakoa. <sup>9</sup> Iniyalahare Nomasehare ite kaotyaka Ahalakoahaliti niyatere kakoa hoka tyotya xoalini hare mawaiyahare tyomehena katyakekotyaka maheta. Maoseratya ite halitinae tyaconaha ekoamaniya maheta. <sup>10</sup> Tyotya xoalini hare iniyalahare kakoa ite maoserahena halitinae irikati mawakenahare xetarenai. Hoka wainiha ite, maisa atyo tyakekoahitaha, exahe awaiyetyahitaha Iraiti Waiyexe iniyalahare nonitata niyasehareheta hoka. <sup>11</sup> Hatyo hiyeta Enore halakisahene, maoserae aeroretyoa ihiyeha hoka maoserae tyakekoha maheta. <sup>12</sup> Hatyo harenae hiyeta ite tyotya Iraiti Waiyexe matyakekoneharenae, exahe maoseratyati xema taita tyaconitreharenae mawenekoaretyaka aoka Enore.

#### *Maika Xikinatere Xisaona*

<sup>13</sup> Nohinaeharenae, wihalahareta menita Enore kakoa xihiyeta, Xekohaseti awaiyetita xiso hoka. Hiyaiya, xiso hotohare Enore aoka haomana Isekohaliti Waiyexe niyatere hiyeta, exahe hoka Iraiti Waiyexe xityakekone hiyeta. Nikare tyoma ekaxaikone hotyalihare xisaona maheta. <sup>14</sup> Enore aoka xiso haomana nikare xisaona maheta, wiyakaihenere Iraiti Waiyexe xihiye hiyeta hoka xiyanne xikaoka Wiyekohase Jesus Cristo waikohera waiyexe nali maheta. <sup>15</sup> Hiyeta hoka nohinaeharenae, maika xikinatere xisaona Xekohaseti koamaniya, exahe heko iraiti wiyakaihenere waxairahenere xomana xotyaxemaya.

<sup>16</sup> Wiyekohase Jesus Cristo awaiyitita wiso, Wexe Enore hoka awaiyetita wiso. Hoka hawaiyexehare hiyeta mamairanehaliti matyotenehare isa womana, exahe hoka heko wakinatere watyaha exahita maheta. <sup>17</sup> Kasani Xekohaseti Jesus, Wexe Enore aihanalalinikisa xiso waowita, exahe kahinaetya xiso hoka waiyexe taita xirae, xisoma taita.

### 3

#### *Maika Xiraexatya Womana*

<sup>1</sup> Imiyanehena nohinaeharenae, maika xiraexaita womana, hoka haxeroreta Iraiti Waiyexe xaoreko hoka aokahene haomana xiso xaoherene xomana akereta. <sup>2</sup> Maika xiraexatya tehtiya hoka Enore kaxaiko wiso mawaiyexeharexenae, xalijinharexenae nonitata. Hiyaiya, maisa tyotya halitinae tyakekore Iraiti.

<sup>3</sup> Xakore hoka Xekohaseti atyoite maisa maotyaneta wiso. Aiyatelikisa ite xiso, exahe Tihanare nonitata ite kaxaiko xiso. <sup>4</sup> Enore hiyeta wityakekota xiso. Kala waokitere akereta xisaonita, exahe hoka nikare ite heko xisoma. <sup>5</sup> Maika Xekohaseti kahinaetya xiso hoka xawaiyetya Enore, exahe hoka ximamaxaharehareda xatyaha wenati waiyexe Cristo kakoa xahita.

#### *Tyakekohatiye Metalaharenae*

(1 Timóteo 4.1-3; 2 Timóteo 3.1-9; 3 João 9-11)

<sup>6</sup> Nohinaeharenae, Xekohaseti nexare kakoa waxikatya: haiyaharenai wihinaeharenae maxahalitikarenae akereta, exahe maisa semaxemaya aokowiyeha wiyaotyakira wahalakihenere xomana. Maika xakikisoaheta enonitaha. <sup>7</sup> Xawaiyoreta xawenane kakoa. Maika wawenane akereta xisaona. Hiyaiya, maisa maxahalitikare akereta xini wisaonitere xinekoni xowaka. <sup>8</sup> Maisa xoare maxaimanehareda wikaoxekarere. Wahakita wihatene hiye winakaira niyahare, maisa wimaxahareta. Haiya xowaka wikrahareda wihatene hiyeta. Wahakita wihatene makiya, ferakoa xoaha, waiye aliya hoka xiso wihinaeharenae nakaira wamiyatya waokita hoka. <sup>9</sup> Aliterexe atyo wawaiye kahinaetyaka. Xakore atyo hoka maisa atyo xoare waxare, kasani wisaonitere akereta

xisaona waokita hoka. <sup>10</sup> Nali wisaonitatere xihaliya xowaka exakere waotyakisa xiso: “Xala xamani atyo maisa haka aokowiye hoka maisaiya atyo kanakairita”.

<sup>11</sup> Wasema haiyaharenae maxahalitikare akereta tyanonitere xinekoni hoka hatyo hiyeta nikareta wiso. Maisa xakore xoare tyomare hoka xane hahinaeharenae nawenane watyalitata. <sup>12</sup> Xekohaseti Jesus Cristo xaokalita wirae, heko waiyateretyoa hatyo halitinae kakoa, kasani waiye tyaonaha, exahe hakaha hoka kanakairaha hahateneha hiyeta waokita. <sup>13</sup> Xakore hoka, nohinaeharenai, awa atyo waiyexe xománe kakoa ximaxaharehena.

<sup>14</sup> Exahe xala xamani maisa tyakeko aokowita exe iraiti waxikaitere xomana hoka hatyo hiyeta waiye xiayiyahena. Waiye xiayiyene hoka xakikisoa enonita haihare maheta. <sup>15</sup> Xakore hoka awa atyo xahalakoahare akereta xamokene. Maika xaotyakisene xihinaehare akereta.

*Iraitinae Miyane*

<sup>16</sup> Maika Xekohaseti mehexaikohaliti kakoa tyaonitere mehexaikohaliti isa xomana tyotyaki ferakene, exahe aliyakere xamani xisaonita hoka. Kasani Xekohaseti tyaona xityotya xikakoa naokita.

<sup>17</sup> Nokahe kakoa naxairatyta exe: Paulo jinakala. Exakere naxairatita tyotya noxairalinae baberanekoa, exakere naxairaita. <sup>18</sup> Maika Wiyekohase Jesus Cristo kaxaiko xiso, eko xoaha.

## 1 Timóteo

<sup>1</sup> Natyo Paulo, Jesus Cristo niraene kakoare wiyasehareheta Enore xaokala xema, watyahitere Wiyekohase Jesus Cristo xaokala xema hoka <sup>2</sup> naxairatya exe babera homana, Timóteo. Nityani hisaona Jesus Cristo koamaniya hisaohenere hiyeta. Maika Wexe Enore, Wiyekohase Jesus Cristo waiye moka hiso, airakoaneharetya hiso, exahe hoka himehexaikohare moka.

### *Xairihalikisatinæ Xaotyakisati Metalahare Xema Mawenatyakene Maheta*

<sup>3</sup> Noxanihenere Macedônia koa nali xowaka naxa hiso hoka Éfeso nali hisaona naokita. Nali haiyaharenæ iraiti hawarehare kakoa aotyakijita. Maika hirae ekakoaha hoka halakisaha haxaotyakiraha hatyohare kakoa. <sup>4</sup> Maika hirae ihiyeha hoka hatyo xakai-hakeretere tahi, toahiyereharenæ nexare xoaha tahi kaexaretyahitereha halakisaha. Hatyoharenæ hiyeta halitinae iraihekoatyahitataha. Nikare tyaconahitaha hoka maisa atyo Enore xahekola tyakekoti hiyeta waiyekhalakitere akereta xini. <sup>5</sup> Exe xaotyakisati atyo aeroretya maheta xawaiyityati waiyexe mahiyaseti akota tyoitere, tyakoiyahaliti waiyexeta tyoitere, tyakekoti aliterexeta tyoitere.

### *Maika Xiriha Xaotyakisatiyenaæ Metalahare Kakoa*

*(Romans 16.17-18; 1 Timóteo 4.1-3; 2 Pedro 2.1-19)*

<sup>6</sup> Haiyaharenæ halakisa exeharenæ hoka maisa xoare tyomare, iraehekoatyahitataha. <sup>7</sup> Kasani Enore Xaotyakiraho kakoa xakore aotyakisa aokowitaha hoka maisa waiyorex-eha, maisa waiyekhalakere enomanaha, exahe iraetereha hatyakekoneha kakoa hoka maisa waiyekhalakere enomanaha. <sup>8</sup> Xaotyakiyaho atyo waiye, aokitere akeretaiya atyo kaomaka hoka ehekore. Hatyohare waiyekhalakita womana. <sup>9</sup> Xaotyakiyaho atyo maisa haliti waiyexenæ anere xini. Xalijiniharexenai, iniyalahare nomaseharenae, masemaxemalaharenæ, Enore maniya mawenaneharenae, maxaiminiraharenæ, matyakekoneharenae anere atyo. Ajjitere hanexe, hanityo, haliti fahrenæ anere tehituya. <sup>10</sup> Exahe hoka ohiroarexenæ, enatyololonaæ, haenane hatya kakoa ohiro akere tyaoniterenæ anere. Maoseratyaliyenæ, iraesetatere harenæ anere. Kirakahare betetyaka akere kolayaha haliti hoka betetitere harenæ anere. Emetalahare xakaitere, xoaliniharetæ iniyalahare tyomahitere hoka Enore niraene mahokoanetitreharenæ anere tehituya atyo kaomaka. <sup>11</sup> Exe xaotyakisati atyo Iraiti Waiyexe isa nomani Enore hoka noxakai aohenere. Enore kinaterexe waiyexe nalitare.

### *Ihalahaliti Enore Xairakoaneharera Hiyeta*

<sup>12</sup> Nihalahare Wiyekohase Jesus Cristo kakoa. Iyateliti isa nomani hoka notyome-henere nohateni hiyeta, exahe hoka tyakeko natyo hoka aoka natyo hoka nohateni notyomehenere hiyeta.

<sup>13</sup> Nikare tyoma, toahiya xakore iniyalahare niraeta etahi, iniyalahare namokitene xoaha hoka. Nokirawanetene harenæ xakore hoka Enore airakoaneharetya natyo. Maisa notyakekorene hoka hatyo hiyeta maisa waiyekhalakere nomani notyomitere-harenæ. <sup>14</sup> Xakore hoka Wiyekohase kalore hawaiyexehare hiyeta, tyakekoti, xawaiyety-ati isa nomani Jesus Cristo koamaniya nawenatyaka hiyeta.

<sup>15</sup> Exe xaotyakiye atyo aliterexe, hoka maika katyakekotyaka, kaxaokaka waiyexe xahekore kakoa: Jesus Cristo tyoa halitinae koni hoka iniyalahare nomaseharenae waiyexe maniya moheta maheta. Natyo ene atyo masakare iniyalahare nomasehare, <sup>16</sup> xakore hoka hatyo hiyeta Enore airakoaneharetya natyo, Jesus Cristo hamaholawakene nokakoi hotikisa maheta. Exehare atyo ite jikiniti tyakekohenerenæ waiyehena hoka ihiyeta tyakekohena hoka wenati matyotenehare ite enawenaneha tyaona.

<sup>17</sup> Maika Xekohaseti matyotenehare, makamanehare, mawaiyakahare, haterore Enore kaxaiminisaka, exahe hoka kaihalaharetyaketa mene ekakoa naoka xoaha.

<sup>18</sup> Naokitere akereta hisaona naoka, haré Timóteo. Koxaka atyo toahiyita nikare kairaetyaka hitahi. Maika exe iraiti kakoa haiyateretyoa Xekohaseti koamaniya. <sup>19</sup> Maika heko hityakeko, waiye maniya taita hahekotya. Haiyaharenæ atyo maisa haxahékola waiyexe xema tyeonare hoka hatyo hiyeta ityakekoneha mawenekoarella. <sup>20</sup> Enekoniha Himeneu, Alexandre xoaha. Ahalakoahaliti niyatere ana nahalakisahene, kaxaotyak-isaka hoka maisa Enore tahi iniyalahare iraehenahititha maheta.

## 2

*Xaotyakisati Iraexatyati Tahi*

<sup>1</sup> Exakere hotohare: Maika iraexatyati, xaxati harenæ kaomaka ihalahaliti Enore kakoa, tyotya halitinae tahi. <sup>2</sup> Maika kalorexenæ xekohasetinæ tahi xiraexatyatæ hoka waiyoreha maheta hoka waiye, wimehexaiko wisaona. Hoka tyotya xoalini hare Enore aokitere akere waiyexe taita wisoma. <sup>3</sup> Hatyo harenæ atyo waiye. Enore waiyexe maniya mohetehenere wiso ana atyo hatyo harenæ waiyeta.

<sup>4</sup> Kasani tyotyaha iniyalahare nonitata kaiyakehetaha hoka waiyexe maniya kaxomakahetaha hoka waiyexe, aliterexe waiyekehalaka enomanaha aokita. <sup>5</sup> Hiyaiya, haterore atyo Enore. Haterore haliti hoka Enore koamaniya mokita halitinae. Hatyo haliti atyo Cristo Jesus. <sup>6</sup> Hatyota isoawi waini maheta hoka tyotya halitinae waiyexe maniya moheta maheta. Enore xaimenekola aoseta kaxekaka, hotikisa maheta Enore xahekola. Kasani tyotyaha waiyexe maniya tyaohtetha aokita hoka.

<sup>7</sup> Nokaxaxikatyaki iraiti kakoare hoka majudeuneharenæ naotyakisa, hoka Iraiti Waiyexe, tyakekoti aliterexe hoka noxakai maheta. Maisa namaoseraita xini, aliterexe niraeta.

<sup>8</sup> Hiyeta hoka exakere kaomaka naoka: Maika wenakalati nihatyaka tyeoniterenæ iraexahenaha Enore hiye hoka hakanonaeha ainakisaha iniyalahare hamaomanehare-taha, exahe hoka hamaxalijinharenetha. <sup>9</sup> Maika ohironæ tehitia irihalo tyona hoka waiye hamaxaokowihalotyane kakoa kaimatyoaha hoka waiye ahekotyaha hawenaneha kakoa. Exahe hoka maisa masakare waiye tilikoaha harenæ, maisa xoare maheta mokahitaha netati, pérola, ouro, exahe hoka imiti masakare karore ako hoka isoahitaha. <sup>10</sup> Waiyexe taitaiya tyomaha hoka katyakekotyakaha, aliterexe waiyexe xema tyonahitaha nerekati maheta.

<sup>11</sup> Maika ohironæ mema tyonahä haxaiminiraha kakoa. <sup>12</sup> Kasani ohironæ maisa enanae aotyakisa, wakatya hare naokare. Maika mema tyonahä. <sup>13</sup> Hiyaiya, Adão hotohare kaomaka, hatyo najikinita Eva kaomaka. <sup>14</sup> Maisa Adão xini kamaoseratyaka. Hoka ohiro atyo kamaoseratyaka hoka maisa Enore aokitere akereta tyonita. <sup>15</sup> Xakore hoka ohiro ite xoima kaisanihena hoka iniyalahare nonita kaiyakeheta, hekoiya tyakeko, waiyexe maniya taita tyonita, irihalo tyonita, awaiyetita haiyanæ hare hoka.

## 3

*Tyakekohatiyenæ Kaxaikotyasenæ*  
(Tito 1.5-9)

<sup>1</sup> Exe xaotyakiye aliterexe: Xala xamani tyakekohatiyenæ kaxaikotyase tyona aokowita hoka haka aokowi waiyexe hateniti. <sup>2</sup> Maika exakerexe tyakekohatiyenæ kaxaikotyase: haliti iniyalahare maomanehare waiyexe, hatita yanityore, maxaokowiharetyoanehare, waiye kaxaikoawitere, waiyore aotyakijitere, maxeharenehare, haliti kaokehena hoka waiye mokiterehare. <sup>3</sup> Kawexere maeranehare, maxalijinharenethare, waiye iraeterehare, mehexaiko tyonitere, xiyealiti kalore haomana maxaokalahare, olo kalore maxaokalahare. <sup>4</sup> Waiye haisani, haiyanityo xoaha kakoa tyonitere, exahe hoka ityaninae tyakekotene haxaiminiraha kakoa. <sup>5</sup> Hiyaiya, xala xamaniya maisa haiyanityo, haisani hekoti waiyore kaxaikore, hoka aliyakereya tyakekohatiyenæ

kaxaikohena? <sup>6</sup> Waitare Cristo koamaniya tyaoheneraya maisa aliyakere tyakekohatiyena kaxaikotyase tyaonita. Waiya aokowiharetyoa hoka Tihanare akereta kamatyakekotyaka. <sup>7</sup> Exahe hoka matyakekoneharenae aiminisene, waiya aliya hoka kamatyakekotyaka hoka kairaharetyaka hoka Tihanare maoserala xema tyaona.

#### *Tyakekohatiyena Kahinaetyasenae*

<sup>8</sup> Nikare tehitiya tyakekohatiyena kahinaetyaseharenae hoka waiye, mamaoserala-hareha. Maisa kaloxa vinhoxa terahitaha, exahe hoka xiyehaliti, olo hare maisa kahare aokahitaha haomanaha. <sup>9</sup> Hekooya waiye ahekotyaha, exahe hatyakekoneha xema taita tyaonaha. <sup>10</sup> Maika kahasakaharetyakaha hotohare. Hatyo kakoaiya jiyaha hoka tyakekohatiyena kahinaetyase tyaonaha.

#### *Ohironai Nawenane Waiyexe*

(*Tito 2.3-5; 1 Pedro 3.1-6*)

<sup>11</sup> Tyakekohatiyena kahinaetyase exanityo tehitiyaiya waiyexehalo, maisa iraesexe. Maxaokowihalotyonehaho, waiyexehaloia tyotya xoalini hare hiye.

<sup>12</sup> Tyakekohatiyena kahinaetyaseharya atyo hatita yanityore, waiye kaxaiko haisaniae, haiyanityo hare. <sup>13</sup> Hatyohare hahatene waiye tyomahitereharenae atyo katyakekotyakita hoka waiyore mamairanehare irae ahitaha Jesus Cristo hatyakekoneha tahi.

#### *Kalore Metaharexe*

<sup>14</sup> Exeharenae naxairaita homana, hoka kasani haxeroreta notyoa nowaiyeheta hiso naokowita. <sup>15</sup> Nohowitihareya hoka exe babera hiyeta waiyekehalaka homana Enore hanako wawenane tahi. (Tyakekohatiyena xaokaka Enore hana nita.) Hatyo atyo Enore makamanehare hana. Tyakekohatiyena atyo aiyatelikijita Iraiti Waiyexe.

<sup>16</sup> Alitere atyo Enore xaotyakiraho maisa mahowithihare xini:  
Kaotyaka haliti akereta, Enore Nisekohare atyo haliti waiyexe aokene. Anjonae hoka waiyene. Kaxakaisaka etahi haliti hotyalinae koni hoka kahare tyakekoahene. Exahe hoka kakolatyaka enokoa xeta.

## 4

#### *Xaotyakisatiye Metalaharenae*

(*1 Timóteo 1.6-7; 2 Pedro 2.1-19; Judas 4-19*)

<sup>1</sup> Enore Nisekohare waiyekehalaka irae: Miyanitiye xowakehena ite hoka haiyaharenae halakisa hatyakekone. Hoka isekohaliti maoseryalyenae ite tyakekohena, exahe ite Tihanare xaotyakira hoka tyakekohenaha. <sup>2</sup> Exe xaotyakiye atyo matyakekoneharenae, maoseryalyenae ta tyoita. Exahekohala atyo ekamane akereta. Motya kamatiherahi watyahiro keralihenahenene hoka maisa kehexene akereta atyo.

<sup>3</sup> Exe halitinae atyo aotyakisahitaha hoka mahokoanetyahitaha wenakakoati, exahe haiyaharenae nakairati manakairatyakene aokahitaha. Xakore hoka Enore atyo exe kakanakairatyakere tyoma kakanakairatyaka maheta tyakekoterenena, iraiti waiyexe xema tyaoniterenae hiyeta. Maika xikanakairehenere nahitita xiraexatya xihalaharene kakoa. <sup>4</sup> Hiyaiya, tyotya Enore tyomehenerena atyo waiyexe taita. Hiyeta hoka maisaiya aliyakere maxawaiyetyakita. Maika iraexatyi ihalahaliniti kakoa kaxaokaka tyotya hatyoharenae. <sup>5</sup> Hiyaiya, Enore niraene, iraexatyi xoaha hiyeta tyotya hatyoharenae waiye kaokita Enore ana.

#### *Waiyexe Jesus Cristo Wakanehare*

<sup>6</sup> Exe kakoaiya haotyakisa wihinaeharenae tyakekohatiyena hoka Jesus Cristo wakanehare waiyexe hisaona, haotyakisahene iraiti waiyexe, tyakekoti xema hisaonitere kakoa hoka. <sup>7</sup> Awa atyo haiyaharenae xakaihakatyahitatere ewaxirahare, hatyaharetere xema hisaona. Cristo koamaniya hawenane kakoa haiyateretyoa hoka kekoare. Heko hahasakoawi Cristo koamaniya hawenane kakoa. <sup>8</sup> Haiyanae hasakoawiti atyo alitere

waiye xakore hoka Enore koamaniya hasakoawisaka atyo masakere waiye. Hatyo hiyeta atyo wenati waiyexe kaotyakita, kalikini exahe haxowaka hoka.<sup>9</sup> Exe xaotyakiye atyo aliterexe, maika katyakekotyaka, exahe kaxaokaka ihalahaliniti kakoa.<sup>10</sup> Hiyeta hoka waiyateretyoa, wahakita kahare. Enore xahita watyahita. Hatyo atyo makamane-hare, tyotya halitinae niyasehareheta, tyakekohenerenae masakare waiyexe maniya xomokasehareheta xoaha.

#### *Xoimahalitinae Nawenane Waiyexe*

(1 Timóteo 6.11-12; 2 Timóteo 2.22-26; Tito 2.6-8)

<sup>11</sup> Exeharenae kakoa haotyakisa, hiyakai xoaha. “Exe hare xema xisaona”, hexa ihiyeha. <sup>12</sup> Awa atyo haiyanae matyakekohena hiso, hiyoimahalitini hiyeta. Xakore hoka maika hawenane waiyexe hahotikisa tyakekohatiyenae ana: iraiti, xawaiyetyati, tyakekoti, waiyexe wenati hiyeta. <sup>13</sup> Maika nokaokini kijiya hakaexaretya halitinae haotita Iraiti Waiyexe nanekoa kaxairatyakehenere hoka hiyakaihakatya Cristo koamaniya nawenatyaka akiti, exahe Cristo xaotyakira kakoa haotyakisa. <sup>14</sup> Awa himaotyane toahiya xowaka tyakekohatiyenae kaxaikotyasanenae mokaha hakaheha hiseri heno hoka iraexatyaha hitahi hoka iyateliti Enore isa homana hoka Xekohaseti ana hahaha maheta. <sup>15</sup> Maika hahekotya exeharenae hiye hoka hatyo xema maniya taita hisaohena hoka hawénane waiyexe kekoarene tyotya halitinae waiya. <sup>16</sup> Hirihare hawénane kakoa exahe hiyaotyakira kakoa hoka. Heko nikare hisoma, nikareya hoka waiyexe maniya hamokoawi, exahe semiterenae hoka waiyexe maniya hamoka.

## 5

#### *Tyakekoterenae Xaiminisaka*

<sup>1</sup> Awa atyo inityohaliti hiwatyalihena hoka kinatyaxa hiraehena ekakoa. Hirae-hena ekakoa hoka hexe kakoa hiraetere akereta hirae ekakoa. Nikare hiwatyalihena xoimahalitinae hoka haxenane, hiximarene kakoa hiraetere akereta hirae ekakoaha. <sup>2</sup> Inityohalotinae kakoa hiraehena hoka hityo kakoa hiraetere akereta hirae. Xoimahalotinae kakoa hiraehena hoka hahahalonae kakoa hiraetere akereta hirae, awa atyo iniyalahare hahekotya ekakoaha.

<sup>3</sup> Wainiyaneneronae mahinaehalohalonae hoka hakahinaetyahene. <sup>4</sup> Xakore hoka wainiyaneneronaiya atyo kaisaniye, kajiyetexe hoka hatyonaiya atyo kahinaetene. Irihareya kahinaetyahitaha hanityo, hasero xoaha hoka ehekoreya. Nikareya hoka bakanahahitaha hanexenaeha, hanityonaeha, hatyokoenaeha aenaehenaherene katyahe. Enore atyo awaiyetita hatyoharenae. <sup>5</sup> Wainiyanenerooya hawawahalo kaiserehare tyaonitere atyo, maisa xala hare kahinaetyare hoka Enore kahinaerene atyahita, hoka iraexaita ferakoa, makiya xoaha Enore kahinaetene maheta. <sup>6</sup> Xakore hoka wainiyanenerooya hakéhalahalone maniya taita tyaona hoka ekamane atyo tyaonita, kasetta xakore hoka.

<sup>7</sup> Timóteo, maika noxaotyakiri akereta hirae ihiyeha hoka waiyexe maniya taita tyaonaha hoka maisa xoare kaxawatyakita ehenoaha. <sup>8</sup> Hoka xala xamaniya maisa hahinaehare kahinaetita, exahe hanityo, hanexe hoka hatyo atyo matyakekoneta. Hatya matyakekonehare nawenane xahexe atyo tyaonita.

<sup>9</sup> Maika wainiyaneneronae nexalo kaxomokakitereko 60 wanonexe xahexenae nexalo, exahe hakirore kaiyanenehenolo nexalo taita kaxomokaka. <sup>10</sup> Xoalini hare waiyexe ohiro nómáne kawaiyakitere, haisaninae waiye aenaehenere, Enore koamaniya tyaoniterenae kiji tihitere, hatya kaokehena hoka hahanako waiye mokitere, haiyanae ana xoalini hare howitharetere hiye kahinaetitere, exahe tyotya xoalini hare waiyexe taita tyomitalohalo nexalo taita atyoite kaxomokaka baberane koa.

<sup>11</sup> Hoka awa atyo wainiyaneneronae xoimahalotiterenae nexalo hamoka. Hiyaiya, haxahekola hiyetaiya kaiyanene aokowihena hoka halakisa Cristo koamaniya nawenatyaka. <sup>12</sup> Nikareya hoka maisa hetati iraetereha akereta tyomahitaha hoka maisaiya ehekoreta. <sup>13</sup> Exe tehitia: Tyaonakoatyahitaha, tonakoatyahitaha hatinae nihatyaka,

maisa xoare hekoti tyomareha. Iraesahitaha, haiyanae nawenane watyalyahitaha. Mairaetyakahare mahetare ene irai ahitaha.

<sup>14</sup> Hiyeta hoka kasani xoomahaloti wainyaneneronae kaiyaneneheta, kaisaniheta hoka kaxaiko haisaninae, exahe hahanaha hare naowita. Nikareya hoka wahalakoaharenae maisa iniyalahare iraetaha witahi. <sup>15</sup> Hiyaiya, koxaka haiyahalonae wainyaneneronae halakisaha hatyakekoneha Cristo hoka Ahalakoahaliti koamaniya tyaonaha.

<sup>16</sup> Maika hatya tyakekohatiye hinaehalo wainyanenero hoka kahinaetene. Awa atyo tyotya tyakekohatiyenae kahinaetyahene aoka, waiya aliya hoka howitihare enomanaha. Hawawahalonae tyaoniterenae atyo ite tyakekohatiyenae kahinaehena.

<sup>17</sup> Tyakekohatiyenae kaxaikotyase waiye hakiterenae atyo waiye kabakatyakita. Iraiti Waiyexe xakaiterenae, aotyakijiterenae terota atyo waiye kabakatyakita. <sup>18</sup> Hiyaiya, exakerexe atyo nexa Iraiti Waiyexe:

“Awa atyo bowi kanase xolatya, tyahakita trigo kase hoka”.

Nihitiya:

Hatenitiye hakita hoka waiye bakatyaka.

<sup>19</sup> Awa atyo kairaharetyakehena tyakekohatiyenae kaxaikotyase hoka kasemaxematyaka. Hoka hinama, hanamaiya atyo irae hoka katyakekotyaka. <sup>20</sup> Iniyalahare tyomehenerenae haotikatita hiwatyali hoka haiyanae tehitia mairaha hoka maisa nikare tyomahita.

<sup>21</sup> Enore, Jesus Cristo, anjonae waiyexenae haotita heko niraeta: maika tyotya xoalini hare hisomehena hoka exe xaotyakisatinae hityakeko. Tyotya halitinae, exahe tyakekohatiyenae kaxaikotyase, exahe hihinaeharetere hoka hakakoa hamokahene.

<sup>22</sup> Awa atyo hikaholawaka hikahe hiyomokala kakoa hatya seri heno Enore hatene haka maheta. Awa atyo haiyaharenae tyomehena iniyalahare hoka hakahinaetene. Waiye hikaxaikoawi.

<sup>23</sup> Awa atyo one taita hisera, vinhoxa tehitia ininae hisera hoka hityako kawetere makaheheta. Hiyaiya, kahalikhena hihokakita.

<sup>24</sup> Haiyanae iniyalahare tyomehena hoka kawaiyakita rota, iniyalahare exomokakaha nahitita. Hoka haiyanae nómame iniyalahare atyo maisa haxerore kawaiyakere. <sup>25</sup> Nikare tehitia xoalini hare waiyexe kaomakehena hoka kawaiyakita rota. Exahe hoka haiyanae atyo komita maisa waiye kasemakita xakore hoka maisaiya aliyakere kaxateroakisakita.

## 6

### *Xekohasetinae, Hatenitiyenae*

(Efésios 6.5-9; Colossenses 3.22-4.1; Tito 2.9)

<sup>1</sup> Wakaharenaaya waiye aiminisa haxekohasenaeha hoka maisa xala hare iniyalahare iraeta Enore tahi, exahe wiyaotyakira xoaha xaoxaka hoka. <sup>2</sup> Maika wakaharenae xekohase tyakekohatiyenae tehitia hoka aiminisa haxekohase. Hiyaiya, exekohasenai atyo Cristo koamaniya tyaoniterenae hoka waiye hakitere resebitita hoka ixiyakawala ihinaeharenaeha atyo.

### *Xaotyakisati Metalahare, Aliterexe Xiyehaliti Xoaha*

Maika exeharenae kakoa haotyakisahene: <sup>3</sup> Hoka hatyaiya hawarehare xaotyakiye kakoa aotyakijita, hoka maisa atyo Wiyekohase Jesus Cristo niraene waiyexe tyakekore, exahe hoka maisa wiyaotyakira waiyexe akere xini aotyakijita hoka <sup>4</sup> hatyo haliti atyo ahinityare tyaonita, maisa xoare hare waiyorexe. Kinatyaxa irai aokowita halitinae kakoa xoalini hare tahi. Hatyohare hiyeta okoawahare kakoati, xalijini kakoati, maoseryata kakoati, matyakekone kakoati kaotyakita, <sup>5</sup> exahe iraesekakoati kahare. Nikare tyaoniterenai maisa waiye maniya ahekotyareha, maisa aliterexe xema tyaonareha. Exahekolaha hiye motya Iraiti Waiyexe hiyeta kalore kakaxiuharetyakita, kakaoloxatyakita aokahitaha.

<sup>6</sup> Alitere atyo Enore koamaniya nawenatyaka hiyeta masakare waiye maniya kaxomokakita, xoare xamaniya wixiyehare hoka wihalahare ekakoa hoka. <sup>7</sup> Hetati wisao-henere xowaka xoare wakolatya? Maisa xoare! Wijikohenaite aliye wawenane hoka xoare wakolatya? Maisa xoare! <sup>8</sup> Hiyeta hoka wikanakairere, wikaimere hoka maika hatyo kakoa wihalahare. <sup>9</sup> Haiyaharenae kaoloxa, kaxiyehare tyaona aokowita hoka hatyo hiyeta kahasakaharetyakahitaha, kamaoseratyakahitaha. Exahe maisa waiye ahekotyahitaha hoka hatyoharenae hiyeta xamaikohaliti, mawenekoaretyati kaotyakita enomanaha. <sup>10</sup> Hiyaiya, olo kaxawaiyetyakitere hiyeta atyo tyotya xoalini hare iniyal-hare kaotyakita. Haiyanae xiyehaliti harenae aokitere haomana hiyeta hatyakekone halakisaha hoka xamaikohaliti kalore kaoka enomanaha.

*Xairihalinikisati*

(1 Timóteo 4.11-16; 2 Timóteo 2.22-26; Tito 2.6-8)

<sup>11</sup> Hoka hiso Enore koamaniya hisaonitere, maika hisekoahena hatyoharenae nonitata. Waiyexe maniya, mamaoseralahare maniya taita hisaona. Enore maniya taita hisaona. Exahe tyakekoti, xawaiyityati, maxahenerahareti xema taita hisaona. Heko hisaona mene Xekohaseti koamaniya. <sup>12</sup> Maika waiye haiyateretyoa hityakekone kakoa hoka wenati matyotenehare ana hahikoa. Hatyohare ana atyo Enore aoka hiso kahare halitinae haoti hityakekone hahotikihenere xowaka.

<sup>13</sup> Kalikini Enore haotita, exahe Jesus Cristo haotita nawakatya hiso. Hiyaiya, Enore atyo wenati ijita tyotya halitinae ana. Jesus Cristo hoka waiye iraeta Pôncio Pilatos haotita. Exakere nawakatya hiso:

<sup>14</sup> Maika iraiti kaxekakehenere homana xema taita hisaona, Wiyekohase Jesus Cristo haikoahaneheta kijiya. <sup>15</sup> Enaose ferakenehena ite hoka kaotyakehena Enore xaokalita. Hatyo atyo kalorexenae Xekohase, xekohasetinae Xekohase. Hatyo atyo haterore kalorexe waiyexe. <sup>16</sup> Hatyo taita atyo makamanehare. Xaokanatyakalati tyaonitere nali atyo tyaonita, maisaiya xala hare xane kaokita ehaliya. Maisa xala hare waiyarene, maisaiya xala hare waiyitene. Maika kaxaiminisaka, kaihalaharetyaka mene ekakoa! Xoaha.

<sup>17</sup> Maika kaoloxerenaе hiye hirae hoka awa aokowiharetyoahenaha haoloxaha ali waikohekoa tyaonitere kakoa. Exahe hoka hatyo xema hawenane mokaha. Hiyaiya, hatyoharenae atyo maisa wikinatere mokare. Maika Enore xahita kaisere atyahaha. Hiyaiya, hatyo atyo tyotya xoalini hare waiyexe ijita womana wihalaharene niyahare. <sup>18</sup> Hirae ekakoaha waiyexe tyomaha maheta hoka ihiyeta kahare xoalini hare kakoare waiyexe tyaonaha waiyexe tyomahitere hiyeta. Maika waiyexe haliti tyaonaha hoka haxiyehareha hiyeta maxiyehareharenae ana isaha. <sup>19</sup> Nikareya tyaonaha hoka enahetaha maniya atyo kahare xoalini hare waiyexe kaxomokakita. Nikareya tyaonaha hoka waiyexe wenati ana xane hikoaha.

<sup>20</sup> Timóteo, maika waiye hikaxaiko kaxekakehenere homana. Awa atyo hiraesekoaty, hatyoharenae atyo maisa waiyexe Enore ana. Exahe awa atyo haiyanae kakoa hiraesekoaty waiyoliniti aokahitere tahi. Hatyoharenae atyo ehaikoare. <sup>21</sup> Haiyanae waiyoliniti aokahitere kakoare aokowiyahitaha, hoka ihiyeta hatyakekoneha halakisa.

Maika Enore waiye kaxaiko xiso xityotya, eko xoaha.

## 2 Timóteo

<sup>1</sup> Natyo Paulo, Jesus Cristo niraene kakoare Enore xaokalita. Exaxikatyakahare natyo wenati matyotenehare isa aokowihenere Cristo Jesus tyakekotyaka hiyeta tahi noxakai maheta. <sup>2</sup> Naxairatya homana Timóteo. Hityakekone hiyeta noxiyakawali nityani hisaohenere.

Maika Wexe Enore, Wiyekohase Jesus Cristo xoaha airakoaneharetya, amehexaiko-halinikisa, kaxaiko harenae hiso.

### *Ihalahaliti, Xairihalinikisati Xoaha*

<sup>3</sup> Nihalahare Enore kakoa. Noxahekoli waiyexe kakoa nahakita enomana nahetako-maniyerenae tyomehenere akereta. Ferakoa, makiya hare niraexaita, nihalahareta minita Enore kakoa, notehena hiso hoka.

<sup>4</sup> Notehitita hitiyaharehenere, hoka kasani nowaiyeheta hiso naokowita, hoka nihala-hare maheta. <sup>5</sup> Notehitita hityakekone kaiserehare. Hasero Lóide, hityo Eunice tyakeko-henereta hityakekone. Waiyekehala kota nomani heko hityakekotere. <sup>6</sup> Hiyeta hoka maika heko Enore waiyoliniti isehenere homana kakoa hahaka nokahe namohenere hiseri heno xowaka hoka hahaka maheta Xekohaseti hatene.

<sup>7</sup> Hiyaiya, Enore Isekohaliti isehenere womana atyo wimamairanahare mokita. Inisekohare atyo aiyatelikijita, axawaiyetyakaoanekijita hoka waiye wikaxaikoawita. <sup>8</sup> Hiyeta hoka awa atyo hihaihare hiyakaini kakoa Wiyekohase tahi, exahe awa atyo hihaihare nokakoi berexoako notyaonita ewakanehare notyaonitere hiyeta. Enore iyateliti isehenere homana kakoa kaisere haiyateretyoa, hoka iniyalahare nokaxomokakitere akereta hisaona hoka iraiti waiyexe hiyakai, Enore iyateliti isehenere kakoa.

<sup>9</sup> Iyeheta wiso iniyalahare nonitata hoka hakaxaikone hotyali aoka wiso. Maisa xoalini hare wománe hiyeta xini. Hawaiyexehare hiyeta waiyexe maniya moheta wiso. Cristo Jesus hiyeta atyo exe maxaimanahare hawaiyexehare isa womana. Toahiya tyotya xoalini hare maomakahare xowakita. <sup>10</sup> Kalikini atyo Jesus Cristo wiyasehareheta kaotyakehenere waiyexe hiyeta waiyekahalaka womana. Hiyaiya, hatyo atyo kawain-isakitere niyatere miyatya hoka Iraiti Waiyexe hiyeta wenati matyotenehare hotikisa.

<sup>11</sup> Iraiti Waiyexe xakaisasehare notyaona noxakai maheta Iraiti Waiyexe, exahe naotyakisa maheta tyakekohatiyena Enore aoka natyo. <sup>12</sup> Hoka hatyo hiyeta iniyalahare nokaxomokakita, xakore hoka heko notyakekota. Notyakekotere atyo kinatere, heko ite kaxaiko natyo imianeki kijiya. Hatyohare kakoa nawaiyoreta.

<sup>13</sup> Maika heko hisaona iraiti naotyakihenere hiso xema. Hatyo niyahare naotyakisa hiso. Maika heko hisaona wityakekotere xema, xawaiyetyati maniya, Jesus Cristo kakoa haxawalita wisaonitere hiyeta. <sup>14</sup> Isekohaliti Waiyexe tyaonitere wihiye hiyeta waiye hamoka, xoalini hare waiyexe kaxekakehenere homana.

<sup>15</sup> Waiyekehala kota: Tyotya wihinaeharenae Ásia koa yerenae, Fíjelo, Her-mógenes harenae halakisaha natyo. <sup>16</sup> Maika Onesíforo hotyali Enore airakoane-haretya. Kahaliki aihalahalinikisa natyo, maisa hihareta berexo notyaonitere kakoa.

<sup>17</sup> Kaokehene Roma nali xowaka tawa noxahiti hoka kaoka natyo. <sup>18</sup> Maika miyanitiye ferakenehenena hoka Enore waiye maniya Onesíforo moka. Éfeso nali hoka kalore kahinaetya natyo. Koxaka exeharenae waiyekahala kota homana.

### *Jesus Cristo Sorarexa*

*(Filipenses 4:1; Hebreus 4:11; 10:32-37)*

<sup>1</sup> Haré Timóteo, maika hikinatere hisaona waiyexe hiyeta, Jesus Cristo kakoa haxawalita wisaonitere hiyeta. <sup>2</sup> Noxaotyakiri hasemehenere kahare haliti haoti hiyakai-hena halitinae waiyexenae hiye hoka hatyoisaha aotyakisaha hahinaeharenaiha.

<sup>3</sup> Maika Jesus Cristo sorarexa tyakekohatiye waiyexe hisaona hoka notyaonitere akereta hisaona, exahe iniyalahare hikaxomokaka hoka. <sup>4</sup> Hiyaiya, sorare atyo sorare hatene hiye tyaonita hoka maisa hawarehare hateniti wavyaliye. Haxekohase maniya taita atyo tyaonita, exekohase tyakekotene maheta.

<sup>5</sup> Nikare temati hiye hasakakoa haiyanae kakoa hoka maisaiya ehekore temita hoka maisaiya xoare kaxekakita enomana.

<sup>6</sup> Nikareta masenekoa hakatyasehare tehitia. Nakairati ihatihena hoka hatyo ana hotohare kaxekakita.

<sup>7</sup> Waiye hahekotya niraetere tahi kakoa. Xekohaseti ite awaiyekehalakatya homana tyotya xoalini hare. <sup>8</sup> Hotyaxemaya Jesus Cristo, Davi jikolahare, kaxekasekisakehete-henere. Etahi noxakaihakaita halitinai hiye, Iraiti Waiyexe noxakaitere akereta. <sup>9</sup> Hoka hatyo hiyeta iniyalahare nokaxomokakita, exahe berexo ako notyaonita xalijiniharexe akere. Xakore hoka maisa atyo Enore niraene kaberexotyakere. <sup>10</sup> Hiyeta hoka Enore haomanere hotyali aohenere waiyakahare howithihare nawenani tyaonita. Xakore hoka naiyateretyoita. Exe harenae notyomita, waiyexe maniya kaxomokakehetaha hoka Jesus Cristo nali wenati waiyexe matyotenehare ana hikoaha maheta.

<sup>11</sup> Exe xaotyakiye aliterexe:

“Koxakaiya wiwaini Cristo kakoa hoka, wikasehetaiya ekakoa.

<sup>12</sup> Hekoiya waiyateretyoa iniyalahare wikaxomokitere kakoa hoka xekohaseti tehitayaiya wisaona Cristo kakoa. Maisaiya waoka hoka maisa aoka wihiye.

<sup>13</sup> Maisaiya wikinatere wisaonita ekoamaniya hoka, Cristo atyoite hekota kinatere tyaonita hawenane kakoa. Maisa atyo hatyota maoseratyoawiye”.

#### *Hatenetyatiye Waiyexe Kaxaokakere*

<sup>14</sup> Maika exeharenae hikaxaikoterena hiye hiyakai. Kinatere hirae ekakoaha Enore haotita, hoka maisa iraiti hiyeta xalijini kokoahitaha. Hatyoharenae maisa waiyexe, semiterena ahawithihalikijita taita.

<sup>15</sup> Haiyateretyoa hawenane kakoa, hoka Enore ihalahare hikakoa. Waiye hakitere atyo maisa haiharexe hihatene kakoa. Nikare waiyekahalaka iraiti kakoa haotyakisa hoka Enore ihalahare hihatene kakoa. <sup>16</sup> Awa atyo iraisekoatyatitere xema hisaona, maisa atyo hatyohare waiyexe Enore ana. Hatyoharenae hiyeta halitinae Enore matyakekonehitita. <sup>17</sup> Hatyo xaotyakiye atyo honoti ekakoita kalaosehena hoka kaheneharehena tyaonitere akereta. Hatyo xaotyakisatiyena konitare atyo Himeneu, Fileto xoaha. <sup>18</sup> Koxaka halakisaha waiyexe wenati hoka ahawithihalikijita haiyaharenae tyakekone. Aiyatere-tyoahitaha haxaotyakira kakoa, wikkaseneheta koxaka kaotyaka aokahitaha.

<sup>19</sup> Xakore hoka Enore niraene kinatere tyaona, maisa atyo ite kaxalikakita. Hati sehalii kalorexe heno kaomakitere akerexe kinatere tyaonita. Exakerexe xairatyoare tyaonita: “Waiyekahalakita Xekohaseti ana enomanerena”.

Nehitiya:

“Maika Xekohaseti koamaniya tyaona aokowiterena halakihenaha iniyalahare háo-maneha”.

<sup>20</sup> Kalorexe hatyako tinihalitinae kahare tyaonita, hoka maisa ouro, prata xoaha nomakere taita xini. Barohe, atya xoaha nomakere tehitia haiyanae. Haiyanae atyo kaomaxetere niyahare hoka haiyanae atyo ferakiti nihatyaka kawatyalisaka maheta.

<sup>21</sup> Nikareya xala xamani iniyalahare háomanenae nonitata waiyexe maniya taita tyaona hoka waiyexe xoalini hare niyahare taitaiya tyaona, exahe Xekohaseti hatene waiyexe niyahareya tyaona.

#### *Xoimahalitinae Nawenane Waiyexe*

(1 Timóteo 4.11-16; 6.11-12; Tito 2.6-8)

<sup>22</sup> Awa atyo iniyalahare xoimahalitinae tyomitere xema hisaona. Maika waiyexe, tyakekoti, xawayetyati, mehexaikohaliti harenae xema hisaona, haxawalita waiyexe haxahekola kakoa Enore xema tyaoniterena kakoa.

<sup>23</sup> Awa atyo maxemerehare, iraesekoatyati xema hisaona. Hatyoharenae hiyeta xalijini kakoati kaotyakita. Hatyohare atyo waiyekehala kita homana. <sup>24</sup> Xekohaseti wakanehariya atyo maisa xalijinihareta. Waiyexe taita atyo iraeta halitinae kakoa. Xaotyakisatiye waiyexe, mehexaikoharexe atyo, <sup>25</sup> hoka hawaiyexehare kakoa watiali hairawaiyasenae. Xoana xamani hoka Enore kahinaetyahene hoka halakisaha iniyala-hare háomaneha hoka Iraiti Waiyexe xema tyona na. <sup>26</sup> Nikareya hoka waiye exa-hekolaha tyao heta, hoka iyoawihenahitahaiya Tihanare xi yokala nonitata, koxaka ene exahekola xema tyona na.

## 3

*Miyanitiye Ferakenenae*

<sup>1</sup> Exe harenae hotyaxemetarya: Miyanitiye xowakehena ite hoka wenati howitihare tyao hena. <sup>2</sup> Halitinae ite haxaokakoawi taita ahekohena, kahare ite xi yehaliti aohenaha, aokowiharetyoahenaha, ahinityaliye, iholitatere, maisa xoare kakoa ihalaharetere hare. Hanexenae, hanityonae maxaiminiriterenae, maisa ite aiminisahitaha Enore koamaniya nawenatyaka. <sup>3</sup> Maisa ite haiyanae awaiyetyahitaha, xalijinihareha ite. Iraeharetyaite haiyaharenai, maisaite waiyore kaxaikoawitaha hoka xalijinihareha. Xoalini hare waiyexenai nahalakoahare ite tyona na. <sup>4</sup> Mátawatyaha ite haliti. Mawatyalisakahare ite tyona na. Aokowiharetyoah ite, awaiyetyah ite kehalahaliti hoka maisa Enore awaiyetyahitaha. <sup>5</sup> Motya ite Enore koamaniya ene tyona hitaha, xakore hoka maisa Enore niyatere aokareha haomanaha. Hatyohare halitinai nonita hakikisoa.

<sup>6</sup> Haiyanae hatyoharekonitare hatyakonae isoa hoka ohiro maotikone tyao niterenae jiyahaotyahitaha. Maisa irihaloloaha, iniyalahare nomasehaloha hoka tyotya xoalini hare awaiyititerenai xema tyona hitaha. <sup>7</sup> Waiyolotaha xakore aokowitaha hoka mai-saiya xoana hekota waiyolo ahitaha Iraiti waiyexe kakoa.

<sup>8</sup> Toahiya Janes, Jambres xoaha Moisés kakoa kahalakoahareha. Hatyonae akereta exe halitinai Iraiti Waiyexe nahalakoahare tyona hitaha. Maisa iriharexe, maisa Iraiti Waiyexe tyakekoreha. <sup>9</sup> Xakore hoka maisa ite wahita hoka tyotya halitinae waiyaha emawaiyoreharenaha, Janes, Jambres xoaha kawaiyakehenere akereta.

*Jesus Tyakekohenerenae Kakoa Atyoite Kahalakoaharetyoaka*

(Filipenses 1:28-30; Apocalipse 6:9-11)

<sup>10</sup> Xakore hoka hiso atyo noxaotyakiri, noxahekoli, notyakekoni, nomehexaikohalini, noxawayiiri, noxaiyateretyoani xema hisaonita. <sup>11</sup> Iniyalahare nokaxomokakitere, kirakoane notyaonitere harenae hasema. Tyotya waiyekehala kita homana wenakalati Antioquia, Icônio, Listra nali kalore iniyalahare nokaxomokakihenere! Howitihare kaiserehare. Xakore hoka Xekohaseti iyeheta natyo hatyoharenae nonitata.

<sup>12</sup> Tyotya waiyexe maniya tyona aokowiterenae, haxawalita Jesus Cristo kakoa tyona aokowiterenae ite iniyalahare kaxomokaha.

<sup>13</sup> Hoka xalijiniharexenae, maoseratyaliyenae harenae ite ekakoita masakare iniyala-hare tyomehenaha. Maoseratyahaite, exahe kamaoseratyakaha xoaha ite.

*Exe Baberane Atyo Enore Niraene*

(1 Pedro 1:24-25; 2 Pedro 1:18-21)

<sup>14</sup> Hiso hoka heko hisaona Iraiti waiyexe hasemehenere, hityakekohenerere xema. Waiyekehala kita homana Iraiti Waiyexe kakoa aotyakihenerenae hiso. <sup>15</sup> Hiyoimene xowakita Iraiti Waiyexe nanekoare hiyaita, hoka hawaiyoreta ekakoa. Hatyoharenae atyo airihalinikijita, waiyexe maniya awenatyakihitita, tyakekoti Jesus Cristo hiyeta.

<sup>16</sup> Hiyaiya, tyotya Iraiti Waiyexe nanekoare atyo Enore nalitare. Ihiyeta xaotyakisati aliterexe kaotyakita, xaotyakisati ehaikoare kaxakaisakita, iniyalahare kaomakitere kaxaototatyakihitita, exahe wenati waiyexe maniya kaxaotyakisakita. <sup>17</sup> Exe harenae hiyeta atyo Enore wakanehare memere tyota mene hoka tyotya xoalini hare waiyexe taita tyoma maheta.

*Maika Heko Hityakekone Xema Hisaona  
(2 Timóteo 2.1-3; Hebreus 4.11; 10.32-37)*

<sup>1</sup> Kinatere niraе hikakoa Enore, exahe Jesus Cristo haotita. Tyohenere xowaka ite Kalorexe tyona maheta hoka tyotya halitinae, kaseхenae, ekamanenae hare hoka axalihena, hoka tyomahitere nahalakoa tyomahitere akereta mokahene maheta. <sup>2</sup> Hasemehena niraini: hiyakai Enore niraine halitinae hiye, haiyateretyoa hiyakaini kakoa. Hiyakaihakala ferakene xamani, maisa xamani hoka hiyakaihakaty ihiyeha. Haiyateretyoa exahitaha, hiwatyalahene, haihalahalinikisahene. Himaholawakeneta haotyakisahene. <sup>3</sup> Hiyaiya, haxowakehena ite hoka halitinae maisa Xaotyakisati Waiyexe semaha aokowihenahititaha hoka xoalini hare awaiyetyahitere xema taita ite tyao-henaha. Haomanahitaha ite haxaotyakisaka aohenaha. Axehenahene ite xoare xamani semaha aokowiyahitaha hoka. <sup>4</sup> Maisa ite semaha aokowi ahitaha xaotyakiye waiyexe hoka xakaihakere taita ite semaha aokowihenaha.

<sup>5</sup> Xakore hoka hiso atyo maika hirihare, hikaxaikoawi. Heko haiyateretyoa iniyalahare hikaxomokakitere kakoa. Hateniti waiyexe hisoma hoka Iraiti Waiyexe hiyakai. Tyotya hihatene hisoma Enore wakanehare hisaohenere hiyeta.

<sup>6</sup> Natyo hoka okoi nokamani aosehena. Nokaxaisakihena hoka nahalakihena exe wenati. <sup>7</sup> Naiyateretyoa waha aka hateniti waiyexe kakoa hoka namematya nohateni Enore aohenere. Heko notyakeko Xekohaseti Jesus. <sup>8</sup> Kalikini waiyexe nomaniye maheta memere atyahita natyo, tyotya nojiyahao akaty hoka. Xekohaseti atyo ehekorexe taita ahekoita halitinai kakoa hoka seriti hoko waiyexe ite isehena nomani hatyo xowakehena hoka. Maisa ite nomani taita xini, tyotya etyoaneneheta hawaiyexehare kakoa atyahiterenae ana tehitiya ite isa.

*Hinaehaliti Kakoa Niraetyaka*

<sup>9</sup> Haiyateretyoa hoka haxerore hisoa hoka hiyaiyeheta natyo. <sup>10</sup> Demas awaiyetya hawenane halitinae koni hoka halakisa natyo hoka Tessalônica xeta xane. Crescente atyo xane Galácia koa xeta, hoka Tito atyo xane Dalmácia koa xeta. <sup>11</sup> Lucas taita ali nohaliyi tyaonita. Maika Marcos hatawa hoka hanolokene hoka kahinaetya natyo Enore hatene hiye. <sup>12</sup> Naxikaty Tíquico Éfeso xeta. <sup>13</sup> Maika hisohena hoka hakolaheta nomani niminase nahalakihenere Trôade nali, Carpos hanakota. Maika hakolaheta nomani baberanae. Maika babera militi nomakerenae kaisere hakolaheta.

<sup>14</sup> Alexandre, kamatihera kakoa hakitere kalore iniyalahare moka natyo. Xekohaseti ite iniyalahare mokene iniyalahare mohenere natyo nahalakoa. <sup>15</sup> Maika hirihare tehitiya ekakoa. Wiyakaitere xahita kahalakoahareta kaisere, xalijinihare tyona.

<sup>16</sup> Hetati nokaxaxalisakenere xowaka maisa xala hare hekotita nokakoi. Tyotyaha halakisaha natyo. Kasani maisa Enore xoana mokahene hatyo nahalakoa naokita! <sup>17</sup> Xakore hoka Xekohaseti hekota kaxaiko natyo, exahe hoka iyateliti isa nomani hoka tyotya Iraiti noxakai maheta majudeuneharenae hiye. Exahe iyeheta natyo leão kanasakota. <sup>18</sup> Xekohaseti ite iyeheta natyo tyotya iniyalahare nonitata hoka kolatya natyo hawenakala enokoa xeta. Maika kaihalaharetyaketa mene ekakoa matyotenehare naoka, xoaha.

*Miyanitiye Xakaisatiheta*

<sup>19</sup> Maika hiyakaiheta natyo Priscila, Áquila hiye, exahe Onesíforo hotyalinai hiye hoka. <sup>20</sup> Erasto hekota wenakalati Corinto nali. Trófimo atyo hokakita hoka nahalakisene wenakalati Mileto nali. <sup>21</sup> Haiyateretyoa hoka wehakiti nahitita hisoa. Wihinaeharenae Eubulo, Prudente, Lino, Cláudia, tyotya haiyaharenae hoka haxakaisakehena hitaha aokaha hihiye.

<sup>22</sup> Timóteo, maika Xekohaseti hisekohare kaxaiko. Maika Enore xityotya waiye moka. Eko xoaha.

## Tito

<sup>1</sup> Natyo Paulo, Enore wakanehare, Jesus Cristo niraene kakoare naxairatya exe babera. Enore aoka natyo haomana hoka axikatyatya natyo nakahinaetya hoka naiyatelikisa maheta Enore anere hotyalinai tyakekone. Naotyakisahene Iraiti Waiyexe kakoa hoka waiyexe maniya taita tyaonaha maheta. <sup>2</sup> Iraiti Waiyexe hiyeta watyahita wenati matyotenehare xahita. Enore mamaoseralahare atyo, waikohe maomakahareneta wenati matyotenehare isa womana aokowi. <sup>3</sup> Haxaimenekolaoseta hotikisa womana wenati matyotenehare iraiti hiyeta. Exe Iraiti Waiyexe atyo kaxekakita nomani hoka noxakaitene Wiyasehareheta Enore xaokalita.

<sup>4</sup> Naxairatya homana, Tito. Hiso atyo nityani hityakekone hiyeta. Exe tyakekoti atyo hityakekone, notyakekonni xoaha. Kasani waiye himehexaikohare hisaona Wexe Enore hiyeta, exahe Wiyasehareheta Jesus Cristo hiyeta naokita.

### *Inityohaliti Waiyexenae Nawenane*

*(1 Timóteo 3.1-13)*

<sup>5</sup> Nahalakihenere hiso Creta nali xowaka xoalini hare hatyo nali maomakahare tyaonitere haxakaisa maheta. Exahe hoka wenakalatinæ nihatyaka tyakekoterenæ nityohalitira hamoka maheta.

Hotita niraehenerenæ. <sup>6</sup> Tyakekohatiyenæ kahinaetyaseya: haliti mairaeharetyakahare, hatita yanityore, ityaninae tyakekohatiye hoka iniyalahare maomanehare, enómaneha tahi masemakahare, semaxematyahatiye hare.

<sup>7</sup> Xala xamani atyo Enore hatene hakita hoka tyakekohatiyenæ nityohalitira tyaonita hoka maisaiya xoare hiyeta kairaeharetyakita. Maisaiya ahinityaliye, maisaiya xalijiniharetata hare. Maisaiya hekatikare, eharehatiye. Maisaiya olo kalore harenæ aokitatere haomana hare tyaonita. <sup>8</sup> Haliti kaokehena hoka waiye mokitere hare hahanako, waiye maniya ahekotitere, aiminisahatiye, iriharexe, waiye kaxaikoawitere hare. <sup>9</sup> Kinatere tyaonitere iraiti waiyexe xema kaxaotyakisakehenereya hiye tyakekohatiyenæ nityohalitira tyaona hoka aihalahalinikisa haiyanae waiyexe xaotyakiye kakoa. Exahe hoka waiyoreya hotikisa xaotyakiye ehaikoare hahinaeharenæ ana airihalikisahene maheta.

<sup>10</sup> Hiyaiya, kahare haiyanae tyakekota xakore aokowita hoka masemaxemalahare tyaonahitaha, kahalakoaharahita iraiti waiyexe kakoa. Maoseratyahitaha haliti. Judeu xaotyakira xema tyaoniterenæ kaisere masakare nikare tyaonita. <sup>11</sup> Maika hiwatyalihenene mema tyaonaha maheta. Hiyaiya, haiya xowaka maoseratyahitaha kaiyanityore, exanityo ityaninae tyotya kakoita. Xaotyakiye ehaikoare aotyakijita, kasani kaoloxahare tyaonaha ihiyeta aokowiyahitaha hoka. <sup>12</sup> Hatya enekonitareha iraiti xakaisasehare Creta nalitare nexa: “Creta nali tyaoniterenæ maoseraty minita. Maisa waiyexe, xalijinihareha. Maxaharehatiha, kirakahare akereta hajiha ekaisetyahitaha”.

<sup>13</sup> Hatyo iraehenere aliterexe. Hiyeta hoka maika hirae kinatere ekakoaha hoka iraiti waiyexe tyakekoha. <sup>14</sup> Hirae ekakoaha maisa judeunæ xakaihakalatere, haliti xakaihakalatere xema tyaonahita maheta. Hatyonæ atyo maisa awaiiyityare iraiti waiyexe hoka nikare irai ahitaha.

<sup>15</sup> Tyotya atyo waiyexe taita, waiyexe taita ahekotiterenæ ana. Hoka maisa atyo xoare hare waiyexe iniyalahare taita ahekotiterenæ, matyakekoneharenæ ana. Hiyaiya, eseriha, ityakoiyahareha atyo ewaxirahare taita. <sup>16</sup> Enore koamaniya xakore tyaonahitaha aokowiyahitaha hoka xoalini hare enómanenaeha atyo mailha waiyexe. Kalore irawaniti kakoareha, maisa semaxematyareha, maisaiya aliyakere xoalini hare waiyexe tyomahitaha.

<sup>1</sup> Maika xaotyakisati waiyexe aokitere akere kakoa taita haotyakisa. <sup>2</sup> Maika inityohalitinae hiye hirae hoka waiye maniya kaxaikoawi, iriharexe, waiyexe taita ahekotyaha, awaiyetyahita haliti, tyakekohatiye kaiserehare, mamaixaharenahareneta tyaonaha wenati waiyexe kakoa.

*Ohironai Nawenane Waiyexe  
(1 Timóteo 3.11; 1 Pedro 3.1-6)*

<sup>3</sup> Maika inityohalotinae hiye tehitija hirae hoka waiyexe maniya taita tyaonaha. Hoka maisa iraeseri ahitaha, maisa kalore vinhoxa terahitaha. Maika waiyexe kakoa taita aotyakisaha. <sup>4</sup> Nikare ite hoka xoimahalotitaterenae masakare awaiyetyaha haiyanenenaeha, haisaninae, <sup>5</sup> exahe hoka irihaloha, waiyexe maniya taita tyaonaha, waiye kaxaiko hahananaeha, exahe haiyanenenaeha niraeneha hoka semaxematyaha harenae hoka maisa Enore niraene kiraeharetyakita maheta.

*Xoimahalitinae Nawenane Waiyexe  
(1 Timóteo 4.11-16; 6.11-12; 2 Timóteo 2.22-26)*

<sup>6</sup> Maika xoimahalitinae tehitija haotyakisa waiye maniya kaxaikoawi maheta. <sup>7</sup> Maika hiso tehitija xoalini hare waiyexe taita hisoma hoka hawenane akereta tyaonaha. Maika haotyakihena hoka kaimini haotyakisa. <sup>8</sup> Waiyexe iraiti taita hirae hoka maisa xala hare iraeharetita hiso hoka wahalakoaharenae haihare hoka maisa xoare iniyalahare iraetaha wiyaokaka.

*Xekohasetinae, Hatenitiyena Xoaha  
(Efésios 6.5-9; Colossenses 3.22-4.1; 1 Timóteo 6.1-2)*

<sup>9</sup> Maika wakaharenae semaxematyaha haxekohasenaiha niraene ihalahareha maheta ekakoaha, hoka maisa ekoaxatyal ahitaha, <sup>10</sup> maisa kaiwaharetyahitaha haxekohasenaiha. Maika haxekohasenae aokitere akereta taita tyomaha hoka exekohasenae tyakekoahene. Nikare taitaiya tyaonaha hoka Enore wiyasehareheta xaotyakira tahi waiye kasemaka.

*Cristo Atyo Waini Womana  
(1 Coríntios 15.2-4; Gálatas 1.4; 1 Pedro 2.21-25; Apocalipse 1.5)*

<sup>11</sup> Hiayiya, Enore hawaiyexehare hotikisa hoka tyotya halitinai waiyexe maniya moheta maheta. <sup>12</sup> Aotyakisa wiso hoka wahalakisa maheta wimatyakekonetere, iniyalahare wawaiyititerehare harenae hoka waiye maniya taita wisaona, waiye wikaxaikoawi iniyalahare nonitata hoka Enore ana taita wisaona maheta halitinae koni. <sup>13</sup> Aotyakisa tehitija wiso hoka watyahita Wenorexa, wiyasehareheta Jesus Cristo xahita. Haxowakehenaite hawerokene kakoa kaokehetehena hoka waiye maniya kaisere mohena wiso hoka hatyo xahita watyahita. <sup>14</sup> Hatyo atyo isoawi waini maheta womana hoka tyotya iniyalahare nonitata waiyexe maniya taita moheta wiso hakaxaikone hotyali maheta. Enomanere taita wisaona hoka waiyexe taita wisoma kaiserehare maheta.

<sup>15</sup> Exeharenae kakoa haotyakisa. Haiyateretyoa hiraene semiterenae xahita, haihalahalinikisahene hare. Hirihare hoka maisa hatya hekoti maxaiminirita hiso.

*Tyakekoterenae Nawenane  
(1 Tessalonicense 5.14-18; Tiago 1.19-22; 3.17-18; 1 Pedro 4.7-11)*

<sup>1</sup> Maika hirae tyakekohatiyena kakoa hoka xekohasetinae wenakalati waikateharenae niraene semaxematyaha hoka memere tyaonaha xoalini hare waiyexe tyomaha maheta.

<sup>2</sup> Maika haotyakisahene hoka maisa iraeharetyahitaha haliti, hoka maxalijiniharenahare, waiyexeharexe tyaonaha. Maika waiyexe iraiti taita iraeha tyotya halitinae kakoa.

<sup>3</sup> Hiayiya, toahiya xowaka ene maisa wiriharexe hoka wasemaxematyare, wiyalijinihare ene. Xoalini hare hawarehare iniyalahare taita ene wahekoita hoka hatyo xema wisaonita. Hatyo xowaka xoalini hare iniyalahare wisomita, xoalini hare kehalita

wihiye hoka hatyohare maniya wisaonita. Wokoawahareta. Haiyanae hoka kirawanahitaha wiso hoka wikirawanahitahene tehitiya. <sup>4</sup> Xakore hoka Enore wiyasehare atyo haxairakoaneharera hotikisa haxawaiyera tyotya haliti ana <sup>5</sup> hoka waiyexe maniya moheta wiso iniyalahare nonitata. Maisa xoalini hare waiyexe wisomitere hiyeta xini. Haxairakoaneharera wiso hiyeta. Isekoaliti Waiyexe hiyeta wawenane waiyexe maniya moheta, hoka waitare awenakiheta wiso hoka isa waitare wenati womana. <sup>6</sup> Enore waiyexehare hoka Haisekohare Waiyexe isa womana wiyasehareheta Jesus Cristo hiyeta. <sup>7</sup> Nikare tyoma hawaiyexehare hiyeta iniyalahare maomaneharene moka wiso maheta, hoka wenati matyotenehare watyahitere kaxekaka womana maheta. <sup>8</sup> Exe xaotyakiye atyo aliterexe kaiserehare.

Maika heko hirae exe harenae tahi hoka tyakekohenerenae Enore aiyateretyoa háomane waiyexe kakoa. Exeharenae atyo waiye tyotya halitinae ana hoka enawenaneha waiye tyaona maheta.

<sup>9</sup> Hoka awa atyo iraesekoatyati maxemerehare, wahahare tahi toahiyereharenae nexare, xalijini kakoati, iraesekoatyati judeunae xaotyakisakaho tahi kairasekoatyaka. Exe harenae atyo maisa xoare tyomare, maxemerehare atyo. <sup>10</sup> Maika xala xamani xaotyakisati metalahare kakoa aotyakisa hoka axalijinhaliki akatya xinekoni hoka hiwatyalini hinamaki. Hatyaoseta maisa semita hiraene hoka maisa hiwatyalihititene. <sup>11</sup> Hiayi, waiyekahalakita atyo homana: maisa xoana hamokitene, iniyalahare nomaserehare terota hoka. Iniyalahare tyomitere atyo emawaiye nawenanene hotikijita.

#### *Miyanitiye Xakaisatinae*

<sup>12</sup> Naxikahena ite homana Ártemas xamani, Tíquico xamani hoka kaokehena homana hoka hatyaoseta maika haiyateretyoa hoka hisoa hahalakoatya natyo Nicópolis nali. Wehe akiti xowakaite nali notyaona naokowi. <sup>13</sup> Maika hakahinaetya Zenas, wenatyaho kakoa waiyoretere. Exahe Apolo tehitiya hoka xoare kakoa xamani hakahinaetyahene haokowi enetonaneha hiye hoka hisa enomana hoka waiye xaneha.

<sup>14</sup> Nikare ite hoka wihinaeharenae waiyore waiyexe háomane kakoa, exahe haiyanae hoka kahinaetyaha xoare xamani aokahitaha haomanaha hoka. Nikare ite hoka enawenaneha waiye tyaona.

<sup>15</sup> Tyotya nohaliye tyaoniterenae haxakaisakehenahitaha aokaha hihiye. Maika wihinaeharenae tyakekohatiyenae hiye hiyakaiheta wiso.

Maika Enore waiye kaxaiko xiso xityotya. Xoaha.

## Filemom

<sup>1</sup> Natyo Paulo, berexo ako notyanita Jesus Cristo hiyeta, hoka wihinaehare Timóteo kakoa naxairatya homana, Filemom. Hiso atyo wihinaehare, wikahinaetyase hateniti hiye. <sup>2</sup> Exahe wihinaehare tyakekoterenae hohisakoiterenae hihanako anere, wihinaehalo Áfia anere, Arquipo wikahinaetyasehare hateniti hiye anere tehitiya hoka.

<sup>3</sup> Kasani waiye ximehexaikohare xisaona Wexe Enore hiyeta, Xekohaseti Jesus Cristo hiyeta waokita.

### *Filemom Tyakekone Nawaiyexehare Xoaha*

<sup>4</sup> Nohinaehare Filemom, niraexahena hoka notyaxematyia minita hiso, nihalahareta Nenorexi kakoa hihiyeta. <sup>5</sup> Nasema hawaiyetitere tyotya Enore koamaniya tyaohenenrae, hityakekone Xekohaseti Jesus Cristo harenae hoka hatyo hiyeta nihalahareta.

<sup>6</sup> Enore hiye niraexatita, kasani tyakekoti haxawalita mokitere wiso awaiyolinikisa wiso hoka tyotya xoalini hare waiyexe kaxekakitere womana Jesus Cristo wityakekotere hiyeta, masakare waiyekhalaka womana naokita.

<sup>7</sup> Nohinaehare, hiyawaiyera aihalahalinikijita, aiyatelikijita xoaha natyo. Hiyaiya, tyotya Enore kaxaikoneharenae hoka haihalahalinikijita.

### *Paulo Waiye Onésimo Xomokaka Aoka*

<sup>8</sup> Notyaonitere hihinaehare Cristo koamaniya hiyeta nirae hihiye hoka naokitereharenae hisoma. <sup>9</sup> Jesus Cristo niraene kakoare natyo Paulo. Nóhiyehena, iniraene hiyeta kalini berexo notyaonita. Xakore hoka nawaiyetitere hiso hiyeta nirae hihiye hoka naxita taita hiso, maisa nawakaita xini hiso, naokitere hisoma maheta.

<sup>10</sup> Naxa hiso hoka waiye hamoka maheta Onésimo. Cristo ityakekone hiyeta atyo nityani. Berexo ako notyaonita hoka Cristo koamaniya namokene hoka nityani akereta tyaona. <sup>11</sup> Toahiya ene atyo maisa xoare tyomare homana hoka kalikini atyo ehekore tyaona nomani, exahe homana tehitiya hoka. <sup>12</sup> Naxikahetehenen homana hoka kalore ite notyaxematene. <sup>13</sup> Kasani alita nohaliye tyaona hoka berexo ako notyaonitere nase Iraiti Waiyexe hiye kahinaetya natyo hiwenekoare naowita. <sup>14</sup> Xakore hoka maisaiya naiyateretyoita hiyahita hakahinaetya natyo maheta. Maika hahekota, haokaiya atyo hoka ali kahinaetya natyo.

<sup>15</sup> Alitere atyo Onésimo waha terehokoane haware tyaona honita hoka hatyo najikinita kalikini atyo haikoahitita homana tyaona mene maheta hihaliya. <sup>16</sup> Haikoahetehena homana xakore hoka maisa atyo wakahareheta xini. Hiyaiya, wakahare xahehare atyo, wihinaehare atyo Cristo koamaniya tyaohenere hiyeta. Noxiyakawali atyo. Exahe tehitiya hoka hixiyakawala. Maisa atyo halititere xini, wihinaehare kaiserehare atyo Xekohaseti hiyeta.

<sup>17</sup> Hihinaehare kaiserehare atyo haokita natyo hoka hamokitere natyo akereta hamoka Onésimo, kaokehetehehena homana hoka. <sup>18</sup> Exahe kakotaneta hiso hoka maika nokotani hamokene. <sup>19</sup> Kalikini nokahe kakoita naxairatya exe: natyo, Paulo ite nabakatyia hiso. Xakore hoka hiso tehitiya hikakotaneta natyo, iraiti waiyexe noxakai hihiye hoka waiyexe maniya hisaohenere hiyeta.

<sup>20</sup> Nohinaehare, haihalahalinikisa natyo Xekohaseti hiyeta, hoka maika naokitere akereta hisoma nomani Cristo hiyeta. <sup>21</sup> Naxairaita homana. Naokitereharite hisoma, xoana xamani ite hoka naowitere xahexe hisoma. Hatyohare waiyekhalakita nomani.

<sup>22</sup> Maika memere hatyako hamoka nahiti. Xoana xamani hoka xiraexala Enore ekoaxatya hoka halakisa natyo hoka haki notyoa nowaiyihitiya xiso nali.

### *Miyanitiye Xakaisatinae*

<sup>23</sup> Epafras haxawalita tyaconitere nokakoi berexo ako Jesus Cristo hiyeta haxakaisake-heta aoka xihiyе. <sup>24</sup> Nohinaeharenae Marcos, Aristarco, Demas, Lucas harenae tehitiya haxakaisakehenahitaha aokaha xihiyе.

<sup>25</sup> Maika Xekohaseti Jesus Cristo waiye moka xiso. Eko xoaha.

## Hebreus

### *Enore Ityani*

<sup>1</sup> Toahiya xowaka Enore irae wahetakomaniyereharenae hiye iraiti xakaisaseharenae kanasakota kahaliki, exahe kahare maniyata. <sup>2</sup> Kalikini wisaonitere miyanitiye xowake-hena atyo hoka Enore irae wikakoa Haisani kanasakota. Ihiyeta atyo Enore tyotya xoalini harenae tyoma. Enore xaokalita atyo tyotya xoalini hare enomanere makere tyaona.

<sup>3</sup> Ityani Hanexe niyatere kakoa kinatere aokanaita Hanexe akereta, exahe hoka waiye hakakoa Hanexe kakoa. Hairaene kinaterexe kakoa tyotya xoalini hare aiyatelikijita. Hoka halitinae nómane iniyalahare emaisahetehenere najikinita enokoa nali tyoka, Enore kinaterexe fihini maniya.

### *Enore Ityani, Anjonae Xoaha*

<sup>4</sup> Enore Ityani atyo anjonae xahehare tyaona. Hiyeta hoka Enore anjonae xahehare aokene.

<sup>5</sup> Hiayiya, maisa atyo Enore hatyanae anjo hiye xoana xowaka nita: Nityani atyo hiso, kalikini atyo Hexe notyaona.

Exahe maisa tehitiya atyo hatyanae anjo hiye nita:  
Hexe ite notyaona, hiso atyo ite Nityani.

<sup>6</sup> Nixa tehitiya irae axikahenere Haisani hetatiye halitinae koni xowaka:  
Maika ite Enore wakanehare anjonae tyotya awaiyetya Nityani, haxahehare aokahene.

<sup>7</sup> Exakere Enore irae anjonae tahi:  
Enore hoholati akereta moka anjonae, hawakaneharenae irikati biyaloitere akereta moka.

<sup>8</sup> Hoka exakere atyo Haisani tahi irae:  
Xekohaseti ite hisaota mene, Enore. Waiye taita ite hamoka hikaxaikone hotyali.

<sup>9</sup> Xoalini hare waiyexe taita hawaiyetita hoka iniyalahare atyo maisa hawaiyetyare.  
Hiyeta hoka hEnorexa haomana aoka hiso hoka hikaxaihalahalinikisaka, hikax-aiminisaka xoaha hihinaeharenae xahe.

<sup>10</sup> Nixa tehitiya Haisani hiye:  
Hetati xowakiya maisa xoare aka hoka hiso atyo hisoma waikohe, enokoa harenae,  
Xekohaseti, hoka hikahe kakoa hisoma.

<sup>11</sup> Maiyarehetaha ite, imiti exololohare akereta kiraharehetaha ite. Hoka Hiso atyo ite hisaoneta mene.

<sup>12</sup> Hityahahenahitene ite imiti kaxityahatyakihititere akere hoka ewenekoareha atyo ite waitare tyaohitiya. Hoka heko atyo ite hisaona, maisaiya atyo hoheyeta.

<sup>13</sup> Enore maisa xoana xowaka nexare hatyanae anjo hiye:  
Hiskehenanofihini maniya hahalákoaharenae hikiji katyahe namohenere kijiya.

<sup>14</sup> Hoka xoare hare atyo anjonae? Isekohalitinae atyo, Enore ana hakahitaha. Enore atyo axikatyahene halitinae iniyalahare nonitata kaiyakehetehenerenae kahinaetya maheta.

### *Waiyexe Maniya Nawenatyakeheta*

<sup>1</sup> Hatyo hiyeta maika waiye wasemaxemanya Iraiti Waiyexe wasemiterenae, waiya aliya hoka ekakoita wahalakisene. <sup>2</sup> Hiayiya, anjonae Iraiti Waiyexe xakaitere nika aliterexe. Hoka matyakekohenerenae maxaiminirehenerenae iniyalahare kaxomokaka ematyakekoneha nahalakoa. <sup>3</sup> Nikareya maisa wityakekota waiyexe maniya halitinae xomomokakeheta tahi hoka aliyakereya iniyalahare wimaxomokakehena? Hetati Xekohaseti Jesus ta waiyexe maniya halitinae xomomokakeheta tahi xakai. Hatyo najikinita

iniraene semaseharenae xakaihityene wihye. <sup>4</sup> Hatyo xowakita tehitia Enore kahinaetyahene hoka iyateliti hotikisa waiyexe. Maomakahare waiyexe hoka kahare tyoma iniraeneha katyakekotyaka maheta. Enore isa tehitia enomanaha Isekohaliti Waiyexe niyatere haxaokala ximita.

*Jesus Cristo, Isekohaliti Niyaseharehta*

<sup>5</sup> Hiyaiya Enore ite tyomehitiya waikohe hoka maisaiya atyo anjonae xekohaseti tyaonita. Hatyo waikohe waitare kaomakenere tahi akiti exe wiraeta. <sup>6</sup> Hiyaiya, exakere Iraiti Waiyexe nanekoa hatya irae:

Xoare atyo haliti, Enore, hoka hahekotita etahi? Xoanere hoka maisa xakore xoare waiyakahare xini hoka himawaiyehareta ekakoa?

<sup>7</sup> Anjonae kátyahakohareta hamokene xakore hoka maisa waha xini nikare tyaona maheta. Haeroretene xekohaseti tyaona, exahe hoka waiye kaxaiminisaka maheta.

<sup>8</sup> Haiyatelikisene hoka tyotya xoalini hare kaxaiko maheta.

Nikare tyotya xoalini hare ekatyahakohare Enore moka hoka haliti kinatere tyaona tyotya xoalini hare xekohaseha maheta. Xakore hoka waiyekehalakita womana: kalikini atyo maisa tyotya xoalini hare xekohasehare haliti tyaonare. <sup>9</sup> Hoka wiyaiya atyo Jesus, wasema atyo etahi. Halitinae koni tyaona Enore nawaiyexehare hiyeta waini tyotya halitinae ana maheta. Hatyo xowaka anjonae kátyahakohareta tyaona, xakore hoka maisa atyo waha xini nikare tyaonare. Waini, hatyaoseta kaseheta hoka wiyaiyene, wasemene xoaha: Kaxaeroretyaka, waiye kaxaiminisaka wainihenere hiyeta. <sup>10</sup> Enore hiyeta tyotya xoalini hare kaotyaka, enomanere tyaonaha maheta. Kasani tyotya ityani tyaohenerenae waiye tyaonaha maheta ehaliya. Hiyeta hoka Enore awaiyolinikisa Jesus, iniyalahare kaxomokakehenere hiyeta. Hiyaiya, Jesus atyo waiye maniya axomokaniki-henahitene.

<sup>11</sup> Jesus tiheheta halitinae iniyalahare enómaneha nonitata. Hoka Jesus, hatyo tihehetehenerenae xoaha atyo Enore ityaninae makere. Hatyo hiyeta Jesus ihalahare ekakoaha, maisa haiharexe haximarenenae aokahiterene hiyeta. <sup>12</sup> Hoka exakere nexa: Enore, noxakai ite hitahi noximaliniae hiye. Hikoamaniya tyaonitreharenae ite haxawalita tyaohenaha hoka noxera xerati ehaotyahitaha nihalahalini hikakoa hiyeta.

<sup>13</sup> Nexa tehitia:

Notyakekone ite.

Nehitiya:

Alihena natyo xoimanae Enore isehenere nómnaninae kakoa.

<sup>14</sup> Xoimanae aowitere atyo halitinae makere hoka hatyo hiyeta Jesus tehitia haliti tyaona, halitinae akereta. Nikare tyaona, waini hoka hakamane hiyeta halitinae fahare Tihanare mawenekoaretya maheta. <sup>15</sup> Exahe tehitia hoka emaisatya maheta emairaneha halitinae nonitata. Hiyaiya, hakamane kakoa mairahitaha ferakiti nihatyaka.

<sup>16</sup> Maisa atyo anjonae kahinaetya maheta xini tya. Abraão jikolaharenae atyo kahinaetya maheta.

<sup>17</sup> Hiyeta hoka Jesus haximarenenae akereta terota tyaona hoka sacerdote kalorexe tyaona maheta. Exahe waiyexehare hoka Enore hatene waiyexe tyoma maheta. Nikare tyaona halitinae nómnanie iniyalahare kaxemaiyaretyakeheta maheta.

<sup>18</sup> Tyaonitere halitinae koni xowaka kahasakaharetyaka hoka howitihare wenati tyaona enomana. Hiyeta atyo kalikini kahasakaharetyakiterenae kinatere kahinaetita.

*Jesus, Moisés Xoaha*

<sup>1</sup> Nohinaehare, Jesus koamaniya tyaohenerenae, Enore haomana aohenerenae: Maika Jesus tahi waiye xahekoty. Enore axikahetene kalorexe sacerdote tyaona maheta hoka

wiso tyakekohenerenae kahinaetyase tyona maheta. <sup>2</sup> Hiyaiya, Enore aokitereharenae taita tyoma, nikare ehatene aoka hoka, Moisés tyotya tyomehenere Enore hanako akereta.

<sup>3</sup> Xala xamani atyo tyoma hati hoka háomane xahehare atyo kaxaiminisaka. Nikare tehtiyya Jesus masakare waiye xaiminisaka Moisés xahe. <sup>4</sup> Tyotya hatinae atyo kao-masexe taita hoka Enore atyo tyotya xoalini hare nomasehare. <sup>5</sup> Moisés tyotya Enore aokiterehare taita tyoma ehanako. Wakahare waiyexe hoka xoalini hare irae Enore jikiniti irae aokowitereharenae tahi. <sup>6</sup> Hoka Cristo atyo Enore Ityani hoka waiye kaxaikota Hanexe hana. Wisaonaiya ekoamaniya, wityakekone, wakinatere harenaeya ekoamaniya wisaona hoka ehanaiya wisaona.

### *Enore Kaxakone Hotyali Kawinini*

<sup>7</sup> Hiyeta hoka Isekohaliti Waiyexe exakere irae:

Kalikiniya xasema Enore niraene hoka

<sup>8</sup> awa atyo ximasemaxemalahare xisaona xahetakomaniyereharenae akereta. Ehareha ihiye hoka maharexakahare nali hasakaharehenaherene xowaka akere.

<sup>9</sup> Hoka Enore nexa: “Xahetakomaniyereharenae hasakaharetya natyo. 40-terehokoane xoalini hare notyomehenere xakore tyotya waiyaha hoka.

<sup>10</sup> Hiyeta nehare ihiyeha hoka nomi: ‘Exe halitinae atyo maisa waiyexe, maisa nawenanyaho kakoa waiyoretaha’.

<sup>11</sup> Nehare hoka nomi: ‘Maisaiya xoana xowaka ewaikoheraha naothenere nali kaokahitaha hoka kawinahitaha nokakoi’”.

<sup>12</sup> Nohinaeharenae, xiriharira xawenane kakoa, waiya aliya hoka iniyalahare xahetakotya hoka ximatyakekone hiyeta maisa Enore makamanehare koamaniya xisaohitita. <sup>13</sup> Maika xaihalahalinikisa kakoa, “kalikini” wisaonitatere xowaka, Iraiti Waiyexe nanekoa iraetera akereta. Nikare xisaona hoka maisa xalahare xinekonitare kamaoseryakita iniyalahare hiyeta, exahe hoka maisa ximasemaxemalahare xisaona. <sup>14</sup> Hiyaiya, hetati wityakekohenere Cristo aosetaiya heko wakinatere wityakekone hoka imiyanaose kijiyaiya xane hikoahena hoka ihinaehare kaiserehareya wisaona.

<sup>15</sup> Exakere atyo Iraiti Waiyexe nanekoa nexa:

Kalikiniya xasema Enore niraene hoka awa atyo ximasemaxemalahare xisaona xahetakomaniyereharenae, eharehenahere ihiye xowaka akere.

<sup>16</sup> Xala Enore niraene sema hoka ehare ihiye? Moisés tyotya nolohetehenerenae Egito nalita. <sup>17</sup> Xalanae hiye Enore ehare 40-terehokoane? Iniyalahare tyoma hoka wainihenerenae maharexakahare hiye.

<sup>18</sup> Xala tahi Enore exakere irae, hairaene akereta tyoma aokowihenere xowaka: “Maisa ite xoana xowaka ewaikoheraha naothenere nali kaokahitaha hoka kawinahitaha nokakoi”. Masemaxemrehenerenae tahi exakere iraeta.

<sup>19</sup> Waiyekahalaka atyo womana: Hamatyakekoneneha hiyetaiya maisa aliyakere Enore ewaikoheraha aohenere nali kaokahitaha.

## 4

<sup>1</sup> Enore halakisa hairaene womana hoka wikaokaite enali hoka wikanisa ekakoa maheta. Maika wirihare wisaona, waiya aliya hoka haiyaharenae xinekonitarenae maisa aliyakere aokitere akereta enali hikoita. <sup>2</sup> Hiyaiya, Iraiti Waiyexe semenehenere akereta tehtiyya Iraiti Waiyexe wasema. Semahene xakore hoka maisa tyakekoahitaha hoka maisa xoare tyomita enomanaha ematyakekoneneha hiyeta. <sup>3</sup> Wiso atyo wasemene hoka wityakekone hoka kalikini waiye wimehexaikohare wisaonita aokitere akereta enali, iraehenere akereta:

Nehare hoka nomi: “Maisa ite ewaikoheraha naothenere nali kaokahitaha hoka kawinahitaha nokakoi”.

Exakere irae, koxaka xakore toahiya waikohe tyomehenere xowakita hahatene tyoma miyatya hoka.

<sup>4</sup> Hiyaiya, exakere Iraiti Waiyexe nanekoa xairatyoare haiyakiti tyaponita e7-kini ferakene tahi:

6-ki ferakene Enore haka hoka waikohe, enokoa tyotya xoalini hare tyoma mematya.  
Hatyaoseta e7-kini ferakene hiye kawini.

<sup>5</sup> Hatyo tahita kairaetyakehitiya:

Maisa ite ewaikoheraha naohenere nali kaokahitaha hoka kawinahitaha nokakoi.

<sup>6</sup> Hatyo hetati semehenaherena Waiyexe Iraiti maisa tyakekoahitaha hoka maisa kaokahitaha ewaikoheraha kaxaokakehenere nali hoka kawinahitaha ekakoa aokitere akereta. Xakore hoka haiyanae tyakekohenerena atyo ite xane kaokaha Enore aohenere nali kawinahitaha ekakoa.

<sup>7</sup> Hatyo hiyeta Enore aimenekohitiya haferakene niyahare. “Kalikini”, nita. Hatyo harenae tahi irae waha terehokoane najikinita Davi kanasakota. Koxaka kairaetyaka Iraiti Waiyexe nanekoa:

Kalikiniya xasema Enore niraene hoka awa atyo ximasemaxemalahare xisaona.

<sup>8</sup> Ikiya Josué kolatyare hatyo halitinae waiyexe wenakalati nali kawiniha maheta Enore aokitere akereta hoka maisaiya haferakene Enore aimenekohitita kawiniha maheta.

<sup>9</sup> Nikare hekota Enore kaxaikoneharenae kawinini tyaona, e7-kini ferakene kawini-henere akereta.

<sup>10</sup> Xala xamani ite xane hikoa kawini maheta hoka tyotya hahatene nonitata kawini, Enore kawinihenere hahatene nonitata akere. <sup>11</sup> Hatyo hiyeta maika waiyateretyoa hoka wiyané wahikoa hoka wikawini maheta Enore nali, waiya aliya hoka hatya matyakekoneta hoka hatyo hiyeta maisa xaneta enáli.

<sup>12</sup> Hiyaiya, Enore niraene atyo masakare kinatere, hatyatere kesekase hinama maniya tihere waiye kawetyakere xahehare. Ajikoa, xane hikoita iyawahaliti, isekohaliti xoáha tyaponitere nali. Exahe hihiraoseti, ahiti kaokakakoane xoáha hiye hoka xane hikoita. Xoare xamani kaxahekotyakita hoka hatyoharenae waiyekehalakita enomana. <sup>13</sup> Maisa xoare hare metaharexe Enore ana, tyotya atyo xoalini hare waiyekehalakita enomana. Hatyo hiyeta ite maisa xoare hare wimaxakainita ihiye.

### *Jesus Atyo Kalorexe Sacerdote*

<sup>14</sup> Hiyeta hoka nika hoka waiyateretyoa wityakekone, wawenane ekoamaniya kakoa. Hiyaiya, kalorexe sacerdote kakoare atyo wiso. Enore Ityani Jesus atyo koxaka xane enokoa hikoa Enore nali kahinaetya wiso maheta. <sup>15</sup> Maisa xakore atyo wakinaterexe hoka hatyo kalorexe sacerdote atyo kahinaetita wiso haxairakoaneharera wiso hiyeta. Hiyaiya, hatyo tehitiya kahasakaharetyaka wikahasakaharetyakitere akereta, xakore hoka maisa atyo iniyalahare tyomita. <sup>16</sup> Hiyeta hoka maika wimamairanehare wisaona hoka wiraexala hiyeta Enore nokahakala haliya wikaoka. Hatyo nali ite xairakoane-haretyati ana wahikoa, exahe wikhinaetyaka waokitere ana hoka wahikoa hoka wikkahinaetyaka.

## 5

<sup>1</sup> Exakere sacerdote kalorexe: Hatya haliti kaxomoka halitinae konita sacerdote kalorexe tyona maheta, hoka haka Enore ana hoka halitinae kahinaetya maheta. Halitinae aisehena bowi, kalanero harenae hoka fetatita iniyalahare nomaka hiyeta.

<sup>2</sup> Hatyo tehitiya maisa kinaterexe. Hiyeta hoka maisaiya ehareta mawaiyoreharenae, iniyalahare tyomiterena hiye. <sup>3</sup> Hamaiyaterene hiyeta fetatita bowi, kalanero harenae. Halitinae nómane iniyalahare hiyeta, exahe iniyalahare háomane hiyeta hoka.

<sup>4</sup> Maisa xala hare haxaokala ximita kalorexe sacerdote tyaponare. Enore xaokala xema taita atyo hatya haliti sacerdote kaxomokakita, Arão kaxomokakehenere akereta.

<sup>5</sup> Nikare tehitiya Cristo sacerdote kalorexe tyona Enore xaokalita, maisa haxaokala xini. Hiyaiya, Enore exakere irae:

“Hiso atyo Nityani, kalikini Hexe notyaona”.

<sup>6</sup> Nixa tehitiya Enore haiyakiti Iraiti Waiyexe nanekoa:

Hiso atyo ite sacerdote kalorexe hisaota mene matyotenehare, Melquisedeque tyaonitere akere ite hisaona.

<sup>7</sup> Jesus waikohekoa tyaonitatere xowaka iraexatya Enore hiye kinatyaxa, haosexo kaka. Enore kinatere hoka kasani Enore emaisatya ekamane aokita hoka. Waiyexehare, hoka hatyo hiyeta Enore sema iniraexala. <sup>8</sup> Enore Ityani xakore hoka hamakawatiharene hiyeta waiyore tyakekohati maheta. <sup>9</sup> Hatyaoseta tyotya Enore aokitereharenae tyoma hoka hatyo najikinita tyakekohenerenena niyasehareheta tyaona, matyotenehare enawenaneha tyaona maheta. <sup>10</sup> Hatyo hiyeta Enore sacerdote kalorexe mokene, Melquisedeque tyaonitere akere.

#### *Tyakekoti Halakisaka Henehare*

<sup>11</sup> Kasani wirae waokowita exe tahi akiti harenae xakore hoka howitihare xawaiyekalakatyaka, exahe hoka howitihare waiyekhalakita xomana. <sup>12</sup> Wahehena Xekohaseti koamaniya xisaonita hoka kalikini ene xaotyakisatiyehena xisaonita. Xakore hoka hatya xaotyakisatiye xaokitata, aotyakisa maheta xiso, hetatiye Enore tahi akiti kaka. Nakairati kinaterexe xinakaira mahetare ene hoka totonexati xaokitata xomana. (Enawenaneha xaokaka nikare iraeta). <sup>13</sup> Hiyaiya, xala xamani atyo totonexati taita akokita hoka hatyo atyo xoimitata. Maisa xoare waiyekhalakere enomana, xoare xamani waiyexe, xoare xamani maisa waiyexe hoka. <sup>14</sup> Hoka inityohalitinae atyo kanakairita tyotya xoalini hare. Exahe hoka waiyekhalakita enomanaha xoare xamani waiyexe, xoare xamani maiha waiyexe hoka. Hatyo hare akiti atyo tyotya waiyekhalakita enomanaha kaxaotyahalikisakehenahere hiyeta.

## 6

<sup>1</sup> Hatyo hiyeta naotyakihitiya xiso haiya akiti ximasemanehare kakoa hoka xahikoa inityohalitinae xaotyakisaka ana. Maisaiya hetati xasemehenere kakoa naotyakihitiya xiso. Koxaka xikaxaotyakisaka: Iniyalahare halakisaka hoka Enore tyakekotyaka tahi, <sup>2</sup> batixatyati, kahiti xomokaka seriti heno, kamatinae kaseneheta, matyakekoneharenae iniyalahare maniya xomokaka matyotenehare, Enore haomanerena waiyexe maniya xomotene harenae tahi. Hiyaiya, hatyohare kakoa koxaka xikaxaotyakisaka. <sup>3</sup> Wiya waheta maniya. Enore xaokalitaiya hoka nikare ite wisoma.

<sup>4</sup> Aliyakereya haiyaharenae matyakekoneheta Enore hoka hatyo najikinita tyakekohitiya? Koxaka ene waiye Enore koamaniya tyaonahitaha, koxaka ene Enore niyatere enokoatare waiyekhalakita enomanaha, exahe hoka Isekohaliti Waiyexe ene tyaonita ekakoaha. <sup>5</sup> Koxaka ene Enore niraene semaha hoka waiyeta enomanaha, exahe hoka Enore niyatere tyohenere kehexaha. <sup>6</sup> Xakore hoka hatyakekoneha halakisaha hoka maisaiya aliyakere kaxatyakekonekisakehenahititaha. Nikare tyaonahitaha hoka koexahaxatyahitaha Enore Ityani kakoa halitinae haotita, wainihenere atyalihose xaimaholatyaka hiye xowaka akereta mokahitene haki.

<sup>7</sup> Waikohekoa waiyexe nali oneta menitere akiti atyo hanakati waiye kinatere tyaonita, kalita harenae haxekohase ana. Enore ana waiyeta hatyo waikohe. <sup>8</sup> Hoka waikohekoa katoherenae, exahe hananehaliti iniyalahare hikoiterehare atyo maisa waiyexe hoka Enore maisa awaiyetitene hoka kakeratyaka ite.

<sup>9</sup> Exeharenae xakore wiraeta hoka maisa atyo waikohe ewaxirahare akereta xini xiso, nohinaehare, noxiyakawalinae. Enore atyo iyeheta xiso iniyalahare nonitata hoka hatyo hiyeta waiye xisaonita. <sup>10</sup> Enore atyo waiyexehare. Maisa maotyanexe hateniti xisomehenere, exahe xawaiyexeharene hiyeta xakahinaehenere xihinaehare tyakekohatiyena. Exahe kalikini hoka hekota xakahinaetyahiterene. <sup>11</sup> Kasani heko xaiyateretyoa xihalaharene kakoa imiyanaose kijiya xahikoa hoka xoalini hare waiyexe xatyahitere kaxekaka xomana waokita. <sup>12</sup> Kasani maisa ximaxaharehati xisaona waokare. Xakore hoka maika tyakekohatiyena hamamaxahareharetta tyaonitere akereta xisaona hoka Enore isa aokowiterehare kaxekaka xomana.

<sup>13</sup> Enore iraehenere Abraão kakoa xowaka, iraehenere akereta tyoma enomana aokowi. Maisa xala hare exahehare aka hoka Enore haexareta kaixaretya hatyoharenæ tyoma maheta. <sup>14</sup> Exakere nexa Abraão hiye: “Naokitere akereta ite waiye namoka hiso. Hijikolaharenæ ite hisoaka tyaona”.

<sup>15</sup> Hatyaoseta Abraão atyaha waha, maisa maxahareta haxatyahane kakoa hoka Enore aohenerrehare isa enomana.

<sup>16</sup> Hatya atyo iraehena hoka haxahehare nexare atyo kaexaretita hoka hatyo ini-raene atyo iraesekoatyati kakoa kamiyaneta. <sup>17</sup> Enore kasani isa aokowiterehare waiyekehala halitinae ana aokita hoka maisa haware haxahekola moheta aokowi-hitita. Hatyo hiyeta isa aokowihenere xowakita aliterexe irae, exahe haexare hoka kaexaretya katyakekotyaka maheta. <sup>18</sup> Hinama akitiya maisa aliyakere hahekore kaxomokakita. Hatyoharenæ tahiya maisa Enore maoseraita. Hatyo hiyeta wima-mairanehare wisaonita hoka wikinatere wavyahita wenati waiyexe isa aokowihenere xahita. <sup>19</sup> Hatyo iraiti xema wisaonita hoka waiye wimehexaikohare wisaonita. Kanowa olatyoare haxemamakisala hiye waiye mehexaikohare tyaonitere akereta wisaonita. Hiyaiya, hatyo wavyahitere atyo waiye kinatere, exahe isoa Enore hanako enokoare nali hoka imiti taose solooitere xaihako jiya hoka xaneta Waiyexe aose nali. <sup>20</sup> Hiyaiya, hatyo nali atyo Jesus xane isoa, wahitita, waiye wisaona maheta. Hoka kalorexe Sacerdote tyaota mene maheta Melquisedeque akereta.

## 7

*Melquisedeque Atyo Sacerdote Exahe Xekohaseti*

<sup>1</sup> Melquisedeque xekohaseti ene tyaonita wenakalati Salém nali. Enore ana hakita, sacerdote tyaonita hoka. Hatyo xowaka Abraão xekohasetinae kakoa haxaisakakoane hekota haikoahitita hoka Melquisedeque ahalakoatene hoka waiyexe wenati aoka enomana. <sup>2</sup> Hatyaoseta Abraão isa enomana hahalakoaharenæ xiye-hare hakolala hiyeta holini, dízimo aokahitere. Melquisedeque nexare atyo “Xekohaseti waiyexe”, Salém nali xekohaseti tyaonita hoka hatyo hiyeta nikare nexarexe. Enexare tehitiya, “Mehexaikohaliti xekohasehare”, nita tehitiya. <sup>3</sup> Maisa xoare kasemakita enexe, inityo, enahetakomaniyereharenæ tahi. Maisa enawenane, ekamane tahi hekoti kasemakita. Melquisedeque atyo Enore Ityani akereta sacerdote tyaoneta mene matyotenehare.

<sup>4</sup> Waiye xasema: Melquisedeque atyo kalorexe kaiserehare. Wikinohare Abraão xahehare atyo hoka Abraão isa enomana holini, dízimo aokahitere, hahalakoaharenæ xiye-hare kolahenere hiyeta.

<sup>5</sup> Moisés xaotyakira xema Levi hotyaliharenæ sacerdotenæ tyaonita hoka ihinae-harenæ isaha holini dízimo aokahitere haxyehare hiyeta enomanaha aokahitaha. Ihinaeharenæ kaiserehare xakore hoka isaha aokahitaha, Abraão jikolahare makereha xakore hoka.

<sup>6</sup> Hoka Melquisedeque atyo maisa Levi hotyalihare xini. Xakore hoka Abraão isa enomana holini xiye-haliti hahalakoaharenæ xiye-hare kolahenere hiyeta hoka Abraão ana wenati waiyexe aoka. Há, waiyexe wenati aoka enomana. Hatyo nahitita Abraão koxaka Enore isa enomana aokowihenere tahi sema.

<sup>7</sup> Hiyaiya, hatya haliti wenati waiyexe aowita hatya ana hoka hatyo atyo exahehare. <sup>8</sup> Hoka kalikini dízimo resebetiterenæ atyo ite waini tyota. Hoka Abraão tyaonitere xowaka dízimo resebeheneræ atyo hekota kaseta.

<sup>9</sup> Exakereyala nirae hoka ehekore: Abraão, Melquisedeque ana holini dízimo aokakahitere isehenere xowaka Levi tehitiya isa Melquisedeque ana, Abraão jikolahare tyare atyo hoka. Hoka kalikini Levi jikolaharenæ ana atyo dízimo aokahitere kaxekakita.

<sup>10</sup> Hatyo xowaka Levi maisa tyaohenere, hahetakomaniyere Abraão háre hiyetata, Melquisedeque ahalakoahenere xowaka.

<sup>11</sup> Xaotyakisatyahø kaotyakehenere Israel yerenæ ana xowaka Levi jikolaharenæ sacerdote tyaonita, Arão jikolaharenaetare. Xakore hoka ehateneha maisa ehekoreta

kaisere. Ehatenehaiya waiye tyaonare hoka maisaiya xoare maheta hatya Melquisedeque akerehare sacerdote kaxomokakita. Maisa Levi jiyete Arão akerehare xini. <sup>12</sup> Hoka hahekorexe atyo sacerdote tyaohena hoka xaotyakiyaho tehitiya atyo hahekorexe tyaonita.

<sup>13</sup> Wiyekohase Jesus xaokaka nikare kairaetyakita, Judá hotyalihare atyo. Hoka maisa atyo xoana xowaka Judá hotyalihare hatya hekoti kirakahare keratyakaose nali hakita. <sup>14</sup> Aliterexe atyo Jesus Judá hotyalihare. Hoka Moisés aotyakijitere xowaka maisa Judá hotyalihare nawenane sacerdote tahi iraeta hekoti.

#### *Hatyा Sacerdote Melquisedeque Akerehare*

<sup>15</sup> Tyotya hatyoharenae waiyekahalaka tyaona. Hatya sacerdote hawareharex kaotyaka Melquisedeque akerehare. <sup>16</sup> Maisa atyo halitinae xahekola xema xini sacerdote tyaona. Tyaona wenati matyotenehare niyatere hiyeta atyo sacerdote tyaona.

<sup>17</sup> Hiyaiya, exakere Iraiti Waiyexe nanekoa nexa:

Sacerdote ite hisaota mene matyotenehare Melquisedeque tyaonitere akereta.

<sup>18</sup> Hiyeta hoka toahiyere wenatyaaho kahalakisaka. Maisa kinaterexe, komita maisa xoare tyomare hoka. <sup>19</sup> Moisés xaotyakiraho atyo maisa xoare waiyexe maniya mokita. Hoka kalikini atyo Jesus kaotyaka hoka exema wisaona hoka wiyanne wikaoka Enore nali.

<sup>20</sup> Exe tehitiya: Enore haexare kaexarehenere tahi. Haiyaharenae atyo sacerdote tyaotaha, maisa xakore atyo Enore nikare iraexe hoka.

<sup>21</sup> Hoka Jesus atyo sacerdote tyaona Enore exakere iraehenere xowaka:

Natyo atyo Enore niraeta, maisaiya nemaisaita niraini. Sacerdote ite hisaota mene matyotenehare.

<sup>22</sup> Hiyeta atyo hoka Jesus masakare waiye. Hatyo hiyeta atyo waitare wenatyaaho waiye toahiyere nonitata.

<sup>23</sup> Exe tehitiya: toahiyere harenae atyo kahare sacerdote tyaonahitaha wainahitere hiyeta. <sup>24</sup> Hoka Jesus atyo menanehaliti hoka hatyo hiyeta sacerdote tyaoneta menite hoka maisaiya xalahare ewenekoare sacerdote tyaonita. <sup>25</sup> Hiyeta hoka hatyoiya atyo, exahe haxowaka hoka waiye maniya moheta Enore nali xaneterenae ihiyeta. Hiyaiya, Jesus tyaota minita, irae maheta etahiha Enore hiye.

<sup>26</sup> Jesus atyo kalorexe sacerdote hoka hatyo hiyeta waokitene womana. Jesus atyo waiye, maisa xoare hare iniyalahare tyomare, iniyalahare nomaseharenae nonitata haware kaxomokaka. Hatyaoseta kakolatyaka enokoa xaihako hoka kalorexe tyaona maheta.

<sup>27</sup> Maisa hatyo haiyarenae kalorexe sacerdotenae akereta xini, maisa atyo fetatyare kirakahare tyotyaki ferakene, hetati háomane iniyalahare hiyeta, jikiniti hoka haiyanae nómame iniyalahare hiyeta akereta xini. Hakirore atyo fetaty, tyotya xoalini harenae hiyeta, fetyoawihenere xowaka. <sup>28</sup> Moisés xaotyakiraho xema atyo iniyalahare nomaseharenae Sacerdote kalorexe tyaona. Hoka Enore iraehenere, haexare kaexarehenere hare, Moisés xaotyakira kasemakehenere najikinita hiyeta atyo Ityani sacerdote kalorexe tyaona. Waiye matyotenehare tyaonita.

#### *Jesus Atyo Kalorexe Sacerdote Tyaonita Womana*

<sup>1</sup> Waiyexe tahi wiraetere atyo Wiyekohase sacerdote tyaonitere akiti. Kalorexe Sacerdote enokoa tyaonita, tyokita Enore kinaterexe nokahakala fihini maniya. <sup>2</sup> Hakita Enore hanako, imiti taose sololoitere xaihako maniya. Enore nómame taita atyo hatyo hati, maisa atyo halitinae nómame xini.

<sup>3</sup> Kalorexe Sacerdotenae hatene atyo exakere: kalanero harenae fetatita Enore ana. Hiyeta hoka Wiyekohase tehitiyaiya maisa xoalini hare mafetalita Enore ana. <sup>4</sup> Ali waikohekoaiya tyaonita hoka maisaiya sacerdote tyaonita. Hiyaiya, Levi hotyali atyo ali waikoheko sacerdotenae tyaonita hoka fetatita Enore ana. Judeunae xaotyakiraho xema atyo tyaonahitaha hoka nikare tyaonahitaha. <sup>5</sup> Exe sacerdotenae tyaonitere ali

waikohekoa atyo enokoare hateniti aimenekoita taita. Hatyo tahi Enore irae Moisés hiye hatirise tyoma aokowihenere xowaka:

Maika hirihare nahotikihenere homana tyairiheno akereta hisoma hatirise, nexa Enore Moisés hiye.

<sup>6</sup> Aliterexe atyo Jesus hatene masakare waiye kaiserehare haiyanae sacerdotenae hatene nonitata. Masakare tehitiya atyo waiye wenati waitare halakihenere hakax-aikone hotyali ana. Hiayiya, waitare iraiti atyo masakare waiye toahiyere nonitata. <sup>7</sup> Hetatiye wenatyahoia waiyexe kaiserehare hoka maisaiya xoare maheta iraiti waitare kaotyakita. <sup>8</sup> Waiya xakore Enore hakaxaikone hotyali hoka iniyalahare tyomahita hoka hatyaoseta nexa:

“Enaose ferakenehena ite hoka niraihitiya waitare wenatyaho tahi Israel jikolaharenæ hiye, Judá jikolaharenæ hiye hoka”, nexa Xekohaseti.

<sup>9</sup> “Maisaiya atyo enahetakomaniyerenaeha kakoa wenati tahi niraetere akerehitita. Exowaka ekaheha hiye notokahene hoka Egito nalita niyehetehenahene. Hatyo xowaka maisa niraini xema tyaonahitaha hoka maisa waiyetaha nomani”, nexa Xekohaseti.

<sup>10</sup> “Niraehitiyere waitare wenati tahi Israel hotyali anere ite exakerexe: Noxaotyakiri ite ekaiyeheha ako namoka. Exairatyakahare akere ite emahiyaseha hiye namokene hoka enEnorexaha ite notaona. Hatyoha ite hoka nokaxaikoni hotyali tyaona”, nexa Xekohaseti.

<sup>11</sup> “Hatyo xowaka ite maisa xoare maheta hahinaehare aotyakihitita. Maisaiya, ‘Xekohaseti koamaniya hisaohena’, nita hekoti hahinaehare hiye. Hatyo xowaka atyo ite tyotyaha tyaohenaha nokoamaniye, wakahare, xekohasetinae xoaha.

<sup>12</sup> Iniyalahare enómaneha ite nomaotyaniheta, maisaiya notehitita iniyalahare enómaneha”.

<sup>13</sup> Waitare wenati tahi Enore iraehena hoka toahiyere wenatyaho atyo kirahareheta. Kahalakisaka hoka tyotya. Kirahare, maisa atyo xoare niyahareheta hoka kahalakisaka hoka hixeroreta ite mawenekoare.

## 9

### *Enore Xawaiyetyaka Aliterexe*

<sup>1</sup> Hetatiye iraiti atyo awaiyekehala katya Enore koamaniya nawenatyaka, exahe Iraexatyakalati Hana halitinae nómane harenæ tahi. <sup>2</sup> Hatyo hati hinama talalyako. Hatikanase kakoare ako xaokanatyakalati kase tyaonita. Nali nakairati Enore anere tyaonita mexakoa. Hatyolyako atyo “waiyexe aose” aokahitere.

<sup>3</sup> Hoka imiti taose kakoa talatyakere maniyako atyo Enore kaiserehare. <sup>4</sup> Hatyo hamaniyako atyo incenso keratyakaose. Nali tehitiya kajali ouro kakoa komatyakere tyaonita. Hatyo kajalyako tehitiya tinihaliti nakairati maná kakoare tyaonita. Arão natyakasera tehitiya tyaonita enako, kahanahihetehenere. Hatyo kajalyako tehitiya hinama sehalli taose iraiti exairatyakahare kakoare tyaonita. <sup>5</sup> Hatyo kajali heno hinama anjonae xaimenekotyaka tyaonita. Enokoare waiyexe aimenekotyahitaha. Ekanoha omerekoare tyaonita iniyalahare kaxemaisatyakehititere nali. Xakore hoka maisaiya kalikini hatyohare tahi tyotya niraehitita.

<sup>6</sup> Nikare tyomaha hoka hatyaoseta xoalini hare Enore ana sacerdotenæ tyoma aokowihenaha hoka isoahitaha tyotyaki ferakene hatyo hatyako mokaha nakairati mexakoa maheta, kaxaikoha xaokanatyakalati harenæ maheta. Hatikanase maniya tyaonitere ako taita atyo isoahitaha. <sup>7</sup> Kalorexe Sacerdote taita atyo ijoita hatyo exaihako maniyere imititaose talarere ako. Terehokoakiti nihatyaka taita ijoita, hakirore, hawawa. Kolatya kirakahare timalaxa hoka fetatita Enore ana, iniyalahare háomane hiyeta, exahe haiyanae iniyalahare tyomitere hiyeta hoka fetatita kirakahare timalaxa Enore ana.

<sup>8</sup> Hatyoharenæ hiyeta Isekohaliti Waiyexe waiyekahala aotyakijita. Hekotata imiti taose sololoita hoka hinamalyako hati tyaonita hoka halitinaiya maisa aliyakere ijoita,

maisaiya isoahita Enore anere kaiserehare ako. <sup>9</sup> Nikare tyomaha hoka aimenekoitaha kalikiniye wenati. Hatyo xowaka erati, nakairati, kirakahare harenae fetatyahitaha Enore ana. Xakore hoka maisa atyo hatyohare waiye maniya kaiserehare mohetere halitinae xahekola. <sup>10</sup> Nakairati, erati, xoalini hare fetatyahitaha. Xakore hoka maisa xoare tyomare. Henekoa maniya taita tihehenahitaha halitinae waitare wenati kaotyakene kijiya.

<sup>11</sup> Hatyaoseta Cristo tya tyota xoalini hare waiyexe koxaka ali tyaonitere kaxaiko maheta hoka isoa Enore hanako kaiserehare enokoa nali. Maisa atyo halitinae nōmane xini, maisa atyo ali waikohekoare xini. <sup>12</sup> Hakirore atyo Enore anere kaiserehare ako isoa. Xakore hoka maisa atyo kolaita kirakahare timalaxa. Hatimalaxa atyo kolatya hoka fetatyahitaha Enore ana. Hatyo hiyeta wenati waiyexe matyotenehare maniya moheta wiso.

<sup>13</sup> Kabala, bowi harenae timalaxa fetatyahitaha Enore ana, exahe ohirolí bowi aisaha hoka kerahaotyahene hoka enete keratyaka mehene kakoa herahera konisahita halitinae hoka henekoa maniya aiyomahitita. Nikare tyomahitaha hoka iniyalahare nomaseharenae henekoa maniya aiyomahenahitiya. <sup>14</sup> Hoka Cristo timalaxa atyo iyateliti kakoare hoka exahehare tihihitita halitinae xahekola harenae. Isekohaliti makamanehare hiyeta fetatyoawi Enore ana hoka fetatyahitite xahe nawaiye atyo. Itimalaxa waiyexe maniya wityakoiyahare moheta. Hatirise hakitere ako atyo masakare waiye. Wománe iniyalahare wahalakisa hoka Enore makamanehare koamaniya wisaona maheta. <sup>15</sup> Hiyeta hoka Cristo atyo wenati waitare kaxaikotyasehare tyaona. Hoka Enore haomana aohenerenae ana wenati waiyexe matyotenehare isa aokowitere isa maheta. Nikare atyoite kaomaka. Hiyaiya, wainihenere hiyeta atyo waiye maniya moheta halitinae, wenati hetatiye xema tyaonahitite xowaka iniyalahare tyomahitite nonitata.

<sup>16</sup> Alyako xamani atyo haliti hatya hairaene halakiyatya hakamane nahitita, haxiye-hare harenae tahi hoka, ekamane najikinita aokitere akereta ixiyehare kaxomokakita.

<sup>17</sup> Kasetatere xowakaiya atyo maisa kaxirakakita hatya haliti xiye. Waini hotohareya atyo hoka aokitere akereta kaxomokaka ixiyeharenae.

<sup>18</sup> Hiyeta atyo hoka hetatiye wenatyaho kirakahare timalaxa kakoa hotohare halitinae kaheraherakonisakita hoka kinatere wenati tyaonita. <sup>19</sup> Moisés hotohare aotyakisa halitinae iraiti kaxairatyakenere akereta. Hatyaoseta iya bowi, kabala mokosenae timalaxa harenae hoka kaketaxatene one kakoa hoka kalanero niyali xaxotyatyaka, exahe híssopo kano kakoa hoka heraherananya babera iraiti kakoare, exahe halitinae hoka heraherakonisa. <sup>20</sup> Hoka nexa: “Exe timalati atyo aiyatelikijita wenati aho xityakeko aohenere Enore”. <sup>21</sup> Nikare tehtiyya heraheratyahatirise hiye, exahe xiye haliti Enore anerenae hoka heraherakonisa. <sup>22</sup> Aliterexe atyo xaotyakiyahore xema tyaonahitaha hoka timalati kakoa taita kaxaiyomatyakihitita xoalini hare. Awaiya timalati hoka maisaiya iniyalahare kaxemaisatyakehetere.

### *Jesus Fetala Iniyalahare Emaisaheta*

<sup>23</sup> Exehare ali waikoa tyaonitereharenae atyo enokoa tyaonitereharenae aimenekoita taita, hoka kirakahare timalaxa kakoa waiyexe maniya kaxomokakihitita. Hoka enokoa tyaonitere harenae atyo masakare waiyexe aokita haomana, waiye maniya kaxomokake-heta maheta. <sup>24</sup> Hiyaiya, Cristo atyo maisa ijoita Enore hana, halitinae nōmane ako. Hatyo atyo aemenekoita taita ehana kaiserehare enokoare. Enokoa atyo xane isoa Enore ana hoka kalikini kahinaetita wiso.

<sup>25</sup> Ali waikohekoatya atyo kalorexe sacerdotenae judeu terehokoakiti nihatyaka ijoita Enore hanako kirakahare timalaxa kakoa imiti taose talarere ako. Hoka Cristo atyo hakirore isoa hoka fetatyoawi, maisa kahaliki xini.

<sup>26</sup> Nikarexeya hoka kahalikiya waini waikohe kaomakehenere xowakatita. Hoka kalikini atyo kaotyaka hakirore, imiyanaose ferakene hikoahena hoka waini. Fetatyoawi iniyalahare emaisaheta maheta. <sup>27</sup> Hiyaiya, hakirore atyo haliti wainitaha. Hatyo najikinita atyo Enore axalijita haliti. <sup>28</sup> Nikare Cristo hakirore fetatyoawi emaisatya

tyotya halitinae nómame iniyalahare maheta. Hatyo najikinita ite ehinamakini hiye tyohetehitiya hoka maisa atyo iniyalahare emaisaheta maheta xini. Atyahiterenena atyo waiyexe maniya moheta maheta.

## 10

<sup>1</sup> Judeunae Xaotyakiraho atyo maisa enokoa xoalini hare waiyexe tyaonitere akereta kaisere xini. Hatyoharenanae atyo waiyexe kaotyakene taita aimenekoita. Hiyaiya, terehokoakiti nihatyaka fetatyahiterekahera fetatyahita. Hoka aliyakereya xaotyakiyaho hatyohare fetatyahitere hiyeta Enore nali xane aokowiterenae waiye maniya mohetehena? <sup>2</sup> Enore koamaniya tyaoniterenae nómame iniyalahareya hatyoharenanae emaisahitita hoka maisaiya otyare háomaneha iniyalahare. Hatyo najikinita maisaiya xoare maheta aisaha kirakahare hoka fetahenahitita. <sup>3</sup> Maisa iniyalahare enómaneha emaisahetere, exahe hoka heko otyahitita iniyalahare háomaneha hoka hatyo hiyeta aisaha kirakahare hoka fetatyahitita terehokoakiti nihatyaka. <sup>4</sup> Hiyaiya, bowi, kabala harenanae timalaxaiya maisa xoana hekota xala hare nómame iniyalahare emaisahitita.

<sup>5</sup> Hiyeta hoka Cristo kaotyakehenere halitinae koni xowaka nexa Enore hiye: Maisa atyo kirakahare timalaxa fetatyaka haokare hoka hisoma noháre nomani.

<sup>6</sup> Kirakahare xaisaka, fetatyaka, ekeratyakahare harenanae hoka maisa hawaiyetyare iniyalahare kaxemaisatyakeheta maheta.

<sup>7</sup> Hiyeta hoka nomi: “Ali natyo, Xekohaseti. Notyoa notyoma haokitere akere maheta, notahi kaxairatyakehenere xaotyakisatyati nanekoa akereta maheta”.

<sup>8</sup> Hetati nexa: “Kirakahare xaisaka fetatyaka, keratyaka harenanae maisa haokare iniyalahare kaxemaisatyakeheta maheta”. Nikare irae xaotyakisatyaho aokitere akereta xakore kafetatyakita xoalini hare hoka.

<sup>9</sup> Hatyaoseta nehitia: “Ali natyo, Enore, notyoa notyoma haokitere akereta maheta”. Nikare Enore miyatya toahiyere kirakaharenanae fetatyaka hoka Cristo ewenekoareha moka kafetatyaka maheta. <sup>10</sup> Enore aokitere akereta Jesus Cristo tyoma hoka hatyo hiyeta waiyexe maniya wikaxomokakita iniyalahare nonitata. Hakirore wainihenere kafetatyakehenere tyotya halitinae ana hiyeta.

### *Waiyexe Maniya Nawenatyakeheta*

*(Hebreus 7.25-27; 1 Pedro 1.18-21; 1 João 1.8-9; 2.1-2; 5.12)*

<sup>11</sup> Tyotya sacerdote judeu hahatene tyomita Enore ana, fetaita kirakahare xaisaka ferakiti nihatyaka. Hatyohareta fetaita tyotyaki ferakene, xakore hoka maisa xala hare nómame iniyalahare emaisahetere. <sup>12</sup> Hoka Jesus Cristo atyo hakirore fetatyoawi. Hatyo matyotenehare niyahare. Hoka hatyo najikinita xane tyoka Enore fihini maniya. <sup>13</sup> Nali atyahita hahalakoaharenanae xomokaka hakiji katyahe. <sup>14</sup> Nikare hakirore fetatyoawi hoka ekoamaniya tyaoniterenae waiye maniya taita tyaona maheta matyotenehare.

<sup>15</sup> Isekohaliti Waiyexe tehitia hatyo hare tahi aotyakijita wiso. Exakere hotohare nexa:

<sup>16</sup> “Haxowaka ite niraihitiya ekakoaha tyaonaha maheta hatyo xema”, nexa Xekohaseti. “Noxaotyakiri ite namoka emahiyaseha hiye, exahe ekaiyeheha ako hoka exairatyakahare akereta namoka”, nexa.

<sup>17</sup> Hatyaoseta nehitia: “Hatyohekota ite maisa notehitita iniyalahare enómaneha, exahekolahaharenanae”.

<sup>18</sup> Nikare atyo ite iniyalahare kaxemaisatyakehetehena hoka maisaiya xoare maheta xoalini hare kafetatyakihitita.

### *Enore Haliya Kaokatyaka*

<sup>19</sup> Nohinaeharenanae, Jesus wainihenere hiyeta ite wikaokehena rotita Enore anere kaiserehare ako. <sup>20</sup> Imiti taose sololoitere hiyeta atyo wikaoka Enore ana. Hatyo atyo aimenekoita Cristo háre. Hatyo atyo waitare wenati matyotenehare maniya moheta wiso. <sup>21</sup> Kalorexe Sacerdote kakoare atyo wiso, kaxaiko Enore hana maheta.

<sup>22</sup> Hatyo hiyeta maika wiyanne wikaoka Enore haliya. Aliterexe heko wityakekone, exahe wiyahekolanae iyomere iniyalahare nonitata, exahe wiháre itihakahare one iyomaxere kakoa hoka. <sup>23</sup> Maika heko kaisere wityakeko hoka maisa wahalakijita wityakekone. Hiyaiya, Enore isa aokowitereharenae ite isa womana, maisa atyo maoseratyaliye xini.

<sup>24</sup> Nika wakahinaetyakakoa hoka wiyawaiyetyakakoane kekoare, exahe xoalini hare waiyexe wománe hoka. <sup>25</sup> Awa atyo wahalakisa wiyahohisakoatyoane haiyanae tyaconitere akereta. Maika wakahinaetyakakoa, waihalahalinisakakoa kaisere. Xiyaiya, kalikini okoi Xekohaseti haikoahenaosehetehena.

<sup>26</sup> Hiyaiya, hekoiya iniyalahare wisoma waokowita Iraiti Waiyexe xema wisahenere najikinita hoka maisaiya xoare hare kafetatyaka hoka iniyalahare wománe emaisahitita.

<sup>27</sup> Wimairehena taitaiya kaheneharexe kaotyakehenere. Hiyaiya, Enore nahalakoahare tyaconiterenae ite irikati watere konite kaxawatyaka hoka kamawenekoaretyakaha.

<sup>28</sup> Xala xamaniya maisa tyakekore Moisés xaotyakiraho hoka hinama, hanamaiya irae etahi hoka kaxaisaka. Maisaiya xalahare airakoaneharetitene. <sup>29</sup> Hoka xoana ite tyaoherena Enore Ityani maxaiminirehenerenae, exahe timalati kakoa tihehenahitene hoka wenati waitare Enore isehenere maxaiminirehenerenae? Xoare ite tyaoherena Enore Nisekohare awaiyetene hoka maxaiminiriterenae ana? Iniyalahare ite kaxomokaka, maisa ite waiye xini. <sup>30</sup> Hiyaiya, koxaka Enore exakere iraehenere kakoa wawaiyoreta: “Nakatolikoaretyoite. Tyomahitere akeretaite namokahene”, nexa Xekohaseti. Exahe hoka nehitia: “Exahe ite nokaxaikoniharenae iniyalahare tyomehenaha hoka hatyo nahalakoa iniyalahare namokahene”, nexa Enore.

<sup>31</sup> Kaxiyani, Enore makamanehare eharehena hoka kahenehare kaiserehareya.

*Maika Xaiyateretyoa Xawenane Kakoa  
(Gálatas 6.9-10; Hebreus 4.11)*

<sup>32</sup> Xotyaxematy toahiya tyaoherena. Xasema waiyexe iraiti hoka Xekohaseti koamaniya waiye xisaona hoka xahalakoaharenae maisa waiye mokita xiso. Xakore hoka heko xikinatere xisaona ekoamaniya. <sup>33</sup> Xikairawayaka, xikairahetehetyaka harenae halitinae haotita xakore hoka heko xikinatere xisaona ekoamaniya. Haiyaharenae tehitia iniyalahare mokahitaha, iniyalahare mokahitere xiso akereta hoka hatyo iniyalahare kaxomokakiterenae hinaehare atyo xisaonita. <sup>34</sup> Haiyaharenae berexo ako tyaconiterenae hoka xakahinaetita, xairakoaneharetahitene hoka. Xahalakoaharenae iyaharetahitaha xiso, xakore hoka maisa atyo xamaikoharexe. Enoka nali kahare waiyexe xixiyehare matyotenehare tahi waiyekahalakita xomana hoka hatyo hiyeta maisa xamaikoharexe.

<sup>35</sup> Hiyeta hoka awa xityakekone xahalakisa. Hekoiya xityakeko hoka kalore xoalini hare waiyexe kaxekaka xomana. <sup>36</sup> Maika ximamaxaharenahare xisaona hoka Enore aokitere akereta xisoma hoka hatyo najikinitaite isa aokowiterehare isa xomana.

*Cristo Haikoahaneheta  
(Atos 1.11; 1 Tessalonicenses 4.13-18; Apocalipse 1.7)*

<sup>37</sup> Hiyaiya, exakere Iraiti Waiyexe nanekoa nexa:  
Okiohetehena, initehena kaiserehare hoka tyoheta aokowitere tyohetehena. Tyohetaite.

Maisa ite wahita hoka haikoahetehena.

<sup>38</sup> Haliti waiyexe atyo ite tyota mene hatyakekone hiyeta, hoka xala xamani atyo ite matyakekoneheta hoka maisa ite nihalahareta ekakoa.

<sup>39</sup> Hoka wiso atyo maisa hatyakekone halakijiterehare hotyalinae hoka iniyalahare kaxomokakiterahare hotyali xini. Wiso atyo tyakekohatiye hotyali. Hatyo hiyeta ite waiyexe maniya wisekohare kaxomokaka.

<sup>1</sup> Wityakekone hiyeta wexa: “Watyahitereharenae ite kaxekaka womana”. Exahe tehi-tya hoka wityakekone hiyeta waiyekehala kita womana xoalini hare wimawaiyanehare tyonitereharenae.

<sup>2</sup> Toahiyereharenae tyakekone hiyeta Enore tehitia tyakekoahene. <sup>3</sup> Wityakekone hiyeta waiyekehala kita womana Enore niraene hiyeta enokoa, waikohe kaomakehenere. Exahe tyotya xoalini harenae kawaiyakiteraharenae atyo mawaiyakitera nomanenae.

<sup>4</sup> Tyakekoti hiyeta Abel aisa kirakahare hoka fetatya Enore ana hoka Caim fetahenere xahehare nawaiye. Ityakekone hiyeta Enore awaiyetene hoka waiyexe haliti aokene. Enore terota atyo awaiyitya efetala hoka. Tyakekoti hiyeta ekamane najikinita hekota iniraene kasemakita.

<sup>5</sup> Tyakekoti hiyeta tehitia Enoque maisa wainita. Kaseta kakolatyaka enokoa xeta. Hatyo najikinita maisa kawaiyakihitita, Enore atyo kolatene hoka. Kakolatyakehenere nahitita Enore ihalahareta ekakoa, Iraiti Waiyexe nanekoa irahenere akereta.

<sup>6</sup> Maisaiya hatya tyakekore hoka maisaiya atyo aliyakere Enore ihalahareta ekakoa. Hiayiya, xala xamaniya atyo Enore nali xane aokowita hoka, “Aliterexe Enore tyakonita, exahe tyakekohenerenae kahinaetyasehare”, nita. Maisaiya hoka maisa aliyakere xaneta.

<sup>7</sup> Tyakekoti hiyeta Noé sema Enore niraene xoalini hare kaotyakene nahitita. Exowaka hatyoharenae mawaiyakahare tyakonita. Noé tyakeko Enore hoka kanowa kalorexe tyoma hoka maisa wainahitaha hoka Enore haliti waiyexe aokene ityakekone hiyeta. Hoka matyakekoneharenae atyo waini hamatyakekoneneha hiyeta.

<sup>8</sup> Tyakekoti hiyeta Abraão Enore niraene tyakeko irahenere ihiye xowaka hoka xane Enore ewaikohera aohenere nali xeta. Halakisa hawaikohera hoka xane. Hatyo xowaka maisa waiyorexe haxanene kakoa. <sup>9</sup> Hatyakekone hiyeta xane kaoka Enore aokitere nali. Xane kaoka hoka bojirise nomaka katyahe tyaona haiyanae waikoherakoa Isaque, Jacó harenae kakoa. Hatyonae ana tehitia Enore isa aokowi. <sup>10</sup> Kasani Abraão wenakalati kinaterexe Enore nomanne nali kaoka aokowita. Hatyo wenakalati atyo kinatere hoka maisaiya kamawenekoaretyakita.

<sup>11</sup> Tyakekoti hiyeta Abraão kaisaniheta, inityohalitihena kaiserehare xakore hoka. Exahe exanityo Sara tehitia xakore koxaka inityohaloti, maisanityakohalo xakore hoka Enore iyatoloti isa enomana hoka kaisaniheta, Enore niraene tyakekohenerenae hiyeta. <sup>12</sup> Hiyeta hoka hatya okoi wainihenere hiyeta kahare ijikolaharenae tyaona, xorese hisoakene, waikohese one kilihi tyonitere hisoakene akere.

<sup>13</sup> Hatyonae tyotya wainiha hatyakekoneha kakoita. Xakore hoka maisa atyo kax-ekakita enomanaha enomanereha kaxaokakehenere. Sekota atyo hatyoharenae waiyaha hoka ihalahareha ekakoa hoka mawaiyakahare hotyali, tonehekoaitatereharenae atyo aokowiha exe waikohekao. <sup>14</sup> Nikare atyo haiyanae iraehena hoka tawahitaha hawenakala tyaonaha maheta nali. <sup>15</sup> Maisa haikoahenahitaha hawaikoheraha halakihenere nali xeta aokowitaha. Haikoahetaiya aokowiha hoka haikoahenahitahaiya. <sup>16</sup> Kasani waiyexe waikohe enokoa nali kaokaha aokowitaha hoka nali tyaonaha maheta. Hatyo hiyeta Enore maisa haiharexahene enEnorexaha aokowitere kakoa. Hatyota koxaka memyatia wenakalati enomanaha enawenakalaha maheta.

<sup>17</sup> Tyakekoti hiyeta Abraão, Enore hasakaharetene hoka haisani Isaque aisa hoka fetatya aokowi. Hatyo nahitita Enore ijikolaharenae hisoakene aoka xakore hoka memere tyaonita haisani haterore aisa hoka fetatya maheta. <sup>18</sup> Hiayiya, Enore koxaka enahitita nexa: “Isaque hiyeta ite kahare hijikolahare tyaona”. <sup>19</sup> Exahiya Abraão aisa Isaque hoka Enore xekasekirihetene waiyekehala kita enomana. Nerekatiya atyo: Abraão ana ityani Isaque kaseheta.

<sup>20</sup> Tyakekoti hiyeta Isaque wenati waiyexe aoka haisaninae Jacó, Esaú xoaha ana enahetaha maniya.

<sup>21</sup> Tyakekoti hiyeta Jacó hakamane nahitita waiyexe wenati aoka José ityaninae ana. Hatyakasera hiye tokoa hoka aiyateretyoa hoka Enore kakoa ihalahare.

<sup>22</sup> Tyakekoti hiyeta José okoi wainihena hoka Israel hotyalinae kikisoaneheteta Egitota tahi irae, exahe hoka irae haháre tahi, ekamane najikinita kakolatyakeheta maheta ewaikohera xeta.

<sup>23</sup> Tyakekoti hiyeta Moisés nexe, nityo xoaha ateroakisa haisani hanamalihena kaimare enawenane najikinita. Waiye mokose waiyahene hoka hatyo hiyeta maisa mairahitaha kalorexe niraene hoka ateroakisahene.

<sup>24</sup> Tyakekoti hiyeta Moisés, inityohalitihena hoka maisa Faraó ityani ityani kaxaokakita. <sup>25</sup> Kasani Enore kaxaikonehare hotyalinae kakoa haxawalita makawati aokowi hoka maisa hatyo iniyalahare kaxawaiiytyakitere xema tyaona aokowita. Hatyoharenæ haxerore tyotita. <sup>26</sup> Maisa Egito nali xiyealiti kahare tyaonitere kakoa tyaona aokowita hoka Enore Kalorexe Aohenere xema tyaona, iniyalahare xakore kaxomokaka, hoka enajikini maniya waiyexe xoalini hare kaxekaka enomana maheta. <sup>27</sup> Tyakekoti hiyeta Moisés Egito nalita kikisoaheta, maisa mairita kalorexe Faraó xeharene. Hoka heko kinatere tyaona Enore koamaniya. Motya waiyita ene Enore mawaiyakitere.

<sup>28</sup> Hatyakekone hiyeta hetatiye Páscoa tyoma hoka Israel hotyalinae wakatya hoka timalati kakoa hahaha kanase xolotyaha hoka maisa anjo haliti xaisasehare ityaninaeha hetatiye aijita maheta.

<sup>29</sup> Hatyakekone hiyeta Israel hotyalinae imahotyoa one kaloxere Xotyaxere waikohe iyokoare akere. Hoka Egito yerenae tehitia imahotyoa aokowihenaha xakore hoka one kaokakakoaheta hoka monaha hoka wainiha.

<sup>30</sup> Tyakekoti hiyeta Jericó talahokola exoa, Israel hotyalinai 7-ki ferakene tonahoko-henaherene najikinita.

<sup>31</sup> Hatyakekone hiyeta enatyalolo Raabe maisa wainita Enore matyakekohenerenae kakoa, waiye mohenere wenakalati waiyase Israel yerenai hiyeta.

<sup>32</sup> Xoare nomi hitiyaite? Noxakaiya Gideão, Baraque, Sansão, Jefté, Davi, Samuel, iraiti xakaisaseharenæ tahi hoka wahaiya. <sup>33</sup> Hatyakekone hiyeta aiyateretyoaha kahare haliti hotyalinae xahita hoka jiyahaotyahene. Waiyexe taita tyomaha hoka Enore isa aokowihenere isa enomanaha. Leäonae kanase jihotyaha. <sup>34</sup> Irikati kahenehare takoitere ewakatya. Kaxaisakehenaha xakore kesekase kakoa hoka maisa kaxaisakahitaha. Maisa xakore kinaterexeha hoka kinatere tyaonaha. Xaisakakoati heko kinatere tyaonaha hoka hahotyaliharenæ sorarexanae jiyahaotyaha. <sup>35</sup> Tyakekoti hiyeta ohironae ana kamatinæ kaseheta.

Haiyanæ iniyalahare kaxomokakaha wainihenahere kijiya. Aiyateretyoaha hawenaneha koamaniya kakoa, maisaya halakisahitaha hatyakekone. Kasani kasehete-henaha hoka wenati waiyexe kaokaha aokowitaha hoka. <sup>36</sup> Haiya harenæ kakoexahalisaka, kamokonasetyaka hare. Haiyanæ kaxolatyaka hoka berexo ako kaxomokakaha.

<sup>37</sup> Haiyaharenæ sehalí kakoa kamokotyakahitaha hoka kaxaisakita. Haiya harenæ hoka xirikotyakalati kakoa kaxirikotyakita. Haiya harenæ tehitia hoka kesekase kakoa katonotyakahitaha. Haiya harenæ iniyalahare kaxomokakaha. Maisa waiye mokahitene, mokohekoatyahitene hare hoka tekoaha. Maoloxahareha, maimahiro, nakahitaha hoka tyaonehekoatyahitata. Inimaha kalanero mili, kabala mili xoaha. <sup>38</sup> Maharexakahare tonakoatyaha tyairi koni, sehalí kakoakotyakako tyaonahitaha hare. Matyakekoneharenæ atyo maisa ehakakoanehare xini.

<sup>39</sup> Ityakekoneha hiyeta tyotya Enore awaiyetyahene. Xakore hoka Enore isa aokowihenereharenæ maisa kaxekakita enomanaha. <sup>40</sup> Enore atyo exáhehare nawaiyexe ahekotya witahi hoka kasani hatyoaha, wiso xoaha, hahotyalita waiye maniya wisaoheta aokita hoka.

<sup>1</sup> Hiyaiya, kahare haliti hatyakekoneha hiyeta waiye maniya kaxomokakeheta hoka wahakotita womana wihokohaliya. Hatyo hiyeta nika hoka tyotya xoalini hare ahowitihalikijitere wiso wahalakisa, exahe iniyalahare kinatere tyaonita wiyahita hoka wahalakisa hoka wimamairanehare watema hoka wahikoa waheta tyaonitere ana.

<sup>2</sup> Nika heko Jesus ana wawahakotya taita. Ihiyeta atyo wityakekone tyaonita, hetatita imiyanaose kijiya. Hiyaiya, maisa atyo atyalihose xaimaholatyaka hiye kaberekotyakehenere nonitata tekoita. Ihalahaliti haomanere tahi sema haheta maniya hoka hatyo hiyeta, kalore kahiharetyakere kaxomokaka atyalihose xaimaholatyaka hiye xakore hoka, heko tyaona Enore koamaniya hakamane kijiya. Hoka kalikini Enore fihini maniya tyokita.

<sup>3</sup> Jesus makawatiharene tahi xahekohena. Iniyalahare nomaseharenae kaeharetyaka waiyene xakore hoka heko kinatere tyaonehenere tahi. Nikare awa atyo xamaikohare hoka xahalakisa ekoamaniya xawenane. <sup>4</sup> Alitere xakore atyo koxaka xaiyateretyoa iniyalahare xahita hoka maisa atyo xikaxaisakita hatyohare hiyeta.

#### *Xekohaseti Aotyakijita Haisaninae*

<sup>5</sup> Xoana, koxakala ximaotyaneheta Enore mamairanehaliti tahi xiso haisaninae hiye iraehenere? Hiyaiya, exakere nexa:

Waiye hasemehena, haré, Xekohaseti iniyalahare mohena aotyakisa maheta hiso. Awa atyo hamaikoharehena, watyalihena hiso hoka.

<sup>6</sup> Hiyaiya, Xekohaseti atyo aotyakijita, watyalita xala xamani awaiyetita, exahe xala xamani haisani aokita hoka iniyalahare mokita aotyakisene maheta.

<sup>7</sup> Maika xexe iniyalahare mohena xiso, aotyakisa maheta xiso hoka xaiyasetyoitere akereta xaiyasetyoahena iniyalahare xiyomokaka kakoa. Hiyaiya, hatyo iniyalahare xikaxomokakitera hiyeta atyo hotikijita xomana, Enore haisani akereta mokiterehare xiso. Xalala maxaotyakisakahare tyaona hanexe hiyeta? <sup>8</sup> Maisaiya watyalita xiso haiyanae haisani akere hoka maisa atyo ityani kaiserehare xini xiso. Hatya ityani atyo xiso.

<sup>9</sup> Hiyaiya, wexe halitinae wiyoimene xowaka watyalihena wiso hoka waiminisahitene. Exahehare atyo ite wexe Enore waiminihena hoka waiye wisaohena. <sup>10</sup> Wexe halitinae watyalitaha wiso xakore hoka maisa waha xini, hatyoharenae motya ehekore aokahitaha hoka. Hoka Enore atyo watyalita wiso waiye wisaona maheta, exahe enawenane akereta iniyalahare maomaneharenae wisaona maheta. <sup>11</sup> Alitere wikawatyalisakehena hoka hatyo xowaka wamaikohareta, maisa wihalaharexe. Xakore hoka wahehena atyo hoka hatyo kawatyalisakiterenae waiye, exahe mehexaikohare tyaonita.

#### *Xairihalikisati Xaotyakisatinæ Xoaha*

<sup>12</sup> Hiyeta hoka xainakihena xikahe kirahareterenae, xaiyatelikhena xikaolise maiyaterreharenæ. <sup>13</sup> Ahoti hakakoahore xatohena hoka kijiti kawe mokoare maisa tonoli, tonoli nihitita hoka waiyeheta kaisere.

<sup>14</sup> Ximaxiholakakoanehare xisaona haiyanae kakoa. Xaiyateretyoa waiyexe maniya xawenane kakoa Enore aokitere akereta. Maisaiya nikare kawenatyakita hoka maisaiya Xekohaseti ana xala hare hikoita. <sup>15</sup> Maika xirihare xisaona hoka Enore waiye mokitere xiso maisa xala hare halakijita. Xirihalira, waiya aliya hoka hanakati tihero kekoare hoka kahare haliti hahowene kakoa komita aijitere akere xisaona.

<sup>16</sup> Awa atyo hatya nohiroxa hekoti xiwatyalihena, exahe Enore anere xiyehaliti hoka ximaxaiminira, Esaú akereta. Hiyaiya, nakairati hiyeta hetatiyesani nawenane betetya.

<sup>17</sup> Hatyo najikinita hanexe hiye wenati waiyexe aoka haomana haosexo kakoa xakore hoka maisa aliyakere moka xaka tyomehenere hiyeta. Hatyoharenæ waiyekehalakita xomana.

<sup>18</sup> Xiso atyo maisa xikaokita tyairi Sinai haliya Israel hotyalinae kaokitere akereta. Hatyonæ atyo kaokaha hoka waiyahitaha tyairi kiritere, makaliroti, kinatyawiniti.

<sup>19</sup> Exahe koneta nemahare, iraiti hare semahita. Iraiti semaha hoka kasani maisa iraehitiya aokareha. <sup>20</sup> “Exaheya kirakahare kaokahaliyatva exe tyairi hoka sehalí

kakoaiya kamokotyaka hoka waini”, nitere iraiti semaha hoka mairaha, mawaiyehareha kalore. <sup>21</sup> Waiyehenahere atyo kahenehare kaisere hoka Moisés nexa: “Nomairita, nomairani hiyeta natatakoita”.

*Wenakalati Waiyexe Waheta Maniya Tyaonitere*

(Hebreus 11:10; Apocalipse 7:15-17; 21:1-22:5)

<sup>22</sup> Hoka xiso atyo xikaoka Sião tyairiya, Enore makamanehare nawenakala Jerusalém enokoare nali, kahare anjonae tyaonitere nali. <sup>23</sup> Xikaoka hetatiye Enore ityaninae, ho-hisakoaha hoka ihalaharahiterenae nali. Enokoa nali exairatyakahare nexarexenae ana. Xikaoka tehitiya Enore ana, aliyakere xamani halitinae tyaonita hoka tyomehenahere akereta mokitere ana. Exahe haliti waiyexenae nisekoharenae ana xikaoka. Hatyo halitinae atyo waiyexe maniya kaiserehare tyaohetehenerenae. <sup>24</sup> Xikaoka Jesus ana, waitare wenati waikatehare tyaohenere ana. Hiyaiya, itimalaxa hiyeta wenati waiyexe kaotyakita, Abel timalaxa xahehare nawaiye hatimalaxa exaorekoahenere ana.

<sup>25</sup> Hiyeta Enore iraehena xikakoa hoka awa ximasemaxemala. Moisés irae toahiy-ereharenae kakoa hoka maisa semaxemayahitaha hoka hatyo hiyeta iniyalahare kaxomokakaha. Hoka kalikini atyo Enore enokoata iraeta wikakoa. Maisaiya wityakekota iniraene hoka exahehareya wikaxomokaka.

<sup>26</sup> Hatyo xowaka Enore irae ekaoaha hoka waikohe tatakoa. Hoka kalikini exakere iraehitiya: “Etare ite niraehitiya hoka maisa waikohe taita xini tatakoa. Waikohe, enokoa xoaha ite tatakoa”.

<sup>27</sup> “Haki ite niraehitiya”, nitere atyo exakere hotikijita: Tyotya xoalini hare tyomehenere ite kaxatatakoakisakehena hoka haiyanae atyo ite maisa tatakoita. Tatakoahenerenae atyo ite kakikisaka hoka matatakoaneharenae atyo ite heko tyaona.

<sup>28</sup> Hiyeta hoka maika wihalahare Enore kakoa wenakalati kinaterexe kaxekakehenere womana hiyeta. Maika wihalahare Enore kakoa, exahe aowitreharenae wisoma wiyaminirene kakoa. <sup>29</sup> Hiyaiya, aliterexe atyo wEnorexa irikati akere, mawenekoaretyare.

## 13

*Enore Kakoa Nihalaharetyaka*

<sup>1</sup> Heko xawayetyakakoa, exahe hoka xihinaehare xaoka kakoa xawenane Cristo koamania hiyeta. <sup>2</sup> Haliti kaokehena xomana hoka waiye xamokene. Hiyaiya, toahiya emawaiyanenehareha kaoka enomanaha hoka waiye mokahene. Motya haliti aokahene xakore hoka anjonae atyo.

<sup>3</sup> Xotyaxemehena berexoako tyaoniterenae, maika motya berexoako ene xisaonita ehaliyaha akereta xamokahene. Xotyaxemahena kirakoane tyaoniterenae, motya kirakoane ene xisaonita ehaliyaha akereta xisaona.

*Xikaxaikoawi Iniyalahare Ohiro Kakoa Xománe Nonitata*

(1 Coríntios 5:1-5; 6:15-20; 1 Tessalonicenses 4:3-7)

<sup>4</sup> Maika wenakakoati xaiminisa xityotya. Maika kaiyanityorenae, kaiyaneneronae aminisakakoa. Enore ite iniyalahare moka ohiroarexe, enatyalolo xoaha hoka.

<sup>5</sup> Awa atyo olo, xiyealiti hare tahi xahekota hoka xaoka xomana mene. Maika xoarenae xamani xixiyehare hoka hatyo kakoa xihalahare. Hiyaiya, Enore nexa: Maisaiya xoana hekota nahalakijita xiso, maisaiya xoana hekota nomaotyanita xiso.

<sup>6</sup> Maika hatyo hiyeta wimamairanehare wisaona hoka wexa: “Xekohaseti atyo kahinaetita natyo hoka maisaiya nomairita. Xekohaseti kahinaetita natyo hoka xalaiya iniyalahare mohena natyo?”

<sup>7</sup> Xotyaxematya xinityohalitira hetatiyenae Enore niraene xakaihenere xihiye. Xotyaxematya enawenaneha, ekamaneha harenae hoka enawenaneha akereta xisaona.

<sup>8</sup> Hiyaiya, Jesus Cristo kafaka tyaonita, kalikini tyaonita. Nikare ite tyaona matyotenehare. <sup>9</sup> Awa atyo haiyanae hahekore aotyakijitere xema xisaona hoka waiyexe ahoti xahalakisa. Waiye atyo Enore waiye ahekoitere wikakoa hiyeta wikaxaiyatelikisakita.

Maisa atyo nakairati nakairatyakaho tyakekotyaka hiyeta xini. Hatyoharenae xema tyaoniterenae maisa kakahinaetyakita xini.

<sup>10</sup> Sacerdote hakiterenae judeunae niraexatyakala hanakoia atyo maisa aliyakere kanakairahitaha wifetatyakalaose nali kafetatyakehenere. <sup>11</sup> Kalorexe sacerdotenae judeu kolatya kirakahare timalaxa hoka imiti taose talarere ako isoaha hoka fetatyahita halitinae iniyalahare tyomitere hiyeta. Xakore hoka kirakaharenae háré atyo haware wenakalati nonitata kakerahaotyakita.

<sup>12</sup> Hiyeta hoka Jesus tehitija waini sekose wenakalati nonitata emaisatya maheta hatimalaxa kakoa halitinae nómáne iniyalahare. <sup>13</sup> Hatyo hiyeta wiýá Jesus haliya kaiserehare wisaona. Wenakalati nonitata haware hoka iniyalahare wikaxomokaka, iniyalahare kaxomokakehenere akereta.

<sup>14</sup> Ali exe waikohekoia wawenakala tyaonitere atyo maisa waha tyaonare. Hoka watyahita atyo wawenakala enokoare kaotyakene xahita. <sup>15</sup> Hiyeta hoka maika wihalahareta mene Enore kakoa, Jesus Cristo hiyeta. Exe wihalaharetere atyo enomanere, exahe etahi hoka wiraeta. Xoalini hare kafetatyakitere akereta. <sup>16</sup> Awa atyo waiyexe xománe ximáomane, exahe hoka xakahinaetya kakoa. Hiyaiya, hatyoharenae kaomakehena hoka Enore ana waiyeta.

<sup>17</sup> Maika xinityohalitiranae niraene xema xisaona. Hiyaiya, aotyakisahitaha xiso xikinatere xisaona maheta Enore koamaniya. Maisaiya waiye kaxaikotaha xiso hoka maisaiya waiyeta Enore hiye. Xasemaxematyaiya iniraeneha hoka ihalaharehaiya hahateneha kakoa. Hoka haxamaikoharene kakoaiya hakaha hoka aliyakere kahinaetyahitaha xiso?

<sup>18</sup> Maika heko xiraexatyा witahi. Wiyahekola waiye maniya tyaonita, waiyexe taita wisoma waokowita hoka. Nikare wisaona waokowita. <sup>19</sup> Maika xiraexatyा nomani hoka haxeroreta Enore ehaikoakheta natyo xinali xeta.

### *Iraexatyati*

<sup>20</sup> Maika Enore kakoa kaihalaharetyaka mene! Hiyaiya, hatyo atyo ekasekiheta Wiyekohase Jesus. Ekamane hiyeta halitinae ekoamaniya tyaoniterenae Kaxaikotyashare Kaiserehare waiyexe tyaonita. Itimalaxa hiyeta waitare wenatyaho matyotenehare kinatere tyaonita. <sup>21</sup> Maika Enore mehexaikohaliti waikatehare iyateliti isa xomana hoka aokitere akere taita xisoma. Exahe waiyexe taita tyoma winekoni waiyetereharenae enomana Jesus Cristo hiyeta. Maika Cristo kakoa kaihalaharetyaketa mene matyotenehare. Eko xoaha.

### *Iraiti Miyanitiyeneae*

<sup>22</sup> Nohinaeharenae, maika xihalahare maheta niraini ximamaxaharenahare xasemaxematy. Exe baberane naxairahenere maisa waha tahi xini.

<sup>23</sup> Xasemehena, wihinaehare Timóteo koxaka hikoaheta berexo akota. Haxeroretaiya tyoheta hoka nanolokene hoka wiyaiyeheta xiso.

<sup>24</sup> Maika xiylakaiheta natyo tyotya xinityohalitira Enore ana hakiterenae hiye, exahe tyotya Enore kaxaikone harenae hiye hoka. Itália nali tyaonitere wihinaeharenae tehitija haxakaisakeheta aokaha xihije.

<sup>25</sup> Maika Enore waiye kaxaiko xiso xityotya. Eko xoaha.

## Tiago

<sup>1</sup> Natyo Tiago Enore wakanehare, Xekohaseti Jesus Cristo wakanehare hoka naxikatyabbera nokatyawaxi maheta tyotya Enore kaxaikone hotyalinae xaorekoitere waikohetka hiye maheta.

### *Tyakekoti Waiyoliniti Xoaha*

<sup>2</sup> Nohinaeharenæ, maika xihalahare xisaona tyotya xihasakaharetyaka kakoa xijiyehena hoka. <sup>3</sup> Hiyaiya, xityakekoneya jiyahaotya exehare hasakaharetyati hoka exahexeya xikinatere xisaona. Exe harenæ waiyekelalakita xomana.

<sup>4</sup> Maika exe hasakaharetyati hiyeta xikinatere xisaonitere hiyeta waiye, tota maniya xisaona, iniyalahare ximaomanehare xisaona.

<sup>5</sup> Maika hatya maisa waiyorexe hoka axa Enore hoka awaiyolinikisene. Isaiya, hiyaiya, waiyexehare atyo hoka hawaiyexehare kakoa tyotya halitinae ana ijita. <sup>6</sup> Xakore hoka xaxehena hoka xityakekone kakoa xaxa. Awa atyo ximatyakekone kakoa xaxa. Hiyaiya, xala xamani atyo matyakekoita hoka, “Xoana isa xamani, maisa xamani”, nita hoka one kaloxere hoholati takoiyaxaitere hamaniyaxa, hamaniyaxa akereta atyo tyaonita. <sup>7</sup> Xala xamani atyo nikarexe hoka maisaiya xoare Enore ijita enomana. <sup>8</sup> Hinama maniya haxowakita ahekotya hoka maisaiya xoana xowaka waiyoreta háomane kakoa.

### *Maxiyeħaliti, Xiyeħaliti Xoaha*

<sup>9</sup> Maika hatya tyakekohatiye maoloxahare kaxiyeharehena hoka ihalahare Enore kakoa, kaxiyeharetene hoka. <sup>10</sup> Maika nikareta teħitiya kaxiyeharexe maxiyeħarehena hoka ihalahare Enore kakoa, maxiyeħaretene xakore hoka. Hiyaiya, kaxiyeharexe ite maiyare iyiti masekka tyaonitere akereta. <sup>11</sup> Kamae wateħena hoka enowatya keraita hananeħaliti, hoka iniye exoita, enowaiyehare emaisatita. Nikare teħitiya ite kaxiyeharexe kamawenekoaretyaka haxiyeharenae nonitata.

### *Xamaikoharetyati Hasakaharetyati Xoaha*

<sup>12</sup> Waiye kaisereħare atyo xala xamani xakore kahasakaharetyaka hoka heko tyaonitere. Hiyaiya, jiyahao aktya najikini atyo ite wenati waiyexe kaxekaka enomana, Enore haxawaiyeranae ana isa aokowihenere.

<sup>13</sup> Xala xamani kahasakaharetyakeħena examaikoharene xowaka hoka awa atyo nexa: “Exe hasakaharetyati atyo Enore nalitare”. Hiyaiya, Enore atyo maisa hasakaharetyare iniyalahare kaomaka maheta. Maisa atyo xala hare hasakaharetyare. <sup>14</sup> Exakore hatya kahasakaharetyakita: Kamaoseratyakita hoka exahekkola iniyalahare kaxawaiyetyakiteret hiyeta atyo kahasakaharetyakita. <sup>15</sup> Hoka hatyo xahekkore ewaxirahare hiyeta atyo iniyalahare kaotyakita. Hoka iniyalahareya waheħena tyaonita hoka kamati kaotyakita.

<sup>16</sup> Awa atyo xamaoseratyawwi, noxiyakawali nohinaeharenæ. <sup>17</sup> Tyotya waiyexe kaxekakiteret harenæ womana atyo enokoatare. Tyotya hatyoharenæ atyo Enore nalitare. Enokoare xaokanatyakalati nomaseħare nalitare. Maisa ini hekot haxahekkola hawareħare mokare. <sup>18</sup> Exahekkola xema atyo wikaotyaka, iraiti aliterexe hiyeta. Tyotya xoalini hare tyomeħenere konita wiso hotħare hetati wisaona maheta.

### *Semati, Omati Xoaha*

(Atos 10.35; Tito 3.1-2; Tiago 3.17-18; 1 Pedro 4.7-11)

<sup>19</sup> Exeharenæ xotya, noxiyakawali, nohinaeharenæ. Maika ximemere xisemaxemala kakoa xisaona. Waiye xahekkotya hotħare hoka xirae, xehare harenæ. <sup>20</sup> Hiyaiya, haliti xeharene maisa Enore aokitereħare ekaotyakatyare. <sup>21</sup> Hiyeta hoka xahalakisa ewaxirahare xománe, xiyeħarene harenæ hoka xawaiyexħarene kakoa Enore niraene xaoka xomana hoka waiyexe maniya moheta xiso.

<sup>22</sup> Awa atyo xamaoseratyoawi. Awa atyo exe iraiti xasema taita. Xasemene hoka aokitere akereta xisaona. <sup>23</sup> Hiayiya, xala xamani atyo sema taita iraiti hoka maisa aokitere akereta tyaconita hoka hatyo atyo hatya haliti tiho waiyakakalati waiyoawi hoka aliyakere haliyere xamani akereta. <sup>24</sup> Waiyoawi hoka xaneheta hoka haxerore haháre maotyanihitita akere.

<sup>25</sup> Hiayiya, Enore xaotyakira atyo waiye maniya mokita wenati. Xala xamani atyo heko Enore xaotyakira akereta tyacona, maisa semitene taita hoka, xoare xamani tyomehena hoka Enore ehatene awaiyetya.

<sup>26</sup> Hoka xala xamaniya atyo tyakekohatiye xakore aokowita hoka iniyalahare iraeta hoka maisa atyo tyakekotere xoare tyomare. Maosseratyoawita atyo. <sup>27</sup> Wexe Enore ana atyo wenati aliterexe exe: tyajikihalo, tyajikihare, maiyanenehalonae kahinaetyaka examaikohareneha hiyeta. Kaxaikoawiti hoka maisa matyakekoneharenae nawenane akereta nawenatyakere.

## 2

### *Hakakoa Xomokakakoati*

<sup>1</sup> Nohinaeharenae, xityakekohenerenae Wiyekohase kinaterexe Jesus Cristo: Awa atyo haiyanae xikirawane, haiyanae waiye xamoka xoaha, ehárenaeha waiyakene hiyeta.

<sup>2</sup> Xiyaiyehenaira ite: ouro hoko kahitiniye, waiyexe imiti ako ijoitere xamaniyatya isoa xomana xihohisakoitere nali hoka hatya tehitia maoloxahare isoa, imiti exololo nimere. <sup>3</sup> Hoka waiyexe imiti ako ijoitereya waiye xamoka hoka xexa ihiye: “Exaose atyo waiye, exaose hisoka”, hoka maoloxahare hiyeya xexa: “Hatityoa nali, maisa hoka hisoka waikoa nokiji haliya”. <sup>4</sup> Exakere atyo, hatya waiye xamokita, hatya maisa waiye xamokare xoaha hoka iniyalahare atyo xamokakakoita. Maisa waiye xahekotyare.

<sup>5</sup> Xasemehena, nohinaeharenae, noxiyakawalinæ: Maxiyehareharenæ atyo Enore aoka haomana ali waikohekoare hoka kaxiyeharexe tyaconaha maheta hatyakekoneha hiyeta enokoa nali. Enore haxawaiyeraharenæ anere aohenere enomanereha tyacona maheta. <sup>6</sup> Xakore hoka maxiyehareharenæ xikirawaneta. Maisa kore kaoloxerenæ xini kolatya xiso xekohasetinae nahalakoa hoka iraharetya xiso hoka iniyalahare xikaxomokakere? <sup>7</sup> Xoana maisa hatyonæ xini iniyalahare iraeta waiyexe Enore kaxakaisakitere xihiiye xaokaka?

<sup>8</sup> Enore xaotyakirahoiya xityakeko hoka waiyexeya xisoma aokitere akereta. Hiayiya, exakere Iraiti Waiyexe nanekoa kaxairatyaka: “Hawaiyetya haiyanae hawaiyetyoaw-itera akereta”. <sup>9</sup> Hoka halitinaiya eháre waiyakeneha waiyakahare waiye xamokita hoka iniyalahare atyo xisomita. Xaotyakisatyaho hiyeta iniyalahare nomasehare xikaxaokaka.

<sup>10</sup> Hiayiya, hatyaiya hátahi xaotyakiye aokitere akereta maisa tyaconita hoka tyotya xaotyakisatyaho aokiterenæ atyo maisa aiminijita.

<sup>11</sup> Hiayiya, hatyo xaotyakisatyahota exakere nexa:

“Awa atyo hatya nohiroxa hiwatyalí”.

Exahe nexatehitiya:

“Awa atyo haisa”.

Exahiya maisa hatya nohiroxa hiwatyalita hoka haisaiya hoka iniyalahare atyo hisomita.

<sup>12</sup> Maika xaotyakisatyaho aokitere akereta xirai, xisoma xoaha hoka maisa xoana xikaxomokakita. Hatyohare atyo mehexaikohaliti ijita womana. <sup>13</sup> Enore axehenere haliti akahenere xowaka ite maisa airakoaneharetita haiyanae maxairakoaneharera-harenæ. Xakore hoka haiyanae airakoaneharenæ atyo ite maisa iniyalahare kaxomokakita, xaxalisati ferakene.

<sup>14</sup> Nohinaeharenæ, xoare mahetaiya hatya tyakekota xakore aokowita hoka maisa hatyakekone akereta tyaonare hoka? Xoana hatyo ityakekoneyaka waiyexe maniya mohetene?

<sup>15</sup> Hiyaiya, wihinaehalonæ, wihinaeharenæya maimahare, manakairahare hoka <sup>16</sup> maisaiya xoare xisare enomanaha hoka xoare mahetaiya, “Maika Enore waiye moka xiso, waiye xisoa ximako, xikanakaira harenæ”, xexa? <sup>17</sup> Hiyeta hoka tyakekoti atyo exakere: Maisaiya xoare waiyexe kaomakere tyakekoti hiyeta hoka maisa tyakekore, ekamane akere atyo ityakekone tyaonita.

<sup>18</sup> Hatya ite nehena: “Hiso atyo hityakekota, hoka natyo atyo waiyexe notyomita. Hahotikisa nomani hityakekone xoalini hare waiyexe himaomanehareta hoka natyo ite nahotikisa notyakekoni homana waiyexe nománi hiyeta”.

<sup>19</sup> Homana atyo Enore haterore. Ehekore! Tihanarenæ tehitia tyakeko hoka mairaha hoka tatakoaha hamairaneha. <sup>20</sup> Maotikoniti! Nahotikisa ite homana. Tyakekoti waiyexe maomakahare atyo maisa xoare tyomare.

<sup>21</sup> Xoaneretya hoka wahetakomaniyere Abraão Enore tyakeko? Enawenane hiyeta awaiyetene, haisani Isaque aisa hoka fetatya aokowihenere hiyeta. <sup>22</sup> Ityakekone, enómane waiyexe harenæ hiyeta atyo kawaiyaka. Ityakekone hatyo waiyexe tyomehenere hiyeta masakare waiye tyaona. <sup>23</sup> Exakere kaotyaka Iraiti Waiyexe nanekoa aokitere akereta: “Abraão Enore tyakeko, hoka ityakekone hiyeta waiyexe haliti aokene”. “Nohinae Abraão”, nexa Enore exaokaka.

<sup>24</sup> Enore atyo haliti tyakekota, waiyexe tyomehena hoka. Maisa ityakekone hiyeta taita xini. Exeharenæ hiyeta ite waiyekehalakehena xomana.

<sup>25</sup> Xiyaiyehena Raabe enatyalolo nawenane. Israel hotyali kaoka enomana hoka waiye mokahene hoka hotikisa haho ahoti enomanaha hoka waiye xanehenahitaha. Hatyo enómane hiyeta Enore tyakekone.

<sup>26</sup> Hiyaiya, nikare tehitia haréti maisekoharehare hoka ekamane tyaonita. Nikare tehitia tyakekoti: waiyexe maomakahare hoka ekamane akere tyaonita.

### 3

#### *Niniseti*

<sup>1</sup> Nohinaeharenæ, haiyanæ taita ite xinekonitare tyakekohatiyenaæ xaotyakisase tyaona. Hiyaiya, wiso waotyakijiterenaæ xiso ite masakare wikaxaxalisakehena haiyanæ xahexe. Hatyo harenæ waiyekehalakita xomana.

<sup>2</sup> Wityota maisa ehekore wisaonare kahareki. Hoka hatyaiya waiyexe taita iraeta hoka hatyo atyo waiye kaiserehare, waiye atyo haháre kaxaikota.

<sup>3</sup> Kawalonæ kanasako examemakisakala wamoka hoka waokitere akereta tyaona maheta, aliye maniya xamani xane waokita hoka waokitere akereta waxanikisahitene.

<sup>4</sup> Xahekotya kanowa kalorexe tahi: Kalore xakore hoka hoholati kinaterexe hoholasekoaitene. Kirane xakore kanowa xaetonakisakala hoka alyako xamani exaetonakisase xane aohena hoka hatyo maniya xaneta. <sup>5</sup> Nikare atyo niniseti tyaonita. Kirane xakore hoka kahareya kaxaokowiharetyoaka hoka maisaiya haiyanæ hiye waiyeta.

Xiyaiya, nikaretaiya inirere irikati hiyetaiya kalore xakore koloho hoka kalore kera.

<sup>6</sup> Niniseti atyo irikati akereta. Ewaxirahare kakoare atyo hoka haréti tyotya ahowetitita, komaniyatita wiso. Irilikati toloko tare keritere akereta niniseti aiyalaharetita wawenane, wawenane atyo irikati maniya mokita.

<sup>7</sup> Halitiya waiyehena jiyyaotya kirakaharenæ. Koxaka jiyyaotya kirakahare xalijiniharexenai, kotehalanai, kirakahare nolokehetyoitreharenai, kohase xoaha. <sup>8</sup> Xakore hoka maisa atyo xala hare niniseti jiyyaotyare. Maisa waiyexe, howero katawanexe kakoare atyo, maisa atyo xalahare jiyyaotyarene.

#### *Enore Maxawaiyerene*

(1 Coríntios 10.6-10; 1 Timóteo 1.9-10)

<sup>9</sup> Exahe wininise kakoa Wexe Enore kakoa wihalahareta. Halitinae hoka wikirawaneta. Enore haháre akere hare tyomehenere. <sup>10</sup> Hatyo kanase kakoita kaihalaharetyakita Enore kakoa, haiyanae kairawaiyakita. Nohinaeharenae, maisa atyo nikare nawenatyaka waiyexe.

<sup>11</sup> Hatyoahota makereyaka one tihexere, wiyxere xoaha hikoahena?

<sup>12</sup> Nohinaeharenae, xoana halohalo kateyaka azeitonali kali? Xoana uva kate xamaniyaka halohalose kase? Nikare tehitiyaiya onehiyase kexaxere maisa aliyakere wiyxere tyeonita.

#### *Aliterexe Irihaliniti*

<sup>13</sup> Xoana hatya otyahati, waiyorehati xinekoni? Maika maxahenerahareneta hotiki-hena hawaiyorene, hawenane waiyexe harenae.

<sup>14</sup> Xakore hoka xokoawaharehati, xeharehati, ximaxihatiya xisaonita hoka awa atyo xaokowiharetyoa xawaiyorene kakoa hoka xamaoseratya. <sup>15</sup> Exeharenae waiyoliniti atyo maisa enokoatare xini. Waikohekoatare atyo, kirakahare, tihanaretare atyo. <sup>16</sup> Hiyaiya, alyako xamani atyo okoawahaliti, xaokowiharetyoati tyeonita hoka nali tehitiya atyo mawaiyekhalakiti, xoalini hare iniyalahare kahare tyeonita.

#### *Wenati Waiyexe*

(Romans 12.9-21; Tito 3.1-2; Tiago 1.19-22; 1 Pedro 4.7-11)

<sup>17</sup> Enokoatare waiyoliniti tyoitere atyo waiyexe taita ewaxiraharenae nonitata: mehexaikohaliti, waiyexehaliti, waiye haliti xomokaka harenae. Xairakoanehaliti kakoare hoka waiyexe tyoma kahare, maisa ahinityare, maosseratyare xini.

<sup>18</sup> Hiyaiya, waiyexe atyo kaotyakita waiyexe mehexaikohaliti tahi xakaiterenae xakaini hiyeta.

## 4

#### *Matyakekoneharenae Kakoa Kahinaeharetyoaka*

<sup>1</sup> Alyakota mokotyakakoati, xiholakakoati kaotyakita xinekoni? Iniyalahare waha aka xahekoitere hiyeta. <sup>2</sup> Kahare xakore xoalini hare xaokita xomana hoka maisaiya aliyakere tyotya xomanere tyeonita hoka kasani xaisa akaty hoka xiyahene xaokowita. Xaokita xakore xomana xoalini hare hoka maisa xaokitere akereta tyotya xomanere tyeonare hoka hatyo hiyeta xaisa kakoa, xiyalijinita. Maisa xomanere tyeonareha, maisa Enore xaxare hoka. <sup>3</sup> Xaxa xakore Enore hoka maisa isare xomana, iniyalahare xiyahekola kakoa xaxita hoka. Xoalini hare xaokita xikehalaharene niyahare taita xaokitene hoka maisa Enore isare xomana.

<sup>4</sup> Maisa Enore aokitere akereta xisaonita! Iniyalahare nomaseharenae hinaeharenae kaiserehareya xisaona hoka xikalakaoahareya Enore kakoa. Xoana, maisa hatyohare waiyekhalakita xomana? Hiyaiya, xala xamani atyo iniyalahare nomaseharenae hinaehare aokowi hoka Enore nahalakoahare atyo tyona.

<sup>5</sup> Awa atyo motya enenaharenae Iraiti Waiyexe nanekoa iraeta xaoka:  
“Isekohaliti mohenere wihiye kalore iniyalahare taita ahekotita”.

#### *Maika Ximaxahenerahare Xisaona*

(Filipenses 2.3-9; 1 Pedro 5.5-7)

<sup>6</sup> Xakore hoka Enore kahinaera atyo masakare kinatere. Hiyaiya, exakere Iraiti Waiyexe nanekoa nexa:

Enore atyo maisa awaiyetyare ahinityaliyena hoka maxaheneraharenae atyo kahinaetita.

<sup>7</sup> Hiyeta hoka Enore xityakeko. Xaiyateretyoa Tihanare xahita hoka tekua xonita.

<sup>8</sup> Xaiyateretyoa hoka Enore maniya taita xisaona hoka kaxaiko ite xiso. Xatiheheta xikahe, iniyalahare nomaseharenae. Iniyalahare xahekoitere xahalakisa, awa atyo hinama maniya haxowakita xahekotya.

<sup>9</sup> Xamaikoharehena, ximawaiyeharehena xawenane hiyeta. Xakawihena, xitiyahena harenae. Xikoexane nonitata xitiyahena, xihalaharene nonitata xamaikoharehena.

<sup>10</sup> Maika ximaxahenerahare xisaona Xekohaseti haoti hoka kalorexe moka xiso.

### *Iraeharetyati*

<sup>11</sup> Nohinaeharenae, awa atyo xiraeharetya kakoa. Xala xamani atyo hahinaehare xaokaka iniyalahare iraeta, iraeharetita, hoka xaotyakisatyaho xaokaka atyo iniyalahare iraeta, kirawaneta. Xaotyakisatyaho xahehare aokowita. Xaotyakisatyaho xaokakaiya atyo iniyalahare hirae hoka xaotyakisatyaho xahehare atyo haokowita, maisa atyo xaotyakisatyaho xema xini hisaonita. <sup>12</sup> Enore taita xaotyakisatyahonae tyomita, hatyo taitaiya atyo xaotyakisatyaho xahehare. Waiyexe maniya xamani moka akatya, xoana mawenekoare akatya xamani. Hoka xala atyo haokowita hoka hihinaehare Cristo koamaniya tyaonitere hiraeharetita?

### *Xahekore Makani Niyahare*

<sup>13</sup> Xasemehena kalikini xiso xiterenae: “Kalini xamani, makani xamani ite hakoa wenakalati wiyanehena hoka nali ite haterehokoane wisaona hoka xoalini hare wahaka hoka kalore wikaoloxa”. <sup>14</sup> Xoana hoka nikare xiraeta? Hiyaiya, maisa atyo makaniye xawenane kakoa xawaiyorexe. Morexalo kaotyaka hoka maiyarehititere akereta atyo xawenane. <sup>15</sup> Exakere xiraeta hoka ehekore: “Enore xaokalitaiya hoka waokitere xoalini hare wisoma”.

<sup>16</sup> Xakore hoka xahinityali xaokowiharetyoali taita. Hatyo atyo maisa waiyexe.

<sup>17</sup> Hiyeta hoka xala xamani atyo waiyore, waiyexe tyomita hoka maisa tyomare hoka iniyalahare atyo tyomita.

## 5

### *Kaxiyeharexenae Xakaisaka*

(1 Timóteo 6.9-10)

<sup>1</sup> Xasemehena, xiso kaoloxerena! Xakawihena, xitiyahena xaheta maniya iniyalahare xiyomokaka kakoa. <sup>2</sup> Xixiyeharenae mololota, ximanae waiyexenae kirakaharesenae sesekasekoaita. <sup>3</sup> Xixiyehare ouro prata harenae kaijikali tyaonita. Hatyo harenae ite halitinae waiya hoka xawaiyekahalaharehena enomanaha. Hoka motya ite irikati keraita ene xiháre akereta tyaona. Exahe kafaka maniyejhena enoheno xamokita xoloxa xixiyeharenae harenae.

<sup>4</sup> Exahe maisa xabakaita halitinae imexehenere ximasenekoata. Hoka xasemehena enosexehareha! Enosexahareha xane kaoka Enore maxaexahityakahare niyaterexe nali.

<sup>5</sup> Ali atyo kalini kehala xisaonita, xoalini hare xisoma xaokowihena, exahe maisa xoare niyahare hoka xisomita. Xikolotya, waiye xisaonita, motya bowi okoi xaisakalati nali kakolatyaka hoka kaxaisakitere akere xisaonita. <sup>6</sup> Iniyalahare maomaneharenae xaisaka xaokita, xaijita. Hoka hatyoha atyo maisa xoare hare tyomare xikakoa.

### *Heko Xatyahati, Iraexatyati Xoaha*

<sup>7</sup> Hiyeta hoka maika ximaholawakahareneta xatyaha Xekohaseti haikoahaneheta kijiya, nohinaeharenae. Hiyaiya, masene waikate fehena masene hoka hatyo najikinita atyahita waha, maisa kaholawakere ekakoa. Wahehena hoka enakaira ihatita. Mokosetatere xowaka oneta ihiye, inityokatehena hoka onehitita kaisereharetia ihiye hoka. <sup>8</sup> Hoka xiso tehitija ite nikareta xatyahahena ximaholawakahareneta. Awa atyo xamaikohare. Hiyaiya, Xekohaseti ite haxeroreta haikoaheta.

<sup>9</sup> Nohinaeharenae, awa atyo xiraeharetyakakoa, waiya aliya hoka hatyo nahalakoa iniyalahare xiyomokaka aoka Enore. Hiyaiya, haliti watyalisasehare atyo okihetehena.

<sup>10</sup> Xotyaxematyia toahiyereharenae iraiti xakaisaseharenae. Enore xaokalita iraeta hoka makawatiharahitaha waha aka hoka heko tyaonahitere. Enawenaneha akereita xisaona. <sup>11</sup> Hiyaiya, nikare makawatihareterenae heko tyaoniterenae xaokaka, “Kaxiyani, waiye kaiserehare”, wita.

Kala koxaka xasema Jó tahi. Heko aiyasetyoa hawenane Enore koamaniya kakoa hoka wahehena hoka Enore waiyexe wenati aoka enomana. Hiyaiya, Enore atyo kalore xawaiyetyati, xairakoaneharetyati kakoare.

<sup>12</sup> Hoka exe kaiserehare, nohinaeharenae: xoalini hare xiraehena halitinae hiye hoka, “Exakere ite notyoma”, xehena hoka awa atyo Xekohaseti nexare xakaixaretya, exahe waikohекоа xoalini hare xakaixaretya xiraine katyakekotyaka maheta. Xexa taita, “Há”, xexa aliterexehena hoka, “Maisaiya”, maisa aliterexehena hoka maisa Enore iniyalahare mokita xiso maheta.

<sup>13</sup> Xala xamani xinekoni tyaconitere kirakoane tyaconita hoka iraexatya. Xala xamani ihalahareta hoka xera xerati haihalaharene kakoa.

<sup>14</sup> Xala xamani hokakita hoka xakawisa tyakekohatiyene nityohalitiranae hoka kolotenitiya iseri heno mokaha hoka iraexatyaha Enore hiye. <sup>15</sup> Exe iraexatyati tyakekoti kakoa nomakere atyo aiyatelikheta hokakiti. Enore ite isa enomana iyateliti hoka kinatereheta. Maotyaneheta ite iniyalahare tyomehenere.

<sup>16</sup> Hiyeta hoka xityakeko kakoa, iniyalahare xisomitere xiyakai kakoa hoka xihinaeharenae xaokaka xiraexatya kaxaiyatelikisakeheta maheta. Haliti waiyexe niraexala atyo masakare kinatere.

<sup>17</sup> Hiyaiya, iraiti xakaisasehare Elias wiso akereta hoka masakare hatyakekone kakoa iraexatya hoka hanama terehokoane mokotexe maisa waikohекоа oneta. <sup>18</sup> Hatyaoseta iraexahitiya haki hoka one. Hoka enakaira tyaohtiya enomanaha.

<sup>19</sup> Nohinaeharenae, hatyaiya xinekonitare matyakekoneheta hoka hatyaiya atyakekonikihitiyene hoka maika exeharenae xotyaxematy: <sup>20</sup> Xala xamaniya atyo waiya iniyalahare nomasehare hoka iniyalahare enómane nonitata waiyexe maniya mohetene hoka ekamane nonitata iyehetene. Nikare ite hoka kahare iniyalahare kamaotyanityakeheta.

## 1 Pedro

<sup>1</sup> Natyo Pedro, Jesus Cristo niraene kakoare kalikini naxairatya exe babera Enore anerenae ana, xaorekoiterenae hawenakalaha nonitata Ponto, Galácia, Capadócia, Ásia, Bitínia, harenaikoa nali. <sup>2</sup> Cristo Nexe Enore atyo toahiyita haomanerena aoka xiso hoka enomanerena xisaona maheta. Haisekohare hiyeta atyo haliti waiyexeharexe moheta xiso. Xityakeko Jesus Cristo hoka itimalaxa kakoa iniyalahare xománe emaisaheta maheta. Maika Enore kahinaetya xiso hoka waiye ximehexaiko xisaona.

### *Xatyahati Nawenane*

<sup>3</sup> Nika waexakeritya Enore, Wiyekohase Jesus Cristo Nexe. Kalore haxairakoaneharera wiso hiyeta isa womana wenati waitare Jesus Cristo kasehetehenere hiyeta. Hiyeta watyahita wenati matyotenehare xahita. <sup>4</sup> Hatyo hiyeta watyahita Enore mokitereharenae haomanere hotyalinae ana. Hatyoharenae mokita xomana enokoa. Hatyo nali atyo maisa kiraharexeha, maisaiya kaiyalaharahitaha, maisaiya kamawenekoaretyakahitaha.

<sup>5</sup> Exehare waiyexenae atyo xomanere, xityakekohenere hiyeta, hoka Enore niyatere atyo tyakaisahitene, hoka memere tyaonahitaha kahotikisakaha maheta xikaiyakenere miyanitiye ferakene niyahare. <sup>6</sup> Hatyohare hiyeta xihalaharehena, kalikini xakore xiyamaikoharene xowaka, kahare xikahasakaharetyaka hoka howitihare xawenane tyaonitere hiyeta hoka.

<sup>7</sup> Exe hasakaharetyatinae atyo hotikisa maheta aliterexe xityakekone. Hiyaiya, ouro kamawenekoaretyakere kakoita atyo irikati hiye kahasakakita. Nikare exe xityakekone, ouro xahexe nawaiye hoka kahasakaharetyakita, heko kinatere tyaona maheta. Nikare ite hoka xikatyakekotyaka hoka xikaxaiminisaka, xikaxaexakeretyaka Jesus Cristo kahotikisakehetehenere xowaka. <sup>8</sup> Xawaiyetitene, maisa xakore xiyaiyarene hoka. Xityakekotene, maisa xakore kalikini xiyaiyarene hoka. Nikare xihalahareta kalorexe ihalahaliti waiyexe kakoa. Maisaiya iraitinae awaiyekahalakatitene. <sup>9</sup> Exe ihalahaliti kakoare atyo xiso. Xityakekohenere hiyeta atyo kaxekakita xomana. Xityakekone hiyeta waiyexe maniya xikaxomokakeheta xisekohare kakoita.

<sup>10</sup> Hatyo iyatiheta tahi atyo iraiti xakaisaseharenai axaha, waiye tawaha hakakahareneha kakoa. Hoka xakaiha iyatiheta Enore isehenerehare xomana tahi. <sup>11</sup> Hatyo harenae ferakene kaotykene tahi semaha aokowiha, aliyakere xamaniya tyohetehena hoka. Cristo Nisekohare tyaonitere ekakoaha hotikisa enomanaha hatyo ferakene, Cristo kirakoane kaxomokahenere hoka jikiniti kaxaeroretyakehenere tahi xakaihenahere xowaka.

<sup>12</sup> Kalikini xasemiterehare tahi iraiti xakaisaseharenai hiye Enore xakai. Enore hotikisene enomana hoka maisa enomanereha xini ehateneha. Waiye xisaona maheta atyo iraiti xakaisaseharenae xakai hatyo tahi. Enokoatare Isekohaliti Waiyexe niyatere hiyeta xakaihaha Iraiti Waiyexe xihiye. Exahe anjonai waiyekahalaka sema aokowi ahitaha hatyoharenae.

### *Enore Kawisa Wiso Wenati Makaolatyoanehare Ana*

<sup>13</sup> Hiyeta hoka ximemere xisaohena xománe kakoa. Maika xirihare, xatyahahena taita wenati waiyexe xahita, Enore waiyexe isehenere xomana Jesus Cristo haikoahetehenere xowaka niyahare xahita. <sup>14</sup> Enore aokitere akereta xisaona, awa atyo hetati ximawaiyorene taterehare xowaka xawaiyititereharenae ewaxirahare xema xisaonitere akereta xisaona. <sup>15</sup> Maika waiye kaisere xisaona, tyotya xoalini hare xisomehena hoka. Enore haomanere aohenere xiso akereta.

<sup>16</sup> Xiyaiya, Iraiti Waiyexe nexa:  
“Maika haliti waiyexe xisaona. Hiyaiya, Natyo atyo nawaiye hoka hatyo hiyeta”.

<sup>17</sup> Xiraexahena Enore hiye hoka Xexe xaokene. Hatyo atyo hakakoa halitinae mokita, tyomehenahere akereta atyo mokahitene. Hatyo hiyeta maika waiye xaiminisene, ali waikohekoa xisaonitatere xowaka.

*Waiyexe Maniya Nawenatyakeheta*

(Hebreus 10.10-14; 1 Pedro 1.18-21; 1 João 1.8-9; 2.1-2; 5.12)

<sup>18</sup> Hiyaiya, waiyekahalakita xomana, bakatya hoka iyehetehenere xiso, xahetako-maniyereharenae nómane iniyalahare aho xisaonitere nonitata. Hatyo bakahenere xaimane atyo maisa etakehare tyotitere hare xaimane, ouro, prata hare akereta xini.

<sup>19</sup> Xikaiyakeheta atyo Cristo timalaxa waiyexe kakoa. Hatyo atyo kalanero mokose iniyalahare maomanehare, makawe xomokoanehare.

<sup>20</sup> Enore atyo aokene haomana, waikohe maomakaharene nahitita. Hoka ka-likini miyanitiye xowakehena atyo hoka kaotyaka, waiye xisaona maheta. <sup>21</sup> Ihiyeta atyo xityakekota Enore, ekasekihetehenerene Xekohaseti mohenerene. Hatyo hiyeta xiyatekone, xiyatyahane harenae Enore nali kinatere tyaonita.

<sup>22</sup> Kalikini tyare atyo Iraiti Aliterexe xityakekone hiyeta iyoma fira xisaonita, exahe xawaiyetita xihinaeharenae tyakekohatiyenae hoka maika xawaiyetyakakoa kaisere-hare.

<sup>23</sup> Xiyaiya, xiso atyo Enore niraene aliterexe matyotenehare hiyeta makamanehare ityaninae xisaohitiya hoka maisa atyo wainiterehare ityaninae xini xiso.

*Exe Iraiti Atyo Maisa Kamiyanexe*

(2 Timóteo 3.14-17; 2 Pedro 1.18-21)

<sup>24</sup> Hiyaiya, Iraiti Waiyexe nehenere akereta:

“Tyotya halitinae atyo ime masekoare akereta, enawenaneha atyo ime niye akereta. Ime wainihena hoka iniyenaiha ixoita”.

<sup>25</sup> Xakore hoka Enore niraene atyo heko tyaonita, maisa kamiyanexe. Exe iraiti atyo Iraiti Waiyexe hiyeta koxaka kaxakaisaka xihiye.

## 2

*Sehali Matyotenehare, Haliti Hotyali Waiyexe.*

<sup>1</sup> Hiyeta hoka xahalikhena tyotya iniyalahare, maoseratyati, teraharetyoati, okoawa-haliti, haiyaharenae niraeharetyaka emakaneha. <sup>2</sup> Maika xoima waitare nawenanenae akereta xaoka mene xomana totonexati waiyexe. (Enore xaotyakira xaokaka “To-tonexati”, nita.) Hoka xiserene hoka xikekoare, waiyexe maniya xikaxomokakeheta.

<sup>3</sup> Hiyaiya, Xekohaseti nawaiyexeharene atyo waiyekahalakita atyo xomana, Iraiti Waiyexe iraetere akereta.

<sup>4</sup> Maika Xekohaseti xema xisaona. Hatyo atyo sehali waiyexe halitinae maxawaiy-erehenere nikaretere akere. Halitinae maisa awaiyetyarene xakore hoka Enore atyo masakare waiyexe aokene. <sup>5</sup> Xiso tehitia sehali waiyexe akereta hoka kotare Enore moka xiso hahaha hiye hoka ewakanehare sacerdotenae xisaona. Hoka Jesus Cristo hiyeta xoalini hare waiyexe xisoma Enore aokitereharenae.

<sup>6</sup> Hiyaiya, Iraiti Waiyexe nanekoa nexa:

“Sehali kaloxaimanexe atyo naoka nomani hoka kalikini atyo ite namokene hati tonone hiye wenakalati Sião nali hati kalorexe niyahare. Xala xamani atyo ite tyakekone hoka maisa kaxexamaikohalinikisakita”. (“Sehali kaloxaimanexe”, nita Jesus Cristo xaokaka).

<sup>7</sup> Exe sehali atyo kaloxaimane xiso tyakekoterenae ana. Hoka matyakekoneharenae ana atyo:

“Hati nomaseharenae sehali maxawaiyerehenere atyo kaxomokaka hati tonone hiye”.

<sup>8</sup> Exakere tehitia haiya akiti Iraiti Waiyexe nanekoa nexa:

“Hatyo sehali ite halitinae jiyakoatya hoka hisehityoaha. Sehali ite ahisehityoakisa-hene”.

Hisehityoaha Iraiti Waiyexe matyakekohenahere hiyeta. Exe ene atyo Enore xaokalita tyona enomanaha.

<sup>9</sup> Hoka xiso atyo exaokowisakahare, sacerdote hatene xisoma maheta Xekohaseti ana. Waiyexe hotyali atyo xiso, Enore kaxaikone hotyali terota atyo xiso. Xikaxaokaka Enore waiyexe tyomehenere xiyakai maheta, makaliroti konita kawisa xiso haxaokanala waiyexe ana. <sup>10</sup> Hetati ene maisa Enore anerenae xiso hoka kalikini atyo enomanerena xisaona. Hetati ene maisa waiyekehalkere xomana exairakoaneharera, hoka kalikini atyo waiyekehalkera xomana exairakoaneharera, koxaka airakoaneharetya xiso hoka.

#### *Enore Wakaneharenae*

<sup>11</sup> Noxiyakawali nohinaeharenae, nirae xikakoa: Xiso atyo hahotyaliharenae hawaikoherata xane hoka hákoa tyaonitere akereta. Maika awa kaxawaiityakitereharenae iniyalahare xema xisaonehena. Hatyoharenae aiyalaharetita wisekohare. <sup>12</sup> Maika xirihare xawenane kakoa hoka waiye maniya xisaona matyakekoneharenae koni. Hoka exahe iniyalahare nomaseharenae xakore ite aokaha xiso hoka xománenae waiyexe ite waiyekehaleheta enomanaha. Nikare ite hoka aexakerityaha Enore, Cristo tyohetehenere xowaka.

<sup>13</sup> Xekohaseti hiyeta maika xityakeko tyotya xekohaseti halitinae. Maika Xekohaseti kalorexe Roma nali tyaonitere masakare xaiminisa. <sup>14</sup> Xaiminisa tehitia exomokala xekohasetinae. Hatyonae atyo exaokala xema iniyalahare nomaseharenae iniyalahare mokita, hoka aexakerityahitaha waiye tyomiterena. <sup>15</sup> Hiyaiya, Enore atyo kasani waiyexe taita xisoma aokita hoka ahinityaliyena, maotikonexena niraesekoala xamiyatya maheta. <sup>16</sup> Maika mawaharenehare tyaonitere akereta xisaona. Xakore hoka awa atyo mawaharenehare xawenane hiyeta iniyalahare xateroakisa. Maika Enore wakaneharenae taita xisaona.

<sup>17</sup> Xaiminisa tyotya halitinae, xawaiyetya xihinaeharenae tyakekohatiyena, xaiminisa Enore. Exahe xaiminisa Xekohaseti Roma nali tyaonitere.

#### *Cristo Iniyalahare Xomokaka Hotikisaka*

<sup>18</sup> Xiso wakaharenae, maika xityakeko, xaiminisa harenae xiyekohasena. Awa atyo waiyexeharexe taita xaiminisa. Maika exahe xalijinharexe hoka nikareta tehitia xaiminisa. <sup>19</sup> Xikinatere heko maxemerehare iniyalahare xikaxomokakiterehare kakoa hoka Enore waiye moka xiso. Exaokalita nikare xisaonita. <sup>20</sup> Hoka iniyalahareya xisomita hoka hatyo nahalakoa iniyalahare xikaxomokaka hoka aliyakereya Enore ihalaharehena xikakoa, ximehexaikohare xisaonita iniyalahare xikaxomokakitereharenae kakoa? Hoka iniyalahareya xikaxomokaka waiyexe xománe hiyeta, ximehexaikoharene kakoa hoka Enoreya waiye moka xiso. <sup>21</sup> Hiyaiya, hatyo maheta atyo aoka xiso haomana.

#### *Cristo Atyo Waini Womana*

(Gálatas 1.4; Tito 2.11-14; Apocalipse 1.5; 5.9-11; 7.14)

Xiyaiya, Cristo tehitia iniyalahare kaxomokaka xihiyeta hoka kaxaisaka hoka kasani tyaonitere akereta xisaona maheta. <sup>22</sup> Maisa xoana xowaka hekoti iniyalahare tyomita, exahe hoka maisa xala hare haki hekoti emaoserala semita. <sup>23</sup> Kairawaiyaka hoka maisa hairawane kakoa ekoaxaita. Kaxaisakehenere xowaka maisa xala hare xaisaka aokita. Enore xahita taita atyaha, ehekore taita tyomitere xahita.

<sup>24</sup> Cristo terota haháre hiye kolatya iniyalahare wománe atyalihose xaimaholatyaka hiye kaberekotyakehenere xowaka. Hoka wiwaini iniyalahare wománe ana maheta hoka wikaseheta wenati waiyexe ana maheta. Kawe kaxomokakehenere hiyeta atyo xikinatereheta. <sup>25</sup> Kalaneronae hehanitere ahotyaho nonitata akereta ene xisaonita, xakore hoka kalikini atyo xikaiyakeheta hoka Xikaxaikotyasehare xema xisaheta, exahe xisekohare Kaxaikotyasehare xema hoka.

*Kaiyanityorenae, Kaiyanenehenolonae Nawenane  
(Efésios 5.22-33; Colossenses 3.18-19; 1 Timóteo 3.11-12)*

<sup>1</sup> Nikare tehitiya xiso kaiyaneneronae, maika xaiminisa xexanenena hoka, exahe maisa haiyaharenae Enore niraene xema tyahenere hoka xawenane hiyeta tyakekoha. Maisaiya xoare hekoti xita ihiye. <sup>2</sup> Hiyaiya, xawenane waiyexe, aiminisoawitere hiyeta atyo ite waiyaha hoka tyakekohenaha. <sup>3</sup> Awa atyo xawaiyehalo xaokowihena hoka xamokahalotyoa xiyealiti waiyexe kakoa, exahe hoka xatilikoa mene, exahe imiti waiyexe, karore ako hoka xisoa. <sup>4</sup> Xakore hoka maika xawaiyehalone ximahiyase, xiayekola xoaha hiye tyaona. Hiyaiya, hatyo atyo waiyehaloti waiyexe. Ximehexaikohalo, xawaiyehalo hare hoka hatyo atyo waiye kaisere, maisa atyo kamianexe. Hatyo hare atyo Enore masakare awaiyetita.

<sup>5</sup> Hiyaiya, nikare atyo ohiro waiyexehalolo toahiyerehalona mokahalotyoa hoka atyahahitaha Enore xahita. Exahe haiyanenena hoka aiminisahitaha. <sup>6</sup> Sara atyo nikare tyaona. Aiminisa Abraão, haxekohase aokitene. Hoka kalikini atyo ite ityaninae xisaona, waiyexe xema xisaona, exahe maisa xoare hare ximairita hoka.

<sup>7</sup> Xiso exanenena tehitiya hoka nikareta waiye xamoka xexanityonae. Maika waiyekhalaka xomana emaxaniyatoloneha hoka hatyo hiyeta waiye xamokahene xiayiminira kakoa. Hiyaiya, Enore wenati ijterehereta xomana haretatyoite kaxekaka enomanaha. Maika nikare xisaona hoka maisa xoare hare ahowitikijita xiraexala.

*Waiyexe Nomaka Hiyeta Kirakoanexe Wenati*

<sup>8</sup> Maika nikare xityotya xisaona, hakakoa harenae xahekotya. Xawaiyetyakakoa, xairakoaneharetya kakoa harenae. <sup>9</sup> Awa atyo iniyalahare kakoa iniyalahare xemaisatya, irawaniti kakoa irawaniti xemaisatya. Xakore hoka maika iniyalahare mohenaha xiso hoka wenati waiyexe xaoka enomanaha. Xiyaiya, Enore haomanere aohenere xiso xowaka atyo xoalini hare waiyexe isa xomana aokowi.

<sup>10</sup> Hiyaiya, exakere nexa Iraiti Waiyexe:  
“Xala xamani atyo ihalahaliti, wenati waiyexe aokita haomana hoka awa atyo iniyalahare irae. Hamaoserala hoka halakisa.

<sup>11</sup> Hahalakisa iniyalahare hoka waiyexe taita hisoma. Exahe hatawa wenati waiyexe hoka hatyo xema taita hisaona.

<sup>12</sup> Hiyaiya, Xekohaseti atyo waiye waiyita haliti waiyexenae. Iniraexala semeta minita, hoka kahalakoahareta atyo iniyalahare nomaseharenae kakoa”.

<sup>13</sup> Aliterexeya waiyexe xisoma xaokowita hoka xalaiya iniyalahare mohena xiso?

<sup>14</sup> Kaxiyani, waiye kaiserehareya iniyalahare xikaxomokaka waiyexe xisomitere hiyeta hoka. Awa atyo xala hare ximaira, awa atyo ximawaiyehare hekoti. <sup>15</sup> Maika ximahiyase hiye xiayiminira Cristo tyaona hoka Xiyekohase xaokene. Ximemere xisaona xiyeckoala niyahare, hatya axehena xiso xityakekone tahi xawaiyekahalakaty maheta hoka.

<sup>16</sup> Maika nikare xisaona waiyexe xityakoiyahare kakoa, xiayiminira xoaha kakoa. Nikare ite hoka xikairawaiyakehena, iniyalahare nomaseharenae hare aohenaha xiso, waiyexe maniya xisaonitere Cristo koamaniya hiyeta hoka haihareha. <sup>17</sup> Hiyaiya, waiye kaiserehareya atyo waiyexe hiyeta iniyalahare xikaxomokaka, Enore xaokalitaiya hoka. Iniyalahare xisomitere hiyeta iniyalahare xikaxomokakitere xáhehare nawaiye atyo.

<sup>18</sup> Hiyaiya, Cristo terota atyo waini xomana. Hakirore atyo tyotya halitinae ana waini, iniyalahare enómaneha hiyeta. Hatya haliti waiyexe atyo waini iniyalahare nomaseharenae ana, Enore koamaniya moheta wiso maheta. Eháre atyo waini hoka kaxekasekisakeheta atyo inisekohare.

<sup>19</sup> Hoka hatyo inisekohare xane Iraiti xakai isekohaliti eberexotyakaharenae hiye.

<sup>20</sup> Hatyo isekohalitinae atyo Enore matyakekonehenerenae nisekohare. Etake hamehexaikoharene kakoa atyahahenere, Noé tyomehenere kanowa kalorexe xowaka. Haiyanae

taita kanowa kalorexe ako xane isoaha, ehohisakoaneha atyo 8-hareha hoka maisa waini ahitaha one morehenere xowaka.

<sup>21</sup> Hatyo one atyo batixatyati aimenekoita, kalikini waiye maniya mohititere xiso. Hatyo batixatyati atyo maisa haréti tiheheta maheta xini, hoka Enore anere wenati atyo tyakoyahaliti waiyexeta tyoitere atyo. Exe waiyexe wenati atyo Jesus Cristo kasehetehenere hiyeta kaotyaka. <sup>22</sup> Enokoa atyo xane hoka kalikini Enore fihini maniya tyaonita hoka kaxaikota tyotya anjonae, kalorexenae enokoa nali tyaonitere kalorexenae hoka.

## 4

*Wenatinae Exawareharetyakehetanae*

<sup>1</sup> Hiyeta hoka Cristo kirakoane kaxomokakehenere akereta ximemere tehitia xisaona hoka kirakoane xikaxomokaka kirakoane kaxomokakehenere akereta. Hiyaiya, hatyo kirakoane kaxomokakehenere halakisa iniyalahare. <sup>2</sup> Hatyo hiyeta exaosetaira kalikini ali waikoheko akiwetere akereta, hoka awa atyo halitinae xahekola iniyalahare kaxawaiyityakitere xema xisaona. <sup>3</sup> Hiyaiya, toahiya ene atyo matyakekoneharenanawaiyetiterekahare xema xisaonita hoka xisaonehekoaitata. Hatyo xowaka atyo iniyalahare kaxawaiyakitere xema xisaonita hoka xiháre akitereharenai xisomita, xiserita kawexere, xahikita, kehalahaliti iniyalahare xema xisaonita, exahe enore metalahare xema xisaonita hoka kalore iniyalahare xisomita.

<sup>4</sup> Hoka kalikini atyo matyakekoneharenahakaharetyoita xawenane kakoa hoka kirawanahitaha xiso, maisa enekoniha xisaoheterahare, wenati ewaxirahare, exahe hatyahalikisare xema hoka.

<sup>5</sup> Xakore hoka xanehaite Enore nali hoka axahene. Memere atyo tyaonita, axa maheta kasetaterenae, kamatinan xoaha.

<sup>6</sup> Hatyo niyahare atyo Iraiti Waiyexe kaxakaisaka tehitia kamatinan hiye kaxaxalik-isaka maheta, tyotya halitinae kaseterenae akereta hoka haisekohare kakoa tyaonaha maheta Enore tyaonitere akereta. Ali waikoheko tyotya halitinae kaxaxalisakitere akereta.

*Maika Xikaxaikoawi, Xirihare Xisaona*

(1 Tessalonicense 5.14-18; Tito 3.1-2; Tiago 1.19-22; 3.17-18)

<sup>7</sup> Okoi tyotya xoalini hare miyanaose hikoahena. Hiyeta hoka maika xikaxaikoawi, xirihare xisaona waiye xiraexatyaheta. <sup>8</sup> Maika tyotya xoalini hare xahehare xawaiyetyakaoahena kaiserehahare. Hiyaiya, xawaiyetyati atyo ateroakihitita kahare iniyalahare. <sup>9</sup> Maika xihanako waiye xamoka halitinae, ximairaehekoalahareta. <sup>10</sup> Maika waiye xikaxaiko hawarehare xakini xawaiyorene Enore isehenere xomana hoka ihiyeta xakahinaetyakakoa kaisere. Hoka maika xawaiyorene kakoa xakahinaetya haiyanan, waiye tyaonaha maheta. <sup>11</sup> Xala xamani xakaita hoka xakai Enore niraene. Xala xamani hakita haiyanai ana hoka haka Enore iyateliti ijitere enomana kakoa. Maika nikare xisaohena hoka tyotya xoalini hare hiye Enore kaxaexakerityaka Jesus Cristo hiyeta.

Maika Cristo kakoa kaihalaharetyaka, iyateliti harenae kakoare tyaona mene matyotenehahare. Eko xoaha.

*Kirakoanexe Tyakekohatiye Nawenane*

<sup>12</sup> Noxiyakawali, nohinaeharenan, awa atyo ximawaiyehare xihasakaharetyaka how-itiharexe xahalakoaitereharenan kakoa. Hiyaiya, hatyohare kaotyakitete xomana atyo maisa makaotyakeneterehahare haiyaharenan ana xini. <sup>13</sup> Hoka maika xihalahare. Hiyaiya, Cristo iniyalahare kaxomokakite akereta xikaxomokakita. Hoka tyohetehenere kalorexe tyaona maheta xowaka masakare xihalahare ekakoa. <sup>14</sup> Waiye kaisere xikairawaiyakehena Cristo koamaniya xisaonitere hiyeta. Hiyaiya, hatyohare atyo hotikijita xomana Enore Nisekohare waiyexe tyohenere xomana.

<sup>15</sup> Hoka awa atyo iniyalahare xisomehena. Xala xamani aisarexe, kaiwarexe, xalijinharexe, hatya nawenane watyaliterehahare harenan xinekon hoka kotare iniyalahare

kaxomokaka hatyo nahalakoa. <sup>16</sup> Hoka Cristo koamaniya xisaonitere hiyetaiya nikare iniyalahare xikaxomokakita hoka awa atyo xihaihare. Hoka maika xihalahare Enore kakoa, hiyaiya, Cristo nexare kakoare atyo xiso.

<sup>17</sup> Hiyaiya, xaxalisati ferakene aose xane hikoa hoka Enore anerenae hotyali hotohare ite kaxaxakehena. Hoka hatyo xaxati atyo ite wikkaoa hotohare hoka xoana ite tyahenae Enore niraene waiyexe matyakekonehenerenae? <sup>18</sup> Hiyaiya, Iraiti Waiyexe nexa: “Waiyexeharexenaeya atyo ite howitihare kaiyakeheta hoka xoana ite tyahenae matyakekoneharenae, iniyalahare nomaseharenae hoka?”

<sup>19</sup> Hatyo hiyeta iniyalahare kaxomokakiterenae Enore xaokalita, maika hawenaneha waiyexe maniya moka, exahe hoka tyakekoha kaiserehare tyotya xoalini hare tyomehenere. Hatyo atyo maisa maotyanexe hakaxaikone hotyali.

## 5

### *Enore Anerenae*

<sup>1</sup> Natyo tehitiya atyo tyakekohatiyenae kaxaikotyasehare hoka kalikini naotyakijita haiyaharenae tyakekohatiyenae kaxaikotyaseharenae. Hiyaiya, Cristo atyo iniyalahare kaxomokaka nohaotita hoka haxowaka ite haikoahetehena Xekohaseti tyahenae maheta hoka enali ite notyaona. <sup>2</sup> Naotyakijita, kasani waiye xamoka halitinae Enore isehenerenae xomana naokita. Maika hatyoharenae xisoma xihalaharene kakoa, aokitere akereta. Awa atyo ximaihalaharenene kakoa hatyo harenae xisoma. Awa atyo olo waiyakahare taita xahaka. Maika xakahinaetya maheta terota xahaka. <sup>3</sup> Awa atyo kaxekakehenerenae xomana xekohase xisaona xaokowi. Maika xahotikhena xawaiyexeharene enomanaha tyaconaha maheta xisaonitere akereta. <sup>4</sup> Nikareya hoka Kaxaikotyatiye kaiserehare tyohetehenere xowaka ite seriti hoko waiyexe isa xomana. Maisaiya atyo ewerokene tyotita.

### *Maika Ximaxahenerahare Xisaona (Filipenses 2:3-9; Tiago 4:6-10)*

<sup>5</sup> Exahe xiso, xomahalitinai harenae, hoka maika xityakeko inityohalitinae niraene. Maika xityotya xakahinaetya kakoa ximaxahenerahareneta. Hiyaiya, Iraiti Waiyexe nanekoa atyo nexa: “Enore atyo maisa awaiyetyare ahinityarexenae hoka kahinaetita atyo maxaheneraharenae”.

<sup>6</sup> Hiyeta hoka ximaxahenerahare xisaona Enore kinaterexe haotita hoka aeroritya xiso, enaosehena hoka. <sup>7</sup> Ximawaiyeharene tyotya Enore ana xahalakisa. Hiyaiya, hatyo atyo kaxaikota xiso.

<sup>8</sup> Maika xirihare, maika xikaxaikoawi. Hiyaiya, Tihanare atyo tonahokoita xiso, leão omiritere akereta, tawita hatawane xahita, nisene maheta. <sup>9</sup> Hekoira xityakekone kakoa xisaona, xijiyyahaotyaira Tihanare. Hiyaiya, waiyekehala kita atyo xomana hakakoare waikohekoa xiso akereta kirakoane tyaconitere xihinaeharenai tyakekohatiyenai tahi.

<sup>10</sup> Xakore hoka iniyalahare xikaxomokakehenere inira najikinita ite Enore kalorexe xawaiyetyati kakoare kahinaetya, aiyatelikisa harenae xiso. Hatyo atyo aoka xiso haomana hoka wenati matyotenehare maniya moka xiso Cristo hiyeta. <sup>11</sup> Maika enomanere iyateliti matyotenehare tyiona, eko xoaha.

### *Tyawaxati Miyanityenae*

<sup>12</sup> Naxairaita exe kiranexe babera Silas kahinaera kakoa. Nomani atyo exe wihinaehare masakare tyakekohatiye. Naihalahalinikisa xiso naokowi nawenani hiyeta xoaha. Exehare atyo Enore nawaiyexehare aliterexe. Maika xikinatere xisaona Enore koamaniya.

<sup>13</sup> Tyakekohatiyenae Babilônia nali tyaconiterenae, Enore haomana aohenerenae, haxakaisakeheta aoka. Nityani Marcos haxakaisaka aoka.

<sup>14</sup> Maika xikatyawaxa kakoa hoka xasohitanakolisa kakoa. Maika Cristo koamaniya nawenatyaseharenae waiye mehexaikohare tyaconaha.

## 2 Pedro

<sup>1</sup> Natyo Simão Pedro atyo Jesus Cristo wakanehare, exahe iniraene kakoare hoka nax-airatya exe baberane xiso waiye xityakekohenerenai wiso akereta Enore nawaiyexehare, Wiyasehareheta Jesus Cristo xoaha hiyeta.

<sup>2</sup> Maika xawenane waiyexe, ximehexaikoharene harenai aerorityoa mene Enore, Wiyekohase Jesus tahi waiyekohalakitere xomana hiyeta.

### *Enore Kawisa Hoka Aokita Haomana*

<sup>3</sup> Enore haiyatere hiyeta tyotya waokitereharenae ijita womana, aokitere akereta wisaona maheta. Waiyekohalakitere womana Jesus Cristo kawihenere wiso hoka waiyexe maniya, enawaiyexehare xoaha akereta wisaona aohenere hiyeta.

<sup>4</sup> Nikare isa womana kahare iyateliti harenae waiyexe isa aokowitereharenae waiye wisaona maheta. Nikare tyoma hoka hatyoharenae hiyeta maisa iniyalahare mawenekoaretyare kaxawaiyityakitere xema wisaona maheta. Hoka hatyo akereta wisaonita maheta. <sup>5</sup> Hatyo hiyeta xaiyateretyoahena hoka xityakekone kakoa xahohisakoatya xawaiyetyati. Hoka xawaiyetyati hiyeta xahohisakoatya waiyoliniti. <sup>6</sup> Exahe waiyoliniti kakoa xawaiyehotyalikisa kaxaikoawiti. Kaxaikoawiti kakoa xawaiyehotyalikisa mamaxaharenehaliti. Mamaxaharenehaliti kakoa xawaiyehotyalikisa waiyexehaliti. <sup>7</sup> Exahe waiyexehaliti kakoa xawaiyehotyalikisa hinaehaliti tyakekohatiye, exahe hinaehaliti tyakekohatiye kakoa xawaiyehotyalikisa xawaiyetyati.

<sup>8</sup> Exeharenae atyo xaokita xomana. Tyotya exeharenaiya xema xisaona hoka ekakoita kahare waiyexeya xisoma xawenane Jesus Cristo koamaniya hiyeta. <sup>9</sup> Hoka xala xamaniya atyo maisa exeharenae kakoare xini hoka hatya maxosehare akere atyo, xoana hatya ininae waiyakaitere akere atyo, hoka maotyaneheta háomane iniyalahare kaxemaisatyakehetehenere.

<sup>10</sup> Hatyo hiyeta, nohinaeharenae, waiye maniya taita xisaona, Enore kawihenere, aohenere xiso koamaniya. Nikareya xisaona hoka maisaiya xoana hekota iniyalahare xisomehitita. <sup>11</sup> Nikare ite hoka maisa ximakaokeneta Wiyekohase, Wiyasehareheta Jesus Cristo nawenakala matyotenehare nali.

<sup>12</sup> Hiyeta hoka nirae menite xikakoa, xotya maheta exeharenai. Koxaka xakore xawaiyore hatyo akiti kakoa, xikinatere xakore atyo xisaonita exema hoka. <sup>13</sup> Exakere noxahekoli: hekota nokasetata hoka ehekoretaiya exeharenai kakoa naxotyanikisa xiso. <sup>14</sup> Hiyaiya, waiyekohalakita atyo nomani nohalakiri exe noháre wainiterehare, Wiyekohase Jesus Cristo iraehenere nohiye akereta. <sup>15</sup> Hatyo hiyeta ite xoalini hare notyoma hoka nowainihenere najikinita xotyaxematya exeharenae maheta.

### *Cristo Nawenane Kalorexe Waiyasehare Tahi*

(Mateus 17.1-8; Marcos 9.2-13; Lucas 9.28-36)

<sup>16</sup> Maisa xahekore xini wiyakaihenere xihije Wiyekohase Jesus Cristo tyoaneneheta haiyatere kakoa tahi xowaka. Waiyiya atyo enerore wiyo senae kakoita. <sup>17</sup> Enexe Enore aerorehenerene xowaka nali wisaonita. Iraiti enokoatare Enore nalitare nexa iraehenere wasema: “Exe atyo Nityani noxiyakawali, kalore aihalahalinikijita natyo”. <sup>18</sup> Wiso terota wasema exe Iraiti Waiyexe enokoatare, Xekohaseti Jesus kakoa tyairi waiyexe heno wisaonitere xowaka.

### *Exe Baberane Atyo Enore Niraene (2 Timóteo 3.14-17; 1 Pedro 1.24-25)*

<sup>19</sup> Hatyo hiyeta wityakeko kaiserehare iraiti xakaisaseharenae xakaihenere. Waiye xasema exe iraiti. Hiyaiya, motya atyo xaokanatyakalati makaliro koni aokanaitere akereta hoka ekakoita ite ferakoahena hoka xorese ferakoa maniyehenere aokanaitere xomana akereta atyoite aokanaty ximahiyase hiye. <sup>20</sup> Maika tyotya xoalini hare

nonitata exehare xotya: Maisaiya atyo xala hare Iraiti Waiyexe haomanita awaiyekehalaika. <sup>21</sup> Hiyaiya, maisa atyo Iraiti Waiyexe halitinae xaokala xema xini kaotyaka. Xakore hoka halitinae xakaihakahenere Enore niraene xowaka atyo Isekohaliti Waiyexe kahinaetyahene hoka Enore nalitare iraiti tyoitere xakaihaha.

## 2

*Xaotyakisatiyena Metalaharenae Tyakekohatiyena Koni  
(Colossenses 4.2-8; 1 Timóteo 1.7-10; 4.1-3; Judas 4-19)*

<sup>1</sup> Toahiya iraiti xakaisaharenae metalahare kaotyaka halitinae koni. Nikare tehitiya ite kaotyaka xinekoni xaotyakisatiye metalaharenae. Aotyakisaha ite xiso hawareharexe xaotyakiyaho, mawenekoaretyaraho, maoserare kakoa. Maisaite aokaha xaotyakisatiye haiyaseharenahitaha hiye, hoka hatyohare hiyeta ite haxerore kamawenekoaretyakaha. <sup>2</sup> Kahare haliti ite iniyalahare enómaneha xema tyona. Hoka hatyo halitinae hiyeta ite wenatyaho waiyexe kairaeharetyaka kahare. <sup>3</sup> Hoka olo haxawaiyeraha hiyeta ite hatyo iraiti xakaisaharenae metalaharenae maoserahenaha xiso kaoloxere tyonaha maheta xihenota. Xakaihakahenaha xihije haxahekolitaha. Xakore hoka toahiyita atyo iniyalahare maniya exomokasehareha wahakoita enomanaha, emawenekoaretyaseha maisa nemakare.

<sup>4</sup> Hiyaiya, Enore atyo maisa halakijita anjonae iniyalahare tyomehenerenae. Xawatyahene toloko hatekoakore ako hoka kamatiherahi kakoa olatyoare halakisahene makaliroti koni Xaxalisati Ferakene kijiya niyahare.

<sup>5</sup> Enore maisa halakijita toahiyereharenae hoka one kaloxere axikatya iniyalahare nomaseharenae ana hoka waini tyotyaha. Noé taita atyo iyehet, 7-hare ihinaeharenae kakoa. Noé atyo wenati waiyexe xakaihenere.

<sup>6</sup> Nikare Enore irikati kakoa mawenekoaretya wenakalatinæ Sodoma, Gomorra xoaha. Hoka hatyo atyo hotikijita iniyalahare nomaseharenæ xomokaka naheta maniya. <sup>7</sup> Hoka iyeheha Ló enalita, haliti waiyexe hoka kalore amaikehareta hatyo halitinae nawenane iniyalahare kakoa. <sup>8</sup> Hatyo haliti waiyexe tyanonitera enekoniha amaikehareta, waiyehena, semehena xoaha hatyo halitinae nómante iniyalahare ferakiti nihatayaka hoka.

<sup>9</sup> Nikare Enore waiyita haliti waiyexeharexenæ, hoka waiyoreta atyo waiye maniya haxomokarehenahitene kakoa ehasakaharetyakaha nonitata. Nikare tehitiya waiyore mokita iniyalahare nomaseharenæ iniyalahare kaxomokaka maheta, Xaxalisati Ferakene niyahare maheta. <sup>10</sup> Enore ite masakare iniyalahare moka ewaxirahare kaxawaiyityakitera xema tyanoniteraharenæ, exahe hoka xekohasetinæ nerore maxaiminiriteraharenæ.

Xe xaotyakisatiyena metalaharenæ tyakekohatiyena koni tyanoniteraharenæ maisa semaxematyahatiyeha, ahinityaliha, maisa ini hekoti aiminisareha anjonæ. Iniyalahare iraetaha exaokakaha. <sup>11</sup> Hiyaiya, anjonæ xakore exe xaotyakisatiye metalaharenæ xahehare niyatere hoka maisa iraeharetyarahene Xekohaseti nahalakoa. <sup>12</sup> Hoka exe halitinae atyo hamaxahekolaharenæ tyomahitaha iniyalahare. Kirakaharenæ tyona hoka katawakaha hoka kaxaisakitera akereta atyo. Iraehkoatyahitaha atyo xoalini hare mawaiyekahalakitera hare enomanaha tahi. Hatyo hiyeta ite kamawenekoaretyakaha kirakaharenæ akereta. <sup>13</sup> Iniyalahare ite kaxomokakaha, haiyanæ emakawatihalikihenahere hiyeta. Hiyaiya, ferakoita atyo tyomahitaha iniyalahare ahekotyahitetherahere. Ahohisakoatyahenaha xikakoa kanakairaha maheta hoka ehaihalikisareha, akomaniyataykisareha, nikare atyo tyonahitaha hamaoseralaha kakoa. <sup>14</sup> Ohiro waiyehenaha hoka maisa iniyalahare hamaxahekorenæ kakoa waiyareha. Maisa maxaharexeha iniyalahare háomaneha. Maoseratyahitaha ininæ tyakekohenerenæ. Olo haomanaha aokahitere tahi kahare ahekotyahitaha. Hoka Enore ite iniyalahare mokahene. <sup>15</sup> Hehanahitaha halakihenahere wenati waiyexe hiyeta. Beor ityani Balaão tyaochenere akere tyonahitaha. Balaão atyo iniyalahare tyoma hoka ihiyeta kaoloxere tyona aokowita. <sup>16</sup> Hoka kawatyalisaka

iniyalahare enómane hiyeta. Burro irae ekakoa haliti xako hoka hatyo iraiti xakaisahare hatyaharene miyatya.

<sup>17</sup> Hatyo halitinae atyo toloko sekaka maonexahare akereta, kaiminiti kinatyaw-initi hoholatitere akereta tyaonahitaha. Enore atyo toloko hatekoakore makakore memere mokita enomanaha. <sup>18</sup> Kahare iraetaha, ahinityahitaha, aokowiharetyoahitaha. Hatyaharahitaha, haxahekolaha iniyalahare kaxawaiityakitere kakoa maoseratyahitaha haiyanae komitehena iniyalahare halakijiterenae. <sup>19</sup> Wenati waiyexe xakore hotikisa aokowyahitaha hoka iniyalahare tyomahitere wakanehareha atyo. Hiyaiya, xoare xamani atyo jiyahaotya haliti hoka hatyo wakanehare atyo tyaonita. <sup>20</sup> Hatyo hiyeta haiyanae Xekohaseti, exahe isekohaliti Niyasehare Jesus Cristo xema tyao-henerenai hoka emawenekoaretyakahola nonitata kaiyakehenahitaha. Xakore hoka hatyo najikinita iniyalahare ehaikoakihenahitene hoka hatyo ximita tyaohititerenai atyoite hetatiye hawenaneha xahehare howitiharene axomokanikihenaha imiyanaose xowakehena hoka.

<sup>21</sup> Hiyaiya, waiye kaiserehare eneya atyo maisa Iraiti Waiyexe semahitaha hoka semaha najikinita atyo haikoahenahitaha hajikiniha hoka waiyexe wenati nonitata halakisahitaha waiyexe xaotyakisati kaxekakehenere enomanaha. Hetatiye xahehare nowaxirahare enawenaneha tyaona. <sup>22</sup> Hatyo nikare tyaoohenahere hiyeta exe iraiti nika aliterexe: “Kajolo xaneheta hajiratene anita, boloko katihalisakehetehenere xane tomololisoaheta olowihihi koni”.

### 3

#### *Xekohaseti Tyoanene*

<sup>1</sup> Nohinaeharenæ, noxiyakawalinæ, exe atyo ihinamenehena naxikaita babera xo-mana. Exe hinamanae koa atyo waiyexe kakoa naxahekotyanikisa, nairihalinikisa xiso maheta. Exeharenæ naxotyanikisa xiso maheta. <sup>2</sup> Kasani xotyaxematy toahiya xowaka Waiyexe Iraiti Xakaisaharenæ iraehenere naokita. Wiyekohase, Wisekohare Niyasehare xaotyakiraho kakoa exaotyakiraharenæ aotyakihenere xiso xotyaxematy naokita.

<sup>3</sup> Exehare hotohare waiyekehalaka xomana naokita: Miyanitiye xowakehenaite hoka kaotyakehena xomana halitinae haxahekola ewaxirahare ximita tyaoniterenæ hoka koexahalihenaha ite xiso. <sup>4</sup> Hoka nehenaha ite: “Tyohetaka aokwi, alitereka? Aliyo tyaonita? Wexenai koxaka waini hoka tyotya hekota tyaonita, hetati waikohe kao-makehenere akereta”. <sup>5</sup> Exe koexahaxaiterena ite maisa exeharenæ otyaxematy aokowitaha: Toahiya xowakiya Enore irae hoka enokoa waikohe harenæ kaotyaka, one xata waikohe kaotyaka, one nekesexata. <sup>6</sup> Exahe tehitiya hoka one morene hiyeta toahiyere waikoheko kamawenekoaretyaka. <sup>7</sup> Hoka waikohe, enokoanae kalikini tyaoniterenæ hatyo niraeneta Enore niraene mokitahene kamawenekoaretyakaha ma-heta irikati kakoa. Tyaonahitaha atyo Miyanitiye Xaxalisati Ferakene niyahare, halitinae iniyalahare nomaseharenæ mawenekoaretyaka ferakene niyahare.

<sup>8</sup> Noxiyakawaliharenæ nohinaeharenæ, awa atyo ximaotyanehena exe harenæ: Enore ana atyo haki ferakene 1.000-wanone akereta, 1.000-wanone hoka haki ferakene akereta. <sup>9</sup> Hiyeta hoka Enore atyo maisa howitiharexe tyoma aokowiterehare kakoa, maisa atyo haiyanae ehowitiharene tahi iraetere akereta xini. Maisa atyo kaholawakere xikakoa, kasani maisa xala hare kamawenekoaretyaka aokare hoka. Kasani atyo tyotyaha halakisa iniyalahare háomaneha aokita.

<sup>10</sup> Hoka Xekohaseti kaokeneheta Ferakene ite kaiwarexe kaokitere akereta, maxatya-hakahareta. Hatyo Ferakene ite enokoa maotyakaheta emahaliti kaheneharexe kakoa. Tyotya xoalini hare enokoa, waikoheko tyaoniterenæ ite kakeratyaka. Waikohe, tyotya enakoa tyaoniterenæ xoaha ite kera hoka maotyakaheta.

<sup>11</sup> Tyotya exe harenæ ite kamawenekoaretyakehena, waiyekehalakita xomana hoka xoare hare halitini ite xisaona xaokowihena? Maika xawenane Enore aokitere akereta

kaisere xamoka, enomanerena xisaona. <sup>12</sup> Maika xatyahahena Enore tyoanene Ferakene xahita, waiye xisaohena hoka haxerore tyoheta. Hatyo Ferakene atyo ite enokoa kamawenekoaretyaka irikati kakoa, tyotya enokoa, waikohekua tyaoniterena ite hoka kololo. <sup>13</sup> Koxaka atyo Enore enokoa waitare, waikohe waitare xoaha kaotyakene aoka. Hatyo nali atyo waiyexe wenati taita tyaonita. Hatyo xahita watyahita.

*Maika Heko Xityakekone Xema Xisaona*

*(Filipenses 4:1; 2 Timóteo 2.1-3; 4.1-2; Hebreus 4.11; 10.32-37)*

<sup>14</sup> Hiyeta hoka nohinaeharenae, noxiyakawalinae, hatyo xowaka niyahare xatyahita hoka maika xaiyateretyoa xawenane kakoa waiye ximehexaikohare xisaona, exahe hoka iniyalahare ximaomanehare hoka maisa xihaihareta iniminika hoka hatyo xowakehena ite hoka ihalahare xikakoa. <sup>15</sup> Xotyaxematyua Wiyekohase haikoahaneheta: Ekoamaniya halitinae tyaona aokita hoka hatyo hiyeta maisa kaholawakere hahaikoaneheta kakoa.

Hatyo tahi tehitiya wihinaehare, wixiyakawala Paulo xairatya xomana, Enore waiyoliniti isehenere enomana hiyeta. <sup>16</sup> Tyotya xairahenere baberanae koa hatyo tahi akiti xairatya. Haiyanae baberane xairahenerekua howitihare xawaiyekhalakatyaka hoka haiyanae mawaiyoreharenae, inira tyakekoterena xoaha ehaikoare awaiyekhalakatyahitaha. Nikare atyo tyaonahitaha haiyanae hoka hatyotaha atyo mawenekoaretyoawi ahitaha.

<sup>17</sup> Hoka exehare koxaka waiyekhalaka xomana, nohinaeharenae. Hiyeta hoka maika xirihare hoka maisa iniyalahare nomasehare tyaoniterena maoserahena xiso hoka exaotyakiraha ehaikoarexe koamaniya xisaonita hoka xikinatere xisaonitere aoseta xakikijoita. <sup>18</sup> Xakore hoka maika heko xisaona Wiyekohase, wisekohare Niyasehare Jesus Cristo nawaiyexehare, exahe waiyorene xema xikinatere kaiserehare xisaona maheta. Maika kaihalaharetyaketa ekakoa kalikini, matyotenehare. Eko xoaha.

## 1 João

### *Iraiti Waiyexe*

<sup>1</sup> Waxairatita xomana Iraiti Waiyexe, waikohe, enokoa maomakaharene xowakita tyaohenere tahi. Wasema tyotya iraeterehare, waiye wiyaiyene xoaha. Wiyaiyene exahe hoka wekaokakisa wikahe ihiye. <sup>2</sup> Hatyo wenati waikatehare kaotyaka hoka wiyaiyene hoka hatyo hiyeta wiraeta, wiyakaita hatyo wenati matyotenehare xihiye. Enore nali ene tyaonita hoka hotikisene womana. <sup>3</sup> Wiyakai wiyaiyehenere, wasemehenere xihiye, wihinaeharenae kaiserehare xisaona maheta. Wiso, Enore, Jesus Cristo hinaeharenae wisaonitere akereta maheta. <sup>4</sup> Waxairatya exe xomana wihalaharene kalore tyaona maheta.

### *Enore Atyo Xaokanatyakalati*

<sup>5</sup> Iraiti Cristo isa womana hoka wiyakaihenere xihiye atyo exe: Enore atyo xaokanatyakalati, maisa makaliroti aka ihiye. <sup>6</sup> Hiyeta hoka “Enore xema taita wisaonita”, wexaiya hoka hatyo xowakita makaliroti koni wisaonita hoka wamaoseraita atyo wisomitere, wiraetere xoaha kakoa. <sup>7</sup> Hoka aliterexeya xaokanatyakalati xema wisaonita hoka Enore tyaonitere xaokanatyakalati xema akereta wisaonita hoka wawaiyetyakakoaiya hoka Jesus timalaxaiya tiheheta wiso tyotya iniyalahare wománe nonitata.

<sup>8</sup> “Maisa atyo iniyalahare wisomare”, wexaiya hoka wamaoseraityoawita atyo, maisa atyo Iraiti Waiyexe xema xini wisaonita. <sup>9</sup> “Aliterexe iniyalahare notyomita”, wexaiya wiraexatya Enore hiye hoka iraetere akereya moka wiso. Enore atyo tota maniya taita tyaonita hoka iraetere akereya tyoma hoka tihehetaiya wiso iniyalahare wománe nonitata hoka maotyanehetaiya iniyalahare wománe. <sup>10</sup> “Maisa iniyalahare wisomare”, wexaiya hoka Enore atyo maoseratyare waokita. Maisa atyo iniraene xema xini wisaonita.

## 2

### *Cristo Kahinaetita Wiso*

(Hebreus 10.10-14; 1 Pedro 1.18-21; 1 João 1.8-9; 5.12)

<sup>1</sup> Haré xoimanae, exehare naxairatya xomana maisa iniyalahare xisomita maheta. Xakore hoka hatyaiya iniyalahare tyoma hoka Jesus Cristo atyo waiyexe. Wikahinaetyase Hanexe nali hairaene kakoa kahinaetita wiso. <sup>2</sup> Hiyaiya, Jesus Cristo hiyeta terota iniyalahare wománenae kaxemaisatyakeheta. Maisa wománenai taita xini, tyotya halitinae nómame tehitia.

<sup>3</sup> Enore xaotyakiraho xemaiya wisaona hoka aliterexeya atyo exema maniya wisaonita. <sup>4</sup> Hoka hatyaiya, “Enore xema maniya notyaonita” nexaiya hoka maisa exaotyakiraho tyaonare hoka maoseratita atyo, maisa atyo Iraiti Waiyexe xema tyaonare. <sup>5</sup> Hoka hatyaiya atyo iniraene xema tyaonita hoka hatyo atyo awaiyetitene kaiserehare. Nikareya atyo hoka aliterexe atyo Enore koamaniya wisaonita. <sup>6</sup> Xala xamani atyo Enore xema maniya tyaonita aokowi hoka Cristo tyaonitere akeretaiye atyo tyaona.

### *Waitare Xaotyakisati*

<sup>7</sup> Exe xaotyakiye tahi naxairaitere xomana atyo maisa waitare xini, nohinaehare, noxiyawakalinae. Hetati iraiti xasemehenere xowaka exe xaotyakiye xasema. <sup>8</sup> Hoka naxairaitere xomana xaotyakiye atyo waitare. Cristo hiye kawaiyaka, exahe xihiye tehitia hoka kawaiyaka. Hiyaiya, makaliroti tyotehena hoka xaokanatyakalati waiyexe koxaka aokanaita.

<sup>9</sup> Xala xamaniya waiyexe maniya taita tyaonita aokowi hoka kirawaneta hahinaehare hoka maoseraitaiya, makaliroti koni atyo tyaonitata. <sup>10</sup> Xala xamani atyo awaiyetita hahinaehare hoka xaokanatyakalati koni atyo tyaonita hoka maisaiya xoare hiyeta

hatya iniyalahare aomanekijitene. <sup>11</sup> Xala xamani atyo kirawaneta hahinaehare hoka makaliroti koni atyo tyaonita. Makaliroti koni tonita, maisa waiyorexe haetonane kakoa, mawai waiyanetene atyo.

<sup>12</sup> Iniyalahare xománenae koxaka kaxemaiyaretyakeheta Cristo hiyeta, hoka hatyo hiyeta naxairatya xomana, haré xoimanae. <sup>13</sup> Nexekatinae, waikoheko kaomakehenere xowakita tyaonitere atyo xiayiyanehare hoka hatyo hiyeta naxairatya xomana. Xoimahalitinae, Tihanare xijiyaohaohenere hiyeta naxairatya xomana. <sup>14</sup> Haré xoimanae, Enore xema atyo xisaonita hoka hatyo hiyeta naxairatya xomana. Nexekatinae, waikoheko kaomakehenere xowakita tyaonitere atyo xiayiyanehare hoka hatyo hiyeta naxairatya xomana. Xoimahalitinae, xikinatere atyo, exahe Enore niraene xema atyo xisaonita hoka koxaka Tihanare xijiyaoha hoka hatyo hiyeta naxairatya xomana.

*Maika Awa Iniyalahare Xema Xisaona  
(Efésios 5.11-12; Colossenses 3.5-9; Hebreus 3.7-13)*

<sup>15</sup> Awa atyo xawaiyetya wenati waikohekoare, exahe waikoheko tyanoniteraharenae hoka. Waikoheko tyanoniteraharenae atyo xawaiyetya hoka maisa atyo Wexe Enore xawaiyetyare. <sup>16</sup> Tyotya xoalini hare ali waikoheko tyanonitere atyo maisa Enore nalitare xini. Ali haliti awaititeraharenae, xosetinae awaititeraharenae, xoalini hare kakoa kaxaokowiharetyoakitere atyo maisa Enore nalitare xini. Waikohekoatare terota atyo. <sup>17</sup> Ali waikoheko tyanoniteraharenae, exahe kaxawaiyetyakiteraharenae atyo tyotere. Hoka xala xamaniya atyo Enore aokitere akereta tyaonita hoka hatyo atyo ite tyaota mene.

*Cristo Nahalakoahare*

<sup>18</sup> Okoi imyaniki ferakenehena, haré xoimanae. Koxaka xasema Cristo nahalakoahare kaotyakene tahi. Kalikini koxaka Cristo nahalakoaharenae kaotyakita kahare. Hoka hatyo hiyeta waiyekhalakita womana okoi imyaniki ferakene hikoahenere. <sup>19</sup> Aliterexe halakisaha wiso, maisa atyo winekoniyea xini hoka. Winekoniyea hoka maisa halakisahitaha wiso. Xanehetaha wonita waiyekhalakahareha maheta, maisa hatyanae winekonitare xini hoka.

<sup>20</sup> Hoka Cristo atyo Isekohaliti Waiyexe axikaita xomana hoka hatyo hiyeta xawaiyoreta aliterexe kakoa. <sup>21</sup> Hiyeta hoka naxairatya xomana. Maisa ximawaiyorene aliterexe kakoa hiyeta xini. Xawaiyoreta ekakoa hoka hatyo hiyeta naxairatya xomana. Maoserat�are atyo maisa aliterexe xema tyaoniterenae konitare xini. Hatyohare waiyekhalakita tehitia xomana. <sup>22</sup> Xala atyo maoseratyaliye? Étakehare Jesus maisa Enore Kalorexe Aohenere xini aokiterehare atyo maoseratyaliye. Hatyo atyo Cristo nahalakoahare. Maisa atyo tyakekore Enexe, exahe Ityani hoka. <sup>23</sup> Xala xamani atyo maisa tyakekota Ityani hoka maisa tehitia atyo tyakekore Enexe. Hoka xala xamani atyo Ityani xema tyaonita hoka Enexe xema tehitia atyo tyaonita.

<sup>24</sup> Hatyo hiyeta heko xotyaxematya hetati xowakiyita xasemehenerehare iraiti. Hekoya hatyoharenae xotyaxematya hoka hekoya hahotalita xisaona Ityani, Enexe xoaha kakoa. <sup>25</sup> Exe terota Cristo isa womana aokowi: wenati matyotenehare.

<sup>26</sup> Haiyaharenae maoseratya aokowita xiso hoka nikare naxairaita etahi xawaiyore maheta ekakoaha. <sup>27</sup> Hoka Cristo atyo Haisekohare isa xomana. Hekoya Inisekohare tyaonita xihye hoka maisaiya xoare maheta hatya aotyakijita xiso. Hiyaiya, Inisekohare atyo aotyakijita tyotya tahi, exahe exaotyakiranae atyo maisa maoserare xini, aliterexe atyo. Hiyeta hoka maika xityakeko Inisekohare xaotyakira, exahe heko haxawalita xisaona Cristo kakoa.

<sup>28</sup> Maika heko haxawalita xisaona Cristo kakoa, haré xoimanae. Nikare ite hoka tyohetehenere xowaka maisa wimairita, wihaiharet, hoka maisa wateroita enonita.

<sup>29</sup> Cristo atyo waiyexehare, koxaka hatyohare kakoa xawaiyoreta. Nikare tehitia xala xamani waiyexe taita tyomita hoka hatyo tehitia atyo Enore ityani.

## 3

*Enore Ityaninae*

<sup>1</sup> Kaxiyani, Wexe Enore kalore awaiyetita wiso! Kalore atyo awaiyetita wiso hoka Enore ityaninae wikakaexaretyakita. Aliterexe ityaninae wiso. Hoka matyakekoneharenæ ana atyo maisa wawaiyekehalaaharex, maisa Enore tyakekoreha hoka. <sup>2</sup> Kalikini atyo Enore ityaninae wisaona, nohinaeharenæ, noxiyakawalinae. Waheta maniya hoka xoana xamani wisaohena, kalini atyo maisa waiyekehalaahare womana. Xakore hoka exe kakoa atyo wawaiyoreta: Cristo ite kaokehetehena hoka hatyo akereta ite wisaona, exahe hoka waiye ite wiayiylene. <sup>3</sup> Xalanae xamani atyo exe xema tyaonita hoka atyahita Cristo xahita hoka hatyoahitaha iniyalahare maomanehenahititaha, Cristo iniyalahare maomanehare akereta.

<sup>4</sup> Xala xamaniya atyo iniyalahare tyoma hoka maisa Enore xaotyakiraho xema tyaonare hoka kaxawatyakaiya eheno. Hiyaiya, maisa atyo xaotyakiyaho aokitere akereta tyaonare hoka iniyalahare tyomita. <sup>5</sup> Koxaka waiyekehalaahare xomana: Cristo atyo tya hoka iniyalahare wománenæ emaisaheta maheta. Hatyo atyo maisa iniyalahare nomasehare xini. <sup>6</sup> Maika xala xamani Cristo koamaniya tyaonita hoka maisa heko iniyalahare tyomihitita. Hoka xala xamani atyo iniyalahare tyomita hoka hatyo atyo maisa xoana xowaka waiyarene, exahe waiyorexe xoaha ekakoa.

<sup>7</sup> Xirihare, waiya aliya hoka xikamaoseratyaka, haré xoimanae. Waiyexe nomasehare taita atyo waiyexehare, Cristo nawaiyexehare akereta. <sup>8</sup> Xala xamani atyo iniyalahare heko tyomita hoka hatyo atyo Tihanare anere. Hatyo Tihanare atyo iniyalahare tyoma hetati waikohe kaomakehenere xowakiyita. Hatyo hiyeta Enore Ityani tya, emaisatya maheta Tihanare nómanenæ iniyalahare.

<sup>9</sup> Xala xamani atyo Enore ityani hoka maisa heko iniyalahare tyomehitita, Enore Nisekhare tyaonita ekakoa hoka. Enore ityani atyo hoka hanexe Enore akereta maisa aliyakere iniyalahare tyomihitita. <sup>10</sup> Exakere waiyekehalaahare womana Enore ityaninae, exahe Tihanare ityaninae akiti kakoa hoka: Xala xamani atyo maisa waiyexe tyomare, exahe maisa hahinaehare awaiyetyare hoka maisa atyo Enore ityani xini.

*Xawaiyehena Haiyanae*

<sup>11</sup> Iraiti xasemehenere hetati xowakita atyo exe: Maika wawaiyetya kakoa. <sup>12</sup> Maisaiya atyo Caim akereta wisaona. Tihanare anere atyo hoka haximarene kaiserehare aisa. Xoanere hoka aisene? Caim atyo iniyalahare tyomita hoka iximarene atyo waiyexe taita tyomita.

<sup>13</sup> Nohinaeharenæ, awa atyo matyakekoneharenæ kirawanehena xiso hoka, “Xoana hoka nikare mokahitaha wiso?” xehena. <sup>14</sup> Kamati akere wisaonitere nonitata atyo waiyexe wenati maniya wikaxomokakeheta. Wawaiyetita wihinaeharenæ hoka hatyo hiyeta hatyohare waiyekehalaahareta womana. Xala xamani atyo maisa awaiyetyare hahinaehare hoka hekotata atyo ekamane akereta tyaonita. <sup>15</sup> Xala xamani atyo kalore kirawaneta hahinaehare hoka hatyo atyo haliti fahare. Haliti fahare atyo maisa tyaona menexe matyotenehare. Hatyohare waiyekehalaahare xomana.

<sup>16</sup> Exakere atyo xawaiyetyati waiyekehalaahare womana: Cristo awaiyetya wiso hoka waini womana. Hiyeta hoka maika wiso tehitia wiwainihena wihinaeharenæ ana wakahinaetyahene maheta. <sup>17</sup> Hatyaiya kaoloxere kawisekorexe xoaha hoka hahinaehare nakitere, maimahirotere maisa kahinaetya aokowita hoka aliyakereya awaiyetita Enore aokowihena? Maisa xakore awaiyetyare hahinaehare hoka. <sup>18</sup> Haré xoimanae, wiwayaiyera atyo maisa wiraetere, wiraesekoala taita xini. Wománe hiyeta atyo ite aliterexe wawaiyexeharene wahotikhena.

*Mamairanehaliti Enore Nahalakoa*

<sup>19</sup> Nikare waiyekehalaahare womana: Aliterexe Enore niraene xema wisaonitere. Hatyo hiyeta waiye wisaonita Enore haotita.

<sup>20</sup> “Wawenane atyo maisa ehekorexe”, wexa wahekotita hoka Enore xahekola atyo wiyahekola xahehare. Tyotya xoalini hare kakoa atyo waiyoreta.

<sup>21</sup> Hiyeta, nohinaehare, noxiyakawalinae, maisaiya wamaikohareta wisomehenere kakoa hoka wimamairanahareya wisaona Enore nahalakoa. <sup>22</sup> Isa womana tyotya waxitereneharenae, wityakekota exaotyakiraho, exahe aokitere akereta wisaonita hoka.

<sup>23</sup> Exakere wisaona aokita: Kasani wityakeko Ityani Jesus Cristo, exahe wawaiyetyakakoa Cristo aohenere akereta. <sup>24</sup> Xala xamani atyo Enore xaotyakiraho tyakekota hoka Enore xema atyo tyaonita. Hoka Enore atyo tyaonita ekakoa. Isekohaliti isehenere womana hiyeta waiyekehala haka womana exeharenae.

## 4

*Isekohaliti Waiyexe, Emetalahare*

<sup>1</sup> Nohinaehare, noxiyakawalinae, awa atyo xityakekohena tyotya Enore Nisekohare kokoare aokowiterenae. Maika xahasakaharetyahene xawaiyore maheta ekakoaha, xoana hatyo isekohaliti tyaonahitere ekakoa Enore nalitare xamani, maisa xamani. Hiyaiya, kahare iraiti xakaisasehare metalahare xaorekoaa waikohe hakakoare koa. <sup>2</sup> Exakere xawaiyore ekakoaha, xoana aliterexe xamani Isekohaliti Enore nalitare hoka: Xala xamani atyo ite “Enore Kalorexe Aohenere haliti terota”, nexa hoka aliterexe atyo hatyo Isekohaliti Enore nalitare. <sup>3</sup> Xala xamani atyo maisa nikare iraeta hoka maisa atyo Enore Nisekohare kokoare xini hoka Cristo nahalakoahare nisekohare kokoare atyo. Koxaka exe isekohaliti tyoanene xasema hoka kalikini atyo koxaka halitinae koni tyaonita.

<sup>4</sup> Haré xoimanae, Enore anere atyo xiso hoka koxaka xijiyyaotya iraiti xakaisasharenae metalahare. Hiyaiya, Isekohaliti tyaonitere xihiyate atyo matyakekoneharenae nisekohaliti xahehare niyatere. <sup>5</sup> Maisa atyo Enore koamaniya xini tyaonahita hoka ewaxirahare taita iraetaha. Matyakekoneharenae iniraeneha semaxemaita, matyakekoneharenah hoka. <sup>6</sup> Hoka wiso atyo Enore anerenae. Xala xamani atyo Enore maniya tyaonita hoka semaxemata wiraene. Hoka xala xamani atyo maisa Enore xema maniya tyaonare hoka maisa semaxemaita wiraene. Exakere hiyeta atyo ite waiyekehala haka womana, xoana aliterexe Isekohaliti Waiyexe xema xamani tyaonita, xoana isekohaliti metalahare xema xamani tyaonita.

*Enore Atyo Xawaiyetyati*

<sup>7</sup> Noxiyakawali, nohinaeharenae, maika wawaiyetya kakoa. Hiyaiya, Enoretare atyo xawaiyetyati. Xala xamani atyo xawaiyetyati kokoare hoka Enore ityani atyo, Enore koamaniya atyo tyaonita. <sup>8</sup> Hatyiya maisa awaiyetyare haliti hoka maisa atyo Enore xema xini tyaonita. Hiyaiya, Enore atyo xawaiyetyati. <sup>9</sup> Enore exakere hawaiyexehare hotikisa womana: haterore Haisani axikatya halitinae koni. Iyeheta wiso hoka waiyexe wenati xema wisaona maheta. <sup>10</sup> Exe atyo xawaiyetyati: maisa wiso xini wawaiyetya Enore. Hatyo atyo awaiyetya wiso hoka Haisani axikatya hoka ihiyeta iniyalahare wománenae kaxemaisatyakeheta maheta.

<sup>11</sup> Xasemehena, nohinaehare, noxiyakawalinae. Enore kalore awaiyetya wiso. Hiyeta hoka nikahena hoka wawaiyetyakakoa. <sup>12</sup> Maisa xala hare Enore waiyare. Hoka wawaiyetyakakaoiha hoka Enore atyo tyaonita wikakoa hoka ekakoita kalore awaititere akereta wawaiyetya haliti.

<sup>13</sup> Enore Haisekohare ijita womana hoka hatyo hiyeta wawaiyore tyaonitere wikakoa kakoa, exahe wisaonitere ekakoa kakoa.

<sup>14</sup> Wiyaiyita hoka wiyakaita haiyanae hiye Enore Haisani halitinae koni axikatya hoka halitinae waiyexe maniya mohetehenere tahi. <sup>15</sup> Xala xamaniya atyo “Jesus Cristo atyo Enore Ityani”, nexa hoka Enore atyo tyaonita ekakoa. Exahe hatyo hoka tyaonita Enore kakoa. <sup>16</sup> Enore awaiyetita wiso. Hatyohare waiyekehala haka womana hoka wityakekone.

Enore atyo xawaiyetyati. Hiyeta hoka xala xamani awaiyetyati tyaonita hoka Enore atyo tyaonita ekakoa, exahe hatyo hoka tyaonita Enore kakoa. <sup>17</sup> Xawaiyetyati kalore

tyaonita wihiye hoka wimamairanehare wisaona maheta xaxalisati ferakene xowaka. Hiyaiya, wawenane ali atyo Cristo tyaonitere akereta wisaonita. <sup>18</sup> Xawaiyetyati hiye atyo maisa mairati aka. Waiyexe xawaiyetyati kikihitita atyo mairati. Hoka xala xamani mairita hoka maisa kalore awaiyetyare. Hiyaiya, mairati hiyeta atyo mawaiyehaliti kaotyakita.

<sup>19</sup> Enore hotohare awaiyetya wiso. Hatyo hiyeta wawaiyetene. <sup>20</sup> Xala xamaniya nexa: “Nawaiyetita Enore”, nexa hoka kirawaneta hahinaehare hoka maoseraita atyo. Maisaiya awaiyetyita hahinaehare waiyitere hoka aliyakereya awaiyehena Enore hamawaiyanenehare? <sup>21</sup> Exakere atyo Cristo xaotyakisati isa womana: Xala xamani atyo awaiyetyita Enore hoka hahinaehare tehitija awaiyetya.

## 5

### *Matyakekoneharenae Jiyahaotyaka*

<sup>1</sup> Xala xamaniya, “Jesus atyo Enore Kalorexe Aohenere”, nexa tyakeko hoka hatyo atyo Enore ityani. Xala xamaniya atyo awaiyetya hatya nexekati hoka ityaninae tehitija awaiyetya. <sup>2</sup> Wawaiyehena atyo Enore hoka exaotyakiranae akereta wisaonita. Exahe hoka ityaninae wawaiyetita. Hatyo harenae waiyekehalakita womana. <sup>3</sup> Enore xawaiyetyaka atyo exaotyakiranae tyakekotyaka. Exaotyakiranae tyakekotyaka maisa howithiharexe. <sup>4</sup> Hiyaiya, Enore ityaninae atyo maisa majiyahaolita matyakekonehare. Nikare wityakekone kakoa wijiyyahaotya matyakekoneharenae. <sup>5</sup> Xalaiya jiyahao aka-hena? Aliterexe Jesus Enore Ityani aokitere taitaiya jiyahao akatya.

### *Jesus Cristo Tahi Xakaisaka*

<sup>6</sup> Jesus Cristo tyoa hoka kabatixatyaka onexa; waini hoka itimalaxa iratyoa. Maisa one kakoa taita xini tyoa. One, timalati xoaha kakoa tyoa. Isekohaliti Waiyexe xakaini. Hatyo xakaini aliterexe taita. <sup>7</sup> Hanamanae waiyatiye enokoa nali: Enexe, Iraiti, Isekohaliti Waiyexe xoaha. Exe hanamanae atyo haterore. <sup>8</sup> Waikohekhoa maniya hoka hanamanae waiyatiye: Isekohaliti, one, timalati xoaha. Exe hanamanae atyo hakakoa ahekoita. <sup>9</sup> Halitinae xakainiya wityakeko hoka aliyakeriya Enore xakaini wimatyakekonehena? Enore xakaini atyo masakare waiye. Hatyo atyo Haisani tahi xakai. <sup>10</sup> Xala xamani tyakeko Enore Ityani hoka hatyo tehitija atyo iraeta Enore Ityani tahi. Xala xamani atyo maisa tyakekota Enore hoka maoseratyare Enore moka. Hiyaiya, maisa atyo Enore Haisani tahi iraehenere tyakekota. <sup>11</sup> Hiyaiya, exe atyo hotikjita: Enore atyo isa womana wenati matyotenehare hoka hatyo wenati atyo womanere Ityani hiyeta. <sup>12</sup> Xala xamaniya Ityani xema tyaonita hoka wenati waiyexe kakoare atyo. Xala xamaniya atyo maisa Enore Ityani xema tyaonare hoka maisa atyo wenati waiyexe kakoare xini.

### *Wenati Matyotenehare*

<sup>13</sup> Exe akiti naxairatya xiso Enore Ityani tyakekohenerenae ana. Hoka waiyekehalaka maheta xomana xawenane matyotenehare tahi akiti <sup>14</sup> hoka Enore haoti wisaonita hoka wimamairanehare wisaonita. Exakere hiyeta: waxeneya xoalini hare aokitere akereta hoka seminiya. <sup>15</sup> Hatyohare hiyeta atyo waiyekehalakita womana, xoalinhare wiyananene esemane. Hoka waiyekehalakita atyo exekane womana waxitereneharenae.

<sup>16</sup> Hatiyaiya hahinaehare nōmane iniyalahare waiya, maisa waini xakere xini hoka hahinaehare ana iraexatya Enore hiye. Hoka Enoreya waiyexe wenati isa ihinaehare ana. Iniyalahare haiya akiti maxaxaisakirahareya atyo hoka nikare hisoma. Hiyaiya, haiyanee akiti iniyalahare nomaka hiyeta kawainisakita. Maisa atyo exe iniyalaharenae tahi xiraexatya maheta xini niraeta. <sup>17</sup> Tyotya mawaiyexe atyo iniyalahare. Xakore hoka haiyanee iniyalahare nahalakoa atyo maisa kawainisakere.

<sup>18</sup> Enore ityaninae atyo maisa iniyalahare tyometa menexe. Hiyaiya, Enore Ityani atyo kaxaikoahitene hoka Tihanare maisa kaokahaliyatayarahene.

<sup>19</sup> Enore anerenae atyo wiso hoka matyakekoneharenae atyo Tihanare xema taita tyaonahitaha. Hatyohare waiyekehalaka womana. <sup>20</sup> Enore ityani tehitija koxaka tyoa

hoka isa womana waiyoliniti hoka Enore tahi akiti waiyekehala ka womana maheta. Aliterexe Enore xema wawenanenae tyaonita, exahe Ityani Jesus Cristo xema hoka. Hatyo atyo Enore kaiserehare, exe atyo wenati matyotenehare.

*Maika Awa Enore Metalahare Xema Xisaona  
(1 Coríntios 8.1-13; 10.14-28)*

<sup>21</sup> Xirihare ira Enore metalaharenae kakoa, haré xoimanae!

## 2 João

<sup>1</sup> Tyakekohatiyena nityohalitira xaxikala babera hatya ohiro noxiyakawalihalo ana, ityaninae xoaha ana. Nawaiyetita xiso. Maisa natyo taita xini nawaiyetita xiso, tyoty iraiti aliterexe xema tyaoniterenae tehiyi awaiyetita xiso. <sup>2</sup> Wawaiyetita xiso iraiti aliterexe tyaonitere wihiye hiyeta. Hatyo atyo ite tyaoneta mene wihiye. <sup>3</sup> Maika Wexe Enore, Ityani Jesus Cristo kaxaikone, xairakoaneharera, mehexaikoharene tyaona wikakoa, aliterexe, exahe xawaiyetyati xoaha kakoa.

### *Aliterexe Exahe Xawaiyetyati*

<sup>4</sup> Nasema haiyaharenae hityaninae iraiti aliterexe aokitere akereta tyaonitere hoka nihalahare. Wexe Enore aokitere akereta tyaonahitaha. <sup>5</sup> Kalikini nirae hihiye, nohinae-halo, noxiyakawalihalo. Maika haiyanai kakoa wawaiyetya kakoa. Maisa atyo waitare xaotyakiye xini naxairaita. Hetati xowakiyata wikaxaotyakisakehenere haretat atyo.

<sup>6</sup> Nikare xawaiyetyati atyo Enore xaotyakiraho tyakekotyaka. Hetatita xasemehenere akereta, exe atyo Enore xaotyakiraho: heko xawaiyetyakakoa.

<sup>7</sup> Kahare maoseratyaliyena tyaonita halitinae koni. Hoka Jesus Cristo atyo maisa haliti kaiserehare xini aokahitaha. Xala xamani atyo nikare tyaonita hoka maoseraita, Enore Kalorexe Aohenere nahalakoahare atyo. <sup>8</sup> Xirihare xisaona hoka maisa koxaka hateniti xisomehenere mitita hoka kalore kaxekaka xomana xihatene nahalakoa.

<sup>9</sup> Xala xamani atyo maisa Enore Kalorexe Aohenere xaotyakira xema tyaonita hoka hatyo xahexe tyaonita, maisa atyo Enore kakoare xini. Hoka xala xamani atyo exe xaotyakiye xema tyaonita hoka Enore kakoare, Ityani kakoare atyo.

<sup>10</sup> Maika hatya kaokehena xomana hoka maisa Cristo xaotyakira kakoare xini hoka awa atyo xihanako xaisoakisene. Awa atyo xexa hekoti: “Maika himehexaikohare hisaona”.

<sup>11</sup> Hiyaiya, xala xamani atyo emehexaikoharene aoka hoka hatyo atyo ihinaehare, iniyalahare nomaseharene hatya.

### *Iraitinae Miyane*

<sup>12</sup> Kahare xoalini hare niraini xihiye niyahare, xakore hoka maisaiya atyo naxairaitene xomana baberanekoa. Ite notyoa nowaiyehetehena xiso hoka xiháre hiyeta nirae. Nikare ite hoka masakare wihalahare.

<sup>13</sup> Hihinaehalo Enore haomanere aohenere ityaninae haxakaisakeheta aoka.

### 3 João

<sup>1</sup> Tyakekohatiyena nityohalitira xaxikala Gaio anere. Hawaijeta kaiserehare nomani, Gaio.

<sup>2</sup> Nohinaehare, noxiyakawali, niraexaita Enore hiye hitahi, waiye hisaona, exahe hikinatere hisaona maheta, Enore koamaniya waiye hisaonitere akereta. <sup>3</sup> Wihinaehare haiyaharenae kaoka nomani hoka xakaiha hitahi nohiye. Heko iraiti aliterexe xema taita hisaonita aokaha. Nasemene hoka nihalahare hamoka. <sup>4</sup> Nasema nityaninae nawenane heko iraiti aliterexe aokitere akereta hoka masakare nihalahare.

#### *Gaio Xaixakerityaka*

<sup>5</sup> Noxiyakawali, nohinaehare, heko waiye hamokita wihinaeharenae, exahe hahotyaliharenae hoka. Nikare hoka waiye kaiserehare. <sup>6</sup> Aliyere tyakekohatiyena hiye xakaihahitaha waiye hamokahiterene tahi. Maika hakahinaetya nikare kaokiterenae hoka waiye jiyehenahitiyaha hinalita Enore awaiyetitire akereta. <sup>7</sup> Hiyaiya, koxaka xane Cristo ana hakahitaha. Maisa matyakekoneharenae kahinaetyahene aokareha. <sup>8</sup> Hiyeta hoka wiso tyakekohatiyenaeya maisa wimakahinaerahitene. Nikare ite hoka wiso tehitija ehateneha Iraiti Waiyexe xakaisaka hiye wakahinaetyahene.

#### *Diótrefes, Demétrio Xoaha*

<sup>9</sup> Naxairatyia inira hatya baberane tyakekohatiyena ana. Xakore hoka Diótrefes maisa naxairahenere semaxematyia aokowita. Kasani kalorexe tyona aokowita hoka. <sup>10</sup> Hiyeta hoka nali ite nokaokihena hoka nirae ekakoa tyoty tyomitere harenae tahi. Ewaxirahare iraeta wiyaokaka, maoseraita harenae. Exahe tehitija hoka maisa hatyo harenae taita tyomare. Wihinaeharenae tehitija kaokehena hoka maisa waiye mokarahene. Xala xamaniya waiye mokahene hahanako aokowi hoka xahohisakoatyakalati hanakota aihiikoahitita hatyo waiye moka akaiterenae.

<sup>11</sup> Nohinaehare, noxiyakawali, maika waiyexe taita hisoma, awa atyo xoare xamani maisa waiyexe hoka hatyo hisoma. Xala xamani atyo waiyexe tyomita hoka Enore anere atyo hoka xala xamani atyo maisa waiyexe tyomare hoka maisa atyo Enore xema tyonare.

<sup>12</sup> Tyotyaha Demétrio tahi iraetaha. Hatyo atyo waiye aokaha. Aliterexe aokitere akereta tyonita. Exahe womana hoka waiyeta tehitija. Wiraeterenae atyo aliterexe taita, hatyohare atyo waiyekehalakita homana.

#### *Tyawaxati Miyane*

<sup>13</sup> Hekota kahare xoalini hare noxakaini niyahare hihiye, hoka maisaiya atyo naxairatitene homana. <sup>14</sup> Kala ite haxeroreta nowaiyeheta hiso hoka wihárenae hiyeta wirae kakoa.

<sup>15</sup> Maika waiye himehexaikohare hisaona. Tyoty hihinaeharenae haxakaisakeheta aoka hihiye. Maika tyoty wihinaeharenae hiye hiyakaiheta natyo.

## Judas

<sup>1</sup> Natyo atyo Judas, Jesus Cristo wakanehare, Tiago ximarene. Naxairahena Enore haomanerenai aohenerenai ana, exahe Wexe Enore xawaiyera xema, exahe Jesus Cristo kaxaikoterenai ana hoka.

<sup>2</sup> Kasani masakare Enore xairakoaneharera, mehexaikoharene, xawaiyera tyaona xikakoa naokita.

### *Xaotyakisatiye Metalaharenae Tyakekohatiyenae Koni*

<sup>3</sup> Nohinaeharenai, noxiyakawali, nahekotita ene noxairali xomana wiyakeheta tahi kakoa. Hatyo wawenanaho tahi. Hatyo hiyeta nahekotya hoka kalikini naxairaty xomana, naihalahalinikisa xiso hoka xaiyateretyoa maheta xityakekone kakoa. Hakirore atyo Enore isa tyotya hakaxaikoneharenae ana.

### *Maika Xirihare Xaotyakisatiyenae Metalahare Kakoa*

(1 Timóteo 1.6-7; 4.1-3; 2 Pedro 2.1-19)

<sup>4</sup> Hiayiya, haiyaharenai halitinai matyakekoneharenai atyo mawaiyakahare ahitaha tyaonaha wihinaeharenai koni. Hoka ehawareharetyahitaha wEnorexa waiyexe xomokala wiso tahi. Nikare tyaonahitaha, maisa enawenaneha iniyalahare kaxawatyakaha maheta ehenoaha. Exahe maisa tehitiya aokareha Jesus Cristo, hatyo taita xakore atyo Wiyaotyakisase, Wiyekohase hoka. Toahiya atyo Iraiti Waiyexenai xakaiha etahi. Kamawenekoaretyakaha terota maheta.

<sup>5</sup> Exeharenai atyo waiyekhalakita xomana, xakore hoka naxotyanikisa atyo xiso naokowita. Hiayiya, Xekohaseti iyehetehena Israel hotyalinai hoka kikihetene Egito nalita, xakore hoka hatyo najikinita mawenekoaretya matyakekonehenereharenai.

<sup>6</sup> Xotehenaira anjonai mawenaneneheta kalorexe hoka halakihenahere hawenakalaha aose. Kalikini katilikoare atyo tyaonahitaha kamatiherahi maxirikotyoanehare kakoa, ako katyahe makaliro koni. Nali atyo Enore mokahitene miyanitiye ferakene xowaka kamawenekoaretyakehenahere niyahare.

<sup>7</sup> Xotehenaira Sodoma, Gomorra xoaha nali tyaoniterenai, exahe ehaliyita haiyanai wenakalatikoasenai tyaoniterenai hoka. Hiayiya, hatyonai atyo xalijinhireha anjonai xahita. Iniyalahare tyaonahitaha, exahe haenane hatyanai kakoa hoka iniyalahare tyomahitaha. Hatyo hiyeta kakerahaotyakeheta irikati mawakenehare kakoa. Hatyo nikare kaxomokakehenahere atyo aimenekoita, hotikijita tyotya halitinai ana.

<sup>8</sup> Hiayiya, exe kalikiniye halitinai nikareta tehitiya tyaonahitaha. Hoka exahekolaha iniyalahare aomanikisahitene. Hoka maisa aiminisareha Enore nerore, kirawanahitaha enokoa tyaonitere anjonai.

<sup>9</sup> Hiayiya, anjonai xekohasehare xakore atyo Miguel hoka maisa atyo nikare tyaonita. Tihanare kakoa iraekakoahenahere, Moisés háré kakoa hawenaneha tahi xowaka, Miguel maisa aiyalatita Tihanare ana. Xakore hoka nexa taita: “Maika Xekohaseti watyali hiso”, nexa.

<sup>10</sup> Xakore hoka exe halitinai atyo kirawanahitaha xoalini hare mawaiye kehalakitere-hare enomanaha. Exahe xoalini hare kaotyakitatarehare waiyahitere, kirakahare akereta waiyorahitere. Hoka hatyoharenai atyo mawenekoaretyahitene. <sup>11</sup> Kaxiyani! Maika kirakoane atyoite tyaonaha. Hiayiya, Caim tyaohenere akereta atyo tyaonahitaha. Exahe olo haxawaiyera hiyeta Balaão iniyalahare tyomehenere akereta tyaonahitaha. Exahe Coré atyo kahalakoahare Moisés kakoa hoka kamawenekoaretyaka akereta, nikareta hatyonai tehitiya kahalakoahareha hoka kamawenekoaretyakaha.

<sup>12</sup> Haxawalita xiyawaityakakoane kakoa xikanakairehena ehaotiha hoka kahaiharetyleka hekahitaha, kanakaira, akomaniyat�akisareha. Hatahi taita atyo ahekotyahitaha. Kaiminitinai hoholati hoholaty hamaniya axanikisa hoka maonenetere akeretaha atyo. Atya katenai iri nexona xowakehetehena xakore hoka malitere akeretaha atyo.

Atya katenai ityaharenae hiyeta kamalakakitere hoka wainahitere akeretaha atyo. <sup>13</sup> One kaloxere kahenehare ainakoiyatyoitere hoka xawaitere haikorone akereta atyo exe halitinai hotikijita kahiharetyakere háomanenaiha. Xoresenai mahotirahare akeretaha atyo. Hatyonai ana atyo Enore memere moka hakiti masakare hatekoakore makakore, nali tyaconetaha mene maheta matyotenehare.

<sup>14</sup> Hiyaiya, Adão jikolahare Enoque atyo xakai etahiha: “Xasemehena! Xekohaseti ite tyoheta, kahare haomanerenai anjonai kakoa, <sup>15</sup> axalisa maheta tyotya halitinai. Tyoheta ite hoka iniyalahare mohena kahare iniyalahare tyomehenahere hiyeta, exahe kahare iniyalahare iraehenahere Enore tahi hiyeta”, nexa.

<sup>16</sup> Hatyo halitinai atyo kaweraharetaha, iraeharetaha minita haiyaharenai. Haxahekola ximita atyo tyaonahitaha, ahinityareha. Exahe waiye irae ahitaha haiyanai hiye, xiyejaliti isaha enomanaha maheta.

#### *Xakaisati Exahe Xaotyakisati*

<sup>17</sup> Hoka xiso nohinaeharenai, xotyaxemahenaira Wiyekohase Jesus Cristo niraene kakoarenae xakaihenere. <sup>18</sup> Exakere atyo nexaha: “Miyanitiye xowakehenaithe hoka kaotyakehenaithe halitinai hoka koexahalihenaha xiso. Matyakekoneharenae, haxahekola ewaxirahare ximita tyaonitereharenai”, nexaha atyo.

<sup>19</sup> Hatyonai atyo exaore akatita. Hiyaiya, exahekola atyo nikare axomokanikisahitene, maisa atyo Enore Nisekohare kakoareha xini hoka.

<sup>20</sup> Hoka xiso nohinaeharenai, maika heko xikekoarehena xityakekone kakoa. Hiyaiya, hatyo tyakekotyati atyo masakare waiyexe. Isekohaliti Waiyexe niyatere kakoaira xiraexahena. <sup>21</sup> Hoka hekotaira xisaohena Enore xawaiyera xema, exahe xatyahahenaira Wiyekohase Jesus Cristo hoka haxairakoaneharera hiyeta isa xomana wenati matyotenehare.

<sup>22</sup> Haiya harenai ana maisa waiyekehalakere hoka maika hatyoharenai xairakoaneharehena, <sup>23</sup> hoka xiyehetehena hatyo halitinai irikati nonitata. Haiya harenai tehitiyaira xairakoaneharehena. Maika xairakoanehahene xakore hoka ximairahenahene tehitiya. Awa atyo xawaiyehena enómaneha kaxawaiyityakitere iniyalahare. Hatyoharenae hiyeta exahe inimanaiha kaiyalahare tyaonita.

#### *Xaexakerityati Niraexatyaka*

<sup>24</sup> Maika Enore kakoa kaihalaharetyaka! Maika kahinaetya xiso hoka xikinatere xisaohena hoka iniyalahare ximaomanehare hoka xihalaharene kakoa moka xiso halakoa waiyexe aose nali. <sup>25</sup> Maika haterore Enore wisekohare Niyasehare kakoa, Wiyekohase Jesus Cristo hiyeta, kaihalaharetyaka, kaxaexakeretyaka, kaxaiyatelikisaka, kaxaeroretyaka, kalikinita, exahe matyotenehare. Xoaha taita.

## Apocalipse

<sup>1</sup> Exe baberakoa kaxairatyaka xoalini hare Jesus Cristo hotikihenere. Enore atyo exeharenae hotikisa enomana, ewakaneharenae ana waiyekahalaka maheta, mawahaneta hoka xoalini hare kaotyakehenere. Jesus Cristo axikatya hanjoxa hawakanehare João ana exeharenae waiyekahalaka enomana maheta. <sup>2</sup> João xakai tyotya waiyehenere tahi. Owene baberakoa tyaonita xakaihenere Enore niraene tahi, exahe Jesus Cristo hotikihenere aliterexe enomana tahi. <sup>3</sup> Waiye kaiserehareya atyo xala xamani kaixaretya, exahe sema exe iraiti xoalini hare kaotyakehenere tahi iraetere hoka tyaona exema. Hiyaiya, hatyoharenae kaotyakene maisa wahehetere.

### *Sete Hotyali Tyakekohatiyena Tyawaxatyaka*

<sup>4</sup> Ásia koa nali 7 tyakekohatiye hotyalinae tyaonita hoka natyo João naxairatyae enomanaha. Maika waiye, ximehexaikohare xisaona Enore hiyeta, exahe 7-hare iseko-halitinae Enore nokahakala nahalakoa tyaoniterenae hiyeta. Hiyaiya, Enore atyo toahiya tyaona, kalini tyaonita, makani exahe tyaoneta minita matyotenehare. <sup>5</sup> Maika nikare xisaona Jesus Cristo hiyeta tehitiya.

### *Cristo Atyo Waini Womana*

*(Tito 2.11-14; 1 Pedro 2.18-21; Apocalipse 5.9-11; 7.14)*

Jesus atyo waiye xakai Enore niraene, exahe hatyo hotohare kaseheta kamatiniae konita hoka waikoheko xekohaseti tyaoniterenae Xekohase tyaonita. Awaiyetita atyo wiso, wihiyeta waini atyalihose xaimaholatyaka hiye emaisaheta maheta wománe iniyalahare. <sup>6</sup> Sacerdotenae moka wiso ewakaneharenae hoka wahaka maheta Enexe Enore hatene. Maika Jesus Cristo kalorexe, kinaterexe tyaona mene, kaihalaharetyaka mene ekakoa, eko xoaha.

### *Cristo Haikoahaneheta*

*(Atos 1.11; 1 Tessalonicense 4.13-18; 5.1-4; 2 Tessalonicense 1.7-10)*

<sup>7</sup> Xiyaiyehena, kaiminiti kakoa ite haikoaheta waikoheko xeta. Tyotya halitinaite waiyahene, exahe ite exaisasenai ite hoka waiyahene. Tyotya waikoheko tyaoniterenae waiyahenene hoka tiyahaite hamawaiyehareneha hiyeta. Kotare nali, xoaha.

<sup>8</sup> — Natyo atyo Alfa, Ômega, exahe hetatiye, miyanitiye xoaha — nexa Xekohaseti maxaexahetyakahare niyaterexe. Hatyo atyo toahiya tyaonitere, kalini tyaonitere, makani, tyaoneta menehenere.

### *João Awaiyakihenere Cristo Tahi*

<sup>9</sup> Natyo atyo xihinaehare João. Jesus koamaniya notyaonita hoka haiya xowaka iniyalahare nokaxomokakita xiso akereta. Jesus atyo Wiyekohase hoka xiso akereta wimamaxaharenehareta wavyahita exahita.

Berexo notyaonita iyolirotikoa Patmos aokahitere nali, Enore niraene noxakaitere hiyeta, Jesus tyotya aliterexe hotikihenere noxakaitere hiyeta. <sup>10</sup> Xekohaseti ferakene domingo xowaka Enore Nisekohare awaiyanikisa natyo. Nasema iraiti kinatyaxa nohiniri maniya, koneta nemahare akerehare:

<sup>11</sup> Nexa nohiye: — Haxairahena hiyaiyehenerenae hoka babera haxikatya 7-hotyalinae tyakekohatiyena ana, wenakalati Éfeso, Esmirna, Pérgamo, Tiatira, Sardes, Filadélfia, Laodicéia xoaha nali tyaoniterenae ana.

<sup>12</sup> Nexa hoka naterehokoa nowaiyene maheta hoka nowaiya 7-kase xaokanatyakalati kase, ouro nomakere makere. <sup>13</sup> Enekoniha hatya tyaonita, motya haliti. Imiti wahahare nase akore ikiji hiye. Xalatahití ouro nomakere tyaonita ihiye. <sup>14</sup> Esekase hoka iyomakase, motya kalanero niyali, iyoma kaiserehare. Exose weroka, motya irikati.

<sup>15</sup> Ikiji tehitiya werokita, motya bronze owere irikati hiye xafiratyakere. Exako motya wamolo kalorexe akereta. <sup>16</sup> Hafihini maniya kahe kakoa 7-se xorese tokita. Ekanasakota

hatya kesekase hinama maniya tiho kawetyakere hikoita. Itiho aokanaita, kamae totahikoa aokanaitere akere.

<sup>17</sup> Nowaiyene hoka nexoa ikiji haliya, nomaoqtyani akatya. Xakore hoka hakahe hafihini maniya ekaokakisa nohiye hoka nexa nohiye: — Awa atyo himaira. Natyo atyo hetatiye, miyanitiye xoaha. <sup>18</sup> Natyo atyo heko notyaonitere. Nowaini xakore hoka nokaseheta, hoka heko ite nomakamanihare notyaona. Nawaiyoreta atyo kamatinai tyaonitere nali akiti kakoa hoka nali tehitia Xekohaseti notyaonita.

<sup>19</sup> — Hiyeta hoka maika haxairahena hiyaiyehenere tahi, kalikini kaotyakiterehare, exahe jikiniti maniya kaotyakehenere harenae tahi. <sup>20</sup> 7-se xorese hiyaiyehenere nokahikoi fihi maniya, exahe 7-kase ouro nomakere xaokanatyakalatinæ hiyaiyehenerænae metaharetere atyo exe: 7-kase xaokanatyakalati hiyaiyehenere atyo aimenekoita 7-hare tyakekohatiye hotyalinai. 7-se hiyaiyehenere xorese atyo aimenekoita ekax-aikotyaseharenæ — nexa nohiye.

## 2

*Iraiti Éfeso Nali Tyaoniterenæ Ana*

<sup>1</sup> — Exakere haxairahena tyakekohatiyenai hotyali Éfeso nali tyaoniterenæ kaxaikotyasehare ana: Exe iraiti atyo etake 7-se xorese tokitere hakahe fihi maniya hoka 7-kase ouro nomakere xaokanatyakalatinæ nenekesene tonitere niraene. <sup>2</sup> Waiyekhalakita nomani xisomiterenæ. Kalore xahaka nomani, hoka maisa ximaxahareta xihatene kakoa. Maisa iniyalahare nomaseharenæ xawaiyetita. Xahasakaharetita Jesus niraine kakoare aokowitereharenae, xakore hoka maoseratyaliyenai atyo. Nikare xamokahitene xawaiyore ekakoaha maheta. <sup>3</sup> Heko xisaona noximi ximaxamaikoharenehareta, iniyalahare xakore xikaxomokaka nohiyeti hoka. Maisa ximaxahareta hekoti. <sup>4</sup> Xakore hoka inira maisa xawaiyeta nomani. Maisa atyo xawaiyetyare natyo hetatiye akereta. <sup>5</sup> Xotyaxemahena xawenane hetatiye. Xahalakihena iniyalahare xawenane hoka hetati xisomiterehare xisomehitiya. Maisaiya hoka notyoa hoka xiyaokanatyakala kase enawenane aoseta niyeheta. <sup>6</sup> Hoka exe akiti waiye nohiye: maisa xawaiyetyare nicolaíta yerenai tyomitereharenae. Hatyoharenæ maisa waiyeta tehitia nomani. <sup>7</sup> Hiyeta hoka xikatanakoakore atyo xasema maheta hoka xasemehena Enore Nisekohare iraehenere tyakekohatiye hotyalinai hiye. Jiyahao akahenerenæ ana ite nisa atyali menanehaliti natyaliya kekoaretere Enore hananehare konitare hiyeta hoka kanakaira.

*Iraiti Esmirna Nali Tyaoniterenæ Ana*

<sup>8</sup> — Exakere haxairahena tyakekohatiyenai hotyali Esmirna nali tyaoniterenæ kax-aikotyasehare ana: Exe iraiti atyo etake Hetatiye, Miyanitiye tyaonitere niraene, waini hoka kasehetehenere niraene. <sup>9</sup> Ximakawatiharene waiyekahalakita nomani. Ximaolox-aharene, ximaxiyearene waiyekahalakita nomani. Xakore atyo hoka Enore nali atyo xikaoloxere kalore. Waiyekahalakita nomani tehitia judeu aokowiterehare xakore hoka maisa atyo judeunai xini. Iniyalahare irae ahitaha xiyaokaka. Ahalakoahaliti anere hotyalinae atyo. <sup>10</sup> Awa atyo ximairehena ximakawatiharenenere kakoa. Xaseme-hena, Tihanare tyaite haiyaharenæ xinekonitare berexo ako mohena hasakaharetyaha maheta xiso. Maika 10-ki ferakene ximakawatihare. Maika heko xikinatere xisaona nokoamaniye xikamane kijiya hoka nisa xomana menanehaliti seriti hoko. <sup>11</sup> Hiyeta hoka xikatanakoakore xasema maheta hoka xasemahena Enore Nisekohare iraehenere tyakekohatiye hotyalinai hiye. Jiyahao akahenerenæ ite maisa wainita hinamaki.

*Iraiti Pérgamo Nali Tyaoniterenæ Ana*

<sup>12</sup> — Exakere haxairahena tyakekohatiyenai hotyali Pérgamo nali tyaoniterenæ kaxaikotyasehare ana: Exe iraiti atyo etake kesekase hinama maniya kawetyakere kakoare niraene. <sup>13</sup> Xisaonitere nali waiyekhalakita nomani. Hatyo nali Ahalakoahaliti nawenakala. Xakore hoka xisaonita terota noximi maniya. Xityakekota natyo, maisa

xahalakisare xawenane nokoamaniyi. Exahe nowakanihare waiyexe Antipas kaxaisaka Ahalakoahaliti nawenakala nali xakore hoka maisa xahalakisare natyo. <sup>14</sup> Xakore hoka inira maisa xawaiyexe nomani. Haiyaharenai xinekonitare Balaão xaotyakiraho tyeonita. Balaão aotyakisa Balaque Israel hotyalinae iniyalahare maniya awenatikisa maheta. “Hiraihena ekakoaha hoka tyoa kanakairaha enore metalahare nakaira, exahe hoka tyaonaha ohironae hiye”, nexa ihiye. <sup>15</sup> Nikare tehitia haiyaharenai xinekonitare-nai nicolaítanae xaotyakiraho xema tyaonahitaha. Hatyohare maisa waiyeta nomani. <sup>16</sup> Xahalakihena nikare xawenane! Maisaiya hoka haxeroriya notyoheta hoka noxali-jinihadaya hatyo iniyalahare nomaseharena kaka exe kesekase nokanasakota hikoitere kakoa. <sup>17</sup> Hiyeta hoka xikatanakoakore xasema maheta hoka xasemehena Enore Nisekohare iraehenere tyakekohatiye hotyalinai hiye. Jiyahao akahenerena ana ite nisa nakairati mawayakahare maná aokahitere. Nisa tehitiaite sehalii iyomere exaliti waitare kakoare. Exaliti waikate taita atyoite waiyore haexare kakoa — nexa.

*Iraiti Tiatira Nali Tyaoniterenae Ana*

<sup>18</sup> — Exakere haxairahena tyakekohatiyenai hotyali Tiatira nali tyaoniterenae kax-aikotyasehare ana: Exe iraiti atyo Enore Ityani niraene. Exose atyo werokita, irikati akereta. Ikiji tehitia werokita, bronze owere irikati hiye xafiratyakere akereta. <sup>19</sup> Kalikini xisomitere waiyekelakita nomani. Xawaiyexehare, xityakekone, xihatene, heko xima-maxaharenehareneta xisaonitere nokoamaniyi harenae waiyekelakita nomani. Hetati xisomitere xahexe kalikini xisomitere waiyekelakita nomani. <sup>20</sup> Xakore hoka inira maisa xawaiyexe nomani. Maisa xaxikahalohitita Jezabel xinekonita. Enore niraene xakaisasero aokowi xakore hoka nowakaniharenae iniyalahare maniya awenatikisa. Aotyakisahene hoka ohiro hiye tyaonahitaha, exahe enore metalahare ana nakairati efetatyakahare kanakairahitaha. <sup>21</sup> Waha natyaha iniyalahare háomaneha halakisaha maheta. Xakore hoka maisa enanae hiye hawénane halakisa aokowita. <sup>22</sup> Hatyo hiyetaite nahokakatene hoka kamakoa ehokotyoa haenalanae kakoa hoka makawatiharehaite kalore. Hoka kalikini ite nikare notyoma, maisa halakisahitaha nikare hawenaneha iniyalahare hatyo ohiro kakoa hoka. <sup>23</sup> Naisaite ityaninai. Hatyaosetaite tyakekohatiye hotyalinae ana ite waiyekelakehena: Natyo atyo etake halitinai xahekola kakoa, exahe iyakawatyahitere kakoa waiyoretere. Nabakatya ite xiso hatya xakini xisomehenere akereta.

<sup>24</sup> —Xakore hoka haiyaharenai nali Tiatira yerenai atyo maisa hatyo iniyalahare xaotyakiyaho xema tyaonahitaha. Hoka hatyonai atyo maisa waiyorahitaha Ahalakoahaliti xahekolanae metaharexe aokahitere kakoa. Hatyo nikare tyaoniterenae hiye niraehena: maisa xoare hatyo xahexe naohitita xihiye. <sup>25</sup> Nikarira xisaona heko nokaokiniheta kijiya. <sup>26</sup> Jiyahao akahenerena, heko naokitere akereta tyomehenerena imiyane kijiya ite kalorexe namoka, halitinae xekohase tyaonaha maheta. <sup>27</sup> Hoka kinatere ite tyaonaha exahitaha. Kamatihera kase wotoka hoka wamokotya wehokitere tinihaliti waikohe nomakere akereta ite kinatere tyaonaha halitinai xahita. Baba Enore kalorexe mohenere natyo akereta ite kalorexe namokahene. <sup>28</sup> Nisa ite xorese ferakoahenere kaotyakitere enomanaha. <sup>29</sup> Hiyeta hoka xikatanakoakore xasema maheta hoka xasemehena Enore Nisekohare iraehenere tyakekohatiye hotyalinai hiye — nexa.

*Iraiti Sardes Nali Tyaoniterenae Ana*

<sup>1</sup> — Exakere haxairahena tyakekohatiyenai hotyali Sardes nali tyaoniterenae kax-aikotyasehare ana: Exe iraiti atyo etake Enore Nisekoharenae 7-hare kakoare, 7-se xorese kakoare niraene. Xisomitere waiyekelakita nomani. Xikaseta xakore atyo xaokowita hoka ekamane akereta atyo xisaonita. <sup>2</sup> Xaiyateretyoa inirere xawenane kakoa hoka maisa xiwainita kaiserehare. Hiayi, waiyekelaka nomani xisomehenere-nae. Maisa Enore aokitere akereta kaiserehare xini xisaonita. <sup>3</sup> Hoka xotyaxemahenaira

koxaka xawaiyorehenere, xasemaxemahenerehare. Hatyo xema xisaona, xahalakihena iniyalahare xománe. Maisaiya hoka ximaxatyahanetere kaiwarexe akeretaiya notyoheta xomana. Maisaiya xawaiyoreta notyoaninheta ferakene kakoa.<sup>4</sup> Xakore hoka haiyaharenai xinekonitarenae atyo Sardes nali heko maisa ekaiyaxatyareha haima. Hoka hatyonai atyoite tohena nokakoi imiti iyomere nimere. Waiye nikare kaxomokakitaha.<sup>5</sup> Jiyahao akahenerenaite imiti iyomere ako kaxaisoakisaka. Maisa ite nemaiyarehitita enexarenaeha babera menanehalitinae nexare kakoare koata. Baba Enore, exahe anjonai nahalakoite mametaharenehare nirae: “Exe halitinai atyo nomaniye”.<sup>6</sup> Hiyeta hoka xikatanakoakore atyo xasema maheta hoka xasemejhena Enore Nisekohare iraehenere tyakekohatiye hotyalinai hiye — nexa.

*Iraiti Filadélfia Nali Tyaoniterenae Ana*

<sup>7</sup> — Exakere haxairahena tyakekohatiyenai hotyali Filadélfia nali tyaoniterenae kax-akotyasehare ana: Exe iraiti atyo Davi ene jafini kakoare niraene. Hatyo atyo waiyexe, aliterexe. Jafi kakoare hoka majiholatyiya hoka maisa xala jihohititene, jihotyaiya hoka maisa xala majiholatitene.<sup>8</sup> Waiyekehalakita nomani xisomiteraharenae. Maisa komita ene xikinaterexe xakore hoka niraini xema xisaonita, heko xityakekota natyo. Namajiholatya jihore xomana hoka maisa ite xala hare jihotitene.<sup>9</sup> Xasemehena, haiyaharenai Ahalakoahaliti xema tyaonahitaha. Judeunae aokowiyahitaha xakore hoka maisa judeunae xini, maoseratyahitaha atyo. Natyoanikisahene ite hoka hakaoliseha kakoa exoaha xahalakoa hoka hatyaosetaite tyotyaha waiyoreha noxawaiyiri xiso kakoa.

<sup>10</sup> — Niraini xityakeko ximehexaikohare maheta. Hatyo hiyetaite nokaxaiko xiso makawatiti hakakoare waikohekoia tyohenere waikohekoare halitinae kahasakaharetyakehenere xowaka hoka maisa nikare xikaxomokakita.<sup>11</sup> Notyoheta rotitaite. Maika waiye xikaxaikoawi hoka maisa xala hare kaiwita xijiyahao akahenere hiyeta kaxekakehenere xomana.<sup>12</sup> Jiyahao akahenere ite Nenorexi hanako tyaona hoka maisaiya hikoahitita enakota. Naxairatyaita Nenorexi nexare ihiye, exahe Enore nawenakala waitare nexare tehituyaite. Hatyo wenakalati waitare Jerusalém nexarexe atyoite Enore nalita exoahetehena. Naxairatyte tehituyaite nexare waitare ihiye.<sup>13</sup> Hiyeta hoka xikatanakoakore xasema maheta hoka xasemejhena Enore Nisekohare iraehenere tyakekohatiye hotyalinai hiye — nexa.

*Iraiti Laodicéia Nali Tyaoniterenae Ana*

<sup>14</sup> — Exakere haxairahena tyakekohatiyenai hotyali Laodicéia nali tyaoniterenae kaxaikotyasehare ana: Exe iraiti atyo etake iraiti aliterexe taita iraetere niraene. Hetati xowakiya, Enore enokoa waikohekoia kaomakehenere xowakiya tyaonitere niraene:<sup>15</sup> Waiyekehalakita nomani tyotya xisomiterenae: Xiso atyo malokaxere akereta xisaonita. Maisa wehexere, watyxere akereta xini. Wehexere, watyxere akeretaiya xiso hoka xawaiyetiya nomani.<sup>16</sup> Wahasahena malokaxere hoka wahesohititene rota, maisa wiserarene. Hatyo akereta xiso, maisa atyo watyxere, wehexere akereta hekoti xini xiso hoka nojiraheta rota ite xiso!<sup>17</sup> Hiyaiya, exakere xiraeta: “Wiso atyo wikaoloxere, wikkaxiyeharexe, tyotya waokiterehare winali”, xita. Motya waiye xisaonita xaokita xakore hoka maisa xawaiyorexe ximaxiyeharene, ximaxoare weseharene kakoa. Ximaxiyeharehare, ximaimahiro, ximaxosehare atyo.<sup>18</sup> Hiyeta hoka nairihalikisa xiso hoka ouro kaiserehare, koxaka kaxafiratyakere irikati hiye, xiya noniti hoka aliterexe xikaoloxahare xisaona maheta. Xiyehena imiti iyomerenae noniti hoka xakaimatyoa hoka xatalatya ximaimahirone kahiharetyakere maheta. Xiyehena tehituya xoseti waira noniti hoka xiyose ako xamoka hoka xiyaiya akatya maheta.

<sup>19</sup> — Halitinai nawaiyetiterenai nowatyalita, exahe howtitiharexe kakoa naotyakijita. Nawaiyetita xiso hoka nikare inira kinatyaxa niraeta xikakoa. Xisaohenaira niraini xema. Xaiyateretyoaira hoka iniyalahare xománe xahalakisa.<sup>20</sup> Xasemehena: Hatikanase notyaonita hoka namokotita. Xala xamaniya sema noxako hoka majiholatya hoka nisoaiya ehanako hoka nokanakairiya ekakoa hoka hatyo tehitiyaiya kanakairia

nokakoi. <sup>21</sup> Xalanae xamani ite jiyahao akatya hoka naokanikisahene ite nokahakali haliya. Hiyaiya, nojiyahao akatya hoka kalikini Baba nokahakala haliya notyokitere akeretaite tyaonaha. <sup>22</sup> Hiyeta hoka xikatanakoakore xasema maheta hoka xasemahena Enore Nisekohare iraehenere tyakekohatiye hotyalinai hiye — nexa.

## 4

*Xerati Ihalahaliti Enokoa Nali*

<sup>1</sup> Hatyo najikinita nokaxawaiyanikisakihitiya hoka nowaiya enokoa nali jiholati mjaholatyoare. Hatyaoseta hetatiye iraihenere iraihitiya nokakoi. Iniraene motya koneta nemahare. — Hisohena ali enokoa hoka nahotikisa homana xoalini hare kaotyakehenere exe harenae najikinita — nexa.

<sup>2</sup> Nexa nohiye hoka Isekohaliti Waiyexe kolatya rota natyo enokoa xeta. Hatyo nali hatya tyokita kalorexe nokahakalakoa. <sup>3</sup> Itiho weroka, aokanaita sehalise jaspe, exahe sardônio xoaha werokene akereta. Okahakalati hoko haliya kaxore werokita sehalise esmeralda werokene akereta, tihorere. <sup>4</sup> Okahakalati hoko haliya 24-okahakalatinæ hoka 24-hare inityohalitinai tyokahitaha enakoa. Imiti iyomere akoreha, exahe seriti hoko ouro nomakere seriye. <sup>5</sup> Hoka hatyo okahakalati hiyeta kahihiye, xakoti, tallore harenae hikoita. Hatyo okahalakati naheta maniya 7-kase xaokanatyakalati takoare tyaonita, 7-hare Enore Nisekoharenae atyo. <sup>6</sup> Okahakalati naheta maniya tyaonita xoalinihare motya onexa, motya balaxokoxa hoka exaihako maniya kawaiyakitere akereta.

Okahakalati haliya 4-harenai tyaonita kirakaharenai, xakore hoka haliti akereta ahekotyahitaha. Kahare exosenaiha itikolali maniya, ihiniri maniya xoaha. <sup>7</sup> Hatya atyo motya leão. Hatya tehitija motya bowi. Hatya tehitija hoka itiho motya haliti tiho. Hatya tehitija motya aliwa ainakoiterehare.

<sup>8</sup> Xe 4-harenai atyo 6-kano tanexeha makere. Nikare tehitija ekanoha hiye exosenaiha tyaonita, eheno, ekatyahé maniya hoka. Hatyo 4-harenai xerita, maisa amematyoareha haxeraneha kakoa, ferakoa, makiya xeretaha minita: — Waiyexe, waiyexe, waiyexe atyo Xekohaseti Enore maxaixahetyakahare niyaterexe. Toahiya tyaonitere, kalikini tyaonitere, exahe makani, kamaetali tyaoneta menehenere — nexa xerahitaha.

<sup>9</sup> Xerahitaha hoka xaiminisati, xaerorityati, ihalahaliti harenae aokahitaha hatyo Makamanehare okahakalati koa tyokitere ana. <sup>10</sup> Nikare xerahitaha hoka 24-hare inityohalitinai exoahitaha ehaliya hakaoliha kakoa, aitoakisaha haserihokonaeha hoka okahakalati haliya mokahene hoka nexahitaha: <sup>11</sup> — Wiyekohase Enore! Hiso atyo hawaiye xaexakerityaka, xaiminisaka, xaerorityaka. Hiyaiya, Hiso atyo hisoma tyotya xoalini hare hiyaokala ximita hoka kaotyaka, tyaonaha.

## 5

*Babera, Kalanero Mokose Xoaha*

<sup>1</sup> Hatyaoseta nowaiyehena atyo, hatyo okahakalatikoa tyokitere kahekao fihini maniya nowaiya baberane jihiririkisaka. Xairatyore tyaonita enakoako, henekoa maniya xoaha. Ihiyalatyakahare tyaonita 7-hiyalatyakalati kakoa, babera mawatyalisakahare tyaona maheta. <sup>2</sup> Nowaiya tehitija anjo kinaterexe hoka kinatyaxa kawiyatya: — Xala waiyexeharexe kaiserehare hoka halalaka 7-hiyalatyakalatinai hoka omereka babera? nexa axa.

<sup>3</sup> Hoka maisa xala hare aokitere akereta aka hoka omerekare hatyo baberane hoka waiyare enanekoa. Maisa enokoarenæ, waikohekoarenæ, exahe maisa waikohe katya-hexenai hekoti aka. <sup>4</sup> Hatyo hiyeta notiya kalore, maisa xala hare waiyexeharexe kaiserehare aka aokitere akereta omerekare babera hoka waiyare enakoa hoka.

<sup>5</sup> Hatyaoseta hatya 24-hare inityohalitinai konitare irae nokakoi: — Awa atyo hitiya. Hiyaiyehena! Judá hotyalihare leãoxa, xekohaseti Davi jikolahare jiyahao akatya hoka hatyoiya halalaka 7-hiyalatyakalati hoka omereka babera — nexa nohiye.

<sup>6</sup> Hatyaoseta nowaiyehena atyo, Kalanero Mokose tityoita okahakalati neneke hoka hatyo 4-harenai, exahe 24-hare inityohalitinai xoaha tityoahokotyahitene. Motya akere koxaka kaxaisaka hoka kaseheta. Exotawanai hoka 7, exahe exosenai hoka 7-tehitiya. Hatyo exosenai atyo Enore Nisekohare 7-harenai. Enore atyo axikaita hatyo isekohalitinai waiyaha maheta hakakoare waikohekao.

<sup>7</sup> Hatyaoseta Kalanero Mokose xane okahakalatikoa tyokitere haliya hoka iya babera ekahekoata. <sup>8</sup> Hatyaoseta xane iyene hoka hatyo 4-harenai, 24-hare inityohalitinai exoa meholokoa Kalanero Mokose nahalakoa. Inihatyakaha harpa, tinihalitise ouro nomakere kakoareha makere. Hatyo tinihalitisenai kaisero tyaonita incenso kakoare. Hatyo incenso atyo Enore kaxaikone hotyali niraexala. <sup>9</sup> Exoaha hakaoliseha kakoa hoka waitare xerati xerahita: — Hiso atyo hawaiyexehare kaiserehare hoka ehekore babera hiya hoka 7-hiyalatyakalati hahalalaka hoka homereka babera. Hiyaiya, hiso atyo hiwaini atyalihose xaimaholatyaka hiye hoka hitimalaxa kakoa hiyeheta kahare haliti tyotya haliti hotyaliharenae konita, haxako xakini iraeterenae konita, kiyere, iyomere harenae konita. <sup>10</sup> Hiyeheta haliti hoka Enore wakanehare sacerdote hamokahene hoka hahenahaite Wiyekohase Enore ana hoka kalorexe ite tyaonaha hoka waikohekao tyaoniterenae xekohase tyaohenaha — nexa xeraha.

<sup>11</sup> Hatyaoseta nawahakohitiya hoka nowaiya kahare anjonai. Hisoaka, hisoaka kaiserehare. Tityoahokotyahitaha okahakalati, 4-harenae, 24-hare inityohalitinai hoko haliya.

<sup>12</sup> — Kalanero Mokose atyo kaxaisaka hoka ehekore atyo kalorexe, kinaterexe, kaxiyeharexe kahare, kaxaiminisakere, kaihalaharetyakere, kaxawaiyolinisakere tyaona — nexaha, kinatyaxa xeraha.

<sup>13</sup> Hatyaoseta nasemehena atyo, tyotya enokoa tyaoniterenai, waikohekao tyaoniterenai, waikohe katyahe tyaoniterenai, exahe onexa tyaoniterenai xoaha tehitiya xerahitaha: — Maika okahakalatikoa tyokitere, exahe Kalanero Mokose kaxaixakerityaka, kaxaiminisaka, kaxaeroretyaka, kaxaiyatelikisaka mene matyotenehare — nexaha.

<sup>14</sup> Hatyaoseta hatyo 4-harenae ekoaxatyahitaha: — Nikare! Nikare tehitiya waokita — nexaha. Hatyaoseta 24-hare inityohalitinai exoaha hakaoliseha kakoa hoka awaiyetyahene.

## 6

### *Hiyalatyakalatinæ*

<sup>1</sup> Hatyaoseta nowaiyehena atyo, Kalanero Mokose hiyalatyakalati hatya halalaka hoka 4-harenae konitare hatya iraehena kinatyaxa, motya talolore: — Hisohena — nexa. <sup>2</sup> Hatyaoseta nowaiyehena atyo, kawalo iyomere nowaiya. Kawalo henore atyo kahitonexe. Hatyaoseta isaha enomana waiyexe seritihoko kalorexe tyaona maheta. Hatyaoseta xane jiyahao akatya maheta xane hoka jiyahao akatya.

<sup>3</sup> Hatyaoseta Kalanero Mokose halalahitiya ihiyetare hiyalatyakalati hoka hatsa hatyo 4-harenae konitare iraehitiya: — Hisohena — nexa. <sup>4</sup> Hatyaoseta nowaiyehena atyo, nowaiya kawalo xotere. Hatyo kawalo henore kaxaiyatelikisaka axaisakakoanikisa halitinae hoka aisakakoaha maheta. Kalorexe kesekase kaxekaka enomana.

<sup>5</sup> Hatyaoseta Kalanero Mokose halalahitiya ehanamene hiyalatyakalati. Hoka nasema hatya 4-harenae konitarenae niraene: — Hisohena — nexa. Hatyaoseta nowaiyehena atyo, kawalo hotero nowaiya. Hatyo kawalo heno tyokitere atyo bexatyakalati kahekoare. <sup>6</sup> Nasemehitiya, motya atyo hatya iraehena 4-harenae konitare: — Hatya haliti ite hahena haferakene hoka xisehena enomana halitrone trigohe xamani, hanama litrone cevadehe xamani ehatene katyahe. Awa atyo kolotenitiya xakaketatya, exahe vinhoxa hoka — nexa.

<sup>7</sup> Hatyaoseta Kalanero Mokose halalahitiya exalakakoane hiyalatyakalati. Nasemehena atyo, hatya tehitiya iraihitiya hatyo 4-harenae konitare: — Hisohena — nexa.

<sup>8</sup> Nowaiyehena atyo, kawalo jikere nowaiya. Hatyo kawalo jikere henore nexare atyo

Kamati. Hades aokahitere xane erota exema. (Kamatinae tyaonitere aose nali atyo Hades). Iyateliti kaxekaka enomanaha aisaha maheta kahare haliti xaisakakoati, nakiti, kahehaliti, nisarenae xaihako maniyata.

*Jesus Tyakekohenerenae Kakoa Atyoite Kahalakoaharetyoaka  
(João 15.18-21; 1 Coríntios 4.9-13; Filipenses 1.28-30; 2 Timóteo 3.10-13)*

<sup>9</sup> Hatyaoseta Kalanero Mokose halalahitiya hiyalatyakalati, hatyo kakoita 5-hena. Nowaiyehena atyo, incenso keratyakaose katyahe atyo halitinai niyawaharenai tyaonita. Waikohекоа tyaonitatereha xowakiya Enore niraene xema tyaonahitaha, exahe xakai-hakatya Enore niraine halitinai hiye hoka hatyo hiyeta kaxaisakaha. <sup>10</sup> Kawisahitaha kinatyaxa: — Xekohaseti maxaexahetyakahare niyaterexe, waiyexe, aliterexe: Xoana xowakaite hakatolikoarehena wiso? Exahe iniyalahare hamohena wiyaisasenae waikohекоа tyaoniterenae? nexa kawiyataya.

<sup>11</sup> Neda kawiyataya hoka inihatyakaha imiti iyomere kaxekaka enomanaha hoka ini-nae kawiniha aoka. Hoka ihinaeharenai kaxaisakahenahere akereta kaxaisaka hotohare hoka hatyo najikinita katolikoaretyahene aokowi.

<sup>12</sup> Hatyaoseta nowaiyehena atyo, Kalanero Mokose halalahitiya hiyalatyakalati, hatyo kakoita 6-hena. Hoka waikohe kalore tatakoa, kamai atyo kiyere tyaona, motya imiti hotero. Kaimare hoka xotya tyaona, motya timalati. <sup>13</sup> Xoresenai enokoata exoa waikohекоа, motya halohalo kate kinatyawiniti xalawatya hoka iri eholase ixoita ene. <sup>14</sup> Enokoa maiyareheta baberane kajihiririkisakihititere akereta. Tyairinai, tyotya iyoliroti xoaha kakikisakaheta enawenaneha aoseta. <sup>15</sup> Kaheneharenahena hoka hatyo hiyeta tyotya halitinai mairaha. Xekohasetinai, kalorexenai, kaoloxerenai, sorare xekohasenai, kinaterexenai, wakaharenai, mawaharenaharenai xoaha tekoaha tyairi koni hoka xane teroaha tyairinae nakoako, exahe sehali katyahe kakoakore tyairi ako.

<sup>16</sup> Mairaha hoka kawiyataya tyairi, sehalinai xoaha ana: — Xexoahena wiheno hoka xateroakisa wiso tyokitere okahakalatikoa nonitata, exahe Kalanero Mokose eharetere wihiye nonitata. <sup>17</sup> Hiyaiya, kalikini atyo exéharene ferakene xane hikoa hoka xalaiyatya aiyasetyoahena? nexaha kawiyataya hamairaneha.

## 7

*144.000-hare Israel Yerenai*

<sup>1</sup> Hatyo najikinita nowaiya xalakakoa anjonai. Hatya tityoita kamai nihikoane maniya, hatya tityoita kamai xisoane maniya. Hatya tityoita tihalo kaokene maniya, hatya tityoita one kaokene maniya xoaha. Watyalyahita xalakakoa hoholati waikohekoarenae, maisa xoare hohola hoholitene maheta, maisa one kaloxere hekoti, exahe atyanae hekoti hoholaita maheta.

<sup>2</sup> Hatyaoseta nowaiya hatya anjo. Ainakoita kamai nihikoane maniyata hoka tyoita. Enore tyaota minitere kaferoxatyakala kahekoare hoka kinatyaxa kawiyatya 4-hare anjonai ana, hatyonai atyo koxaka kaxaiyatlikisaka, waikohекоа, onexa xoaha iniyalahare mokaha maheta. <sup>3</sup> Hoka anjo nexa: — Awaira atyo xaiyalaharetya waikohекоа, onexa, atyakatenai hekoti. Ite wakaferoxatyah hotohare Enore koamaniya tyaoniterenai ityaolikoa hoka — nexa kinatyaxa kawiyatya.

<sup>4</sup> Hatyaoseta Enore wakanaharenai kaferoxatyah ityaolinaeha hiye. Ihatyahitene hoka nasemene: 144.000-hare kaferoxatyah, Israel hotyaliharenae taita. <sup>5</sup> Judá hotyalihare atyo 12.000-hare, Rúbem hotyalihare hoka 12.000-hare. Gade hotyalihare hoka 12.000-hare. <sup>6</sup> Aser hotyalihare hoka 12.000-hare. Naftali hotyalihare hoka 12.000-hare. Manassés hotyalihare hoka 12.000-hare. <sup>7</sup> Simeão hotyalihare hoka 12.000-hare. Levi hotyalihare hoka 12.000-hare. Issacar hotyalihare hoka 12.000-hare. <sup>8</sup> Zebulom hotyalihare hoka 12.000-hare. José hotyalihare hoka 12.000-hare. Benjamim hotyalihare hoka 12.000-hare, eko xoaha. Ehohisakoaneha hoka 144.000-hare kaferoxatyakaha.

<sup>9</sup> Hatyo najikinita nowaiyehena atyo, hisoakere haliti nowaiya. Hisoaka hoka maisaiya xala hare aliyakere ihatitene. Hatyo halitinai waikoheko a nihatyakatare, exahe tyotya haliti hotyalinai konitarenai, kiyere, iyomere, haxako xakini iraetere konitarenai. Tityoahitaha Enore nokahakala hoko haliya, Kalanero Mokose hoko haliya hoka. Imiti iyomere akoreha taita, xoloto hana akerehare kahekoareha. <sup>10</sup> — Wenorexa, okahakalati koa tyokitereta, Kalanero Mokose hoka iyeheta wiso iniyalahare nonitata — nexa kinatyaxa kawiyatuya.

<sup>11</sup> Tyotya anjonai okahakalati hoko haliya tityoahitaha, exahe hatyo 4-harenai, 24-hare inityohalitinai xoaha hoka. Hatyaoseta anjonai hakaolise kakoa exoaha hoka meholokoaha, hatiho waikoa mokaha, awaiyityaha maheta Enore. <sup>12</sup> Nexahitaha: — Ehekore! Xaixakerityati, iyateliti, waiyoliniti, ihalahaliti, xaiminisati xoaha atyo Wenorexa anere matyotenehare. Ehekore! nexaha toli.

<sup>13</sup> Hatyaoseta hatya inityohaliti 24-harenae konitare axa natyo: — Xalanae imiti iyomere akore tyaonita? Alyakota tyaoha? nexa nohiye. <sup>14</sup> Hoka nomi ihiye: — Maisa nawaiyorexe. Waiyekehala kita atyo homana, kalorexe — nomi nekoaxatya. Hoka nexa nohiye:

— Exenai atyo waikoheko tyaonahitere xowaka kalore iniyalahare kaxomokaka hoka tihehenahitaha haimanaeha Kalanero Mokose timalaxa kakoa hoka iyoma tyaonaha.

<sup>15</sup> Hatyo hiyeta Enore nokahakalakoa haliya tyaonahitaha, exahe Enore hanako hoka hakahitaha enomana ferakoa, makiya xoaha. Hatyo okahakalati koa tyokitere ite tyaona enekonyaha hoka kaxaikoahene. <sup>16</sup> Exe hekota atyoite maisa nakehenahititaha, oinehenahititaha. Maisaiya kamae, hatya watere hekoti kerahenahititene. <sup>17</sup> Hiyaiya, Kalanero Mokose okahalakati nenekesene tyaonitere atyoite kaxaikohenahene. Kolatya-hene ite one waiyexe maniya hoka erakisahenahenite one mananehalitiya kakoa. Enore ite tyotya enosexataliha tiriheta — nexa nohiye.

## 8

### *Miyanitiyehena Hiyalatyakalati Halalakaka*

<sup>1</sup> Hatyaoseta Kalanero Mokose halalahitiya hiyalatyakalati, hatyo kakoita 7-hena. Halalaka hoka hatyaoseta enokoa nali mema tyaonaha, xakore hoka maisa waha xini.

<sup>2</sup> Hatyaoseta nowaiya 7-hare anjonai, Enore haliya tityoita. Hatyaoseta 7-xaemahalikisakalati koneta kaxekaka enomanaha.

<sup>3</sup> Hatyaoseta hatya anjo tinihaliti ouro nomakere incenso nitini kakoare tyaoa tityoa incenso keratyaka aose haliya. Kahare incenso kaxekaka enomanaha hoka ahohisakoatya maheta tyotya Enore kaxaikone hotyali niraexala kakoare. Hoka ouro nomakere keratyakalati aose keratene maheta okahakalati haliya. <sup>4</sup> Enore haliya anjo tyaonitere kahekoata incenso keratyaka niye ainakoita manene Enore kaxaikone hotyali niraexala kakoare. <sup>5</sup> Hatyaoseta anjo iya tinihaliti incenso nitini hoka irikati iya incenso kaker-ayakitere aposeta hoka irikati moka enako hoka waikoheko a xawatene. Hoka talolare, xakoti, kahihiyeh, exahe waikoheko a harenae hoka tatako.

### *Koneta Xaemahalikisaka*

<sup>6</sup> Hatyaoseta 7-hare anjonai memere tyaonaha koneta aemahalikisa maheta.

<sup>7</sup> Hatyaoseta hetatiye anjo aemahalikisa koneta hoka irikati one sehalise kakoare, timalati kakoare, kaolatyoanexe exoa waikoheko a hoka keratyka waikohe holinikoa. Atyakatenai, ime harenae hoka holini kera.

<sup>8</sup> Hatyaoseta hatya anjo aemahalikisa koneta, hatyo kakoita hinamehena. Aemahalikisa hoka motya tyairi kiriterehare kaxawatyaka one kaloxere xaiya hoka holinixa one timalaxa tyaona. <sup>9</sup> Hoka holini waini onexa tyaoniterenae, exahe kanowa kalorexenai hoka holini kamawenekoaretyakaha.

<sup>10</sup> Hatyaoseta hatya anjo aemahalikihitiya koneta, hatyo kakoita hanamehena. Aemahalikisa koneta hoka kalorexe xorese exoa enokoata, motya xaokanatyakalati kalorexe takoare. Exoa holini onexaiyanai, onesenai xoaha heno. <sup>11</sup> Hatyo xorese nexare atyo

Tihero. Tihe hoka onexaiyanae, onesenae xoaha exoa hoka tihexa mokahene. Hiyeta hoka kahare haliti waini terehenaherene hiyeta.

<sup>12</sup> Hatyaoseta hatya anjo aemahalikihitiya koneta, hatyo kakoita 4-hena. Aemahalikisa koneta hoka kamai, kaimare, xoresenae kakawé xomokaka hoka ferakoa hoka kamai maisa waiye aokanahenahitita. Makiya hoka nikare kaimare, xoresenai hoka maisa waiye aokanahenahitita.

<sup>13</sup> Hatyaoseta nawahakota hoka nasema hatya aliwa eno ainakoita hoka kinatyaxa kawiyatya: — Maika waikohekua tyaoniterenai kirakoane tyaonaha hanamaki hoka “Akai, akai, akai”, nehenaha, semehenaha koneta nemahare, hanama anjonae aemahalikihena hoka — nexa.

## 9

*E5-ne Koneta Xaimahalikisaka*

<sup>1</sup> Hatyaoseta hatya anjo aemahalikihitiya koneta, hatyo kakoita 5-hena. Aemahalikisa koneta hoka nowaiya hatya xorese xexoane enokoata. Exoa waikohekua hoka kaxekaka enomana toloko kalorexe jihola majiholatyakala. <sup>2</sup> Majiholatya toloko kalorexe hoka jimere hikoa. Motya jihatyalati kalorexe akota hikoane hoka talatya kamae. Kamae, enokoa xoaha makaliro tyaona jimere toloko akota hikoahenere hiyeta. <sup>3</sup> Hatyaoseta hatyo jimere konita iri toli hikoa hoka waikohekua exoa. Hoka iyateliti kaxekaka enomanaha hoka xakolokoa akereta xakarexeha.

<sup>4</sup> Iraeha ihiyeha hoka atya, ime, xoalini hare waikoa hikoitreharenai maisa aiyalaharetyahitaha maheta. Hoka Enore kaferoxatyakala kakoa makaferoxatyakaharenae ityaolinaeha hiye taita xakaka aokaha. <sup>5</sup> Hoka maisa atyo halitinai xaisaka aokahitaha iri toli hiye, xakore hoka exewaolitikisakaha taita atyo aokaha 5-li kaimare niyahare. Ixatene kahe atyo motya xakolokoa xatene kahe. <sup>6</sup> Hatyo iri xahenaherene 5-li kaimare nasite kasani halitinai waini xakorete aokowiha hoka maisa ite wainahitaha. Waini kaiserehare xakore ite aokowihitaha hoka maisaiya wainahitaha.

<sup>7</sup> Hatyo irinai atyo motya kawalo memere tyaonitrehare xaisakakoati ana akerehare. Eserinae hiye seritihoko motya ouro nomakere. Itihonaiha hoka motya haliti tiho.

<sup>8</sup> Esekaseha hoka motya ohiro sekase, enaikoliha hoka motya leão naikoli. <sup>9</sup> Motya kamatihera taose tyaonita itikolali hiye itikolali talatyakala maheta. Kataneroha hoka etanenaeha kaimahareta, motya kahare kawalonai karosa kakoa temiterehare xaisakakoati ana akereta atyo kaemahareta. <sup>10</sup> Kaihoreha, hoka inihoha hiye enokolaha xakolokoa akereta. Hoka haihoha kakoa xakahitaha halitinai 5-li kaimare niyahare.

<sup>11</sup> Kaxekohasexeha hoka wakatyahitene. Toloko hatekoakore kaxaikotyasehare anjo atyo exekohaseha. Hebraico xako atyo Abodom enexare hoka grego xako atyo Apoliao enexare. Xoalini hare mawenekoaretyasehare hoka nikare enexare. <sup>12</sup> Nikare tyaonaha hoka hetatiye kaheneharexe koxaka jiya. Xakore hoka hekotata hinama kaheneharexe enahetaha maniya.

*E6-ni Koneta Xaimahalikisaka*

<sup>13</sup> Hatyaoseta hatya anjo aimahalikihitiya koneta, hatyo kakoita 6-hena. Hatyaoseta nasema xakoti tyoitere xalakakoa tononako maniyata, ouro nomakere keratyakalati aose Enore nahalakoa tyaonitereta. <sup>14</sup> Hoka nexa anjo koneta aimahalikihenere hiye: — Hamaxolahetehena 4-hare anjonae olattyore one kaloxere Eufrates haliya tyaoniterenae — nexa.

<sup>15</sup> Nixa hoka maxolahenahitahene. Hatyo ferakene, hatyo kaimarene, hatyo terehokoane niyahare memere tyaonahitaha kahare halitinai aisaha maheta. <sup>16</sup> Exowaka kawalonai, kawalohenorenai hisoaka tyaonaha, 200.000.000 harenai. Nasema ixihatyalaka tahi. <sup>17</sup> Nokaxawaiyanikisaki hoka nowaiya kawalonai, eheno tyokiterenae hare. Itikolaliha talatyakala irikati akerehare xotere, sehalise safira akerehare tihorere, enxofre akerehare jikere xoaha. Kawalonae seri hoka motya leao seri. Ekanasakota hikoita irikati, jimere, enxofre xoaha. <sup>18</sup> Nikare hikoa irikati, jimere, enxofre xoaha ekanasakotaha hoka haliti aisaha kahare. <sup>19</sup> Kawalonai niyatere atyo ekanasakonaeha,

inihonaeha xoaha hiye tyaonita. Inihoha motya owi haseri kakoare hoka tyalokehekoaita halitinai.

<sup>20</sup> Irikati, jimere, enxofre xoaha hiye kahare haliti waini, xakore hoka makamane-henerenai maisa halakisare iniyalahare háomaneha. Heko tyaonahitaha tihanare koamaniya. Maisa halakisareha hawenane enore metalaharenae koamaniya. Hatyoharenae xakore atyo ouro, prata, kamathiera bronze, sehali harenae nomakere, atya taose nomakere. Maisa waiyakatyareha, maisa semakatyareha, maisa tonareha xakore hoka tyaonahitaha ekoamaniya. <sup>21</sup> Hatyo makamanehenerenai maisa halakisareha haxaisaneha halitinai, maisa halakisareha hahaholitaharenaha, maisa halakisareha ohironai hawatyaliniha, maisa halakisareha hakaiwarenaha.

## 10

### *Anjo, Baberanese Xoaha*

<sup>1</sup> Hatyaoseta nowaiya hatya anjo kinaterexe exoahena enokoata. Inima atyo kaiminiti, kaxore tyaonita eseri hiye. Itiho weroka kamai werokitere akereta. Ekasahenai hoka motya irikati takoiterehare. <sup>2</sup> Ekahekao baberanese omerekaoare tyaonita. Exoa enokoata hoka hakiji fihi maniya moka onexa hoka hawatone maniya waikohekoia moka <sup>3</sup> hoka kawiyatya kinatyaxa. Exako motya leão tyorera. Kawiherenere najikinita 7-talolore ekoaxatene kalorexe emahaliti kakoa. <sup>4</sup> Iraihenahere xowaka naxairatya naokowihena hoka nasema iraiti enokoata: — Awa atyo xoalini hare haxairatya, awa atyo hiyakaihenenahatya hiye exe talolore iraehenere — nexa nohiye.

<sup>5</sup> Hatyaoseta anjo nowaiyehenere onexa, waikohekoia tityoahenere hakahe fihi maniya eno xeta keteka. <sup>6</sup> Hoka Enore heko makamanehare tyaonitere, tyomehenere enokoa, waikohe, one, tyotya tyaoniterehare enakoa nexare kaexaretya hoka nexa: — Maisa wahehetere. <sup>7</sup> Miyanitiye anjo koneta aemahalikihenere xowaka ite Enore haxahekola metaharetere tyomehena, toahiya xakaitere hawakaneharenae iraiti xakaisaseharenae hiye akereta — nexa nohiye.

<sup>8</sup> Hatyaoseta enokoata iraehenere nokakoi iraihitiya nokakoi: — Hiyane hiyehena anjo onexa, waikohekoia xoaha tityoitere kahekoata baberanese omerekaoare — nexa nohiye. <sup>9</sup> Noxani hoka naxa baberanese anjo hoka nexa nohiye: — Ahá, hotohenene hoka hikanakairehenene. Hajako ite tihe hoka hikanasako ite wiya, motya maha.

<sup>10</sup> Hatyaoseta niyene anjo kahekoata hoka nokanakairini. Nokanasako wiya, motya maha. Hoka nokanakairihenerene najikinita najako tihe. <sup>11</sup> Hatyaoseta nexaha nohiye: — Enore niraene ite hiyakaihitiya haliti hotyalinae tahi, iyomere, kiyere harenae tahi, haxako, haxako xakini iraeteretahi, exahe kalorexenae tahi — nexa anjo irae nokakoi.

## 11

### *Hinama Iraityatiyeneae*

<sup>1</sup> Hatyo najikinita kaxekaka nomani xaimenekotyakalati atyakase akerehare hoka nexaha nohiye: — Nikahena hiyane haimenekohena Iraexatyakalati Hana, keratyakalati aose xoaha. Haiyaharenai tyaonita Iraexatyakalati Hanako, awaiyityahitaha Enore. Hihatehena hatyo halitinai. <sup>2</sup> Xakore hoka awa atyo haimenekohena wetekonae, Iraexatyakalati Hana teneno maniya henekoa tyaoniterenae. Enore maniya mawenane-harenai hotyalinai anere atyo kahalakisaka hoka 42-ri kaimare ite tohenaha wenakalati waiyexe nali — nexa nohiye. <sup>3</sup> — Naxikatyaithe hinama haliti niraini kakoare. Imiti tataolate nimerehaite hoka xakaihenaha ite Enore niraine haliti hotyalinai ana 1.260-ki ferakene — nexa nohiye.

<sup>4</sup> Exakere kaxawaiyekhalakatya hatyo hinama haliti: Hinama kate oliveira kate, hinama kase xaokanatyakalati xoaha. Tityoare tyaonita waikohekoia nihatyaka Xeko-hasehare nahalakoa. <sup>5</sup> Xala xamaniya kawe mokahene aokowi hoka ekanasakotahaiya hikoa irikati hoka mehotyaiya hahalakoaharenai. Nikareya xala xamani iniyalahare mokahene hoka kaxaisakaiya. <sup>6</sup> Hatyo hinama haliti atyo iyateliti kakoare enokoa

jihotyaha hoka maonene maheta Enore niraene xakaihahitere nase. Iyateliti kokoareha one timalati aikawatyaha maheta, exahe ahokakatyaha maheta waikoheko tayoniterenae hawarehare kahehaliti kakoa haxaokalaha ximita.

<sup>7</sup> Miyatyaite haxakainiha iraiti hoka kirakahare toloko hatekoakoretare ite kahalakoaharehena ekakoaha hoka aisahene. <sup>8</sup> Aisahenite hoka eháreha ite hekota etolisoare tyaona kalorexe wenakalati náhota. Hatyo nali Exekohaseha kaberekotyaka atyalihose xaimaholatyaka hiye hoka kaxaisaka. Wenakalati nexare atyo Sodoma, Egito xoaha. (Hatyo exalitinae aimenekoita iniyalahare aose.) <sup>9</sup> Waikoheko nihatyaka tyaoniterenaite waiyaha ekamaneha. Kiyere, iyomere harenae, haxako xakini iraeterere harenae waiyaha ekamaneha hanamaki ferakene mokotexe. Maisaité halakisahitene kaxafityakaha maheta. <sup>10</sup> Hoka waikoheko tyaoniterenae ite ihalahareha exe hinamahare haliti kamane hiyeta. Kanakaira akatyahaite, terakatyahaite, axikatyakakoahenaha ite xoalini hare maxaimanehareta. Koxaka howithare kaiserehare mokaha halitinai nawenane hoka hatyo hiyeta ihalahareha ekamaneha kakoa.

<sup>11</sup> Xakore hoka hatyo hanamaki ferakene mokotexe najikinita ite Enore nalita xamomati xekasekisakalati tyoa isoa ihiyeha hoka tityoahenahitaha. Tityoahenahitaha ite hoka tyotya waiyehenerenenaite mairaha kalore. <sup>12</sup> Hatyaoseta semehenaha atyo, kinatyaxa iraiti semaha enokoata: — Xisohena ali — nexa hatyo hinamahare hiye. Enahalakoaharenae wahakotitere nase hatyo hinama iraiti xakaisaseharenae enokoa xeta xaneha kaiminiti xema.

<sup>13</sup> Hatyo xowaka kalore waikohe tatakoa hoka kahare hati exoa hatyo wenakalatikoa nali, exahe 7.000-hare haliti waini. Makamanhenerenai mairaha kalore hoka aexakerityaha Enore enokoa nali tyaoniterenae niyatere.

<sup>14</sup> Koxaka ihinamene kaheneharexe jiya. Hoka xasemehena, ehanamene haxeroreta kaotyakehena.

#### *E7-ni Koneta Xaimahalikisaka*

<sup>15</sup> Hatyaoseta hatya anjo aemahalikihitiya koneta, hatyo kokoita 7-hena. Aimahalikisa koneta hoka enokoata kinatyaxa iraitinai nehena: — Kalikini atyo iyateliti Wiyekohase ana tyaona, exahe Enore Kalorexe Aohenere ana tyaona waikoheko nali, hoka Kalorexe ite tyaona menehena matyotenehare — nexaha.

<sup>16</sup> Hatyaoseta 24-hare inityo halitinai tyokahitire Enore nokahakala nahalakoa exoaha hakaolise kakoa hoka meholokoaha waikoa hatihoha kakoa hoka awaiyetyaha Enore hoka nexaha: <sup>17</sup> — Xekohaseti Enore maxaixahityakahare niyaterexe, toahiya hisaonita, exahe kalini hoka heko hisaonita. Hiso atyo hikinatere hoka hiyatere ximita kalini Xekohaseti hisaonita ali waikoheko hoka hatyo hiyeta hawaiyeta womana. <sup>18</sup> Waikoheko nihatyaka tyaoniterenai eharahitaha hihiye, hoka kalini atyo iniyalahare exomokakaha aose hikoa. Kalini kamatinai kaseneheta ferakene hikoahena hoka hasemehena enómaneha hoka enómaneha akereta hamohenahene. Hoka hiwakanehareni iraiti xakaisaseharenai, exahe tyotya hikoamaniya tyaoniterenai hoka waiye ite hamohenahene. Aiminijitere Hiso, kalorexenae, wakaharenae hare hoka waiyexe hiyomotene ferakene hikoa. Hoka wenati aiyalaharetiterenai mehotyakaose ferakene hikoa — nexa hatyo 24-hare inityohalitinai.

<sup>19</sup> Hatyaoseta Iraexatyakalati Hana, Enore anere enokoa tyaoniterenae majiholatyoa hoka hatyoako kawaiyaka kajalise Enore xairala xaotyakiraho kokoare. Kahihiyeh, iraiti, talolore, harenae tyaona. Waikoheko maniya hoka xairirikoati, exahe one isemaxha kokoare tyaona.

#### *Ohiro, Owi Kalorexe Kakijiye Xoaha*

<sup>1</sup> Hatyaoseta enokoa nali kaotyaka kalore metaharexe, amairakisare. Hatyo atyo hatya ohiro. Inima atyo kamai, ikijinai katyahe kaimare. Seritihoko tyaonita eseri hiye 12-se xorese kokoare. <sup>2</sup> Tifalo hoka xoima kaweta ihiye hoka kinatyaxa waolitita, okoi xoima tyaohena hoka.

<sup>3</sup> Hatyaoseta enokoa xoalini hare metaharexe kaotyakehitiya. Nowaiya owi xotere kalorexe, kakijiye. 7-seriye, ekaiyehe nihatyaka seritihoko tyaonita, exahe hoka 10-xotawa eserinai hiye. <sup>4</sup> Haiho kakoa hisakoatya holini xoresenae hoka waikoa xawatyahene. Hatyaoseta ohiro tifalo haliya xane amematyoa, kasani xoima tyaohena hoka nisene aokowita.

<sup>5</sup> Hatyaoseta ohiro awenakisa haisani enamokose. Hatyo xoima atyoite inityohaliti-hena hoka tyotya haliti hotyaliharenae xekohase tyaona kamatihera kase kakoa. Xakore hoka xoima tyaona taita hoka kakolatyaka enokoa nali Enore haliya, enokahakala haliya.

<sup>6</sup> Hatyaoseta ohiro tekao maharexakahareko. Enore koxaka memere enaheta maniya moka. Nalite kakaxaikotyaka, exahe katyaisaka hare 1.260 ferakene.

<sup>7</sup> Hatyaoseta xaisakakoati tyaona enokoa. Miguel hanjoxanai kakoa, xalijinhare kakoaha owi kalorexe hanjoxanae kakoa xalijinharetere xahita. <sup>8</sup> Xakore hoka owi kajiyahaotyaka hoka maisaiya aliyakere hawakanehare anjonae kakoa enokoa tyao-henahitaha. <sup>9</sup> Hatyaoseta owi kalorexe kaxawatyakeheta enokoata waikoahекоа xeta enanjoxanai kakoa. Hatyo atyo toahiyere owi kinohare. Tihanare, Ahalakoahaliti xoaha nexarexe. Tyotya haliti maoseraitere.

<sup>10</sup> Hatyaoseta nasema iraiti kinatyaxa enokoa nali. Nita: — Kalini atyo Enore hotikisa haiyatere hoka hakaxaikonehare hotyalinai waiyexe maniya exomokala ferakene atyo hikoa. Exahe Enore Kalorexe Aohenere tehitiya ite kalorexe tyaohena. Hiyaiya, wihinaeharenai niraeharetyase kaxawatyaka waikoahекоа. Hatyo atyo iraeharetita ene wihinaeharenai Enore hiye fera. Ferakoa, makiya hoka maisa halakisare hairaeharera. Hoka kalini atyo kaxawatyakeheta. <sup>11</sup> Hoka wihinaeharenai jiyahaotene Kalanero Mokose timalaxa hiyeta, exahe Iraiti Waiyexe xakaihenahere hiyeta. Memere ene tyaonahitaha haxaisakaha naheta, wainiha maheta. <sup>12</sup> Hiyeta xihalaharehena enokoa, exahe xiso xisaoniterenae enakoa. Xakore hoka waikoa, onexa tyaoniterenai ite hoka kirakoane tyaonehena. Hiyaiya, Tihanare exoaheta xomana xisaonitere nali hoka ehareta kalore. Waiyoreta atyo maisa wahehetare hawenane kakoa hoka — nexa.

<sup>13</sup> Owi kalorexe kakijiye exoaheta waikoahекоа hoka hatyo najikinita kehexahare-tyoaheta hoka xalijinharehena hatyo ohiro xoima enamokose awenakihenere hiye.

<sup>14</sup> Xakore hoka ohiro ana kaxekaka aliwa tane ainakoa maheta hawenakala maharex-akahare xeta. Nalite kakaxaikotyaka hanama terehokoane mokotexe maisa owi xoana mokitene maheta. <sup>15</sup> Ohiro tekahena hoka owi hakanasakota kaloxa one aihi koatya one kaloxere akere ohiro xema, one kolatya maheta ohiro. <sup>16</sup> Xakore hoka waikohe kahinaetya ohiro. Toloko kaloakore kaotyaka hoka owi kalorexe hakanasakota one aihi koakehenere wiroloka hoka aisoakisa. <sup>17</sup> Hatyaoseta owi kakijiye masakare ehare ohiro hiye. Maisa xoare tyomita ohiro kakoa hoka xalijinharehena ityaninai, ijikolaharenai xahita. Hatyonai atyo Enore niraene xema tyaoniterenae, exahe iraiti Jesus hotikihenere xema tyaoniterenae. <sup>18</sup> Hatyaoseta owi kakijiye xane amematyoa kaiholokoa one kaloxere kilihi.

## 13

### Hinama Kirakahare Kaheneharexe

<sup>1</sup> Hatyaoseta nowaiya hatya kirakahare kahenehare. Onexata atyo hikoita. 7-kaiyehe, exahe hoka 10 xotawa hoka exotawa nihatyaka seriti hoko tyaonita. Ekaiyehenai hiye xairatyoare iraehekoatyi iniyalahare. <sup>2</sup> Hatyo kirakahare nowaiyehenere atyo motya jini kaxairere. Ikjinali atyo motya urso kiji, ekanase atyo motya leão kanase. Hoka owi kakijiye isa enomana haiyatere, exahe okahakalati masakare kalorexe tyaona maheta.

<sup>3</sup> Nowaiyehenere atyo, hatya ekaiyehe hiye kaxoseharexe kalore hoka maisaiya aliyakere makamaneta, xakore hoka tyameheta. Tyameheta hoka hatyo hiyeta waikoahекоа tyaoniterenai hakaharetyoaha hoka tyaonaha kirakahare xema. <sup>4</sup> Tyotyaha awaiyetyaha owi kakijiye, ihalahareha ekakoa kirakahare ana xekohaseti haiyatere isehenere hiyeta.

Awaiyetyahitaha tehitiya kirakahare hoka nexaha: — Xalaiya hatyo akerehare? Xalaiya aisakakoa ekakoa? nexaha.

<sup>5</sup> Hatyaoseta kirakahare kahalakisaka irae maheta xoalini hare kaheneharexe, iniyalahare hare. Hatyaoseta iyateliti kaxekaka enomana kalorexe tyaona maheta 42-ri kaimare niyahare.

<sup>6</sup> Hatyaoseta Enore xaokaka iniyalahare iraehena. Enexare, Enore tyaonitere nali, tyotya enokoa tyaoniterenae xaokaka iniyalahare iraehena. <sup>7</sup> Hatyaoseta iyateliti kaxekaka enomana hoka Enore koamaniya tyaoniterenai xahita xalijinhare, exahe jiyahaotyahene maheta. Exahe tyotya haliti hotyalinai haxako xakini iraiterenai, kiyere, iyomere harenae xekohase tyaona maheta. <sup>8</sup> Tyotya halitinaite awaiyetyaha kirakahare. Hatyonae atyo toahiya Kalanero Mokose kaxaisakehenere nahitita, exahe waikohe maomakaharene xowakiya enexarenaeha maisa xairatyoare tyaonita Kalanero Mokose baberanexakoa.

<sup>9</sup> Hiyeta hoka xasema xaokowita hoka waiye xasemaxemaya: <sup>10</sup> Xala xamanite berexo xane maheta terota hoka berexo ite xane. Xala xamanite kesekase kakoa kaxaisaka maheta hoka kesekase kakoa terotaite kaxaisaka. Hiyeta hoka xityakekohenaira Enore. Maikaite heko xikinatere ekoamaniya xisaona, exahe berexotyaha xiso, aisaha xiso xoaha hoka.

<sup>11</sup> Hatyaoseta nowaiyehena atyo, nowaiya hatisa kirakahare, waikoata kaotyaka. Hinama exotawa, motya kalanero mokose xotawa. Iraehena hoka exako atyo motya owi kakijiye xako, kahenehare. <sup>12</sup> Hatyo kirakahare waikoata kaotyakehenere atyo hetatiye kaotyakehenere niyatere kakoare, ehaotita tyaonita hoka. Aiyateretyoa waikohekao tyaoniterenai xahita, kasani halitinai awaiyetyaha kirakahare onexata hikoahenere aokita. Hatyo kirakahare kaxosexo hoka tyamexosehetehenere awaiyetyaha aokita. <sup>13</sup> Hatyo kirakahare waikoatare kahare xoalini hare amairakisare tyoma. Irikati enokoata exoakisa waikohekao tyotya halitinai haotita. <sup>14</sup> Kirakahare onexatare haoti tyomehenerenae hiyeta maoseratya tyotya halitinai. Hatyaoseta irae tyotya waikohekao tyaoniterenae hiye hoka tyomaha kirakahare xaemenikotyaka exaiminisakahare niyahare aoka. Hatyo atyo kesekase kakoa xakore kakaxoseharettyaka hoka maisa wainita.

<sup>15</sup> Hatyaoseta kirakahare akerehare tyomaha exaimenekotyaka. Hoka iyateliti kaxekaka kirakahare waikoata kaotyakehenere ana hoka exaimenekotyaka kaomakehenere aohoma hoka iraexe tyaona, hoka maxawaiyerehenerenae aisa maheta. <sup>16</sup> Hatyaoseta kinatere hoka tyotya halitinai kakaferoxatyaka aoka ewaotyaliha ifihiniha hiye, ityaolikoa xoaha. Kaloxerenai, maoloxaharenai, mawakaharenaharenai, wakaharenai xoaha tyotya halitinai kakaferoxatyaka aoka. <sup>17</sup> Makaferoxatyakaharenaiya maisa aliyakere betetita, iyahitaha xoaha. Maisa Kirakahare nexare kakoare, maisa eferoxa kakoare kakaferoxatyakita hoka.

<sup>18</sup> Exe akiti atyo waiyorexe niyahare. Xawaiyoriya xihatita hoka kirakahare feroxaiya waiyekhalakita xomana, xaiyateretyoa hoka. Eferoxa atyo hatya haliti nexare, eferoxa atyo 666.

## 14

### Kaiyakehetehenerenae Tahi

<sup>1</sup> Hatyaoseta nowaiyehena atyo, nowaiya Kalanero Mokose. Tityoita tyairi Sião henô, 144.000-hare haliti tyaonita ehaliya. Enexare, Enexe Enore nexare xoaha xairatyoare tyaonita ityaolinaha koa hiye. <sup>2</sup> Hatyaoseta nasema enokoata iraiti, motya kalorexe wamolo. Motya tehitiya one kalorexe talolola. Motya tehitiya halitinai aimahalikijita ene harpa. <sup>3</sup> Hatyo 144.000-hare haliti Enore nokahakala haliya tyaonita, exahe hatyo 4-harenai, 24-hare inityohalitinai xoaha haliya tyaonahitaha. Xerahitaha waitare xerati xaka. Hatyo 144.000-hare taita atyo waiyore hatyo xerati kako hoka maisaiya atyo aliyakere hatya waiyoreta ekakoa. Hatyonai atyo koxaka waiye maniya kaxomokaka halitinai konita hoka. <sup>4</sup> Iniyalahare heko maomaneharenae, ohiro mawatyaliniharenai hoka. Xanahitaha Kalanero Mokose xema, aliyo xamani xanehena hoka. Hatyonae

hotohare atyo kaiyakeheta halitinai konita Enore ana, Kalanero Mokose ana. <sup>5</sup> Maisa xoana xowaka maoseratyareha. Waiyexe kaiserehareha, maisa xoare hare iniyalahare tyomareha.

#### *Hanama Anjonai Xakaini*

<sup>6</sup> Hatyaoseta nowaiya hatya anjo, eno akiya ainakoita. Iraiti Waiyexe matyotenehare kakoare, xakai maheta haliti hotyalinae waikoheko tyaoniterenae hiye, hahotyalihare, haxako xakini iraetereharenae, kiyere, iyomere harenae hiye xakai maheta. <sup>7</sup> Anjo xane hoka nexa: — Ximairehena Enore, xaixakerehena enerore. Hiyaiya, Enore halitinae tyomehenere akereta xomotene ferakene hikoa. Xihalaharehena ekakoa, xawaiyehena etake waikoheko, enokoa, one, onesenae hare tyomehenere — nexa kinatyaxa irae.

<sup>8</sup> Hatyaoseta hatya anjo tya exema hoka nehitiya: — Wenakalati Babilônia kamawenekoaretyakeheta. Hatyo nali tyaoniterenai isa haolone vinhoxa tyotya haliti hotyalinae ana hoka erakisahitene, ahekakakisahitene — nexa kinatyaxa irae. (Enawenaneha iniyalahare xaokaka “oloniti vinhoxa”, nita)

<sup>9</sup> Hatyaoseta hatya anjo jiya hatyo hinamahare xema hoka nexa: — Xala xamani atyo ite kirakahare, exaimenekotyaka xoaha awaiyetya, exahe kakaferoxatyaka ityaolikoa xamani, ewaotyali hiye xamani hoka <sup>10</sup> Enore nolone vinho ite tera, makaolat�akahare ehaihenere haxeharene nitinihare ako. Hoka kehexaiya Enore xeharene — nexa. (Enore xeharene xaokaka “Enore nolone vinhoxa”, nita). — Hoka kaxawatyakaite irikati enxofre kakoare keritere aose nali anjonai waiyexe haotita, exahe Kalanero Mokose haotitaite hoka makawatiharehaite. <sup>11</sup> Iriskati ekeralisakalaha jimene ite matyotenehare ainakoahena. Nali atyo maisa kawiniti aka ferakoa, makiya xoaha kirakahare, exaimenekotyaka awaiyehenerenae ana. Exahe xala xamani enexare kakoare hakiti kakaferoxatyakehenere ana hoka — nexa anjo kinatyaxa kawiyatya.

<sup>12</sup> Xasemehena, xiso Enore wakaneharenai, xiso Enore aokitere akereta tyaoniterenae, exahe xiso tyakekoterenai Jesus: Maika xaiyateretyoa heko xisaona maheta exema maniya.

<sup>13</sup> Hatyaoseta nasema iraiti enokoata hoka nexa nohiye: — Exe haxairahena — nexa. — Waiye kaiserehare atyo xalanae xamani kalikinita Enore koamaniya tyaoniterenai wainihena hatyakekone kakoa — nexa.

— Há, alitere aokita — nexa Isekohaliti Waiyexe. — Wainihenere najikinita atyoite kawinihenaha hahateneha nonitata. Enómanenaite maisa kamaotyanityakita — nexa.

#### *Hananehaliti Xirikotyaka Waikohekoata*

<sup>14</sup> Hatyaoseta nowaiyehena atyo, nowaiya kaiminiti iyomere hoka hatya tyokita eheno, motya haliti. Eseri hiye seritihoko ouro nomakere hoka ekaheko kataikore ekawetyakahare tyaonita.

<sup>15</sup> Hatyaoseta hatya anjo hikoa Iraexatyakalati Hanakota hoka kinatyaxa kawisa kaiminiti heno tyokitere ana: — Hahahenaira kataikore kakoa hoka hirikohenahanehaliti. Hiyaiya, ixirikotyaka ferakene hikoa, waikohe memere tyaonita kaximexakoatyaka maheta — nexa. <sup>16</sup> Nexa hoka kaiminiti heno tyokitere kataikore kakoa hahena waikoheko hoka hananehaliti irikotya.

<sup>17</sup> Hatyaoseta nowaiyehitiya atyo hatya anjo hikoahena Iraexatyakalati énokoa naliye Hanakota. Hatyo tehitiya kakatakorere ekawetyakahare. <sup>18</sup> Hatyaoseta hatya anjo iriskati kaxaikotere hikoa keratyakalati aoseta. Hikoa hoka irae anjo kataikore kahekoare hiye: — Hiyane hahahena kataikore kakoa waikoheko. Hiyaiya, uvalinaitya koxaka xona, hiyane hirikohenene — nexa ihiye kinatyaxa kawiyatya.

<sup>19</sup> Nexa hoka anjo xane waikoheko haka maheta kataikore kakoa. Iriskotya uva xawanae ekate hiyeta hoka xawatyahene kakatyakalati kalorexe ako. Enore xeharene xaokaka, “Kakatyakalati kalorexe”, nita. <sup>20</sup> Uvalinai kaxawatyakaha enako hoka kakatyaka wenakalati nonitata haware. Kakatyakalati akota kaise hoka timalati hikoa

enakota hoka kahekoaxa hoka hatekoxehena, kawalo kanasakolihi akereta ehatekoxene. Hatyaoseta jiyaxa xane 300 kilometrone.

## 15

*Anjonai, Exahe Miyanitiye Kahehalitinae*

<sup>1</sup> Hatyaoseta nowaiya xoalini hare metaharexe kalore enokoa nali, kahenehare. — Xoare naheterala — nomi moka. Nowaiya 7-hare anjonai, 7-kahehaliti kakoarenæ, miyanitiyenæ. Hatyoharenæ kakoa Enore xeharene tyoteheta.

<sup>2</sup> Hatyaoseta nowaiya one, motya balaxoko taosexa ekaolatyakahare irikati kakoa. Nowaiya tehitia kahare halitinai, tityoahitaha hatyo onexa motya balaxoko taosexa haliya hoka aemahalikisahitaha harpa Enore isehenere enomanaha. Hatyonai atyo waikohekoa tyaonitatere xowakiya kirakahare, exahe exaimenekotyaka, eferoxa hotiki-jitere enexare xoaha jiyahaohenerenai. <sup>3</sup> Xerahitaha Enore wakanehare Moisés xerane, exahe Kalanero Mokose xerane tehitia. — Xekohaseti Enore, Hiso atyo maxaixahityakahare niyaterexe. Hománenæ waiye kaiserehare, kalore atyo. Hiso atyo tyotya haliti hotyalinæ Xekohase. Waiye kaiserehare atyo hiyahekolanae exahe hisomitereharenæ hoka. <sup>4</sup> Xalaiya maisa mairita hiso, Xekohaseti? Xalaiya maxakainihena waiyexe hitahi? Hiyaiya, Hiso taita atyo iniyalahare maomanehare hisaonita. Tyotya haliti hotyaliharenæ ite tyoa awaiyetyaha Hiso. Hiyaiya, tyotya hisomehenerenæ atyo waiye taita, hakakoa heko kawaiyakita — nexa xerahitaha harpa aimahalikjiterenai.

<sup>5</sup> Hatyaoseta nowaiyehena atyo, Iraexatyakalati Hana nowaiya enokoa nali. Majiholatyoare tyaonita hoka halyako iraitiya kakoare kawaiyakita. <sup>6</sup> Hatyaoseta 7-anjonai, 7-kahehaliti kolaiterenai hikoa Iraexatyakalati Hanakota. Linho nimereha, iyoma, weroka xoaha. Ouro nomakere xalatahiyeha. <sup>7</sup> Hatyaoseta hatya 4-harenai Enore nokahakala haliya tyokiterenai konitare isa 7-tinhalitirise hatyo 7-hare anjonai ana. Tinhalitinaï ako Enore tyaota minitere xeharene tyaonita. (Kahehaliti xaokaka “Enore xeharene”, nita.) <sup>8</sup> Hatyaoseta Enore werokene niyatere ajimakotyaka Iraexatyakalati Hana. 7-kahehaliti 7-anjonae kolaitere maxawatyakaharetataiya waikohekoa xeta maisa xala hare hatyoako ijoita.

## 16

*Tinhalitirisenai Enore Xeharene Kakoare*

<sup>1</sup> Hatyaoseta nasema iraiti kinatyaxa Iraexatyakalati Hanakota: — Xiyane xehaihena tinhalitirisenai akotare Enore xeharene kakoare waikohekoa — nexa. <sup>2</sup> Nexa hoka hatya anjo xane ehaika tinhalitirise akore waikoa xeta hoka honotihaliti kahenehare kawero kaotyaka kirakahare feroxa kakoa kakaferoxatyakehenerenæ hiye, exahe exaimenekotyaka xema tyaohenerenæ hiye.

<sup>3</sup> Hatyaoseta hatya anjo xane ehaihilitiya tinhalitirise akotare one kaloxerexaiya. Hoka one timalaxa tyaona, motya kamati timalaxa tyaona hoka onexaiya tyaoniterenai tyotya waini.

<sup>4</sup> Hatyaoseta hatya anjo xane ehaihilitiya tinhalitirise akotare, hatyo kakoita hanamehena. Ehaikene tyotya onese, onexanae hoka timalaxa tyaonaha.

<sup>5</sup> Hatyaoseta nasemehena atyo, anjo onenai kaxaikotyasehare atyo nehena: — Ehekoreta hahekotita exe halitinai kakoa hoka exakere hamokahitene, Xekohaseti iniyalahare maomanehare. Hiso atyo toahiyere, kalikiniye xoaha. <sup>6</sup> Koxaka hikoamaniya tyaoniterenai, exahe hiraene xakaisaseharenai hoka aisaha. Timalati waiyeta enomanaha hoka hatyo hiyeta hisa timalati enomanaha terahene maheta. Nikare iniyalahare tyomaha kahare hoka ehekoreta nikare hamokahitene — nexa anjo onenai kaxaikotyasehare.

<sup>7</sup> Hatyaoseta nasema iraiti keratyakalati aposeta, nita: — Alitere aokita, Xekohaseti Enore maxaixahityakahare niyaterexe. Hahekohenerenæ, hisomehenerenæ xoaha atyo waiyexe, ehekorexe taita.

<sup>8</sup> Hatyaoseta hatya anjo ehaihitiya tinihalitirise akotare kamae heno. Hatyo kakoita 4-hena. Hatyaoseta kamae masakare watya tyaona hoka keralijita halitinai.

<sup>9</sup> Kakeralisakaha irikati kakoa hoka iniyalahare iraeha Enore, kahehaliti xekohasehare xaokaka. Maisa halakisahitaha iniyalahare háomaneha, exahe maisa aexakerityareha Enore.

<sup>10</sup> Hatyaoseta hatya anjo ehaihitiya tinihalitirise akoretare kirakahare nokahakalaose heno, hatyo kakoita 5-hena. Exoa enawenakala nali hoka makaliro tyaona, kawe naliyerenai hiye hoka tyalokehekoatyaha haniniseha. <sup>11</sup> Honotihaliti tyaonitere ihiyeha, exahe kawetere ihiyeha xoaha hiyeta, kahare iniyalahare iraeha Enore enokoa tyaonitere xaokaka. Xakore hoka maisa halakisareha iniyalahare háomaneha.

<sup>12</sup> Hatyaoseta hatya anjo ehaihitiya tinihalitirise akotare one Eufrates xaiya, hatyo kakoita 6-hena. Exoa exaiya hoka makala, xekohasetinai kamai nihikoane maniyata tyoiterenae waiye imahotyoaha maheta. <sup>13</sup> Hatyaoseta nowaiya hanama isekohaliti ewaxirahare, motya kali. Hali hikoa owi kakijiye kanasakota, hali hikoa kirakahare onexata hikoahenere kanasakota, hali hikoa iraiti xakaisasehare metalahare kanasakota. <sup>14</sup> Hatyonai atyo tihanare kaisereharenai, exahe xoalini hare maomakahare, mawaiyakahare hoka tyomahitaha halitinai tyakekoahene maheta. Xaneha ite waikohekoa ni-hatyaka tyaoniterenai xekohasenaiha ana, ahohisakoatyahene hoka Enore maxaix-ahityakahare niyaterexe haikoahaneheta ferakene hikoahena hoka xaisakakoati tyomaha maheta.

<sup>15</sup> — Xasemehena, kaiwarexe akeretaite nomaxatyahakihareta notyoheta waikohekoa xeta. Xiriharira xawenane kakoa, iniyalahare ximaomanehare xisaona maheta. Waiye kaiserehare atyo xala xamani kehexaikohare tyaonita hoka haima waiye mokita hoka maisa maimahiro tonita maheta haliti hisoakere koni hoka haiharefa maheta — nexa Xekohaseti Jesus.

<sup>16</sup> Hatyaoseta hatyo hanama tihanare ahohisakoatya xekohasetinai Armagedom aokahitere nali. Hatyaose atyo hebraico kaixarera.

<sup>17</sup> Hatyaoseta hatya anjo ehaihitiya tinihalitirise akotare hoholati koni, hatyo kakoita 7-hena. Ehaikene hoka iraitihena Iraexatyakalati Hanakota, Enore nokahakala aoseta: — Wahikoa imiyanaose! nexa kinatyaxa kawiyatya.

<sup>18</sup> Nexa hoka kahihiyenae, iraitinae, talolorenae, kalore xairirikoati harenae tyaona. Tyotya haiyanæ xahehare kahenehare. <sup>19</sup> Hatyaoseta kalokoare wenakalati ehekua hoka hanamakoa tyaona. Tyotya wenakalatinæ, hakiti tyaoniterenae kamawenekoaretyakeheta. Hoka Enore otya wenakalati kalokoare Babilônia hoka isa enomana haolone vinhoxa haitinihare akotare, tera enolone maheta. Exeharene nolone.

<sup>20</sup> Hatyaoseta onexa tyaonitere iyolirotinai maiyareheta, exahe tyairinai hoka maisa kawaiyakehitita. <sup>21</sup> Hatyaoseta one isemaxa kakoare halitinai hiye. Iyekolinai atyo kalore, halita iyeko atyo timena, 40-kilone atyo. Halitinæ kahare iniyalahare iraeha Enore tahi iyeko kakoare onehenere ihiyeha hiyeta, kahenehare kaiserehare hoka.

## 17

### *Enatyalo Kahenehalolo*

<sup>1</sup> Hatyaoseta hatya anjo 7-hare, 7-rise tinihalitirise kakoare konitare tyaona iraehena nokakoi: — Hisohena hoka enatyalo kahenehalolo mawenekoaretyakeheta nahotikisa homana, iniyalahare enómanenai nahalakoa. Hatyo wenakalati atyo tyaonita kahare onexanai haliya. <sup>2</sup> Haliti hotyalinai xekohasenai watyali hatyo ohirø kahaliki hoka iniyalahare tyomaha ekakoa kahare. Exahe waikohekoa tyaoniterenai teraha enolone vinhoxa hoka hekaha — nexa. (Enawenane iniyalahare xaokaka “Enolone vinhoxa”, nita.)

<sup>3</sup> Hatyaoseta Enore Nisekohare kahinaetya natyo hoka anjo xane nokakoi maharex-akiti. Nali wahikoa hoka nowaiya hatya ohirø. Tyokita kirakahare xotere heno. Kahare iraehekoatyati xairatyaoare tyaonita ihiye. Hatyo kirakahare atyo 7-kaiyehexe, 10-xotawere. <sup>4</sup> Hatyo ohirø nima atyo xotere, tihorere xoaha, karore taita. Ouro,

sehalise kaxaimanexe, pérola xoaha kakoa mokahalotyoita. Tokitere tinihalitirise ouro nomakere ako atyo kaise tyaonita kahiharetyakere, exahe ewaxirahare taita enenatalone hiyeta.<sup>5</sup> Ityaolikoa enexalo xairatyoare tyaonita, metahare, maisa komita waiyekehalaakere. Exakerexe enexalo: “Kalorexe Babilônia, tyotya enatyololonai nityo, exahe iniyalahare nomaseharenai nityo”.

<sup>6</sup> Hatyaoseta nowaiyehena atyo, hatyo ohiro atyo hekita. Enore wakaneharenai timalaxa, exahe Jesus niraene xema tyaohenerenae hoka wainihenerenae timalaxa tera hoka hekita. Nowaiyene hoka, — Kaxiyanira — nomi moka, nomawaiyehare kalore.

<sup>7</sup> Hatyaoseta anjo axa natyo: — Xoana hoka himawaiyehareta? Nawaiyekehalaatyaite exe ohiro tahi homana, exahe kirakahare 7-kaiyehexe 10-xotawere tahi tehitia. <sup>8</sup> Exe kirakahare hiyaiyehenere atyo kafaka maniya tyaonita ene hoka kalikini atyo maisa tyaohetere. Toloko kalorexe akota ite hikoaheta hoka kamawenekoaretyakeheta. Halitinai nexare maxairatyakahare tyaonitere hetati xowakiyata, kalikini kijiya ite Enore baberanexakoa waiyaha kirakahare hoka hakaharetyoaha. Hatyo kirakahare tyaonita ene hoka waini. Xakore hoka haxowakaite kaotyakehetehitiya — nexa anjo nohiye.

<sup>9</sup> — Exe akiti atyo waiyoliniti, irihaliniti niyahare, maisa mahowithare waiyoretyaka xini. Waiyira hasemehena niraini. 7-kaiyehiti atyo 7-tyairinai aimenekoita. Enatyololo nawenakala atyo 7-tyairi henose tyaonita. Exahe tehitia hoka 7-hare xekohasetinae aimenekoita. <sup>10</sup> 5-hare atyo koxaka waini, hoka hatya atyo kalini xekohaseti tyaonita. Hatya atyo maisa kaotyakehenere. Kaotyakaite hoka maisa waha tyaonita. <sup>11</sup> Hatyo kirakahare kafaka maniya tyaonita ene hoka kalikini atyo maisa tyaonehetere. Xakore atyoite hoka kasehetaite hoka 7-harenai hinaite tyaona hoka ehohisakoaneha ite 8-hareha. Hoka hatyo kirakahare atyoite kamawenekoaretyakeheta.

<sup>12</sup> — Etake 10-xotawati hiyaitere atyo aimenekoita 10-xekohasetinai. Kalikini atyo maisa xekohaseti tyaohenere. Hoka kirakahare ite kalorexe tyaona hoka iyateliti ite kaxekaka enomanaha hoka xekohaseti tyaohenaha kirakahare kakoa. Xakore hoka maisaite waha xini, “uma hora” taitaite tyaonaha. <sup>13</sup> Hatyo 10-hare xekohasetinai ite hakakoa ahekohenaha, haiyatereha kakoa kahinaetyaha taita kirakahare maheta. <sup>14</sup> Aisakakoahenahaité Kalanero Mokose kakoa hoka Kalanero Mokose ite jiyahaotyahene. Hiyaiya, hatyo atyo xekohasetinai Xekohase, kalorexenai Kalorexatira xoaha atyo hoka hahinaeharenai kakoite jiyahaotyahene. Ihinaeharenai atyo Enore aohenerenai haomana, exahe Enore aokitere akereta tyaohenerenai — nexa anjo nohiye.

<sup>15</sup> Hatyaoseta anjo nihitiya nohiye: — Onexanai hiyaiyehenere enatyololo tyaonitere nali atyo aimenekoita waikohekoia nihatyaka tyaoniterenai, tyotya haliti hotyalinai, kiyere, iyomere, haxako xakini iraeterenae xoaha. <sup>16</sup> Etake 10-xotawati hiyaitere tehitia atyo xekohasetinai hoka hatyonai, exahe kirakahare xoaha ite ehareha ohiro hiye hoka tyotya ite ixiyehalo iyehenahitaha enonita hoka maimahiro halakisahene. Nisahaite enete, exahe irikati kakoa ite mawenekoaretyahene. <sup>17</sup> Enore atyo emahiyaseha hiye exahekolaha moka, xoare xamani aokita hoka haxahekolita ahekotyaha maheta. Exahe tehitia hoka kirakahare ana haiyatereha isaha hoka kalorexe tyaona maheta, Enore niraene aokitere akereta kaotyakene kijiya. <sup>18</sup> Ohiro hiyaitere atyo aimenekoita wenakalati kalorexe. Tyotya waikohekoia xekohaseti tyaoniterenae wakatitere.

## 18

### Babilônia Mawenekoaretyaka

<sup>1</sup> Hatyo najikinita nowaiyehena atyo, hatya anjo exoahena enokoata, kinaterexe. Aokanatya, werokakoa moka waikohekoia hakakoare. <sup>2</sup> Exoa hoka kinatyaxa kawiyatya: — Wenakalati kalorexe Babilônia kamawenekoaretyakeheta. Kalikini atyo tihanare, isekohaliti ewaxirahare tyaonita enakoa, exahe xoalini hare kotehala kaiyalaharexe taita tyaonita hatyo wenakalatyaose. <sup>3</sup> Hiyaiya, isa haolone vinhoxa waikohekoia nihatyaka tyaoniterenai ana, exahe aiyatolotyoa exahitaha iniyalahare tyomaha maheta hatyo akereta. Xekohasetinai koxaka iniyalahare tyomaha hatyo ohiro kakoa. Exahe xiyealiti

betetyaseharenai kaoloxere, kaxiyeharexe tyagonaha enawenane ewaxirahare hiyeta — nexa.

<sup>4</sup> Hatyaoseta nasemehtiya hatya iraiti enokoata: — Xahikoahetehena hatyo wenakalatita, nokaxaikoniharenai, waiya aliya hoka iniyalahare xisoma tyomitere akereta hoka iniyalahareya xikaxomokaka ekakoa. <sup>5</sup> Hiyaiya, iniyalahare enómane atyo kahare, komita ene xane enokoa hikoa hoka Enore otyaxemaita iniyalahare enómanenaeha — nexa.

<sup>6</sup> — Iniyalahare tyoma kalore hoka maika hatyo nahalakoa iniyalahare kaxomokaka kalore hinamaki. Maika kakaisetyaka initinihare ako hinamaki enomana erati ijitere xomana akereta hoka tera hoka kehexene. <sup>7</sup> Ahinityalo aeroretyoawi aokowita ene, kehala tyaona aokowita xoaha. Maika hatyo nahalakoa makawatihalo tyaona, kalore amaikohalo. Hiyaiya, exakere iraeta: “Natyo atyo xekohasetinero, maisa atyo nowainianenero xini, maisaiya xoana heko nomakawatita”, nita. <sup>8</sup> Hatyo hiyetaite haferakenetaite kahehaliti, xamaikohaloti, nakiti harenaite kaoka enomana. Hatyaosetaite kakerahaotyaka irikati koni. Hiyaiya, Xekohaseti Enore emawenekoaretyasehare atyo kinatere kaiserehare — nexa anjo.

#### *Waikohekua Tyaoniterenae Tiyaha Ekawa*

<sup>9</sup> Kakerahaotyakehenaita hoka jimere ite, ‘Boxó’, nexa hikoahena ihiyeta hoka xekohasetinaite waiyahene hoka amaikohareha, tiyahenahaite ekawa. Koxaka iniyalahare tyomaha ekakoa, exahe kehala tyaonaha enawenakalakoa nali hoka. <sup>10</sup> Ekerene ite waiyaha hoka sekotaite wahakotyaha enomana, mairahitaha hakeralisakaha kakoa hoka. — Akairaki, kirakoane hisaona wenakalati Babilônia. Kalorexe, kinaterexe xoaha xakore hiso hoka haxerore hikamawenekoaretyakeheta. Haxerore, motya “uma hora” kakoa taita ene hikamawenekoaretyakeheta hománe iniyalahare hiyeta — nexahaite.

<sup>11</sup> Xiyehaliti betetyasenai tehitia ite amaikohare, tiyaha ekawa, maisa xala hare iyehetere ixiyehareha hoka. <sup>12</sup> Maisa xala hare iyehitita ouro, prata, sehalise kaxaimanexe, pérola harenai enonyahitaha. Maisa xala hare iyehitita linho waiyeharexe, imiti taose tihorere, seda harenai, exahe kalanero niyali nomakere xotere. Exahe atya taose waiyeharexe, aikoliti nomakere, atya taose karore hoka maisa xala harenai iyehitita enonyahitaha. Maisa xala hare iyehitita bronze, kamatihera, mármore harenai enonitaha. <sup>13</sup> Maisa xala hare iyehitita canela, airaxero, incenso, vinhoxa, koloteniti, trigohe, trigose, harenae enonyahitaha. Maisa xala hare iyehitita kalanero, bowi, kawalo karosa kakoita, wakaharenai, halitinai inisekohare kakoita enonyahitaha hoka hatyo hiyeta amaikohareha, tiyaha kalore.

<sup>14</sup> — Tyotya xoalini hare hawaiyetitreharenai kamawenekoaretyaka honita. Exahe tyotya xoalini hare hixiyeharenae waiyexe, karore harenai hoka, maisaito xoana xowakata hikaokihititene — nexa xiyehaliti betetyaseharenai irae wenakalati xaokaka.

<sup>15</sup> Kahare xiyehaliti betetyasenae kaoloxere tyaohenerenae hatyo wenakalati nali ite sekota tyaohena mairahitaha iniyalahare haxomokakaha ekakoa hiyeta. Kawisaha, tiyaha ite. <sup>16</sup> — Akairaki, kirakoane wenakalati kalorexe tyaoheta. Isoahitaha ene imiti waiyexe, linho waiyeharexe ako, imiti taose xotere, kalanero niyali nomakere xotere harenae ako. Mokaharetyoahitaha ene ouro, sehalise kaxaimanexe, pérola harenai kakoa. <sup>17</sup> Xakore hoka haxerore, motya “uma hora” kakoa taita meta tyotya. Xiyehaliti enoheno tyaonitere meta tyotya — nexahaite haosexa kakoa.

Tyotya kanowa kalorexe xekohasenae, tonatiyenae, kanowa hiye hakiterenae, onexa hakiterenae harenae wahakotyaha sekota. <sup>18</sup> Hatyaoseta waiyaha jimere wenakalati kiritere hoka kawiyatytaha: — Maisa xoana xowaka exakerehare wenakalati kawiyakere — nexaha. <sup>19</sup> Xawatyaha waikohese haseriha heno haxamaikoharene hiyeta. — Akairaki, kirakoane kalorexe wenakalati tyaona. Kalore ene kaoloxere tyaonahitaha hoka kanowa kalorexe kakoarenae tehitia kaoloxere tyaonita ihiyeta. Xakore hoka haxerore, motya “uma hora” kakoa taita kamawenekoaretyakeheta hoka tyotya meta ixiyehare — nexa tiyaha.

<sup>20</sup> Xihalaharehena, xiso enokoa tyaoniterenai, exahe Enore koamaniya tyaoniterenai, iraiti xakaisaseharenai, iraiti kakoarenae xoaha, wenakalati mawenekoaretyakeheta hiyeta. Hiyaiya, Enore atyo mawenekoaretene iniyalahare mohenere xiso hiyeta hoka katlikoaretya xiso.

<sup>21</sup> Hatyaoseta hatya anjo kinaterexe kolatya sehalì kalorexe, nakairati miyohityakala akerehare hoka xawatene onexa hoka nexa: — Exakere ite wenakalati kalokoare Babilônia kaxawatyaka kinatyaxa hoka maisaiya kawaiyakehitita. <sup>22</sup> Maisaiya xala hare aema-halikihitita harpa, flauta, koneta, harenae hoka kasemakehitita hatyo nali. Maisaiya xiyevaliti nomaseharenae kawaiyakihitita, maisaiya nakairati mehetyakala nemahare kasemakehitita hatyo nali. <sup>23</sup> Maisaite exaoseta xaokanatyakalati takoare tyaohitita hatyo nali, maisaite wenakakoati tyaohitita hoka kaiyanityohenere, kaiyanenehenolo hoka ihalaharehena hitita. Hinakoa xiyevaliti betetyasenae kinatere, waiyore xoaha hoka maoseratyaha haihoxalaha kakoa waikohekua nihatyaka tyaoniterenae — nexa.

<sup>24</sup> Hatyo wenakalatikoa nali kawaiyaka iraiti xakaisaseharenai timalaxa, exahe Enore koamaniya tyaoniterenai timalaxa, exahe tyotya kaxaisakehenerenai waikohekua timalaxa kawaiyaka Babilônia nali hoka hatyo hiyeta kamawenekoaretyakeheta.

## 19

<sup>1</sup> Hatyo najikinita nasema iraiti enokoa, motya hisoaka haliti ene iraeta: — Xaexakerehena Enore! Iyatheta, xaexakeretyati, iyateliti xoaha atyo Wenorexa anere. <sup>2</sup> Aliterexe, waiyexe taita atyo ahekoita hoka ehekore nikare mokita halitinai. Hiyaiya, hatyo atyo enatyalolo kahenehalore mawenekoaretya. Aiyalaharetita waikohekorennae nawenane, exahe ajita Enore xema maniya tyaoniterenae hoka — nexaha.

<sup>3</sup> Hatyaoseta kinatyaxa kawayahenahitiyaha: — Xaexakerehena Enore! Hiyaiya, kalorexe wenakalati kerehenere jimene atyo ite ainakoaiyeta mene.

<sup>4</sup> Hatyaoseta 24-hare inityohalitinai xekohasetinai, 4-harenae Enore nokahakala haliya tyaoniterenae xoaha exoaha hakaolise kakoa. Meholokoaha hoka awaiyetyaha Enore, ihalahareha hatyo okahakalatikoa tyokitere kakoa. — Há, nikare tehitia waokita. Maika Enore kakoa xihalaharehena — nexaha.

### Kalanero Mokose Kaiyanityohenere Hisahere Tahi

<sup>5</sup> Hatyaoseta iraitihena okahakalati nalita: — Xaexakerihena wEnorexa, xiso ewakaneharenai, kalorexe, wakaharenai harenai, tyotya xiso mairiterenai, hoka xihalaharehena ekakoa — nexa.

<sup>6</sup> Hatyaoseta nasema iraiti, motya kaharexe haliti niraene, wamolo kalorexe nemahare akereta, exahe onetalolo kinaterexe akereta: — Xaexakerehena Enore! Wenorexa atyo Xekohaseti maxaixahityakahare hoka kalini atyo kalorexe kaiserehare tyaonita, tyotya haliti hotyalinai Xekohase. <sup>7</sup> Maika wihalaharehena ekakoa hoka waexakeretene, tyotya xoalini hare enómane hiyeta. Hiyaiya, Kalanero Mokose exanityo aose hikoa hoka ityaonero memere tyaonita. <sup>8</sup> Kaxekaka enomana imiti miratere. Linho waiyexe werokita makaolatyaoanehare isoa maheta enako. Enore kaxaikoneharennae nómane waiyexe xaokaka “Linho waiyexe”, nita.

<sup>9</sup> Hatyaoseta anjo nexa nohiye: — Exe haxairahena: Waiye kaiserehare atyo kakak-aekeytakayakehenerenai Kalanero Mokose kaiyanitohenere ana — nexa.

Anjo nehitia: — Exenae atyo aliterexe Enore niraene.

<sup>10</sup> Hatyaoseta nexoa nokaolise kakoa, nameholokoa enomana nawaiyetene maheta xakore hoka nexa nohiye: — Awa atyo nikare hisaona. Xoana Enoreyatyat natyo hoka? Natyo atyo hihinai, exahe hihinaeharennae hinai, Jesus hotikihenere xema tyaohenerenae hinai atyo natyo. Maika Enore taita xawaiyetya — nexa.

Hiyaiya, Jesus hotikihenere xema iraiti xakaisaseharennae tyaona.

### Kawalo Iyomere Henore

<sup>11</sup> Hatyaoseta nowaiyehena atyo, enokoa atyo totakore tyaona hoka kawalo iyomere kaotyaka hoka hatya tyokita eheno. Enexare atyo Tyakekohatiye, Aliterexe

xoaha. Waiyexe taita ahekoita. Xalijinihatrena hoka kaxemerexe taita xalijinihatrena. <sup>12</sup> Exosenai werokita, irikati werokene akereta. Eseri hiye hoka seritihoko kahare tyaonita. Exaliti xairatyoare tyaonita ihiye hoka hawawa atyo waiyoreta ekakoa hoka hatyatere ana atyo maisa waiyekelakere. <sup>13</sup> Inimanase hoka timalanase. Enexare atyo Enore Niraene. <sup>14</sup> Enokoatare sorarenai kahare xanha exema, kawalo iyomere henorenai makere. Inimanaeha atyo linho waiyexe, iyomere taita. <sup>15</sup> Kawalo henore kanasakota kesekase ekawetyakahare hikoita, hatyo kakoa jiyahaotita tyotya haliti hotyalinai. Kamatiherakase kakoa ite exekohaseha tyaona. Tyahakehekoatyaita kakatyat maheta uvalinae kakatyakala akore. “Uvalinae kakatyakala”, nita Enore maxaexahityakahare niyaterexe xeharene xaokaka. <sup>16</sup> Inimanase, ehone xoaha hiye xairatyoare tyaonita: “Exe atyo xekohasetinai Xekohase, exahe kalorexenai Kalorexatira.”

<sup>17</sup> Hatyaoseta nowaiya hatya anjo, eno akiya tityoita kamae tyaonitere maniya hoka kinatyaxa kawiyatya kotehalanai eno akiya ainakoiterekarenai ana: — Xisohena, xahohisakoatyoahena hoka Enore tyaisa xiso hoka xifikatehare. <sup>18</sup> Xisohena hoka xanisa kalorexenai nete, sorare xekohasenai nete, esorarexanai nete xoaha xanisa, exahe kawalo, kawalo henorenai, tyotya halitinai nete xoaha xanisa, wakaharenai, mawakaharenai, kalorexenai, kiranexe xoaha nete xanisa — nexa anjo kawiyatya.

<sup>19</sup> Hatyaoseta nowaiyehena atyo, kirakahare, exahe waikohekoa nihatya tyaonitere-nai xekohasenai hasorarexanai kakoita xoaha hohisakoaha, aisakakoaha maheta kawalo heno tyokitere kakoa, esorarexanae kakoa. <sup>20</sup> Aisakakoaha hoka kirakahare kaxotokaka, exahe iraiti xakaisasehare metalahare xoaha. Hatyo atyo kirakahare xema tyaonita hoka tyoma maomakahare kahare ehaotita halitinai tyakekoahene maheta. Halitinae tyakekoha emaoserala hoka kirakahare feroxa kakoa kakaferoxatyakaha, exahe awaiyetyahitaha kirakahare xaimenekotyaka. Kaxotokakaha hoka hatyaoseta kaseta kaxawatyakaha irikati enxofre kakoa kiritere koni. <sup>21</sup> Tyotya esorarexanai kaxaisakaha, kesekase hikoitere kawalo iyomere henore kanasakotare kakoa. Kaxaisakaha hoka hatyaoseta kotehalanai, olaho harenai kaokaha, nisakatyaha hoka fakatehareha.

## 20

### 1.000 Terehokoane

<sup>1</sup> Hatyaoseta nowaiya hatya anjo exoahena enokoata. Toloko kaloakorexe majiholatyakala kahekoare, exahe xolatyakalati kamatiherahi timenere kahekoare. <sup>2</sup> Exoa hoka toka owi kakijiye, etake toahiyere owi kinohare, Tihanare, Ahalakoahaliti xoaha nexarexe. Otokene hoka olatene 1.000 terehokoane niyahare. <sup>3</sup> Otokene hoka xawatene toloko kaloakore hatekore ako hoka jihotene, jafixahiyatene, maisa aliyakere hikoaheta hoka maoserahitia maheta xini waikohekoa tyaoniterenai. 1.000 terehokoane ite miyatyaha hoka kamaxolatyakeheta xakore hoka maisa atyoite waha xini tyaoheta maxolatyoare.

### Tyakekohatiyena Kaseneheta

(1 Coríntios 15.12-23, 35-58; 2 Coríntios 4.14; 1 Tessalonicense 4.13-18)

<sup>4</sup> Hatyaoseta nowaiya okahakalatinæ. Haiyaharenæ tyokita enakoaha hoka hatyo halitinai kalorexenæ tyaonaha wakatyaha maheta halitinæ. Nowaiya tehitia halitinæ nisekohare. Jesus hotikihenere, exahe Enore niraine xakaihenahere hiyeta kaxaisakahenerenæ. Maisa atyo kirakahare koamaniya tyaonahitaha, exahe exaimenekotyaka xema hoka. Maisa tehitia kakaferoxatyakahitaha ityaolikoa, ewaotyaliha hiye, maisa awaiyetyahitene hoka. Hatyo halitinæ nisekoharenæ kasehetaha, hamilako isoahenahitiyaha hoka kalorexenæ tyaonaha haxawalita Cristo kakoa 1.000 terehokoane.

<sup>5</sup> Hatyo atyo hetatiye kamatinæ kaseneheta. Hoka haiyaharenæ wainiterekarenai atyo maisa kasehenahitita, heko 1.000 terehokoane miyane kijiya niyahare. <sup>6</sup> Halitiya kaseheteta hetati kasehetehenerenai kakoa hoka waiye kaiserehareya, maisaiya atyo hinamaki wainihenahitita, miyanitiye xowaka. Sacerdotenæ ite tyaonaha Enore ana, Cristo ana hoka kalorexenæ tyaohenaha ekakoa 1.000 terehokoane.

*Ahalakoahaliti Jiyahaotyaka*

<sup>7</sup> Hatyaoseta ite miyatya 1.000 terehokoane hoka Ahalakoahaliti ite kamalox-tyakeheta exolatyakaoseta <sup>8</sup> hoka xane ite maoserahitiya halitinai waikohetka nihatyaka tyaoniterenai, hatyonai atyo Gogue, Magogue xoaha nali. Ahohisakoatyahene xaisakakoati tyomaha maheta. Ahohisakoatyahene halitinai hoka hisoaka tyaona, kaiholohe hisoakere one kilili tyaonitere akereta. <sup>9</sup> Hatyaoseta exaoretyoaha waikohetka hoka xaneha Enore kaxaikoneharenai tyaonitere nali, wenakalati Enore awaiyetitere nali hoka exahiyahokotyahene. Aisahene maheta. Xakore hoka enokoata irikati exoa hoka mawenekoaretyahene. <sup>10</sup> Hatyaoseta maoserahanere Tihanare kaxawatyaka irikati enxofre kakoare kiritere koni. Kirakahare, iraiti xakaisasehare metalahare koxaka kaxawatyakehenere nali. Hatyo nalite haxawalita waolititaha menehenaha, ferakoa, makiya xoaha.

*Xaxalisati Miyanitiye*

(Atos 17.31-32)

<sup>11</sup> Hatyaoseta nowaiya okahakalati kalore, iyomere, hoka hatya tyokita ehen. Tyoka okahakalatiko hoka waikohe, enokoa xoaha maiyareheta enahalakoata, maisa kawaiyakihitita. <sup>12</sup> Nowaiya tehitia kamatinai. Tyotyaha kasehenahitaha, kalorex-enai, kiranexenai xoaha hoka okahakalati haliya tityoahitaha. Hatyaoseta baberanai kaxomerekaka. Hatya tehitia kaxomerekaka baberane waiyexe. Hatyaoseta halitinae nomanenai kakaixaretyaka baberakoata hoka tyomehenahere akereta kaxomokakaha.

*Kamatinae Atyoite Kaseheta*

(João 5.25-29; Atos 24.15; 26.8)

<sup>13</sup> Onexa wainihenerenai onexata kaseheta, exahe waikohetka wainihenerenai waikohetka kaseheta. Kamatinae nisekohare tyaonitere nali tyaoniterenae tehitia kaseheta. Tyotyaha wainihenerenai kaseheta hoka xane okahakalati haliya tityoah. Enómanenaiha kakaixaretyaka hatya, hatya xakini hoka tyomehenahere akereta kaxomokakaha. <sup>14</sup> Hatyaoseta kamatinai nisekohare tyaonitere akokatyah kaxawatyaka irikati enxofre kakoare kiritere koni. Hatyo irikati kalorexe kiritere nali wainiterenai atyo wainiha miyanitiye. Hatyo kokoita hinamaki wainiha. <sup>15</sup> Hoka maexareharenai tyaoniterenai baberane waiyexeko atyo kaxawatyaka irikati kalorexe kiritere koni.

## 21

*Waitare Enokoa, Waitare Waikohetka*

(Hebreus 11.10; 12.22-24; Apocalypse 7.15-17)

<sup>1</sup> Hatyaoseta nowaiya enokoa waitare, waikohetka waitare xoaha. Hoka hetatiye enokoa, waikohetka xoaha maiyareheta. One kaloxere hoka maiyareheta. <sup>2</sup> Nowaiya tehitia Wenakalati Waiyexe, Jerusalém Waitare, exoita enokoata. Enore nalita atyo tyoita, waiyehare, memere tyaonita. Kaiyaneneheno mokahalotyotolo xane ahalakoaitere hatyaone akereta waiyehare. <sup>3</sup> Hatyaoseta nasema iraiti okahakalati nalita: — Kalini atyo Enore nawenatyakala halitinai koni tyaona. Enore ite tyaona enekoniha hoka ekaxaikoneharenai ite tyaonaha. Enore ite tyaohena ehaliya hoka enEnorexaha ite tyaona. <sup>4</sup> Hoka tirixosetyahene ite enose xataliha nonitata. Maisaiya wainihenahitaha, amaikeharenahitaha, tiyahenahitaha, kawehitita ihiyeha. Hatyohare toahiyere-harenai atyo kamiyane — nexa kinatyaxa kawiyatya.

<sup>5</sup> Hatyaoseta okahakalatiko tyokitere nexa: — Kalikini atyo tyotyha xoalini hare waitare notyomehitiya — nexa. Hoka nexa tehitia: — Haxairahena niraini. Hiyaiya, exe niraihenere atyo aliterexe, exahe waiye tyakekotyaka — nexa.

<sup>6</sup> Hatyaoseta nehitia: — Tyotyha atyo kaomaka. Natyo atyo Alfa, Ômega xoaha. Natyo atyo Hetatiye, Miyanitiye xoaha. Xala xamaniya oinita hoka nisaiya enomana one maxaimanahareta, tera maheta one menanehalitiya hikoitere hiyeta.

<sup>7</sup> Xala xamanite jiyahao akatya hoka exakere ite namokene: Enenorexa ite notyaona hoka hatyo atyoite nityani tyaona.

*Iniyalahare Nomaseharenae Atyoite Maisa Xaneta Enore Nawenakala  
(1 Coríntios 6.9-10; Gálatas 5.19-21; Efésios 5.1-7; Colossenses 3.5-6)*

<sup>8</sup> — Hoka kaxonaseriyenae, matawatyarenai, iniyalahare awaiyetitereharenae, haliti fahrenae, ohiroarexenae, enatyololona, haholitaharexenae, enore metalahare maniya tyaonitereharenae, maoseratyahatiyena xoaha atyo ite kaxawatyaka irikati enxofre kakoare kiritere koni. Nikare ite hoka hatyo kakoita hinamaki wainilha.

*Waitare Jerusalém*

<sup>9</sup> Hatyaoseta 7-hare anjonai konitare, hatya anjo 7-rise tinihalitirise kahehaliti kakoare tyoa hoka irai nokakoi: — Hisohena hoka nahotikisa homana Kalanero Mokose tyaonero, exanityohenere maheta — nexa nohiye.

<sup>10</sup> Hatyaoseta Enore Nisekohare kahinaetya natyo hoka anjo kolatya natyo tyairi enoakiyere henose. Hoka hotikisa nomani Jerusalém, Wenakalati Waiyexe enokoata exoahititere, Enore nalitare, <sup>11</sup> weroka Enore werokene hiyeta. Sehalise kaxaimanexe jaspe akereta weroka, motya balaxoko niyomene exaihako kawaiyakita. <sup>12</sup> Talarehoko wahahare, kalore, talahokoita wenakalati. Ixisoakalanai atyo 12 hoka 12-hare anjo kaxaikotene. Xisoakalatinai hiye 12-hare nexare xairatyoare tyaonita, 12-hare Israel hotyalinai nexare. <sup>13</sup> Hanama xisoakalati kamai nihikoane maniya, nikare hanama xisoakalati one kaokane maniya, hanama xisoakalati tehitia kamai xisoane maniya, hanama xisoakalati tehitia tihalo kaokane maniya. <sup>14</sup> Talarehoko katyahe 12-sehali hoka hatyoheno talarehoko kaomaka hoka hatyonai hiye Kalanero Mokose niraene kakoarenae nexare xairatyoare tyaonita.

<sup>15</sup> Anjo iraehenere nokakoi atyo katyakaserere ouro nomakere, aimenekotya maheta wenakalati, talarehoko, xisoakalatinai xoaha maheta. <sup>16</sup> Wenakalati atyo 4-tonone, enowahahare atyo hakakoa itihoko kakoa. Hatyaoseta anjo aimenekotya wenakalati hoka 2.200-quilometro. Enowahahare, itihoko, enenoakiyene xoaha atyo hakakoa.

<sup>17</sup> Hatyaoseta anjo aimenekotya talarehoko nisakone hoka 64-metrone. Halitinai aimenekotitere akereta aimenekotya.

<sup>18</sup> Talarehoko atyo sehalii jaspe nomakere, hoka wenakalati atyo ouro taita, motya balaxoko niyomene exaihako kawaiyakita. <sup>19</sup> Wenakalati talahokola katyahe tyaonitere-nae atyo sehalii. Hawareharexe xakini kakoa xawaiyeharetyakere. Hetatiye atyo jaspe, ihiyetare safira, ihiyetare ágata, ihiyetare esmeralda, <sup>20</sup> ihiyetare sardônio, ihiyetare sárdio, ihiyetare crisólito, ihiyetare berilo, ihiyetare topázio, ihiyetare crisóraso, ihiyetare jacinto, ihiyetare ametista nomakere, eko xoaha. <sup>21</sup> Wenakalati jiholanai atyo 12, pérola nomakere atyo. Hatya jihore hiye atyo hatita pérola nomakere. Wenakalati nahotira atyo ouro nomakere, motya balaxoko niyomene exaihako kawaiyakita.

<sup>22</sup> Hatyo nali maisa nowaiyita Iraexatyakalati Hana. Xekohaseti Enore maxaix-ahityakahare niyaterexe atyo nali tyaonita Kalanero Mokose kakoa Iraexatyakalati Hana.

<sup>23</sup> Wenakalati naliya atyo maisa xoare maheta kamai, kaimare xoaha aokanaita. Enore werokene atyo aokanakoaitene. Kalanero Mokose atyo exaokanala. <sup>24</sup> Waikohekua tyaoniterenaite tyaohena exaokanala xema, exekohasenaiha ite kolahena waiyexe ha-wisekorenai nali xeta. <sup>25</sup> Ferakoata mene ite hoka maisaiya wenakalati xisoakalanai jihotyahitaha. Hatyo nali atyoite maisa makehitita. <sup>26</sup> Waikohekua tyaoniterenai ite kolatyaaha haxiyahare, exahe xoalini hare waiyexe hatyo wenakalati xeta.

<sup>27</sup> Maisaiya xoalini hare iniyalahare ijoita hatyo wenakalatikoa, aiyalaharetene ma-heta. Maisaiya xoalini hare ewaxirahare kahiharetyakere, exahe maoseratyahatiye ijoita. Kaxairatyakehenerenai nexare tyaonitere Kalanero Mokose baberanexa waiyex-ekoia taita ite isoa hatyo wenakalati.

*One Menanehalitiya*

<sup>1</sup> Anjo tehitiya hotikisa nomani one iyomaxa jiyaxitere, menanehaliti nonexa. Hikoita Enore, Kalanero Mokose xoaha nokahakala nalita. <sup>2</sup> Wenakalati nahotira nekesaho atyo one jiyaxita. Ali maniya, halakoia maniya xoaha menanehaliti natyaxa tyaonita hoka hamijini, hamijini xoaha kalita hoka xane hikoita haterehokoane. Ehananae atyo waikoheko nihatyaka tyaoniterenai wairatyakala. <sup>3</sup> Maisa atyo xoare hare iniyalahare aka hatyo wenakalati nali, hoka maisaiya atyo Enore emawenekoaretyaka aokita. Enore, Kalanero Mokose xoaha nokahakalaite hatyo wenakalatikoa nali tyaona hoka enomanerena ite awaiyetyahene. <sup>4</sup> Waiyahaite itiho, enexare ite ityaolikoaha xairatyoare tyaona. <sup>5</sup> Nali atyoite maisa makehitita, hoka maisaiya xoare maheta xaokanatyakalati, kamai xoaha xaokanala hoka aokahitaha. Xekohaseti Enore atyoite exaokanatyakalaha tyaohena. Kalorexe ite tyaohenaha matyotenehare.

*Jesus Tyoaneneheta*

<sup>6</sup> Hatyaoseta anjo iraihitiya nokakoi: — Exe iraitinae atyo aliterexe, hoka waiye tyakekotyaka. Xekohaseti Enore Haisekohare ijitere iraiti xakaisaseharenai ana, kalini axikatya anjo hawakaneharenai ana, hotikisa maheta enahetaha maniya kaotyakehenere. Maisaite waha xini — nexa anjo nohiye.

<sup>7</sup> — Xasemehena! nexa Jesus: — Notyoheta rotaite. Waiye kaiserehare atyo exe iraiti baberanekoa tyaonitere semehenerenai hoka tyakekohenerena — nexa.

<sup>8</sup> Natyo João nowaiya exahe nasema xoaha tyotya exe akiti. Nowaiyene, nasemene hoka hatyaoseta nexoa nokaolise kakoa, anjo hatyoharenai hotikihenere nomani nahaloka, nawaiyetene maheta.

<sup>9</sup> Xakore hoka nexa nohiye: — Awa atyo nikare hisaona. Hihinaehare atyo natyo, exahe hihinaeharenai hinaehare atyo natyo. Iraiti xakaisaseharenae, tyotya tyakekohenerena iraiti exairatyakahare tyaonitere exe baberakoa hinaehare atyo natyo. Maika hawaiyetya Enore taita — nexa. <sup>10</sup> — Awaira atyo hateroakihena exe babera iraiti kakoare. Hiyaiya, exeharenai kaotyakene okoi enaosehena. <sup>11</sup> Xala xamani iniyalahare tyomita hoka kotare iniyalahare tyoma, xala xamani kaiyaxa hoka kotare kaiyaxa. Xala xamani waiyexe hoka kotare waiyexe tyoma, xala xamani Enore aokitete akereta tyaonita hoka kotare nikare tyaona — nexa anjo nohiye.

<sup>12</sup> — Xasemehena! nexa Jesus: — Notyoheta rotaite. Nakolatya ite noxekani maheta xomana hoka aliyakere xamanite xisomita hoka hatyo nahalakoite xisomitere akereta nisa xomana — nexa. <sup>13</sup> — Natyo atyo Alfa, Ômega xoaha, Hetatiye, Miyanitiye xoaha. Tyotya xoalini hare nahitita atyo notyaonita, exahe imiyane xowakaite heko notyaonita — nexa Jesus.

<sup>14</sup> Waiye kaiserehare atyo haima tihehetehenerena. Kanakairahaite atyalí menanehaliti kate tare, exahe isoahaite xisoakalati ahota hoka xane Enore nawenakala nali kaokaha. <sup>15</sup> Xakore hoka iniyalahare nomaseharenai, haholitaharexenai, ohiroarexenai, enatyalolonai, haliti faharenai, enore metalahare xema tyaoniterenai, exahe tyotya maoseratyaliyeni atyoite haware kaxomokaka wenakalati nonitata.

<sup>16</sup> — Natyo Jesus atyo naxikatya anjo xiso tyakekohatiye hotyalinai ana xakai maheta exeharenai xihiye. Natyo atyo xekohaseti Davi jikolahare, natyo atyo xorese kaloliro ferakoahena aokanaitere — nexa.

<sup>17</sup> Isekohaliti Waiyexe, exahe Kalanero Mokose tyaonero xoaha nexa: — Hisohena! nexaha. Semehenerene tehitiya maika nexa: — Hisohena!

Xala xamani oinita hoka maika tya hoka tera one menanehalitiya maxaimanahareta.

*Imiyane*

<sup>18</sup> Natyo João atyo niraehena tyotya exe baberakoa naxairahenere iraiti semehenerena hiye: Xala xamaniya exehare haiyanae akiti aexahexatya hoka Enore tehitiyai aexahexatya kahehaliti xairatyoare tyaonitere enomana. <sup>19</sup> Xala xamaniya iyeheta haiy

akitinae iraiti baberakoata hoka Enoreya iyeheta enatyaliya menanehaliti natyaliya hiyeta, exahe maxisoaneteneya Wenakalati Waiyexe nali. Exeharenae xairatyoare tyaonita exe baberanekoa.

<sup>20</sup> Exeharenae tyotya waiyehenere nexa: — Alitere ite haxeroreta notyoheta!

Nikare tehitiya naokita. Hisohetehena, Xekohaseti Jesus!

<sup>21</sup> Maika waiye Xekohaseti Jesus kaxaiko xityotya, xoaha taita.